


Melĕ Mékōōlē



New Testament in Akoose (CM:bss:Akoose)

Mel̥ Mék̥ōl̥ē

New Testament in Akoose (CM:bss:Akoose)

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akoose

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files dated 29 Jan 2022
0143729f-907e-5098-b6ce-63b1629b8e48

Contents

Matyo	1
Makōse	59
Lukase	95
Jōne	154
Mbēltéd	196
Roma	251
1 Kōrinto	277
2 Kōrinto	302
Galesia	319
Efesus	328
Filipi	338
Kolose	345
1 Tēsalonika	351
2 Tēsalonika	357
1 Timoti	361
2 Timoti	369
Titus	374
Filemōn	378
Hibru	380
Jemse	399
1 Petro	406
2 Petro	413
1 Jōne	418
2 Jōne	425
3 Jōne	427
Jude	429
Mam nime mébenléd	432

Nkalanj ní bwám níme Yesue ngáne

Matyo

átélé

Ndibned ní kálag

Nkalanj ní bwám ngáne Matyo átélé ríhóbe nén bán Yesue mó adé Nsoode awé Dyöb dénhöbpé aá móólóm á nkòhsé te. Mbwiined ne mó dso Dyöb dénlönödte mekan níme ánhöbpé aá móöbelé ábè bad se' bsoð. Mmén nkalanj ní bwám rídé áyāl e nkòhsé rísyöāl.

Mekan níme Yesue áyágté'áá békábé mó áte metón métáan. (1) Abé áde bad bé nkamlen ní Dyöb bétáñgéné awóñ ne mbeltéd rímáb, mekan níme mébé rímáb ne mekan níme mébenléd ne bós (E'ped 5-7); (2) Nsón níme bembapere dyóm ne bébe bétáñgéné abel (Eped 10); (3) Ngáne nkamlen ní Dyöb rídí (Eped 13); (4) Ngáne mod átáñgéné Dyöb abele (Eped 18); (5) Mekan níme mébenlad ne ngáne ébēē áde Krístæ ápé (E'ped 24-25).

Nkabted ní kálag

Nchyaátén ne echyáa éche Yesu Krístæ 1.1-2.23

Nsón níme Jone, Ndusen 3.1-12

Edusen ne mekágsen níme Yesue 3.13-4.11

Nsón níme Yesue á mbwóg e Galilia 4.12-18.35

Nsón níme Yesue áde áhídté á Galilia ápe á Jerusalem 19.1-20.34

E'pun bé asóg ábe Yesue á Jerusalem ne benben ne á Jerusalem 21-27

Mpuu ne alúmed áde Sángrwéé alúmtáá bad yál áde amáá apuu 28.1-20

Betaa ábe Yesue

(Luk 3.23-38)

¹ Tóñgé e betaa ábe Yesu Krístæ edii nén. Yesue ambíd á nchyaátén níme kññ Dabide, Dabide mó-'e abíd á nchyaátén níme Abrahamé.*

² Abrahamé mó abédé sáá awé Aisige. Aisige-'e ambé sáá awé Jaköbe, Jaköbe-'e mó anchyáá Judaa bóöbe baányan.

³ Judaa bó mwaád Tamaa, bényhyāā Perese ne Zeraa. Perese ambé sáá awé Heseṛone, Heseṛone-'e sáá awé Rame.

⁴ Rame mó abédé sáá awé Aminadabe, Aminadabe-'e abédé sáá awé Nashone. Nashone ambé sáá awé Salmone.

⁵ Salmone bó mwaád, Rahabe bó-'áá bényhyāā Boase. Boase bó mwaád Rute bényhyāā Obede, Obede-'e ambé sáá awé Jese.

⁶ Jese ambé sáá awé kññ Dabide.

Kññ Dabide bó Uria mwaád béchyāā Solomone.

⁷ Solomone ambé sáá awé Rehoboame, Rehoboame-'e mó ambé sáá awé Abijaa, Abijaa ambé sáá awé Asaa.

⁸ Asaa ambé sáá awé Jehosafade, Jehosafade mó-'e ambé sáá awé Jorame, Jorame mó-'e ambé sáá awé Uzzia.

⁹ Uzzia abédé sáá awé Jotame, Jotame mó-'e ambé sáá awé Ahase. Ahase mó-'e ambé sáá awé Hezekaya.

¹⁰ Hezekaya-'e ambé sáá awé Manase. Manase-'e sáá awé Amose. Amose mó ambé sáá awé Josia.

¹¹ Josia móó anchyáá Jekonyase bóöbe baányan, á pónde eche bad bé alonj á Israel bēnkweé nzum bonj bad bé Babilon bēsweēn bó áwāb alonj.

* 1:1 Mmén nchoo rídé kóñne á kálag e Dyöb e'só 5.1, 6.9, 10.1, 11.10, 27.

12 Ade nén dēmmadté atóm, káŋ ne á pónde echē bēnchyaā'ē Yesue, betaa ábe Yesue bēbédé; Jekonyase móo ambé sáá awē Sheltyele, Sheltyele-ē mó ambé sáá awē Zerubabele.

13 Zerubabele ambé sáá awē Abutee, Abutee-ē sáá awē Elyakime. Elyakime-ē ambé sáá awē Azoo.

14 Azoo abédé sáá awē Zadoge, Zadoge mó-ē ambé sáá awē Akime, Akime-ē sáá awē Eliude.

15 Eliude mó ambé sáá awē Elizaa. Elizaa-ē sáá awē Matane. Matane mó-ē ambé sáá awē Jakobe.

16 Jakobe mó abédé sáá awē Josebe. Josebe mó awōŋ Maria awē anchyaá Yesue awē bēchágé bán Krístə.

17 Né-óó, nyongel ésyāāl, mbooted ne Abrahamē ápe wée Dabide, édé dyóm-é-nyongel ne éniin. Mbooted ne Dabide ápe pónde eche béswééné bad bé Israel á Babilon áde bēnkweé nzum, édé dyóm-é-nyongel ne éniin. Bootya pónde eche bēnswēnnē bad bé Israel á Babilon áde bēnkweé nzum, káŋne á pónde eche bēchyaá Yesue, áde dyóm-é-nyongel ne éniin.

Echyaá éche Yesue (Luk 2.1-7)

18 Echyaá éche Yesue ébédé nén: Maria, nyaá awē Yesue, ábédé ngon e mmwaád echē enkembíi mwenchóm. Bēnkíi mó mod nhóg awē bēchágé áá bán Josebe. Bon byánán Maria ásu á e'wóngé wée Josebe, ényínnēd nén bán adé nkgó á ngine e Edəəđəŋ éche Esáá.

19 Josebe-ē, ngáne ábédé mó mod a bwām, enkēndəŋgé Maria e'són awóged. Né-óó, abelé'áá mbonšén áchene mó á mesəəm-té.

20 A pónde echē nímé mewēmten médíi mó áte, ángel e Dyöb empií mó áde ánəŋgé nló. Angel ne enláá mó nén áá, "A-Joseb, mod á mbyaa níme Dabide, weebáá' Maria atéd née mmwaád awōŋ, áyale Edəəđəŋ éche Esáá chíó épíde mó bon abé nkgó.

21 Achyaā mwān a mwenchóm, échuu-ē mó đin wée Yesue† áyale nén móđhūd ábē bad á mbéb-te."

22 Mmén mésyāāl mēmbenléd álóned e'yale ábe Dyöb dénlōmēnnē nkal é'dəəđəŋ áá,

23 "Nyénəne', ngon e mmwaád echē eebíi mwenchóm ébē nkgó, echyaá-ē mwān a mwenchóm, bēchág-ke mó bán Emmanuele." Adén đin áde nén bán, "Dyöb áde ne sé."

24 Née Josebe ásyəŋgé áse, ambēl ngáne ángel enláā'ē mó. Antéd Maria née awē mmwaád.

25 Bon káŋ ne pónde eche Maria áchyaá mwān, Josebe enkēndyēnné mó. Josebe anchuu-ē ane mwān đin áá Yesue.

2

Beləŋ-bé-betintine bēbidé á akuu áhye dé abe Yesue edúbe

1 Bēnchyaā Yesue á dyad á Betlhem á mbwóg e Judeya á pónde eche Herode ábédé kəŋ. Bad behóg ábe beláá'áá betintine ábíi mekan, bēmbíd á akuu,* bépē á Jerusalem. 2 Ade bépédé á Jerusalem, bēnsədéd bánken, "Héé kəŋ e bad bé Israel, ane awē achyaádté wén ádíi? Sényiné tintine á akuu awē alúnte nēn bán achyaádté. Nē dáo ákásá bon sépag ábe mó edúbe."

† 1:21 Yesue: Adén đin ádíi bán Mod a e'sooson.

* 2:1 A akuu: Ped echē etondēe ábideé.

³ Adé kâñ Herode awógé nê, nê dèntagéd mós á mewêmtent-tê bwâmbwam. Dèntagéd mós, átägéd-te bad bé Jerusalem bésyāāl.

⁴ Herode anlād ábe heprisê bémbáá ne bemeléede bé mbéndé bésyāāl áte. Boñ ásedté bós aáken, “Héé Ane awé Dyōb Awógté, awé bésinéé, áchyāādté?”

⁵ Dósó békwénténé mós bán, “Béchyāā mós á dyad á Betlehem, á mbwóg e Judeya. Nkal é dāsdāñ antél aá,

⁶ ‘A-bad bé Betlehem á ndāob e Juda, ádēn dyad ádé dyad ahóg áde ádé etógnēn bwâmbwam átínté e myad mé alon á Juda.

Ayāle mod ábíd átínté echēn, awé ályāgēd ábēm bad bé alon á Israel.’ ”

⁷ Néé Herode awógé nê, anchélé ábē belāñ-bé-betintine á kun-tê, boñ ásedté bós nyaa e póndé echē tintine ne ámbídtē.

⁸ Dósó álómé bós á Betlehem aá, “Nyékag, nyétōñ anōn. Nzé nyényíné wéé ane mwān áchyāādté, nyétīm ámbíd nyéhye nyéláá mē, ábel boñ mémpē níke níbe mós edúbé.”

⁹ Ade bémbáá mekan níme kâñ álángé bós awóg, bēmbbootéd akē ámpē. Boñ áde bēnóné ámīn, bényīn melemlē mé tintine níme bényīnnē á akūu néé ákagké bós á sō. Ane tintine ankē kōōñ atyéem wéé ane mwān áchyāādté.

¹⁰ Anyīn áde bényíné ane tintine, bēnwōg menyīñge bwâmbwam.

¹¹ Bénsōl á ndáb-te. Néé bēsólé, bényīn ane mwān bós nyan, Maria. Bēmbwōg ane mwān mebóbón ábe mós edúbé. Bēmbíddé mēde áwed níme bēnwānlédté mós, bēbē-ε mós. Mmē mēde mébédé gól,† mōg mé e lod é bwām níme béchōgēé bán frankinsen‡ ne mía. §

¹² Néé bēmbáá ane mwān edúbé abē, bēmbwōgē esú áwāb alon, boñ bēmpōñ nzii empée, ayāle Dyōb dénlāā bós á nló-te aá bēetímé’ ámbíd wéé Herode.

Bēsōbnē Yesue, békééné mós á alon á Egipto

¹³ Ade ábē belāñ-bé-betintine bēmbáá akē, ángel e Dyōb enláá Josebe á nló-te aá, “Hidé áse, étéd anén mwān bós nyan ésobēn bós, étímen bós á Egipto. Nyédyc-ε áwed kōōñ né nlangé nyé mēé nyéhide, ayāle Herode álōm bad áhed anén mwān, áwúu mós.”

¹⁴ Mmē nkūu dēn, Josebe anhidé áse, atéd mwān bós nyan, ákēēn bós nkūu ne nkūu, átimnád bós á Egipto.

¹⁵ Áwed dósó bendycéé kōōñ ne póndé eche Herode áwédé. Nén dēmbēnléd álóned e yale ábe Dyōb dénlōmēnnē nkal é dāsdāñ aá, “Nlébpé awem Mwān mēé ábíd á alon á Egipto.”

Béwúu e ched é bán á Betlehem

¹⁶ Ade Herode ásoñténē nēn aá belāñ-bé-betintine bē bédógé mós, anlīñ bwâmbwam. Anlóm eche sánze á Betlehem ne ene ped e mbwóg esyāāl, aá béwúu bán bé baachóm bésyāāl ábe béepede mwē níláán. Ambēl nē átōñgen ne póndé eche belāñ-bé-betintine bēnlāā-ε mós bán bēnkōlē tintine awé anlóméd echyāá eche Yesue anyīn.

¹⁷ Nén dēmbēnléd álóned e yale ábe Dyōb dénlōmēnnē nkal é dāsdāñ Jeremayaa. Jeremayaa anhób aá,

¹⁸ “Bad bēnwōg e saad ne awé á ngīne ádé ábídé’áá á Rama, áde Rashede áchyēé’é ábe bán.

Bélénté’áá mós awé, boñ eékobpe aléned ayāle nēn bán bēmmad mós awé.”

Josebe, Maria, ne Yesue bēbídé á Egipto bētīm á Nazaret

¹⁹ Ámbíd e kwééd eche Herode, ángel e Dyōb empīí Josebe á nló-te áde ámbēē abé á Egipto, élāngē mós nēn aá,

† 2:11 Gól: Edii ekii eche edé nkun bwâmbwam eche élúmte bán Yesue ádé kâñ. ‡ 2:11

Frankinsen: Ábédé dyóg áde bēbagné Dyōb mēde. § 2:11 Mía: Mébédé dyóg áde bēnabnadté ndim.

20 “Téd awōn mmwaád bō mwān, nyétime ámbíd á alon á Israel. Herode ne ábē bad ábe béhéde’ áá ane mwān awūu bé máá awé.”

21 Née Josebe áwógé nē, anlad yāl, atéd Maria bō mwān, bōsbō bétlm ámbíd á alon á Israel.

22 Bon áde Josebe áwógé bán Achelausé atédé atii dé nkamlen áde sáá, kōn Herode á mbwóg e Judeya, ambán atim ámbíd áwed. Angel e Dyōb enhyé mó mekan mémpée aláa á nló-te. Nē dēmbēl, á mbwóg e Galilia dōo ántimmé áke.

23 Ankē alón á dyad ámbáá áhóg áde béchágé’ áá bán Nazaret. Nén dēmbēnléd álonéd é’yale ábe Dyōb dénlōmēnnē bekal bé’dáádān tōngene Yesue áá, “Abyēēn nēē Mod a Nazaret.”

3

Nkalan nime Jone, Ndušene

(Mak 1.1-8; Luk 3.1-18; Jon 1.19-28)

1 Etūn é pónde ámbíd enē, Jone, Ndušene ámbíd nkal é’dáádān a Dyōb. Akalé áá eyale é Dyōb á ehyānge á Judeya, álāngē bad áá,

2 “Nyéte de abel dé mbéb áyāle nén nkamlen ní Dyōb rídé benben.”

3 Jone mó abédé mod awé nkal é’dáádān Yesayaa áhóbé’ áá, áde ánhābpē áá, “Ehāngé ébide’ á ehyānge bán, ‘Nyébonšen epe éche Sāngwéé. Nyétii échē nzii.’”

4 Jone ahágé’ áá mbóté éche bébēnlé nyon éche ébídé á yāl e kamēl.* Awáá’ áá ngáá a ngōb e nyam. E’chuu ne bengóméé bōo bébédé ndyééd échē.

5 Bad bébídé-’ áá á Jerusalem, ne mīmíníí myad mé mbwóg e Judeya esyāal ne á melon mémpée nime mébédé á nkāg mé edīb é mbáá é Jodan, békag wée Jone.

6 Née bēmpaléé mīmāb mbéb áte, Jone ádušén bō á edīb é Jodan.

7 Bon áde Jone ányíné née Befarisia ne Besadusia béhúé’ é ábel bon ádušen bō, anláá bō áá, “Píí é nyā chēn! Nzéé múmó álāngé nyé áá nkáásé ní Dyōb níhúé’ bon aléb-pe nyé áá nyékúme abāngé?”

8 Nyéke nyébele mam nime mēlūmēd nén bán nyētēdté áden abé dé mbéb.

9 Nyéewém tán nén bán nzé nyēhóbé bán, nyédé bán ábe Abrahamē, nyéekudté nkōgsen ní Dyōb. Bon níláa nyé nén mēē, Dyōb áhele ábenléd mīmén meláá átmēd mó bán ábe Abrahamē.

10 Bōob-pōo ehón é máá anaa á nkan ní mel. Né-ōó, bwel ké é’ héé ábe béēchyāā’ e’pum é’ bwām, békwel bō bébwēm-me bō á muú-te.

11 Ndušan nyé bōob ne mendīb álūmed nén bán nyēhārléné áden abé dé mbéb. Bon mod ampée ahúé’, awé atómé me. Meékwognedéé ké ápém nime metámbé. Ádušén nyé ne Edáádān éche Esáá, ádušén-ne nyé ne muú.

12 Awánlé échē epeben á ekáá, ábel nén, ápeb nime menyán ámín. Nzé amadé, álad mbum é bwām áte, ákōo chó. Bon álad e’páá, ahyáád bō á ebonde é muú éche éēdīmē’.”

Béduséné Yesue

(Mak 1.9-11; Luk 3.21-22)

13 Bōob-pōo, Yesue ámbíd á mbwóg e Galilia, áke wée Jone á edīb é Jodan ábel nén Jone ádušen mó.

14 Bon Jone anwanén mó mewēmten ahānlen, áhōbē nén áá, “Née édíí bán wē-éé wembé edusan me, chán étímé abé éche wewe éhyagké áwēm wéé ndusen wē?”

15 Bon Yesue ankwentén mó áá, “Mwé ébē nē bōob ábel nén débel mam mésyāal bwām ngāne Dyōb áhédeé.” Né-ōó, Jone ankwentén mó adusen.

* 3:4 Kamēl: Edii nyam échē edé née nyag échē bébenladté á ehyānge ápém nted.

16 Melemlen mé pónde níme Jone amáá Yesue adusen, Yesue ansyáá á mendib-te. Dóo ngob e dyöb énédnédé, bon anyíne née Edáádəŋ é Dyöb ébíde ádyöb ésudé ásé née éläs, étyéem-me mó á nló mín. 17 Ehób chós-é ámpé ébíde ádyöb nén, “Awem Mwän a nlem nén, awógte me menyinge bwámbwam.”

4

Satane akagé Yesue (Mak 1.12-13; Luk 4.1-13)

1 Ambid e pónde, Edáádəŋ é Dyöb éntimén Yesue á ehyánge ábel nén Satane ákəg mó.

2 Yesue andid yäl nzaa á mekáne-té móom mé e'pun méniin. Ambid e ene pónde nzaa ewagé'áá mó.

3 Dóo Satane ápedé bon álanđe mó aá, “Nzé We-éé edé Mwän a Dyöb, kamlen nímén meláá métim e'wele.”

4 Bon Yesue antimén mó aá, “Eténlédé á kálag e Dyöb nén bán, ‘Saké ndyééd chəmpən edide moonyon á alongé. Bon eyale téé éche Dyöb áhóbé, chós édíde moonyon á alongé.’”

5 Dóo Satane ákééné Yesue á Jerusalem, dyad áde ásáá bon átyēemān mó á nzoŋge e Ndáb-e-Dyöb mín,

6 álanđe mó aá, “Nzé we-éé edé Mwän a Dyöb, éheb á bwéle-mín hén éhún á ndəəb, áyale eténlédé á kálag e Dyöb nén bán, ‘Dyöb dékamlen éche ángel ášáb we, épēm-me we ámín ábel weébōmē ekuu á aláá.’”

7 Yesue-é antimén mó aá, “Bon kálag e Dyöb ehóbé ámpé nén aá, ‘Weekəgē Səŋgwéé ádon Dyöb áte.’”

8 Satane antéd Yesue ámpé, búmō bətyéem á mbəod mín, bon álūmté mó melon mé nkōŋsé mésyāäl ne nhən nısyāäl níme ídē áwəd-te.

9 Dóo álanđe mó aá, “Měbē we ábén bwēm é'syāäl nzé ebwógké me mebóbón bon ébāg-ke me edúbé.”

10 Dóo Yesue álanđe mó aá, “Syáá me á did-te, a-Satan! Eténlédé nén bán, ‘Ebwógke’ Səŋgwéé ádon Dyöb mebóbón, ébage-é mó edúbé. Mwənpən-naá étəŋgéné abele.’”

11 Né-ós, Satane antedé Yesue, áké. Ángel émpě, éwōŋgén Yesue.

Yesue abootédé níme nsón á Galilia (Mak 1.14-15; Luk 4.14-15)

12 Ene pónde bənhē Jone, Nduzene á mbwəg. Ade Yesue áwógé nē, antím ámbid á mbwóg e Galilia.

13 Anhidé á dyad á Nazaret, áke ádyēē á dyad á Kapenahum. Kapenahum abédé á nkəg mé edib-é-nzab é Galilia, á abwóg á hōm á túmbé e Zebulon ne e Naftali.

14 Yesue anké á Kapenahum áloned mekan níme nkal é'dəádəŋ Yesayaa ánhöbpé aá,

15 “A-mbwóg e Zebulon, a-mbwóg e Naftali, ntimned ne edib é nkwě, á múde mé edib ní Jodan, Galilia mbwóg eché bad ábe béesě bad bé Israel bədyé'é.

16 Bad ábe bəbéde á ehíntén-té békúde e'nyinən bé ekide; Bad ábe bəbéde á nsəl ní son békúde e'sooson.”

17 Bootya pónde eché Yesue ánkéé á Galilia ambootéd eyale é Dyöb akal áhəbē nén aá, “Nyéhəŋlən abé dé mbéb, áyale nkamlen ní Dyöb ídē bənben.”

Yesue apwədə bembapεε bé'so

(Mak 1.16-20; Luk 5.1-11)

¹⁸ Epun ehóg Yesue akagé'áá á nkin mé edib-é-nzab é Galilia. Annyín bán bé baachóm bébe; Simone awé béchágé'áá bán Petro, bó mwānyan Andreyá néε bébwéméé mbínzé. Bébédeε bekóh-bé-súu.

¹⁹ Dóo álángeé bó aá “Nyéhíde me. Ngáne nyékóbeé súu bəəb, meéyāgēd nyé ngáne nyétēdtē bad nlém á abum áhíd me.”

²⁰ Abwōg-ábwōg bēntēdē échab mbínzé, béhídē-'ε mós.

²¹ Néε bésídtē á'so, Yesue annyín bán bé baachóm bémpēε bébe; Jemse bó mwānyan Jone, bán ábe Zebēdie. Bóəbe sáá bémbe á bōle-tē, bébwémé'áá échab mbínzé. Hē dóo Yesue áchēnléé bó bad bébe aá béhíde mós.

²² Abwōg-ábwōg bēntēdē sáá ne bōle, béhídē-'ε Yesue.

Yesue ayágtē'áá, áchōntē-'ε bad

(Luk 6.17-19)

²³ Yesue akagé'áá myad mésyāāl á alon á Galilia ayāgtē eyale é Dyōb á ndáb é mekáne, ákalé-'ε nkalan mí bwám mé nkamlen ní Dyōb. Achōntē'áá bad bé nkole bésyāāl ne nyaa e nkole téé echē émbē áfíntē echáb.

²⁴ Né-óo mekan míme Yesue ábélé'áá nwógnádtáá á mbwóg e Siria esyāāl. Nē dēnkān bad bépéne'áá bad bé nkole bésyāāl áwē. Bépéne'áá bad áwē ábe békónlé'áá nkole ne mewε nyaa ne nyaa. Bad ábe e'dəədan bé mbēb bémbeé áte, bad ábe béhúne ekikíd, ne bad ábe bēwédé eped, Yesue áchōntē ábē bad bésyāāl.

²⁵ Nē dēnkān, ndun e mod ehíde'áá Yesue. Bad bēbídē'áá melon bootya á Galilia ne mbwóg e Myad Dyóm, Jerusalem, Judeya, ne ped echē edé á múde mé edib é Jodan míminíí.

5

Yesue ayágtē bad á ekone mín

¹ Ade Yesue ányíné ene ndun e mod, anchágé é ekone mín, ádyēē ásē. Ahed-táá ábē bembapεε bétáné mós

² boŋ ábootéd bó ayáged, áhōbē aá,

³ “Nnam mbē ne bad ábe bédé atóg á edəədan-tē áyāle bédé ásē e nkamlen mí mín.

⁴ Nnam ne bad ábe bélebe', áyāle Dyōb déwōgēd bó menyinge ámpē.

⁵ Nnam ne bad ábe bépwítédé, áyāle nkōhsé n̄syāāl mébē nímāb.

⁶ Nnam mbē ne bad ábe bédé nzaa ne pid ábel mam míme Dyōb áhedéé aá mébenled, áyāle Dyōb dékōdéd bó.

⁷ Nnam ne bad ábe bēwóge bad bémpeε ngol, áyāle Dyōb dōmpē déwōg bó ngol.

⁸ Nnam ne bad ábe békénlé nlém á abum, áyāle bényín Dyōb.

⁹ Nnam ne bad ábe békóme nsaŋ, áyāle Dyōb déchəg bó ábē bán.

¹⁰ Nnam ne bad ábe békude metake áyāle bébeleé mam míme Dyōb áhedéé. Bédé ásē e nkamlen mí mín.

¹¹ Nnam mbē ne nyé ábe bad bésyāá'ε, nyé ábe bétagteé, bēbānē nyé e'bébtéd é' mam áyāl, bēbídē-'ε nyé mbōŋ é metóm áyāl, á dín ádēm.

¹² Nyéwóge bwám, nyébé-'ε menyinge áyāle nsábe míme nyékudtē ádyōb níchábé ámin. Nén dóo bad bétágtē'áá bekal bē'dəədan bé' bəəd.

Nkwē míme mbódé e'nyin, ne etrukān éche békōngé

(Mak 9.50; Luk 14.34-35)

¹³ “Nyédé etógnén á alongé á bad bé nkōhsé ngáne nkwē nídí etógnén áyāle ndyééd. Boŋ nzé nkwē mbódé alan chán béhele-se bényínéd mós ámpē?

Méesaá dyam dé abelen ámpē. Né-óó, apim dóó bépiméé, bad békəgtáád mō ámīn.

¹⁴ Nyéé nyédé nēngáne etrukánj álúmed bad bé nkōjsé bésyāāl nzii e Dyōb. Dyad áde álōjnédé á ekone mīn déesəməé.

¹⁵ Mod eemāā-'aá etrukánj achod se ákōō chō á ebwəg-sé, boŋ abelé ákēlē chō ámīn, ábel nēn ényīnte kénzée awē adé á ndáb-te ekīde.

¹⁶ Nyémpē nyépené', melemlem néé etrukánj. Nzé bad bényíné nsōn ní bwām nīme nyébeleé, bēken Dyōb, awēn Titée awē adé ámīn.

Ayáged áde Yesue t̄ngene mbéndé

¹⁷ "Nyéewémtán nēn bán mpedé á nkōjsé ábóded mbéndé éche Moséé ne mekan nīme bekal bé'dəədəŋ bəyágté nyé. Meépedéé ábóded mō, boŋ mpedé álóned mō.

¹⁸ Ne mbále nlánge nyé nēn meé, kóŋj ne á asóg dé nkoŋ ní sé ne mī mín, ké mwāmpīn mé eyale nhóg awē atēnlédé á mbéndé e Dyōb eéhídtéé ásē kóŋj né mésyāāl mélóné.*

¹⁹ Né-óó, kénzée awē abóó mbéndé póg átínté éché mbéndé é Dyōb, ké ene eché bəwémténé bán eesaa etógnén, áyāgté-'e bad bəmpēe aá bēbel melemlem, ene ndīn e mod ébē ndimtene átínté e bad ábe bédé ásē e nkamlēn ní mín. Boŋ kénzée awē abele ngáne mbéndé éhóbé, áyāgté-'e bad bəmpēe ábel melemlem, ábē etógnén bwāmbwam átínté e bad ábe bédé ásē e nkamlēn ní mín.

²⁰ Né-óó, nlánge nyé nēn meé, ésebán abele á Dyōb ádēn átómé áde Befarisia ne bemeléede bé mbéndé, né nyémpē nyéesónlé á nkamlēn ní mín mbéd."

Ayáged áde Yesue t̄ngene melingá

(Luk 12.57-59)

²¹ Yesue ambád ahób aá, "Nyéwógé nēn bán bēnlāā bad bé' bəód bán, 'Mod eewúé mod. Kénzée awē awúú mod, bétánjéné mō akáad.'

²² Boŋ nlánge nyé nēn meé, kénzée awē alljné[†] mwányan bétánjéné mō akáad. Kénzée awē ásyāŋ mwányan bēpēén mō á kóte e bad bémbaá békáád mō. Kénzée-'e awē áchəg mwányan aá, 'Edimdim é chōm chén', bēhele bəbwēm mō á dū-á-muú.

²³ Né-óó, nzé ekag á menyán mé mendé áke dé abe Dyōb mendé, boŋ ekámtné nēn wēé nyé mod nyéwánléné kəkəó,

²⁴ ébānē nīmōŋ mendé ásē á'sō é' menyán mé mendé. Esébe éke ébēl nsan ne ane mod boŋ étīm ámbíd éke ébē mendé.

²⁵ Nzé mod ahede wē áke dé asómēn á kóte, bēl kóŋj nyúmō nyépe á nchemten byánān nyéēpé á kóte. Esébe nē, ahelese asómēn wē á kóte. Kóte-'e ébēé wē á mekáá mé plúse, plúse chō-'e éhē wē á mbwəg.

²⁶ Ne mbále, nlánge wē meé, weéhēlē-sē ebíd á ndáb e mbwəg-tē wē kóŋj né etwedé ádōŋ alúm ásyāāl.

Ayáged áde Yesue t̄ngene akáb dé mesón

²⁷ "Nyéwógé ngáne bēhóbé nēn bán, 'Nyéekábé mesón á ndáb e'wóngé.'

²⁸ Boŋ nlánge nyé meé, kénzée awē anóné mmwáád boŋ awémtén aá né mōnnaŋjéd mō, amaa asón akáb ne ane mmwáád áwe nlém-té.

²⁹ Nzé ádōŋ dīd ábelte wē mbéb, ehúd dō, épim. Edé mboŋ ábód dō, tómaa bō ábwēm echonj yāl esyāál á dū-á-muú.

³⁰ Melemlem nē, nzé échonj ekáá ébelte wē mbéb, esél chō, épim chō. Edé mboŋ ábód chō tómaa bō ábwēm echonj yāl esyāál á dū-á-muú.

* **5:18** Né mésyāāl mélóné káa áde ayáge ásyāāl alóné. † **5:22** Kénzée awē alljné; donje á kálag áwóó kénzée awē alit ngēn.

Ayáged áde Yesue tâηgene abóo-dé-e'wóngé
(Mat 19.9; Mak 10.11-12; Luk 16.18)

³¹ “Kálag e Dyöb ehóbé ámpé nén, ‘Kénzée awé anané mwaád á e'wóngé atáηgéné ábe mó apab áde álúmté nén bán anané mó á e'wóngé.’

³² Boη nláηge nyé nén meé, nzé mod anané mwaád á e'wóngé ésebán ane mmwaád akábé asón, boη ane mmwaád akii mod ampée awón, né nchóm awé anané mó á e'wóngé mó atúmté mó mmwaád awé akábe' mesón. Kénzée-é awé awóó mmwaád awé bénané á e'wóngé né mómpé akábé asón.

Ayáged áde Yesue tâηgene amwé dé melé

³³ “Nyéwóge nén bán bénlāā bad bé' bōóó bán, ‘Mod eemwág melé ngên, boη nzé mod amwédé melé atáηgéné ábēl dyam áde ámwééné melé á'sō é Dyöb.’

³⁴ Boη nláηge nyé nén meé, nyéemwág melé ké mehóg. Nyéemwág melé á đin dé nkamlen mí mín, áyāle áhed dōó Dyöb áwóó e'dii bé nkamlen.

³⁵ Nyéemwág-ke á đin dé nkōηsé, áyāle áhed dōó Dyöb ásumé mekuu. Nyéēbenlād-te ké đin á dyad á Jerusalem, áyāle áđii dyad áde kāη embáá.

³⁶ Nyéemwág melé ké á đin dé nló nímēn, áyāle nyéēhēlēē ké mbum e esid póg ahāηlen áwēn nló, ápúbed ké'ε áhined chó.

³⁷ Boη nzé ehóbé wéé móbele dyam, ehób wéé, ‘Ée, mēbel dō.’ Ké-ε wéé, ‘Aáy, méebēnlé.’ Kéchéé éche ébádé áhed né ébíde wéé Satane.

Ayáged áde Yesue tâηgene akun-á-yǎl
(Luk 6.29-30)

³⁸ “Nyéwóge ngáne béhóbé nén bán, ‘Nzé mod atúbé mod đid, bétúb mómpé đid. Nzé mod ahúdé-ε mod ason, béhúd mómpé ason.’

³⁹ Boη nláηge nyé nén meé, nzé mod abelé wε mbéb, éched yǎl. Nzé mod abómé wε abén á akag ahóg, ékunnéd mó áđiníi ámpé.

⁴⁰ Nzé mod ahede wε asómen á kóte ákobēn wε nímōη nkobe, ébag mó kááη ne echorj súde.

⁴¹ Nzé mod anyágté wε aá ékeen mó máyl mehóg, ékéēn mó máyl mébe.

⁴² Kénzée awé achómé wε chōm, beé mó. Nzé mod ahóbé-ε aá, ébál mó chōm éche éwóó, ebál mó.

Ayáged áde Yesue tâηgene bad bé ekōyi
(Luk 6.27-28, 32-36)

⁴³ “Nyéwóge ngáne béhóbé bán, ‘Edāη mwānyon, ékōō-ε mod awé akōó wε.’

⁴⁴ Boη nláηge nyé nén meé, nyédāη bad ábe békóó nyé, nyékānnad-te ábe bétagte nyé.

⁴⁵ Nzé nyēbelé nē, né nyēēbē bán ábe Titée awēn awé adé ámín. Alóme' enyen ne mbúú wéé bad bé mbéb ne bé bwám nyaa póg.

⁴⁶ Nzé edáá bad ábe bédáá wε bēnpen, nē déepiinédte wε nsábe ké nhóg. Kááηne besaad-bé-tááε bómpé bébele melemlen.

⁴⁷ Nzé elente' ábōη bad bēnpen né ebele melemlen ngáne kénzée ampée ábeleé. Kááηne bad ábe béesē bad bé Israel bébele nē.

⁴⁸ Né-óó, mbeltéd nímēn rítáηgéné née rityéémé bwám, nēηgáne mbeltéd míme awēn Titée awé adé ámín.

6

Ayáged áde Yesue tâηgene áwóηgen bad

¹ “Nyétéd pónđé! Nyéēbelé nsón ní Dyöb ábel boη bad bényín nyé. Nzé nyébele nē, né nyéekudté nsábe wéé awēn Titée awé adé á nkamlen mí mín.

2 “Né-óó, nzé ebage mod chöm éche átógnéné, weékūmē nkāḡ nēḡgāne bad ábe bédoge yāl. Békume nkāḡ á ndáb é mekáne ne á dyad-tē wée bad bédíí, ábel boḡ bényín bó. Ne mbále nlāḡge nyé meé, bémáá nímāb nsábe rísyāāl akud.

3 Boḡ nzé ebage mod chöm éche átógnéné, weébelē-se ké awoḡ wēn awē étómténé adəḡ abíí.

4 Nē débēl mod ké nhōḡ éebíí'é chöm éche ébágé mó. Dyōb, awoḡ Titée awē anyíne mam níme mébenled á e'koḡnéd-te mōssábē wε.

Ayáged áde Yesuε tāḡgene mekáne

(Luk 11.2-4)

5 “Nzé nyékanne', nyéekánne' nées bedog-badé, ábe nzé békánne' bédəə atyéem á ndáb é mekáne ne á mbom, ábel boḡ bad bényín bó. Ne mbále nlāḡge nyé nēn meé, bémáá nímāb nsábe rísyāāl akud.

6 Boḡ pen, nzé mod akánne', asól áwē toḡ-tē, ádíb ekob, boḡ akānnē wée eche sāḡ Dyōbe awē mod éēnyīnē. Ene pónde awōḡ Titée awē anyíne' mam níme méde á e'koḡnéd-te ásbē wε.

7 Nzé nyékanne', nyéebádnán e'yale mbád ne mbád, ngáne bad ábe béesē bad bé Israel bébelé. Bébelé bēwēmtān bán Dyōb déwōḡ bó mekáne áyāle bébúdé e'yale áte.

8 Nyéebág nées bó, áyāle Dyōb, awēn Titée, amaá abíí chöm éche nyétógnéné byánán nyēsédéd mó.

9 Né-óó, enén nyaa e mekáne chōó nyétāḡgnéné akáne, Dyōb, Titée awēd, awē adé ámīn, edúbé ébē ne ádoḡ díḡ.

10 Mmōḡ nkamlen ríhye rítéd etál.

Bad bé nkōḡsé bébel mekan níme éhédeé, ngáne ébenlaadté ámīn.

11 Bag sé echəd ndyéed e epun e bīn e' chii.*

12 Lagsén sé níməd mbéb, ngáne sémpē sélāḡsanné mod téé awē abelé sé mbéb.

13 Weémwāḡ-se sehún á mekáḡsen-tē, boḡ húd sé á mekáá mé Satan.†

14 Nzé nyélagsan bad mewusé níme bébenlé nyé, né Dyōb Titée awēn awē áde ámīn mōmpē ālāḡsén nyé.

15 Boḡ nzé nyéélagsán bad, né ké Dyōb awēn Titée éelāḡsénne nyé.

Ayáged áde Yesuε

tāḡgene adíd á yāl nzaa á mekáne-tē

16 “Nzé edide yāl nzaa á mekáne-tē, weésudné' ngáne bedog-badé bébelé. Béchémtē' e'só á nló ábel boḡ bad béchem bán bédide yāl nzaa á mekáne-tē. Ne mbále, nlāḡge nyé nēn meé bémáá nímāb nsábe rísyāāl akud.

17 Boḡ nzé edide yāl nzaa á mekáne-tē, éwōbē e'só, ésedē-'e nló áte.

18 Bēl nē, ábel boḡ bad béchemé bán edide yāl nzaa á mekáne-tē, étóméé awōḡ Titée awē mod éēnyīnē. Anyíne' mam níme méde á e'koḡnéd-te, mó-'aa ásbē wε.

Ayáged áde Yesuε

tāḡgene awōḡ á bwēm

(Luk 12.33-34)

19 “Nyéekoḡnád yāl nhon á nkōḡsé wēn, wée síi ne ngāḡ bébēbēdtē, bechīb-pe ámpē bébóó ndáb, béchīb.

* 6:11 Bag sé ndyéed e epun e bīn e' chii káa ndyéed e epun e bīn e' chān. † 6:13 Doḡḡe á kálag dé'so ábádé bán Nkamlen, ngīne ne ehúme bédíí abōḡ á ngīndé ne á ngīndé.

20 Boŋ nyékoo mímēn nhōn wée sii ne ngag béebébédté, bechíib-pe ámpē béebóó'é ndáb se béchíib.

21 Nyébíí bán wée nhōn mbágbkē mod, áhed dōo nlém-me mbágbkē mó.

22 “Díd dōo áde ngáne etrukán é yál e mod. Nzé díd ákénlé wē áte, echoŋ yál esyáál chómpē ebélé ekélé.

23 Nzé déekēnle, yál chómpē ēlōn wē áte ne ehintén. Né-óó, nzé chōm éche ényínte nyé ekíde étímé abé chōm éche étímté nyé á ehintén-té, né échē ehintén échē nyébēē áte étómtēn ngíne abé.

24 “Modmod eéhēlē-se abé mbáledē á bewōŋ bébe. Alúmēd nhóg edaŋge tómaa aníní, ké'ē áfímēn nhóg, abán-'ē aníní áyál. Weéhēlē-se ebé mbáledē á bad bébe abé ahóg. Weéhēlē-se ebé mbáledē á Dyōb se ehé-'ē mbáledē á mōné.

25 “Né-óó, nlāŋge nyé nēn mēé nyéētāgē áte á alongé, se nyéhōbē nēn bán cheé nyédyēē, ké'ē nzé-chómé nyémwēē, ké'ē cheé nyéwāā'ē á yál. Eesaá mbále bán alongé átómé ndyééd-é? Yál-le ámpē eesaá etógnén tómaa mbóté-ye?

26 Nyénōne menōn, méēwēnēē bwēm, méēpādēē, méēwóo-'áa hōm áde békōŋgēé medyé. Kénē, Dyōb awēn Titēé awē adé ámín adidte mó! Nyéebíí'ē bán nyéde etógnén bwám bwam tómaa menōn-é?

27 Nzé-módé áwēn tínté áhele átāg áte kááŋ, abád ké epun ehóg áwē alongé?‡

28 Cheé-ō ékás boŋ nyétagé áte áyāle mbóté éche nyéwāā'é? Nyénōne' mbonja éche éde á mehín-te ngáne ékwogēé. Eebelēé ntū, éebāŋgēé mesan.

29 Nlāŋge nyé nēn mēé, ké kāŋ Solomonē ne mímē nhōn ísyāál eewāā'áa mbóté éche épédé échēn mbonja ké póg e'boŋ.

30 Nzé Dyōb áhelese áwāádté e'sum abé é'bag chíi boŋ chān béhé bó á dū, né étómmé nyé awáad né-ye? Chān adúbe ádíí nyé mwāmpín nēn?

31 Né-óó nyéētāgē áte bán, ‘Cheé sédyēē? Cheé sémwēē?’ Ké-'ē bán, ‘Cheé séwāā'é?’

32 Bad ábe béese bad bé Israel bōo béchyēé' ákud échēn ndín é bwēm. Awēn Titēé awē adé ámín abíí áa nyétógnéné ábén bwēm é'syāál.

33 Boŋ nyésébe nyé nyéhēd mam mé nkamlēn í Dyōb tómaa mam mésyāál, nyébele-'ē ngáne Dyōb áhednéé nyé. Nzé nyébele né, né Dyōb débē nyé ábiníí bwēm é'syāál.

34 Né-óó nyéētāgē áte áyāle epun é' chān. Epun é' chān chēn éwōŋ mímē metake mímē mékwognéd chó. Epun téé éwóó mímē metake.

7

Ayáged áde Yesuē

tāŋgene bad ábe békáádté baab

(Luk 6.37-38, 41-42)

1 “Mod eekáádté waáb. Nzé eekáádté wēn, né Dyōb dómpē dékāād wē.

2 Nyaa eché eekáádté wēn, chōo Dyōb dómpē dékāádté wē. Melemlem mé nhágtéd mímē ébénléde mōo Dyōb dómpē débénlédté.

3 Cheé ékás boŋ éwāmsān mwā púuted anyín á díd áwēn, ésebán ehēle nkōg mímē rídé mmōŋ á díd anyín?

4 Chān éhele-se aláá mwānyōŋ wēé ámwē mōshūd mó púuted á díd, áde nkōg rídíí mmōn á díd?

5 A-edog-bad! Sébé ehūd nkōg mímē rídé mmōn á díd, dōo wétōŋ'é púuted eché edé mwānyōŋ á díd anyín, boŋ ehūd-te chó.

6 Weetédé mam mé Dyōb se ébē mbwé, áyāle ékunnéd wē yál ékūm-me wē. Weebwémmé nguú échōŋ ngese áyāle édyāntéd chó ámín.

‡ 6:27 Abád ké epun ehóg áwē alongé káa áchab tómaa ngáne ádíí.

*Hedén Dyöb kéchéé éche éhedeé**(Luk 11.9-13)*

⁷ “Hedén Dyöb, äbë we. Hëd, Dyöb débël enyín, kùm ekob, Dyöb dédibnéd we.

⁸ Ayäle kénzée awë ahëdné Dyöb, äküd, awë ahedé-’e, änyín. Kénzée-’e awë akumé ekob, Dyöb dédibnéd mó.

⁹ Sáa-a-mwän ahéé mwän ahédénne ewele, bonj ábe mó aláá?

¹⁰ Ké-’e nyé ahéé mwän ahédénne súu, bonj ábe mó nyö?

¹¹ Nzé e’bébtéd é’ bad née nyé nyébage áben bán kase é bwëm, tógtén-naá echen Sáj awë adé amín? Chán-nö éebaá bad ábe béhédné mó kase é bwëm?

¹² Né-óó, kéchéé éche édás wée bad bébel áwöñ, ébel chó áwáb. Nén dóó mbéndé e Dyöb ne bekal-bé-e’daádaj ékoo’ é ayáged.”

*Nzii e alongé ade déemaá’**elélé áte**(Luk 13.24)*

¹³ Yesue ambád aá, “Bwée á ekob éche échiné áte, ayäle ekob éche ékag á dü-á-muú ékälé áte, nzii eched-te etánlédé, bad ábe bébwag-ke áhed bébüú áte.

¹⁴ Bonj ekob é nzii e alongé adé déemaá’ edé mwämpín. Nzii-’e eché etime áwed elélé abwe áte. Nguse é bad chóó ébwag-ke áhed.

*Bekal-bé-e’daádaj bé metóm**(Luk 6.43-44)*

¹⁵ “Nyétéd pónde ne bekal-bé-e’daádaj bé metóm. Bélümte byánán bepweédtéde née ndyöñ mí mbód, bonj áwab nlém-té bédé ebébtéd née ngä.

¹⁶ Nyéëchem bós á mbéltéd nímāb. Mewán méchyáa e’pum é’ besabé-yé? Ké-’e mekód méchyáa’ e’pum é’ mángale-yé?

¹⁷ Melemlem-’aá bwel ké é’héé ábe é’kwoge’ bwām, é’chyáa-’e e’pum é’ bwām. Bonj ké é’héé ábe béekwogé’ bwām, béechyāā-’é e’pum é’ bwām.

¹⁸ Bwel é’ bwām béehelée e’pum bé mbéb achyáa. Bwel bé mbéb-pe béehelée e’pum é’ bwām achyáa.

¹⁹ Bwel ké é’héé ábe béechyāā’ e’pum é’ bwām, nwóó-nzag äkwel bós, abwém bós á dü.

²⁰ Né-óó, nyéëbñ bekal-bé-e’daádaj bé metóm á mbéltéd nímāb.

*Bad ábe béhíde Yesue**ne nlém mbé**(Luk 13.25-27)*

²¹ “Saké mod téé awë achagtaad me aá, ‘A-Sáj, A-Sáj,’ äsöl á nkamlén mí mín. Bad ábe bébele ngáne echem Sáj awë adé amín ahednéé bós, bóó bésöl.

²² Ade epun é nkáásé mé asóg épéé, bad hiin bepë áwëm, bélāngē me bán, ‘A-Sáj, A-Sáj,’ ngómé sèkänlé’áá bad mam míme Dyöb álómné’áá sé aá mébenléd, á dín ádöñ, sébenléd-te ádöñ dín ábíded bad é’daádaj bé mbéb áte, sébelé-’e menyáké hiin!”

²³ Héé mélāā’ é bós méé, ‘Meebñí’ é me nyé. Nyésyā me á díd-te! E’bébtéd é’ bad ngên!”

*Belón-bé-ndáb bébé:**a debyée ne a eyókéí**(Luk 6.47-49)*

²⁴ Yesue ambád ämpë aá, “Né-óó, mod téé awë awógé ábëm e’yale bén, bonj ábelé-’e ngáne é’hóbéé, ádíí née mod a mekínzé awë alóó ndáb á ebën é aláá mín ábel bonj ewúu ásé.

²⁵ Ambíd e nê, mbúú e ngíne enchó, e'díb é'lóne, ekukud-te étóm wée ene ndáb émbēē, boŋ enkênkwēē, áyāle enlónnéd á aláá mín.

²⁶ Boŋ kénzée awē awógé ábēm e'yale bēn, boŋ eébele ngáne é'hóbeé, adí nēŋgáne eyókél é mod éche élóó eche ndáb á nsíí mín.

²⁷ Ambíd e nê, mbúú e ngíne enchó, e'díb é'lóne, ekukud-te étóm wée ene ndáb émbēē. Ene ndáb enkwē. Enkúme émād-te ahented áte."

Kunze eche Yesue awóó áyáged

²⁸ Ade Yesue ámáá nímén mésyāā́l ahób, amute áde áwóglánáá mó démbē menyáké bwāmbwam áyāle nyaa echē áyágté'áá.

²⁹ Ayágté'áá bó nēe mod awē nzé ahóbé, né émáá. Eeyágté'áá, nēŋgáne bemeléede bé mbéndé.

8

Yesue achóŋté mod awē meləŋ mékóbé

(Mak 1.40-45; Luk 5.12-16)

¹ Yesue ansúd á ekone sé. Ade ápédé é ekone sé ndun e mod ehídé'áá mó.

² Hē dōo mod nhóg awē meləŋ mékóbé ápédé áwē boŋ ábwōgē mebóbōŋ ne edúbé ésyāā́l, áhābē nén áá, "A-Sáŋ, nzé edāó ehēle ébēl me nsáŋ!"*

³ Dōo Yesue ábídté ekáá, ábānē mó á yāl boŋ álánŋē mó áá, "Ndāó, sáŋ!" Abwōg-ábwōg nímē meləŋ mēmáá ane mod á yāl.

⁴ Dōo Yesue álánŋéé mó áá, "Weelánŋé modmod dyam áde ábénlédé, boŋ ké élúmed yāl wée prise, ásimen wē. Ebag-ke mendē ngáne mbéndé e Mosēé éhédeé, álúmed bad wée mósāā́."

Yesue achóŋté mbālede a mod ambáá a sánze

(Luk 7.1-10)

⁵ Ambíd e nê, Yesue ankē á dyad á Kapenahum. Nēe ápédé áwed, mod ambáá a sánze é Roma ambé awē akamlaan mbwókél e sánze. Ane mod anhye mó achán, áhābē

⁶ áá "A-Sáŋ, awēm mbālede eedyé'é bwām, adé á anōŋ de nkole á ndáb. Eéhēlēē ahide ásē. Atage bwāmbwam."

⁷ Yesue anláá mó áá, "Mēéŋ, níchōōd-te mó."

⁸ Dōo mod ambáá a sánze ne átímtanné Yesue áá, "A-Sáŋ, mmēn meékwoŋdeéé ákob wē nken áwēm ndáb, boŋ hób ké eyale, awēm mbālede ádyéé bwām.

⁹ Mmēn ndii mod awē adé ásē e nkamlēn, mmēn-ne nwóó sánze éche níkamlanné. Nlāŋge póg mēé, 'Kág', ékág-ke nē dēn, empée mēé 'Hyág', éhyág-ke né dēn. Nzé nlāŋge awēm mbālede mēé, 'Bēl échéń', ábelé-'é né dēn."

¹⁰ Ade Yesue áwógé nē, yāl enkóm mó áte. Dōo álánŋéé bad ábe behídé'áá mó áá, "Ne mbāle, nlāŋge nyé mēé, meényīnēē mod a lonŋ á Israel ké nhóg awē awóó nyaa e adúbe echē anén nken-e-mod áwóó.

¹¹ Nlāŋge-'é nyé nén mēé pónde echē ngande ébēē á nkamlēn ní Dyōb, bad híín ábe bēnkētāŋgén abé áhed bēbíd á akuu ne á mbəŋ ábé á ngande nchoo ne betaa, Abrahamē, Aisigē ne Jakōbē.

¹² Boŋ bēbídēd bad ábe bēntāŋgēn abé á nkamlēn ní Dyōb á ebwóg-te, bēbwém bó á ehíntén-tē. Ahed-táá béchycé'é bēdyāg-ke mesōŋ á nsāl."

* 8:2 Mmēn nteltéd níde á Kálag e Levitikus eped dyóm ne é'láan nchoo móom méniin ne rítáan ápe nchoo móom méniin ne ntóob (Lev 13.45-46).

13 Dɔɔ Yesue ɔ́lɔ̀ngɛ́e ane mod ɔ́ sɔ̀nze aá, “Súé’ ɔ́ ndáb, ébenled ngáne edúbpé.” Melemlem mé pónde mbaledɛ awɛ ane mod ambáá a sɔ̀nze andyɛ bwám.

*Yesue achɔ̀ntɛ ekud é bad
(Mak 1.29-34; Luk 4.38-41)*

14 Adɛ Yesue ɔ́pédɛ ɔ́ ndáb wɛɛ Petro, antán Petro mwaád nyaá ɔ́ anɔ̀ɲ dé nkole, ahéb dɛnsog mó.

15 Nɛɛ Yesue ɔ́chɔ̀ngɛ́ mó ɔ́ ekáá, ahéb ɔ́máá mó. Anhidé ɔ́sɛ, ɔ́kɔ̀b-pe Yesue nken.

16 Ene ngukél bad bɛmpɛ́ɛn bad hiin wɛɛ Yesue, ɔ́be e’daádɔ̀ɲ bé mbéb bémbɛ́ɛ ɔ́te. Yesue ambɛnled ɔ́bɛ e’yale bé nsal abidéd ɔ́bɛ e’daádɔ̀ɲ bé mbéb, ɔ́chɔ̀ɔ̀d-te bad bɛsyáál ɔ́be békónlé’áá.

17 Yesue ambɛl nímmɛn mésyáál ɔ́lóned e’yale ɔ́be Dyɔ̀b dénlómɛnnɛ nkal e’daádɔ̀ɲ Yesayaa nɛn aá, “Ankɔ̀bɛn syánɛ nkole nísyáál ne nímmɛd metake.”

*Bad ɔ́be bɛmpɛn Yesue ahid
(Luk 9.57-62)*

18 Ade Yesue ɔ́nyínɛ ngáne ndun e mod élɔ̀ɲnédɛ mó, anláá ɔ́bɛ bɛmbapɛɛ aá bɔ̀bɔ̀ɔ́ bétimɛ ɔ́ pɛd e edib-é-nzab eníní.

19 Hɛ dɔɔ meléede a mbéndɛ nhɔ̀g ɔ́pédɛ ɔ́wɛ bɔ̀ɲ ɔ́hɔ̀bɛ aá, “A-meléed, mɛ́híd wɛ kéhéé ɔ́de ékagké.”

20 Yesue antimtɛn mó aá, “E’bubwɔ̀g é’wóó ɔ́bab e’lóm wɛɛ bɛsólɛ́, mɛnɔ̀n-ne ɔ́mpɛ méwóó nímmab mùm, bɔ̀ɲ Mwán-a-Moonyɔ̀ɲ eewóó’é hóm ɔ́dɛ ɔ́bánnɛé nló.”

21 Dɔɔ mod ampée awɛ mómpɛ ahidɛ’áá Yesue ɔ́lɔ̀ngɛ́e mó aá, “A-Sán, mwɛ, rísɛbe níke nílime echem sán.”

22 Dɔɔ Yesue ɔ́timtanné mó aá, “Hidɛ mɛ, chenɛ ndim ní bad mɛn nílime nímmab ndim.”

*Yesue ahóódtɛ ekukud
(Mak 4.35-41; Luk 8.22-25)*

23 Ene pónde dɔɔ Yesue ɔ́sólɛ ɔ́ bɔ̀lɛ-tɛ ne ɔ́bɛ bɛmbapɛɛ bɔ̀ɲ bɛbwɔ̀gɛ eke.

24 Adɛ bɛpédɛ ɔ́ edib-te, dɔɔ ekukud é ngine éhɔ̀ótédɛ atóm. Embɛ ngine nyaá echɛ káɔ̀ɲne bɔ̀lɛ bɛmpɛnnɛ asú ɔ́sɛ ɔ́ mendib-te. A pónde eched Yesue akúnɛ’áá.

25 Hé-’áá bɛmbapɛɛ bɛnyemɛé mó ɔ́sɛ bɔ̀ɲ bɛlɔ̀ngɛ́ mó bán, “A-Sán, sɔ̀n, wɔ̀ngɛ́n, pɔ̀n syánɛ dewág-ɔ̀ɔ!”

26 Yesue ankwentɛn bó aá, “Cheé ékásá bɔ̀ɲ nyéwɔ̀gɛ mbwɔ̀g? Cheé ékásá bɔ̀ɲ ɔ́dɛn adúbe ɔ́be mwámpɛn nɛn?” Dɔɔ ɔ́tyéémɛ ɔ́mɛn, bɔ̀ɲ ɔ́kamlán ekukud echɛ étómé’áá, ne edib echɛ éhódɛ’áá ɔ́te. Abwɔ̀g-ábwɔ̀g ekukud énsɛle, edib ɔ́mpɛ echɛ éhódɛ’áá ɔ́te énsɔ̀g ahod.

27 Yál enkóm bɛmbapɛɛ ɔ́te bwámbwam ɔ́de bɛnyínɛ nɛ, bɛsɛdtɛ bánken, “Ebál é mod éhéé chɛn echɛ káɔ̀ɲ ne ekukud ne mendib bɛwɔ̀ngɛ́e?”

*Yesue achɔ̀ntɛ bad bébe
ɔ́be e’daádɔ̀ɲ bé mbéb bémbɛ́ɛ ɔ́te
(Mak 5.1-20; Luk 8.26-39)*

28 Ade Yesue ne ɔ́bɛ bɛmbapɛɛ bɛpédɛ ɔ́ múde mé edib-é-nzab nímmíní, ɔ́ mbwɔ̀g e bad bé Gerasin, bad bébe ɔ́be bémbíd ɔ́ soóbadɛ bɛmbomɛn mó. E’daádɔ̀ɲ bé mbéb bémbɛ́ɛ ɔ́bɛ bad bébe ɔ́te. Abɛ bad bémbɛ́ɛ nganɲɛn nyaá echɛ mod ké nhɔ̀g éechue’áá ene nzii abwe.

29 Anyín ɔ́de bɛnyínɛ Yesue, bɛmbootéd abón bán, “A-Mwán a Dyɔ̀b, cheé syánɛ déwɔ̀ɲnɛ? Epedɛ hɛn ɔ́kɔ̀gɛn sé ɔ́de pónde éepɛdɛ́ɛ-yɛ?”

³⁰ Esog é nguu chós-’ε ébédé benben ne áhed, édyāg medyé.

³¹ Hée ábē e’daádəŋ bé mbéb é’cháa-’ε Yesue bán, “Sébií bán wēbídéd sé, boŋ tedé sésəl á esog é nguu-tē eche édé híní nē.”

³² Dóo Yesue akamlanné ábē e’daádəŋ bé mbéb aá, “Nyébíd!” Abíd áde ábē e’daádəŋ bé mbéb é’bídé ábē bad áte, bénsəl nguu ché áte. Abwōg-ábwōg, éché esog é nguu émpādē ásē, ényəgté’ á eláá é nkin mé edib-é-nzab, éhún á edib-tē, éwé-’ε.

³³ Benon bé nguu béntōm mehelé á dyad-tē, békag békanklé bad dyam áde ábénlédé ne ábē bad ábe e’daádəŋ bé mbéb bémbéε áte.

³⁴ Awóg áde ábē bad bé dyad bəwógé nē, bəmpādē ásē áke dé atán Yesue. Née bényíné mó, bəchāŋ mó bán, áhíde áwab mbwóg.

9

Yesue achōŋtē mod

awē awédé epəd

(Mak 2.1-12; Luk 5.17-26)

¹ Ambíd e ene pónDé, Yesue ansól á bōle-tē ámpē, áchābē edib-é-nzab, áŋim ámbíd awē dyad wēε ádyéé’áá.

² Ape áde Yesue ápédé áwē dyad, bad behóg bəmpēén mod á mekále mín awē awédé epəd. Ade Yesue ányíné adúbe áde ábē bad, anláá ane mod awē awédé epəd aá, “A-mwān, weewógé mbwóg, nłagséné wε mbéb.”

³ Hē dóo donje dé bemeléde bé mbéndé bényonjéé áte bán, “Anén mod asyāa Dyōb!”

⁴ Yesue anchēm bó mewēmten áte. Hée ásedtēé bó aáken, “Cheé ékás boŋ nyéwōŋ nímén mewēmten mé mbéb áte?”

⁵ Ahéé adé dyam ásad, áhób wéé, ‘Nłagséné wε mbéb,’ káa áhób wéé, ‘Syāó ásē, ébooted áke?’

⁶ Boŋ mēluméd nyé mēé Mwān-a-Moonyon awóó kunze á nkōsē álagsen mbéb.” Hée álāŋjéé ane mod awē awédé epəd aá, “Syāó ásē, étéd nímōŋ mekále, ésúe’ á ndáb.”

⁷ Dóo ane mod áhídté ásē boŋ ásūē-’ε á ndáb.

⁸ Mbwóg ménkōb bad ábe bényín ngáne ádén akan ábénlédé. Bébootéd-tε Dyōb aken áde ábágé baányon kunze ábel éché nđín é mam.

Yesue achénlé Matyo

áhíd mó

(Mak 2.13-17; Luk 5.27-32)

⁹ Ambíd enē Yesue ansyāó áde abwóg á hōm. Ade ákagké nē, annyín mod awē béchágé’áá bán, Matyo. Matyo andyéé ásē á ndáb eche ásanŋtē’áá tááse áte. Hée Yesue álāŋjéé mó nén aá, “Hídé me.” Dóo Matyo átyéémé ámín, boŋ áhídē-’ε mó.

¹⁰ Ambíd e pónDé Yesue ankē á ndáb wéε Matyo* ádyé ndyééd. Ekud é besaad bé tááse né bad bé mbéb bəmpēε bəmpē bédyēεn Yesue ne ábē bəmpəεε áhed.

¹¹ Née donje dé Befarisia bényíné ngáne Yesue ádyééné éché nđín é bad, bənsédéd ábē bəmpəεε bánken, “Cheé ékás boŋ awen meléde ádyāg ndyééd ne besaad bé tááse ne bebél bé mbéb bəmpēε?”

¹² Dóo Yesue ákwentanné bó aá, “Bad ábe bédyéé bwām béetógnenēé mod-a-bwél. Bad ábe békanklé’ bōó bétógnéné mod-a-bwél.

¹³ Nyéke nyéhéd áte ábel nyésōŋten ábén e’yale ábe é’ténlédé á kálag e Dyōb nén bán, ‘Chōm eche ríhédnéé bad édíi nłém ní ngōl, saké mende.’ Meépédéé

* **9:10** Nđáb wéε Matyo káa nđáb eche Yesue.

á nkõñsé áchële bad ábe békóbnédé á'ós é' Dyõb, boñ mpedé áyãle bad bé mbéb."

*Nsëdtéd tãngene ádid yãl nzaa
á mekáne-të*

(Mak 2.18-22; Luk 5.33-39)

14 Hê dõo bembapεε ábe Jonε, Nduseνε bépédé wέε Yesue boñ bésεdté mó bánken, "Cheé ékáá boñ sé ne Befarisia sédidé yãl nzaa á mekáne-të, boñ ábõñ bembapεε pεn béedidé'?"

15 Yesue ankwentén bó ne ngan aá, "Chán bad ábe bélébpé á ngande e e'wóngé béhele bélebe' áde bédíí ne mod awě akudé sómbé? Béeheléé. Boñ epun épě éche békobénné bó mod awě akudé sómbé. Eché epun dõo bédídté yãl nzaa á mekáne-të.

16 Nyébíí nén bán, nzé mod anabpe' mbóté, eetédéé eped é abad ékãlë se ánanéd nchun ní mbóté, áyãle nzé éché eped é abad ékãlë ébóótédé abób áte ébelé éhabnéd abad dé nchun. Nê ábele' éché epõn é mbóté ékale' áte tómaa ngáne énsèbēē abé.

17 Melemlem nêngáne mod éetédēē mím mékãlë se ápen mós á nchun mé ntyág ní ngob e nyam. Ayãle nzé abelé nê, né mím méhõd káõñ ntyág ní'yéd? Mím mémád asyõge, ntyág-ke ámpē mbéb. Boñ bétédéé mím mékãlë béhé á ntyág mékãlë-te. Nê ábele' mím mébé bwám, ntyág-ke ámpē mbé bwám."

*Yesue apuúdté ngõndérε póg
echë enwé*

(Mak 5.21-43; Luk 8.40-56)

18 Ade Yesue álãngéé bad nímén mekan, mod a nkamlen nhóg ampě áwé abwóg mebóbõñ ne edúbé ésyãl, áhãbē nén aá, "Awem mwãn a mmwaád awédé bõõb nén dën, hyág ébán mós ekáá á yãl ábel nén apuu."

19 Né-õ Yesue ampádé ásē ne ábē bembapεε béhídé ane mod.

20 Ade békagké nê, mmwaád nhóg ambé awě anwõn nkole níme mekií mébidé'áá mós á yãl pónde ésyãl. Mím nkole níbéde mós á yãl á etún é dyõm-a-mwé ne níbe. Héé ane mmwaád ábíde Yesue á mbíd, ásitán mós mesó mé nkobe níme ánwãá'é.

21 Ambel nê áyãle ánwálé mewēmten aá, nzé mósíténé níme nkobe, aá né móõdyéé bwám.

22 Dõo Yesue ákúnnédé boñ anyín ane mmwaád. Anyín áde ányíné mós dõo álãngéé mós aá, "A-mwãn-a-mmwaád, adúbe ádõñ ádíde wε bwám." Ábwõg-ábwõg ane mmwaád andyεé bwám.

23 Yesue ampě á ndáb eché ane mod a nkamlen. Ade ásólé á ndáb-te, antán ndun e mod ébele ntõgag ní ngine ne bad ábe bétóo e'lõñ, békõñε-ε nkãngé ní kwééd.

24 Dõo Yesue áhãbéé aá, "Nyé moosyãl nyébíd á ebwóg, áyãle anén mwãn-a-mmwaád eewédéé, akúne kúnén." Héé bó moosyãl bébóótédé mós awõõ.

25 Boñ áde ene ndun e mod émáá abíd á ebwóg dõo Yesue ásólé á ton eché bënnaádté ane mwãn. Néé Yesue áchénégé mós á ekáá, apádé-ε ásē ábwõg-ábwõg.

26 Adén akan dënkanléd ene pεd e aõñ esyãl.

Yesue achõñté bad bé ndím bébe

27 Néé Yesue áhídte ádê abwóg á hõm, bad bébe ábe bënkwě ndím béhídé'áá mós ámbíd, bélébpē-ε e'saád bán, "A-Mwãn a mbyaa níme Dabide, wóg sé ngol."

²⁸ Ade Yesue ásolé á ndáb-te, ábê bad bébe ábe bēnkwe ndim bēntān mō. Dōo Yesue áseɗteé bō aá, “Nyédúbpé nén bán nhele níbel nyényinen-ε?” Bēnkweɗtén mō bán, “E. A-Sán, sédúbpé.”

²⁹ Dōo Yesue ábáné bō mekáá á mīd, boŋ áhōbē nén aá, “Nyéwóo adúbe bán nyéenyinēn, né-ɔ́ ébenleɗ ngáne nyédúbpé.”

³⁰ Abwōg-ábwōg bébootéɗ-te anyinēn. Boŋ Yesue asim bō etúu áte, álāngé bō aá, “Nyéelāngé mod ké nhóg ádén dyam áde ábénléde.”

³¹ Boŋ ké nē, néε hébíde áhed, bémbē békēen nkalan ene pɛd é alon ésyāal ngáne Yesue ábélé menyáké.

*Yesue achónté mod
awé eehōbe'áá dyam*

³² Néε ábê bad bébe ábe bēnkwe ndim ábe Yesue áchónté béhídté, bad bēmpɛén mod wéε Yesue awé ankwé ebóbé áyāle edáádəŋ é mbéb émbē mō áte.

³³ Boŋ áde Yesue ámáá ane mod éché edáádəŋ é mbéb abided áte, ambootéɗ dyam ahób. Nén dénkōbéd ndun e mod éché ebéde áhed menyáké, béhōbē-ε bán, “Dyam néε ádén déébēnleɗε á Israel mbéd.”

³⁴ Boŋ Befarisia pɛn béhōbē nén bán, ahele bad e'dáádəŋ bé mbéb ahúd áte áyāle kán e e'dáádəŋ bé mbéb chōo ebage mō ngine ábel né.

Yesue awógé bad ngɔl

³⁵ Né-ɔ́ Yesue akagé'áá myad mésyāal, mémháá ne mésad ene pɛd e alon, áyāgté eyale é Dyōb á ndáb é mekáne, ákalé-ε nkalan ní bwām mé nkamlen ní Dyōb. Yesue achónté'áá bad bé nkole bésyāal ne nyaa é nkole ésyāal éche émbē áfínté écháb.

³⁶ Ade Yesue ányiné ndun e mod, ngɔl enlóg mō á nlém-té bwāmbwam áyāle écháb. Ambé bō ngɔl áyāle bétágé'áá áte, bééwóo-ε nwoŋgen. Bémbē néε ndyɔŋ ní mbód níme mééwōo nnən.

³⁷ Dōo álāngéé ábē bembapεε aá, “Nzag echyáá bwāmbwam, bwēm é'hɛdnaad apád, boŋ bepád béebuu' é áte.

³⁸ Né-ɔ́, nyékāne nén bán nwoó-nzag álóm bepád.”

10

*Bembapεε bé nlomag
dyóm ne bébe*

(Mak 3.13-19; Luk 6.12-16)

¹ Ambid e nē Yesue anlād ábē bembapεε dyóm ne bébe áte. Ambε bō kunze ábided bad e'dáádəŋ bé mbéb áte, áchood bad bé nkole ne nyaa é nkole ésyāal.

² Mīn níme bembapεε bé nlomag dyóm ne bébe ábe Yesue mómén: A'só, Simōne awé béchágé'áá bán Petro ne mwányan Andreyā. Jemse bō mwányan Jone, bán ábe Zebedie,

³ Filibe ne Batolomyo, Tomase ne Matyo nsaad-a-tááse, Jemse mwán awé Alfōse, ne Tadiose,

⁴ Simōne awé ambé á epepe é kán e alon, ne Judas Iskariode awé antīm Yesue asóm.

*Yesue alāngé bembapεε bé nlomag
ngáne bébenlé níme nsón*

(Mak 6.7-13; Luk 9.1-6)

⁵ Ábê bad dyóm ne bébe bōo Yesue ánlōmmē. Anláá bō aá, “Nyéekāg á myad níme méesé myad mé alon á Israel, nyéekāg-ke dyad ké ahóg á alon á Samaria.

⁶ Boŋ nyékāg wéε bad bé Israel. Bédé néε ndyɔŋ ní mbód níme níbóo.

7 Nyékag, ngáne nyékagké, nyéh̄n̄te nén bán, ‘Nkamlen mí mín rídé benben.’

8 Nyéchoŋte bad bé nkole, nyépuudte bad ábe béwédé, nyéchoŋte bad ábe békonle nkole mé meləŋ ábel bésán, nyébidte-ε bad e’daádəŋ bé mbéb áte. Mbagé nyé ngíne ábel nímén mésyāal, meéh̄edneé nyé nsábe. Né-óó nyémpe nyéke nyébele melemlen nyéeh̄dn̄e bad nsábe.

9 Nyéewánlé məńé ké nhóg áyāl.

10 Nyéewánlé ekwe, ké’ε mbóté ébe áyāl. Nyéewánlé metámbé, ké’ε ntóŋ. Ayāle mod a nsón atəŋgéné ndyééd akud w̄εε mod aw̄é ábenléé nsón.

11 Nzé nyésólé dyad ké ahéé, nyéh̄d mod aw̄é akw̄enténé nyé nken akob, nyédyēē áwe ndáb kóəŋ ne póndé éche nyéh̄idteé ád̄é dyad.

12 Ndáb ké ehéé ech̄é nyésólé áte, nyélélēd bad ábe bédé áw̄ed-te nén bán, ‘Nsaŋ mb̄ê ne nyé.’

13 Nzé bad ábe bédé áw̄ed-te békóbé nyé nken, ním̄en melent̄en mé nsaŋ ní Dyób mb̄ê ne b̄ó. Boŋ nzé béekobe nyé nken, ním̄en melent̄en r̄sú ne nyé.

14 Boŋ nzé nyépedé ndáb ké’ε dyad ké ahéé, boŋ béekw̄ent̄ene nyé aw̄ógl̄en, nyékūd ebumbū á mekuu áde nyéh̄idteé áhed, álúmed nén bán, Dyób déekobeé b̄ó.

15 Ne mbále, nlänge nyé nén m̄εé á Epun é Nkáásé, nkógsen n̄ime myad mé Sodom ne Gomora b̄enȳinn̄é méb̄e mw̄amp̄in tómaa n̄ime bad ábe bédé ád̄é dyad.”

*Metake n̄ime
bembapeε b̄ekudt̄é
á d̄tn áde Yesue*

(Mak 13.9-13; Luk 21.12-17)

16 Yesue ambád aá, “Nyén̄əne’, nlóme nyé néε r̄dyoŋ mí mbód áf̄int̄é e nḡə. Né-óó nyéh̄e mek̄inz̄é néε nȳə, nyépwiited-te néε éls̄ə.

17 Nyétéd póndé, áyāle bad béb̄e ábe békeén nyé á kóte, bésw̄ádt̄ed nyé e’taŋgú awáb ndáb é mekáne.

18 Áyāl e ech̄em b̄epeén nyé á’s̄o é’ benkaml̄ene ne é’ k̄əŋ. Béb̄ēl n̄ē ábel nyékale b̄ó nkalanj mí bw̄ām, nyékale-ε bad ábe bées̄ bad bé Israel.

19 Nzé b̄ép̄ééné nyé ké ahéé ákáád nyé, mod eétāḡe’ áte áyāle ch̄ōm-εε áh̄əbp̄e ké’ε ngáne áh̄əbp̄e ch̄ó. Ade póndé ép̄eé, ch̄ōm éb̄e éche áh̄əbp̄e.

20 E’yale ábe áh̄əbp̄e béeb̄áá áb̄e, b̄éh̄ūū ne Ed̄əádəŋ éche eche Sáŋ aw̄é áh̄əbp̄e m̄ó.

21 Mod ábe mw̄anyaŋ á mekáá mé bad b̄emp̄ee ábel béwúu m̄ó. S̄éε mw̄ān ámp̄e áb̄ēl melemlen ne mw̄ān. Mw̄ān ákunn̄én s̄áá ne nyaŋ ȳāl áb̄ēl béwúu-’ε b̄ó.

22 Mod asȳəəl ák̄óó nyé, áyāl ech̄em, boŋ kénz̄éé aw̄é ákaán n̄im̄e metake n̄lém kóəŋ ne a asóg, ákūd e’s̄oos̄oŋ.

23 Nzé b̄étágt̄é nyé á dyad ahóg, nyényəged nyéke ádiní. Ne mbále, nlänge nyé nén m̄εé, nyéep̄áá nsón amad á myad mé alonj á Israel mésyāal, boŋ Mw̄ān-a-Moonyonj ápag.

24 Mw̄ān-a-ayáge eetóm̄éé mod aw̄é ayágte m̄ó. Mb̄əled̄e-ε eetóm̄éé eche s̄əŋ.

25 Né-óó mw̄ān-a-ayáge eetəŋgen̄eé néε áhed̄eé edub̄é éche étóm̄é éche mod aw̄é ayágte m̄ó. Mb̄əled̄e-ε ámp̄e eetəŋgen̄eé néε áhed̄eé edub̄é éche étóm̄é éche eche s̄əŋ. Nzé b̄éch̄úúdé s̄áá-a-mbw̄óg bán Belzebul̄e, né b̄ech̄uú bad ábe bédé áwe ndáb m̄in n̄ime méb̄ébé tómaa n̄ē.

*Mod aw̄é b̄étəŋgéné ab̄əŋj
(Luk 12.2-7)*

26 “Né-ó nyéebáá’ moonyon. Áyāle dyamdyam déesaá á e’konéd-te áde déebíd áwed. Ké ahóg-ke déesaá, áde ásóomé bon bán déebyéénné.

27 Mam mésyāāl níme rílanḡeé nyé á ehíntén-tè, nyéhòb mó á e’nyínen bé ekide. Mésyāāl-le níme nyéwógé á kun-té, nyékal mó á nhéné.

28 Nyéewógé mbwóg ne moonyon awé ahele awúú ekob é yāl, bon eéhēlē’ edaádān awúú. Bon nyébāa Dyòb áde áhele ábēbéd ekob é yāl, abēbéd-te edaádān á dū-á-muú.

29 Eesaá mbále nén bán, bésóme’ ndun ébe áyāle kábpe póg-ε? Ké nē, ké póg eehúnéé á ndaab ésebé á nkwenten níme echen Sān Dyòbe.

30 Bon ne nyé, Dyòb ábíí kóāne mesongé mé e’sid ábe é’dé nyé á nló.

31 Né-ó, nyéewógé mbwóg, nyédé etógnén tómaa ndun, ké émbuú ké áte.

*Abíd Yesue mbón,
ké’ε ábān mó áyāl
(Luk 12.8-9)*

32 “Kéznéé awé ábíd me mbón á’sō é’ baányon, me-’ε mēbíd mó mbón á’sō wéε echem Sān awé adé ámín.

33 Bon kéznéé-’ε awé ábān me áyāl á’sō é’ baányon, me-’ε mēbān mó áyāl á’sō wéε echem Sān awé adé ámín.

*Yesue ad ngabén chō
mópééné átínté e badnyon
(Luk 12.51-53; 14.26-27)*

34 “Nyéewém tán nén bán, nhyedé á nkòḡsé ápeεn nsan. Aáy, meépédeé ápeεn nsan, bon ngabén.

35 Mpedé ákón mwān a mwenchóm átānḡen sáá, mwān a mmwāád átānḡen nyaá, mmwāád-te átānḡen nyān-kólé.

36 Bad bé ekoyí bé mod bēbíd áwe ndáb-te dēn.

37 “Kéznéé awé adáá nyaá ké’ε sáá tómaa me eékwognedéé awēm mbapeε abé. Kéznéé-’ε awé adáá awe mwān a mwenchóm ké’ε awe mwān a mmwāád tómaa me, eékwognedéé awēm mbapeε abé.

38 Kéznéé-’ε awé éepém áde awóg se áhídnē me, eékwognedéé ábe awēm mbapeε.

39 Kéznéé awé ahεde áde alonḡé ason, ábōd dō. Bon kéznéé-’ε awé ábōd áde alonḡé áyāle echēm, ákud alonḡé áde déemaá’.

*Nsábe ní Dyòb ne bad
ábe békobe’ ábe bembālede
(Mak 9.41)*

40 “Kéznéé awé akobé nyé nken, né me-εé ákóbé nken. Kéznéé-’ε awé akobé me nken né echem Sān awé alómé me mós ákóbé nken.

41 Kéznéé awé akobé nkal é’dáádān nken áyāle ádíí nkal é’dáádān, ákud nsábe mé nkal é’dáádān. Kéznéé-’ε awé akobé mod awé asáá nken áyāle ásaá, ákud nsábe níme mod awé asáá.

42 Ne mbále, nlanḡe nyé nén meé, kéznéé awé abagé ké mendíb mámwé ngēn wéε anēn nhóg awé áhíde me, ké ane awé eébude etógnén abé, átānḡéné néε ákudé nsábe ní Dyòb.”

11

*Jōne, Ndusεne alómé
ábe bembapeε wéε Yesue
(Luk 7.18-35)*

1 Ade Yesue áamá ábē bembapεε dyóm ne bébe nímén mésyāā alyágtēn, anhidé adē abwóg á hóm áke déyáged ne ákal eyale é Dyöb á myad níme mébéde benben ne áhed.

2 Ene pónde Jone, Nduσεε ambé á mbwög. Ade áwógé mam mésyāā níme Krístāā ábélé'áá, anlóm ábe bembapεε áwē.

3 Anhób áá béseded mós bánken, mós adé ane awē Dyöb áhóbé áá mósölóm-ε, ngé bésine' mod ampée?

4 Héε Yesue átimanné bós áá, "Nyétime' ámbíd, nyéke nyeláa Jone mekan níme nyéwógé ne níme nyényinné díd.

5 Nyeláa mós bán, bad ábe bēnkwx̄ ndím bényinne', ábe bésyágtáá, békag bwám, ábe meləη ménkōbpē, bésáá. Abe bēnkwx̄ ndóg bēwógne', ábe bēnwē, bēpuude', nkaləη ní bwám-me ámpē níkalte' wēε betoótoke' be bad.

6 Nnam míbē-'ε ne kénzée' awē eéħəŋlεne nlem á abum təŋgene me."

Yesue ahóbé təŋgene

Jone Nduσεε

7 Ade bembapεε ábē Jone bétimée ámbíd nē, dós Yesue áboótedé ndun e mod eché embē áhed akale təŋgene Jone. Ansedéd bós ááken, "Pónde eché nyémbídté áke détan Jone á ehyáŋge, cheé nyéwēmtēnnē bán nyéenyín? Apab á chyaá áde epub éságtεε-yε?

8 Cheé nyénkongé abíd áke dé anyín? Mod awē ahédé mbóté eché ébós bwámbwam-ε? Bad ábe béhág eché ndín é mbóté bédyεε dās á ndáb é kəŋ.

9 Nyeláa me, cheé nyémbídté áke dényín. Nkal é'dəəəəŋ mós nyénkεé anyín-ε? Nē dén! Ne mbále nlánge nyé meé, nyényíné mod awé atómé nkal é'dəəəəŋ.

10 Jone mós adé ane awē béhóbé'áá áde bétélé e'yale ábe Dyöb áhóbé áá, 'Nóné', nlóme nímém mészεze níme mészēbē we á'sō, áboŋsen we nzii.'

11 Ne mbále, nlánge nyé nén meé, mod ké nhóg awē abídé á abum dé mmwáád eetómεé Jone, Nduσεε. Boŋ ké nē, mod awē adé ndimten áyāle bad ábe bédé á nkamlen ní mín, adé etógnén tómaa Jone.

12 Bootya ne pónde eché Jone, Nduσεε áboótedé nkaləη ní Dyöb akal kóəŋ ne epun é'chii, nkamlen ní mín níkude metake híin á mekáá mé bad, e'wanje é' bad-te é'kume nímé nkamlen nzum.*

13 Mbéndé ne bekal bé'dəəəəŋ béhóbé təŋgene nímé nkamlen kóəŋ ne pónde eché Jone.

14 Né-əó, nzé nyébōŋséné échab ehób adúbe, Jone mós adé ane awē béhóbé'áá áde bēnhōpē bán, Elaijaa ahúε'.

15 Kénzée' awē awóó metúu áwóge'.

16 "Boŋ cheé méħəgtēnné nyonŋel e'chii? Enén nyonŋel edii nēŋgáne bēndem ábe bédyée á dyad-té, boŋ bélébpē nhóg ne aníní,

17 bán, 'Sétónge nyé e'loŋ,

boŋ nyéeságeé.

Sékónné nyé nkánge ní kwééd,

boŋ ké nē nyéélēbēε.'

18 Ayāle, Jone abédé, eéyoke'áá ndyééd adyé, eemwáge'áá-'ε mím, bēhōbē bán, 'Edəəəəŋ é mbéb édé mós áte.'

19 Mwán-a-Moonyon apedé, ádyāg ndyééd, ámwāg-ke mím, bēhōbe bán, 'Nyénne mós, adəəə ndyééd bwámbwam. Mmwε-mímε ngēn, awonŋe belad bé tááε ne bebel bé mbéb.' Boŋ kóəŋ ne á asóg, mam níme mébenléd mélūméd nén bán, debyéé á Dyöb átəŋgēnε."

* 11:12 E'wanje é' bad-te é'kume nímé nkamlen nzum káa nípag ne ewanje.

Myad níme bad bénkëndubéé Yesue

(Luk 10.13-15)

²⁰ Bad ábe bebédé á myad níme Yesue ámbenlé ekud é menyáké áte békênhəŋlénne ádab abé dé mbéb. Né-óó Yesue ambootéd bó akáne áte,

²¹ áhóbé aá, “A-bad bé Korazin, ébēēn nyé ebébtéd! Ebēēn nyémpē ebébtéd á-bad bé Betsaida! Ayāle nzé émbē bán, ndāle é mekan éche Dyób ábélé áwēn myad, mémbenléd nē á dyad á Tíre ne dyad á Sidōn, né bēnwāā melebe se etūn, bémwagtéd-te mbúmbú áyāl álúmed nēn bán, béhəŋléné ádab abé dé mbéb.

²² Mbále, nlāŋge nyé nēn meé, á mbwe mé nkáásé, nkáá níme bad bé Tíre ne bé Sidōn mébē mwāmpīn tómaa nímēn.

²³ Nyé bad bé Kapenahum ámpē, nyēwēmtan bán, nyēmaá ape ádyōb, boŋ bésudéd nyé káŋse asē á dū-á-muú. Nzé menyáké níme Dyób ábélé áwēn dyad mémbenléd á Sodom† né ádē dyad ádíí adé chíi.

²⁴ Boŋ ne mbále nlāŋge nyé nēn meé á mbwe mé nkáásé Dyób délúmed ngəl ne bad bé Sodom tómaa ne nyé.”

Yesue alébe bad ad,

béhyag áwē

(Luk 10.21-22)

²⁵ Ene Póndé Yesue anhób aá, “A-Tē, Sāŋgwéé a nkoŋ ní mín ne rí sé, nsáŋnen ríbē ne we, áyāle elúmté mpīn ní bēndem mam níme ébāŋné bad bé debyéé ne bad bé nsōŋten.

²⁶ Eε, A-Tē, nē dēn dóó édóó wéé ébenled.”

²⁷ Dóó ábádéé aá, “Echem Sāŋ ebagé mekan mesyāāl áwem mekáá. Mod ké nhóg eékoŋtéé mwān abii ésebé Dyób Títéε. Mod ké nhóg-ke ámpē eebii’ é ngáne Títéε ákoŋté abé ésebé mwān, ne kēnzéé awē mwān ádóó aá mólúmed mó.

²⁸ “Nyéhyag áwēm, nyé bad bésyāāl ábe nyékómé nted níme rídélé apém, mébe nyé nkóme-áte.

²⁹ Nyékwēnten áhíd nímēm mekuu, nyéyágke-ε awēm, áyāle mpwiitédé, nchii-ε nlem á abum. Nyéhyag, nyéēkud nkóme-áte.

³⁰ Ayāle ayáged ádēm déeleléé áte, nted nímēm-me méedeléé.”

12

Atón dé Mbwe-mé-nkóme-áte

(Mak 2.23-28; Luk 6.1-5)

¹ Mwāmpīn ní pónde ámbid e nē, Yesue ne ábē bembapeε bétómé’ áá á nzag é ngun-tē.* Nēn ábédé á mbwe-mé-nkóme-áte. Nzāa ewagáá ábē bembapeε. Né-óó bēmbootéd e’sóg é’ ngun apád, bépāke’, bédyág.

² Befarisia bényīn nē, dóó bélāŋgeé Yesue bán, “Nōné’, ábōŋ bembapeε bébele dyam áde mbéndé éebagéé kunze abel á mbwe-mé-nkóme-áte.”†

³ Dóó Yesue átimtanné bó aá, “Nédē nyéeláá’ é mbéd á kálag e Dyób dyam áde kōŋ Dabidē ámbenlé áde nzāa ekóbé mó ne ábē bad-ε?”

⁴ Eténlédé nēn bán, ansł á Ndáb-e-Dyób mó ne bad ábe bēnwōón mó, bédyé e’wele ábe é’ bédé nde e Dyób, ábe eched mbéndé eebagéé mod ké nhóg kunze ádyé. Ké bad ábe bēnwōón mó bénkētāŋgēnné adyé. Bepriεe bēnpēn bóo bēntāŋgēn adyé.

† 11:23 Dyób démbēbed dyad á Sodom áyāle ebébtéd éche émbē áwed. * 12:1 Echē ngun ebédé nyāa e ngun eche bēbenlé e’wele. † 12:2 Bad bēnkētāŋgēnné nsōn abel á mbwe-mé-nkóme-áte. Ne Befarisia, apád ádē bembapeε bépádé’ áá ngun ebédéé nēé abel dé nsōn.

⁵ Káa nyéeláá' é á mbéndé eche Mosee nén bán, mbwe-mé-nkóme-áte tée, beprise bé Ndáb-e-Dyöb békweg mbéndé e mbwe-mé-nkóme-áte áyāle nsón míme bébeléé bonj ké nê, nê déesaa mbéb á'só é' Dyöb-e?

⁶ Nlānge nyé nén mēē dyam ádé hén bōob áde ádé etógnén tómaa Ndáb-e-Dyöb.

⁷ Eténlédé ngáne Dyöb áhóbé áá 'Chöm éche ríhedneé bad édií nlém ní ngól saké abe dé mende.' Nzé nyénkonj ábén e'yale asóhten né nyéehēlēē-se nyéchégē bad bán, bédé bebel bé mbéb áde bébeléé mbéb.

⁸ Nyébii-óó nén bán Mwān-a-Moonyonj awóó nkamlen kóōne ámín e mbwe-mé-nkóme-áte."

*Yesue achōhté mod
awē ekáá éwédé*

(Mak 3.1-6; Luk 6.6-11)

⁹ Ambíd e pónidé, Yesue anhidé hē, áke asól á ndáb e mekáne.

¹⁰ Mod abédé áhed awē ekáá éwédé. Bad behóg ábe béhédé'áá Yesue awusé akóben, bénsedé mó bánken, "Eched mbéndé ebagé kunze ádid mod bwám á mbwe-mé-nkóme-áte-ye?"

¹¹ Dóó ásedtéé bō aáken, "Nyé ahéé míme mpōm ní mbód méhūnnē á echóg-te á mbwe-mé-nkóme-áte bonj eékag mó ahúd?"

¹² Nzé nyéhele-se nyéhel nê ne mbód ngên, tógténnē moonyonj awē adé etógnén tómaa mbód. Né-óó, mbéndé eesaa nén bán mod eébelē bwám á mbwe-mé-nkóme-áte."

¹³ Dóó álāngeé ane mod awē ekáá énwēē áá, "Sálé ekáá áte." Asále áde ane mod ásánlé ekáá áte, ekáá éndyéé mó bwám ámpē nēé échíníí.

¹⁴ Ade nén ábénlédé, Befarisia bémbíd á ndáb e mekáne, bébootéd Yesue ahāge, áwúú mó.

Yesue, mbālede awē Dyöb ápwédé

¹⁵ Yesue ambíí áá béhāgke mó. Nē démbēl anhidé áde abwóg á hōm. Ade áhídté, ndun e mod enhíd mó, anchoód-te bad bé nkolé bésyāā.

¹⁶ Bonj ansím bō etúú áte áá béélāngē bad nyaa e mod eche módíí.

¹⁷ Ambel nén álóned e'yale ábe Dyöb dénlōmēnnē nkal é'dáōdāj Yesayaa áá,

¹⁸ "Nyénōne', awēm mbālede nén awē rípwédé, ndáá mó nwógne-'e mó menyīnge.

Mēlōm échēm edáōdāj ébē ne mó.

Abíded mbakú echē etyéémé áftínté e bad ábe béesē bad bé Israel.

¹⁹ Eebeléé nswāj ne bad, éetógé-'áá.

Béewóg-kaá mó ehób á dyad-té.

²⁰ Eekógédté ngēn echē enógké, éedíméd-taá etrukánj éche éhede adím.

Abel nén kóōj né mbeltéd ní bwám múmó rítédé etāl.

²¹ A dīn áde dóó bad ábe béesē bad bé Israel bésummé nlém."

*Bad bán Yesue abenlaad
ngtne eche Belzebul*

(Mak 3.20-30; Luk 11.14-23)

²² Dóó bépééné mod wēē Yesue, awē ankwē ndím, ákwē-'e ebóbé áyāle edáōdāj é mbéb émbē mó áte. Yesue anchoód mó. Ambootéd anyínen, áhōbē-'e akan.

²³ Ade bad bésyāāl bényíné nē, yāl enkóm bō áte bwāmbwam. Bēn ne bēn bēmbootéd ahób nén bán, "Ehele-se ébē né anén mod adíí mwān a mbyaa míme Dabide awē bésiné-yōó?"

24 Boŋ áde Befarisia béwógé nê, bénhōb bán, “Saá ngine eche Belzebule awé akamlan e’daádəŋ bé mbéb chōo ábenladté ábíded bad e’daádəŋ bé mbéb áte-ye?”

25 Yesue ambíí nímāb mewēmten, né-óó, anláá bō aá, “Aloŋ ké ahéé áde ákábné áte, boŋ nchemten méesž, débēb. Dyad ké áhéé-’ε, ké’ε abum á ndáb áde ákábné áte, boŋ nchemten-ne méesž, déétyēmēē.

26 Né-óó, nzé Satane awanne Satane, né awanne eche yál. Chán-nō nímē nkamlen méhenlé atyéem?

27 Nzé ngine eche Belzebule chōo mbenladté ábíded bad e’daádəŋ bé mbéb áte, né ngine eche nzé-’ō áben bad ábe bébíde e’daádəŋ bé mbéb bébenladté? Bēn bōo békwid nyé nkáá.

28 Boŋ ngáne édíí nén bán ngine e Edaádəŋ é Dyōb chōo mbenladté ábíded bad e’daádəŋ bé mbéb áte, né álumte nén bán nkamlen ní Dyōb nřpédé áfinté echēn.

29 “Mod eéhēlē-se asól á ndáb e mod a ngine se ádūm ábē bwēm ésebán asebpé mō ahaŋ. Amaa-’áa mō ahaŋ boŋ atéd ábē bwēm é’syāál.

30 “Kéznzé awé éesž ne me, né atāŋgan me. Kéznzé-’ε awé eewōŋgán me álad, né apáa páán.

31 Né-óó, nlāŋge nyé meé, Dyōb délagsén bad mbéb ké řihéé nímē bébélé ne nzyāŋ ké ehéé eche bésyáá Dyōb. Boŋ kéznzé awé ahóbé e’bébtéd é’ mekan tāŋgene Edaádəŋ éche Esáá éekudté alagsen.

32 Dyōb délagsén kéznzé awé ahóbé eyale é mbéb tāŋgene Mwān-a-Moonyoŋ, boŋ déelagsénné kéznzé awé ahóbé eyale é mbéb tāŋgene Edaádəŋ éche Esáá, ken bōob ké’ε á pōndé eché ehúe’.

A epum dōo bécheméé bwel (Luk 6.43-45)

33 “Nzé epum é’ bwel ébōó, né bwel ábe é’chyáá échē epum bōmpē é’bōó. Nzé epum é bwel ébébé, né bwel ábe é’chyáá échē epum bōmpē é’bébé. Ayāle á epum dōo bécheméé bwel.

34 Píí e nyš chén! Chán nyéhēlé-se nyéhōb mekan mé bwām, áde nyé bēn nyedíí mbéb? Mam nímē řlóné mod á nlém-tē, mō-’áa mébíde mō á nsál.

35 Mod a bwām abele bwām áyāle é’bíde mō á nlém-tē wéε bwām é’kōŋnéde. Mod a mbéb-pe abele mbéb áyāle řbíde mō á nlém-tē wéε mbéb řkōŋnéde.

36 Nlāŋge nyé nén meé, á mbwe nímē Dyōb dékáádté bad bé nkōŋsé, mod téé ábē nzom eché enkəŋ boŋ ahób ekúkú é eyale téé échē ámbídedté á nsál.

37 Né-óó, kéchéé éche wénhōbpē chōo ékəŋ boŋ ésūū nzom káa ékwe nkáá.”

Béhédné Yesue e’chemléd (Mak 8.11-12; Luk 11.29-32)

38 Dōo donge dé bemeléde bé mbéndé ne Befarisia bélāŋgeé Yesue nén bán “A-meléed, sēhede nén bán élúmed sé e’chemléd ábe é’lúmte nén bán echoŋ ngine ehúú ne Dyōb.”

39 Yesue antímtén bō aá, “Echén ebébtéd é nyoŋgel, nyéhēdēē Dyōb awógen, nyéhēde-’ε e’chemléd bé menyáké! Boŋ nyéekudté nzése e’chemléd bé menyáké ábe nkal é’daádəŋ Jonaa.

40 Jonaa ambé e’pun é’láán á abum á súu e mbáá-tē. Melemlem dōo Mwān-a-Moonyoŋ ábēē á ndōob-sé e’pun é’láán.

41 A mbwe mé nkáásé, bad bé Ninive býnyemé á soŋ-tē nchoo ne enén nyoŋgel e bad. Bétýēm mbōŋ eché ékwíd enén nyoŋgel e bad nkáá, áyāle áde Jonaa ákánlé’áa bad bé Ninive eyale é Dyōb, béntéde abel dé mbéb. Boŋ mod adé hén bōob awé atómé Jonaa, boŋ nyéewóglánné mō.

⁴² A mbwε mé nkáásé, mmwaád awě akamlánnáá alonj á Seba, anyemé á soŋ-tê, nchoo ne nyongel e bad bé' chii, átyeēm mbónj eché êkwid bó nkáá. Békwe nkáá áyāle áde Solomone áyágté'áá, ane mmwaád ambíd se nchabnede wεε nkónj sé rísogé áhye dé awóglen mam mé debyéé nime Solomone áyágté'áá. Bonj chii nēn mod adé hēn awě atómé Solomone."

*Nzé edǎǎdǎŋ é mbéb
étimé mod á yǎl ámpε
(Luk 11.24-26)*

⁴³ Yesue ambád ahób áá, "Nzé edǎǎdǎŋ é mbéb ébidé mod áte, ébelé ébwāgε á ehýāŋge áhed abwóg áde ékómmeé áte. Nzé éekude,

⁴⁴ ébelé éhób áá, 'Měťim ambíd á ndáb eche mémbidť áte.' Ape áde épagkε ébelé étán néε chómchóm éesaá á ndáb-te, néε ndáb ésaá áte ne néε bénábpé-'e chó áte.

⁴⁵ Héε ékagkε bǎǎb, éke épēēn e'dǎǎdǎŋ bé mbéb bεmpēe saámbé ábe é'dé ebébtéd tómaa mwēn, bonj é'hye é'sól ane mod áte, é'bwóg-ke e'dii áhed. Enε pón dé, ane mod abág ebébtéd tómaa ngáne ánsēbēē abē. Né-ǎǎ, nē dǎǎ ébenlédťe ne nyongel e ebébtéd e'chii."

*Tǔmbé eche Yesue
(Mak 3.31-35; Luk 8.19-21)*

⁴⁶ Ade Yesue álāŋgεé bad nímén mekan, nyaá ne Yesue baányan bεmpě bétýéém á ebwóg-te. Béhédé'áá Yesue ábel bonj bǎǎbǎǎ békál.

⁴⁷ Hē dǎǎ mod nhóg álāŋgεé Yesue áá nyaá ne baányan bépédé, bésine mó ebwóg-te, ákalen mó.‡

⁴⁸ Héε átímténé ane mod áá, "Nzéé adé echēm nyan, benzéé-'e bédé bǎnned?"

⁴⁹ Hē dǎǎ Yesue ányítanné ábē bembapεε ekáá bonj áhǎbē áá, "Echēm nyan ne bǎnned bǎǎ bēn!

⁵⁰ Kénzéé awě abele mam nime awēm Titée awě adé ámín áhedéé adii mwānned abé-'e echēm nyan."

13

*Ngan e mbál-e-bū
(Mak 4.1-9; Luk 8.4-8)*

¹ Mmē mbwε mén ambíd e nē, Yesue ambíd á ndáb-te wεε ámbēē, áke ádyēē áse á nkin mé edib-é-nzab é Galilia, áyáged bad.

² Bad ábe bεmpě áhed béntǎmtēn abuu áte. Nē dēnkǎŋ ansól á bǎle-tē, ádyēē áse áyáged bó. Abé bad bésýāǎl bétýeēm á nkin bεwóglān mó.

³ Abēnládtáá ngan áyáged bó mekan híin. Ankalé bó ngan áá, "Nkwel-é-nzag nhóg anké mbál asob á nzag-té.

⁴ Ade ásobéé mó nē, donje dénhūn á nzii-tē, menǎn mēmpě, mémad mó asǎmted.

⁵ Donje dénhūn á meláá-tē wεε ndǎǎb énkēmbuú'é áte. Enwāmsēn abíd áse ngáne ndǎǎb énkēnchabpé áse áhed.

⁶ Bonj néε enyen é ngine épédé, énhýāād ábē bwēm é'wé-'ε, áyāle nkan ménkēnsónlé bǎ á ndǎǎb-tē bwām.

⁷ Mbál mēmpēe ménhūn wεε mekód médíí. Néε mekód mē mékwógé, mékán akwog áde ábē bwēm.

⁸ Bonj donje dé mbál démpēe dénhūn á ndǎǎb e bwām. Mmén mbál mémbid áse bwām, ríchyáá-'ε bwāmbwam. Donje dé e'sóg dénwālē mbwókel é mbum, donje móom ntóób, abíní-'ε móom meláán."

‡ 12:47 Donje á kálag dé e'só déewóó'é nímén nchoo.

9 Ade Yesue ámadé nê, ambád áte aá, “Kéznzé awè awóó metúu áwóge’.”

*Nzom echè ekáá bon Yesue
abnláád ngan áyáged bad
(Mak 4.10-12; Luk 8.9-10)*

10 Ámbíd e nê, bembapεε ábe Yesue bémpε mós benben bon bésédte mós bánen, “Cheé ekáá bon ébenláád ngan áyáged bad?”

11 Yesue ankwentén bó aá, “Dyób ábáge nyé kunze ábíi kun é nkamlen mí mín, bon ene kunze eébagnedεε ne bad bémpεe.

12 Kéznzé awè awóó nsónten ní kun é nkamlen mí mín, Dyób débád mós míme nsónten ábe, ábel nén átómten awóy. Bon kéznzé awè eewóo, Dyób dékobén mós ké mwá nsónten awè áwóó.

13 Nzom echè ekáá bon níkanlé bad ngan edii áyále bényine’, bon béechemézé, béwóge’, bon béésóntänné.

14 Nén álónte e’yale ábe Dyób dénlómenné nkal é’dáádəy Yesayaa aá, ‘Nyéεwóg awóg-ne-awóg bon nyéesónténné, nyéenyín, anyín ne anyín bon nyéechemmé.

15 Nhóbe nén áyále ábén bad béehelézé dyam ayáge ámpε.

Békólé metúu, béládé-ε míd. Béewógké, béenyín-naá dyamdyam. Nzé énkémbé nê, né bényín, béchēm-’ε.

Né béwógεn metúu, nlém mímb-πε nísonnten.

Nzé bébélé-’ε nê, né bétimén me, né méchoód-te bó.’”

16 Héε Yesue ábádeé ábε bembapεε aláa aá, “Nsimé níde ne nyé áyále nyényine’ mam míme nyényinéé, nyéwógε-’ε mam míme nyéwógεé.

17 Ne mbále, nlánge nyé nén meé, bekal-bé-e’dáádəy ne bad bé Dyób híin bēnwanén ányín mekan míme nyényiné ne áwóg mekan míme nyéwógε bon bēnkényinné, bēnkénwóg-kaá.

*Yesue atógké ngan e nwén-é-mbál
(Mak 4.13-20; Luk 8.11-15)*

18 “Bóob-բóó nyésónten ngáne enén ngan e nwén-é-mbál edii.

19 Nzé mod awóge eyale tǎngene nkamlen mí mín, bon eesóntene chós, Satane abelé áhyε, ahúd mós chós á nlém-té. Echén ndín é bad edii nēngáne mbál míme níhúné á nzii-té.

20 Mbál míme ménhūn á meláá-te nílúmte bad ábe békobe’ eyale é Dyób ne menyinge ábwóg-ábwóg áde béwógé chós.

21 Bon éché eyale ééwennáádté bó á nlém-té. Bédúbpe chós á esón é pónde bon nzé ndutul ne metake bépédé áyále éché eyale, bédol yál ámbíd.

22 Mbál míme níhúné á mekód-te nílúmte bad ábe béwógé eyale é Dyób, bon kásy ne á asóg, mpúlé mé nkóysé ne adəy dé abud á bwēm awóy ákán bó nlém áte. Nē ábele’, béehelézé ahənylen ábel mam mé bwám.

23 Mbál míme mós-’ε méntán kase e ndəb nílúmte bad ábe béwógé eyale é Dyób bon bésóntán-ne chós. Ábén bad bébele kase é mekan nēngáne é’sóg é’ ngun ábe é’wánlé mesongé mé mbum é ngun mbwókel móom ntóób, ne móom meláán.”

Ngan e mesison

24 Yesue ankalé ene ndun e mod ngan empée aá, “Nkamlen mí mín níde nēngáne mod awè awéné kunze é mbál áwé nzag-té,

25 bon ámbíd e nê, nkuu nhóg áde bad bémáá akún, mod á ekóyí awè ane mod nhóg, anké á nzag e ngun-té wé, awén mbál mé mesison

26 Ade ngun ché ébóótédé akwog, dós bad bényiné bán mesison mómpε mékwoge’ áwéd-te.

²⁷ Bembəlede ábe ane nwóó-nzag bəmpě áwē, bésedte mó bánken, ‘A-Sán, éesaá mbále bán, mbál ní ngun ní bwám móó wénwənnē á nzag-tē-ye? Chán ébēnlédé boŋ mesisoŋ mékwōg áwəd-te?’

²⁸ Dóó ákwəntanné bó aá, ‘Mod á ekoyí awēm nhóg mó awéné nímé mesisoŋ.’ Abē bembəlede bənsédéd mó bánken, ‘Séke séhub mesisoŋ mé áse-ye?’

²⁹ Ankwəntén bó ámpě aá, ‘Aáy. Nyééhūbē’, áyāle nze nyéhóbé bán nyéhūbe’, nyééhūbén bóobe ngun.

³⁰ Nyémwē ngun bóobe mesisoŋ békwoge’ káŋŋ ne áde pónde épeé eche bepádtē ch́. Ene pónde dóó mēláā’ é bepád mēé, bésébe bēhūd mesisoŋ, bēlad mó áte boŋ béhyáád mó. Ambíd e nē, dóó bepádtē ngun, bēbānē ch́ áwēm etág-te.’ ”

Ngan e mbál-e-bū

(Mak 4.30-32; Luk 13.18-19)

³¹ Yesue ankalé ene ndun e mod ngan empée aá, “Nkamlen ní mín rídé nēŋgáne mbál-e-bū eché mod átédé boŋ awén áwē nzag-tē.

³² Mbál-e-bū edé mwāmpin bwāmbwam nze bēhāgténé ch́ ne mbál mémpēe. Boŋ nze ekwogé, ekále’ tómaa mel mėsád mėsýāā. Menən méhyag-ke múm alón á ngen-tē.”

Ngan e esulten

(Luk 13.20-21)

³³ Yesue ambé ákalé bó ngan empée aá, “Nkamlen ní mín rídé nēŋgáne esulten éche mmwáád ámuúnédé asii á pān é mbumé ní ngun éláán káŋŋ ésure.”

Nzəm eché ekáá boŋ Yesue

ábēnláád ngan

(Mak 4.33-34)

³⁴ Yesue abēnládtáá ngan áyáged bad. Eeyágte’aá dyamdyam ésebán abēnlédé ngan.

³⁵ Ambel nén álóned e’yale ábe nkal e’dáádəŋ ánhəbpě nén aá, “Mēbēnléd ngan nze nhóbe wēé bad. Mēyáged bó mam nime bėnkėmbíí’ é bootya á mbooted mé nkōŋsé.”

Yesue atógké ngan e mesisoŋ

³⁶ Yesue antedé ene ndun e mod, áke asól á ndáb-te. Ahed dóó abē bembapēe bétáné mó, boŋ bēláŋgē mó bán, “Tógnéd sé ngan e mesisoŋ.”

³⁷ Yesue antimtén bó aá, “Mod awé anwén nímé mbál ní bwám adii Mwān-a-Moonyon.

³⁸ Nzag edii nkōŋsé. Mbál ní bwám rídii bad ábe bédé áse e nkamlen ní Dyōb. Mesisoŋ médií bad ábe Satane.

³⁹ Mod á ekoyí awé ane nwóó-nzag-ke, awé anwén mesisoŋ áwē nzag-tē mó adé Satane. Pónde eche bepádeé ngun ch́ edé asóg dé nkōŋsé. Bepád bē ngun-ne bédii ángel.

⁴⁰ Ngáne bēladeé mesisoŋ áte boŋ béhyáád mó, melelem nē dóó ébēē ne bad ábe Satane, nze nkōŋsé nípedé á asóg.

⁴¹ Mwān-a-Moonyon álom éche ángel áhúd bad ábe bēbēlte bad bēmpēe mbéb, ne bad bésýāā ábe bēbēle mbéb.

⁴² Bēbwēm bó á dū-á-muú, áhed-taá bēchyé’ é, bēdyāg-ke mesoŋ á nsəl.

⁴³ Ene pónde bad ábe bēmbēl-le ngáne Dyōb áhedeé, bēpənē’ nēe enyen á nkamlen wēé echab Sán. Mod ké ahéé awé awóó metúu, áwóge’.”

Ngan tēŋene Nkamlen ní mín

Ngan e nhon nime mēnkoŋnéd

⁴⁴ Yesue ambád ngan empée aá, “Nkamlen ní mín rídé nêngáne nhon níme mênkonhéd á nzag-tê, bonj née mod nhóg ádíbté mó, akútén mó. Menyíngé níme ámbèè mênkàñ anke bwëm é’syāāl ábe ánwōngē asóm, ábel nén áke áchan ene nzag.

Ngan e aladá dé etógnén

⁴⁵ “Nkamlen ní mín rídé nhəgtén ámpē nêngáne mod a nyongé awé ahédé’áá meláá mé etógnén níme rídé nkun bwāmbwam níme áchanéé.

⁴⁶ Anyín áde anyíné aláá áde átómténé abonj bwāmbwam, áde bésóméé, anké ábè bwēm é’syāāl asóm, áchan-ne dó.”

Ngan e mbínzé

⁴⁷ Yesue ankāl ngan empée aá, “Nkamlen ní mín rídé nêngáne mbínzé eche bekób-bé-súu bébwémé á edíb-te bonj békób nyaa é súu ésyāāl.

⁴⁸ Ade mbínzé é máá alón, bëndól chó á nkin, bédyēé áse ábon súu áte. Eche émbonj adyé bēnhē chó á melongé-te. Eche chó-’é enkēmbonj adyé, bēmpím.

⁴⁹ Né-óó enén ngan elúnte ngáne asóg dé nkōñsé débēē. Dyōb délóm éche ángel áhúd bad bé mbéb átúnté e bad ábe bésáá.

⁵⁰ Bébwēm ábè bad á dū-á-muú. Ahed-taá béchyeé’é bédyāg-ke mesonj á nsał.”

Ayóge dékōālē ne dé nchun

⁵¹ Yesue ansédéd ábè bembapēē ké bésóñténé nímén mam. Bēnkwen-tén mó bán bésóñténé.

⁵² Né-óó Yesue anláá bó aá, “Meléede a mbéndé ké ahéé awé ayóké tñngene nkamlen ní mín adíi nêngáne nwóó-ndáb awé abidte bwēm bé ekóólé ne bé nchun wéē ákongéé bwēm.”

Bad bé Nazaret béekobéé Yesue

(Mak 6.1-6; Luk 4.16-30)

⁵³ Ade Yesue á máá ayóged ne ngan, anhidé ádé abwóg á hóm,

⁵⁴ asú ámbíd áwe dyad wéē ámbídtē. Awed ayógté’áá bad á ndáb e mekáne. Bad ábe bēnwōg ngáne ayógtéé, yāl enkóm bó áte bwāmbwam. Bésédte bánken, “Héé múmó ákúdé enén ndín e debyéé? Chán múmó ámwagké-’é nímén menyáké mésyāāl ábel?

⁵⁵ Kíné saá mwān a kápéntaa adíi-ye? Saá Maria achyáá mó-ye? Kíné saá Jemse, Josebe, Simone ne Judase bóó bédé baányan-é?

⁵⁶ Baányanj bé bebaád bésyāāl-le ámpē bédyēé’é á dyad-tē hén ne syānē-ye? Héé ákúdé enén ndín e debyéé? Héé ákúdé enén nyaa e ngine éché ábenléé níme menyáké?”

⁵⁷ Né-óó, bēnkóó Yesue. Anláá bó aá, “Nkal e’ dəáðəñ awóó’ edúbé hóm ásyāāl étóméé áwé dyad ne áwe túmbé.”

⁵⁸ Ngáne bēnkēndúbéé Yesue, enkēmbenléé menyáké híin áhed.

14

Kwééd echē Jone Ndusenē

(Mak 6.14-29; Luk 9.7-9)

¹ Ene pónké Herode awé akamlánnáá alonj á Galilia anwóg mam níme Yesue ábélé’áá.

² Dóó álángéé ábè bembəlede aá, “Anén mod, Yesue, adíi Jone, Ndusenē awé ammad awé bonj apuúdé. Née ákásá bonj awónj ngine ábel nímén menyáké mésyāāl.”

³ Herode anhób nê áyāle anlóm bad aá békòb Jone, béhanj mós, béhé-'ε mós á mbwóg. Ambel nén áyāle mwaád, Herodyase, awě mwānyaj Filibe ánsēbēē awóh.

⁴ Herode anhé Jone, Ndusene á mbwóg áyāle Jone anláá mós nén aá, “Weewóó'ε kunze áwón Herodyase, mmwaád awě mwānyoj.”

⁵ Kénée Herode áhéde'áá Jone, Ndusene awúu, abédé mbwóg ne bad bé Israel. Bad bé Israel béndübē bán Jone adii nkal é'dáádaj.

⁶ Bonj Herode antim Jone awúu. Nén dēmbenléd epun-ée Herode ábélé'áá ngande áwēmtēn epun-ée áchyāādtē. Echē epun mwān-a-mmwaád awě Herodyase anság esáke á'só é' bad bésyāāl. Nén dénwōgēd Herode menyinge bwāmbwam.

⁷ Nén dēmbēl ambē mós akag. Anhób nén aá, “Mmwāg melē nén, mēbē we kéchéé éche éhédeé.”

⁸ Nyaa anláá mós chóm éche átāngéné sáá ahēden. Né-óó anláá Herode aá, “Bāg me nló míme Jone, Ndusene á taplēt-te hén bōób.”

⁹ Nén dénwōgēd kōh Herode ndutul bonj ngáne ámmadté melē amwé á'só wée ábē beken, ambéé kunze aá béhyene nló míme Jone ábē ane mwān-a-mmwaád.

¹⁰ Né-óó anlóm bad á ndáb e mbwóg ásél Jone nló.

¹¹ Bēmpēēn nló mímed á taplēt-te, bēbē ane mwān-a-mmwaád, mós-'ε ábē nyaa.

¹² Ambid e nē bembapēē ábē Jone bēnkē á ndáb e mbwóg bétéd mós ndim bēke béliime, bonj bēke bēlāngē Yesue dyam áde ábēnlédé.

Yesue adídté ndun e mod

(Mak 6.30-44; Luk 9.10-17; Jon 6.1-14)

¹³ Ade Yesue áwógé dyam áde ábēnlédé ne Jone, ansól á bōle-tē áke á abwóg á hóm wée abédé mwēmpēn. Bonj áde bad bēwógé bán Yesue amaá aké á bōle-tē, bēnchené mímāb myad békēēn mekuu áhíd mós ámbid.

¹⁴ Ade Yesue ábidé á bōle-tē, bonj anyin ndun e mod, antómtēn bó ngol abé, ámād-te bó nkole.

¹⁵ Ade bin é'boótédé ahín, ábē bembapēē bēmpē áwē, bēhōbē nén bán, “Hén adé á etūn-tē, pónde emaa-'ε atóm bwāmbwam. Láá ábēn bad bétime' á myad-tē míme méde bēnben, ábēl béchan ndyééd eche bēdyēē.”

¹⁶ Dóó Yesue átímtanné bó aá, “Béētāngēné aké. Nyébó nyébe bó chóm éche bēdyēē.”

¹⁷ Dóó bēhōbēé bán, “Sēwóó e'wele é'tāan ne súu ébe chēmpēn.” ¹⁸ Yesue aá, “Nyéhyēene'.”

¹⁹ Ade ábē bembapēē bépéénédé mós chó, anláá ene ndun e mod aá bēdyēē ásē á nkaákā mīn. Hē dóó Yesue awánlé ábē e'wele é'tāan ne échē súu ébe á mekáá bonj ánoné ámīn ásāgnān Dyób. Ankabtéd bó áte, bonj ábagé ábē bembapēē aá békabe ene ndun e mod.

²⁰ Bad bésyāāl bēndyē ene ndyééd békód, élyāg-ke ásē. Nēe bēládé echē elyāgé ásē, enlón e'lón dyóm ne é'be.

²¹ Mesongé mé bad míme mēndyē ene ndyééd mémbē ké e'kálé é'tāan. Mmē mesongé mé bad mébédé-ε baachóm. Bēnkētōngé bebaád ne bēndem.

Yesue akii á mendib-mīn

(Mak 6.45-52; Jon 6.15-21)

²² Ambid e nē, Yesue anláá ábē bembapēē aá, bésól á bōle-tē, békag á'só á múde mé edib-é-nzab mímíní, bonj álāngē-'ε ene ndun e mod aá bésūē' áwab mendá.

²³ Ade moosyā̄l áamá ake, Yesue anchágé á ekone m̄n ákáne. Ade ehintén emáá akwe, ambé abé áhed mwēmp̄en.

²⁴ Enén pónđé Yesue ábē bembap̄eē bēnchab b̄l̄e abēen áf̄nté e edib-é-nzab. B̄l̄e étágé'áá, béhele'áá ake á'só áyāle epub é nḡine émb̄id b̄ó á'so-te.

²⁵ Ep̄og é mbwēmbwe Yesue anké á mendib m̄n atán b̄ó.

²⁶ Ade bembap̄eē bényiné mod akag á mendib m̄n, bēn̄ə̄n̄éd, bélébé-'e esaad ne mbw̄og í nḡine, bēh̄ōbē-'e n̄n bán, "Nwú móo íd̄é."

²⁷ Abw̄og-ábw̄og Yesue anláá b̄ó áá, "Nlém mééh̄unē nyé, me-éé ndé. Nyéebáá."

²⁸ D̄óo Petro álán̄geé mó áá, "A-Sán, nzé edé bán mm̄on-éé edé, láá me íke á mendib m̄n n̄pe w̄éé edíí n̄é."

²⁹ Yesue anláá mó áá, "Hyāg." D̄óo Petro ábidé á b̄l̄e-tē ábootéd-te ake á mendib-m̄n āpe w̄éé Yesue.

³⁰ Bon̄ áde ányíné nḡane epub é nḡine étóm̄éé, mbw̄og ménk̄ob mó, ábootéd-te asú ášé á mendib-te. D̄óo álēbp̄é esaad áá, "A-Sán s̄on, w̄on̄ḡen me!"

³¹ Melemlem mé pónđé Yesue ansad ekáá, achás-'e mó, áh̄ōbē áá, "Chán adúbe ádíí we mwāmp̄ln̄ n̄n, cheé ékás̄ bon̄ nlém r̄h̄unē we?"

³² N̄éé Yesue b̄ó Petro bésólé á b̄l̄e-tē, epub éns̄og atóm.

³³ Ade n̄n ab̄enlédé, ábiníí bembap̄eē ábe bēmb̄ē á b̄l̄e-tē bēmb̄eé Yesue edúbé, bēh̄ōbē-'e n̄n bán, "Ne mbále, edíí Mwán á Dyōb."

³⁴ N̄éé bécháp̄é edib-é-nzab, bēmp̄ē á múde n̄m̄íníí, á mbw̄og e Genesaret.

³⁵ Ade bad ábe bēmb̄ē ád̄é abw̄og á h̄om̄ béchémeé Yesue, bēnl̄om̄ bad bán bēp̄een bad bé nkole bésyā̄l ábe bēbédé ene p̄ed e alon̄.

³⁶ Bad ábe bēmp̄eēn bad bé nkole w̄éé Yesue béchān̄ mó bán ámw̄e bad bé nkole bēsiten ké mesó mé mbóté n̄m̄ē. Né-óó bad bé nkole bésyā̄l ábe bēnsitén n̄ime mesó mé mbóté bēndyēé bwām̄.

15

Ayáged á bad bé' b̄óod (Mak 7.1-13)

¹ Ambid e n̄é Befarisia ne bemeléede bé mbéndé bēmb̄id á Jerusalem, bētān Yesue, bésed̄té mó bánken,

² "Cheé ékás̄ bon̄ áb̄on̄ bembap̄eē bēéh̄id̄é' ayáge áde áb̄ed betaa bétédnédé sé? Béewop̄p̄éé mekáá nyaa ech̄é éh̄edn̄éé bon̄ b̄edyē ndyēéd."

³ Yesue ankwentén b̄ó áá, "Cheé ekás̄ bon̄ nyēmp̄ē nyéeh̄id̄é' nḡane mbéndé e Dyōb éh̄ōb̄é áá débel, á etútú éche nyéh̄id̄éé ayáge ád̄en d̄en?"

⁴ Dyōb áh̄ōb̄é áá, 'B̄éé sóó ne nyon̄ edúbé.' Ah̄ōb-pe ámp̄é áá, 'Kenz̄éé aw̄é ah̄ōb̄é sáá ké' nyaa d̄yam dé mbéb̄ ayā́l b̄étānḡéné b̄ewúú mó.'

⁵ Bon̄ nyé, nyéyágte n̄n bán, nzé mod awóó ch̄om̄ éche ántānḡēnē sáá ké' nyaa aw̄on̄gen bon̄ alán̄gé b̄ó áá móš̄be Dyōb ch̄ó,

⁶ né éesaá n̄n bán atānḡéné sáá b̄ó nyan̄* ch̄ó edúbé ab̄een. Abel áde mod áb̄elē n̄é, né nyéetéd̄éé eyale é Dyōb n̄éé d̄yam á etútú éche nyéh̄id̄éé ayáge ád̄en.

⁷ Nyé bedog-badé! Nkal é'd̄oád̄ə̄n̄ Yesayaa antānḡén̄ áde ánh̄ōbp̄ē ne e'yale ábe Dyōb dénl̄om̄ēnn̄é mó t̄ānḡene nyé áá,

⁸ 'Ab̄en bad bēbage me edúbé é ns̄al nḡen, bon̄ n̄m̄ab nlém méesaá áwēm.

⁹ Edúbé éche bēbageé me éesaá d̄yamd̄yam, áyāle b̄éyágte bad áh̄id̄ mbéndé é baānyon̄ byánán̄ edíí mbéndé é Dyōb.' "

* 15:6 *Sád b̄ó nyan̄; don̄ge á kálag dé e'só déewóó'é b̄ó nyan̄.*

*Mam nĩme mēbele boŋ
mod eesáá' á'sō é' Dyōb
(Mak 7.14-23)*

10 Hée Yesue áchēnléé ene ndun e mod boŋ álāŋgē bó aá, “Nyéwóglēn, nyésōŋten-ne me!

11 Saké chōm éche ékag mod á nsal ébele boŋ mod eesáá' á'sō é' Dyōb, boŋ chōm éche ébide mó á nsal chōo ébele' boŋ eesáá.”

12 Ade áhóbē nē, dōo ábē bembapēé bépédé mó benben boŋ bésēdté mó bánken, “Ebíí nēn wēé dyam áde móhóbē ábébté Befarisia nlém á abum-e?”

13 Yesue ankwentén bó aá, “Bwel tēé ábe awēm Titée awē adé ámīn éewénéé, bēhūb bó áse.”

14 Nyéchene bó. Bédíi bad bé ndím ábe bélúmte bad bé ndím bēmpēe nzii. Nzé mod awē akwedé ndím atómne mod a ndím ampée, búmō bēhūn á echóg-te.

15 Petro anláá mó aá, “Tógnéd sé enén ngan.”

16 Hée Yesue álāŋgēé bó aá, “Káōŋ ne' bōob, ké nyémpē nyéesōŋténéé-ye?”

17 Nyéenyínéé nēn bán, chōm ké ehéé éche mod ádyédé, ésóléé mó á nsal, étim á abum-tē, boŋ ébidte mó á yāl-e?

18 Boŋ mam nĩme mod áhóbēé nĩbide mó se á nlém-tē. Mmēn mam mó-'aá mēbele mod boŋ eesáá' á'sō é' Dyōb.

19 Ayāle á nlém-tē dōo mewēmten mé mbéb méhúé'é nĩme mékəə boŋ ábelé mam mé mbéb nēŋgāne, ewūen, akáb dé mesón á ndáb e e'wōŋgē, echīb, abíd á mbōŋ é metóm, ne mehōben á mbíd.

20 Mmēn mam móo mēbele boŋ mod eesáá' á'sō Dyōb. Boŋ saké adyé á ndyééd áde éewobpēé mekáá ngāne bēhédeé, débēl boŋ eesáá.”

*Adúbe áde mmwaád a Kanahan
(Mak 7.24-30)*

21 Ambíd e pōndé, Yesue anhidé adé abwóg á hōm áŧīm á pəd e mbwóg echē enchiitēn myad mé Tirē ne Sidōn.

22 Hē dōo mmwaád a Kana nhóg awē adyéé'áá adē abwóg á hōm ápééné awē awē boŋ áhōbē nēn aá “A-Sāŋ, Mwān a mbyaa nĩme Dabidē, sōn wóg me ngō! Awem mwān a mmwaád atage bwāmbwam, áyāle edaádəŋ é mbéb édé mó áte.”

23 Boŋ Yesue ekēntimténné mó dyamdyam. Hē dōo ábē bembapēé bétánéé mó, boŋ bēcháā mó nēn bán “Láá anén mmwaád wēé ákag áyāle ahídne syáne ntəgag ámbíd.”

24 Dōo Yesue ákwentanné bó aá, “Bad bé Israel ábe bédé néé ndyōŋ ní mbód nĩme nĩbós bóo Dyōb álómé me awōŋgen.”

25 Néé ane mmwaád áwógé nē, ankwē Yesue á mekuu, boŋ ácháā mó aá, “A-Sāŋ, wōŋgén me.”

26 Dōo Yesue ákwentanné aá, “Eesaá bwām átéd ndyééd e bānbān boŋ ebwémé mbwé.”

27 Dōo ane mmwaád átimtanné mó aá, “Nē dēn A-Sāŋ, boŋ káōŋne mbwé édyág píuted é medyé éche ábab bésáá bēhúnté.”

28 Hē dōo Yesue ákwentanné mó aá, “A-mwān-a-mmwaád, ewóó adúbe ámbáá. Ebenled ngāne éhédeé.” Melemlem mé pōndé, ane mmwaád awe mwān-a-mmwaád andyéé bwām.

Yesue achōŋté ndun e mod

29 Yesue anhidé adé abwóg á hōm, ápōŋ á nkəg mé edib-é-nzab é Galilia. Anké adyéé áse á ekone mīn.

³⁰ Ndun e mod empĕ áwē. Bépééné'áá bad ábe bésyágté'áá, ábe bēnkwĕ ndím, ábe mekuu ménwĕē, e'bóbé ne ekud é bad bé nkole bēmpĕe. Bébánné'áá ábē bad bésyāā́l á'sō wĕē Yesuē, áchōōd-te bō.

³¹ Menyáké ménkōb ene ndun e mod áde bényíné nĕe bad ábe béēhōbe'aá akan nĕe béhōbēé akan. Ábe mekuu ménwĕē bentyēem bwām, ábe bésyágté'áá békag bwām. Ábe bēnkwĕ ndím bényínne'. Békéné Dyōb á bad bé Israel.

*Yesuē adíté ndun e mod
(Mak 8.1-10)*

³² Yesuē anchélé ábē bembapĕē, álāngē bō nĕn aá, “Ndé enén ndun e mod ngol áyāle békébē ne me e'pun é'láán, béēwōo-'áa chōm éche bédyáké bōob. Meēhēdĕē meé béhíde hĕn ne nzaa, áyāle béhĕle se béhún ásē á nzii.”

³³ Dōó ábē bembapĕē bē bésēdteé mó nĕn bán, “Héé syānē dékudté ndyééd á chyānge-tē hĕn echĕ ékwōg enén ndun e mod?”

³⁴ Yesuē ansadéd bō aáken, “E'wĕle é'tāj nyéwóó?” Bēnkwentén bán, “E'wĕle saámbé ne nguse é súu ésad.”

³⁵ Dōó Yesuē álāngé ene ndun e mod aá bédyēē ásē á ndōob-tē.

³⁶ Héē átédé ábē e'wĕle saámbé ne échē súu, ásāgnān Dyōb, ákabtáád bō áte, ábagé ábē bembapĕē, bō-'ē békabpé ene ndun e mod.

³⁷ Bad bésyāā́l bēndyē ene ndyééd, békód-te, kááj élyāg-ke ásē. Echĕ enlyāg ásē enlón e'lōj saámbé.

³⁸ Mesōngé mé bad míme méndyē ene ndyééd mébédé e'kálé é'niin. Mmē mesōngé mé bad mébédēē baachóm, bēnkéntōngé bebaád ne bēndem.

³⁹ Héē Yesuē álāngéé ene ndun e mod aá bésūē' áwab mendáb. Áde ámáá bō aláa nĕ, ansól á bōle-tē, áke á mbwóg e Magadan.

16

*Béhédné Yesuē
e'chemléd é' menyáké*

(Mak 8.11-13; Luk 12.54-56)

¹ Ambíd e nĕ, Befarisia ne Besadusia bēnkĕ wĕē Yesuē ákag mó. Bēnlā́ mó bán álúmed bō e'chemléd ábe é'huú ádyōb.

² Dōó Yesuē álāngéé bō aá, “Nzé ngukél epedé, nyēhōbe bán, 'Abobe áyage ámín, nĕ álúmtē bán bín béboj chán.’

³ Nzé bín é'sāngé-'ē, nyēhōbe bán, 'Abobe áyage ámín, bín-ne é'wábpé, nĕ álúmtē bán mbúú échā.' Nyēbíe' bín aláj ámín, ngáne bēbēē, boj nyēēhĕlēē mam míme mébēnlad chii achem.*

⁴ Echén ebébtéd é nyōngĕl, nyēēhēdĕē Dyōb awógen, nyēhēde-'ē e'chemléd bé menyáké! Boj nyéekudté nzése e'chemléd bé menyáké ábe nkal é'dáōdaj Jonaa bēnpĕn.” Dōó átédte bō, boj ákag.

*Esulten éche Befarisia ne Besadusia
(Mak 8.14-21)*

⁵ Yesuē ne ábē bembapĕē bēnchabé edib é nzab ámín, boj bembapĕē bēnchatén e'wĕle awále áyā́l.

⁶ Yesuē anlā́á bō aá, “Nyétéd pōndé ne esulten éche Befarisia ne Besadusia.”

⁷ Héē ábē bembapĕē bēn ne bēn bēbóótédé ahōb bán, “Ahóbé nĕ áyāle syā́ā deewānléé e'wĕle áyā́l.”

* **16:3** Donge á kálag déēwóó'ē e'yale ábē Yesuē ngáne é'ténlédé á nchoo 2 ne 3.

⁸ Yesue ambíí chõm-ée békálé. Dóo ásedtée bõ aáken, “Cheé nyé bèn ne bèn nyéhóbeé áyale e’wele ábe nyéewõó’é? Chán adúbe adíí nyé mwámpín nén?”

⁹ Káá nyé bõob, nyéesónténé-é? Nyémaá achaten ngáne méndidēē e’kálé e’ bad é’tán ne e’wele é’tán. Ambíd eché bémáá ene ndyééd adyé, e’lõñ é’tán eché enlyəg ásé énlõnné?

¹⁰ Nyéchaténé káá nyé adíde áde méndidēē e’kálé é’ bad é’niin ne e’wele saámbe. Ambíd eché bõmpē bémáá adyé, eché enlyəg ásé chõ-ε enlõn e’lõñ é’tán?

¹¹ Ade nílángé nyé meé nyétédēn esultēn pónde, saké ewele chēn chõo nḥóbé’áá. Nyétéd pónde ne esultēn é Befarisia ne Besadusia.”

¹² Dóo bembapēé bétimé asõntēn bán saké esultēn éche bébenlēé ewele chõo Yesue ahóbé’áá aá bétédēn pónde bon ayáged áde Befarisia ne Besadusia béyágté’áá dóo ákõjté’áá ahób.

*Petro ad Yesue mó
adé Ane-awě-Béwógté
(Mak 8.27-30; Luk 9.18-21)*

¹³ Yesue anké á mbwóg e Kaisaria Filipi. Ade ápédé áwed, dóo ásedtée ábē bembapēé aáken, “Nzé-módé bad bõ béhóbeé bán Mwän-a-Moonyon adé?”

¹⁴ Béntimén mó bán, “Donge á bad béhóbe bán edii Jonē Ndušene, bémpē bán Elaijaa, ábínií-’é bán Jeremayaa ké’ε nkal é’ dáódəj nhóg ampée.”

¹⁵ Héé Yesue ásedtée bõ aáken, “Bon nyébēn-ne, nzé-módé nyéhóbeé bán ndé?”

¹⁶ Simõn Petro ankwentén aá, “Wε-εé edé Ane-awě-Béwógté, Mwän a Dyõb áde adé á alongé.”

¹⁷ Yesue antimén aá, “Nnam ndé ne wε, a-Simõn, mwän awě Jonaa. Saké moonyon álángé wε nē, bon echem Sán awě adé ámín móo ahóbté wε.

¹⁸ Né-óo a-Petro nlanje wε,† wεé edé ndim-e-aláá. Ámín e ene ndim e aláá dóo mélõngē nímēm mwembé. Ké ngine e kwééd éhēnlé nímē mwembé ahóbed ásē.

¹⁹ Awõñ dóo mébeé mekií mé nkamlēn ní mín. Kéchéé éche ébéné á nkõjšé, né ébennédé ámín. Kéchéé-’ε éche ébágé kunze a nkõjšé, né ébágnédé kunze ámín.”

*Yesue ahóbé tãngene
nímē metake ne eché kwééd
(Mak 8.31-9.1; Luk 9.22-27)*

²⁰ Héé Yesue ásimēé ábē bembapēé etúu áte nén béhóhbē bán móo módē Ane-awě-Béwógté.

²¹ Bootya ene pónde, Yesue ambootéd ábē bembapēé alúmed áte aá móótãngēnē aké á Jerusalem. Áwed-taá mókudté metake hiiin á mekáá mé bad bémbáá, beprise bémbáá ne bemeléede bé mbéndé. Aá béwũ mó, bon e’pun ábe é’lõnténé é’láán móõpuu.

²² Dóo Petro átimné Yesue á nkag bon ákagé átimed mó áte, ahóbē nén aá, “A-Sán, Dyõb déekwenténne mbéd aá nén ábenled ne wε.”

²³ Héé Yesue ákúnnédé bon ahóbē wéé Petro aá “Hidé me á’sõ-te, a-Satan! Cheé ékóá’é me ábel mewēmtēn mé Dyõb? Ehóbe nē ne mewēmtēn mé moonyon saké mé Dyõb.”

²⁴ Dóo Yesue álángéé ábē bembapēé aá, “Kéznéé awě awémténé me ahíd, atãngéné ásob yál mendíb, ápēm adē awõg, bon ahíde me.

† 16:18 **Petro:** á ehób é Grikia adii ndim e aláa.

²⁵ Ayāle kénzée awē ahede adē alongé ason, ābōd dō. Kénzée-’e awē ābōd adē alongé ayāl echēm, ākud dō.

²⁶ Nsyāñ rñhéé mod ākudté nzé akudé nkōñsé rñsyāñ bonj abódé adē alongé? Ké-’e, cheé mod áhēlese ábe ākōde adē alongé?

²⁷ Nlānge nyé nímén mekan ayāle Mwān-a-Moonyonj āpē ne ehúmé éche eche Sāj nchoo ne éche āngel. Ene póndé dōo ākōgsennē ké’ē ānamédté kénzée tāngene chōm éche āmbenlé.

²⁸ Ne mbále nlānge nyé nén mēé donge á bad átínté echēn béenyínénne kwééd díd ešebán bényíne nēe Mwān-a-Moonyonj āpééné nímē nkamlen á nkōñsé.”

17

Yāl ehāñléne Yesue

(Mak 9.2-13; Luk 9.28-36)

¹ Ambíd e epun ntóób Yesue ankeén Petro ne Jemse bó mwānyanj Jone á mbōod echē echabé amín. Bēnpēn-’eé bēmbē áhed.

² Dōo ábē bembapēe bényíne nēe áhāñléne, e’só é’pene mō á nló nēngáne enyen. Mbóté chō-’e épūbē mō féréd emwáá-’e áte.

³ Abwōg-ābwōg, ábē bembapēe bényín nēe Mosee ne Elaijaa bēbídé tǎléd, bōbē Yesue békale’.

⁴ Dōo Petro álāngéé Yesue aá, “A-Sāj, ébóo ngáne syāā dédíí hén. Nzé edáá, mēlōñ e’bem é’láán, échōñ, éche Mosee ne éche Elaijaa.”

⁵ Eépedéé ké amad á nsal bonj mbag echē ekine áte ékūtān bó. Héé bēwógéé ehób ébide á mbag-té nén, “Awem Mwān a nlém nén, awógte me menyinge. Nyéwógne mō.”

⁶ Ade ábē bembapēe bēwógé echē ehób, bēmbwōg mebóbōñ, bésōñ-’e e’só áse ne mbwōg ní ngine.

⁷ Dōo Yesue āpédé wēe bēmbēē bonj ábānē bó ekáá á yāl, áhōbē aá, “Nyéhíde áse, nyéebáá.”

⁸ Ade bényéne nló amín, bényín Yesue mwēnpēn.

⁹ Ade bóbōo bésudeé á mbōod mín nē, dōo Yesue ásiméé bó etúu áte áhóbe’ aá, “Nyéelāngé modmod dyamdyam áde nyényíne káññ ne á póndé echē Dyōb dépuúdté Mwān-a-Moonyonj á kwééd.”

¹⁰ Héé ábē bembapēe bésedteé mō bánken, “Cheé ekáá bonj bemeléede bé mbéndé bēhóbé nén bán Elaijaa atāngéné asébe dé ape bonj Ane-awē-Béwógté āpē?”

¹¹ Yesue antíntén bó aá, “Ne mbále, Elaijaa atāngéné asébe dé ape, atíí-’e mam mésyāā.

¹² Bonj nlānge nyé nén mēé Elaijaa ammāđ ape, bonj bad bēnkēnchemmé mō, bēmbēl-le mō ngáne bēndāngé. Melemlem né-’aá Mwān-a-Moonyonj átagké áwab mekáá.”

¹³ Enén póndé dōo ábē bembapēe bésōñtēnnē nén bán Jone, Ndusene mōo áhóbéé.

Yesue achōñté mwān a mwēnchóm

awē edááđāñ é mbéb émbēē áte

(Mak 9.14-29; Luk 9.37-43a)

¹⁴ Ade Yesue ne ábē bembapēe bétímé ámbíd ámpē bonj bétán ndun e mod, mod nhóg ampē áwē, akóg mebóbōñ, bonj áhōbē nén aá,

¹⁵ “A-Sāj sōñ, wóg awem mwān ngol. Awem mwān a mwēnchóm akonle nkole mé ekikíd, atage bwāmbwam. Ayōgké ahún káññ ne á muú-te ne á mendíb-te.

16 Mempoéén mó wéε ábōŋ bembapεε, boŋ béheleé mó ahood.”

17 Dóo Yesuε átimtanné aá, “Wáá! Nyé bad bé’ chii, mbéltéd nímēn méetyéeméé, nyéewóo-’áa adúbe. Chán mépéé nyé adyen hén-eé? Chán mépéé nyé awesen-é? Hyenáád me mwán awed hén.”

18 Dóo Yesuε ákamlané edáádəŋ é mbéb éche étágté’áa ane mwán aá ébíd, boŋ ébíd-te. Abwōg-ábwōg ane mwán áchōŋ-’ε.

19 Ambíd e pónde bembapεε ábe Yesuε béntān mó, boŋ bésédte mó á kun-té nén bánken, “Cheé énkəŋ boŋ sénkənhél éché edáádəŋ é mbéb abided?”

20 Dóo Yesuε átimtanné bó aá, “Ayāle adúbe áde nyé mwāmpīn. Ne mbále nlanje nyé nén meé, nzé nyéwóo adúbe áde áde mwāmpīn nēŋgáne mbál-e-bū, né nyéεkamlén échén ekone bán éhide hén, étim híníí, étim-me nē dēn. Dyam ké ahóg déetómme nyé áte.

21 Nyéhele-se nyébidéd enén ndín e edáádəŋ é mbéb nzé nyékānne, nyédidé-’ε yāl nzaa á mekáne-tē.”*

*Yesuε ahóbe ámpε
ngáne bad béwūú’ é mó*

(Mak 9.30-32; Luk 9.43b-45)

22 Yesuε ne ábē bembapεε bēnladén áte hōm ahóg á mbwōg e Galilia. Héε álāŋgeé bó aá, “Bébeé Mwán-a-Moonyoŋ á mekáá mé baányoŋ. Bó-’aá béwūú mó.

23 Boŋ Dyōb dépuúd mó ámbíd e e’pun é’láán.” Ade bembapεε béwógé nē, bēnwōg ndutul bwāmbwam.

Yesuε asāŋgé tááse e Ndáb-e-Dyōb

24 Yesuε ne ábē bembapεε bēmpε á dyad á Kapenahum. Ahed dóo bad ábe bésāŋté’áa tááse e Ndáb-e-Dyōb bētāné Petro boŋ bésédte mó bánken, “Kíné awen meléede eésāŋgéé tááse e Ndáb-e-Dyōb-e?”

25 Petro antimtén bó aá, “Asāŋge’.” Ade Petro ásólé á ndáb sólén, eépedéé dyam ahób boŋ Yesuε ásedte mó aá, “A-Simōn, chán ényíné ádén akan? Benzébádé kəŋ é nkōŋsé ésaŋtéé e’sāŋgé ké’ε tááse? Bán bé alon-ε, ngé beken?”†

26 Petro ákwentén aá, “Beken.” Yesuε aá, “Nē álúmte nén bán, bán bé alon bēetāŋgenéé asaa.

27 Boŋ ké nē, ábel nén deélinśé ábē bad ábe bésāŋte tááse, ké ébwēm e’chōb á edib-é-nzab-té. Súu eche wésēbēε akób, éneede chó nsəl áte, wētān mōné míme mékwog sóo tááse asāŋned áwéd-te. Téd mó, ésaŋned sóo.”

18

*Nzéé atómténé mod ambáá
abé á’só é’ Dyōb?*

(Mak 9.33-37; Luk 9.46-48)

1 Eebeméé áte ámbíd e nē, bembapεε ábe Yesuε bēmpε áwē, bésédéd mó bánken, “Nzé-módé-’ε atómténé mod ambáá abé á nkamlen mí mín?”

2 Hé dóo Yesuε áchēnlé mwēndem nhóg, áfíidé mó áwab fínté,

3 boŋ áhōb aá, “Ne mbále nlanje nyé nén meé ésebán mod ahəŋléné áde alongé boŋ abé nēŋgáne anén mwán, eéhēlēε-se asól á nkamlen mí mín.

4 Né-óó, kénzéé awé asúdté yāl nēŋgáne anén mwán né móo atómténé mod ambáá abé áfínté e bad ábe bédé ásé e nkamlen mí mín.

5 Kénzéé awé akobé enén ndín e mwán á dín adēm, né akobé me.

* **17:21** Donje á kálág dé e’só déewóo’ é mímén nchoo. † **17:25** Ene pónde beken bóo bésāŋgé’áa tááse é kəŋ.

⁶ Bonj kénzée awë abělté enén ndín e mwëndem awë adúbpé me mbéb, émbē mbonj né bēntās ene ndín e mod sánkalaa a aláá á nkónj, bonj béhúnéd-te mós wée edib é nkwe' étomténé achab áse.

⁷ E'beb é' yál áte ne nkónsé áyāle mekəgsen nime mébelte bad mbéb. Mekəgsen méťāngéné ape, bonj e'beb é' yál áte ne mod awë abělté mod ampée mbéb.

⁸ Nzé échon ekáá ké'ε ekuu ébelte we mbéb, esél chós, épim. Edé mbonj we ákud alongé ne eped é yál tómaa we áwónj mekáá mébe ké'ε mekuu mébe bonj bébwém we á muú nime méédimé'.

⁹ Melemlem nzé ádonj díd ábelte we mbéb, ehúd dós, épim. Edé mbonj we ákud alongé ne díd ahóg tómaa we áwónj míd mébe bonj bébwém we á dū-ámuú.

Ngan e ndyoyj ní mbód nime mémbōō

(Luk 15.3-7)

¹⁰ “Nyényín nén bán nyéetédéé nímén mpín ní bán ké nhóg nkónjtéd, bán méesaá etógnén. Nlānge nyé nén meé ángel éche énoné' bós ébág á'só ábe echem Sán awë adé ámín áhóbe bós.*

¹² Chán nyényíné adén dyam? Nzé mod awóó mbwókel é ndyoyj ní mbód, bonj nhóg mbósó, ngómé átedé nímíní móom mé ndyoyj ní mbód abog ne abog wée bédyáké medyé á ekone mún áké dé ahéd nímé nhóg nime mbósó?

¹³ Ne mbále nlānge nyé nén meé, nzé adlbté-ε mós abelé awógén mós menyīnge tómaa nímíní móom abog ne abog nime ménkēmbōō.

¹⁴ Melemlem nē dōō echen† Sán awë adé ámín éhedéé aá ké mpín ní mwëndem nēé nímén mbósó.

Mwānyoyj awë aběnlé we awusé

¹⁵ “Nzé mwānyoyj aběnlé we awusé, tán mós wée nyúmō bad bébe bēnpen nyédíí, échu mós dós aláá. Nzé achemé adé awusé, né nyé mwānyoyj nyétímé áse.‡

¹⁶ Bonj nzé eékwentene aá mópānné we, etéd mod ampée nhóg ké'ε bébe ékēēn awë, ábel nén, 'Mbéb ké ríhée nime éhóbé wée abelé we nbyēn ne mbónj ébe ké'ε élaán.'§

¹⁷ Nzé eékode káñjne chóm-ée éché mbonj éhóbé, épēēn mós á mwembé. Nzé eékwentene ké bós awóglēn, etéd mós nēé mod awë eedúbpe áyāl e nime nsónjten káa nēngáne nsaad-a-tááse.*

Yesue aá bēmapēe bēwóó ngīne ákónj ne ábe dyam kunze

¹⁸ “Ne mbále, nlānge nyé nén meé, kéchéé éche nyébéné á nkónsé ébēnnédé ámín. Kéchéé-ε éche nyébágé kunze á nkónsé, ébágnédé kunze ámín.

¹⁹ Nlānge nyé ámpē nén meé, nzé nyé bad bébe nyéchēmténé áyāle kéchéé bonj nyéhédé chós á mekáne-té, echem Sán awë adé ámín ábē nyé chós.

²⁰ Ayāle wée bad bébe ké'ε beláán beládné áwēm dīn, mémpē ndé áwab tinté.”

Ngan e mod-a-nsón a kōñ awë enkēnlagśén waab

* **18:10** Donje á kálag dé'só ábáde nchoo 11: Nyēbli nén bán Mwān-a-Moonyoyj apedé ásonj bad ábe bēbós. † **18:14** Echen: donje á kálag dé'só áwóó echem. ‡ **18:15** Aběnlé we awusé: donje á kálag dé e'só áwóó abelé awusé. § **18:16** Nén átēnlédé á kálag e Dyób, Diátronomi: 19.15. * **18:17** Bad bé Israel bēndúbē nén bán besaad bé tááse bós bétómténé bad bé mbéb abé, bán béesl-laa á nkamlēn ní mín.

21 Hê dɔɔ Petro ápedé wée Yesue, bon ɔsedtɛ mó aá “A-Sán, nzé mwanned abenle me awusé pónde téé, ngen étɔ́n rítɔ́ngéné mó alagsɛn? Káɔ́nse ngen saámbe-yɛ?”

22 Dɔɔ Yesue átimtanné mó aá, “Nlânge nyé nén meé, saké ngen saámbe, bon móom mé ngen saámbe ne saámbe.”†

23 Nê dɔɔ édíí á nkamlen ní mín. Dyôb ákamlanne nêngáne kâñ póg eché echénlé bad ábe bébele nsón ásê eché, ânɔn mɔné níme bó ké ahéé bɛwánlé mó.

24 Abooted áde ábóótédé ânɔn mɔné níme ábê bad bɛwánlé mó, dɔɔ bad bɛpéénédé mó mod nhóg awé anwálé mó nkúú ní mɔné.

25 Ane mod enkênhenlé ádê alúm atwe, né-ɔɔ kâñ enhób aá bésóm mó nchoo ne mwaád ne bán nêngáne betân, bésóm-me bwém é'syāāl ábe áwóó. Mmê mɔné mébê ásábe áde alúm.

26 Ane mod ankwɛ kâñ á mekuu, áchāá mó aá, ‘Béé me pónde, mɛtwɛ ádon alúm ásyāāl.’

27 Kâñ enwóg mó ngol, anchené mó aá ákag, álagsɛn-ne ádê alúm.

28 Néé ane mod áhídtɛ hê, ambomén waáb awé mómpɛ abelé'áá nsón ásê e kâñ. Waáb ne anwálé mó mwá mɔné awé énkɛmbuú áte. Dɔɔ átólé waáb á mengogíd, aá ásábe mó níme mɔné.

29 Waáb ankwɛ mó á mekuu, áchāá mó aá, ábe mó pónde aá, móɔsábê mó ádê alúm.

30 Ane mod enkênlagsɛnné waáb, anhé mó á mbwɔg aá káɔ́n né asábpé áde alúm bon bɛbíded mó.

31 Ade bad ábe bɛbédé áhed ábe bómpɛ bɛbélé'áá nsón ásê e kâñ bényíné dyam áde ábénlédé, bɛnlɔ́n bwámbwam. Bɛnkê kâñ dyam ásyāāl áde ábénlédé aláa.

32 Né-ɔɔ, kâñ enchélé ane mod, álanɔ́gê mó aá, ‘Ekúkú é ləə nén! Menlagsɛn we alúm áde wénwālɛɛ me áyāle wencháñ me.

33 Cheé ékás bon weewóge wɛn ngol melelem nêngáne me-ɛ ménwɔgkê we ngol?’

34 Kâñ énlɔ́n bwámbwam, né-ɔɔ anlóm ane mod á mbwɔg aá bɛwóged mó ndutul. Aá ábɛ-'ɛ á mbwɔg káɔ́n né asábpé áde alúm ásyāāl.”

35 Né-ɔɔ, Yesue ansógtɛn nén aá, “Nê dɔɔ Titée Dyôbe awé áde ámín ábenlé. Nzé weélagsene mwányon ne nímɔ́n nlem nsyāāl, né Dyôb dékɔ́gsɛn we ngáne ene kâñ énkɔ́gsɛnné ane mod.”

19

Ayáged tângene anan

dé mmwaád á e'wɔ́ngé

(Mak 10.1-12)

1 Ade Yesue ámáá nímén mekan ahób, anhidé á Galilia áke á mbwɔg e Judeya, áchábê á ped e edib é Jodan eníníí.

2 Nduɔn e mod enhid mó áwed, áchōōd-te bad bé nkole.

3 Donɔge á Befarisia bɛmpɛ áwé ákag mó. Bɛnsedéd mó bánken, “Mbéndé echêd ebagé kunze nén bán, mod ánan awé mwaád áyāle nyaa e nzom ké ehéé-yɛ?”

4 Yesue ankwɛntɛn bó aáken, “Nyéeláá'é á kálag e Dyôb nén bán á mbooted, Dyôb dɛnhag bó mmwaád ne mwɛnchóm-ɛ?”

† 18:22 Móom mé ngen saámbe ne saámbe: donɔge á kálag dé e'ɔ́ áwóó móom mé ngen saámbe ngen saámbe.

⁵ Dyöb á hóbpe aá, “Áyāle né-ṣṣ, mwēnchóm ätedé sáá ne nyan abé ne mwaád, boṅ búmṣ bad bébe bétim mod nhóg.

⁶ Né-ṣṣ, búmṣ béesaá ámpē bad bébe, boṅ bédii mod nhóg. Né-ṣṣ, échē Dyöb áládé, modmod eepáá.”

⁷ Hē dṣṣ abē befarisia bésedteé mó bánken, “Nzé édé nē, cheé-ṣ ēnkṣṅ boṅ Mosēe ábagé bad kunze aá, mod ábe mwaád kálag échē elúmte nēn bán, e'wóngé é'máá boṅ ánan mó.”

⁸ Dṣṣ Yesue álanṅgé bó aá, “Mosēe ambāg nyé enén kunze áyāle nyélelé nlém á abum. Enkēmbáá nē á mbooted mé nkṣṅsé.

⁹ Né-ṣṣ, nlánṅe nyé nēn mēé, mod ké ahéé awē anané mwaád ésebán ane mmwaád akábé asón, nzé ene ndín e mod awóó mmwaád ampēe, né akábé asón.”

¹⁰ Hē dṣṣ abē bembapee belánṅgé mó bán, “Nzé nēn dṣṣ mekan mé mmwaád ne nchóm médíí, né éesaá nsyṣṅ áwóṅ mmwaád.”

¹¹ Yesue antimtén bó aá, “Saké mod asyṣṅ ahele akob ádén ayáged. Boṅ dékṣṅné ne bad ábe Dyöb ábágé dṣṣ.

¹² Nyébíí nēn bán, nzṣm édé híin échē ékṣṣ boṅ bad béewṣṣ bebaád. Behóg bédé ábe béchyááténé nē. Bēmpēe-é bédé nē áyāle bad bébéle bó nē. Abíníí-é, bébéle yál nē ábel boṅ bébel nsón mé nkamlēn ní Dyöb. Kénzéé awē ahelé ádén ayáge akob, akob dṣṣ.”

Yesue anámté bēndem

(Mak 10.13-16; Luk 18.15-17)

¹³ Bad bēmpēén bēndem wē Yesue nēn bán ábán bó ekáá á nló, ákánned-te bó. Abē bembapee bēnkānē ábe bad áte.

¹⁴ Boṅ Yesue anláá bó aá, “Nyétede bēndem béhyag áwēm, nyéekṣṣ bó, áyāle nēn, nyaa é bad nēé bó chṣṣ éwóó nkamlēn ní mín.”

¹⁵ Né-ṣṣ, Yesue ambán abē bán ekáá á nló. Ambíd e nē, anhidé áhed.

Nhṣn ní bad

ne nkamlēn ní Dyöb

(Mak 10.17-31; Luk 18.18-30)

¹⁶ Póndé póg mod nhóg ampē wēe Yesue, ásedté mó aáken, “A-meléed, dyam á bwám áhéé ntánṅéné ábel, ábel nēn níkud alonggé áde déemaá?”

¹⁷ Héé Yesue ákwentanné mó aá, “Chán éhéleé ésedté me dyam áde áde dyam á bwám? Mod nhóg mwēnpen mó adé awē adé mod a bwám. Konṅé' mbéndé é Dyöb nzé ehede we mókud alonggé áde déemaá.”

¹⁸ Dṣṣ ane mod ásedté mó aáken, “Mbéndé éhéé?” Yesue ankwentén mó aá, “Weewúé' mod, weekábé asón á ndáb e'wóngé, weechíbé', weebídé mbón e metóm,

¹⁹ bēé sóó ne nyoṅ edúbé, édṣṅ-é mwānyoṅ nēṅgāne echoṅ yál.”

²⁰ Héé ene kódemod élanṅgé Yesue aá, “Nhídé échēn mbéndé ésyṣṅ; cheé empēe éhedne me ábel.”

²¹ Yesue antimtén mó aá, “Nzé ehede wēé mówóó awusé á yál ké ahóg, kág ésóm bwēm é'syṣṅ ábe éwóó, étéd nímmé mṣnē ébe betóótókē bé bad. Nzé ebelé nē, wēkúṅ nhṣn ádyöb. Ene póndé éhye éhíde me.

²² Ade ene kódemod áwógé nē, anwóg mbéb áte bwámbwam áhíde-é áyāle ambé nhṣn bwámbwam.”

²³ Héé Yesue álanṅgé abē bembapee aá, “Ne mbále nlánṅe nyé nēn mēé élél áte nhṣn ní mod ásó' á nkamlēn ní Dyöb.

²⁴ Nlāa nyé ámpē nēn mēé édé mwān a akan sṅṅkalaa a nyam nēé Kamēl ápoṅ á epṣn é ndṣnde tómaa nhṣn ní mod ásó' á nkamlēn ní Dyöb.”

25 Ade bembapεε béwógé nén, yǎl enkóm bó áte bwámbwam. Bênsédéd bánken, “Nzée-’5 ahele ákud e’soosón?”

26 Hée Yesue ánóné bó chóón boŋ áhōbē aá, “Ne baányon nén déehelée se ábenléd boŋ ne Dyōb dyamdyam déelεεé áte.”

27 Hée Petro áhóbeé aá, “Nóné’, sétédte chōm ésyāāl áhíd we, chee-5 ébē nímεd nsyāŋ.”

28 Hée Yesue álángeé bó aá, “Ne mbále, nlánge nyé nén meé, pónde eché Mwān-a-Moonyon ádyεé’ε á atii dé nkamlεn ne éche ehúmé ésyāāl á nkōŋsé míme níhúe’, nyé bad dyōm ne bébe ábe behíde me nyémpē nyéedyéé á metii mé nkamlεn, nyékāadtē metúmbé mé Israel dyōm ne mébe.

29 Kénzée-’ε awé atédte éche ndáb, baányan, sáá, nyaá, bán, ne eche mbwóg áyāl echém, ákud chó mbwókel e ngen, ákūd-te alongé áde déemaá’.

30 Boŋ bad híin ábe bédé á’sō bōōb bélyag mbíd, híin-ne ábe benlyag mbíd bébē á’sō.”

20

Ngan e bad bé nsón

1 Hē dōo Yesue ákaleé ngan aá, “Nhóbe nē áyāle nkamlεn mí mín rídé nhəgtén nēngáne nwóo-nzag nhóg awé ambíd á ndáb epog é mbwεmbwε áke dé ahead bad ábe ásábεε, ábel nsón awē nzag-tē.

2 Bóōbōō bémpē á nchemtεn áyāle nsábe mé epun é bīn boŋ álómé bó awē nzag-tē.

3 Ane nwóo-nzag antīm ambíd ámpē á dyad-tē á ngón abog. Antán bad bé nsón bémpēe áhed. Bentyēem ngēn, bébele’ aá chōmchōm.

4 Hée álángeé bó aá, ‘Nyémpē nyéke nyébel nsón áwēm nzag-tē, mēsábē nyé nsábe míme níkwógnédé.’

5 Né-óó, bēnkē. Ambēl melemlεm mé dyam á kəd, ne á ngón éláán.

6 Dyam ngón étáan néε ane mod átímé á dyad-tē ámpē, antán bad bé nsón ábe bómpē bentyēem, bébele’ aá dyamdyam. Hée ásedtée bó aá, ‘Chee nyébēbteé epun é bīn ésyāāl hén ngēn áde nyéebelée dyamdyam.’

7 Bēnkwentén mó nén bán, ‘Modmod eetédée sé á nsón.’ Hée ane mod álángeé bó aá, ‘Nyémpē nyékag-kóó nyébel nsón áwēm nzag-tē.’

8 “Ade ngukél épédé, ane nwóo-nzag anláá awé mod awé anone ábē bad bé nsón aá, álad bad bé nsón áte, ásábe bó. Aá, ábooted ne bad ábe bédímténé ape, ásoŋ-ke ne ábe bésébpé ape.

9 Ambéé bad ábe bēmbootéd nsón á ngón étáan nsábe mé epun é bīn

10 Ade bad ábe bēnsēbē nsón ábooted bépédé ákob nsábe, bēnwēmtēn bán, békud nsábe míme rítómé mí bad ábe bēmbootéd nsón á ngón étáan. Boŋ bómpē bēnkūd melemlεm mé nsábe.

11 Ade békóbé mōné míme bēmbéé bó, bēmbootéd anyoo áte.

12 Béhōbē bán, ‘Abén bad bébéle nsón háwa póg chēmpεn, ké nē, esábpé bó melemlεm néε sé ábe sébelé nsón epun é bīn ésyāāl ne enyεn é ngine.’

13 Nwóo-nzag antímtén ábē bad nhóg aá, ‘Amúε, meédogéé nyé. Eesaá mbále bán dentí bán mēbe nyé nsábe mé nsón mé epun é bīn-ε?

14 Nyékob-póó mímēn mōné, nyékag. Mmēn-εé ntíídé meé mēsábē anén mod awé adímténé ape melemlεm ngáne rísábpé’ áá wémpē.

15 Meewóo’ε kunze ábenled mímēm mōné ngáne ndáá-yε? Cheé ékáá boŋ nyébēbté nlém á abum áyāle ábém e’boŋ bé nlém?”

16 Yesue ansógtén ene ngan aá, “Né-óó, bé’sō bētīm bé mbíd, bé mbíd-te bētīm bé e’só.”

Yesue ahóbe ngen echë elónténé
éladn ngáne béwūú'é mó
(Mak 10.32-34; Luk 18.31-34)

¹⁷ Yesue ne ábē bembapεε békágé'áá á akuu á Jerusalem. Ade békágé nê dōo áchágé bó á nkæg, bonj álāngē bó á kun-tē aá,

¹⁸ “Pón nyébii bán dekag á Jerusalem, áwed-taá bébéé Mwān-a-Moonyonj á mekáá mé beprise bémháá ne bemeléede bé mbéndé. Bó-'é bébéé mbakú bán atāngéné awé.

¹⁹ Bébe mó á mekáá mé bad ábe béesě bad bé Israel. Bó-'é béwōodé mó, béswātdāad mó e'tanjú, bēbōmē-'é mó á awōg. Bonj ámbíd e e'pun é'láán Dyōb dépuúd mó.”

Nyē-mwān ahēdte bán metii
(Mak 10.35-45)

²⁰ Ámbíd e pónde dōo Zεbedie mwaad ápédé wée Yesue ne ábē bán bé baachóm bébe, abwóg mebóbónj, áchāā-'é Yesue aá ábele mó dyam.

²¹ Yesue ansedéd mó aáken, “Cheé éhédeé?” Dōo ákwentanné mó aá, “Bāg me akag nén wée, pónde eche wēbēē á nkamlen, ábēm bán bēn bébe bédyēé wé á nkæg, nhóg ekáá émbáá, aníní-'é á ekáá é emwed.”

²² Héé Yesue ákwentanné bó aá, “Nyéebii'é chóm éche nyésedté. Nyéēhēl metuné níme mépēmme apém-ε?” Bēnkwentén bán béhēl.

²³ Dōo Yesue álāngéé bó aá, “Ne mbále, nyéepēm bonj meewóo'é kunze ápwed mod awé ádyéé me á ekáá é mbáá ké'ε á ekáá é emwed. Ábē e'tál é'dii e'tál ábe é'bágnédé ne bad ábe echem Sáj ánábnédé bó.”

²⁴ Ade ábinii bembapεε dyóm béwógé nē, bēnliín ábē baányan bébe.

²⁵ Né-ó Yesue anlad bó áte, bonj álāngē bó aá, “Nyébii nén bán, benkamlene ne bad bémháá bé nkōjsé bēbenlad ngine ákamlen bad ábe bédé ásē echáb.

²⁶ Bonj éetāngeneé abé nē átíntē echēn. Kénzéé awē ahede aá móbē mod ambáá átíntē echēn, atāngéné abé mbālede awēn.

²⁷ Kénzéé-'é awē ábē mod a'só átíntē echēn, atāngéné abé awen ntān.

²⁸ Melemlem néé Mwān-a-Moonyonj épedéé aá bad bēbenle mó, bonj apedé ábele bad, ábe-'é áde alonjé ákōde bad hiin.”

Yesue achōjté bad bébe
ábe bēnkwe' ndim
(Mak 10.46-52; Luk 18.35-43)

²⁹ Ade Yesue ne ábē bembapεε béhidtéé á Dyad á Jeriko, ndun e mod ehidé'áá mó.

³⁰ Ene pónde-'ó bad bébe ábe bēnkwe' ndim bēndyēé á nkæg ní nzii. Ade béwógé bán, Yesue atóme', bēmbootéd abón bán, “A-Mwān a mbyaa níme Dabide, wóg sé ngól!”

³¹ Ndun e mod echē embé áhed enkáné bó áte bán bédib nsal. Bonj bó-'é bēmbādnēn abón ne ngine bán, “A-Mwān a mbyaa níme Dabide, a-Sáj, wóg sé ngól!”

³² Yesue antyéem, achélé bó bonj ásedté bó ááken, “Cheé nyéhedeé bán, níbele nyé?”

³³ Bēnkwentén bán, “A-Sáj, sēhede bán, ébel sényínen.”

³⁴ Yesue anwóg bó ngól, né-ó ambán bó mekáá á mīd. Abwōg-ábwōg bēmbootéd anyínen, béhíde-'é mó.

21

Yesue asólé á Jerusalem néé kàḡ

(Mak 11.1-11; Luk 19.28-40; Jòn 12.12-19)

¹ Ade Yesue ne ábê bembapɛɛ békwógé apɛ á Jerusalem, néé bépédé á dyad á Betpeg á ekone é menzab Yesue anlóm bembapɛɛ bébe á'sò.

² Anláá bó nén aá, “Nyékaḡ á dyad áde áde nyé á'sò nê. Nzé nyésólé sólén, nyéētán néé bétàngé ésel ne mwän ánkag. Nyéhune bó nyéhiinad me.

³ Nzé mod asédté nyé aáken, cheé ékáá boḡ nyéhunne', nyélaá mó bán Sàngwéé* atógnéné bó. Nzé nyéhóbé nê, ábwōg-ábwōg ane mod áchennéd nyé.”

⁴ Nén dɛmbɛnléd álóned e'yale ábe Dyōb dénlómɛnné nkal é'dáádəḡ aá,

⁵ “Aláa dyad á Zayon aá,

Nyénoné', echɛn kàḡ ehyag áwɛn,

asúdté yál, adiidé ésel, etum é nchóm a ésel.”

⁶ Né-óó ábê bembapɛɛ bɛnkĕ bɛbɛl-le ngáne Yesue ányágtɛnné bó.

⁷ Bɛmpɛɛn éché ésel ne mwän, bétéd échab mbóté, bétal chó ámín, boḡ Yesue ádiide'.

⁸ Ekud é bad bɛntál échab mbóté á nzii-té, ábíní'-e bésɛlɛ' e'kikag é' mií, bétalé' á nzii-té.

⁹ Ndun e mod echĕ ekágé'áá mó á'sò ne echĕ ehídé'áá mó ámbíd bɛmbootéd abón bán,

“Hosána, mekenag mébê ne mwän a mbya míme Dabide.

Nnam míbê ne ane awĕ apedé á dín áde Sàngwéé.

Hosána, mekenag ne Dyōb áde áde se ámín!”

¹⁰ Néé Yesue ásólé á Jerusalem nén sólén, bad bésyāāl bɛpuutéd, bésɛdté'-ɛ bánken, “Nzéé ne?”

¹¹ Dóó ene ndun e mod ékwɛntanné bán, “Yesue mó adé, nkal é'dáádəḡ a dyad á Nazaret á mbwóg e Galilia.”

Yesue anané bekáb bé nyongé

á Ndáb-e-Dyōb

(Mak 11.15-19; Luk 19.45-48; Jòn 2.13-22)

¹² Ámbíd e nê, Yesue anke asól á Ndáb-e-Dyōb. Annán bad bésyāāl ábe békábé'áá dyon áwəd-te. Ankuné betébelɛ ábe bad bɛpɛnlé'áá móné ámín mekuu ámín, ákūnĕ'-ɛ metii mímé bad ábe bésómme'áá mbəḡgé mekuu ámín.

¹³ Anláá'-ɛ bó aá, “Eténlédé nén bán, Dyōb áhóbé aá,

'Echem ndáb etáḡnéé achəḡned bán ndáb e mekáne.' Boḡ nyétimté chó, 'mbwōg mé bechíb!' ”

¹⁴ Bad ábe bɛnkwxĕ ndím ne bad ábe mekuu ménwɛɛ ábe bɛmbĕ áhed bɛmpĕ áwĕ, ádid-tɛ bó bwám.

¹⁵ Boḡ áde beprɛ bɛmbáá ne bemelɛede bé mbéndé bényíné menyáké míme Yesue ábélé, boḡ bɛwóg-ke e'saad ábe bɛndem bɛbónɛé á Ndáb-e-Dyōb bán, “Mekenag mébê ne mwän a mbyaa míme Dabide,” bɛnliḡ bwámbwam.

¹⁶ Bɛnsɛdéd Yesue bánken, “Ewóge chóm-éé ábê bán béhóbé-ye?” Yesue ankwentín bó aá, “Eɛ, nwóge'. Nyééláá' é mbêd á kálag e Dyōb nén bán, Dyōb ábónséné e'ched é' bɛndem ne é' bán bé nkáál ábe mó mekenag mé bwám-ɛ?”

¹⁷ Ámbíd e nê Yesue antedé bó á Jerusalem áke ánāá á dyad á Betani.

Yesue ne alín á ngál

(Mak 11.12-14, 20-24)

* 21:3 Sàngwéé: káa nwóḡ.

18 Epog é mbwembwe áde átimeé ámbid á Jerusalem nzaa enkób mó.

19 Ade ákagké nê annyín alín á ngəl. Ankě áhed, boŋ enkényinné epum ké ehóg áwedé-mín étóméé byaá. Héé Yesue álángeé ábē bwel aá, “Wéechyáá’ é epum ámpé mbéd.” Abwōg-ábwōg bwel bēnhyéle.

20 Ade ábē bembapēé bényiné nê, yəl enkóm bó áte bwámbwam. Héé bésēdtéé bánken, “Chán adēn alín á ngəl ánwéde ayéle á mehélé-te nēn-ē?”

21 Yesue ankwentén aá, “Ne mbále nlanje nyé nēn meé, nzé nyédúbpé ne nlém nisyāal, né saké dyam áde núbélé ábēn bwel áyāl dēmpen nyébenlé. Boŋ né nyéhēle-se nyeláá kōŋne enēn mbōod nēn bán, ‘Hidé hēn, éke ébwēm yāl á edib é nkwe-te,’ ébenléd-te nē dēn.

22 Nzé nyéwóo adúbe bán, kéchéé éche nyéhédné Dyōb á mekáne-té nyéekūd, né nzé nyéhéde nyéekūd.”

*Nsēdtéd tãŋgene kunze eche Yesue
(Mak 11.27-33; Luk 20.1-8)*

23 Yesue ansól á Ndáb-e-Dyōb, áyāgtē bad. Ade áyāgtēé nê, dōo beprise bēmbáá ne bad bēmbáá bé Israel bēpédé áwē, bésēdté mó bánken, “Kunze ehéé éwóo ábel nímén mekan? Nzé-módé abagé-’é wē ene kunze?”

24 Yesue antimtén bó aá, “Mē ámpē mēsedéd nyé dyam ahóg. Nzé nyékwēténé dó né mē-’é mēlāā nyé kunze eché ríwóo ábel nímén mekan.

25 Edusen éche Jōne adúsánnáá bad héé émbídtē? Embíd ne Dyōb-ε ngé ne baányon?” Bēn ne bēn bēmbootéd apentēn bán, “Nzé dehóbé nēn bán, ‘Jōne eché kunze enhúú ne Dyōb,’ né ásedéd syáné aáken, ‘Cheé-ō enkŋ boŋ nyénkéndúbé mó?”

26 Boŋ nzé dehóbé bán, ‘Eché kunze ehúú ne baányon,’ né échén ekud é mod ébel syáné mbéb áyāle bad bésyāal bēndúbē bán Jōne abédéé nkal é dāōdāŋ.”

27 Né-ōó bēnkwentén Yesue bán, “Séebii’ é.” Mō-ε antimtén bó aá, “Né ké mē-’é ámpé méeláá’ é nyé kunze eché ríwóo ábel nímén mekan.”

Ngan e bán bé baachóm bébe

28 Yesue ambé ásedéd beprise bēmbáá ne bad bēmbáá bé dyad aáken, “Chán nyényíné adén akan tãŋgene enén ngan? Mod nhóg abédé awé anchyáá bán bé baachóm bébe. Héé ákíí mwān ambáá aláa aá, ‘A-mwān, ké ébel nsón á nzag-té chii.’

29 Mwān antimtén mó aá móōkaá. Boŋ ámbid e pónde anhəŋlén mewēmten, áke.

30 Dōo ane mod ákíí wēé mwān asad, aláa-’é mómpē melemlēm mé dyam. Anén mwān antimtén sáá aá, ‘A-Sāŋ, mēkē’ boŋ eékii.”

31 Héé Yesue ásedéte beprise bēmbáá aáken, “Átínté ábēn bán bébe, ahéé ambēl ngáne sáá áhédé’áá?” Bēnkwentén mó bán, “Ambáá.” Né-ōó, Yesue anláá bó aá, “Ne mbále, nlanje nyé nēn meé, besaad-bé-tááse ne bekwalee bédé asól á nkamlen rí Dyōb tómaa nyé.†

32 Nhóbe nēn, áyāle Jōne, Ndusen ampē, alúmed nyé nzii eché etyéémé, nyénkéndúbéé mó, boŋ besaad-bé-tááse ne bekwalee bēndúbē. Ké nēé nyénnyín-naá nē, nyénkēnhəŋlenné, nyénkéndúbé-’aá mó.”

*Ngan e bebel bé nsón ntéd
(Mak 12.1-12; Luk 20.9-19)*

33 Yesue anláá bó aá, “Nyéwóglēn ngan empée. Nwóo-nzag nhóg abédé awé ankwel nzag e e’pūm é’ mel ábe bēbenléé mīm. Ankág chó, ábel bwāl wēé bémíneé ábē e’pūm é’ mel ábel mīm, alón-’é ebem áwēd-te wēé bédyēé’ é ánon

† 21:31 Baá mbáá bé Israel bēndúbē nēn bán bekwalee ne besaad-bé-tááse béésónlé á nkamlen ní mín.

nzag áte. Ambéé ene nzag wée bad ábe bós̄b̄s̄ békáb mbote áte, ákē á alon démpēe.

³⁴ Adē pónde épédé eche bēpadéé e'pum, ane nwóo-nzag anlóm ábe bembaledé wée ábē bebel-bé-nsón ákobe mós adē asii dé e'pum.

³⁵ Hée ábē bebel-bé-nsón békóbé ábē bembaledé, bēwanné' nhóg, bēwū' ampēe, aníní'-é bēwūēnē meláá.

³⁶ Ambíd é pónde ane nwóo-nzag anlóm bembaledé bēmpēe ábe bēmbuú áte tómaa ábíníí. Ábē bebel-bé-nsón bēmbēl ábē bembaledé melemlen ngáne bēmbēnlé bé'só.

³⁷ Ambíd e pónde anlóm awe mwān áwāb, ne mewēmtēn nēn bēbéé mós edubé.

³⁸ Bonj áde bebel-bé-nsón bényíné ane mwān nēe áhúe'é, dós bós bēn ne bēn bēhóbēé nēn bán, 'Ndyé-a-mbwóg nēn, nyéhyag! Déwúu mós, ábel nēn, eche mbwóg esuuned syánē.'

³⁹ Hē dós békóbé mós, bēbídēn mós á nzag-tē, bonj bēwúú'-é mós."

⁴⁰ Hée Yesue ásedtēé ábē bad bēmbáá bē dyad ne beprisē bēmbáá aá, "Bós̄b̄s̄, nzé nwóo-nzag ne apedé, cheé ábēnlé ábē bebel-bé-nsón?"

⁴¹ Hē dós bēkwentanné bán, "Áwūú ábē e'bébtéd é' bad e'bébtéd é kwééd, ábē'-é ene nzag wée bebel-bé-nsón bēmpēe ábe bēbe mós adē asii á mbote nzé pónde epedé eche bēpadéé e'pum."

⁴² Yesue anláá bós ampē aá, "Nyéēlāā-'é mbēd wée eyale é Dyób éhóbé nēn bán,

'Aláá adē belón-bé-ndáb bēnchenéé dós átímé aláá dé etógnén abé.

Sánjwéé mós ambel nēn, édē'-é syánē menyáké.'

⁴³ Né-ós̄ nlānge nyé nēn mēé, békobēn nyé etál éche nyéwóo nēe bad bē nkamlēn ní Dyób, bēbē wée bad ábe bēbele' ngáne Dyób áhēdēé."‡

⁴⁵ Ade beprisē bēmbáá ne Befarisia bēwógé échén ngan éche Yesue ákálé, bēnchem bán, bós̄ ákanléé chós.

⁴⁶ Né-ós̄ bēhédé'áá mós akób, bonj bēmbān abel nē, áyāle bényín bán, ene ndun e mod enyíné'áá Yesue nēe nkal é'dáádān.

22

Ngan e ngande e e'wóngé

(Luk 14.15-24)

¹ Yesue ambé ábēnléd ngan ampē ákalen ábē bad. Anhób aá,

² "Nkamlēn ní mín rídé nēngáne kān póg eché enláá ábē bembaledé aá bēbonjsen ngande e e'wóngé ábe awé mwān a mwēnchóm.

³ Ene kān'-é anlóm ábē bembaledé aá bēke bēchāg bad ábe álébpé áyāle ene ngande, bonj ábē bad bēnkēnkwenténné ape.

⁴ Hée álóméé bembaledé bēmpēe aá bēlāá bad ábe mólēbpé nēn bán, 'Nyēbīí nēn bán, mmaá nyag ne e'lem ábe é'bós̄ yāl awúu. Chóm esyāāl-lē édé mbonjsén, nyéhyag-kós̄ á ngande.'

⁵ Bonj ké nē ábē bad ábe bēnlēbēē bēnkéntédte mímē nlébtéd nēe dyam. Mod téé ahídé'áá mímē ntíi ámbíd. Behóg bēnkē áwāb nzag-tē, ábíníí bēhídē nímb nsón mémpēe ámbíd.

⁶ Ábíníí'-é bēnkōb ábē bembaledé, bēbōm bós, bēwúú'-é bós.

⁷ Ene kān enlīn bwāmbwam. Né-ós̄, anlóm éche sōnze. Nēe épédé, éwūú bad ábe bēnwūú ábē bembaledé, éhyāād-te ábē bad dyad.

‡ 21:43 Dongé á kálag dé'só ábáde nchoo 44: *Mod ké ahéé awé alúme adē aláá amín abogted áte. Bonj ane awé áhūntédte amín, ányogted áte.*

⁸ Dóo álàngéé ábē bembəlede bəmpēe aá, ‘Ngande e e’wóngé emaa mbonşén abé, bon bad ábe rílebpé béekwognedeé chó abé áşé.

⁹ Bəəb-pəó, nyékag á mbom ní nzii á dyad-tē, nyéchéle bad bésyāā́l ábe býnyíné bán, béhyag á ngande.’

¹⁰ Né-óó ábē bembəlede bēnké á dyad-tē, bēlād bad bésyāā́l ábe býnyinnē, ken mod á bwām ké’ε mod á mbēb, káşñ ndáb e ngande enlóg áte.

¹¹ “Kāñ empē á ndáb-te āñon bad ábe bēpédé á ngande. Ade ápédé anyín mod awé enkēnhé asañ áde ántāngēnnē ahé á ngande e e’wóngé.

¹² Héε áşedté mó aá, ‘Amúē, chán émwéde apε hén áde wééhēdeé asañ á ngande e e’wóngé.’ Bon ane mod enkēnhóbpé dyamdyam.

¹³ Dóo kāñ élanğéé ábē bembəlede ábe béchágté’áá beken aá, ‘Nyéhañ mó mekáá ne mekuu, nyébwēm mó á ebwóg, á ehintén-tē. Áhed-taá béchyeé’ε, bédyāg-ke mesoñ á nsəl.’”

¹⁴ Héε Yesue ásoğtéé enén ngan ne e’yale nén aá, “Dyöb áchēñle’ bad híin ábē áşé e nkamlēn mímē, bon nguse chóó épweɗnéd.”

Yesue ne asaa á tááse

(Mak 12.13-17; Luk 20.20-26)

¹⁵ Ebédé pónde póg eché Befarisia bēnkéé mbom, áhəge Yesue, ábel békóben mó awusé tēngene e’yale ábe bēbíđ mó á nsəl.

¹⁶ Bēnlōm ábāb bembapεε nchoo ne bad bé epepé éche Héəde wée Yesue. Néε bēpédé áwé, bēlanğé mó nén bán, “A-meléed, sēbíí nén bán, ekale mbále. Sēbíí-’ε ámpē nén bán, ayáge áđōñ tēngene mbéndé e Dyöb áde mbále. Mewēmtēn mé bad ne e’so é’ mbom é’ bad bēehañlánné áđōñ ayáged.

¹⁷ Láá-’ε sé ngāne ényíné áđn akan. Mbéndé eche syáné ehóbe nén bán désaŋge’ tááse wée Kaisεε, kāñ e Roma-ye?”

¹⁸ Bon Yesue ambíí nímbab mewēmtēn mé mbēb. Né-óó ansédéd bó aaken, “Nyé bedog-badé, cheé nyéhəgkéé mε?”

¹⁹ Nyélúmed mε məné níme bésañnadté tááse eched.” Bēmpiinéd mó məné mé ekii.

²⁰ Dóo áşédté bó aaken, “Eđiđiŋge éche nzéé chén? Dín áde nzéé-’ε dén?”

²¹ Bēnkweñtén mó bán, “Abe Kaisεε.” Dóo álàngéé bó aá, “Nyébag-kóó Kaisεε éche éde éche Kaisεε, nyébag-ke Dyöb éche éde é Dyöb.”

²² Ade bəwógé nē, yəl enkóm bó áte. Né-óó bēnhidé áhed, békē-’ε.

Ayáged áde Yesue

tēngene mpuu ámbíd e kwééd

(Mak 12.18-27; Luk 20.27-40)

²³ Eché epun chēn doŋge á Besadusia bēmpē wée Yesue. Besadusia bēndūbe bán mpuu méesaá ámbíd e kwééd.

²⁴ Dóo bēhóbeé bán, “A-meléed, mbéndé e Mosεε ehóbe nén bán, ‘Nzé mod awóó mmwaád bon awéde áde bó ane mmwaád béepedeé mwān awále, mwānyañ á abum ahóg atāŋgéné ane nkúd awóñ, ábel bon đín áde mwānyañ déébōó’.

²⁵ Bəəb-pəó, bad bēbédé hén mod saámbé ábe bēmbíd abum ahóg. Mod á’só anwóñ mímwaád, bon awé áde bó mmwaád ne béepedeé bán awále, né-óó mwānyañ awé anhíd mó anlyəgnéd ane nkúd á mmwaád.

²⁶ Ane mómpē anwé áde bó ane mmwaád béepedeé bán awále. Melemlem mé dyam mēmbenléd ne awé alónténé bēláán, káşñ bēbóm bó mod saámbé.

²⁷ Káşñne á asóg ane mmwaád mómpē anwé.

²⁸ Bəəb-pəó á pónde e mpuu, mmwaád awé nzéé ane mmwaád áchəgnédté ayále bó moosyāā́l saámbé bēnwōñ mó?”

²⁹ Yesue antimtén bó aá, “Nyêpane’ áyale nyéesõhteneé chõm éche eyale é Dyõb éhõbéé, nyéesõhteneé-’-e ngáne ngine e Dyõb ésógé abé.

³⁰ Ayale pónde echê bad bépuú’ é ámbíd e kwééd mewõngé méebaá ámpê. Bad bébê nêngáne ángel éche édé ámin, béewõhñéé.

³¹ Nyéeláá’ é mbéd dyam áde Dyõb ahóbé áwên tângene mpuu-ye? Dyõb ahóbé tângene ábéd betaa áá,

³² ‘Me-éé ndé Dyõb áde Abrahame, Aisige ne Jakõbe.’ Dyõb ádíi Dyõb á bad ábe bédé á alongé, saké Dyõb á bad ábe bewardé.”

³³ Ade ene ndun e mod echê embé áhed éwógé nê, bémbê menyáké bwámbwam tângene ayáged áde Yesue.

Mbéndé ébe éche etómténé etógnén abé

(Mak 12.28-34; Luk 10.25-28)

³⁴ Ade Befarisia bewardé bán nkwenten míme Yesue ámbéé Besadusia mêmbeñ béehéle dyamdyam ahób, bënladén áte.

³⁵ Hê dóo bó mod nhóg awê abédé meléede a mbéndé, áhyédé Yesue akág, ásedté mó aá,

³⁶ “A-melééd, áfinté mbéndé ésyáál, ehéé etómténé etógnén abé?”

³⁷ Yesue ankwentén bó aá, “Etângéné édãñ Sãngwéé ádoñ Dyõb ne nímon ním nísyáál, ne échoñ edããdãñ ésyáál, édãñ-’-e mó ne nímoñ mewêmten mésyáál.

³⁸ Enén mbéndé chõ etómténé etógnén abé, ebé-’-e mbéndé e’só.

³⁹ Mbéndé echê elónténé ébe echê chõmpê edé etógnén melelem nêngáne e’só edíi nén ‘Edãñ mwãnyoñ ngáne édós echoñ yál.’

⁴⁰ Echén mbéndé ébe chõó éwánlé mbéndé éche Moséé ésyáál ne mekan míme bekal-bé-e’daãdãñ béyógté.”

Nsedtéð tângene

Ane-awê-Béwógté

(Mak 12.35-37; Luk 20.41-44)

⁴¹ Hê dóo Yesue ásedtéé ábê Befarisia ábe bënladén áte aá,

⁴² “Chán nyéwêmtanné tângene Ane-awê-Béwógté? Á mbyaa míme nzéé áhúú?” Héé békwénténé mó bán, “Abídé á mbyaa míme kãñ Dabide.”

⁴³ Yesue ansédéd bó aá, “Cheé-õ enkãñ boñ Dabide áde Edããdãñ é Dyõb élyógté mó ánehãgké mó aá, ‘A-Sãñ,’ áde ahóbé aá,

⁴⁴ ‘Sãñ Dyõbe anláá awêm Sãngwéé aá,

Dyéé áwêm ekáá émbáá,

kãñ ne á pónde echê mébenlé boñ ékõgtéd ábõñ bad bé ekõyí ámin ne mekuu.’

⁴⁵ Néé Dabide mwên ásebpe mó achãg aá, Sãngwéé, chán-nõ Ane-awê-Béwógté áhéléé abé awe mwãn?”

⁴⁶ Bó modmod bénkênhenlé mó dyamdyam akwenten. Bootya échê epun bénkênchu’ é mó dyamdyam aseded ámpê.

23

Elébé tângene bemeléede

bé mbéndé ne Befarisia

(Mak 12.38-39; Luk 11.43, 46, 20.45-46)

¹ Ámbíd e nê, dóo Yesue álanngéé ene ndun e mod ne ábê bembapere aá,

² “Bemeléede bé mbéndé ne Befarisia bóo bétédé etál éche Moséé bõõb áyóged bad.

³ Né-òó, nyétàngéné bó awóglɛn nyébelé-'ε mekan mésyāāl níme bélàngéé nyé, boŋ nyéebēlē' mekan níme bébeléé, áyāle béebeléé mekan níme béhóbéé.

⁴ Békāa' e'deltéd bé nted, bépēmtad bad, boŋ béesaá mboŋsén ábān ké ekāá áwóŋgen bó ápém mó.

⁵ Kéchéé éche bébeléé, bébele chí ábel boŋ bad bényín bó. Békālte' bān bé ntyág ábe bháhgk' nchoo mé e'yale e' Dyób áte, boŋ bētāā á mbom ne á mekáá, béchabte e'túd* ábe bēwāá' é á mengombe mín bwāmbwam. ⁶ Bédāā e'tāl bé edúbé adyεε á hóm á ngande, bédāŋ-'ε metii mé edúbé adyεε á ndáb é mekáne.

⁷ Bédāā bān, bad bélente bó ne edúbé ésyāāl á dyon-té, bédāŋ-'ε bān, bad béchāge bó bān, 'A-meléed.'

⁸ Boŋ nyé, nyéēmwāg-se béchāgé nyé bān, 'Meléede.' Ayāle meléede nhóg mó nyéwóó, baányan bō-'āá nyédíí.

⁹ Nyééchāgē-'ε mod ké nhóg á nkōŋsé wén bān Titée áyāle nyéwóó-'ε Titée nhóg, awēn Titée awé adé ámín.

¹⁰ Nyéēmwāg-ke se béchāgé nyé bān, 'Sāŋgwéé' áyāle nyéwóó Sāŋgwéé nhóg, Ane-awé-Béwōgté.

¹¹ Mod awé adé ambāá áfínté e echēn atāŋgéné abé mbāledε awēn.

¹² Kénzée' awé achágté yāl, Dyób désudéd mó, kénzée-'ε awé asúdté yāl, Dyób déchāgēd mó."

Yesue asélé bad bé medogké

(Mak 12.40; Luk 11.39-42, 44, 52, 20.47)

¹³ Dóó Yesue áhóbéé áá, "Ebēēn nyé bemeléede bé mbéndé ne Befarisia ebébtéd, nyé bad bé medogké! Nyédíibe' ekob é nkamlɛn ní mín ábel boŋ bad béésōlē'. Nyé bēn nyéésōléé, nyéēmwāg-kaá bān bad bēmpēe ábe béhede asól bēsōl.†

¹⁵ Ebēēn nyé bemeléede bé mbéndé ne Befarisia ebébtéd, nyé bad bé medogké. Nyékag meloŋ ne meloŋ ábel boŋ mod nhóg átímen nyé. Boŋ nzé amaá nyé átímen, nyébelé nyébébed mó nyaa eché ákwógnédé ákud nkógsen á dù-á-muú níme nífómé nímēn gen ébe.

¹⁶ "Ebēēn nyé ebébtéd nyé bad ábe békwdé ndím, boŋ belyāgtē bad bēmpēe. Nyéyāgte bān, 'Nzé mod amwédé melé á dín á Ndáb-e-Dyób, né nē déesaá dyam, boŋ nzé mod amwédé melé á dín á bwēm é' gól ábe é' dé áwēd-te, atāŋgéné ábel dyam áde ámwééné melé.'

¹⁷ E'yókél é' bad bēn, nyékwedé ndím! Cheé étómténé etógnén abé, gól-le, ngé Ndáb-e-Dyób eché ebélé boŋ gól ebé chóm éche ésaá á'só é' Dyób?

¹⁸ Nyéyāgte' ámpē bān, 'Nzé mod amwédé melé á dín dé menyán mé mende, né nē déesaá dyam. Boŋ nzé mod amwédé melé á dín dé mende níme médé á menyán mín, atāŋgéné ábel dyam áde ámwééné melé.'

¹⁹ Bad bé ndím bēn! Cheé étómténé etógnén abé, mende ngé menyán níme mébéle boŋ nímé mende mébé chóm éche ésaá á'só é' Dyób?

²⁰ Né-òó kénzée' awé amwédé melé á dín dé menyán mé mende, né amwédé nímé melé á dín dé menyán ne mende ké méhéé níme médé áwédé-mín.

²¹ Kénzée-'ε awé amwédé melé á dín á Ndáb-e-Dyób, né amwédé nímé melé á dín á Ndáb-e-Dyób ne á dín á Dyób áde ádyεε' áwēd-te.

²² Kénzée-'ε ámpē awé amwédé melé á dín dé nkoŋ ní mín né amwédé melé á dín dé atii dé nkamlɛn ní Dyób ne á dín á Dyób áde ádíídé áde atii.

* **23:5 Etud:** Bēwāá' áá e'túd álúmed bān bébenle Dyób. † **23:13 Donge** á kálag dé'só ábádé nchoo 14: Ebēēn nyé bemeléede bé mbéndé ne Befarisia ebébtéd, nyé bad bé medogké. Nyéútman yāl ne ntóŋ-ntóŋ mé mekáne, nyédumé-'ε mbwóg é bekúd. Né-òó, nyékuá nkógsen níme ríchábé dntn.

23 “Eβḗēn nyé bemeléede bé mbéndé ne Befarisia ebébtéd, nyé bad bé medogké! Nyébage Dyöb akab ahóg áfinté e mekab dyôm, ké dé meküle níme béchámneé ndyééd néε mínt, díl ne kúmin.‡ Bon nyéehédéé nló áte ábel ndín é mekan éche mbéndé éhóbé aá nyébele’. Nyéésaa mbále ne Dyöb, nyéewó’ é nlém ní ngól, nyéedúbpe-’áa Dyöb. Nyéntāngén mímén mesýāäl abel, ésebán nyéchöbte’ mímíní.

24 Nyé bad ábe békwédé ndím bon bélyāgtē bad bémpēe. Nyébude’ mekan níme méésē etógnén ahíd ámbíd. Nyéhúde’ púted á mendíb níme nyémwāgkē-te, bon nyétēdte mbinde émbáá éche édé áwēd-te.

25 “Eβḗēn nyé bemeléede bé mbéndé ne Befarisia ebébtéd, nyé bad bé medogké! Nyéwobpe mbwendé ne díse ámbíd e ebwóg, bon medyé níme méde áwēd-te médíi medyé níme nyékúdné ndumbán ne ngoód.

26 Nyé Befarisia, bad bé ndím bēn! Nyésébe nyéwobe mbwendé ne díse áte, kóāñne mbíd e ebwóg chōmpē ēsāñ.

27 “Medim ne nyé bemeléede bé mbéndé ne Befarisia, nyé bad bé medogké! Nyédii néε son éche bépúbté. Ekine’ áte ámbíd e ebwóg bon e’hid ne e’bōó bé ndím mí bad bōó é’lóné áwēd-te.

28 Melemlem nē dōó nyényinnadté á’só é’ bad néε bad ábe bésáá bon áte nyélóné ne edogké ne mbéb.

*Dyöb dékōgsēn bemeléede
bé mbéndé ne Befarisia
(Luk 11.47-51)*

29 “Medim ne nyé bemeléede bé mbéndé ne Befarisia, nyé bad bé medogké! Nyéloo’ son é bekal-bé-e’daádāñ bwām, nyélonjté-’ε mebón níme bad ábe bésáá.

30 Nyékag, nyéhóbe-’ε bán, ‘Nzé sēmbé á pónde échē ábēd betaa, né sēnkēnlaténné bó áde bēnwūú’ é bekal-bé-e’daádāñ áte.’

31 Nē dēn álumte nēn bán nyēnkwentén nēn bán nyébídé á mbyaa níme bad ábe bēwúe’ bekal-bé-e’daádāñ.

32 Nyékag-kōó á’só nyémad nsón níme ábēn betaa bēmbootédte.

33 Nyā chēn! Etad é pí ngēn. Chán nyémwéé nkōgsēn ní dū-á-muú abame?

34 Né-ōó, mēlōmē nyé bekal-bé-e’daádāñ ne bad bé debýéé ne bemeléede. Nyéewūú donge, nyébōmē-’ε bó á awōg. Nyéswādtéd donge e’tāngú á ndáb é mekáne. Abíní-’ε nyénané myad ne myad.

35 Awúu áde nyéwúe’ é bó débēl Dyöb ákōgsēn nyé áyāle mekií mé bad ábe bésáá bésýāäl ábe nyéwúú eben á nkōnsé, bootya kwééd eche Abéle awé bēwúú ngēn, ápe kwééd échē Zakariyaa, mwān awé Berekayaa. Zakariyaa awé nyéwúú áfinté e Ndáb-e-Dyöb ne hōm áde bēbageé mende.

36 Ne mbále nlānge nyé nēn meé, enén nyonjgel chōó éküd nkōgsēn áyāle échēn kwééd ésyāäl.

*Yesue adé ngól
ne bad bé Jerusalem
(Luk 13.34-35)*

37 “Wóowó! A-bad bé Jerusalem, nyéwúe bekal-bé-e’daádāñ, nyéwūēnē-’ε bad meláá ábe Dyöb álómé! Nkēnwān áte ngen ne ngen álad nyé áte nēngāne nyaá-küb ákútanné bán, bon nyéehédéé etál!

38 Nyéñone’, Dyöb détéde echen ndáb, modmod éebáá-’áá áwēd-te.

39 A mbále, nlānge nyé nēn meé, nyényínénné me díd ámpē kóāñ ne á pónde eche nyééhōbpe bán, ‘Nnam ne ane awé apedé á díñ á Sāngú.’ ”

‡ 23:23 *Mint, díl ne kúmin*: bédii byaa ábē bēbēnládtáá áchám ndyééd.

24

Mbooted mé metake
(Mak 13.1-2; Luk 21.5-6)

¹ Ambid e nê, Yesue anhidé á Ndáb-e-Dyöb. Ade ákagké nê, dáo ábē bembapεε bétané mó, boŋ bēlanḡē mó bán ánoŋe nyaa eche bēlóó Ndáb-e-Dyöb.

² Héε Yesue ákwentanné bó aá, “Ngáne nyenyínεé ábē bwēm é’syāal nê, ne mbále, nlanḡe nyé nén meε pónde épē echē aláá ké ahóg déelyagké ámín e waáb. Bépāntēd mésyāal áte.”

³ Ankē á Ekone é Menzab ádyēē ásē. Héε ábē bembapεε bétané mó wée bebédé bēnpen boŋ bésēdté mó bán, “Láá sé pónde echē nímén mekan mésyāal mébenlédté. E’chemléd é’héé bēlūmēd epε échōŋ ne asóg dé nkōŋsé?”

⁴ Yesue antimtén bó nén aá, “Nyétēd pónde nén modmod eédōḡē nyé.

⁵ Bad híin bépē bán bóó bédé Ane-awē-Béwōḡté. Bédōḡ-ke bad híin.

⁶ Nyéewōḡē ngáne nzum éwantεé, nyéewōḡē-’ε nzunze é nzum. Boŋ nyé modmod nyéēnāā. Mmēn mekan mésyāal métāŋḡéné abenled, boŋ saké móó mēlūmēd bán asóg ámáá apε.

⁷ Aloŋ ahóg détyēēmēn ádíníí nzum. Nkamlēn nhóg-ke rítyēēmēn nímíníí. Nzaa ébē, ndáob-pe eénaŋnéd ásē mebwóg ne mebwóg.

⁸ Echén ndutul ésyāal ébē nēŋgáne mewε mé’sō níme mmwaád áwóḡéé nzé aheđe achyáa.

⁹ Ene pónde békōb nyé, bēbe nyé á mekáá mé bad ábe békōḡsēn nyé, bēwúú-’ε nyé. Melōŋ mésyāal mékóó nyé áyāle dín ádēm.

¹⁰ “Bad híin béewōŋḡé adúbe ámpē. Bēbeé nhóg ne aníníí á mekáá mé bad ábe békóó bó. Bó bēn-ne békóon.

¹¹ Bekal bé’dáádāŋ bé metóm híin bēbíd, bédōḡ-ke ekud é bad áhíd bó.

¹² E’bēb bé nlem á abum bēchāḡē, né-óó edāŋḡe é bad híin esūd.

¹³ Boŋ kénzēé awē ákaán nímé metake nlem kááŋ ne á asóg, ákúú e’sóosōŋ.

¹⁴ Mmén nkalāŋ rí bwām tāŋḡene nkamlēn rí Dyöb mékanléd nkōŋsé áte rísyāal ábel boŋ melōŋ mésyāal méwōḡ. Ene pónde dáo asóg dépéé.

E’bēbtéd é’ mekan dbe bépē
(Mak 13.14-23; Luk 21.20-24)

¹⁵ “Nyéenyín nées ekúkú é akan eche épεene e’sōn á’sō é Dyöb ébēnlédé á Ndáb-e-Dyöb á hōm áde ásáá * ngáne nkal é’dáádāŋ Daniele ánhōbpε aá ébēnléd. (Nyé ábe nyéláa’ nímén mekan nyésōŋten mó bwām.)

¹⁶ Nzé nyenyíné nê, bad ábe bédé á Judeya bétóm mehélé, bēke bésōom á e’kone mín.

¹⁷ Mod awē adé á nnoŋ rí ndáb mín eétoḡné asud áke déttéd chōm eche édé mó á ndáb-te.

¹⁸ Mod awē mó-’ε ámpē adé á nzag-té, eétmē ámbíd á ndáb áke déttéd sóte.

¹⁹ Ebē ebéttéd ne bebaád ábe bēbē nkog ne ábe bēmwāŋtē nímé mesú.

²⁰ Nyékāne nén bán ádē abāŋḡé déttānē nyé á pónde e nkóg áde ahéb ádíí ngine bwāmbwam, ké’ε á mbwe-mé-nkóme-áte.

²¹ Ayāle ndāŋḡe echē ébē ene pónde ébē ndín echē eébēnlédé mbéd bootya nkōŋsé ríbootede kááŋ ne epun é’chii. Dyamdyam nées ádē déebenléd-taá ámpē mbéd.

* **24:15 Hōm áde ásáá:** ádíí hōm ádē bébageé Dyöb edubé ne wée bad bēndūbē bán, Edáádāŋ eche Esáá édé.

²² Dyõb áamáá ábê e'pun é' metake asél áte. Nzé énkêmbé nê, né modmod éechonjé. Bon á etútú é bad ábe ápwédé, ásel ábê e'pun áte.

²³ Ene pónké nzé mod alánjé nyé aá, 'Nyénone', Ane-awé-Béwógté mó nén' káa aá, 'Mónínií, nyéedúbpé'.

²⁴ Ayāle bad híin bébídé' ábe békalé metóm nén bán, bóó bédé Ane awé Dyõb Awógté. Bekal bé' d'áadonjé bé metóm ámpé bébíd. Bébelé menyáké mé ngíne, bélumtê-'é e'chemléd híin. Bébel nén ábel bon bédog kááne bad ábe Dyõb ápwédé, nzé nzií edé ádog bó.

²⁵ Nyénone', nlánje nyé nímén mekan á'só é' pónké.

²⁶ Né-óó nzé bad bélánjé nyé nén bán, 'Nyénone' adé á ehyánje, nyéekāg áwed. Káa nzé bélánjé nyé bán, 'Nyénone', adé á ton-tê hén, nyéedúbpé'.

²⁷ Επε éche Mwān-a-Moonyon ebē melemlen nēngāne emwēdmwēd étóméé á akuu ne á mbān.

²⁸ Ké héé wéé ndim mbāgkē dóo benhōgnoné béladnéé.

Epe é Mwān-a-Moonyon

ne asóg dé nkōhsé

(Mak 13.24-27; Luk 21.25-28)

²⁹ "Ade pónké e ndānje ne étómē tómén, etondēe ākwē ehintén, ngon-ne esóg apen. Betintine bébíd ámín, béhūn ásē, ngíne-'é éche edé ámín énájnéd á e'dii.

³⁰ Ene pónké dóo nyényinnē néé e'chemléd é' Mwān-a-Moonyon é'bidé ámín. Hē dóo metúmbé mé nkōhsé méšyāāl mébootédte achii ne mbwóg. Bad bényín néé Mwān-a-Moonyon áhúé' é á mbag mín, ne ngum, ne ehúmé ésyāāl.

³¹ Esaád é elonj émbáá éwōgnéd. Ene pónké ālōm éche ángel á metónjé mé nkōhsé méšyāāl méniin. ālad ábē bad áte ábe Dyõb ápwédé, bootya atónjé dé nkōhsé ahóg āpe ádiníí.

³² "Nyétéd elānsén wéé alín á ngāl. Nzé ngen ébóótédé byaá békāālē abided, nyélele nyébíí bán nchoj rídé benben.

³³ Melemlen nzé nyényíné nímén mekan méšyāāl mébenlad, nyébii nén bán, Mwān-a-Moonyon akwogé ape, † adé-'é benben.

³⁴ Ne mbále, nlánje nyé nén méé, enén nyonjgel e bad éemaá' é kááj né nímén mekan méšyāāl mébenlédé.

³⁵ Nkonj m' m'ín ne nkōhsé bémaá, bon ábēm e'yale bēbē abé ne abé.

Modmod eebii' é epun

éche Mwān-a-Moonyon ápéé

(Mak 13.32-37; Luk 17.26-30, 34-36)

³⁶ "Modmod eebii' é epun pen ké' é pónké eché nímén mam mébenlédte. Ké ángel éche edé ámín éebii' é, ké mwān ámpé eebii' é. ‡ Titéé mwēmpen mó abíí pónké eche nímén mekan mébenlédte.

³⁷ Melemlen ngāne émbēē á pónké eche Noa, nê dóo ébēē pónké eché Mwān-a-Moonyon ápéé.

³⁸ Ayāle á pónké eched, byánán mendíb mé mbúú mélōn á nkōhsé-te bad bédyágé' áá bwēm, bémwāg-ke, bebaád ne baachóm béwōhne, kááj ne mbwē míne Noa ásólé á bōle é' mbáá-te.

³⁹ Bénkēmbíí' é dyam áde ábenlad, kááj ne pónké eche mendíb mé mbúú mélōnné, méhóód-te bó. Melemlen nê dóo ébenlédte á pónké eché Mwān-a-Moonyon ápéé.

⁴⁰ Bad bēbē bébelé nsón á nzag-té, Dyõb átéd nhóg, átēdē anínií.

† 24:33 Mwān-a-Moonyon akwogé ape káa pónké ekwogé ape. ‡ 24:36 Ké mwān-ne ámpé eebii' é: donje á kálag déewóó' é ábén e'yale.

41 Bebaád bébē békogé medyé, Dyōb átéd nhōg, áchēnē aníní.

42 Né-óó nyétéd pónde áyāle nyéebíí' é epun éche awen Sāngwéé ápéé ámpē.

43 Boŋ nyéebíí nēn bán, nzé nwóó-ndáb abyéé' áá pónde éche nchíb ápéé nkuu, né ádyéé epin áñon ndáb. Né enkēmmwaa áá nchíb ábóo mó ndáb.

44 Né-óó nyémpē nyétāngéné mboŋsén abé, áyāle Mwān-a-Moonyon āpē á pónde échē nyéekamtenéé.

Mbaledé a bwām ne mbaledé a mbéb
(Luk 12.41-48)

45 “Né-óó, nyé mod té ábē néé mbaledé awé awóó debyéé, awé abele-’ε mam míme éche sāj alāngé mó áá ábel. Mó adé mbaledé awé éche sāj ábánné áá ákamlen bembaledé ábíníí, yáín-ne nēn áá békúdé echab ndyééd pónde échē etāngéné.

46 Nnam mébē ne ane mbaledé awé éche sāj áhūū’ é, boŋ atán nēngáne ábeléé mam míme ányāgtēnné mó.

47 Ne mbále nlānge nyé nēn mēé, ane mbaledé éche sāj ábané bwēm é’ syāal ábe áwóó áwe mekáá áá ákamlan.

48 Boŋ nzé ane mbaledé adé mbaledé a mbéb, boŋ ahóbé áwe nlém-té áá, ‘Ehēm áte boŋ echem sāj áhūū.’

49 Né-óó aboótédé ábíníí bembaledé ábe bédé ásē echē awanen, ádyāg bwēm, ámwāg-ke mím ne be-mmwé-míme.

50 Boŋ ane mbaledé éche sāj áhūū epun éche éewēmtēnéé ne á pónde échē énkēmbíí’ é áá áhūū.

51 Ane mbaledé éche sāj ákōgsēn mó héén. Akōgsēn mó melelem ngáne ánkōgsēnné bedog-badé, áhed dō-’áá áchyéé’ é boŋ ádyāg-ke meson á nsāl.”

25

Ngan e ngōndéré dyōm

1 Yesue ambenléd ngan empée, áhōbē nēn áá, “Pónde éche Mwān-a-Moonyon ápéé, nkamlen ní mín mébēē nēngáne ngōndéré dyōm éche éntéd ábab e’trúkán áke dé asin mod awé akude sómbé áke délyáged mó.

2 Átínté échē ngōndéré dyōm, étáan émbē eyókél, étáan-ne énwōŋ debyéé.

3 Ábe bēmbē eyókél bēnwalé e’trúkán boŋ bēnkēnwaléé dyōg dé etrúkán áde ákwōgnédé.

4 Boŋ ábe bēnwōŋ debyéé bēnwalé ábab e’trúkán ne dyōg démpēé á e’píd te.

5 Mod awé akudé’áá sómbé enkēnkobéé ape, né-óó e’chó é’tágté’áá bó, békún-ne.

6 Melúde mé nkuu dōo esaád ébídé bán, ‘Mod awé akude sómbé mó ahúe’ nēn! Nyéhyag-kōó nyétán mó.’

7 Dōo échē ngōndéré dyōm ésyāngé ásē, échágéd ábab e’trúkán.

8 Héé éche ébédé eyókél élāngéé éche énwōŋ debyéé bán, ‘Nyéwōŋgen se ádān dyōg dé etrúkán áyāle e’trúkán ábād é’ dímmé.’

9 Ngōndéré éche énwōŋ debyéé entímtén bó nēn bán, ‘Aáy! Dyōg áde séwóó déekwogké syānē moosyāál. Nyéke nyéchan ádēn wéé bésóméé.’

10 Né-óó, ngōndéré ché énkē dyōg dé etrúkán achan. Ade békíí nē, dōo mod awé akude sómbé ápédé. Echē ngōndéré é debyéé étáan éche émbē mboŋsén bōbōō bēnké bēsól á ndáb e ngande e e’wōŋgé bédīb-pe ekob.

11 Ámbíd e pónde dōo échíníí ngōndéré épédé boŋ bélébpe bán, ‘A-Sāj díbnéd sé ekob!’

12 Dōo mod awé akude sómbé átímtanné bó áá, ‘Ne mbále, nlānge nyé nēn mēé meebíí’ é nyé.’ ”

13 Hée Yesue ásógtée ene ngan nén aá, “Nyétêd pónde áyale nyéebii’ é pónde eche Mwán-a-Moonyonj ápée.”

*Ngan e bembalede beldán
d̄be bényāgnēdte ngāb
(Luk 19.11-27)*

14 Yesue ambád ámpē aá, “Ene pónde nkamlen nímín mébē nēngáne mod nhóg awē anlédé eke ake, bonj achélé ábē bembalede alyág eche ngāb áwāb mekáá.

15 Ambē bó mod té t̄ngene echē ngude. Ambē nhóg e’kálé é’ kábpe é’táan, ábē aníní e’kálé é’be, ábē-’e aníní ekálé ehóg. Amaá-’aá bó abe bonj ákag.

16 Mbalede awē ankūd e’kálé é’táan antéd nímē melelem mé pónde áke akábén nyongé, ákudé’ e’kálé é’táan bémpee nēe nsyāj.

17 Awē m̄mpē ankūd e’kálé é’be ambēl melelem ákūd-te e’kálé bémpee é’tān nēe nsyāj.

18 Bonj mbalede awē ankūd ekálé ehóg ankē echóg alím, atéd nímē mōné níme awē s̄ngwée ámbéé mós, ákóó mós áwēd-te.

19 “Etún é pónde ámbid enē, s̄ngwée awē ábē bembalede anhuú, bós̄bōs̄ belúmtén áte ngáne bó mod téé ábenlédé nímē mōné.

20 Mbalede awē ámbéé e’kálé é’ kábpe é’táan ampē wée eche s̄āj, áhōbē nén aá, ‘A-Sāj, wembē me e’kálé é’táan ábē ménkābēnnē nyongé bonj r̄kud e’kálé é’tān bémpee nēe nsyāj, mós̄mén.’

21 Dóo eche s̄āj élan̄gēé mós aá, ‘Nē ábóó, edii mbalede a bwám, edé mod a mbále, ebélé bwám. Ngáne éhélé nson̄gē r̄sad alyáged, mēbē we nson̄gē m̄báá ályáged. Hyág-kó, déwóg menyinge.’

22 “Mbalede awē bēmbéé e’kálé é’ kábpe é’be mós-’e ampē, áhōbē nén aá, ‘A-Sāj, wembē me e’kálé é’be ábē ménkābēnnē nyongé bonj r̄kud e’kálé é’be bémpee nēe nsyāj, mós̄mén.’

23 Dóo echab s̄āj álāngēé mós̄mpē aá, ‘Ebélé dyam áde ábóó, edii mbalede a bwám. Ngáne éhélé nson̄gē r̄sad alyáged, mēbē we nson̄gē m̄báá ályáged. Hyág-kó, déwóg menyinge.’

24 Dóo ane-’e awē bēmbéé ekálé é’ kábpe ehóg ápédé bonj áhōbē nén aá, ‘A-Sāj, mbíi meé edii mod awē alélé áte. Ehúde’ wée wéewéneé, épādē-’e wée wéesobéé.

25 Menwóg mbwóg, né-’ó, menkē n̄mōj mōné alíme á ndōb-tē. Mmōj mōné mós̄ r̄dé, mós-’e we mén.’

26 “Hée echab s̄āj álāngēé mós aá ‘A-ebébtéd ne ewōmwōm é mbalede! Wembíi weé ndii mod awē ahúde’ wée éewéneé, wée mpáde-’e wée méesobéé.

27 Cheé-’ē énkāj bonj weehéde nímēm mōné á ndáb eche békongéé mōné ábel nén á ehúu échém r̄tán nēe r̄chyáá mōné mémpēe ámín?’

28 Dóo ane mod álāngēé bembalede bémpee aá, ‘Nyékoben mós nímē mōné nyébe wée mod awē awóó e’kálé é’ kábpe dyóm.

29 Kénzée awē awóó, Dyób débād mós abe, ábūd-te awój bwámbwam. Bonj ane awē mós-’e eewóó, Dyób dékobén mós kóš̄jne mwámpín awē awóó.

30 Né-’ó anén mbalede awē eesē dyam dé abenled, bebwēm mós á ebwóg-te, á ehintén-tē. Ahed-taá áchyéé’é, ádyág-ke mesoj á nsal.’ ”

Mbakú e asóg

31 Yesue ambád ahób ámpē aá, “A pónde echē Mwán-a-Moonyonj ápée nēe k̄āj ne ángel é Dyób ésyāēl ádyéé á atii dé nkamlen ákáad bad.

32 Bad bésyāā́ a nkòṣé bēladén áte áwē e'só. Ene póndé ákab bó áte monḡe mébe melemlem nēḡgáne nnən-a-mbód ákabéé éche mbód áte, ábānē rídyəḡ ní mbód pəd póg, ábānē-é tón é mbód échíní eped.

33 Nē dōo ene kāḡ ébanéé bad ábe bésáá á ekáá émbáá, ábānē-é bad ábe béesaá á ekáá é emwēd.

34 Ade nēn débenlédté, álaā́ bad ábe bédé mó á ekáá émbáá aá, 'Nyéhyag, nyé bad ábe echem Sāḡ ánámte! Nyéhye nyékob nnam mé nkamlen ní Dyōb níme ábòṡséné nyé bootya póndé eche áhágé nkòṡsé.

35 Nyéēkūd nímén nnam áyāle áde nzaa ékóbé me, nyēmbéé me chōm éche méndyē. Ade píd ékóbé me nyēnhé me mendib mémwē. Ade mpédé-é nken, nyēnkób me bwām.

36 Ade ménkēnwōḡ'é chōm éche níwáá'é, nyēmbě me mbóté. Ade ménkēndyē'é bwām, nyēntagén me. Ade níbédé-é á mbwəḡ, nyēnhyé me anən.'

37 Héé bad ábe bésáá bēkwenténné mó bán, 'A-Sāḡ póndé ehéé sēnyīnnē wē ne nzaa boḡ sébē wē ndyééd, káa áde píd ékóbé wē boḡ sébē wē mendib?

38 Póndé ehéé-'áá sēnyīnnē wē boḡ sékōb wē nken áwēd mendáb, ké'ε sébē wē mbóté ádē wēwóo'é chōm éche éhāḡkē?

39 Póndé ehéé wēnkēndyē'é'é bwām, boḡ sétḡḡen wē, ké-ε séhyē sēnōn wē ádē édíí á mbwəḡ?"

40 Héé ene kāḡ étimtanné bó aá, 'Ne mbále, nlāḡge nyé meé, póndé ké ehéé echē nyēmbenlé nē ne mwānned ké ahéé, ké awē eésé etóḡnén, né meé nyēmbeléé.'

41 "Hé-'áá álaā'é bad ábe bédé mó á ekáá é emwēd aá, 'Nyésyāā́ me á díd-te, nyé ábe nyékudé nkòḡsen ní Dyōb. Nyékaḡ á dū-á-muú níme méédímé', níme Dyōb ábòṡséné áyā́ e Devāle ne éche ángel.

42 Nzaa ewagé'áá me boḡ nyēnkēmbáá me chōm éche rídyāḡkē. Ade píd énkōbpē me, nyēnkēháá me mendib.

43 Mbédé nken, boḡ nyēnkēnkōbpē me áwēn mendáb. Ade ménkēnwōḡgé chōm éche níwáá'é, nyēnkēmbáá me mbóté. Ade ménkēndyē'é'é bwām, mbé-é á mbwəḡ nyéétogne'áá me.'

44 Hē dōo bēkwenténné mó bán, 'A-Sāḡ, póndé ehéé sēnyīnnē néé nzaa, ké'ε píd ékóbé wē, ké'ε néé édíí nken, ké'ε áde wēwóo'é chōm éche éwáá'é, ké'ε ádē ékonléé, ké'ε édíí á mbwəḡ boḡ séewōḡḡene wē?"

45 Héé ene kāḡ étimtanné bó aá, 'Ne mbále, nlāḡge nyé meé, póndé ké ehéé echē nyēnkēnwōḡḡénné ábén bad ké ahéé awē eebéde etóḡnén, me-éé nyēnkēnwōḡḡénné.'

46 Abén bó-aá bēkē ákud nkòḡsen níme méemaá'. Bad ábe bésáá-'é bēkē á alongé ádē déemaá'."

26

Bad bēmbáá bé Israel

béḡagke Yesue áwúu mó

(Mak 14.1-2; Luk 22.1-2; Jōn 11.45-53)

1 Ade Yesue ámáá níme mam mésyāā́ ayáged, dōo álanḡḡéé ábē bembapēe aá,

2 "Nyébíí nēn bán, ámbíd e e'pun é'be Ngande e Nnyime-ámin ébē. Echē epun dōo bēbéé Mwān-a-Moonyoḡ á mekáá mé bad ábe bēbomé mó á awəḡ."

3 Beprise bēmbáá ne bad bēmbáá bé dyad bēmbóm á ndáb wēe Kaifase, prise ambáámbáa.

4 Ahed dōo bēbélé'áá ntíi ákób Yesue á mesəom-té, áwúu mó.

⁵ Boη bēnhōb bán, “Deébēlē nē á mbwe rí ngande, áyāle nén bad bēpēén epuutéd.”

Mmwaad nhóg awógté

Yesue á dyad á Betani

(Mak 14.3-9; Jōn 12.1-8)

⁶ Yesue ambé á Betani á ndáb wée Simōne awē akékolé nkole mé meləη.

⁷ Ade ádyáγκē ndyééd nē, dōo mmwaad nhóg ápédé áwē ne apom á dyōg dé elod é bwám áde dénlēl nkun, ásyog mó dō á nló.

⁸ Néé ábē bembapēē bényíné nē, bēnlīη, bésēdté-’ε bánken, “Cheé ékáá boη anén mmwaad ábēbtē, enén nyaa e dyōg?”

⁹ Béhélé’áá se bésóm adén dyōg nkun mbáá, bēwóngén betóótōkē bé bad.”

¹⁰ Yesue ambíí mam níme ábē bembapēē bēhóbé’áá. Né-óó anláá bó áá, “Cheé nyétagtéé anén mmwaad? Dyam ádē ábēnlé me átómténé aboη.

¹¹ Betóótōkē bé bad bēbē ne nyé póndé ésyāāl, boη me pen méebáá ne nyé póndé ésyāāl.

¹² Asyogé me adén dyōg á nló aboηsen me áyāle níme nímmēn.

¹³ Ne mbále, nlānge nyé nén mēé kēhéé ádē nímmén nkalaη ní bwám mékanlédté nkōηsé áte ísyāāl, bēhōb dyam ádē anén mmwaad ábélé, ákamten mó.”

Judas akwēténé Yesue asóm

(Mak 14.10-11; Luk 22.3-6)

¹⁴ Ambíd e nē, mbapēē nhóg áfínté e dyóm ne bébe ábe Yesue, awē béchágé’áá bán, Judas Iskariōde ankē beprise bēmbáá atán.

¹⁵ Héé ásedtēé bó áá, “Cheé nyébéé me nzé mbagé Yesue áwen mekáá ábel nyékób mó?” Dōo bétóó móom mé kábpe meláan boη bēbagé mó.

¹⁶ Bootya ene póndé dōo ábóótédé nzii ahed ásom mó áwāb.

Yesue ne ábē bembapēē bétómté

Ngande e Nnyíme amín

(Mak 14.12-21; Luk 22.7-13, 21-23; Jōn 13.21-30)

¹⁷ Bōob-pōó, póndé e Ngande e Ewele-é-Ngēn empē. A epun é’sō é ngande, bembapēē ábē Yesue bēntān mó, bésēdté mó bánken, “Héé wédəηgé wēé séboηsen we ndyééd e Nnyíme-ámín?”

¹⁸ Dōo Yesue álóméé bó á dyad-tē wée mod nhóg áá, bēláa mó bán meléede ahóbé nén áá, “Echem póndé emaa ape. Awōη ndáb dōo syáabe ábēm bembapēē sédyēē ndyééd e ngande e Nnyíme-ámín.”

¹⁹ Né-óó bembapēē bēmbēl ngáne Yesue ánlāá’é bó, bēmbōηsén-ne ndyééd e Ngande e Nnyíme-ámín.

²⁰ Ene ngukél Yesue ne ábē bembapēē bēndyéé áse, bēdyāg ene ndyééd.

²¹ A ndyééd mín wē, dōo Yesue álāngeé bó áá, “Ne mbále, nlānge nyé nén mēé nyé mod nhóg ábē me á mekáá mé bad bé ekoyí.”

²² Nén dénwōgēd bembapēē ndutul bwāmbwam. Bēmbootéd mó asēded nhóg ámbíd aníníí, bán, “A-Sáη, ndúbpe mēé saké me.”

²³ Dōo Yesue átimtanné bó áá, “Mod awē sūmō séētōdé ewele á dīse-tē atōde ahóg móšōm me.

²⁴ Mwān-a-Moonyoη áwē ngáne éténlédé, boη medim ne ane mod awē ásom mó. Ebágé’áá bwám ne ane mod nzé bēnkētəgen mó achyáa.”

²⁵ Héé Judas awē ankwētén Yesue asóm ásedtēé mó áá, “A-meléed, me-yé?” Héé Yesue átimtanné mó áá, “Ngáne éhóbé.”

*Ndyééd e Sányá**(Mak 14.22-26; Luk 22.14-20; 1 Kor 11.23-25)*

²⁶ Ade bedyákē ndyééd nê, dɔɔ Yesue átédé ewele, áságnān Dyōb, boŋ ákabtáád áte, ábagé ábē bembapεε áhōbē nén aá, “Nyékob, nyédyê, echem yál nén.”

²⁷ Ámbíd e nê, antéd mbwendé mí mím, áságnān Dyōb, ábagé bó, boŋ áhōbē nén aá, “Nyé moosyáál nyémwê.”

²⁸ Mmēm mekií mōmén. Mmén mekií médií melē mékōālē. Mmén mekií mésyógkē á nló mí bad híin, ábel nén Dyōb álagsen bó mbéb.

²⁹ Nlānge nyé nén meé, méemwáá nímén mím ámpē kóōŋ ne epun éche mémwēé mó ekóólé ne nyé á nkamlen nímē echem Sány.”

³⁰ Bénkōn nkāŋgé mé nságnen. Néε bémáá akón, bēnkē á Ekone é menzab.

*Yesue ahóbé ngáne**Petro dbāŋgē mó áyāl**(Mak 14.27-31; Luk 22.31-34; Jon 13.36-38)*

³¹ Ade bépédé á ekone mím, dɔɔ Yesue álanŋεé ábē bembapεε aá, “Nkuu nén dēn, nyé baásyāāl nyéŋnyágéd, nyétēdē me. Nyéŋnyágéd, áyāle dyam áde dēbenléd ne me. Eténlédé nén bán, ‘Mēwū nnon-a-mbód, éche mbód ésyāāl épáŋtéd áte.”

³² Boŋ áde echem Sány ápuúdté me, mēkē á’sō á Galilia, áwed-taá nyétānnē me.’”

³³ Ade Yesue ámáá ahób nê, dɔɔ Petro áhóbεé aá, “Ké moosyáál ambāŋ wε áyāl, me pen méetēdēé wε mbéd.”

³⁴ Dɔɔ Yesue átímtanné mó aá, “A-Petro, níláa wε meé, nchóm-a-kúb adēhób aá móto’o’ nkuu nén, wēbāŋ me áyāl ngen éláán.”

³⁵ Dɔɔ Petro ábádtéé mó áte aá, “Ké nkāŋ móó bésēlēε me, méebāŋgé wε áyāl mbéd.” Abíníí bembapεε bésyāāl bómpē bēnhōb melemlen.

*Yesue akánné á Getsemani**(Mak 14.32-42; Luk 22.39-46)*

³⁶ Ámbíd e nê, Yesue ne ábē bembapεε bēnkē á abwóg á hōm áde béchágé’áá bán Getsemani. Ade bépédé, Yesue anláá bó aá bedyεε áhed, aá mó-ε mósídté’ á’sō, ákáne.

³⁷ Ade ákagké, ankeén Petro ne bán ábe Zebēdiε bébe. Ndāŋge ne metake híin bēbédé mó á nlém-tē.

³⁸ Dɔɔ álanŋεé bó aá, “Ndāŋge echē edé me á nlém ehele-se ewúú me. Nyélyag hén, nyédyeen me epin.”

³⁹ Dɔɔ Yesue ásídté á’sō ámpē boŋ ábwēmē yál ásē. Ankúdé n ásē, ákánnē aá, “A-Tē, nzé ébōŋnéde wε, ékóbén me nímén metuné. Boŋ ké nê, bēl ngáne ébōŋnéde wε, saké ngáne ébōŋnéde me.”

⁴⁰ Ade ámáá akáne, antím ámbíd wēε ábē bembapεε beláán. Antán néε békúnéé, boŋ álanŋē Petro aá, “Cheé ékóá boŋ nyéēhele awesen ádyeen me epin ké háwa póg?”

⁴¹ Nyédyεε epin, nyékānne ábel nén Dyōb déemwāg-se mekágsen mépiinéd nyé. Nlém nídáá, boŋ ekob é yál edé mbwóg.”

⁴² Yesue anke akáne ámpē, áhōbē nén, aá, “A-Tē, nzé edé nén bán, wēhélēε-se ékōbēn me nímén ntéd mé metuné, ésebán mpémé mó, ébel ngáne ébōŋnéde wε.”

⁴³ Néε átímé ámbíd ámpē, antán néε ábē bembapεε bédii békúnéé áyāle e’chá bēmbē bó á díd bwāmbwam.

⁴⁴ Yesue antím ámbíd á mekáne ámpē ngen éche élónténe éláán, áhōbē melemlen mé e’yale.

45 Hê dǎo Yesue átímé ámbíd ámpē wée ábē bembapēe, bonj álǎngē bó aá, “Nyélyǎgē nyékúne’, nyékómme-’ε nyé áte-ye? Nyénǎne’, pónǎde-’aá epedé nǎn eche bébēé Mwán-a-Moonyonj á mekáá mé bad bé mbéb.”

46 Nyépáde ásē dékag. Nyénǎne’, mod awé akií me ntúrē mó ahúe’ nén.”

Békóbe Yesue

(Mak 14.43-50; Luk 22.47-53; Jǎn 18.3-12)

47 Ehób éepedéé Yesue amaa á nsǎl bonj Judase ápag. Judase, mbapēe nhóg áfinté e bembapēe dyóm-ne-bébe ábe Yesue, ampē ne amute áǎé dénwalé nkwaté ne mbíd. Beprise bémbáá ne bad bémbáá bé Israel bóo bénlóm ábē bad.

48 Ntúrē awé Yesue amad bó e’chemléd abe aá, “Kénzéé awé méhēē tâl, né mod awé nyéhēdeé móne, nyékób mó.”

49 Néé Judase ápedé pēén, atóm-me wée Yesue, áléléd mó aá, “A-meléed, nsanj mǎhē ne wε.” Ahé-’ε mó tâl.

50 Yesue antimén mó aá, “Amúē, wébeléé chóm éche éhyédé abel-ε?”* Hê dǎo ábē bad bésídté á’só, bonj békóbē’ Yesue, béwéd-te mó acháa.

51 Hê dǎo mod nhóg áfinté e bad ábe bémbē ne Yesue áǎolé nkwaté á abám, néé atómte mó bonj asél-le ntǎj awé prise ambáámbáa etúu.

52 Dǎo Yesue álǎngéé ane mod aá, “Timéd nímónj nkwaté á abám. Kénzéé awé awanne nkwaté, nkwaté móo béwūēnnē mó.

53 Weebíí’ é nén wée nzé nhědné echem Sǎj nwǎngen, wée né ábwǎg-ábwǎg, álómē me e’chonj ne e’chonj é ángel áwǎngen me-ye?

54 Bonj nzé mbelé nē, né chán-nǎ kálag e Dyǎb echē ehóbé nén aá, nén átǎngéné abenled élonné?”

55 Héé Yesue álǎngéé áǎé amute aá, “Nchíb móo nídí awé nyéhyédé akób ne mbíd ne nkwaté-ye? Epun téé mbéde á Ndáb-e-Dyǎb, ní’yǎgtē bad, bonj nyéékóbe me.

56 Bonj nímén mésyǎál mébénlédé áloned mam níme bekal bé’dǎǎǎj bétélé á kálag e Dyǎb.” Hê dǎo bembapēe bésyǎál bétédté mó, bonj bétómé mehélé.

Bépééné Yesue á kóte

(Mak 14.53-65; Luk 22.54-55, 63-71; Jǎn 18.13-14, 19-24)

57 Hê dǎo bad ábe bénkób Yesue békééné mó á ndáb wée Kaifase awé ambé Prise Ambáámbáa. Ahed dǎo bemeléede bé mbéndé ne bad bémbáá bé Israel bémpēe bēnladénné áte.

58 Ade békeenéé Yesue nē, Petro ahidé’áá mó ámbíd mwǎ etún kǎǎj bépe nchiuten ne eyáde éche Kaifase. Néé ápedé áhed ansól á eyáde-tē, ádyε ásē ne benǎn bé Ndáb-e-Dyǎb, ábel nén ányín ngáne nkáásé níme Yesue mésoǎgkē.

59 Bǎǎb-pǎǎ, beprise bémbáá ne bad bé káánsel bésyǎál béhéde’áá bad ábe bébíd mbónj é metóm á nló wée Yesue ábel nén béwúu mó.

60 Ké nēngáne ekud é bad ényhē mbónj é metóm abíd áwe nló, bēnkēnkóbénné mó awusé ké ahóg. Kǎǎj ne á asóg, dǎo mbónj ébe ébídé, éhóbē nén bán,

61 “Anén mod anhób aá, móhele móbǎotēd Ndáb-e-Dyǎb aá mǎlǎj-’ε chǎ ámbíd ámpē áfinté e e’pun é’lǎán.”

62 Ade Prise Ambáámbáa éwógé nē, dǎo átyéémé ámín bonj ásedté Yesue aáken, “Weewóo’ é dyamdyam áhób tǎngene dyam áǎé ábén bad béhóbé wε á yǎl-ε?”

* 26:50 Amúē, wébeléé chóm éche éhyédé abel-ε? Káa, Amúē, cheé éhyédé abel hén?

⁶³ Boŋ Yesue enkênkadénné mó. Hê dóo Prise Ambáámbáa álāngēé mó ámpē aá, “Ne melē á dīn á Dyōb áde áde á alongé, láá sé mbále, wē-éé edé Ane-awē-Béwōgté, Mwān a Dyōb-é?”

⁶⁴ Hê dóo Yesue ákwentanné mó aá, “Ngáne éhóbé.” Yesue ambád-te ámpē aá, “A mbále, nlanŋe nyé nén mēé bootya enén pónde, nyéenyīn nēé Mwān-a-Moonyoŋ ádyéé á ekáá émbáá é Dyōb a Ngum. Nyéenyīn-ne nēé ádyéé á mbag mīn, ásudéé á nkōŋsé.”

⁶⁵ Dóo Prise Ambáámbáa ányábé mbóté álúmed nén aá mólii, boŋ álāngē bad bé kóte aá, “Asyáá Dyōb! Mbōŋ éhéé émpēe déhédeé? Nyé baasyāā nyéwógé bōōb ngáne ásyáá Dyōb!”

⁶⁶ Dóo ásedtēé bó aáken, “Chán nyéwémtnéné?” Hēé békwétnéné bán, “Ak-wedé nkáá, atāŋgéné-’é awé.”

⁶⁷ Dóo doŋge á bad bébóótédé mó meléed asobted á’sō, bébōmé-’é mó. Abíní-’é bébōmé mó mebén,

⁶⁸ béhóbé-’é bán, “A-mod awé ahóbé aá móo módē Krīstā, láá-’é sé mod awé abōmē wē.”

Petro abáá Yesue áyāā

(Mak 14.66-72; Luk 22.56-62; Joŋ 18.15-18, 25-27)

⁶⁹ Ene pónde Petro andyēé áse á eyáde é kóte-tē. Hê dóo ngōndéré e mbaledé póg épédé áwē, boŋ éhōbē aá, “Wē nén, edé nhóg awé awōŋné’áá Yesue, ane mod awé abídé á mbwóg e Galilia.”

⁷⁰ Boŋ Petro antāŋ á’sō wēé ábē bad bésyāā, ákwentén aá, “Meebii’ é dyan áde éhóbé.”

⁷¹ Ade ámáá ahób nē, antīm á mmwē mé eyáde é kóte. Áhed dóo mbaledé a ngōndéré ampée ányíné mó, boŋ álāngē bad ábe bébédé áhed aá, “Anén mod abédé ne Yesue, mod a dyad á Nazaret.”

⁷² Boŋ Petro antāŋ ámpē, áhōbē nén aá, “Mmwāg melē nén mēé meebii’ é me ane mod.”

⁷³ Eebeméé áte, bad ábe béntyēēm áhed bēmpē wēé Petro, boŋ béhōbē nén bán, “Etáa ngēn, edé nhóg awé ahídé’áá ane mod. Mbwéd e ehób echōŋ epanle wē áte, nén ebídé á mbwóg e Galilia.”

⁷⁴ Dóo Petro ámwākē melē aá, “Dyōb ákōgsen me nzé nkale metóm! Meebii’ é ane mod!” Ade ámáá ahób nē hóbén, nchóm-a-kúb antōŋ.

⁷⁵ Dóo Petro ákámtnéné ehób éche Yesue ánlāā’é mó aá, “Nchóm-a-kúb adēhób aá mótdō, wēbāŋ me áyāā ngen éláán.” Dóo Petro abídé á ebwóg-te, boŋ ábānlē awé. Anchii bwāmbwam.

27

Békééné Yesue wēé Payledé

(Mak 15.1; Luk 23.1-2; Joŋ 18.28-32)

¹ Nēé bīn é’sāngé sāngén, beprise bémbáá ne bad bémbáá bé Israel bésyāā bēmbootéd Yesue ahage ngáne béwūū’é mó.

² Bēnhaŋ mó, bébāg-ke mó á mekáá wēé Payledé awé kāŋ e aloŋ á Roma émbanéé aá ákamlan bad bé mbwóg e Judeya á pónde eched.

Kwééd eche Judase

(Mbēl 1.18-19)

³ Ade Judase, ntúrē awé Yesue ányíné nén aá kóte ebagé mbakú nén bán béwūu Yesue, ambé ngol ne awusé áde ábélé. Nē dēnkōŋ, antéd móom mé kábpe meláán nīme beprise bémbáá ne bad bémbáá bé Israel bēmbéé mó, áke átimtéd bó ámbíd.

4 Anhób aá, “Mbélé mbéb áke mod ntúré awě eébele dyamdyam, awě bėwũ-áá bɔɔb ngèn.” Dóo bétimtanné mó bán, “Cheé séwóó abel ne nê? Nê ánoe we.”

5 Née Judase áwógé nê, ambwémé bó nímé móom mé kábpe méláán ásé wée bėmbɛé á Ndáb-e-Dyɔb. Née ámáá abwém, ambíd áke ápan yál.

6 Beprise bėmbáá bėnlád nímé mɔné áte, bėhɔbė nén bán, “Mmén mɔné rídíi mɔné mé ebɛn. Né-ɔó, mbéndé eébagéé kunze nén bán déladtɛn nímén mɔné ne mɔné ní Ndáb-e-Dyɔb.”

7 Ade bėmáá ahəɛtɛn tɛngene nímé mɔné, béntéd mó, bėchánɛn etúú éche ebédé etúú é mod nhóg awě atumé’áá mbeé. Bėnchan chós, álíme beken.

8 Nê dóo ákásá bon kásɔn ne’ chii, bėchágé éché etúú bán, Etúú é Mekii.

9 Nén, dėmbenléd álóned e’yale ábe nkal é’dáɔɔɔn Jeremayaa ánhɔbpɛ aá, “Bétéd móom mé kábpe méláán níme rídé nsongé ní mɔné níme donje á bad bé Israel bėnkwenténné asábe áwe nló,

10 bėbɛnléd áchanen etúú éche ntumé-mbeé. Nén dóo Dyɔb dénláá’ é me aá, mbél.”

Payledé akáádté Yesue

(Mak 15.2-5; Luk 23.3-5; Jɔn 18.33-38)

11 Enén pónde-ɔó Yesue antyéém á nkáásé á’sɔ wée Payledé awě akámlánnáá mbwóg e Juda. Payledé ansɛdéd mó aá, “Wée edé kɔn e bad bé Israel-ɛ?” Yesue antimtén mó aá, “Ngáne éhóbé.”

12 Bon áde beprise bėmbáá ne bad bėmbáá bé Israel bėnhɔbpɛ mó mam áyál, enkėnhɔbpɛ dyamdyam.

13 Né-ɔó Payledé ansɛdéd mó aáken, “Weewógéé nímén mam mésyáál níme ábén bad bėhɔbɛé we áyál-ɛ?”

14 Bon ké nê, Yesue enkėnhɔbpɛ ké eyale, nê-’ɛ dénkɔméd Payledé yál áte bwámbwam.

Mbakú e kwééd eche Yesue

(Mak 15.6-15; Luk 23.13-25; Jɔn 18.39-19.16)

15 Bɔɔb-ɔó, mwé tée nzé Ngande e Nnyime-ámín empě, Payledé ammɛntén mod a mbwóg nhóg abided á mbwóg. Ane mod abágé’áá mod ké ahée awě bad bé dyad bėmpwɛdté.

16 Ene pónde mod a mbwóg nhóg ambé awě bėchágé’áá bán Barabase. Ane mod ambeyén bwámbwam áyale e’bėbtéd é’ mekan ábe ábélé’áá.

17 Né-ɔó áde ndun e mod éladné áte á ndáb wée Payledé, ansɛdéd bó aá, “Nzé-módé nyéhedeé bán mbided, Barabase kéé Yesue awě bėchágéé bán Krístá?”

18 Ambel nén áyale ambii bwám aá prise ambáa ne baámbáá bėbágé Yesue áwe mekáá áyale kónjí embé bó áte.

19 Ade Payledé ádyéé á atii wée ákáádté’áá bad, mwaád anlómé mó nsál aá, “Weewóó dyamdyam ábel ne mbakú eche ane mod awě eébele dyamdyam, áyale nnángé mó nló nkuu níme rítómé nén níme rítágté me bwámbwam.”

20 Beprise bėmbáá ne bad bėmbáá bé Israel bėnsál ábė bad áte nén bán bėláa Payledé ábided dásɔ Barabase bon ábe mbakú nén bėwúu Yesue.

21 Né-ɔó, áde Payledé ásɛdté ábė bad aá, “Áyale ábén bad bėbe, ahée nyéhedeé bán, mbided?” Bó moosyáál bėnkwentén bán, “Barabase!”

22 Dóo Payledé áseɛtɛé bó ámpɛ aá, “Chán-nɔ nyéhedeé bɔɔb bán mbél ne Yesue awě bėchágéé bán Krístá?” Dóo bėkwɛntanné bán, “Bėbome mó á awóg!”

23 Héé Payledé áseɛtɛé bó ámpɛ aá, “Áyale chán? Ebėbtéd éhéé ábélé?” Bon bėnnabé abón bán, “Bomé mó á awóg.”

24 Ade Paylede anyiné aá móshēlēē se móshəŋlén ábē bad mewémten t̄əŋgene mbakú eche Yesue, ábāŋ nén aá, ábē bad béereene' mpuutéđ, d̄óó átédé mendíb boŋ áwobpé mekáá áwab e'só, áhōbē-ε aá, "Mekáá mészáá me áyāle kwééd eche anən mod. Nē ánoŋe nyé bēn."

25 Hēε ene ndun e mod ékwentanné bán, "Sékwěnténé. Mmē mekií mébē áwəd nló, nchoo ne nímmēđ nchyáátén!"

26 Né-óó, Paylede ambídtéd bó Barabase. Ambě kunze aá, sánze ébəm Yesue, boŋ béke bébome-ε mó á awōg.

*Sánze éwélé Yesue
(Mak 15.16-20; J̄on 19.2-3)*

27 Sánze éche Paylede éntéd Yesue, ékēēn mó á eyáde é nkamlene, bēlād-te baáb ábiní bésyāāl áte áhed.

28 Béhūđ mó mbóté áyāl, béhé mó mengombe níme ní'yəge' níme níwágné mengombe mé k̄əŋ.

29 Béntéd ngen é mechā, bēlóó mó ekóté éche émbē néε ekóté é k̄əŋ, béhé mó chó á nló. Béhē mó ntōŋ á ekáá é mbáá te, bēbwōgkē-ε mó mebóbóŋ áwəl mó. Béhóbé'áá nén bán, "Edúbé ébē ne wε, a-k̄əŋ e bad bé Israel!"

30 D̄óó bēbóótédé mó meléed asob á yāl, boŋ bétédē nímmē ntōŋ, bēbómé mó á nló.

31 Ade bémáá mó awəl, béhūđ mó nímmē mengombe á yāl, bétímmēđ éche mbóté. Néε bémádé nē, bénkēēn mó áke dé ábome mó á awōg.

*Bébómmé Yesue á awōg
(Mak 15.21-32; Luk 23.26-43; J̄on 19.17-27)*

32 Ade békagké nē, néε échē sánze ébidēnnē Yesue á dyad-té, d̄óó bēbómmé mod awē ambíd á dyad á Sirine awē béchágé'áá bán Simōne. Hēε békóbé mó, boŋ bépémté mó awōg áde Yesue bán áhídne mó d̄óó ámbíd.

33 D̄óó bépédé hōm áde béchágé'áá bán, Golgota, awē adé nén bán, "Hōm dé Ebōŋgél é Nló."

34 Áhed, bēmbě Yesue nímmē bēhédé achəchəə áte. Boŋ áđē áwógléné mó á nsəl, enkēnkwenténné amwé.

35 Ade bémáá mó abome á awōg bēnsíd mbambú ákab éche mbóté.

36 Néε bémáá mó mbóté akab, béndyεé áhed ánoŋe mó.

37 Béntél echē nzom e kwééd á abámbé nén bán, "Yesue móó nén, k̄əŋ e bad bé Israel." Béntéd áde abámbé, bēbómé áwe nló-nín.

38 Bēmbómé bechíb bēbe á awōg nchoo ne Yesue, nhóg á pəd e ekáá émbáá, aníní-ε á pəd e ekáá é emwəd.

39 Bad ábe bétómé'áá nzii benben ne áhed bēbómé'áá nló bēbwēmmē-ε mó nzyáŋ

40 bán, "Wenhób wεé móšbōótéd Ndáb-e-Dyōb, wεé mólōŋ-ε chó ámpē áfnté e e'pun é'laán. Nzé wε-εé edé Mwān a Dyōb, sōŋ ehoŋ yāl, ésud ásé á awōg hē."

41 Bepriε bēmbáá, bemeléede bé mbéndé ne bad bēmbáá bé Israel bōmpē bēwélé'áá mó, bēhōbē bán,

42 "Achōŋtē'áá bad, bōob eéheléé yāl awōŋgen. Nzé ne mbále móđé k̄əŋ e aloŋ á Israel, ásud-tóó á awōg hē bōob. Hē d̄óó sédúbēē bán móđé Ane-awē-Béwōgté.

43 Adúbpé aá Dyōb áde ne mó, aá móđē-ε Mwān a Dyōb. Ahá! Dyōb áwōŋgen-nóó mó bōob dényín."

44 Káəŋ ne bechíb ábe bēmbóméé á awōg nchoo ne Yesue bōmpē bésyáó'áá Yesue.

*Yesue awédé**(Mak 15.33-41; Luk 23.44-49; Jon 19.28-30)*

⁴⁵ Ade bin é'pédé kað, ehíntén ênkwě hõm ásyāāl káõj ne ngāj éláán.

⁴⁶ Dóo Yesue álébpé esaád aá, “Elí, Elí, lámá sábatáni,” awé adé nén bán, “A-Dyõb ádèm, a-Dyõb ádèm, cheé ekáá bonj étédte mé?”

⁴⁷ Néé donje á bad ábe bémbē bēnben béwógé nē, bénhõb bán, “Achênle Elaijaa aá áhye áwõngēn mó.”

⁴⁸ Abwõg-ábwõg bó mod nhóg annyagéd, antéd kuchá, ásõm á ntõj, átõdē á ebéntéd é mím tē, bonj áhåg mó á nsal aá ámwē.

⁴⁹ Abíní-'é béhõbē nén bán, “Nyémwε, dényín nzé Elaijaa áhye mó áwõngēn.”

⁵⁰ Hē dóo Yesue álébpé esaád ámpē bonj ámyē-'ε nlem.

⁵¹ Ene pónde chēn abad ádē dēnkáb Ndáb-e-Dyõb áte, dēnsalé áte e'péd é'be bootya ámín káõj ne ásē. Ndõab ennəjnéd, meláá mésanlé áte,

⁵² sonj énednad. Ekud é bad bé Dyõb ábe bēmmad awé bēmpuú,

⁵³ bébíd á sonj-tē. Ámbíd e pónde áde Yesue ámáá apuu, bēnké á dyad tē á Jerusalem. A dyad tē wē, ekud é bad ényín bó.

⁵⁴ Néé mod ambáá a sánze ne sánze eche énoné'áá Yesue bényíné néé ndõab énájnédé, bényín-ne mekan mésyāāl níme mébénlédé, mbwóg ménkõb bó bwámbwam, béhõbē-'ε nén bán, “Ne mbáale, anén mod abédéε Mwān a Dyõb.”

⁵⁵ Ekud é bebaád eche émbootéd Yesue ahíd ámbíd se á Galilia, béwõngān-ne mó, bentyēem etún, bēnõné mekan mésyāāl níme mébenlad.

⁵⁶ Atínté e ábē bebaád, Maria Magdalene, Maria awé abédé nyaá awé Jemse bó Joseb, ne nyaá awé bán ábe Zebēdiε bémbē áhed.

*Níme níme Yesue**(Mak 15.42-47; Luk 23.50-56; Jon 19.38-42)*

⁵⁷ Néé ngukél épédé, nhõn ní mod nhóg níme béchágé'áá bán Josebe mēmpē. Ane mod abédéε mod a dyad á Arimatia. Mómpē abédé nhóg awé ahídé-áá Yesue.

⁵⁸ Anké wée Payledε aá ábe mó kunze átéd ndim níme Yesue. Payledε ambé kunze nén aá bébe mó ndim níme Yesue.

⁵⁹ Josebe antéd ndim níme Yesue, ákāan mó mbóm e ekóólé,

⁶⁰ alímé mó á sonj eche bēpwógé á éláá-tē. Ene sonj ebédé-'ε sonj e ekóólé eché Josebe mwēn ánwõngē. Ámbíd e nē, antínéd aláá ámbáá akóólén nsal ní sonj, ákē-'ε mó.

⁶¹ Maria Magdalene ne Maria awé anchyáá Jemse bó Joseb, bēnlyǎg bēdyēē á nkag ní sonj.

*Payledε alómé sánze**ánõn sonj eche Yesue*

⁶² Néé bin é'sánge, nē démbē á Mbwe-mé-nkóme-áte, beprise bémbáá ne Befarisia bēnladén, béke bényín Payledε,

⁶³ bēlāngē mó nén bán, “A-sán, sékamtan nén bán ádē nkal a metóme ne ábédé ámín, anhõb aá móõpuú ámbíd e e'pun é'láán.

⁶⁴ Né-õó tóméd akale nén, wéé bēnõne' eché sonj bwām, káõj ne e'pun é'láán ábel nén bonj ábē bembapεε béehelé nímé ndim achib se bēlāngē bad bán apuúdé. Né nén débē metóm níme ríchábé ámín tómaa níme ásēbpé akal.”

⁶⁵ Dóo Payledε álāngéé bó aá, “Nyétéd sánze ánõn sonj bwām, ábel nén dyamdyam déebnlád.”

⁶⁶ Héé békíí, bonj béhåg e'chem á aláá ádē démbē á nsal ní sonj, ábel nén bébii nzé mod anédte, bētédé-'ε sánze áhed ábel bonj béechíbē' Yesue ndim.

28

*Yesue apuúde**(Mak 16.1-10; Luk 24.1-12; Jɔn 20.1-10)*

1 Ambíd e mbwε-mé-nkóme-áte, á epun é'sò é sòndé,* epɔg é mbwεmbwε, Maria Magdalene ne Maria awě anchyáá Jemse bó Joseb, bēnkě sonj eche Yesue anɔn.

2 Esám-éékəmtēnē, ndɔɔb ennəɔɔnéd, ángel e Dyɔb ebíd ámín épe. Entínéd adé aláá adé démbē á nsəl ní sonj, édíí-'ε dɔ́ ámín.

3 E'sò é'péné'áá ene ángel áte nēε emwεdmwεd, mbóté-'ε épúbē mɔ́ féréd.

4 Mbwóg ménkɔb sɔnze éche énoné'áá ene sonj. Nē dēnkəɔj bēnnəɔɔnéd, bēkwε ásé, bēbé nēε ndim ní bad.

5 Héε ángel élanɔgēé ábē bebaád aá, “Nyéebáá’. Mbíí mεé Yesue awě bēmboméé á awɔg mɔ́ɔ nyéhyédé anɔn.

6 Eésaa hén. Apuúde ngáne ánlāá'ε nyé aá ébenléd. Nyéhyε nyénɔn wée bēnnaádté mɔ́.

7 Nyékag-kɔɔ mehélé bɔɔɔb, nyéláa ábē bembapεε bán, apuúde, amaá-'ε ake á'sò á Galilia, áwed-taá bényinē mɔ́. Nyéechatán dyam adé nlanɔgē nyé.”

8 Né-ɔɔ, bēnhidnéd mehélé áhed, ké nēε bēbéde mbwóg, menyinɔge mémbe bó áte. Bēnnyagéd áke déláa bembapεε ábe Yesue dyam adé ábenlédé.

9 Ade ábē bebaád békagké nē, dɔ́ɔ Yesue átáné bó táléd, bonj áhɔbē aá, “Nlěnté nyé.” Bēmpě áwē, békóbén mɔ́ á mekuu ábe mɔ́ edúbé.

10 Héε Yesue álanɔgēé bó aá, “Nyéebáá’. Nyéke nyéláa ábēm bembapεε ábe bédé nēε ábēm baányan nén bán, békag á Galilia. Áwed dɔ́ɔ bényinē mε.”

Sánze éhóbé dyam adé ábenlédé

11 Ngáne ábē bebaád békagké aláa bembapεε ábe Yesue dyam adé ábenlédé, donɔge á sánze adé ánoné'áá sonj eche Yesue dēnkě á dyad-té áke dé aláa beprise bēmbáa chɔm esyáál eche ébenlédé adé ángel épédé.

12 Beprise bēmbáa ne bad bēmbáa bé Israel bēmbóm átií ngáne bēbenlé. Nēε bémáa atíí, bēmbě éché sánze nsonɔge ní mɔné nime níhábé ámín.

13 Béláa-'ε bó bán bēhɔb bán, “Yesue ábē bembapεε bényhyε mɔ́ ndim achíb nkuu adé nyékúnéé.

14 Nzé Payledε awógé, né sēɛbəl adúbé nén aá awusé déesaa ádēn. Nē débəl nyéesónlé á ndutul-té.”

15 Né-ɔɔ éche sánze énkɔb níímé mɔné, bēbél-le ngáne bēnlāá'ε bó. Kóáɔj ne' chii, bad bé Israel bédíí békale níímé nkalanɔj.

*Yesue apuúde ábē bembapεε**(Mak 16.14-18; Luk 24.36-49; Jɔn 20.19-23; Mbél 1.6-8)*

16 Bɔɔɔb-pɔɔɔ, bembapεε dyóm-ne-nhóg ábe Yesue bēnkě á ekone-mín á Galilia wée ánlēbēε aá bēke.

17 Anyín adé bényinē mɔ́, bēmbε mɔ́ edúbé, kénεε bó donɔge á bad bēnkənkɔngé adúbé nén bán Yesue mwén-εé akɔɔnté ábē.

18 Héε Yesue ásidté bó bēnben, bonj álanɔgē bó aá, “Kunze esyáál ebágnédé mε, ádyɔb ne á nkɔɔj nísé.

19 Nyékag melonj mé nkɔɔnsé mésyáál, nyébele bad ábēm bembapεε. Nyédusan-ne bó á dín adé Titéε, á dín á Mwán ne á dín dé Edáádəɔj eche Ešáá.

20 Nyéyagte-'ε bó áhid mekan mésyáál nime nísógténé nyé. Nyébíí nén bán mēbē-'ε ne nyé kóáɔj ne á asóg dé nkɔɔnsé.”

* 28:1 Nédé á Sándé.

Nkalanj ní bwám míme Yesuε ngáne

Makose
átélé

Ndibned ní kálag

Nkalanj ní bwám ngáne Makose átélé níhóbe tǎngene Yesu Krístəə, Mwǎn a Dyǒb. Nlúmté Yesuε ngáne mod awé abele mekan, awón-ε kunze ábel nímé mekan. Ene kunze enyínnédé áyál e mekan míme áyágté'áá ne míme ábélé'áá. Yesuε ahóbé aá mós módé Mwǎn-a-Moonyonj awé ampé, ábe ádè alongé, ábel boj bad békud alagsen dé mbéb.

A kálag tē wén, Makose ábidté mekan áwed míme Yesuε ábélé'áá tómaa míme áhóbé'áá ne míme áyágté'áá. Ahóbe ngáne Jone áhǎngé epe éche Yesuε, ahób tǎngene edusen éche Yesuε, ahób-pe mekǎgsen míme Yesuε ánkudté. Asóged, alúmté áte ngáne bemboméé Yesuε á awǎg ne ngáne ámpuú'é. Nyaa édé ébe éche enén kálag ésógé, élúmté-ε nén bán saké Makose atelé chó.

Nkabtéd ní kálag

Mbooted mé nkalanj ní bwám 1.1-13

Nsón míme Yesuε á Galilia 1.14-9.50

Nsón míme Yesuε áde áhidté a Galilia ápe á Jerusalem 10.1-52

E'pun bé asóg ábe Yesuε á Jerusalem né benben ne Jerusalem 11-13

Ákád áde békáádté Yesuε ne kwééd eche áwédé 14-15

Mpuu míme Yesuε 16.1-8

Alúmed áde Sánǎwéé álúmté yál ámbid e mpuu ne mpume nímé 16.9-20

Ehǎngé éche Jone, Ndusenε

(Mat 3.1-12; Luk 3.1-18; Jon 1.19-28)

¹ Nkalanj ní bwám míme Yesu Krístəə Mwǎn a Dyǒb mǎmén.

² Mbóótédé ngáne nkal é' dǎádǎj Yesayaa ántenlé aá,
"Dyǒb áhóbé aá,
'Nǎné', nlóme nímmé mészene míme mészébe we á'sǎ,
ábojnen we nzii.'

³ Móbelé' ehǎngé á ehýǎnge nén,
'Nyébojnen epe éche Sánǎwéé. Nyétfi eché nzii.' "

⁴ Né-ó Jone ampé á ehýǎnge, ádusen bad, ákalé'-ε eyale é Dyǒb aá, "Nyétede ábel dé mbéb, nyékud edusen ábel boj Dyǒb álagsen nyé mbéb."

⁵ Bad békídé'áá á mbwóg e Judeya esyǎál ne á dyad á Jerusalem, békag áwé áwóglen mó. Néé bémpaléé nímmáb mbéb áte Jone ádusen bó á edib é Jodan.

⁶ Jone ahágé'áá mbóté éche bébénlé nyonj éche ébidé á yál e kamél.*
Awáá'áá ngǎǎ a ngob e nyam. E'chuu ne bengóméé bóó ádyágé'áá.

⁷ Ahǎnté'áá aá, "Mod ápe ámbid echém awé atómé me. Meékwojnedéé ké ábwaaam áse áhune nímmé nkǎod mé metámbe.

⁸ Ndusan nyé ne mendib, boj ádusen nyé ne Edǎádǎj éche Esáá."

Yesuε akudé edusen ne mekǎgsen

(Mat 3.13-4.11; Luk 3.21-22, 4.1-13)

⁹ Mmè mesú Yesuε ámbid á dyad á Nazaret á mbwóg e Galilia ápe wéé Jone. Jone andusen mó a edib é Jodan.

* **1:6** Bébénládtáá nyonj é nyam eche béchǎgéé bán Kamél ábel mbóté. Mbóté echéd éébáge'aá kunze é mbóté.

10 Ade Yesue ábídeé á edib-te dǒo ányíne néé ngob e dyöb énednadté. Edǎádǎn é Dyöb émbíd ádyöb, ésud mó á nló mín néé éláǎ.

11 Héé ehǒb ébídeé ádyöb nén, “Edíi awem mwǎn a nlém awé rídǎó bwǎmbwam. Ndé menyinge ne we.”

12 Abwög-ábwög éché Edǎádǎn énkid Yesue á ehyanǵe.

13 Andyéé áwed móom mó e’pun méniin, Satane ákǎgé mó. Nyam éché ékaa’ ébéde áwed, ángel-le éwöngǎn mó.

Yesue apwe-dé bembapée bé’só

(Mat 4.12-22; Luk 4.14-15, 5.1-11)

14 Ámbíd e pǒndé bénhē Jǒne á mbwög. Ade bémáá mó ahé á mbwög, Yesue ampé á mbwög e Galilia ákalé nkalan ní bwám ní Dyöb, áhǒbē nén,

15 “Pǒndé epedé, nkamlen ní Dyöb rídé benben. Nyé mod téé áhǎnlen ádē abé dé mbéb, nyédúbe-’e nkalan ní bwám.”

16 Ade Yesue ábamméé nkin mé edib-é-nzab é Galilia annyín Simǒne bó mwǎnyan Andreya, néé bébwéméé mbínzé. Bébédeé bekób-bé-súu.

17 Héé Yesue álanǵéé bó aá, “Nyéhíde me. Ngáne nyékóbeé súu bǒb, méyǎgéd nyé ngáne nyétédte bad nlém á abum áhíd me.”

18 Abwög-ábwög béntedé échab mbínzé, béhídē-’e mó.

19 Néé ákíi mwǎ etún, annyín bán ábe Zebedié, Jemse bó mwǎnyan Jǒne á bǒle-té néé bébwéméé mbínzé.

20 Anyín ádē ányíne bó, anchélé bó. Béntedé echab sǎn Zebedié ne bad bé nsón á bǒle-té béhídē Yesue.

Yesue abídté mod edǎádǎn é mbéb áte

(Luk 4.31-37)

21 Yesue ne ábē bembapée béniin bēnkē á dyad á Kapenahum. Adé mbwe-me-nkǒme-áte nípedé, Yesue anké asól á ndáb e mekáne, ábootéd bad ayáged.

22 Nyaa eche áyágté’áá enkóméd bad yǎl áte bwǎmbwam áyǎle ayágté’áá néé mod awé nzé ahǒbē né émáá. Eeyágté’áá nēngáne bemeléede bé mbéndé.

23 Héé mod nhóg awé edǎádǎn é mbéb émbēé áte ápedé tǎléd, ábǒnē aá,

24 “A-Yesu, mod a Nazaret, cheé syánē déwǒnné? Ehyedé sé awúu-ye? Mbíi we bwám. Edíi mod awé Dyöb álómé, awé asáá.”

25 Héé Yesue ákǎnnéé éché edǎádǎn é mbéb áte aá, “Lám, bíd ane mod áte!”

26 Dǒo éché edǎádǎn é mbéb éságte ane mod áte ngíne-ngíne, éhé-’e esaád é ngíne, bon ébid-te mó áte.

27 Menyáké ménkǒb ábē bad bwǎmbwam. Bésédté nhóg ne aníní bánken, “Nzé-dyámé dén! Ayáged dékǎǎle dén-é? Anén mod awóó ngíne ákamlen e’dǎádǎn bé mbéb, é’wǒgnē-’e mó!”

28 Nén dēmbēl nkalan níme Yesue ménkanléd mbwóg e Galilia esyǎl.

Yesue achǒnté ekud é bad

(Mat 8.14-17; Luk 4.38-41)

29 Néé béhídté á ndáb e mekáne hidtén, Yesue nchoo ne Jemse bó Jǒn bēnkē á ndáb eche Simǒne bó Andreya.

30 Simǒne mwaád nyaá ambé á anǒn dé nkole, ahéb dēnsog mó. Ade Yesue ápedé péén, bēnlǎá mó tǎngene nkole níme ane mmwaád.

31 Dǒo ákíi wéé ane mmwaád ábéde, bon áchǎngē mó á ekáá, awǒngén mó ásyǎ ase. Ahéb dēmmaá mó, ákǒb-pe bó nken.

32 Ade ngukél áde enyen émáá asud, bad bēmpéén bad bé nkole bésyǎl ne bad bésyǎl ábe e’dǎádǎn bé mbéb bēmbēé áte wéé Yesue.

33 Bad bé dyad bésyǎl bēnkanǎnén mmwe ndáb níme Simǒne.

³⁴ Yesue anchoód bad hiin ábe békónlé'áá nkole nyaa ne nyaa, abídéd-te bad e'dáádəŋ bé mbéb hiin áte. Eémwage'áá pen áá ábè e'dáádəŋ bé mbéb é'həb dyamdyam áyale bémbíi mod awè adíi.

Yesue akalé nkaləŋ ní bwám á Galilia

(Luk 4.42-44)

³⁵ Epag é mbwəmbwə áde bīn béékənłē, Yesue anhidé ásē, áhídé á dyad-té, áke á ahəŋgé á hōm, ákānne'.

³⁶ Siməne ne bad ábe bóbəó bémbe, bəmbootéd Yesue ahəd.

³⁷ Bédíbté'áá mós, dáo bəlāŋgēé mós bán, "Moosyáál ahede wə!"

³⁸ Yesue anláá bós áá, "Dékag hōm démpēe. Dékag á myad míme rídé benben ábəl boŋ níkal nkaləŋ ní bwám áwed ampē, áyale níme nkaləŋ móó níkáá boŋ nípē á nkōŋsé."

³⁹ Né-óó, ankē mbwóg e Galilia esyáál, ákalé nkaləŋ ní bwám á ndáb é mekáne, ábidte-'e bad e'dáádəŋ bé mbéb áte.

Yesue achōŋté mod awè meləŋ məkóbé

(Mat 8.1-4; Luk 5.12-16)

⁴⁰ Mod nhóg awè meləŋ məkóbé ampē wée Yesue, abwóg mebóbón, ácháá mós áá áwōŋgən mós. Anhób áá, "Nzé edáá ehəle ébəl me nsán."

⁴¹ Ngol enkonned Yesue. Dáo ábidté ekáá, ábānē mós á yál, boŋ álāŋgē mós áá, "Ndáá, sán!"

⁴² Ábwōg-ábwōg míme meləŋ mēmmaá ane mod á yál, áchōŋ-'e.

⁴³ Yesue anláá mós áá ákag, asím-me mós etúu áte áá,

⁴⁴ "Nōné', weelāŋgé modmod dyam áde ábénlédé, boŋ ké élúmed yál wée prise, ásimen wə. Ebag-ke mende ngáne mbéndé e Moseé éhedeé, álúmed bad wée mósáá."

⁴⁵ Boŋ ké nē, áde ane mod abidé, ankē, áke ákalé mós níme nkaləŋ hōm ásyáál. Ankal mós bwámwam nyaa eche Yesue éhele'áá dyad ké ahóg asál ampé á ntálé. Antīm ádyéé' é mehāŋgé wée bad béesaá. Ké nē, bad bēbídé' mebwóg mésyáál béhyāg awè.

2

Yesue achōŋté mod awè awédé epəd

(Mat 9.1-8; Luk 5.17-26)

¹ Néé nguse é e'pun étómé, Yesue ansú ámbíd á Kapenahum. Bad bēnwōg bán ahúú.

² Ekud é bad énkūmən áwe ndáb nyaa eché etál éēbedéé á ndáb-te, ké á mmwə. Yesue akánlé'áá bós eyale é Dyób.

³ Héé dáo bad bēniin bépééné mod awè awédé epəd.

⁴ Boŋ ngáne ndun e mod émbēé áhed, bēnkēnhenlé mós apēen wée Yesue ábédé. Né-óó, bēnchāgē á ndáb mīn, bēnēdē nnəŋ ní ndáb á nló mīn wée Yesue ántyēemmē. Adé bémáá nnəŋ anede, bēnsudtén ane mod ebúm éche ánnáá' é ámīn wée Yesue ámbēé.

⁵ Ade Yesue ányíné adúbe adē ábe bad bēwóó áte anláá ane mod awè awédé epəd áá, "A-mwān, nlāgséné wə mbéb." ⁶ Donge dé bemeléde bé mbéndé ábe bēndyéé ásē áhed bēmbootéd anyoo áte á nlém-té bán,

⁷ "Chán anén mod áhələé se áhōbē' enén ndín e akan? Asyáá Dyób. Nzéé ahələse álāgsén mbéb ésebán Dyób démpən?"

⁸ Ábwōg-ábwōg Yesue anchēm bós mewēmten. Héé ásedteé bós aáken, "Cheé ekáá boŋ nyéwōó' enén ndín e mewēmten?"

⁹ Ahéé adé dyam ásad, naa áhób wée 'Nlāgséné wə mbéb,' káa áhób wée, 'Syáá ásē, étéd échōŋ ebúm ébooted áke?"

10 Boŋ, mēlūmēd nyé nēn mēé Mwān-a-Moonyoŋ awóó kunze á nkòŋsè álagsen mbéb.” Dóo álángeé ane mod awē awédé eped aá,

11 “Nlānge we nēn, syáó ásē, étéd échōŋ ebúm, ésúé’ á ndáb.”

12 Hē dēn wēé moosyáál ánōnéé mó nē, ane mod anhidé ásē, atéd éche ebúm ábootéd-te ake. Yāl enkóm bó áte bwāmbwam, békēnē Dyób, bēhābē bán, “Séenyīnēé sé enēn ndin e dyam mbéd!”

Yesue achénlé Levi

(Mat 9.9-13; Luk 5.27-32)

13 Ambíd e nē, Yesue antīm ámbíd ámpē á nkin mé edib-é-nzab é Galilia. Ndun e mod empē áwē, ábootéd-te bó ayáged.

14 Ade átóméé á nzii, annyín nlad-é-tááse nhóg awē béchágé’áá bán Levié, mwān awē Alpasēé. Levié andyēé ásē á ndáb eché ákóbé’áá tááse áte. Héé Yesue álángeé mó aá, “Hidé me.” Dóo Levié átyéémé ámīn boŋ áhídē-’e mó.

15 Ambíd e póndé Yesue ádyágé’áá ndyééd á ndáb wēé Levié. Ekud é besaad bé tááse ne bad bé mbéb bēmpēe bēhídé’áá mó. Bóbóo bēndyēé á tébele ne ábē bembapēé.

16 Ade donge dé bemeléede bé mbéndé ábē bēbédé Befarisia bényíné Yesue ádyág ndyééd ne ábē bad bé mbéb, ne besaad bé tááse, dóo bésēdteé ábē bembapēé bánken, “Cheé ékásá boŋ ádyág ndyééd ne échē ndin é bad?”

17 Ade Yesue áwógé nē, anláá bó aá, “Bad ábē bēdyéé bwām bēétógnēnéé mod-a-bwēl. Bad ábē bēkonle’ bóó bétógnēnéé mod-a-bwēl. Meépedéé á nkòŋsè áchéle bad ábē békóbnédé á’só é’ Dyób, boŋ mpedé áyāle bad bé mbéb.”

Nsēdtéd tǎŋgene adid á yāl

nzaa á mekáne-tē

(Mat 9.14-17; Luk 5.33-39)

18 Póndé póg ebédé, bembapēé ábē Jōne, Ndusenē ne Befarisia bēndíd yāl nzaa á mekáne-tē. Dóo bad behóg bēpédé wēé Yesue boŋ bésēdte mó bánken, “Cheé ékásá boŋ bembapēé ábē Jōne, Ndusenē ne ábē Befarisia bēdidé yāl nzaa á mekáne-tē boŋ ábōŋ pēn bēdidé?”

19 Yesue ankwentén bó ne ngan aá, “Chán bad ábē belébpé á ngande e e’wóngé, bēhéle bēdidé yāl nzaa á mekáne-tē áde mod awē akude sómbé ádíi adé ne bó? Bēdidéé, bēétǎŋgenéé yāl nzaa adid á mekáne-tē póndé eché mod awē akude sómbé ádíi ne bó.

20 Boŋ epun épē éche békóbēnné bó mod awē akude sómbé. Echē epun dóo bēdidé yāl nzaa á mekáne-tē.

21 Nyébíi nēn bán nzé mod anabpe’ mbóté, eetédéé eped é abad ékōlē se ábnéd nchun mí mbóté. Ayāle nzé échē eped é abad ébóótédé abób áte ébelé éhabnéd abad dé nchun. Nē ábele’, échē epōn ékālē’ áte tómaa ngáne énsēbēé abé.

22 Melemlem nēŋgáne mod éētēdēé mīm mékōlē se ahé mó á nchun mé ntyág,* se ápen. Ayāle nzé abelé nē, né mīm méhōd kóŋŋ ntyág ríyéd, mīm mēmád asyoge ntyág-ke ámpē mbéb. Boŋ bétédéé mīm mékōlē, bēhé á ntyág mékōlē-te.”

Nsēdtéd tǎŋgene

Mbwē-mé-nkóme-áte

(Mat 12.1-8; Luk 6.1-5)

* 2:22 Ntyág mīmé bēbēnlé ngob e nyam móo bēbēnládtáá póndé eched.

²³ Mbwe-mé-nkóme-áte nhóg Yesue atómé'áá á nzag e ngun-tê. Ambê ne ábê bempape. Ade békagké nê, dóo ábê bempape bébóótédé e'sóg é' ngun apád.

²⁴ Héε Befarisia bélāngēé Yesue bán, “Nōné', cheé ékáá bonj ábōñ bempape bébele dyam áde mbéndé éebagēé kunze ábel á mbwe-mé-nkóme-áte?”

²⁵ Yesue antimtén bó aá, “Nédé nyéelaa' é mbéd á kálag e Dyōb dyam ádē kññ Dabidē ámbenlé ádē bétógé chóm éche bédyággē ne ádē nzaa ékóbé mó ne ábê bad-ε?”

²⁶ Ansól á Ndáb-e-Dyōb á póndé echē Abyataa ábédé prise ambáámbaa. Andyé e'wele ábe é'bédé nde e Dyōb. Bonj eched mbéndé éebagēé mod ké nhóg kunze ádyē ábê e'wele étóméé Prise. Mwēn andyé ábē-'ε káññe bad ábe bēnwōñ mó donje.”

²⁷ Dóo Yesue ásógtéé aá, “Dyōb dénsēbē moonyon ahag, bonj áttidē epun éche békōmmēé áte. Enkēnsébéé epun atii bonj áhagē moonyon aá ákōmme áte échē epun.

²⁸ Né-óó, Mwān-a-Moonyon awóó nkamlen káññe ámīn e mbwe-mé-nkóme-áte.”

3

*Yesue achōñté mod
awē ekáá éwédé*

(Mat 12.9-14; Luk 6.6-11)

¹ Héε Yesue átímé ámbīd á ndáb e mekáne. Mod abédé áhed awē ekáá éwédé.

² Bad behóg ábe bébédé áhed béhédé'áá Yesue awusé akóben. Né-óó bēnóné'áá Yesue chodchod, ányīn nzé áññd ane mod bwām á mbwe-mé-nkóme-áte.

³ Héε Yesue álāngēé ane mod aá, “Hyē étyéem á'só hén!”

⁴ Dóo Yesue ásedtéé ábê bad aaken, “Nyéláa me ké édé mbéndé ábel mbonj á mbwe-mé-nkóme-áte, káa ábel mbéb. Édé mbéndé ásonj alongé á mod, káa áwúu mó?” Bonj bēnkēnhōbpé dyamdyam.

⁵ Anwóg ndutul á nlém-tê bwāmbwam áyāle ábáb e'lél bé nlém á abum. Héε ánóné bó ne melingá, bonj álāngēé ane mod aá, “Sálé ekáá áte.” Asále áde ane mod ásánlé ekáá áte, ekáá éndyéé mó bwām ámpē.

⁶ Héε Befarisia bébídé á ndáb e mekáne, bonj békē bētāñē bad bé epepé éche Herōde, ábwōg-ábwōg bóbbō béhāggē Yesue áwúu mó.

*Ndun e mod ehídé
Yesue á edib é Galilia*

⁷ Yesue ne ábê bempape bēnhidé békē á edib é Galilia. Ndun e mod enhíd mó áwed. Abê bad bēmbīd á mbwōg e Galilia, á Judeya,

⁸ á Jerusalem, á mbwōg e Idumeya, á mbwōg echē édé échíní eped é Jodan, ne á myad míme médé benben ne myad mémbaá mé Tíre ne Sidōn. Abén bad bēpágé'áá wéε Yesue áyāle bēnwōg mam níme ábélé'áá.

⁹ Bad bēmbuú áte nyaa echē echabé ámīn. Né-óó, Yesue anláá ábê bempape aá bébonjñen bóle ábel bonj bad béekaññán mó.

¹⁰ Ammād ekud é bad ahood, né-óó bad bésyāñl bēmpēe ábe békónlé'áá bēbuné apē wéε áññí, ásitēn mó ábel bonj bédyēε bwām.

¹¹ Póndé téé echē e'dáadāñ bé mbéb ábe é'bédé bad áte bēnyīnnē mó, é'bélé'áá bad ábe é'díí áte bēhūñé ásé, é'bōñé-'ε bán, “Wε-εé édé Mwān a Dyōb!”

¹² Yesue ansím bó etúu áte aá bélāngē bad nyaa e mod eche módíí.

*Yesue apwédé bembapεε**dyôm ne bébe**(Mat 10.1-4; Luk 6.12-16)*

13 Héε Yesue áchǎgké á ekone mǎn, áchēnlē bad ábe áhédé'áá, boŋ bépǎg awē.

14 Dóo apwédé bad dyôm ne bébe ábé ne mó, áchágé bó aá bembapεε bé nlómag ábe álómmē-ε ákal eyale é Dyöb.

15 Ambǎg-ke bó ngíne ábíded bad e'dáádǎŋ bé mbéb áte.

16 Abé bad dyôm ne bébe bébédéε: Simōne awe Yesue ánchuu'é mbǎŋ aá Petro;

17 Jemse bó mwǎnyǎŋ Jōne, bǎn ábe Zebēdie, (ábe Yesue ánchuu'é mbǎŋ aá Bwanegεε, awē adé bǎn, Bǎn bé ngin.)

18 Andreyá bó Filibe, Batolomyo, Matyo, Tōmase, Jemse mwǎn awē Alfōse, Tadiose, Simōne awē ambé á epepé é kǎn e alon,

19 ne Judas Iskariōde awē antīm Yesue asóm.

*Béchégé Yesue bǎn Belzebule**(Mat 12.22-32; Luk 11.14-23, 12.10)*

20 Héε Yesue átímé á dyad. Ekud é bad ênkaán ámpē nyaa echē Yesue ne ábe bembapεε bēnkēnwōngé pōndé ádyé ndyééd.

21 Ade Yesue baányǎŋ béwógé nē, bēnkē mó ahed, átéd mó áswēn mó á ndáb áyǎle bad béhóbé'áá nēn bǎn, "Nló méésáá'é mó áte."

22 Donje dé bemeléede bé mbéndé ábe bémbíd á Jerusalem béhóbé'áá bǎn, "Belzebule adé mó áte. Ene kǎn e e'dáádǎŋ bé mbéb chō ebagé mó ngíne ábíded bad e'dáádǎŋ bé mbéb áte."

23 Héε Yesue áchēnlé bó boŋ ákanlé bó ngan aáken, "Chán Satane áhēle se abídéd Satane?"

24 Nzé bad bé alon ahóg békábné áte, boŋ nchemtén méésē, adé alon déheleé atyéem.

25 Nzé abum á ndáb-pe ákábné áte, boŋ nchemtén méésē, adé abum á ndáb déheleé atyéem.

26 Né-ó, nzé nkamlēn í Satan níkábné áte, boŋ bēn ne bēn bēwane, míme nkamlēn méebemmé, mékwē, nípē-ε ásoğ.

27 Né dóo mod eéhēlē se asól á ndáb e ngíne-e-mod se ádūm ábē bwēm ésebán asébpé mó ahan. Amaa-'áa mó ahan, boŋ atéd ábē bwēm é'syāāl.

28 Ne mbále nlǎnge nyé nēn meé Dyöb délǎgsén bǎn bé baányon mbéb nisyāāl míme bébéle kǎŋne nzyǎŋ ké ehéé echē bébídté á nsal.

29 Boŋ kénzéé awē ahóbé e'bébtéd é' mekan tǎngene Edáádǎŋ éche Esáá, éekudté alagsen mbéd. Abelé mbéb míme méēwóo alagsen."

30 Yesue anhób nēn áyǎle bad béhóbé'áá bǎn, "Edáádǎŋ é mbéb édé mó áte."

*Yesue nyad ne baányǎŋ**(Mat 12.46-50; Luk 8.19-21)*

31 Héε Yesue nyaá ne Yesue baányǎŋ bépédé, bétyéem é ebwóg-te, boŋ bélómē mó achǎg.

32 Ndun e mod enlǎŋnéd Yesue. Bēndyεé ásē. Dóo bélǎngcé mó bǎn, "Echōŋ nyon ne baányon bédé á ebwóg-te béhéde we."

33 Héε Yesue ásedtéé bó aáken, "Nzéé adé echēm nyan, benzéé-ε bédé bǎnned?"

34 Dóo Yesue ánoŋcé bad ábe bélǎŋnédé mó nē, boŋ áhóbé' aá, "Echēm nyan ne bǎnned bóo bēn!

35 Kénzéé awē abele mam míme Dyöb áhédeé adii mwǎnned, abé-ε echēm nyan."

4

*Ngan e mbál-e-bù**(Mat 13.1-9; Luk 8.4-8)*

¹ Yesue ambootéd bad ayóged ámpē á nkag mé edib é Galilia. Bad ábe bēnləŋnéd mó bēntōmtēn abuu áte, nē dēmbēl asól á bǎle-tē ádyēē áwēd-te. Abē bǎle bēmbē á edib-tē. Ene ndun e mod chós-’ε enlyǎg á nkin mé edib.

² Abēnládtáá ngan áyóged bó mekan híin. Ankalé bó ngan aá,

³ “Nyéwóglen! Nkwel-é-nzag nhóg anké mbál asob á nzag-tē.

⁴ Ade ásobéé mó nē, donje dénhūn á nzii-tē, menən mēmpē mémad mó asōmted.

⁵ Donje dénhūn á meláá-tē wēe ndoob énkēmbuú’ é áte. Enwāmsēn abid áse ngāne ndoob énkēnchappé áse.

⁶ Boŋ nēe enyen é ngine épédé ényhāād ábē bwēm é’wé-’ε, áyāle nkan ménkēnsónlé bó á ndoob-tē bwām.

⁷ Mbál mēmpēe ménhūn wēe mekōd médíí. Nēe mekōd mē mékwógé, mékánj akwog áde ábē bwēm, nē ábel bēnkēnchyáá’ é.

⁸ Boŋ donje dé mbál dénhūn á ndoob e bwām. Mmēn mbál mémbid áse bwām, níkwōg, níchyáá-’ε. Donje dé e’sóg dénwālē móom mé mbum meláán, donje móom ntóób, ábíníí-’ε, mbwókēl.”

⁹ Yesue ansógéd enén ngan aá, “Kéznzé awē awóó metúu, áwóge’.”

*Nzəm eché ekáá boŋ Yesue akalé ngan**(Mat 13.10-17; Luk 8.9-10)*

¹⁰ Ade Yesue ályágé mwēmpen, ábē bembapēe dyōm ne bébe ne bad ábe bēmbē ne mó, bēnlāā mó bán átógned bó échē ngan.

¹¹ Hée Yesue álāngéé bó aá, “Dyōb ábágé nyé kunze ábíi kun e nkamlen nímē, boŋ ne bad bēmpēe abele aá bēwóge’ nímén mekan mésyāāl dásō á ngan-tē.

¹² Abelé nē, ábel boŋ, ké bényínē ké nyínén, bēechemé, ké bēwōgē ké wógen béēsōŋtān áyāle nzé bēsōŋténé né bétimén Dyōb, békūd-te alagsen dé mbéb.”

*Yesue atógké ngan e nsob a mbál-e-bù**(Mat 13.18-23; Luk 8.11-15)*

¹³ Dsō Yesue ásedtēé bó aáken, “Nédé nyéesōŋtēneé enén ngan-ε? Nzé nyéesōŋtēne chó chán-nō nyémwēé échíníí ngan asōŋtēn?

¹⁴ Nsob-a-mbál awēne eyale é Dyōb.

¹⁵ Donje á bad bédé nēngāne mbál níme níhúné á nzii-tē. Nzé bēwógé eyale é Dyōb ábwōg-ábwōg Satane abelé áhye ahúd bó chó á nlém-tē.

¹⁶ Abíníí bédé nēngāne mbál níme níhúné á meláá-tē. Bēwóge’ eyale é Dyōb, ábwōg-ábwōg békōb-pe chó ne menyinge.

¹⁷ Boŋ échē eyale éēwēnnāādtē bó á nlém-tē, bédúbpe-’ε chó dásō á esōŋ é pōndé. Né-ós, nzé ndutul ne metake bépédé áyāle échē eyale bédol yāl ámbíd ábwōg-ábwōg.

¹⁸ Abíníí-’ε bédíí nēe mbál níme níhúné á mekōd-te. Bédíi bad ábe bēwóge eyale é Dyōb,

¹⁹ Boŋ mpúlé mé nkōrsé ne adəŋ dé abud á bwēm awóŋ, ne ahəd á bwēm bēmpēe akánj bó nlém áte nyaa eché bēheléé e’pum achyāa.

²⁰ Boŋ bad ábe bédé nēngāne mbál níme níhúné á ndoob eché eboó yāl, bédíí bad ábe bēwóge’ eyale é Dyōb, békōb-pe chó, béchyāā-’ε e’sóg ábe é’wánlé mesōŋgé mé mbum móom meláán, móom ntóób ne mbwókēl.”

*Nzé béchódé etrukánj béekongéé chó**(Luk 8.16-18)*

²¹ Héé Yesue áseɗteé ene ndun e mod aaken, “Mod asónléé etrukánj éché ámáá achod á ndáb-te, abanē chó á ebwōg-sé ké'ε á anoj sé-ye? Saá á atii dé etrukánj mín dǎo ábelé abanē chó?”

²² Chǎm ké éhéé éche ékónjnéde ébid á enyen. Ké éhéé-'ε éche békúténé bédíbé chó.

²³ Kénzéé awé awóó metúu, áwóge'.

²⁴ “Nyétǎn chǎm-ée nyéwógéé anǎn áte bwám! Melemlem mé nhágtéd míme ébenléde wée wǎn mó Dyǎb dǎmpé débenlédté, ábenléde-te mó tómaa ngáne wémbenlédté wée wǎn.

²⁵ Kénzéé awé awóó nsǎnten ní kun é nkamlen ní mín, Dyǎb débád mó míme nsǎnten abe. Ane awé mó-'ε eewóo, Dyǎb dékobén mó káǎne mwámpín awé awóó.”

Ngan e mbál-e-bü

²⁶ Yesue ambé áhóbe aá, “Nkamlen ní Dyǎb nídí nǎngáne mod awé akii mbál-e-bü asob á nzag-té,

²⁷ áfím ámbíd á ndáb, nkúu ákúne', müte ábelé míme nsǎn. Ene pónde esyáál, mbál ébide áse, ékwóge' ésebán abíe' ngáne nē ábenladté.

²⁸ Ndǎob chǎn-ée ebele boj bwém é'kwogé', é'chyāā-'ε e'pum. Nlóm ní byaá mó nseǎpe abíd, ámbíd e pónde mbwém káǎne ášǎg, e'sǎg bǎmpé é'bid.

²⁹ Boj nzé e'sǎg é'máá awúu, ábwǎg-ábwǎg ane mod ábelé atéd páá áke dé apád áyále pónde éché bépadeé epedé.”

*Ngan e mbál míme níchíne**(Mat 13.31-32, 34; Luk 13.18-19)*

³⁰ Héé Yesue áhóbeé ámpé aaken, “Cheé déhéleé-se déhágtén nkamlen ní Dyǎb-é? Ngan éhéé débenlédté éché élüméd ngáne míme nkamlen nídí-ye?”

³¹ Ndíi nǎngáne mbwé e mbál-e-bü éché mod átédé boj asob á nzag-té. Mbál-e-bü edé mwámpín bwámbwam nzé béhágténé chó ne mbál mémpée míme níde á nkǎnsé.

³² Boj nzé ékwógé, ékale' tómaa e'sum* é'syáál, éwóo-'ε ngen éche menǎn méhyagké müm alǎj áte.”

³³ Yesue akánlé'áá bad eyale é Dyǎb, ábenláád ekud é ngan émpée nǎngáne échén. Akánlé'áá bó nyaa éché bésǎntǎnné.

³⁴ Eékanle'áá bó áde éebenlédeé ngan, boj nzé anlyǎg mwǎmpen ne ábe bembapée aláá bó mam mésyáál míme éché ngan éhóbeé.

*Yesue áhódté ekukud**(Mat 8.23-27; Luk 8.22-25)*

³⁵ Eché epun dǎn nguké', dǎo Yesue álángéé ábē bembapée aá, “Syáá déchabe pǎd e edib eníní.”

³⁶ Héé ábē bembapée béchénné ene ndun e mod boj bésǎlé á bǎle-té wée Yesue ámbēé boj békéené mó. Myǎle mémpée mémbē áhed.

³⁷ Ábwǎg-ábwǎg dǎo ekukud é ngine ébóótédé atóm, boj mendíb mésǎlé á bǎle-té nyaa éché bǎle bǎmpónné asú á mendíb sé.

³⁸ Yesue ambé á bǎle-té á pǎd e mbíd. Annaá áse ábanē nló á mbǎngé mín, ákúne'. Héé bényeméé mó áse, boj bǎlángē mó bánken, “A meléed, weewóo' é we pónde ée syánē dédíí á kwéed-te-ye?”

³⁹ Héé Yesue átyéémé ámín boj ákanné éché ekukud áte aá éhóo, aláá-'ε mendíb aá mésud. Ekukud énsǎg awan, ekíde-'ε éhóótéd áte.

* **4:32** Bǎn bé mel nǎe ndǎj.

⁴⁰ Hée Yesue ásedtée bó aaken, “Chee ékásá bonj nyéwōgē mbwōg? Nyéewóó’ é adúbe kásá ne bōob-é?”

⁴¹ Bonj mbwōg ménkōb bó bwāmbwam, bésedtē nhóg ne aníní bánken, “Ebál e mod éhéé chén éche kásáne ekukud ne mendíb bēwōgneé?”

5

*Yesue achōjté mod awe
awóó e’ dāádāj bé mbéb*

(Mat 8.28-34; Luk 8.26-39)

¹ Yesue ne ábē bembapēe bēmpē á pēd e edib eníní, á mbwōg e Gerasin.

² Ade Yesue ábidé á bōle-tē bídén, ambomén mod awē abidé á soóbade. Edāádāj é mbéb émbē ane mod áte.

³ A soóbade dōo ádyéé’ áá. Modmod enkēnhenlé mós abane á mehanj ámpē, ké ne bengōbēngōbē.

⁴ Ayāle ngen ne ngen, bēháá’ áá mós ne e’pwoğ ne bengōbēngōbē bonj ké nē aselē’ áá bengōbēngōbē áhentéd-te e’pwoğ bē áte. Antómtén ngine awóñ nyaa eché modmod éehēle’ áá mós abwōge.

⁵ Atamnádtáá á soóbade ne á e’kone-tē nkuu ne mūte, ábōnē e’saad ákweltáád-te yāl ne meláá.

⁶ Ane mod abédé mwā etún áde anyíné Yesue. Hée anyógté mehelé, bonj ábwōgē mebóbōñ áwē e’sote,

⁷ ábōnē esaad é ngine, áhōbē áá, “A-Yesu, Mwān a Dyōb á Ngum, chee sóo déwōjné? Nchaa wē á dīn á Dyōb mēé weekōgsán me.”

⁸ Ane mod anhób nē ayāle Yesue anláá edāádāj é mbéb áá, “A-edāádāj é mbéb, bíd ane mod áte!”

⁹ Dōo Yesue ásedtēe mós aaken, “Chán dīn ádíí wē?” Ankwentén áá, “Dīn ádíí mē bán Amudtēe, ayāle sēbuú áte.”

¹⁰ Ambé ácháā Yesue áá eénānē’ ábē e’ dāádāj bé mbéb ene mbwōg.

¹¹ Bōob-pōó, sánkalaa a esog é nguu chó-’ é ébédé benben ne áhed, édyāg medyé á mbám mé ekone.

¹² Hée ábē e’ dāádāj bé mbéb é’cháá’ é Yesue bán, “Lóm sé á nguu-tē wē, émwē sésól chó áte.”

¹³ Hée Yesue ábágé bó kunze bonj é’ bídē ane mod áte. Abíd áde é’ bídē ane mod áte é’ sālē éché nguu áte. Eché esog ébédé dyam e’ kálé é’ nguu é’ bē. Abwōg-ábwōg éché esog émpādē áse, ényógté’ á eláá é nkin mé edib-é-nzab, éhún á edib-tē, éhó-’ é.

¹⁴ Benōn bé nguu bēntōm mehelé á dyad-tē ne á mebwōg nime médé benben, ákale bad dyam áde ábēnlédé. Abē bad bēmbíd áke dényín.

¹⁵ Ade bēpédé wēe Yesue bonj bényín ane mod awē ndun e’ dāádāj bé mbéb émbēē áte, nēe ádyéé áse, ahédé-’ é bwēm á yāl bwām, adyēé-’ é sen, mbwōg ménkōb bō.

¹⁶ Bad ábe bényín ádē dyam bēnlāā ábē bad ngáne émbēnlédte ne ane mod awē e’ dāádāj bé mbéb bēmbēē áte. Bēnlāā-’ é bō dyam áde ábēnlédé ne éché esog é nguu.

¹⁷ Hée ábē bad bēbóótédé Yesue achán bán ásyāā áwab mbwōg.

¹⁸ Ade Yesue ásólé á bōle-tē, ane mod awē e’ dāádāj bé mbéb bēmbēē áte nē anchánj mós áá búmō békag.

¹⁹ Bonj Yesue enkēnkwenténne. Anláá mós áá, “Súé’ áwōñ dyad, éke eláá ábonj bad ndāle e dyam eche Sánjwēé ábēnlé wē ne ngáne ápédé wē ngol awóg.”

²⁰ Hê dɔɔ ane mod áhídté boŋ ákag á mbwóg e Dekapolis.* Akanlé mod té dyam áde Yesue ábénlé mó. Bad bésyǎǎl ábe bɛnwóg, yǎl enkóm bé áte bwámbwam.

*Yesue achòŋté mmwaád nhóg,
apúúd-te Jairuse mwán*

(Mat 9.18-26; Luk 8.40-56)

²¹ Yesue antím ámbíd á pɛd e edib eníní ne bǎle. Ade ápédé á nkin nímíní, ndun e mod enkaŋnén áhed.

²² Dɔɔ mod nhóg awě akamlan ndáb e mekáne awě béchágé'áá bán Jairuse ápédé áhed. Anyín áde anyíne Yesue, ankwě áse áwe mekuu.

²³ Ne mechángé mé ngíne áhóbé aá, "Awem mwán a mmwaád awág. Són, hyé ébân mó ekaa á yǎl, ábel nén ádyee bwám, ábé-'e á alongé."

²⁴ Héee Yesue áhídé mó. Ekud é bad éhídé'áá Yesue nyaa eché bɛnkaŋnénne mó.

²⁵ Mmwaád nhóg-ke ambé áhed awě anwóŋ nkole níme mekií mébídé'áá mó á yǎl pónde ésyǎǎl. Mmê nkole mbédé mó á yǎl á etún é dyóm-a-mwé ne mbé.

²⁶ Atagé híin á mekaa mé bad bé e'bó, abébéd-te ngáb esyǎǎl eché ánwóŋgē, boŋ ké nê enkendyé'é bwám, nkole mbādé bádén.

²⁷ Anén mmwaád anwóg mam níme Yesue ábélé'áá, dɔɔ ábídé mó ámbíd áfínté ene ndun e mod boŋ ásitán mó nkobe.

²⁸ Ayǎle anhób áwe nlém-té aá nzé mósiténé ké nímē nkobe, né móodyéé bwám.

²⁹ Asitén áde ane mmwaád ásiténé Yesue nkobe, mekií níme mébídé'áá mó á yǎl ménsēle, awóg-ke á yǎl aá móchoó.

³⁰ Abwóg-ábwóg Yesue ambíi aá ngíne ebídé mó á yǎl. Hê dɔɔ ákúnnédé áfínté ene ndun e mod, boŋ ásedté aáken, "Nzéé asiténé me nkobe?"

³¹ Dɔɔ ábē bembapēé békwentanné mó bánken, "Néé ényíneé bad békáŋne wé á yǎl nén ésedté' wéé ken nzéé asiténé wé-yé?"

³² Ké nê, Yesue ambé ánoné' ekíde ányín mod awě asiténé mó.

³³ Héee ane mmwaád ábóótédé anəŋ ne mbwóg áde ányíne chóm-éé ébénlédé mó. Dɔɔ ápédé wéee Yesue boŋ ákwag mó á mekuu, álǎŋgē mó mbále esyǎǎl.

³⁴ Héee Yesue álǎŋgēé mó aá, "A mwán-a-mmwaád, adúbe ádŋh ádíde wé bwám. Kág ne nsəŋ. Ndutul echŋh chó-'e émaa."

³⁵ Ade Yesue áhóbéé nê, dɔɔ bad behóg ábe bébídé á ndáb wéee Jairuse bélǎŋgēé Jairuse bán, "Awŋh mwán amaa mó awé. Cheé étəgnéé Meléede ataged?"

³⁶ Boŋ Yesue enkéntédté dyam áde béhóbé néee dyam. Héee álǎŋgēé ane mod a nkamlan aá, "Weewógé mbwóg! Dúbé dúbpén."

³⁷ Yesue enkémmwéé aá mod ampée áhíd mó étóméé Petro ne Jemse bó mwányan Jəne.

³⁸ Ade bépédé á ndáb wéee Jairuse dɔɔ ányíne mpuuté, awóg-ke mewé mé ngíne níme bad béchyé'é.

³⁹ Héee áslé á ndáb-te boŋ ásedté bó aáken, "Cheé ékás boŋ nyébelé' nímén mpuuté, nyéchyé-'e mewé? Ane mwán eewédeé, akúne kúnén."

⁴⁰ Boŋ bémbootéd mó awɔɔ. Ámbídéd bó mod asyǎǎl á ebwóg-te. Antéd ane mwán sáá bó nyan ne ábē bembapēé béléán, bésól á toŋ eché ane mwán ámbéé áte.

* **5:20 Dekapolis:** adii mbwóg e myad dyóm.

⁴¹ Hée Yesue áchánǵé ane mwän á ekáá, bonj álǻngē mós aá, “Talíta kúm,” (awē adé bán, “A-mwän a ngǻndéré, nlǻnge we meé, hidé ásē.”)

⁴² Ane mwän anhidé ásē ábwǻg-ábwǻg, ábootéd-te ake. (Abédé dyóm á mwē ne nǻbe.) Yǻl enkóm bós áte híin áde nēn ábénlédé.

⁴³ Hée Yesue ásiméé bós etúu áte aá béelǻngē modmod dyam áde ábénlédé, aláá-’é bós aá bébe ane mwän ndyééd.

6

Bad bé Nazarét béekobéé Yesue (Mat 13.53-58; Luk 4.16-30)

¹ Yesue anhidé adé hóm, asú áwē dyad nchoo ne ábē bembapēe.

² Néé mbwe-mé-nkóme-áte nǻpédé, ambootéd ayáged á ndáb e mekáne. Bad híin bémbē áhed. Ade béwógé áde ayáge yǻl enkóm bós áte. Bésēdte bánken, “Hée mós ábídné nímén mésyǻál-é? Nǻdín e debyéé éhéé bébágé mós nēn? Chán ámwagké nímén menyáké abel-é?”

³ Kíné saá kápéntaa ádíi-yé? Saá mwän awē Maria nēn-é? Kíné saá Jemse, Josebe, Judase ne Simone bós bédé baányan-é? Baányan bé bebaád bésyǻál-le ámpē béedyé’é ádyad-té hén ne syánē-yé?” Né-ós, bēnkós Yesue.

⁴ Dós álǻngéé bós aá, “Nkal e’daádǻn awós’ edúbé hóm ásyǻál étóméé áwē dyad, áwē túmbé-te ne áwē abum á ndáb.”

⁵ Eéheleé menyáké ké mehóg abel áhed, étóméé nguse é bad bé nkole ábe ábáné mekáá á yǻl, bédyēē-’é bwám.

⁶ Yǻl enkóm mós áte bwámbwam ne adúbe áde bad bēnkēnwǻngé.

Yesue alómé bembapēe dyóm ne bébe (Mat 10.5-15; Luk 9.1-6)

Dós Yesue ákíi á myad mésad níme médé bēnbēn, áyágtē bad.

⁷ Anchélé ábē bembapēe dyóm ne bébe. Anlǻd bós áte, alóm bós bébe ne bébe. Ambē-’é bós kunze ábíded bad e’daádǻn bé mbéb áte.

⁸ Anlyágtén bós aá, “Nyéewánlé chómchóm á eke étóméé ntón. Nyéewánlé ndyééd ké’ é ekwe, mod eesóó-’é mōné á mesó mé abad.

⁹ Nyéhē metámbé bonj nyéewánlé mbóté ébe.”

¹⁰ Ambád aá, “Ndáb ké ehéé eché ekobé nyé nyédyēē áhed káǻn ne pǻndé eché nyéhídtéé adé dyad.

¹¹ Nzé nyēpedé dyad áde béekobéé nyé, káa béekwentēnéé nyé awóglēn, nyétédé dō, nyékūd-te ebumbú á mekuu, álúmed nēn bán échab ebébtéd éǻne bēn.”

¹² Né-ós, bēnkē bēkalé’ eyale é Dyǻb bán bad bétede ádad abé dé mbéb.

¹³ Bēmbídné bad e’daádǻn bé mbéb híin áte, béwǻgtē bad bé nkole híin ne dyóg dé menzab, béchōód bós.

Kwééd eché Jǻne, Ndusene (Mat 14.1-12; Luk 9.7-9)

¹⁴ Bǻǻb-pǻǻ, Herǻde anwóg mam mésyǻál níme Yesue ábélé’áá. Ayále mam mé bwám níme Yesue ábélé’áá mēmbēl ambyēen hóm ásyǻál. Donje á bad béhóbé’áá bán, “Jǻne, Ndusene apuúdé. Néé ákás bonj awónǻ ngine ábel nímén menyáké mésyǻál.”

¹⁵ Bēmpēe béhōbē bán, “Elaijaa mósódé.” Abíníi-’é bán, “Adíi nkal e’daádǻn nēngáne nhóg áfnté e bekal bé’daádǻn ábe bémbē se’ bósód.”

¹⁶ Ade Herǻde áwógé nē anhób aá, “Jǻne, Ndusene awē mēmbēnlé bonj bésēl nló mósódé. Atímé ámbíd á alongé.”

17 Herode anhöb nê áyale anlóm bad aá béköb Jone, béhanj mós, béhé-'e mós á mbwög. Ambel nén áyale Herodyase, mwaád awë mwányan, Filibe ánsëbëë awón, anwónj mós.

18 Jone alángé'áá Herode pónde téé aá, "Weewóó'ë kunze áwón Herodyase, mmwaád awë mwányonj."

19 Né-ós, Herodyase anhö Jone pél á nlém-të, áhéde-'e aá mówúu mós. Bon Herode ambël enkênhenlé.

20 Herode ambë mbwög áte tãngene Jone áyale ambii aá adii mod a bwám awë asáá. Né-ós akãngé mós bwám, ábel bon dyam dé mbéb déebenlád mós. Adós'áá mós awóglén kénéé édíi bán pónde téé nzé anwóglén mós, atagé'áá áte á mewëmtén-të bwámbwam.

21 Kóõne á asóg, Herodyase anküd nzii echë áhéde'áá. Nén ábéde epun-ëë Herode ábéle'áá ngande áwëmtén epun-ëë ánycháádtë. Á ngande wë, Herode anlébë ábë bad bémbáá bé ngómenaá, bad bémbáá bé sánze, ne kase é bad é mbwög á Galilia.

22 Echë epun mwán a mmwaád awë Herodyase anhyë aság esáke. Nê dénwögëd Herode ne ábë beken menyinge. Né-ós, Kã Herode ansëdéd ane mwán a mmwaád aáken, "Cheé édsós wëé míbe wë? Mëbë wë kéchéé échë éhédeé."

23 Nén démbël ammwé melë, álãngë mós aá, "Mmwág melë meé, mëbéé wë kéchéé éche éhédeé. Ké eped é mbwög échëm échë níkamlané."

24 Né-ós ane mwán ankë nyaá asëdéd aáken, "Cheé méhédeénné mós?" Dóo nyaá átímténé mós aá, "Hédén mós nló míme Jone, Nduzene."

25 Héé ane mwán átime ámbid ábwög-ábwög wëé kãj, bon álãngë mós aá, "Bãg me nló míme Jone, Nduzene á taplët-te hén bööb."

26 Nén dénwögëd kãj Herode ndutul bwámbwam, bon ngáne ámmadtë melë amwé á'sö wëé ábë beken, enkênhenlé mós nló míme Jone abáan.

27 Héé álómé sánze póg aá épeen nló míme Jone. Ene sánze enkë á ndáb e mbwög, esél Jone nló,

28 épeën míme nló á taplët-te, ábë ane mwán a mmwaád. Ane mwán a mmwaád mós-'e ábe nyaá.

29 Ade Jone ábe bembapëé béwógé nê, bëmpë, bétéd mós ndim, béke bélime.

Yesue adítë e'kále é' bad é'tan

(Mat 14.13-21; Luk 9.10-17; Jon 6.1-14)

30 Bembapëé bé nlómag ábe Yesue ánlómmë bénhüu bétán mós beláá-'e mós mekan mésyáäl míme bébéle ne míme býýágtë.

31 Ekud é bad épágé'áá wëé Yesue ne ábë bembapëé bétimé-'e ámbid nyaá echë Yesue ne ábë bembapëé benkênwóngé etál ádyé ké ndyééd. Dóo Yesue álãngéé ábë bembapëé aá, "Syáá détim á ahãngé á höm. Bon nyékóme áte mwámpín."

32 Hë dóo bésólé á böle-të, bon bétimé' á ahãngé á höm.

33 Ekud é bad énnýn áde békagké, bénehëm-me bó ábwög-ábwög. Ábë bad bémbid myad ne myad, békëen mekuu, bényögëd á'sö ne mekuu, bésébé ape wëé Yesue ne ábë bembapëé békágé'áá.

34 Ade Yesue ábidé á böle-të bon anyín ene ndun e mod, antómtén bó ngól abé áyale bébéde néé ndýon ní mbód míme mééwöo nnön. Né-ós ambootéd bó ekud é mekan ayáged.

35 Ade bín é'böótédé ahín, ábë bembapëé bëmpë áwë, béhõbë nén bán, "Hén ádé á etún-të, pónde emaa-'e atóm bwámbwam.

36 Láá ábén bad bétimé' á myad-të míme méde benben, ábel bën béchan medyé míme bédyëë."

37 Bon Yesue antimtén bó aá, “Nyé bó nyébe bó chöm éche bédyēē.” Héē bésēdtéé mó bánken, “Ehede wéé séke séchan e’wlele é’ mbwókel é kábpe ébe,* sébe bó, bédyē-ye?”

38 Héē ásēdtéé bó aáken, “E’wlele é’tán nyéwóó? Nyéke nyénan.” Ade bémáá anan dso bélángeé mó bán, “E’wlele é dé é’taan ne súu ébe.”

39 Héē Yesue álángeé ábē bembapēē aá bébel bad, békaben áte monje ne monje bédyēē á nkáákāō mín.

40 Né-óó ábe bad bēndyēé ásē, donje á monje, mbwókel é bad, donje-ē móom mé bad métáan.

41 Hē dso Yesue átédé ábē e’wlele é’taan ne échē súu ébe, ánoné ámin, ásāgnān Dyób, ákabtáád bó áte, bon ábagé ábē bembapēē aá békabpe ene ndun e mod. Ankabé-ē ábē bad kááñne échē súu ébe.

42 Moosyáál andyé, akód-te.

43 Bembapēē bēnlād e’wlele ne súu éche énylǎg ásē, enlón e’lón dyóm ne é’be.

44 Mesongé mé baachóm ábe bēndyē ene ndyééd mémbe e’kálé é’taan.

Yesue akii á mendib mín

(Mat 14.22-33; Jón 6.15-21)

45 Melemlem mé pónde Yesue anláá ábē bembapēē aá bésól á bōle-tē, békag á’só á Betsaida, á múde mé edib-é-nzab nímíní. Ade békagké nē, anláá ene ndun e mod aá bésūē’ áwab mendáb.

46 Ade Yesue ámáá bó alyágtēn, anchágé á ekone mín, ákáne.

47 Néē ngukél épédé, Yesue ábē bembapēē bēmbēēn bōle áttinté e edib, Yesue-ē abé á nkín mwēpen.

48 Annyín aá ábē bembapēē bétage ákēēn bōle áyāle epub é ngíne émbíd bó á’só-te. Né-óó, dyam-ēé adé epog-ne-ngwa anké bó atán, ákag á mendib mín. Ahédé’áá aá mótom bó ámin.

49 Bon anyín áde bényíné akag á mendib mín, bēnwēmtēn bán nwú móo rídé. Héē bēbóótédé abón.

50 Bébóné’áá áyāle áde bényíné mó, mbwóg ménkōb bó moosyáál bwámbwam. Abwóg-ábwóg Yesue anláá bó aá, “Nlém mééhūne nyé, mēé ndé. Nyéebáá’.”

51 Héē ásólé á bōle-tē wéē bēmbēē, epub-pe énsōg atóm. Yāl enkóm ábe bembapēē áte bwámbwam.

52 Yāl enkóm bó áte áyāle bēnkēnsōñtēnné chōm-ēē menyáké nime ámbenlé ádíde e’kálé é’ bad é’taan rílumtéé. Bēnkēnhenlé-ē achem.

Yesue achōñté bad

bé nkole á Genesarēt

(Mat 14.34-36)

53 Néē béchábpé edib-é-nzab, bēmpē á múde nímíní, á mbwóg e Genesarēt. Ahed-táá bēntāā-’é bōle.

54 Bēhídé-’áá á bōle-tē bídén bad béchēm-me Yesue.

55 Héē bényágté mbwóg áte esyáál bēpēmē bad bé nkole á mekále mín, békēēné’ hōm tēé áde bēnwōgkē bán Yesue adé.

56 Hōm tēé-’é áde Yesue ánkéé, á myad mémháá ne mēsad, ne wéē bad bélóó á nzag-tē, bad bēpēéné’ áá bad bé nkole wéē bad bēbúdé aladen á dyad-tē ákáb nyongé. Néē bēmpēēnné bó, bécháá mó bán ámwē bad bé nkole bésiten ké mesó mé mbóté nímē. Né-óó bad bé nkole bésyáál ábe bēnsitén nime mesó mé mbóté bēndyēé bwám.

* 6:37 *Mbwókel é kabpe ébe*: ébédé nsábe ní mod nhóg áyāle ngon waam.

7

*Ayáged dé betaa**(Mat 15.1-9)*

¹ Befarisia ne donje dé bemeléede bé mbéndé ábe bémbid á Jerusalem bēnlanéd Yesue áwóglen mó.

² Bēnyin bán donje dé bembapεε ábe Yesue bēdyág medyé ne mekáá mé mbinde, nēdē béewopεaá mekáá nyaa echē Befarisia bēhóbeé bán bētāngéné awobe.

³ Befarisia ne bad bé Israel ábe bēlyágé ásē bēsyāāl bēhídē ayáge áde bēnkudtē wēε ábāb betaa. Bēedyāgkē ndyééd ésebān bēwóbpε mekáá nyaa echē etāngéné.

⁴ Póndé echē mod ábidéé á dyon-tē, eedyāgkē chōmchōm ésebān asēbpε yāl awobe. Mbéndé édé-’ε ámpē híin echē bēhídéé, nēngāne awobe á bwēm bwām. Bwēm nēngāne kōb, mbeé, kúmbe é e’kii, ne bwēm nēε mebendé.

⁵ Héε Befarisia ne bemeléede bé mbéndé bēsēdtēε Yesue bánken, “Cheé ékáá bonj ábōj bembapεε bēéhídē’ ayáge áde ábēd betaa bētēdnédé sé? Bēdyág ndyééd áde béewopεé mekáá nyaa echē éhēdnadté.”

⁶ Yesue antimtén bó aá, “Nkal é’dāádəj Yesayaa antāngén áde ánhōbpε ne e’yale ábe Dyōb dénlōmēnnē mó tāngene nyé bedog-badé, ngāne étēnlédé nēn,

‘Abēn bad bēbage mε edúbé é nsəl ngēn, bonj nímab nlém méesaá áwēm.

⁷ Edúbé éche bēbageé mε éesaá dyamdyam, áyale bēyágte bad áhíd mbéndé é baányonj byánán édii mbéndé é Dyōb.’

⁸ Nyētēdtē mbéndé é Dyōb bonj pεn nyéhíde ayáge á baányonj.”

⁹ Héε Yesue ábádéé aá, “Nyébēnlad mwane áte mē mbéndé é Dyōb ábel nēn nyéhíde ayáge ádēn dēn.

¹⁰ Moseε ahóbé aá, ‘Béé sóo ne nyon edúbé.’ Ahób-pe ámpē aá, ‘Kéznéé awé ahóbé sáá ké’ε nyaa dyam dé mbéb áyāl bētāngéné bēwúú mó.’

¹¹ Bonj nyéyágte nēn bán nzé mod awóó chōm éche ántāngēnnē sáá ké’ε nyaa awōngεn bonj ahóbé aá, ‘Echēn chōm édé Kóban,’ (Nē adé bán édii chōm é Dyōb),

¹² né eewóó’ε nzom áwōngεn sáá ké’ε nyaa.

¹³ Né-óó, ádē ayáge áde nyébageé bad ábélé nyéetédeé eyale é Dyōb nēε dyam. Mam médé-’ε ámpē híin nēε nímén níme nyébēléé.”

*Mam níme mébele bonj**mod eesáá’ á’só é Dyōb**(Mat 15.10-20)*

¹⁴ Héε Yesue áchēnléé ene ndun e mod bonj álāngē bó aá, “Nyéwóglen, nyésōjtεn-ne mε.

¹⁵ Chōmchōm éesaá éche ébídé á ebwóg bonj nēε ésólé mod áte ébel mó abé mbinde á’só é Dyōb. Bonj chōm echē ébídé mod áte chōó ébele bonj abé mbinde á’só é Dyōb.”*

¹⁷ Yesue anchené ene ndun e mod, asól á ndáb-te. Dóó ábē bembapεε bēpédé bonj belāngē mó bán átānled bó ene ngan.

¹⁸ Héε Yesue ákwentanné bó aáken, “Nyémpē nyéesōjtánné-ye? Nyéenyínéé nēn bán kéchéé éche ésólé mod áte, éche ébídé á mbíd e ebwóg, ébeléé-sε mod abé mbinde á’só é Dyōb-ε?

¹⁹ Ngāne ésóléé mod áte, éepagkē mó á nlém-tē. Ebelé ésud mó dāsó á abum-tē ébíd-te.” (Yesue anhób nē álúmed nēn aá ndyééd ké ehéé eboó adyé.)

* 7:15 Donje á kálag dé’só ábádé nchoo 16: “Kéznéé awé awóó metúu áwóg.”

²⁰ Ambád aá, “Chóm eché ébídé mod áte chós ébele bonj eesáá’ á’sō é Dyób.

²¹ Ayāle, á nlém ní mod-té dós mewēmten mé mbéb nēngáne akáb dé mesón, echíb, ne ewúen bébídé. Mmē mewēmten móo mébelte mod mbéb.

²² Akáb dé mesón á ndáb e’wóngé, abé dé metog, ne abel á mam mé mbéb mémpēe nēngáne edogké, ábel binde é mekan, akón á bad, akal á bad metóm ayāl, abé á kúmbe ne abel dé e’yóklé é’ mekan.

²³ Mmén mam mé mbéb mésyāāl mébídé mod á nlém-té mébelé-’ε mod eesáá’ á’sō é Dyób.”

*Adúbe dé nken-a-mmwaád
(Mat 15.21-28)*

²⁴ Dós Yesue ásyóngé bonj ákäg á eped é mbwóg eché enchiitén myad mé Tíre ne Sidón. Héé ásolé ndáb póg, eéhe’áá-’ε aá modmod ábíi aá módé áwéd-te. Ké nē bémē bébíi.

²⁵ Néé mmwaád nhóg awé edaádəŋ é mbéb ébédé awe mwán a mmwaád áte áwógé bán Yesue adé áhed, ampé ákwē-’ε mó á mekuu.

²⁶ Ane mmwaád abédéé mmwaád a alonj á Grikiá awé béchyáá á pəd e mbwóg e Siria eché béchógé bán Fonisia. Héé ácháá’é Yesue aá ábíded mwán eché edaádəŋ é mbéb áte.

²⁷ Bonj Yesue ankwentén mó aá, “Sé sébe sédíde bëndem. Eesáá bwám átéd ndyééd e bánbán ábwēme mbwé.”

²⁸ Ane mmwaád ankwentén aá, “Nē dēn a-Sánj, bonj kóŋne mbwé eché edyéé á tébele-sé ebelé edyéé píuted é medyé éche bëndem béhúnté.”

²⁹ Dós Yesue álāngéé mó aá, “Ayāle échén ehób éche éhóbé nén, ehēle ésūē wē á ndáb. Edaádəŋ é mbéb éche ébédé awonj mwán áte étédte mó.”

³⁰ Né-ós, ane mmwaád ansú á ndáb, atán nēngáne mwán ánāngé á anón mín. Eché edaádəŋ é mbéb émmäd mó atede.

*Yesue achōŋté mod awé
eewógne’áá, eehóbé’ad-’ε dyam bwám*

³¹ Héé Yesue áhídté á mbwóg e Tíre, átimé á Sidón á pəd e edib é Galilia, átimnád á pəd e mbwóg e Myad Dyóm.

³² Bad behóg bēmpēn mod áwē awé eewógne’áá, eehóbé’áá-’ε dyam bwám. Abé bad bēnchāŋ Yesue bán ábán ane mod ekáá á yāl.

³³ Héé Yesue áhídnédé mó wéé ene ndun e mod édíi bonj átimēn mó á ahāngé á hóm. Ansóléd memii á metúu níme ane mod, ásob meléed bonj ásitén mó echém.

³⁴ Héé Yesue ánóné ámín, áheeméd áte, bonj áhōbē aá, “Efáta,” nē ádé nén bán, “Dibnéd.”

³⁵ Abwōg-ábwōg, ane mod ábootéd-te awógēn, echém étyéém mó á nsāl, ábootéd-te dyam áhób bwám.

³⁶ Héé Yesue ásiméé bó etúu áte aá béétúbpe modmod ádén akan dīn. Bonj pónde téé eché áhóbé aá béehóbé, bō-’ε bēnabpé bó ahób hóbén.

³⁷ Bad bésyāāl ábe bēnwōg, yāl enkóm bó áte nyaa eché echabé ámín bwámbwam. Béhóbé’áá bán, “Abele’ mam mésyāāl bwám. Abele kóŋne bad bé ndóg béwógne’, ábele-’ε e’bóbé é’hōbē dyam.”

8

*Yesue adídté e’kólé é’ bad é’niin
(Mat 15.32-39)*

¹ Mmē mesú mēn ndun e mod empée empé wéé Yesue. Ngáne bēnkēnwóngé chóm-éé bédyágkē, Yesue anchélé ábē bembapēe, álāngē bó aá,

² “Ndé enén ndun e mod ngɔl áyāle békébē ne me e’pun é’láán, béewóo-’aa chóm éche bédýákē bɔɔb.

³ Nzé nsúúténé bɔ nzaa bɔɔb, né bēhūn asē á nzii áyāle bó donje á bad bēchábé abíd.”

⁴ Hée ábē bembapεε bétimtanné mó bánken, “Hée mod áhele ákud ndyééd á ehyánje-tē hén echē ékwɔg ábēn bad adyé-ye?”

⁵ Yesuε ansɛdéd bó aáken, “E’wele é’tán nyéwóó?” Bēnkwentén bán, “E’wele saámbé.”

⁶ Dóo álánjeé ene ndun e mod aá bédýεε asē á ndɔɔb-tē. Hée átédé ábē e’wele saámbé, ásāgnān Dyɔb, ákabtád bó áte, ábagé ábē bembapεε, bó-ε békabpé ene ndun e mod.

⁷ Bénwɔŋ-ε baá nguse bé súu ésad. Yesuε annaméd chómpē. Amaá-’aá chó anamed, ábagé bembapεε aá békabe bad.

⁸ Bad béndýē ene ndyééd, békód-tε, káŋh élyāg-ke asē. Echē enlyāg asē enlón e’lón saámbé.

⁹ Mesonjé mé bad níme méndýē ene ndyééd mébédé dyam e’kálé é’niin. Yesuε ansúúd ábē bad áwab mendáb.

¹⁰ Asúúté-’aá bó súútén, asól-le mó á bǎle-tē ne ábē bembapεε, békē-ε á mbwóg e Dalmanuta.

Befarisia bēhede’ e’chemléd

(Mat 12.38-42; 16.1-4)

¹¹ Befarisia bēmpē wée Yesuε bébootéd mó apentén, bēhedné mó e’chemléd ábe é’húú ádyɔb. Bébélé-’aá nē ákag mó.

¹² Hée Yesuε áhéémédé áte, bonj áhɔbē aáken, “Cheé ékáá bonj nyonjel e’chii éhedé e’chemléd? Ne mbále, nlánje nyé nén meé, nyonjel e’chii éekudté e’chemléd ké’ ehóg.”

¹³ Hée áchénné bó, bonj áswlē á bǎle-tē, átimé á pɛd e edib eníní.

Esulten é Befarisia

(Mat 16.5-12)

¹⁴ Bɔɔb-pɔɔ, áde bembapεε ábe Yesuε bésólé á bǎle-tē, bēnchatén e’wele awále áyāl. Ewele ehóg chémpɛn chɔɔ bēnlyagnédte á bǎle-tē.

¹⁵ Hée Yesuε álánjeé bó aá, “Nyétéd pónde ne esulten é Befarisia ne éche Herɔde.”

¹⁶ Dóo békaleé bēn ne bēn bán, “Ahóbé nē áyāle deewánleé e’wele áyāl.”

¹⁷ Yesuε ambii chóm éche bēhóbéé, hée ásɛdteé bó aáken, “Cheé nyéhóbéé áyāle e’wele ábe nyéewóo-é? Káŋh ne’ bɔɔb nyéebíí-é ké-ε nyéesónjtené-ye? Chán nyéiléle nlem á abum nén?”

¹⁸ Nyéwóó míd, nyéenyinné-ye? Nyéwóo-ε metúu nyéewógné-ye? Káŋhne bɔɔb nyéekamtánné-ye?

¹⁹ Ade ménkabpé e’wele é’táan ádíde e’kálé é’ bad é’táan, e’lón é’tán e’wele ábe bēnlyāg asē ábe nyénladté bēnlónné?” Bēnkwentén mó bán, “Dyóm ne é’be.”

²⁰ Ambád bó asɛded ámpé aá, “Ade ménkabpé-ε ewele saámbé ádíde e’kálé é’ bad é’niin, e’lón é’tán e’wele ábe bēnlyāg asē ábe nyénladté bēnlónné?” Bēnkwentén mó bán, “E’lón saámbé.”

²¹ Ambád bó asɛded aáken, “Bonj ké nē nyéesónjtené-ye?”

Yesuε achóŋtē mod awē akwedé ndim

²² Yesuε ne ábē bembapεε bēmpē á Betsaida. Ahed dóo bad behóg bépééné mod awē akwedé ndim áwē, bonj bēcháá mó bán ábán mó ekáá á yál.

23 Yesue ancháá ane mod á ekáá, áhidnéd mós á dyad-tê wê. Ansob mós meléed á mîd, abán mós mekáá á yál, bonj ásedtê mós aáken, “Enyíne chómchóm-ê?” 24 Héé ane mod ánóné ámín bonj áhōbē aá, “Nnyíne bad bonj bényínnad nēngáne mel níme mékag.”

25 Héé Yesue ábáné mós mekáá á mîd ámpē. Dóó ane mod ákídté anōn, mîd mēndíbnéd mós, ábootéd-te anyínen bwám.

26 Yesue ansúúd mós á ndáb, áhōbē aá, “Wētōgné-’ε asól ádyad-tê ámpē.”

Yesue mós adé Ane-awē-Béwógté
(Mat 16.13-20; Luk 9.18-21)

27 Yesue ne ábē bembapēē bekágé’áá á myad níme médé á mbwóg e Kaisaria Filipi. Bépédé-’aá á nzii wê, dóó ásedtēé bós aáken, “Nzé-módé bad bós béhōbēé bán ndé?”

28 Héé békwentanné bán, “Donje á bad béhōbe bán edii Jōne Ndusene, bémpēe bán Elaijaa, ábíni’-’ε bán nkal é’ dāóðəŋ nhóg.”

29 Dóó ásedtēé bós ámpē aáken, “Bonj nyébēn-ne nzé-módé nyéhōbēé bán ndé?” Héé Petro ákwentanné mós aá, “Wéé edé Ane-awē-Béwógté.”

30 Ade Petro amaa’-’aá ahób nê, Yesue ansím bós etúu áte aá béélāngē modmod nyaa e mod echē módíí.

Yesue ahóbé t̄ŋgēne metake nímē
ákudté ne kwééd echē áwēē
(Mat 16.21-28; Luk 9.22-27)

31 Yesue ambootéd ábē bembapēē ayóged, áhōbē aá, “Mwán-a-Moonyon at̄ŋgéné ákud metake híin. Bad bémbáá bé dyad, beprise bémbáá ne bemeléede bé mbéndé béban’-’ε mós á yál. Béwúú mós, bonj e’pun ábe é’lonténé é’lálán, ápuú.”

32 Yesue anhób adén dyam nyaa echē énkēnkonjédté bós mbále ké póg. Héé Petro átímné Yesue á nkag, bonj ákagé átimed mós áte.

33 Bonj Yesue ankuné, ánōn ábē bembapēē. Dóó ákánné Petro áte aá, “Hidé me á’sō-te, a-Satan! Mmoŋ mewēmten méesaá mewēmten mé Dyób, médii mewēmten mé moonyon.”

34 Dóó Yesue áchénlé ene ndun e mod ne ábē bembapēē, bonj álāngē bós aá, “Kéznéé awē adaá me ahíd, ásob yál mendíb, ápém-me ádē awag áhíde me.

35 Ayāle kéznéé awē ahēde ádē alongé asonj ábōd dós. Kéznéé-’ε awē abódé ádē alongé ayāle echēm ne ayāle nímén nkalanj mī bwám né ákud alongé áde déemaá’.

36 Nsyáŋj níhéé mod ákudté nzé akudé nkōjsé n̄syāā bonj abódé ádē alongé.

37 Cheé mod áhelese ábe ákóde ádē alongé?

38 Kéznéé awē ákwāgēn me ne ábēm e’yale á nyongel e’chii echē ehídne Dyób nlém nibe, abé-’ε ebébtéd, Mwán-a-Moonyon mós ámpē ákwāgēn mós á pónde echē ápéé ne ángel échē éśáá ne ehúmé éche Sáá.”

9

1 Héé álāngéé bós aá, “Ne mbále, nlāngē nyé nén meé, donje á bad átíntē echēn béenyínénné kwééd díd áde bényínéé néé nkamlen ní Dyób nípédé ne ngine.”

Yál ehāŋléné Yesue
(Mat 17.1-13; Luk 9.28-36)

2 Ámbíd e epun ntóób Yesue ankeén Petro, Jemse ne Jōne á mbōod echē echabé ámín. Bémpēn-’ε bémbē áhed. Awáb e’só-te hē dóó ábē bembapēē bényíné néé Yesue áhāŋléné.

³ Mbóté éche ánhēē épené áte, épübē-’ε féréd. Epúbé’áá nyaa echē modmod á nkōṣé éehelēé-se apúbéd.

⁴ Héé bényiné Mosēē ne Elaijaa bébidé táléd, bóobe Yesue békale’.

⁵ Dóo Petro álāngēé Yesue aá, “A meléed, ébóó ngáne syáá dédíí hén. Délōṅ e’bem é’láán, échōṅ, éche Mosēē ne éche Elaijaa.”

⁶ Petro enkēmbíí’ é chōm éche áhóbéé áyāle mbwóg rí ngíne níme mémbe bóobe baáb á yāl.

⁷ Héé dóo mbag ekúténé bó boṅ ehób-pe ébidé’ á mbag-té wē nén, “Awem Mwān a nlém nēn, nyéwógne mó.”

⁸ Abwōg-ábwōg dóo bēnóné ekíde boṅ béenyíne modmod ampée nzése Yesue.

⁹ Ade bésudeé á mbōod mín nē, Yesue ansím bó etúu áte, álāngē bó aá, “Nyéelāngé modmod dyam áde nyényíne kóáṅ ne á pónde echē Mwān-a-Moonyōṅ ápuú’é.”

¹⁰ Né-óó, ábē bembapēē bēnkoó áde dyam ne bēn, bésedté yāl chōm-éē mpuu rdíí.

¹¹ Héé bésedtéé Yesue bánken, “Cheé ékóá boṅ bemeléede bé mbéndé béhóbé nēn bán Elaijaa atāngéné asébe dé ape boṅ Ane-awé-Béwógté āpē?”

¹² Dóo átímtanné bó aá, “Ne mbále Elaijaa atāngéné asébe dé ape atíí-’ε mam mésyāāl. Cheé-ō ékóá boṅ étenléd á kálag e Dyōb nēn bán Mwān-a-Moonyōṅ ákūd metake híin, bad bébán-’ε mó á yāl?”

¹³ Boṅ nláṅge nyé nén méé Elaijaa ammad ape, bēmbēl-le mó ngáne bēndāṅgé. Nē dénlōnéd mam níme mēntenléd áyāl e echē.”

*Yesue achōṅté mwān
awē edāádāṅ é mbéb étagtéé
(Mat 17.14-21; Luk 9.37-43a)*

¹⁴ Ade bépédé wēé ábiníí bembapēē bēbédé, bēntān nēē ndun e mod élāṅnéde bó. Bemeléede bé mbéndé bēpéntānnáá ne bó.

¹⁵ Anyín áde ábē bad bényiné Yesue, menyáké ménkōb bó bwāmbwam. Bēnnyāgéd áwē áleled mó.

¹⁶ Héé Yesue ásedtéé ábē bembapēē aáken, “Cheé nyáábōo nyépentanné?”

¹⁷ Dóo mod nhóg átínté e ene ndun e mod ákwentanné aá, “A-meléed, mpeéne awēm mwān a mwēnchóm áwōṅ áyāle edāádāṅ é mbéb édé mó áte, ébélé eehóbéé-’ε dyam.

¹⁸ Nzé ékóbé mó, ébelé éhūnéd mó áse, mehod-te mébidé mó á nsāl. Ene pónde ádyāg mesoṅ á nsāl, anámén-ne. Nlángé-’ε ábōṅ bembapēē méé bēbided mó chō áte boṅ béehelēé.”

¹⁹ Dóo Yesue ákwentanné aá, “Wáá, nyé bad bé’ chíi, nyéewóó’é adubé. Chán mépéé nyé adyēn hén-ēē? Chán mépéé nyé awesén-é? Hyēnáád me mwān awed.”

²⁰ Dóo bēpíínédé mó ane mwān. Anyín áde échē edāádāṅ é mbéb ényíne Yesue, énsóg ane mwān, éhūnéd mó áse, áhāṅlād á ndōob, mehod-te mébidé mó á nsāl.

²¹ Héé Yesue ásedtéé sáá aáken, “A etún é pónde éhéé ákétagké nén?” Dóo sáá ákwentanné aá, “Bootya se á mwēndemé.

²² Eyógké mó ahúned á muú-te ne á mendíib-te áwúu mó. Boṅ nzé dyam áde áde éheleé-se ébel, ewóg sé ngāl, ewōṅgén sé.”

²³ Héé Yesue átímténé mó aá, “Wéé nzé dyam áde áde ríheleé se mbél-ε? Chōm ésyāāl éhele ébenled ne mod awé awóó adubé.”

²⁴ Abwōg-ábwōg dóo ane mwān sáá ákánté ehób ámín aá, “Ndúbpe, wōṅgén adubé ádēm áde déekwognede.”

²⁵ Ndun e mod enyǝgté'áá áladen áte áhed. Ade Yesue ányíne nê, ankáne échê edǝádǝn é mbéb áte aá, "A-edǝádǝn é ndóg ne é ebóbê, nkamlan we meé ébíd mós áte, weesólé'-e mós áte ámpê."

²⁶ Echê edǝádǝn élébpé'-aá esaád, eságéd ane mwǎn ne ngíne, ébíd-te. Ane mwǎn antím nêe ndim mí mod kǝn donje á bad béhǝbê bán, "Awéde."

²⁷ Bon nêe Yesue áchǝngé mós á ekáá, áfíidê mós ámín, ane mwǎn atyéem-me.

²⁸ Yesue ansól á ndáb-te. Héé ábê bembapêe bésedtêé mós á kun-tê, bánken, "Cheé ênkǝn bon sênkênhêl échê edǝádǝn é mbéb abíded?"

²⁹ Ankwentén bó aá, "Mekáne mwêmpen móo méhele mébídéd enén ndín e edǝádǝn."

Yesue ahóbê ámpê tǝngene eche kwééd

(Mat 17.22-23; Luk 9.43b-45)

³⁰ Yesue ne ábê bembapêe béhídté'-aá hê, bépǝn á mbwóg é Galilia. Enkênmwaá aá modmod ábíi wêe módíí,

³¹ áyǝle ayǝgté'áá ábê bembapêe aá, "Bébê Mwǎn-a-Moonyon á mekáá mé baányon. Bó'-aá béwúú mós. Nzé bémáá'-e mós awúu ápuú ámbíd e epun é'láán."

³² Bon ábê bembapêe béenkênsǝnténné chǝm éche ánhǝbpê, bébáá'áá'-e mós aseded.

Nzéé atómténé mod ambáá abé?

(Mat 18.1-5; Luk 9.46-48)

³³ Yesue ne ábê bembapêe bémpe á Kapenahum. Ade bépédé, bénsól á ndáb-te. Dóo Yesue ásedtêé bó aáken, "Cheé nyéswǝntánnáá á nzii bwéed?"

³⁴ Bon békênhǝbpê dyamdyam áyǝle bèn ne bèn bépéntánnáá tǝngene mod awê atómténé mod ambáá abé áfínté écháb.

³⁵ Héé Yesue ádyéé ásê, áchǝgê ábê bembapêe dyóm ne bébe bon álǝngê bó aá, "Kéznzéé awê ahede mod a mbáá abé, atǝngéné abé ndimtene, abé'-e mbáledê a moosyáál."

³⁶ Hê dóo átédé mwêndem bon áfíidê mós áwab tíntê. Dóo abwáádê ane mwǎn, bon áhǝbê aá,

³⁷ "Kéznzéé awê akobé enén ndín e mwǎn á dín ádêm, né akobé me. Kéznzéé'-e awê akobé me, eékobéé mmên-pen. Akobé kǝnne ane awê alómé me."

Kéznzéé awê eetǝngán syánê,

né adé ne syánê

(Luk 9.49-50)

³⁸ Jǝne anláá Yesue aá, "A meléed sennyín mod abídtê bad e'dǝádǝn bé mbéb áte á dín ádǝn, sênláá'-e mós bán ásóg abel nê, áyǝle eésaá mod a echor éche syánê."

³⁹ Bon Yesue anláá bó aá, "Nyéelǝngé mós bán ásóg abel nê. Mod ké nhóg eésaá awê ámad menyákê abel á dín ádêm, bon ámbíd e pónde áhǝbê me mam mé mbéb á yál.

⁴⁰ Ayǝle, kéznzéé awê eetǝngán syánê né adé ne syánê.

⁴¹ Ne mbále, nlǝnge nyé nén meé, kéznzéé awê abagé nyé ké kǝb e mendíb ámwé á dín ádêm, áyǝle nyédíí bad bé Krísto, atǝngéné níme nsábe akud.

Mekǝgsen níme mébelte bad mbéb

(Mat 18.6-9; Luk 17.1-2)

⁴² "Kéznzéé awê abéltê enén ndín e mwêndem échê edúbpê me mbéb, ébê mbon áttæ mós sǝnkalaá aláá á nkǝn, béhúnéd-te mós á edíb é nkwê.

⁴³ Nzé échon ekáá ébelte we mbéb, esél chós, épim. Edé mbon we ákud alongé áde déemaá' ne eped é yál tómaa we áwón mekáá mébe bon bébwém we á dü-á-muú.*

⁴⁵ Nzé échon ekuu ébelte we mbéb, esél chós, épim. Edé we mbon ákud alongé áde déemaá' ne eped é yál tómaa we áwón mekuu mébe, bon bébwém we á dü-á-muú.†

⁴⁷ Nzé ádon did ábelte we mbéb, ehúd dós, épim. Edé mbon we ásól á nkamlen ní Dyób ne did ahóg tómaa we áwón mid mébe bon bébwém we á dü-á-muú.

⁴⁸ Ahed, 'e'kuu ábè é'dyag bad béewágkè, muú nímed-te méédímèè.'

⁴⁹ "Muú ményāā mod ké ahéé á yál ngáne nkwe nínyāngéé á ndyééd-te.

⁵⁰ Nkwè níbóó, bon nzé níbódé alan, chán béhele-se bényínéd mó ámpè? Nyényine' néé nkwe, nyédyéé-é ne nsaj ne nhóg ne anínií."

10

Ayáged tãngene anan

dé mmwaád á e'wóngé

(Mat 19.1-12; Luk 16.18)

¹ Yesue anhidé áde abwóg á hóm, ampõñ á mbwóg e Judeya, áchābē á ped e edib é Jodan enínií. Ndun e mod epagé'áá áwē, áyāgtē-é bó ngáne ámenténné bó ayáged.

² Befarisia bémpè áwē ákag mó. Bēnsédéd mó bánken, "Echéd mbéndé chóchó ebagé kunze nén mod ánan mwaád á e'wóngé-yé?"

³ Héé Yesue átíntanné bó aáken, "Chán mbéndé eche Moséé ékalé?"

⁴ Bēnkwentén bán, "Mbéndé échē Moséé ebagé kunze nén, mod ábe mwaád kálag échē elúmtē nén bán, e'wóngé é' máá bon ánan mó."

⁵ Héé Yesue álanngéé bó aá, "E'lel bé nlém á abum ábēn bóó bēmbēl bon Moséé ábe nyé échén mbéndé.

⁶ Bon se á mbooted, áde Dyób áhágé bad, anhög mmwaád bó mwēnchóm.

⁷ 'Né-óó, mwēnchóm átedé sáá ne nyan, abé ne mwaád.

⁸ Búmō bad bébe bétim mod nhóg.' Né-óó, béesaá ámpē bad bébe, bon bédii mod nhóg.

⁹ Né-óó, échē Dyób áládé, modmod eepáá'."

¹⁰ Ade bétimé ámbid á ndáb-te, Yesue ábē bembapēé bēnsédéd mó tãngene dyan áde áhóbé.

¹¹ Héé Yesue álanngéé bó aá, "Kézzéé awē anané mwaád bon awón mmwaád ampée né akábé asón.

¹² Nzé mmwaád-te atēdté nchóm bon awóó mod ampée, né akábé asón."

Yesue anámté bēndem

(Mat 19.13-15; Luk 18.15-17)

¹³ Bad bépééné'áá bēndem wéé Yesue bán ábán bó ekáá á yál ánamed bó. Bon ábē bembapēé bēnkānē ábē bad áte.

¹⁴ Ade Yesue ányíné nē, anlíñ, aláá-'é ábē bembapēé aá, "Nyétedē bēndem béhyag áwēm. Nyéekás bó áyāle nén nyaa e bad néé bó chós éwóó nkamlen ní Dyób.

¹⁵ Ne mbále nlange nyé nén meé, kézzéé awē eékobe nkamlen ní Dyób nēngáne mwēndem, éesónlé áwēd-te."

* **9:43** Donge á kálag dé'só ábádé nchoo 44: *Ahed, e'kuu abè é'dyag bad béewágkè, muú nímed-te méédímèè.* † **9:45** Donge á kálag dé'só ábádé nchoo 46: *Ahed, e'kuu abè é'dyag bad béewágkè, muú nímed-te méédímèè.*

¹⁶ Hée Yesue aláde ábê bãn áte, ábānē bó mekáá á nló nhógē-nhógē, ánamté-’ε bó.

Nh̄on ní bad ne nkamlen ní Dyōb
(Mat 19.16-30; Luk 18.18-30)

¹⁷ Ade Yesue ábwógkē eke ámpē, dōo mod nhóg anyógtē áwē, abwóg mebóbón áwē e’só-te, boŋ ásēdté mó aá, “A-meléed a bwām, dyam áhéé ntáŋgénē abel, ábel nén níkud alongé áde déemaá?”

¹⁸ Hée Yesue ásēdté mó aáken, “Cheé ékás boŋ échagé me meléede a bwām? Mod ké nhóg eésáá mod a bwām étōmēé Dyōb dēmpen.

¹⁹ Ebíí mbéndé éche éhóbe bán, ‘Weewúé’ mod, weekábé asón á ndáb e’wóngé, weechíbé’, weebidé mbón e metóm, weedógē bad, beé sóo ne nyon eúbé.”

²⁰ Hée ane mod áhóbeé aá, “A meléed, nhídé échén mbéndé ésyāal bootya se á mwëndemé.”

²¹ Hée Yesue ánonéé mó chóón ne nlém mé edange, boŋ álāŋgē mó aá, “Dyam ahóg áhedne wε. Kág, ésóm bwēm é’syāal ábe éwóó, étéd nímé mōné, ébe betóótókē bé bad. Nzé ebelé nē, wékúd nh̄on ádyōb. Ene pónde éhye éhíde me.”

²² Ade ane mod áwógé nē ansudén, asú-’ε ne ndutul á nlém-tē áyāle ambé nh̄on bwāmbwam.

²³ Hée Yesue ákúnne mīd wée ábē bembapeε boŋ álāŋgē bó aá, “Elēl áte bwāmbwam behón bé bad ásól á nkamlen ní Dyōb.”

²⁴ E’yale ábe Yesue bénkōméd ábē bembapeε yāl áte. Ambád ahób ámpē aá, “A-baányan̄ élélé áte bwāmbwam ásól á nkamlen ní Dyōb!

²⁵ Edé mwān e akan sánkalaa a nyam née Kamēl ápon̄ á epōn é ndōnde tómaa nh̄on ní mod ásól á nkamlen ní Dyōb.”

²⁶ Ade bembapeε béwógé nē yāl enkóm bó áte bwāmbwam. Hée bēn ne bēn behóbeé bánken, “Nzée-’s̄ ahele ákud e’sóson?”

²⁷ Hée Yesue ánonéé bó chóón, boŋ áhóbē aá, “Ne baányon̄ nén déehelé se abenled, boŋ ne Dyōb dyamdyam déeleléé áte.”

²⁸ Hée Petro áhóbeé aá, “Nōné’, sētēdté chōm ésyāal áhíd wε.”

²⁹ Dōo Yesue áhóbeé aá, “Ne mbále, nlāŋge nyé n̄n meé, kénzéé awé atēdté eche ndáb, baányan̄, nyaá, sáá, bãn ne eche mbwóg áyāl echēm, ne áyāl e nkalan̄ ní bwām,

³⁰ ákūd tómaa ne nē á alongé dé’ chíi. Akūd ndáb, baányan̄, bãn, ne mbwóg mbwókel é ngen. Akūd-te káōŋne metake á d̄in ádēm. Akud-te alongé áde déemaá’ á pónde échē ehúe’

³¹ Boŋ bad hiin ábe bédé á’sō b̄ōōb bēlyag mbíd, hiin-ne ábe bēnyag mbíd bébē á’sō.”

Yesue ahóbé ngen éche elónténe
eládn ngáne béwūú’ε mō

(Mat 20.17-19; Luk 18.31-34)

³² Yesue ne ábē bembapeε békágé’áá á akuu á Jerusalem, mó-’aá antómén bó. Yāl enkóm ábē bembapeε áte bwāmbwam, mbwóg-ke níkób bad ábe behídé’áá bó. Ade békagkē nē, dōo Yesue átímné ábē bembapeε á nkag ámpē boŋ álāŋgē bó mam níme mébenléd ne mó.

³³ Hée áhóbeé aá, “Pón nyébii bán dekaḡ á Jerusalem, áwed-taá bébéé Mwān-a-Moonyon̄ á mekáá mé beprise bémbáá ne bemeléede bé mbéndé. Bó-’ε bébē mbakú bán atáŋgénē awé, bébē-’ε mó á mekáá mé bad ábe béese bad bé alon̄ á Israel.

34 B́ewelé mós, b́esobtád mós meléed á yǎl, b́eswǎdtǎad mós e'tanǵú, b́ewúú-'e mós. Bon ǎmbíd e e'pun é'láán ǎpuú."

Jemse b́ó Joné b́ehede' e'tál
(Mat 20.20-28)

35 Ambíd e nê Jemse b́ó Jon, bǎn ábe Zebedie b́empǎ ẃee Yesue. Ade b́epédé, b́enláa mós bǎn, "A meléed, dyam adé ade séhedéé bǎn ébele sé."

36 Héé Yesue ásedteé b́ó aáken, "Cheé nyéhedeé bǎn míbele nyé."

37 D́óo b́éhóbéé bǎn, "Séhede bǎn ade ẃedyéé'é ádōn atii dé nkamlen, émwe sédyee we á nkǎg, nhóg á ekáá émbáá aníní-'é á ekáá é emwed."

38 Héé Yesue ákwentanné b́ó aá, "Nyéebíi'é chóm éche nyésedtéé. Nyééhǎl metuné míme mépēmme apém-'e? Nyééhǎl edusen é metuné éche mékudté akud-'e?"

39 D́óo b́ekwentanné mós bǎn b́éhǎl. Héé Yesue álǎngéé b́ó aá, "Nyéēpēm metuné míme mépēmme, nyéékúd edusen é metuné éché mékudté,

40 bon meewóó'é kunze ǎpwed mod awé ádyéé me á ekáá é mbáá ké' é á ekáá é emwed. Dyób d́óo débǎ nímé metii ẃee bad ábe ǎnǎbnédé mós."

41 Ade ǎbíníi bembapēe dyóm b́ewógé dyam ade Jemse b́ó Jon b́esédté, b́enlíin b́ó bwǎmbwam.

42 Héé Yesue áchagéé b́ó moosyáal benben bon álǎngé b́ó aá, "Nyébíi nén bǎn bad ábe bébyééné néé benkamlene bé nkōnsé ne bad b́embáá bé dyad, b́ebenlad ngine ákamlen bad ábe bédé áse echǎb.

43 Bon éetǎngeneé abé nê áfinté echên. Kénzéé awé ahede aá móbê mod ambáá áfinté echên, atǎngéné abé mbaledé awên.

44 Kénzéé-'e awé ǎbē mod a'só áfinté echên, atǎngéné abé ntǎn a moosyáal.

45 Ayǎle ké Mwǎn-a-Moonyon epedéé aá bad b́ebenle mós, bon apedé ábele bad, ábe-'e adé alonǵé ákōde bad híin."

Yesue achōnté mod

awé ankwē ndím

(Mat 20.29-34; Luk 18.35-43)

46 Yesue ne ǎbē bembapēe b́empǎ á dyad á Jeriko. Ndun e mod ehidé'áá b́ó. Ade b́emadté dyad áte nê, d́óo b́etáné mod nhóg awé b́échágé'áá bǎn Batimuse. Batimuse abédé-'éé mwǎn awé Timause. Ankwē ndím. Andyéé á nkǎg ní nzii, áchōmē bwēm.

47 Ade áwógé bǎn Yesue a dyad á Nazaret mósó atóme' nê, ambootéd abón, áhōbē aá, "A-Yesu, Mwǎn a mbyaa míme Dabide, wóg me ngol!"

48 Bad híin b́ekánné'áá mós áte, b́elǎngē-'e mós bǎn ádib nsǎl. Bon mós-'e ambé ábōnē aá, "A-Mwǎn a Dabid, wóg me ngol!"

49 Héé Yesue átyéémé bon áhōbē aá, "Nyéchéle mós." D́óo b́echénlé, b́elǎngē mós bǎn, "Weétǎgē áte. Tyéém ǎmín achênle we."

50 Héé ane mod abwémé kóte winíi, apádé áse, ǎpǎg-ke ẃee Yesue.

51 Héé Yesue ásedteé mós aáken, "Cheé éhedéé ẃee míbele we?" Ane mod anhób aá, "A-meléed, nhede meé rinyínen ǎmpē."

52 Héé Yesue álǎngéé mós aá, "Kǎg, adúbe ádōn ádíde we bwám." Abwōg-ábwōg ambootéd anyínen, áhíde-'e Yesue.

11

Yesue asólé á Jerusalem néé kǎh

(Mat 21.1-11; Luk 19.28-40; Jon 12.12-19)

1 Ade Yesue ne ǎbē bembapēe b́ekwógé ape á Jerusalem, benben ne myad mé Betpeg ne Betani á Ekone é Menzab, anlóm ǎbē bembapēe b́ebe á'sō,

² álāngē bó aá, “Nyékag á dyad áde áde nyé á’sō nē. Nzé nyésólé sólén nyéētán néé bétāngé etum é nchóm a ésel awē mod éédíidēē mbéd. Nyéhune mó, nyéhyeene’.

³ Nzé mod asēdté nyé aáken, ‘Cheé ékásá bonj nyébelé nén?’ Nyéláa mó bán, ‘Sāngwéé atógnéné chó, ālóm-me chó ámbíd ábwōg-ábwōg.’”

⁴ Hēé békíí bonj bétānē’ etum é nchóm a ésel éche bétāngé á mmwē-ń-nzii bonj béhunné’.

⁵ Hēé bad ábe bentyēem benben ne áhed bésēdtéé bó bánken, “Cheé nyébeléé nē, nyéhunne échē ésel-é?”

⁶ Bembapēē bēntimtén bó ngáne Yesue ánhōbpē aá béhōb. Dóó ábē bad-te bētdté bó bán békag.

⁷ Bēmpēén échē ésel wēé Yesue, bétal chó échab mbóté ámín bonj mó-’e ádiidé’.

⁸ Bad híin bēntāl échab mbóté á nzii-tē ábe mó edúbé, ábíní-’e bésēle’ e’kikag é’ mií, bétalé’ á nzii-tē.

⁹ Bad ábe békágé’áá mó á’sō ne ábe béhídé’áá mó ámbíd béhágé’áá e’saad bán,

“Hosána, Mekenag!

Nnam mbê ne ane awē apedé á dín áde Sāngwéé.

¹⁰ Nnam mbê ne nkamlēn níme echēd sāj Dabide, níme ríhúé’.

Hosána, Mekenag ne Dyōb áde áde se ámín!”

¹¹ Yesue apedé-’áá á Jerusalem, asól á Ndáb-e-Dyōb. Ansimén ekide ésyāāl. Ngáne póndé émmadté atóm, antīm ámbíd á Betani ne ábē bembapēē dyōm ne bébe.

Yesue abagé alín á ngəl ebómán

(Mat 21.18-19)

¹² Chán é bíníí áde béhúé’ é á Betani, nzaa enkób Yesue.

¹³ Annýín alín á ngəl nchabnede ne byaá ámín. Dóó ákíí áhed ányín nzé móhele se mókud e’pum áwedé-mín. Ade ápedé áhed enkēntánné epum ké ehóg étóméé byaá áyāle enén póndé eebédeé póndé échē ngəl échyáa’ é e’pum.

¹⁴ Hēé álāngéé ábē bwel aá, “Wéechyáá’ é epum ámpē mbéd.” Abē bembapēē bēnwōg áde Yesue áhóbé nē.

Yesue anané bekab bé nyonjé

á Ndáb-e-Dyōb

(Mat 21.12-17; Luk 19.45-48; Jōn 2.13-22)

¹⁵ Yesue ne ábē bembapēē bēmpē á Jerusalem. Ade bépédé, ansól á Ndáb-e-Dyōb, ábootéd-te bad ábe békábé’áá dyon áwēd-te ananted. Ankuné betébele ábe bad bépénlé’áá mōné ámín mekuu ámín, ákūnē-’e metii níme bad ábe bésómé’áá mbāngé mekuu ámín.

¹⁶ Enkēmumwaá-’e aá modmod átómēn chóm é nyonjé ké ehóg á eyáde é Ndáb-e-Dyōb-te.

¹⁷ Hēé áyágtéé bó, áhōbē aá, “Eesaá mbále bán éténlédé nén bán, ‘Echem ndáb échagnéd bán ndáb e mekáne e melonj mésyāāl-é?’ Bonj nyētímté chó mbwōg mé bechíb!”

¹⁸ Bepriše bémháá ne bemeléede bé mbéndé bēnwōg áde Yesue áhóbé nē, bébootéd-te nzii áhed áwúu mó. Bonj bémbē mbwōg áyāle ndun e mod esyāāl échē embé áhed émbē menyáké ne mekan níme áyágté’áá.

¹⁹ Ade ngukél épédé Yesue ne ábē bembapēē bēnhídé á dyad-tē wē.

Ayáged tāngene alín á ngəl ádē dénwē

(Mat 21.20-22)

²⁰ Mbwembwε, áde bétiméé ámbíd, bényín ádé alín á ngəl ngáne áwédé kóŋne á nkaŋ.

²¹ Héε Petro ákámtné dyam áde Yesuε ámbenlé, boŋ álāŋgē mó aá, “A-Sán, nəné, alín á ngəl áde wēmbéé ebómán áwédé.”

²² Héε Yesuε ákwentanné aá, “Nyédúbe Dyöb ne nlém rísyāāl.

²³ Ne mbále, nlāŋge nyé nén meé, kénzéé awē álāā enén mbōod aá, ‘Hidé áse, éhún á edíb é nkwē-te’ boŋ adúbé ne nlém rísyāāl aá dyam áde móhóbeé débenléd ésebán apide’, né débenléd.

²⁴ Né-ō, nlāŋge nyé meé kéchéé éche mod ásédte Dyöb á mekáne-té, boŋ adúbé nén aá móōkud chó, ákūd-te chó.

²⁵ Póndé ké ehéé échē étyéémé wéé mókannε’, nzé ewánléné mod melingá, élagsn mó, ábel nén awōŋ Titée awé adé ámín mó-ε ámpē alagsen wε nímōŋ mbéh.”*

Héε kunze eche Yesuε ébidé?

(Mat 21.23-27; Luk 20.1-8)

²⁷ Yesuε ne ábē bembapεε bēmpē á Jerusalem ámpē. Ahyómme’áá á Ndáb-e-Dyöb-te. Hé dóo beprise bémháá, bemeléede bé mbéndé ne bad bémháá bé dyad bépédé áwē.

²⁸ Dóo bésédteé mó bánken, “Kunze ehéé éwóó ábel nímén mekan? Nzé-móde abagé-ε wε ene kunze?”

²⁹ Yesuε ankwentén bó aá, “Méésédéd nyé dyam ahóg. Nzé nyékwēnténé dó, né me-ε mēláā nyé kunze echē níwóó ábel nímén mekan.

³⁰ Nzéé ambē Jōne kunze ádusen bad? Dyöb-ε ngé baányoŋ?”

³¹ Bēn ne bēn bēmbóotéd apentεn bánken, “Nzé dehóbé nén bán ‘Jōne echē kunze ehúú ne Dyöb,’ né ásedéd syánē aáken, ‘Cheé-ō enkāŋ boŋ nyénkëndúbé mó?’

³² Boŋ nzé dehóbé bán, ‘Echē kunze ehúú ne baányoŋ?’ ” (Béwógé’áá bad mbwóg áyāle bad bésyāāl bēndúbé bán Jōne abédéε nkal é’daōdōŋ.)

³³ Né-ō, bēnkwentén Yesuε bán, “Séebíí’ε.” Yesuε mó-ε antimtén bó aá, “Né ké me-ε ámpē méeláá’é nyé kunze echē níwóó ábel nímén mekan.”

12

Ngan e bebel-bé-nsón

abe bēbébé nlém á abum

(Mat 21.33-46; Luk 20.9-19)

¹ Héε Yesuε ábóótédé ngan abenled ákalεn bó. Anhób aá, “Mod nhóg ankwēl nzag e e’pum é’ mel ábe bēbenléε mím. Ankág chó, ábel bwāl wéε béminéé ábē e’pum é’ mel ábel mím, alōŋ-ε ebem wéε bédyε’é áwēd-te ánan menōn. Ambē ene nzag wéε bad ábe bóbóó békāb mbote áte, ákē á alōŋ démpēe. ² Néε póndé épédé echē bépádeé e’pum, ane nwóó-nzag anlóm awē mbālede wéε ábē bebel-bé-nsón ákobe mó ádé asií dé e’pum.

³ Héε ábē bebel-bé-nsón békóbé ane mbālede, bēwānēn mó, bésúúd-te mó ámbíd ne mekáá mé ngēn.

⁴ Dóo ane nwóó-nzag álómé mbālede ampée. Bēnlōgēn mó á nló, bēwógéd-te mó e’són.

⁵ Nwóó-nzag ambé álóm mbālede ampée, ábē bad bēnwūú ane ámpē. Bēmbēl melelem ne ekud émpēe, bēbómé doŋge, bēwū-ε ábíníí.

* **11:25** Doŋge á kálag dé’só ábádé nchoo 26: “Nzé nyéélagsán bad bēmpēe mbéh, ké awēn Titée awé adé ámín éelagsénné nyé nímén mbéh.”

6 Mod awē anlyəg mós alóm abédée awe mwān-a-mwēnchóm awē āndəngé bwāmbwam. Káəhne á asóg, dós alómée ane mwān ne mewēmtēn nēn aá, 'Ngāne ádíí awem mwān, bēbē mós edúbé.'

7 Boŋ áde ábē bebel-bé-nsón bényíne nēe ane mwān áhúe'é, dós bēn ne bēn bēhóbeé bán, 'Ndyé-a-mbwóg nēn, nyéhyag déwúu mós ábel nēn eche mbwóg ésuuned syānē.'

8 Hée békóbé mós, bēwūē' mós, bēbwēm-me mós ndim ámbid e e'ké."

9 Hée Yesue ásedtée aáken, "Bóob-póó, cheé nwóó-nzag ábenlé ábē bebel-bé-nsón? Apē awúú bós, ábē-'e ene nzag wée bebel-bé-nsón bēmpēe.

10 Eyale é Dyób éhóbe nēn aá,

'Aláá áde belón-bé-ndáb bēnchenéé, dós átímé aláá dé etógnēn abé.

11 Sāngwéeé mós abelé nēn, édé-'e syānē menyáké á díd-te. Nyéeláá'é nē-ye?"

12 Né-ós, bad bēmbáá bē Israel bēhédé'áá Yesue akób áyāle bēmbíi bán áyāle echáb dós ákálé enēn ngan. Boŋ bēmbē mbwóg áyāl e ene ndun e mod embé áhed. Né-ós bēntedé mós bēke.

Nsedtéd t̄h̄gene asaa á tááse

(Mat 22.15-22; Luk 20.20-26)

13 Bēnlōm Befarisia ne bad bē epepé éche Heróde áke dé aseded Yesue dyam ábel nēn békóben mós awusé.

14 Hée bēpédé áwē boŋ bēlāngē mós nēn bán, "A meléed, sēbíí nēn bán ekale mbále. Weékwoŋádté modmod. Weebáá-'e bad mesó mé mbóm. Boŋ ekoŋte bad mam mé Dyób ayáged. Mbéndé eche syānē ehóbe nēn bán désanŋe' tááse wée Kaisēe, kāŋ e Roma-ye?"

15 Boŋ Yesue anchēm nīmāb medogké, hée ásedtée aá, "Cheé nyékəgeé me. Nyéhyiined me mōné mé ekii rīnōn mós."

16 Hée bēpééné mōné nīmed boŋ ásedtē aáken, "Ediidinge éche nzéé chēn, dīn áde nzéé-'e dēn?" Bēnkwenētēn mós bán, "Abe Kaisēe."

17 Dós álāngēé bós aá, "Nyébag-kóó Kaisēe éche édé éche Kaisēe, nyébag-ke Dyób éche édé é Dyób." Ade bēwógé nē, yāl enkóm bós áte.

Nsedtéd t̄h̄gene mpuu

(Mat 22.23-33; Luk 20.27-40)

18 Besadusia bēmpē wée Yesue. Bēndübē bán mpuu méesaá ámbid e kwéed. Dós bēhóbeé bán,

19 "A-meléed, mbéndé e Mosee ehóbe nēn bán, 'Nzé mod awóó mmwáád boŋ awédé áde bós ane mmwáád bēepedéé mwān awále, mwānyan a abum ahóg atāngéné ane nkúd awónj ábel boŋ dīn áde mwānyan déebōó.'

20 Bóob-póó, bad bēbédé mod saámbé ábe bēmbíd abum ahóg. Mod a'só anwōj mmwáád boŋ awé áde bós mmwáád ne bēepedéé bán awále.

21 Mwānyan awé anhíd mós anwōj ane nkúd a mmwáád. Mómpē awé áde bós ane mmwáád bēepedéé bán awále. Melemlēm mé dyam mēmbēnléd ne awé alónténé beláán.

22 Káəh bós mod saámbé asyáál bēnwōj ane mmwáád bēwé-'e, áde bēepedéé mwān awále. Káəhne á asóg ane mmwáád mómpē anwé.

23 Bóob-póó á pónéd e mpuu, mmwáád awé nzéé ane mmwáád áchəgnédte áyāle bós moosyáál saámbé bēnwōj mós?"

24 Hée Yesue átímtanné bós aá, "Nyépane' áyāle nyéesōŋtēnēé chōm éche eyale é Dyób éhóbeé, nyéesōŋtēnēé-'e ngāne ngīne e Dyób ésogé abé.

25 Pónéd eché bad bēpuu' é ámbid e kwéed, mewōngé méebáá ámpē. Bad bēbē nēhngāne ángel éche édé ámīn, bēewōhénéé.

26 Bóob-póó, t̄h̄gene mpuu, kīné nyéeláá' é á kálag e Mosee á eped eché éhóbe áyāle mwā bwel awé ahyáá'áá-ye? Ahed, éténlédé bán áde Dyób álāngēé

Mosee tãngene Abrahamee, Aisige ne Jakõbe ábe bêmmad awé, Dyõb dénhõb aá, 'Mée ndé Dyõb áde Abrahamee, Aisige ne Jakõbe.'

²⁷ Nê álúmte nén bán bédé á alongé. Dyõb ádli Dyõb á bad ábe bédé á alongé, saké Dyõb á bad ábe bégwéde. Nyépane' bwãmbwam."

Mbéndé ébe éche etómténé etógnén abé

(Mat 22.34-40; Luk 10.25-28)

²⁸ Meléede a mbéndé nhõg awé ambé áhed anwóg chõm éche behõbée. Adé ányíné aá Yesue abagé Besadusia nkwenten ní bwãm, ansédéd Yesue aá, "A meléed, áfinté e mbéndé esyãál, mbéndé ehéé etómténé etógnén abé?"

²⁹ Yesue ankwentén mós aá, "Mbéndé eché etómténé etógnén abé edii mbéndé eché ehõbe nén aá, 'A-bad bé Israel nyéwõglen: Sãngwéé ádéd Dyõb, mwẽmpen-éé adé Sãngwéé.

³⁰ Edãh Sãngwéé ádon Dyõb ne nímon nlem rísyãál, ne échon edããdãh esyãál, ne nímdõh mewẽmten mésyãál, edãh-'é mós ne echon ngine esyãál.'

³¹ Eché elonténé ébe eché chõmpé edé etógnén, edii eché ehõbe nén aá, 'Edãh mwãnyon nẽngãne edãá echon yãl.' Mbéndé empée eesáá eché etómténé etógnén abé nẽngãne échén ébe."

³² Héé ane meléede a mbéndé álãngéé Yesue aá, "A-meléed etãngéné. Ekalé mbále wéé Dyõb ádii ahõg, Dyõb démpée déesaa-'é etóméé mwẽmpen.

³³ Mod ádãh-'é mós ne níme nlem rísyãál, ne níme mewẽmten mésyãál, ne eche ngine esyãál, ádãh-'é mwãnyon ngãne ádãá eche yãl, atómténé etógnén abe tómaa ábe Dyõb mende níme behyãntéé ne mende mémpée."

³⁴ Ade Yesue ányíné aá ane meléede a mbéndé ahõbné debyéé, anláá mós aá, "Nkamlen ní Dyõb méechabnedéé wé yãl." Ambid enê modmod enkẽnchũ'é Yesue dyamdyam asedé ámpé.

Nsedtéd tãngene Ane-awè-Béwõgté

(Mat 22.41-46; Luk 20.41-44)

³⁵ Yesue ayógté'áá á Ndáb-e-Dyõb. Áhed dõo áhõbée aáken, "Chán bemeléede bé mbéndé behéle behõbè bán Ane-awè-Béwõgté abidé á mbyaa níme kãh Dabidé?"

³⁶ Dabidé mwèn anhõb áde Edããdãh éche Esáá émbéé mós áte aá, 'Sãh Dyõbe anláá awèm Sãngwéé aá,

Dyéé áwèm ekáá émbáá kóãh ne á pónde eché mébenlé bon ékõgtéd ábõh bad bé ekoyí ámín ne mekuu.'

³⁷ Néé Dabidé mwèn ásébpé mós achãg aá Sãngwéé, chán-nõ Ane-awè-Béwõgté áheléé abé awe mwãn?"

Elébé tãngene bemeléede bé mbéndé

(Mat 23.1-36; Luk 20.45-47)

Ndun e mod ewõglánnáá Yesue áhed ne menyinge bwãmbwam.

³⁸ Ade áyógtéé bõ anhõb aá, "Nyétéd pónde ne bemeléede bé mbéndé, bédã' mengombe níme ríchábé ahyõmen áte. Bédã-'é bán bad béente bõ ne edúbé esyãál á mebwóg néé á dyon-té nê.

³⁹ Bédã-'é metii mé edúbé adyee á ndáb é mekáne, bédãh-'é e'tál bé edúbé á hõm á ngande.

⁴⁰ Bédume' mbwóg é bekúd, bédogné-'é bad ntõh-ntõh mé mekáne. Béküd nkõgsen níme ríchábé ámín."

Mende mé nkúd a mmwaád

(Luk 21.1-4)

41 Yesue andyεε benben ne ntyóg míme behágé'áá mone mé mende áte á Ndáb-e-Dyöb, ánoné' ngáne bad beháγκε mone áwöd-te. Ekud é behon bé bad behágé'áá ekud é moné.

42 Dóo ntógétöke a nkúd a mmwaád ápédé, bon áhāg mone mé ekii míme ndé ké bedáλεε bébe.

43 Héε Yesue áchágé ábē bembapεε benben bon álāngē bó aá, “Ne mbále, nlānge nyé mēé, mímén ntógétöke mé mmwaád ríhédé mone tómaa ábén behon bé bad bésyāā.

44 Mone míme ábē bad behédé, ndii mone míme ríchóbé bó ásē, bon anén mmwaád ne atóg áde ádíí, ahédé mone rísyāā míme áwóó, rísyāā míme ámbēε atognan yāl.”

13

Yesue ahóbé ad

bépan̄téd Ndáb-e-Dyöb

(Mat 24.1-2; Luk 21.5-6)

1 Yesue ambíd á Ndáb-e-Dyöb. Ade ábídeε nē dóo awē mbapεε nhóg álāngēé mó aá, “A-meléed nōné', meláá ne nlōntéd ní Ndáb-e-Dyöb mén mbóó bwāmbwam.”

2 Yesue ankwentén mó aá, “Enyíne' échén ngíne é nlōntéd-ε? Aláá ké ahóg déelyáγκε ámín e waáb, bépan̄téd mó áte mésyāā.”

E'bebtéd é' mekan abe bébenléd

(Mat 24.3-14; Luk 21.7-19)

3 Yesue ankē adyεε á ekone é Menzab mín. Echē Ekone ébéde á müde ní Ndáb-e-Dyöb. Ahed dóo Petro, Jemse, Jone ne Andreyā bépedé bon belāngē mó wεe bóbōō bēnpεn bebédé bán,

4 “Láá sé pōndé echē mímén mam mébenlédte, éláa-'ε sé e'chemléd ábe belūméd bán pōndé echē mébenlédte epedé.”

5 Yesue anláá bó aá, “Nyétéd pōndé nyéemwāg-ke se modmod ádog nyé.

6 Bad híin bépé á dīn ádēm behōbē bán, ‘Mε-εé ndé Ane-awē-Béwógté.’ Bédōg-ke bad híin.

7 Nzé nyéwógé bán nzum éwante' ké'ε nyéwógé nzunze é nzum, nyéētāgē áte. Nén átāngéné abenled, bon nē déélūmtēε nén bán asóg ámáá ape.

8 Alon ahóg détyēmēn ádíníí nzum. Nkamlen nhóg-ke rítyēmēn mímíníí. Ndōob eénāñnéd mebwóg ne mebwóg, nzaa-'ε ébē. Nén débē nēngáne mewε mé'sō míme mmwaád áwógéé nzé ahede achyáa.

9 Nzé mímén mam mébóótédé-'ε abenled, nyétédén yāl pōndé áyāle békōb nyé, bébe nyé á mekáá mé bad bé kóte. Béwanén nyé á ndáb é mekáne, nyétyém-mε á nkáásé á'sō é' benkamlenε ne kāñ é bad á yāl echēm. Nén débēnléd ábel nyékale bó nkalan ní bwām.

10 Bétāngéné nēε bésébpé nkalan ní bwām akal melon mé nkōñsé áte mésyāā, bon asóg dépē.

11 Nzé békóbé-'ε nyé bon bépééne nyé á kóte, nyéētāgē áte, áyāle dyam áde nyéhōbpē. Nzé ene pōndé epedé, nyéhōb kéchéé echē ébagnéd nyé, áyāle dyam áde nyéhōbpē débíd ne Edāōdāñ éche Esáá saké ne nyé.

12 Bad bébagé baányāñ á mekáá mé bad bémpēε áwúu bó. Besáá-bé-bān bébēl melemlen ne ábab bán. Bān-ne ámpē békunnén besáá bóōbe benyāā yāl ábel béwúu bó.

13 Moosyāāł ákōó nyé áyāle é dīn ádēm. Bon kénzēé awē ákaán mímé metake nlém kōāñ ne á asóg, ákúd e'soosōñ.”

*Dyam dé ebébtéd**(Mat 24.15-28; Luk 21.20-24)*

14 “Nyéenyin née ekúkú é akan éche épeene e’sôn á’sò é’ Dyöb édíí wée énkéntàngénné abé.” (Nyé ábe nyéláá’ nímén mekan nyésònten mó bwám.) “Nzé nyényiné nê, bad ábē bédé á Judeya bétóm mehélé, béke bésòom á e’kone mín.

15 Mod awé adé á nnoh í ndáb mín eétógné aké á ndáb-te átéd chòmchòm.

16 Mod awé mó-’é adé á nzag-té, eétímē ámbíd átéd eche sôte.

17 Ebē ebébtéd ne bebaád ábe bēbē nkog ne ábe bémwāntē nímē mesú.

18 Nyékāne nén bán, nén déebenlād ne nyé á pónké e nkóg áde ahéb ádíí ngíne bwāmbwam,

19 áyāle ndānge echē ebē ábē e’pun, ebē ndín echē eebédé mbéd bootya Dyöb áhāge nkòsé ape epun é’chii. Dyamdyam née ádē déebenléd-taá ámpē mbéd.

20 Boj Sāngwéé amaá ábē e’pun é’ metake asél áte. Nzé énkembé nê, né modmod éechongé. Boj á etútú é bad ábe ápwédé, asélé ábē e’pun áte.

21 Ene pónké nzé mod alángé nyé aá, ‘Nyénōne’, Ane-awē-Béwógté mōnén’ káa, ‘Nōné’ mōníní, nyéedúbpé’.

22 Bad híin bēbíd, bó mod té ákalé metóm aá móo móde Ane-awē-Béwógté. Bekal bé’dáádān bé metóm ámpē bēbíd. Bēbelé menyáké, bélúmtē-’é e’chemléd híin. Bēbel nén ábel boj bédog bad ábe Dyöb ápwédé, nzé nzii edé ádog bó.

23 Nyétéd pónké. Nlángé nyé nímén mam mésyāal á’sò é’ pónké.

*Epe é Mwān-a-Moonyon**ne asóg dé nkòsé**(Mat 24.29-31; Luk 21.25-28)*

24 “Ábē e’pun-ne, áde pónké e ndānge ne étómmé tómén ‘etondē akwē ehintén,

ngōn-ne esóg apen,

25 betintine bēbíd ámín bēhūn ásē,

ngíne-’é éche édé ámín énáñné á e’dii.’

26 Ene pónké dōo benyínnē née Mwān-a-Moonyon áhúe’ é á mbag-tē ne ngum ne ehúmé é ngíne.

27 Alóm éche ángel á metógné mé nkòsé mésyāal méniiin, álad bad ábe Dyöb ápwédé áte, bootya atógné dé nkòsé ahóg ape ádíiní.

*Yesu: aá bad bétéd**elānsén ne alín á ngəl*

28 “Nyétéd elānsén ne alín á ngəl. Nzé ngen ébóótédé byaá békōlē abided, nyēbele nyēbíí bán nchoj rídé benben.

29 Melemlem nzé nyényiné nímén mekan mésyāal mébenlad, nyēbíí nén bán, Mwān-a-Moonyon akwogé ape, adé-’é benben.

30 Ne mbále, nlānge nyé nén mēé, enén nyongel e bad édíí ebé ámín boj nímén mekan mésyāal mébenlād.

31 Nkoj ní mín ne nkòsé bémaá boj ábēm e’yale bēbē abé ne abé.

*Modmod eebii’ é epun**éche Mwān-a-Moonyon ápé**(Mat 24.36-44)*

32 “Modmod eebii’ é epun pen ké-’é pónké echē nímén mam mébenlédte. Ké ángel éche édé ámín eebii’ é, ké Mwān ámpē eebii’ é. Titēe mwēmpen mó abíí pónké eche nímén mekan mébenlédte.

³³ Nyétéd póndé, nyéboṅsen, áyāle nyéebii' é áde ene póndé épéé.

³⁴ Ebē nēngáne mod awē anlédé eke ake, boṅ alyágnéd ábē bembaledé ndáb, ábē nhóg-téé níme nsón, aláá-é mod awē anone' mmwe mé e'ké áá ábele nsón bwám.

³⁵ Né-óó, nyétéd póndé áyāle nyéebii' é pondé echē Sāngwéé a ndáb ápéé. Ahele ápē ngukél, ké' é melúde, ké' é epóg é mbwembwe, ké' é mbwembwe.

³⁶ Nzé apedé taléd eetāngeneé nées átáné nées nyékúneé.

³⁷ Né-óó, saké nyé bēnpen rílanḡeé ádén dyaṃ boṅ nlanḡe moosyáál méé, 'Nyétéd póndé.' "

14

Béhagke Yesue

(Mat 26.1-5; Luk 22.1-2; Jōn 11.45-53)

¹ Enlyōg e'pun é'be, Ngande e Nnyíme-ámín ne e Ewēle-é-Nḡên ápē áte. Bepriše bémháá ne bemeléede bé mbéndé béhágé' áá mwane ákób Yesue á mesám-té, áwúu mó.

² Boṅ bēnhōb bán, "Deébēlē nē á mbwe rí ngande áyāle né bad bēpēén epuutéd."

Béwógté Yesue á Betani

(Mat 26.6-13; Jōn 12.1-8)

³ Yesue ambé á Betani á ndáb wéé Simōne awē ankwē nkole mé melāḡ. Ade ádyáḡké ndyééd nē, dōó mmwáád nhóg ápédé ne apom á dyōḡ dé elod é bwám áde dēnlē nkun bwāmbwam. Adé dyōḡ bébēnlé dō náđ. Hē dōó ákógté nló mé epom boṅ ásyógé Yesue áđé dyōḡ á nló.

⁴ Boṅ donḡe á bad ábe bébéde áhed bēnlḡ bwāmbwam, bésēdté nhóg ne anínií bánken, "Cheé ékás boṅ anén mmwáád ábēbtē' enén ndín e dyōḡ?"

⁵ Béhéle' áá-se bésóm ádén dyōḡ nkun níme ríchábé ámín, bétéd nímé mōné bēbē betóótókē bé bad." Né-óó, bēnhōbēn ane mmwáád bwāmbwam.

⁶ Boṅ Yesue anláá bō áá, "Nyéchene mó. Cheé nyétagtēé mó? Abēnlé me kase e dyaṃ echē ebod bwāmbwam.

⁷ Betóótókē bé bad bēbē ne nyé póndé ésyāāl, póndé ké ehéé echē nyédás-é bō awōḡḡen nyéhele nyéwōḡḡén bō, me pen méebáá ne nyé póndé ésyāāl.

⁸ Abelé wéé mekáá mépédé mó. Asyógé me dyōḡ á nló áboṅsen nlime nímēm á'só é' póndé.

⁹ Ne mbále, nlanḡe nyé nén méé, kéhéé áde nkalan rí bwám mékanlédté nkōḡsé áte rísyāāl, bēhōb dyaṃ áde anén mmwáád ábēlé ákamten mó."

Judas akwēténé Yesue ásóm

(Mat 26.14-16; Luk 22.3-6)

¹⁰ Ambíd e nē, mbapēe nhóg áfinté e bembapēe dyōm ne bēbe awē béhágé' áá bán Judas Iskariōde ankē beprise bémháá atán ábel boṅ ásóm Yesue áwāb.

¹¹ Bepriše bémháá bēmbē menyḡḡe ne dyaṃ áde Judase ánlāā' é bō, bēhōb-pe bán bēbē mó mōné. Né-óó, Judase ambootéd nzii áhed ásóm Yesue.

Yesue ne ábē bembapēe bédyéde

Ndyééd e Nnyíme-ámín

(Mat 26.17-25; Luk 22.7-14, 21-23; Jōn 13.21-30)

¹² Bōob-póó póndé e ngande e Ewēle-é-Nḡên empē. Mbwe mé'só áde bēwúé' áá bán bé ndyōḡ ní mbód áboṅsen ndyééd e Nnyíme-ámín, bembapēe ábe Yesue bēntān Yesue, bésēdté mó bánken, "Héé wédāḡḡé wéé séboṅsen we ndyééd e Nnyíme-ámín?"

13 Dóo Yesue álómeé bembapee bébe ne nlyágtén nén aá, “Nyékag á dyad-té, mod ábomé ný awé apémé apom dé mendíb, nyéhíde mó.

14 Nzé nyépedé, nyéláa nwóó-ndáb bán, ‘Meléede ahóbé aáken, Héé ton e beken edíí eché módyéé ndyéed e Nnyíme-ámín áte ne ábē bembapee?’

15 Alúmed nyé ton eché ekalé áte eché bémáá abonŕen, bénábpé-’e áte. Ene ton edé ámín á ndáb-te. Nyébonŕen syáá ndyéed áhed.”

16 Héé ábē bembapee béhídté bon békág á dyad-té. Béntán mekan mésyāāl ngáne Yesue ánlāá’ é bó, bēmbonŕen-ne ndyéed e ngande e Nnyíme-ámín.

17 Nēe ngukél épédé Yesue ne ábē bembapee dyóm ne bébe bēmpē áhed.

18 Bedyágé’áá ndyéed á tébele. Póndé eché bedyákē ndyéed nē, dóo Yesue áhóbé aá, “Nlānge nyé nén meé, nyé mod nhóg ábē me á mekáá mé bad bé ekoyí, nyé nhóg awé adyág ndyéed ne me.”

19 Nén dēmbēl bembapee bēnsudén bwāmbwam. Bēmbootéd mó aseded nhóg ámbíd e aníní bán, “Ndúbpé meé saké me.”

20 Dóo átimtanné bó aá, “Mod nhóg áfínté nyé bad dyóm-ne-bébe, mod awé sūmā séētódé ewele á díse-té atóde ahóg.

21 Mwān-a-Moonyon áwē ngáne éténlédé bon medim ne ane mod awé ášóm mó. Ebágáá bwām ne ane mod nzé bēnkētōgen mó achyáa.”

Ndyéed eché Sángwéé

(Mat 26.26-30; Luk 22.14-20; 1 Kor 11.23-25)

22 Ade Yesue ne ábē bembapee bedyákē ndyéed nē, dóo átédé ewele, ásāgnān Dyób, bon ákabtaád áte, ábagé ábē bembapee áhóbé aá, “Nyékob nén, yál echém nén.”

23 Ambíd e nē, antéd mbwendé ní mím, ásāgnān Dyób, ábagé bó. Bó moosyāāl-le bémwág.

24 Dóo Yesue álāngeé bó aá, “Mmēm mekií mómén níme nýsýgkē á nló ní bad híin. Mmēn mekií médíí mekií mé melē mékōšlē.

25 Ne mbále, nlānge nyé nén meé, méemwáá nímén mím ámpē kááŕ ne epun éche mémwēé mó ekólé á nkamlen ní Dyób.”

26 Bēnkōn nkāngé mé nsāgnen. Nēe bémáá akón, bēnké á Ekone é Menzab.

Yesue ahóbé ngáne

Petro ábāngē mó á yál

(Mat 26.31-35; Luk 22.31-34; Jōn 13.36-38)

27 Yesue anlāá ábē bembapee aá, “Nyé baásyāāl nyéēnyagéd, nyétēdē me. Ayāle éténlédé á kálag e Dyób nén bán,

‘Měwūū nnōn-a-mbód, mbód ésyāāl épántéd áte.’ ”

28 Dóo Yesue áhóbéé aá, “Bon áde ápuúdté me, mēkē á’sō á Galilia áwed-taá nyétānnē me.”

29 Dóo Petro áhóbéé aá, “Ké moosyāāl annyagéd átēdē we, me pen méetēdēé we.”

30 Dóo Yesue álāngeé Petro aá, “Ne mbále, nlānge we meé, nkuu nén dēn, nchóm-a-kúb adēhób aá mótoó’ ngen ébe wēbāŕ me á yál ngen éláán.”

31 Héé Petro ábádtéé mó áte aá, “Ké nkāŕ móó bésēlēē me, méebāngé we áyāl mbéd.” Bembapee ábíníí bésyāāl bōmpē bēnhōb melemlen.

Yesue akánné á Getsemani

(Mat 26.36-46; Luk 22.39-46)

32 Ambíd e nē Yesue ne ábē bembapee bēnké á abwóg á hóm áde béchágé’áá bán Getsemani. Ade bépédé Yesue anlāá bó aá, “Nyédyēe hén, me-’e nke nkáne.”

³³ Ankeén Petro, Jemse ne Jone ákáne. Nɔnge ne metake hiin bêmpii mó á nlém-tê.

³⁴ Dóo álángeé bó aá, “Nɔnge eché edé me á nlém, ehéle-se ewúú me. Nyélyag hén, nyédyeen me epin.”

³⁵ Ansidé á'sò, abwém yál asé, bon ákanne' aá nzé nzii edé eché ene pónde e metake ehéleé se ébámé mó, ébame.

³⁶ Anhób aá, “A-Tê, Titée, ehéle ébel kéchéé. Kobén me nímén metuné. Bon ké nê, bël ngáne ébóɔnéde wé, saké ngáne ébóɔnéde me.”

³⁷ Ade amáá akáne, antim ámbid wée ábê bembapee beláán. Antán née békúneé. Dóo álángeé Petro aá, “A-Simɔn, ekúne'-e? Cheé ekás bon weéhele awesen ádyeen me epin ké háwa póg?”

³⁸ Nyédyee epin, nyékánné-'e ábel nén Dyób déemwág-se mekágsen mépiinéde nyé. Nlém ndáá abel bon ekob é yál edé mbwóg.”

³⁹ Antim ámbid ámpê, áke akáné melemlem ngáne ánsêbêê akáne.

⁴⁰ Ade átímé ámbid ámpê, antán née békúneé áyále e'chó bembé bó á díd bwámwam. Né-óó békémbíí' é chòm éche bélángeé mó.

⁴¹ Ade átímé ámbid ngen éche élonéne éláán dóo álángeé bó aá, “Nyélyagé nyékúne' nyékómme-'e nyé áte-yé? Nê ákwógé! Pónde epedé eché bébéé Mwán-a-Moonyon á mekáá mé bad bé mbéb.

⁴² Nyépáde áse dékag. Nyénone', mod awé akii me ntúré mó ahúe' nén.”

Békóbe Yesue

(Mat 26.47-56; Luk 22.47-53; Jón 18.3-12)

⁴³ Ehób épedeé Yesue amaa á nsal bon Judase ápag. Judase abédeé mbapee nhóg átínté e bembapee dyóm-ne-bébe ábe Yesue. Ampê ne ndun e mod. Ábê bad bémwálé nkwaté ne mbid. Beprise bémháá, bemeléede bé mbéndé ne bad bémháá bé Israel bóo bémwám bó.

⁴⁴ Bóob-póó, ntúré awe Yesue amháad bó e'chemléd abe aá, “Kénzéé awé méhêê tâl, né mod awé nyéhedeé mône. Nyékób mó, nyécháa-'e mó bwám bon nyékeene mó.”

⁴⁵ Judase apedé-'aá péén, átómé-'e wée Yesue. Anhób aá, “A-meléed.” Ahé-'e mó tâl.

⁴⁶ Héé ábê bad békóbe Yesue, bémwéd-te mó acháa.

⁴⁷ Dóo mod nhóg átínté e bad ábe bémwám ne Yesue ádolé nkwaté á abám, née átómté mó, asél-le ntáɔ awé prisee ambáambáa etúu.

⁴⁸ Héé Yesue ásedteé bó aá, “Nchíb móo ndii awé nyépééne nkwaté ne mbid ahýe dé akób-é?”

⁴⁹ Epun téé mbéde á Ndáb-e-Dyób ne nyé, n'yágté bad, nyéekóbe me. Bon e'yale é' kálag e Dyób é'tángéné alón.”

⁵⁰ Héé dóo bembapee bésyáál bétédté mó, bon bétómé mehéle.

⁵¹ Kódemod póg ebéde áhed, éhídé Yesue ámbid. Anwáá dásó esón é abad chémpen. Ábê bad bémkág bán békób mó,

⁵² bon antóm mehéle ne nsób, áchennéd-te bó éché esón é abad.

Békáadté Yesue

(Mat 26.57-68; Luk 22.54-55, 63-71; Jón 18.13-14, 19-24)

⁵³ Bad ábe bémkób Yesue bémkeén mó wée Priše Ambáambáa. Beprise bémháá, bad bémháá bé Israel ne bemeléede bé mbéndé bémpeé belááden áhed.

⁵⁴ Ade békeeneé Yesue nê, Petro ahidé'áá mó ámbid mwá etún kóón asól á eyáde éche prisee ambáambáa. Andyéé áhed ne benon bé Ndáb-e-Dyób, áwále muú.

55 Bɔɔb-pɔɔ, beprise bémbáá ne bad bé káánsel bésyāal béhéde'áá bad ábe bébíd mbón é metóm á nló wée Yesue ábel nén béwúu mó, bonj békénkudté kék nhóg.

56 Ekud é bad émbíd mó mbón é metóm á yál, bonj béébédeé nsal nhóg.

57 Héé donje á bad bétyéémé ámín, bonj bébídé mó mbón é metóm bán,

58 “Sénwóg née áhóbé áá, ‘Měbootéd enén Ndáb-e-Dyób eché baányonj béléó, nlónj empée, áfínté e e'pun é'láán eché béélónjnéé mekáá.’ ” 59 Bonj ké nê, échab mbónj é metóm énkembáá nsal nhóg.

60 Dóɔ prise ambáámbáá átyéémé ámín áfínté e bad bé káánsel, bonj ásedtē Yesue ááken, “Weewóó' é dyamdyam ahób tãngene dyam ádē ábén bad béhóbé we á yál-ε?”

61 Bonj Yesue andyéé mó ngên, enkénkobéé dyamdyam. Dóɔ ene prise ambáámbáá ésedtēé mó ámpē áá, “Wε-εé edé Ane-awē-Béwógte, Mwän awē Dyób áde bad bébageé edúbé-yé?”

62 Héé Yesue ákwentanné áá, “Mεé ndé, nyéēnyín-ne ngáne Mwän-a-Moonyonj ádyéé á ekáá émbáá é Dyób a Ngum. Nyéēnyín-ne née áhúé' é á mbag-té ámín.”

63 Héé prise ambáámbáá ányábé mbóté álúmed nén áá mólii, bonj áhóbē áá, “Mbónj éhéé émpée déhédeé?”

64 Nyéwógé née ásyáá' é Dyób. Cheé nyéhóbé á yál eché?” Héé bó moosyáál béhóbéé bán atãngéne awé.

65 Donje á bad bēmbóótéd mó meléed asob á yál, békütān mó mīd, bébómé mó, bélāngē-'ε mó bán, “Láá-'ε sé mod awē abómé we.” Dóɔ bembáledé bétédé mó, bonj bébootéd-te mó abómteed.

Petro abád Yesue á yál

(Mat 26.69-75; Luk 22.56-62; Jɔn 18.15-18, 25-27)

66 Wée Petro ádyéé áse nê á eyáde-tē, dóɔ mbáledé nhóg a mmwáád awē prise ambáámbáá ápédé.

67 Annyín Petro awále muú. Dóɔ ásímné mó bonj álāngē mó áá, “Wémpē wembé ne Yesue awē abídé á Nazaret.”

68 Bonj Petro ambánj éché ehób á yál, áá, “Meebíi' é, meesóntán-naá chóm éche éhóbéé.” Amaá-áá ahób nē abíd-te á mmwe. Ene pónde chēn nchóm-a-kúb antónj. *

69 Dóɔ ane mbáledé ányiné mó ámpē bonj ábootéd bad ábe bébédeé benben aláá áá, “Anén mod adé nhóg awē mómpē ahídé'áá Yesue.”

70 Petro ambánj á yál ámpē. Eebeméé áte ámpē dóɔ bad ábe béntyēēm áhed bélāngéé Petro bán, “Mbále chó edé. Edé nhóg awē ahídé'áá Yesue, áyāle ebídé á Galilia.”

71 Bonj Petro ambootéd yál ebómán abe ámwāg-ke melē áá, “Meebíi' é anén mod awē nyétúbéé dín nê.”

72 Melemlem mé pónde nchóm-a-kúb antónj ngen éché élónténé ébe. Héé Petro ákámtné chóm éche Yesue ánlāá' é mó áá, “Nchóm-a-kúb adéhób áá móto'o' ngen ébe wēbán me á yál ngen éláán.” Héé Petro ábánlé awé, ábootéd-te achii.

15

Payledé akáádtē Yesue

(Mat 27.1-2, 11-14; Luk 23.1-5; Jɔn 18.28-38)

* 14:68 Donje á kálag dé'só déewóó' é Ene pónde chēn nchóm-a-kúb antónj.

¹ Bîn é sánǵé-’á sánǵén, beprise bémbáá, bad bémbáá bé Israel, bemeléede bé mbéndé ne bad bé káánsel embáá e bad bé Israel békób mbom. Béhñǵ Yesue, bébǵg-ke mó á mekáá wée Paylede.

² Héé Paylede ásedtée mó aáken, “Wε-εé edé kǵη e bad bé Israel-ε?” Yesue ankwentén mó aá, “Ngáne éhóbé.”

³ Beprise bémbáá bémbān mó ekud é mekan á yǵl.

⁴ Héé Paylede ásedtée mó ámpē aá, “Weewóó’ε dyamdyam áhób-ε? Mmön wógé’ ekud é mekan éché béhóbéé wε á yǵl.”

⁵ Bonǵ Yesue enkénhóbpe dyamdyam. Nê dénkōmed Paylede yǵl áte.

Bán Yesue atǵǵéné awé

(Mat 27.15-26; Luk 23.13-25; Jǵn 18.39-19.16)

⁶ Bǵob-póó, émbē nén bán á Ngande e Nnyime-ámin, Paylede ammentén mod á mbwǵg nhǵg abided á mbwǵg. Ane mod abágé’áá mod ké ahée awé bad béhédénné mó.

⁷ Ene pǵndé mod nhǵg ambé á mbwǵg awé béchǵgé’áá bán Barabase. Abédé ne bad ábe béntyéemēn nkamlēn í Roma.

⁸ Dǵó ndun e mod épédé wée Paylede, bonǵ bélǵǵē mó bán ábel ngáne ámēténé bó abele.

⁹ Héé ásedtée mó aáken, “Nyéhede’ bán, mbídted nyé kǵη e bad bé Israel-ε?”

¹⁰ Abii áde ámbǵǵ’ é áá kǵnǵí edé beprise bémbáá áte á yǵl wée Yesue, dǵó dénkǵǵ bonǵ ásedēd bó nē.

¹¹ Bonǵ beprise bémbáá békóné’áá ábē bad bán béláa Paylede bán ábítéd bó dǵsǵ Barabase.

¹² Paylede ansédéd bó ámpē aá, “Chán-nǵ nyéhedeé bán míbel ne mod awé nyéchǵgéé bán kǵη e bad bé Israel?”

¹³ Dǵó bélébpéé e’saad bán, “Bomé mó á awǵg.”

¹⁴ Héé Paylede ásedtée bó aáken, “Ayǵle chán? Ebébtéd éhéé ábélé?” Bonǵ bénnabé abón bán, “Bomé mó á awǵg.”

¹⁵ Né-ǵó, ngáne Paylede áhédé’áá aá mókóded ábē bad mewēmtēn, ambídtéd bó Barabase. Ambē kunze aá, sǵnze ébǵm Yesue, bonǵ béke bébome-’ε mó á awǵg.

Sǵnze éwélé Yesue

(Mat 27.27-31; Jǵn 19.2-3)

¹⁶ Sǵnze éntéd Yesue, békēēn mó á eyáde é nkamlēnε, bélǵd-te baáb ábíní áte áhed.

¹⁷ Bénwǵād mó mengombe níme méyǵge’ níme méwǵgné mengombe mé kǵη, bélǵǵ-’ε ekóté é mechǵ, béhé mó á nló. ¹⁸ Dǵó bébóótédé mó awel, bélenté mó bán, “A-kǵη e bad bé Israel, edúbé ébē ne wel!”

¹⁹ Bébmé’áá mó ntǵǵ á nló, básobtád mó meléed á yǵl, bébwǵgkē-’ε mó mebóbǵǵ áwel mó.

²⁰ Ade bémáá mó awel, bénhūd mó níme mengombe á yǵl, bétímed mó éche mbóté chēn á yǵl. Néε bémadé nē, bēnkēēn mó áke débome mó á awǵg.

Bébméé Yesue á awǵg

(Mat 27.32-44; Luk 23.26-43; Jǵn 19.17-27)

²¹ Ade békagké nē, dǵó bébméé mod awé ambíd á dyad á Sirine. Dǵn démbē mó bán Simǵne. Simǵne abédée sáá awé Alésandaa bó Refuse. Simǵne atómé’áá ásól á dyad-té. Dǵó békóbé mó bonǵ bényǵgtē mó bán ápēm awǵg áde Yesue.

²² Dǵó bépédé hǵm áde béchǵgé’áá bán, Golgota, awé adé nén bán, “Hǵm dé Ebǵǵél é Nló.”

23 Ahed bēmbē Yesue mīm nīme beládténé ne bwel ábe béchagēé bán mīa* bán ámwê, bon enkēnkwenténne amwê.

24 Bēmbomé Yesue á awōg. Bēnsíd mbambú ákab éche mbóté.

25 Mbwēmbwē á ngān abog dóo bēbómme mós á awōg.

26 Chóm éche bēntenlé á awōg áwe nló mín álúmed nẏom eché bēbómnedé mós á awōg émbē nēn bán, “Kān e bad bé Israel.”

27 Bēmbomé-’e bechīb bēbe bómpe á awōg, nhóg á ped e ekáá émbáá eche Yesue, aníní-’e á ped e ekáá é emwēd.†

29 Bad ábe bétómé’áá nzii benben ne ahed bēbómé’áá nló, bēbwēmmē-’e mós nzyān bán, “Ahá! Wenhós wēe mós bōōtéd Ndáb-e-Dyōb, wēe mólōn-’e chó ámpē áfinté e e’pun é’láán.

30 Sōn-ō echor yāl bōōb, ésud áse á awōg.”

31 Melemlem nē dóo beprise bēmbáá ne bemeléde bé mbéndé bēwélé’áá mós. Bēn ne bēn bēhóbé’áá bán, “Achōjté’áá bad, bōōb eéheleé eche yāl awōngēn.

32 Mós awé ahóbé áá mós módē Ane-awē-Béwógté, áá mós módē-’e kān e bad bé Israel ásud-tōó áse á awōg hē bōōb, dényín ábel dédúbe.” Ábē bechīb ábe bēmboméé á awōg nchoo ne Yesue bómpe bésyóó’áá mós.

Kwééd eche Yesue

(Mat 27.45-56; Luk 23.44-49; Jōn 19.28-30)

33 Ade kəd épédé, ehintén ēnkwe hōm ásyāāl, kóān ne á ngān éláán.

34 Ade ngān éláán épédé, Yesue anlébé esaád áá, “Elí, Elí, lámá sábatāni.” Nēn adé nēn bán, “A-Dyōb ádēm, a-Dyōb ádēm, cheé ekáá bon étēdté mē?”

35 Nēe donje á bad ábe bēmbē benben bēwógé nē, bēnhōb bán, “Nyéwóge’, achēne Elaijaa áá áhye áwōngēn mós.”

36 Héé mod nhóg ányógté bon átédé kuchá, átódté’ á ebéntéd é mīm-tē, ásmé’ á ntōn bon áhāg mós á nsal áá ámwē. Anhób áá, “Nyémwē dényín nzé Elaijaa áhye mós asuded á awōg.”

37 Héé Yesue álébpe esaád bon ámīē-’e nlém.

38 Ene pónde chēn abad áde dēnkáb Ndáb é Dyōb áte, dēnsalé áte e’ped é’be bootya ámín kóān ápe-’e áse.

39 Adé mod ambáá á sánze awé antyéém Yesue á’sō-te ānōn mós ányíné ngāne Yesue áwédé,‡ anhób áá, “Ne mbále, anén mod abédéé Mwán a Dyōb.”

40 Bebaád behóg bómpe bēmbē nchabnede bēnōne’ mekan mēsýāāl nīme mēbenlad. Áfinté e ábē bebaád, Maria Magdalēne, Salome ne Maria awé achyáá Jemse asad bō Joseb, bēmbē áhed.

41 Abén bebaád bēhíde’áá Yesue áde ámbēē á Galilia, bēwōngān-ne mós. Ekud é bebaád émpēe éche bóbō bēmpē á Jerusalem chómpē émpē áhed.

Nīme nīme Yesue

(Mat 27.57-61; Luk 23.50-56; Jōn 19.38-42)

42-43 Mod nhóg abédé awé béchagé’áá bán Josebe. Ambíd á dyad á Arimatia. Anén mod abédéé mod e edúbé á káánsel embáá e bad bé Israel. Mómpe asiné’áá pónde eché nkamlen ní Dyōb mēpéé. Ngāne émbēē mbwē mé mbonšén (nédé áde mbwē-mé-nkōme-áte nlyógé nēe chān), hée ákáá nlém, bon ápag wēe Payledē benben ne ngukél, álāngē mós áá ábe mós ndim nīme Yesue.

* 15:23 *Mia*: mēbédéé bwel ábē bad bēbēnládtáá ásudēd mewe. † 15:27 Donje á kálag dé’só ábádē nchoo 28: *Adé nēn abēnlédé, e’yale abē é’ténlédé á kálag é Dyōb bēnlon. Eténlédé nēn bán, ‘Bēntōn mómpe á nchoo mé bebel bé mbēb.’ ‡ 15:39 Awédé: Donje á kálag dé’só áwóó álébpe esaád, awē-’e.*

⁴⁴ Ade Paylede awogé bán Yesue amaa awé, yäl enkóm mó áte. Héé álómé ane mod a mbáá a sónze achag bon ásedté mó ké Yesue amaa awé.

⁴⁵ Ade ene sónze élanḡe mó aá Yesue awédé, dso ákwénténé aá Josebe átéd míme ndim.

⁴⁶ Josebe anchán mbóm. Antéd Yesue ndim, ákãān mó ene mbóm, alímé-é mó á soḡ-tê echê bépwógé aláá áte. Ambíd ene, antínéd aláá á mbáá ákólen nsal ní soḡ.

⁴⁷ Maria Magdalene ne Maria awé anchyáá Josee bénóné'áá wée bélimméé Yesue.

16

Yesue apuúde

(Mat 28.1-8; Luk 24.1-12; Jón 20.1-10)

¹ Ambíd e mbwe-mé-nkóme-áte Maria Magdalene, Maria awé achyáá Jemse ne Salome, bēchān dyḡg dé elod é bwām áke dé awoged ndim míme Yesue.

² Mbwembwe mé epun é'sō é Sōndé áde enyēn étúbéé dso békíí á soḡ.

³ Ade békagké, dso bésedtéé nhóg ne aníníí bánken, “Nzéé áhūdē syānē aláá á nsal ní soḡ?”

⁴ Dso bésádé díd, bon bényinē bán bémáá adé aláá ahúd. Aláá áded dēnkā bwāmbwam.

⁵ Héé bésólé á soḡ-tê, bon bényinē kódemod edyēé á nkag á ped e ekáá émbáá. Anhé megombe míme mēpúbe'. Nēn dēnkōbēd bó mbwóg bwāmbwam.

⁶ Héé ene kódemod élanḡeé bó aá, “Nyéebáá”, mbíí mēé nyēhede' Yesue, mod a Nazaret awé bēmboméé á awog. Apuúde, eésáá hēn. Nyēnōne wée bēnaádté mó.

⁷ Nyékag-kōs bōob nyélaa abē bembapēe, tanḡe Petro, bán Yesue apuúde, ‘Akag-ke á'sō á Galilia. Awed-taá nyényinnē mó ngáne ánlāá'nyé.’”

⁸ Héé bebóótédé anḡ ne menyáké míme bényinē. Bēmbíd á soḡ-tê bébootéd-te anyoged. Bēlanḡe-áa modmod dyamdyam áyāle mbwóg ménkōb bó.

Nyaa póg echê Kálag e Makose ésógé*

16.9-20

Yesue alúmté Maria Magdalene yäl

(Mat 28.9-10; Jón 20.11-18)

⁹ Ade Yesue amaa apuu, epog é mbwembwe é epun é'sō é Sōndé, Maria Magdalene móo ánsébēē yäl alumed. Anén mmwaád móo Yesue ámbídédte e'daádḡn bé mbéb saámbe áte.

¹⁰ Héé ane mmwaád ákíí bon álāḡē bad ábe bóobē Yesue bēbágé'áá. Antán néé béchyé'é kwééd eche Yesue.

¹¹ Bon áde bēwógé bán Yesue adé á alonḡé, bán ane mmwaád anyíné-é mó, bēnkéndúbéé.

Yesue alúmté abē bad bébe yäl

(Luk 24.13-35)

¹² Ambíd e pónde Yesue anlúmed yäl wée abē bad bēmpēe bébe áde bēbídéé á dyad-tē. Bon enén ngen anlúmed yäl nyaa émpēe.

¹³ Héé ábē bad bétímé ámbíd, béke beláá baáb ábíníí. Bon ké nē, baáb bē bēnkéndúbéé.

* 16:8 Donḡe á kálag dé'so déewóo'é nchoo 9-20.

*Yesue alúmté ábē bembapεε**dyóm ne nhóg yǎl**(Mat 28.16-20; Luk 24.36-49; Jɔn 20.19-23; Mbɛl 1.6-8)*

¹⁴ Ámbíd e pónde Yesue anlúmed yǎl wéε ábē bembapεε dyóm-ne-nhóg áde bédyáǵkē ndyééd. Bénkëndúbéé bad ábe bēnhōb bán bényíné mós áde ámáá apuu. Né-ɔɔ, ankáné bós áte aá béewóó'é adúbe, aá bélélé-'ε nlem á abum.

¹⁵ Anláá bós aá, “Nyékag nkōɔsé áte rísyāǎl, nyékanle bad bésyāǎl nkalan nī bwám.

¹⁶ Kénzéé awé adúbpé boɲ bédusén-ne mós ákūd e'choóchoɲ, boɲ kénzéé awé eedúbpe ákūd nkógsen.

¹⁷ Bad ábe bédúbpé b'éwōɲ ngine ábel mam mé menyáké: b'ébídte bad e'dáádəɲ bé mbéb áte á dín adém; b'éhōbē-'ε mehób mékɔǎle.

¹⁸ Békōbēn nyǎ mekáá, éebɛnlé bós dyamdyam. Ké bémwε-'ε ké e'wε, ábē e'wε béebɛnlé bós dyamdyam. Bébān bad bé nkole mekáá á yǎl, bad bé nkole bē bédyē-'ε bwám.”

*Yesue apūmmé**(Luk 24.50-53; Mbɛl 1.9-11)*

¹⁹ Áde Sāngú Yesue ámáá bós nímén mekan aláa, dáɔ Dyōb ábélé boɲ ápūmē ámīn. Andyéé Dyōb á ekáá émbáá.

²⁰ Héε bembapεε b'ébídé, boɲ béke békale Eyale é Dyōb hóm téé. Sāngwéé ambé ne bós, ábē-'ε bós ngine ábel mekan mé menyáké, álúmed nén aá chóm éche b'éhōbεé édé mbále.

Nyaa empée eché kálag e Makɔε ésoǵé†*16.9-10*

[(9) Héε ábē bebaád békíí, boɲ b'élāngē Petro ne bad ábe bémbe ne mós mekan mésyāǎl nime bényāgtēnnē bós, bésélé mós esóɲ-esóɲ. (10) Néε nē átómé, Yesue mwēn anlóm bad nkōɔsé áte rísyāǎl ákal nkalan nī bwám. Mmē nkalan nī bwám nime rísáá, méehəɲlānné. Mmē nkalan nídíí nkalan tōɲgɛne alongé áde débē á ngíndé ne á ngíndé.]

† 16:20 Donje á kálag dé'só ábádé ádén asóǵ á kálag ámbíd e nchoo 8.

Nkalanj ní bwám níme Yesuε ngáne

Lukasε
átélé

Ndibned ní kálag

Nkalanj ní bwám níme Yesuε ngáne Lukasε átélé nílúmte Yesuε ngáne Nsoode awé Dyöb dénhöbpé aá mósólómé bad bé Israel. Lukasε ahóbé aá Edaádəŋ é Dyöb chósé épwéde Yesuε ápeen nkalanj ní bwám wéε betóótöké bé bad. Mmén nkalanj níbude ahób tǎŋgene e'boŋ bé nlem ábe Yesuε álúmteé bad. A mbooted menyinje ményinnédé áde ehǎŋgé ébidé tǎŋgene epe éche Yesuε, ményinnéd-
te á asóg áde Yesuε ápúmmé ádyöb. Mekan níme Lukasε ákóó awéd áte médi: mekáne, Edaádəŋ éche Esáá, mekan níme bebaád bébéle áfinté e nsón níme Yesuε ne alagsen áde Dyöb álagsanné bad mbéb.

Lukasε abádé mekan áte wén níme méde áyāl e nímén nkalanj ní bwám dēmpen (Nōn e'pəd é'be ne ntóób á nkabtéd).

Nkabtéd ní kálag

Ndibned 1.1-4

Echyáa éche Jōne, Ndušenε ne éche Yesuε 1.5-2.52

Nsón níme Jōne, Ndušenε 3.1-20

Edusen ne mekágsen níme Yesuε 3.21-4.13

Nsón níme Yesuε á Galilia 4.14-9.50

Nsón níme Yesuε áde áhídté á Galilia ápe á Jerusalem 9.51-19.27

E'pun bé asóg ábe Yesuε á Jerusalem ne benben ne á Jerusalem 19.28-21.38

Akáad áde békáádté Yesuε ne eche kwééd 22-23

Mpuu níme Sǎŋgwéé, alúmed áde ánlúmédte bad yāl ne níme mpume 24.1-53

¹ A-Tiofilos, mod á edúbé, ekud é bad ékétéd pónde átel mekan asé, níme mébénlédé áfinté e' syané.

² Bétélé melemlen ngáne dénwöŋkē wéε bad ábe bényinēn mó díd se á mbooted, békalé-ε Eyale é Dyöb.

³ Né-ós, ntóó nímén mekan ahed áte se á mbooted, nnyiné-ε nén meé ébóó mémpé níted pónde, nítele wε mekan asé ahóg-ahóŋe.

⁴ Nén débél wééchem mbále tǎŋgene mekan níme émáá abíi.

Angel epítde Sakaria

⁵ A pónde eche Herode abédé kǎŋ e Judeya, mod nhóg ambé bán Sakaria. Sakaria abédéε prise á nchoo níme Abiyaa. Mwaád ambé dīn bán Elisabete. Mó ámpé abédéε ngon e túmbé eche Arone.

⁶ Alongé áde bó mwaád dēmbē bwám á'sō é' Dyöb. Béhidé'áá mbéndé éche Sǎŋgwéé ésyāāl.

⁷ Boŋ bēnkēnwáléé mwán ké nhóg áyāle Elisabete abédé ekom. Bó bad bébe bēmmád-te achun.

⁸ Bōob-pōó, áde pónde e nsón e nchoo níme beprise níme Sakaria bó épédé áte, anké nsón níme prise abel á Ndáb-e-Dyöb epun ehóg.

⁹ Mó'aa bēmpwēdté ášāl á Ndáb-e-Dyöb ábele Sǎŋgwéé, áhyáad e'twé, ngáne nsón níme prise níhédnádtaá.

¹⁰ Ade áhyǎŋteé e'twé, ndun e mod embé ámbid e ebwóg, békánne'.

¹¹ Hē dōó ángel e Sǎŋgú épíidé mó, etyéém mó á pəd e ekáá émbáá benben ne menyán mé e'twé.

12 Anyín áde Sakaria ányíne ángel, yál enkóm mó áte, mbwóg ménkòb-pe mó bwámbwam.

13 Dóo ángel élanḡeé mó aá, “A-Sakaria, weebáá’. Dyòb áwógé we mekáne. Né-òó, awòḡ mwáád Elisabete, áchyāá mwán. Echuu ane mwán ðín weé Jone.

14 Anén mwán áwògèd we menyinḡe. Ndun e mod ámpè èwòg menyinḡe é echyāa éche.

15 Ebē nē áyāle ane mwán àbē ndāle a mod á’sò é’ Sánḡú. Eetāḡḡeneé nēe ámwáḡkē mím níme méwag, káa chòm ké échē éwúú áte. Edáòdāḡ éche Esáá élon mó áte se á ncháátén.

16 Atiméd bad bé Israel nlem ámbid wée Sánḡwée awē adé ádab Dyòb.

17 Abē á’sò bon Sánḡwée ápag. Awòḡ-’e edáòdāḡ ne ngíne melemlen ngáne nkal é’dáòdāḡ Elaijaa a’boòd ánwòḡḡ. Achèd bad nlem á abum, ábel bad bóòbe bán bétim ásē. Abèl bad ábe béwúéné Dyòb nló áte, béhāḡlén, béwòḡ debýéé nēe bad ábe bétýeeme á’sò é’ Dyòb. Né-’aá ábonḡénné epe éche Sánḡwée.”

18 Sakaria anseḡdéd ángel aá, “Cheé élúmte me nén bán ádén akan áde éhóbé débēnléd? Mmēn mmaá achun. Awēm mwáád-te ámpè amaá kòd atóm.”

19 Dóo ángel étimtanné mó aá, “Ndíí Gabriēle, mésénze níme mébenle Dyòb nsón. Dyòb álóme me áwòḡ, áláa we mímēn nlébtéd mí bwám.

20 Bóòb-òóó, ngáne wéédúbpeé dyam áde ríhóbé, wékwé ebóbé káóḡ ne pónde échē mam mésyāal níme rílánḡé we melónnē. Mekan mésyāal mébenléd-te á pónde échē métāḡḡéne abēnléd.”

21 Ene pónde esyāal bad bésiné’áá Sakaria ámbid ebwóg, bényāḡe’ chòm éche ékóó bon ápē abem á Ndáb-e-Dyòb-te nē.

22 Ade ábíde áwed, eéhele’áa dyamdyam ahób áwāb. Dóo béchéme nén bán, anyíne ndóg á Ndáb-e-Dyòb. Mekáá móo álúmtánnáá bó, ésebán ahele dyam ahób.

23 Pónde e nsón échē Sakaria emaa’-’aá áte, asú á ndáb.

24 Ámbid e pónde mwáád ambé nkog. Ankoó yál á ndáb-te á etún é ngon étáan.

25 Anhób aá “Kóóḡ ne á asóg Sánḡwée abēnlé me ádén. Awógé me ngol, ahúde-’e me e’són áyál áftinté e ábēm bad.”

Angel epíidé Maria

26-27 Adé dyēm áde Elisabete ádíí ngon ntóób, Dyòb dénlòm ángel Gabriēle á dyad á Nazaret, á alon á Galilia, wée ngòndéere póg bán Maria. Maria enkémbíí’é mwēnchóm. Mod ankiú mó awe béchágé’áá bán Josebe. Josebe ámbid á túmbé échē Kōḡ Dabide.

28 Ade ángel étáné Maria enhób aá, “A-Maria, nsāḡ rúbē ne we! Edíí mwáád awē akudé mende ne Dyòb. Titée Dyòbe adé ne we.”

29 Nén déntagéd Maria á mewēmten-tē bwámbwam. Akóḡláádtáá á nlem-té ábíi chòm éche ene nyaa e melēnten éhele élúmte’.

30 Dóo ene ángel élanḡeé mó aá, “A-Maria! Weebáá’, nsimé ní Dyòb rídé ne we.

31 Ebíi weé, móòbē nkog. Wéchyāá mwán a mwēnchóm. Echuu mó ðín weé Yesuē.

32 Ane mwán àbē ndāle a mod. Béchāḡ mó bán, Mwán a Dyòb á Ngum. Titée Dyòbe mwēn àbē mó atii dé nkamlēn áde sáá ambáá Dabide.

33 Mó ákamlēn abum á ndáb áde Jakòbe á ngíndé ne á ngíndé. Nkamlēn níme méewóngé asóg.”

34 Héē Maria áseḡtéé ángel ne aáken, “Chán ríhele nchyāá mwán áde méébíí’é mwēnchóm?”

³⁵ Ene ángel enkwentén mó aá, “Edaðəŋ éche Esáá épií wε. Ngum e Dyöb ékúdtən wε. Né-ɔ́, mwán awə asáá, awə wéchyāá’é, áchəgnéd bán Mwán a Dyöb.

³⁶ Bíí wεé, Elisabete, mwányonŋ a túmbé póg, mómpé adé nkgó á e’chun-té. Mó awə bénhöbpé bán adé ekəm, adé dyém bəob ngon ntóob.

³⁷ Edé nê áyále dyamdyam déesaá áde átómé Dyöb áte.”

³⁸ Héε Maria áhóbéé aá, “Ndíí mbəlede awe Səŋgwéé. Ebê ne me ngáne éhóbé.” Dóo ene ángel étédte mó bon ékag.

Maria akil wée Elisabete

³⁹ Mmê mesú mên, Maria anlád yál ne mehél mésyāál, áké á dyad á Juda ahóg áde adé á e’kone-té.

⁴⁰ Ade apédé awed, ansól á ndáb echè Sakaria, áléléd Elisabete.

⁴¹ Awóg áde Elisabete awógé Maria níme melenten, mwán anhóbnéd Elisabete á abum-té. Edaðəŋ éche Esáá êmpií mó.

⁴² Dó-’aá áləŋgée Maria ne esaád é ngíne nén aá, “Nnam núbê ne wε áfínté bebaád bésyāál. Nnam núbê ne mwán awe wéchyāá’é.

⁴³ Chán éhénlédé éche mεmε nkúké échén edúbé? Chán nyaá awe Səŋgwéé áhəle áhyε áwém-é?

⁴⁴ Awóg áde níwógé nímónŋ melenten, mwán ahóbté me yál á abum-té ne menyinŋe.

⁴⁵ Dyöb ánámte wε áyále edúbpé nén wεé, dyam áde Səŋgwéé áləŋgé wε débénléd.”

Ngəse echè Maria

⁴⁶ Héε Maria áhóbéé aá,

“Nkémte Səŋgwéé ne nlém nímmém rísyāál,

⁴⁷ edaðəŋ échém ampé éwógne Dyöb menyinŋe. Mó adé awém mod a e’sóosonŋ.

⁴⁸ Ayále achemé me awə ndé awe mwá mbəlede ngên. Bootya bəob, áke á’só, nyonŋel e bad téé éhób bán, níde mmwaád awə Dyöb ánámte.

⁴⁹ Dyöb á Ngum abənlé me ndəle a akan. Mó adé ane awə asáá.

⁵⁰ Ngəl eché ébē nyonŋel ne nyonŋel e bad téé, ámín e kénzée awə abage mó edúbé.

⁵¹ Abelé ndəle a akan ne éche ekáá chən. Apuúdtédé bad ábe bédé kúmbe mewémten áte.

⁵² Ahúde benkamlenε áwáb metii mé nkamlen, bon achágté bad ábe bésúdté yál.

⁵³ Akódté bad ábe bétagne nzaa ne kəse é bwém, bon anané bad ábe bébúde awónŋ aá bésū’ ne mekáá mé ngên.

⁵⁴⁻⁵⁵ Akámtené álóned akag áde ámbéé ábēd betaa, bootya Abrahamε ne nímé mbyaa rísyāál kóŋŋ ne á ngíndé. Né-ɔ́, awónŋéné ábē bembəlede, bad bé Israel.”

⁵⁶ Ámbid e nê, Maria andyεén Elisabete ngon éláán, bon ásué’ ámbid.

Echyáa éche Jone Ndusene

⁵⁷ Ámbid e pónde, e’we é’ mwán bénkōb Elisabete. Anchyáá mwán a mwenchóm.

⁵⁸ Túmbé eché ne bad ábe bóbəo bédyéé’áá abwóg ahóg, bénsontən nén bán Səŋgwéé ábage mó sənkalaa a nsimé, bómpé bəwóg menyinŋe.

⁵⁹ Mbwe mé asónŋ-á-yál (ámbid e e’pun waam) áde béhyédé mwán ayag, béhéde’áá mó díŋ áde sáá achuu bán Sakaria.

⁶⁰ Dóo nyaá áhóbéé aá, “Aáy! Díŋ débēé mó bán Jone.”

⁶¹ Hée bétimtanné mó bán, “Modmod eésáá áwoŋ túmbé-te awě awóó ádé dín.”

⁶² Né-óó bēnhəgtén Sakaria á mekáá mín áhəd áte ngáne ádáá mwän dín achuu.

⁶³ Hée áhəgténé ne mekáá áá bépiined mó abámbé. Antəl áhed áá, “Dín ádíí mó bán Jone.” Anyín áde bad bényíné nē, menyáké mékōb bó.

⁶⁴ Abwəg-ábwəg, ehób énsälé mó á nsəl, ábootéd-te dyam ahób ámpē, ákəmtē-’ε Dyōb.

⁶⁵ Nén dēnkōbəd bad bésyāäl ábe bēbédé áhed mbwóg, békēené nkalan hōm ásyāäl á myad mé e’kone á alonj á Judeya.

⁶⁶ Mod téé awě anwóg ádén akan, ankoó dó á nlém-tē. Bésēdté bánken, “Ebál é mod éhéé anén mwän ábēε-yēε?” Bésēdté’áá nē áyāle bémbíí nén bán Dyōb áde ne ane mwän.

Ngase echē Sakaria

⁶⁷ Bəəb-əəə, Edəədəŋ eche Esáá émpíí séε mwän, Sakaria. Hée ábóótédé mam ahóbted, ahóbé áá,

⁶⁸ “Mekəŋag mébē ne Səŋgwéé, Dyōb á bad bé Israel.

Békən Dyōb áyāle ahyedé ábē bad anyen ásé, akōdté-’ε bó.

⁶⁹ Akwōgté ngum a mod á abum á ndáb áde awě mbələde Dabidε, móəchoód syānē.

⁷⁰ Se’ bōód ansón bekal bé’dəədəŋ, alóm bó áá bēhób bán,

⁷¹ Mósōŋ syānē á mekáá mé bad bé ekəyí ábe syānē, ne bad ábe békóó syānē.

⁷² Nē dōó Dyōb álúmtéε ngəl eche ánhíí’ é ábəd betaa akag. Né-’áá ákámtné nímé melé,

⁷³ nédē melé níme ámmwēε ne awəd sáá ambáá Abrahame.

⁷⁴ Anhób áá mósmadté syānē asonj á mekáá mé bad bé ekəyí ábe syānē, bonj déhel mó abele ésebán debáá’.

⁷⁵ Deébenlé mó pónéd eched ne nlém níme rísáá ne mbəltéd níme rídé ngáne Dyōb áhədéé, á alonjé ádəd ásyāäl.

⁷⁶ Wε-óó, a-mwän, béchəg wε bán nkal é’dəədəŋ awě Dyōb á Ngum.

Wε-’áá wēsēbē Səŋgwéé á’sō, ábonŋsen mó nzii echē ábwεé áte.

⁷⁷ Wēbēl ábē bad bēbíí nén bán, Dyōb áchóŋt é bó áyāle álágséné bó nímab mbéb.

⁷⁸ Nén dēbenléd áyāle ngəl e Dyōb ne ábē e’bonj bé nlém.

Ene ngəl chó-’áá ékəŋ e’nyínen bé ekíde ábē é’bíde ámín é’piined syānē e’sóosonj.

⁷⁹ Né-óó bad ábe bédé á ehíntén-té, ne á nsəl ní sonj, békūd e’nyínen bé e’kíde. Syānē-’ε deékūd debyéé áde álúmte syānē nzii echē epeεene alonjé dé nsanj.”

⁸⁰ Jone ankwōg, edəədəŋ é Dyōb ébē-’ε mó ngine. Andyé é ehýŋge kóəŋ ne á pónéd eche ábóódtédé eyale é Dyōb akal á ntálé wéε bad bé Israel.

2

Yesuε achyáádté á Betslehem

(Mat 1.18-25)

¹ Mmē mesú-óó Agəstusε, Kaisεε a Roma antóméd mbéndé áá, moosyáál awě áde ásé e nímé nkamlən, áke átelen dín.

² Nén démbē tōŋgé e bad e’só. A pónéd eched Kirinuse mó ambé nló mé alonj á Siria.

³ Mod téé anké awē dyad ábel bonj bétel mó dín ásé.

⁴ Né-ɔ́ Joseb e mómpē anhidé á dyad á Nazaret á Galilia, achágé á Betelhem, dyad áde Kāḥ Dabide á Judeya, áyāle ambíd á mbyaa nīme Dabide.

⁵ Ankē nē ábel bétōḥ bó Maria, ngōndere eche ánkíí'ē. Maria mós-ē ambé nkg.

⁶ A Betelhem wē dós-áá achád ákóbé Maria.

⁷ Anchyáá mwān a mwenchóm awē átúbne abum. Ankaán mós e'ped bé mebad, ánáād-te mós á ebwōg eche bédídté e'lém áte, ngáne etál éebédéé á ndáb e beken.

Angel épíidē benon bé mbód

⁸ Aped eched, benon bé mbód bēnóné'áá échāb echor é' mbód á hōm dé medyē nkuu.

⁹ Angel e Sāngú empií bós táléd, ehúmé é Sāngú élanéd bós. Mbwóg ménkōb bós.

¹⁰ Héé ángel élanḡéé bós áá, "Nyéebáá', mpiínédé nyé kase e nkalan echē éwōgēd bad bésyāāl menyinge bwāmbwam.

¹¹ Nyébíi bán, epun é'chii, Nsoode awēn achyáádté á dyad áde Kāḥ Dabide. Mós adé Ane awē Dyōb Awógté. Mós adé Sāngwéé.

¹² E'chemléd ábe nībageé nyé é'dii bán, nyéētān mwān awe békāḥné e'ped bé mebad ngáne ánanḡé á ebwōg eche bédídté e'lém áte."

¹³ Melemlem mé pónde echor é ángel émbíd eníní ángel á nkag táléd, ékené Dyōb bán,

¹⁴ "Ehúmé ébē ne Dyōb áde adé se ámīn, nsaḡ-ē mībē ne baányon ábe ábágé nsimé á nkōḡsé!"

¹⁵ Ambíd e nē, échē ángel énsū ámīn. Héé benon bé mbód bēlanḡéé nhóg ne aníní bán, "Syáá dékag á Betelhem, déke dényín adé akan áde Dyōb á Ngum álúmté syāné áte áá ábenlédé."

¹⁶ Dós-áá békíí á mehélé-te, boḥ bédíbté Maria bós Joseb ne nkáál ní mwān néé nínánḡé á ebwōg eche bédídté e'lém áte.

¹⁷ Bémáá-áá anyín nē, dós bēbóótédé nkalan akal ngáne ángel énlāā'ē bós tāḡgene ane mwān.

¹⁸ Bad bésyāāl ábe bēnwōg nē, menyáké ménkōb bós.

¹⁹ Maria ankoó nímén mam mésyāāl á nlém-tē, ádolé mós áte.

²⁰ Héé benon bé mbód bétímé ámbíd, békēmté Dyōb, békēné-ē mós áyāle mam mésyāāl nīme bēwógé, boḥ bényínén-ne díd nēḡgáne bēnlāā'ē bós.

²¹ Ambíd e e'pun waam, mbwē nīme bēyagéé mwān, bēnchuú mós dīn bán Yesue. Adé dīn dós ángel émmadté mós achag boḥ nyaá ábē dyēm.

Bépééné Yesue á Ndad-e-Dyōb

²² Bōob-pōó, mbéndé e Mosee ehedáá bán, ámbíd e echyáa bébe mende áwobe nyé mwān bós sée mwān. Ade bémádé nē, Maria bós Joseb bēnkēén mwān á Jerusalem álúmed mós á'sō é' Sāngú.

²³ Bēnkē nē nchoḥ ne ngáne étenlédé á mbéndé e Sāngú bán, Mwān a mwenchóm téé awē bétúbne abum, bébe mós á mekáá mé Dyōb.

²⁴ Bēnkē nē káḡḡne ábe mende ne álonéd mbéndé e Sāngú echē ehóbé bán mod ábe bé éllāá bébe káa mbḡgé ésad ébe.

²⁵ A Jerusalem wē, mod ambé bán Simione. Ane mod anwōḡ abé áde atónḡéné á'sō é' Dyōb, ákongé-ē mbéndé é Dyōb. Edáádḡ echē Esáá émbē ne mós. Asiné'áá pónde echē Dyōb désonḡé alongé á bad bé Israel.

²⁶ Edáádḡ echē Esáá émmád-te mós álúmed nén áá, éewáá ésebán ányíné Ane awē Sāngwéé Awógté.

27 Edəəðəŋ éche Esáá émbəl Simione anké á Ndáb-e-Dyöb. Dóo Maria ne Joseb bəpééne awab mwän Yesue áhed, ngáne mbéndé éhéde'áá.

28 Simione ankobən bó mwän, abwáá mó, boŋ ákemtə Dyöb nən aá,

29 “A-Sánjú, ngáne élonťé áđöŋ akag, téd-tə me, níkag ne nsanj.

30-31 Ayále míd níməm nínyíne awöŋ mod a e'soosöŋ awe éböhśéné wée moosyaäl ányín.

32 Abə e'nyínen bé ekíde ábe bəbəl bad ábe béesə bad bé Israel ábíi we, ápééne ne edúbé wée áböhŋ bad bé Israel.”

33 Josebe ne Maria bémbə menyáké áwóg mam níme bəhóbé tənġene awab mwän.

34 Hée Simione ánámťé bó, boŋ álánġə Maria aá, “Nənə, anén mwän awə nyényíneé nən, Dyöb dóo álómé mó. Abəl bad behóg békud ebébtéd, ábíní-'e békud e'soosöŋ á aloŋ á Israel. Abə nənġáne e'chemléd é' Dyöb, boŋ ekud é bad éťí mó ámín, bétənġan mó.

35 A pónđe eched mod tée níme mbeltéd mən mébíđəd níme mewəmten áwed. Hée ndutul ésoŋġe we á nłem née nkwáté.”

36-37 Nkal é'ðəəðəŋ a mmwaád nhóg abéde, dín démbə mó bán Anaa, mwän awe Panuele awə abíde á túmbé e Asee. Anaa anchün bwámbwam. Bó nchóm béndyee mwə saámbe á e'wónġé, boŋ ályāġə mó akúid káŋŋ ne á móom mé mwə waam ne mwə níniin. Eesyāŋġe'aá á Ndáb-e-Dyöb. Akánné'aá nkuu ne mŵte, ádíde-'e yäl nzaa á mekáne-té.

38 Ade Maria bó Joseb bəpééne Yesue á Ndáb-e-Dyöb pəenən, Anaa ambé áhed. Hée ábóótédé Dyöb aken, ákanlé-'e bad nkalan tənġene ane mwän. Abə bad bəbédé bad ábe bésíné'aá pónđe eche Dyöb déwəbée dyad á Jerusalem. Anláá bó nyaa e mod eché ane mwän ábə.

Josebe bó Maria bétimné

mwän ámbíd á Nazaret

39 Ade Maria bó Joseb bémádné mam mésyāäl ngáne mbéndé e Sánjú éhéde'áá, bəntím áwáb dyad á Nazaret á aloŋ á Galilia.

40 Ene pónđe mwän mó-'e ákwogé, áwūē' áte, debyéé ákwogé mó, nsimé ní Dyöb mó-'e níhíde mó.

Yesue akil á Ndáb-e-Dyöb

41 Bəəb-pəə, émbə bán, mwə tée Yesue sáá bó nyan békáġé'aá á Jerusalem áyale Ngande e Nnyíme-ámín.

42 Ade Yesue ápedé dyöm á mwə ne níbe, bóbəə bənké á ngande ngáne émmənténne abé.

43 Ngande emaa-'aá boŋ nyaá bó sán bəsūē' á dyad. Yesue anlyəġ ámbíd á Jerusalem ésebán bəbíí.

44 Mewəmten mémbə bó nən bán, adé á ehoŋ éche ésúé'aá. Boŋ áde békékeé bootya mbwəmbwe káŋŋ ne ngukél, dóo bəbóótédé mó áhed, bəsədté mó wée bad bé túmbé ne bad ábe bóbəə bəbyééne.

45 Anyín áde béenyíneé mó, bəntím ámbíd á Jerusalem áhed mó áwed.

46 Alóntən e'pun é'láán dóo bétímé mó adibed á Ndáb-e-Dyöb. Andyéé áťinté e bemeléede, áwöġlān bó, ásedťé-'e bó mam.

47 Mod tée awə anwóg mam níme Yesue áhóbé'aá, ambé menyáké áyale nsöŋten níme ánwöŋġə ne nyaa eché ákwəntánnáá bó.

48 Ade nyaá bó sán bényíneé mó, yäl enkóm bó áte. Dóo nyaá ásedťéé mó aá, “A-mwän, chán-nə ébéle sé nən? Sé sönj sékómé we áhed, sétage-'e áte.”

49 Boŋ Yesue ankwentén bó aá, “Cheé ékáá boŋ nyéhede me? Nyénkəmbíí'é bán, ntənġéné abé á ndáb eché echem Sán-ε?”

⁵⁰ Bénkênhenlé dyam áde áhóbé asòŋten.

⁵¹ Ambíd e nê, dóo Yesue áhídé nyaá bó sán, boŋ bóbōó bésūē' á Nazaret. Enkênwúénné bó nló áte. Nyaá-é ankoó nímén mekan mésyāā́l á nlém-té.

⁵² Ngáne Yesue ákwógé'áá, debyéé dǎmpē ákwógé'áá mó. Nsimé ní Dyób ne ní baányonj ríhídē mó.

3

Jōne, Ndusenē aboŋsan nzii
(Mat 3.1-12; Mak 1.1-8; Jōn 1.19-28)

¹⁻² A pǎndé echē nkamlēne Tiberiose, ákēbēē Kaisēē a Roma áyāle dyóm á mwē ne rítáan, Dyób dénlóm Jōne mwān awe Sakaria ne nlébtéd á ehýáŋge wēe ábédé. Ene pǎndé-é dóo Pontus Payledē mó-é ábédé Nkamlēne á Judeya, Hērōde ákamlán alonj á Galilia, mwānyanj Filibe-é ákamlán alonj á Ituria ne alonj á Trakoniti. Boŋ Lisania mó-é akamlánáá alonj á Abilēne. Mmē mesú mēn-naá Anase bó Kaifase bébédé beprise bémháámháa.

³ Jōne abwágé'áá mebwóg mésyāā́l níme meláŋnedé edíb é Jodan. Akag ákalé eyale é Dyób nēn aá, "Nyétede abel dé mbéb, nyékud edusen ábel boŋ Dyób álagšen nyé mbéb."

⁴ Nén dénlōnéd chǎm-éé éténléde á kálag echē nkal é'dǎóǎŋ Yesayaa bán, "Ehánjé ébídé á ehýáŋge bán, nyéboŋšen epe éche Sánjwéé. Nyétii echē nzii.

⁵ Nyélóned nhog té. Nyésuded mbǎod ne ekone té. Nyétii mebwóg níme méhyómé. Nyétaled mebwóg níme médé pwǎgléd pwǎgled.

⁶ Abel boŋ moonyonj asyāā́l ányín ngáne Dyób ásoo'é alongé á bad."

⁷ Ndun e mod empwé wēe Jōne béhéde bán, ádusen bó. Mó-é ásedté bó aaken, "Píí é nyǎ chén! Nzéé múmó aláŋgé nyé aá nkáásé ní Dyób ríhúé' boŋ aléb-pe nyé aá nyékúme abánjé?"

⁸ Nyéchyáa e'pum ábe é'lúmte bán nyétédte abel dé mbéb, tómaa áhób áwen nlém-té bán, 'nyéde bán ábe Abrahame, nyéekudte nkógsen ní Dyób.' Boŋ ríláa nyé nēn mēé, Dyób áhele ábenléd nímén meláá áfíméd mó bán ábe Abrahame.

⁹ Bǎob-pǎó, ehón emáá anaa á nkanj ní mel. Né-pǎó, bwel ké é'héé ábe béechyāā́ e'pum é' bwám, békwele bó, bébwém-me bó á muú-te."

¹⁰ Hé dóo, bad bésédteé mó bánken, "Chán-nǎ sébenlé bǎob?"

¹¹ Jōne antimtén bó aá, "Mod awé awóó mbóté ébe, ábe pǎg wēe ane awé eewóo chǎmchǎm. Ane awé mó-é awóó ndyééd, ákabe bad ábe béewóo."

¹² Belad bé tááse ábe bǎmpē bēnhýē edusen akud bēnsédéd mó bán, "A-meléed, cheé sébenlé?"

¹³ Antimtén bó aá, "Nyéesanjé tááse tómaa ngáne bétífidé."

¹⁴ Nguse é sánze chǎ-é énsédéd mó bánken, "Chán-náa sé, sébel chán?" Jōne ankwentén aá, "Nyéekobné bad mǎné. Nyéebáné-é bad mekan áyāl ngēn, boŋ nyébē menyinje ne chǎm-éé nyékudéé nēé nsábe."

¹⁵ Bǎob-pǎó, bad ábe bébédé áhed, nímab mewémten mēmbootéd acháge ne e'lyág bé nlém, békǎglád á nlém-té nzé édé bán Jōne mó adé Ane-awé-Béwógté.

¹⁶ Héé Jōne átimtanné bó moosyāā́l aá, "Ndusan nyé bǎob ne mendíb, boŋ mod ahúé' awé atómé me. Meékwognedéé áhune ké nímē nkǎod mé metámbe. Adusén nyé ne Edǎóǎŋ éche Esáá, ádusén-ne nyé ne muú.

¹⁷ Awánlé échē epeben á ekáá, ábel nén, ápeb níme menyán ámín. Nzé amadé, álad mbum é bwám áte, ákōō chó. Bonj álad e'páá, ahyáád b́ó á ebonde é muú éche éédímē.”

¹⁸ Né-óó Jone alébé'áá bad ne ekud é ṕóle émpēe, ákanlé-'é b́ó nkalanj ní bwám.

¹⁹ Jone anhób ḱóáñne ẃeé nkamlenε Herode aá, abelé mbé́b ngáne áwóó Herodyase, mwaád awé mwányan, nchoo ne e'hébtéd b́e mekan bémpēe ábe ámbenlé.

²⁰ Abád-te áyále nímmé mbé́b ńsyáál Herode anhé Jone á mbwóg.

Bédúséné Yesuε

(Mat 3.13-17; Mak 1.9-11)

²¹ B́óob-ṕóó, áde Jone ámáá ekud é bad adusen, Yesuε mó ámpē ampē aá ádusen mó. Ade ámáá mó adusen, ábwóg-ábwóg ankané. Ade ákánneé nē d́óo ngob e dyób énédnédé.

²² Hé-'áá Edáádəñ éche Esáá ébídé ngáne éláá, bonj ésudé mó á nló mín. Ehób chómpē émbíd ádyób nén, “Edíi awem mwán a nlém awé nídáá bwámbwam. Ndé menyinge ne we.”

Abum á ndáb áde Yesuε

(Mat 1.1-17)

²³ Yesuε ambé dyam móom mé mwé méláán bonj ábootád níme nsón. Bad bényíné'áá mó nεε mwán awé Josebe. Josebe ambé mwán awe Eliε. Eliε ambé

²⁴ mwán awe Matate. Matate ambé mwán awe Leviε. Leviε abédé mwán awe Melekyε. Melekyε ambé mwán awe Janne. Janne ambé mwán awe Josebe.

²⁵ Josebe abédé mwán awe Matatya. Matatya ambé mwán awe Amóεε. Amóεε abédé mwán awe Nahumε. Nahumε ambé mwán awe Esilyε. Esilyε ambé mwán awe Nagaya.

²⁶ Nagaya abédé mwán awe Maate. Maate ambé mwán awe Matatya. Matatya ambé mwán awe Simεne. Simεne ambé mwán awe Joseke. Joseke ambé mwán awe Jodaa.

²⁷ Jodaa abédé mwán awe Joanane. Joanane ambé mwán awe Resa. Resa ambé mwán awe Serubabele. Serubabele ambé mwán awe Salatyε. Salatyε ambé mwán awe Nerie.

²⁸ Nerie ambé mwán awe Melki. Melki ambé mwán awe Adie. Adie ambé mwán awe Kosame. Kosame ambé mwán awe Elamadame. Elamadame ambé mwán awe Ere.

²⁹ Ere ambé mwán awe Josua. Josua ambé mwán awe Elesaa. Elesaa ambé mwán awe Jorime. Jorime ambé mwán awe Matate. Matate ambé mwán awe Leviε.

³⁰ Leviε ambé mwán awe Simione. Simione ambé mwán awe Judaa. Judaa ambé mwán awe Josebe. Josebe ambé mwán awe Joname. Joname ambé mwán awe Elyakime.

³¹ Elyakime ambé mwán awe Meleya. Meleya ambé mwán awe Mena. Mena ambé mwán awe Matate. Matate ambé mwán awe Natane. Natane ambé mwán awe Dabide. Dabide

³² mwán awe Jese. Jese mwán awe Obede. Obede ambé mwán awe Boase. Boase ambé mwán awe Salmonε. Salmonε ambé mwán awe Nasonε. Nasonε

³³ ambé mwán awe Aminadabe. Aminadabe ambé mwán awe Ademine. Ademine ambé mwán awe Arenie. Arenie ambé mwán awe Heserone. Heserone ambé mwán awe Perese. Perese ambé mwán awe Judaa.

³⁴ Judaa ambé mwán awe Jakobe. Jakobe ambé mwán awe Aisige. Aisige ambé mwán awe Abrahamε. Abrahamε ambé mwán awe Tera. Tera ambé mwán awe Nahó. Nahó

³⁵ ambé mwän awe Seruge. Seruge ambé mwän awe Rewee. Rewee ambé mwän awe Pelege. Pelege ambé mwän awe Ebee. Ebee ambé mwän awe Sela. Sela

³⁶ ambé mwän awe Kanané. Kanané ambé mwän awe Apasade. Apasade ambé mwän awe Semé. Semé ambé mwän awe Noa. Noa ambé mwän awe Lameke.

³⁷ Lameke ambé mwän awe Metusela. Metusela ambé mwän awe Henoke. Henoke ambé mwän awe Jaredé. Jaredé ambé mwän awe Mehalele. Mehalele ambé mwän awe Kenané. Kenané

³⁸ ambé mwän awe Enose. Enose ambé mwän awe Seta. Seta abédé mwän awe Adame. Adame-ε abédé mwän a Dyöb.

4

Satané akägé Yesue (Mat 4.1-11; Mak 1.12-13)

¹ Bööb-pöö, áde Yesue abidé á edib é Jodan, anlón ne Edädəŋ éche Esáá. Entimén mós á ehyánge.

² Andyé áwed móom mé e'pun méniin, Devəle ákägé mós. Mmé mesú mésyā́l enkə́ndyáá chómchóm. Ambid e né-ó nzaa ewagáá mós.

³ Dóo Devəle álángeé mós áá, “Nzé we-éé edé Mwän a Dyöb, kamlén ádén aláá weé, átim ewele.”

⁴ Yesue antimtén mós áá, “Eténlédé á kálag e Dyöb nén bán, ‘Saké ndyééd chə́mpə́n edide moonyoŋ á alonjé.’ ”

⁵ Héé Devəle ákééné mós á ekone mín, álúmté mós melonj mé nköŋsé mésyā́l áyā́le mwá esónj é pónde.

⁶ Dóo álángeé mós áá, “Nóné’, bébágé me nkamlən ámín e ábén bwəm é’syā́l. Nwóó-ε kunze ábe mod ké ahéé awe rídás abe. Měbš we mós.

⁷ Né-óó nzé ebagé me edúbé, né wée ewóó ábén bwəm é’syā́l.”

⁸ Yesue antimtén mós áá “Eténlédé nén bán, ‘Ebwógke’ Sánjwéé ádonj Dyöb meböbónj, ébage-ε mós edúbé. Mwə́npə́n-naá étánjéné abele.’ ”

⁹ Héé Satane ákééné Yesue á Jerusalem. Atyēemān mós á nzoŋge e Ndáb-e Dyöb mín, boŋ álángeé mós áá, “Nzé we-éé edé mwän a Dyöb, éheb á bwəle-mín hén, éhún á ndöb.

¹⁰ Eténlédé á kálag e Dyöb nén bán, ‘Dyöb dékamlén éche ángel ásbáb we,’

¹¹ ‘épəm-me we ámín, ábel nén weébōmē ekuu á aláá.’ ”

¹² Yesue-ε antimtén mós áá, “Kálag e Dyöb ehóbe nén áá, ‘Weékāgē Sánjwéé, ádonj Dyöb áte.’ ”

¹³ Devəle amaá-’áá mós akäg áte menzii mésyā́l, boŋ áhidte’, áhāg mós mwá etál.

Yesue aboótédé nsón á Galilia (Mat 4.12-17; Mak 1.14-15)

¹⁴ Yesue antim ámbid á Galilia. Edädəŋ éche Esáá émbē ne mós, đín dós-ε ákanlád mós mbwóg áte ésyā́l.

¹⁵ Ayógté’áá bad áwab ndáb é mekáne, moosyā́l ákə́mté mós.

Bad bé Nazaret béekobéé Yesue (Mat 13.53-58; Mak 6.1-6)

¹⁶ Ade ápedé á Nazaret wée ákwógé, ansól á ndáb e mekáne á Mbwe-mé- nkóme-áte, ngáne ámmə́nténné abel. Dóo átyéémé ámín, álán eped.

17 Bém̄bē mós nhibe ní kálag é metelag níme nkal é'dáádəŋ Yesayaa. Anhuné chós áte, ákūnē eped éche éhōbe nén bán,

18 "Edáádəŋ éche Səŋgwéé édé ne me,

áyəle Dyōb ápwédé me aá, níbel ehəŋgé é nkaləŋ ní bwām wée betóótōkē bé bad.

Alómne me ehəŋgé aá, bad ábe bédé á mehangé, béhide á mehangé,

aá, bad ábe békwdé ndím, bényínən

aá, bad ábē békude metuné á mekáá mé baáb, nhúd bós á metuné-te

19 aá níbel-le ehəŋgé nén meé pónde epedé echē Dyōb álúmtéé bad ngol."

20 Amaá-aá aləŋ, ádíb kálag áte, ábag chós ámbíd wée mod awē anəne ndáb e mekáne. Ankē ádyēé áse, míd mésyáál ménəne mós.

21 Dós áləŋgéé bós aá, "Echén eped éche nyéwógé, éloné epun é'chii."

22 Moosyáál ankéméd mós, menyáké mékób bós áyəle kəse e pəle echē ebídáá mós á nsəl, bésədté' bánken, "Kíné saá mwān awē Josebe mós nén-ε?"

23 Yesue ambád bós aláa aá, "Mbíi meé, nyéekalé me ngan bán, 'A mod a bwel, choód yəl.' Nyéelāā-ε me bán, mekan níme nyéwógé bán mbelé á dyad á Kapenahum bán, níbel-láa mós áwəm dyad-té hén."

24 "Nláa nyé nén meé, nkal é'dáádəŋ eewóó'ε edubé áwē dyad.

25 Nyébii-ós nén bán, á pónde eche Elaijaa, mbúú eechódéé áyəle mwē níláan ne eped. Nē dēmbəl sánkalaa a nzaa ambé alon áte ásyáál. Bekúd híin bém̄bē á mbwóg e Israel hén ene pónde.

26 Boŋ Dyōb dénknlómme Elaijaa áwāb. Anlóm mós dásō á alon á Sidən á dyad á Sarefa wée nkúd a mmwaád ampé.

27 A pónde echē nkal é'dáádəŋ Elisha ámpē ndun e mod e meləŋ embé á Israel. Boŋ Elisha enkənsáadté mod a meləŋ ké nhóg awē ambíd á alon á Israel. Namane, mod awē ambíd á alon á Siria mós ánsáadtē."

28 Ade bad ábe bém̄bē á ndáb e mekáne bəwógé-ε nē, ekan énkōb bós áte.

29 Héé bépádté áse, béhé mós abum ámín, békēən mós á asóg á dyad. Ngáne bēnlōŋgé á ekone mín, bēntímén mós á mbám mé ekone ábel bētined mós á ekone sé.

30 Boŋ ansam bós áfínté, ákē-ε mós.

Mod awē edáádəŋ é mbéb émbēé áte (Mak 1.21-28)

31 Yesue ansyógé á dyad á Kapenahum á mbwóg e Galilia, ábootéd ayáged á mbwe-mé-nkōme-áte.

32 Nyaa eche áyágté'áá enkóméd bad yəl áte bwāmbwam áyəle ábē e'yale bém̄bē ngíne.

33 A ndáb e mekáne wée áyágté'áá, mod ambé awē edáádəŋ é mbéb ékamlánáá. Héé ábóótédé abón aá,

34 "Bób! A-Yesu, mod a Nazaret, cheé syáné déwōŋné? Ehyedé sé awúu-ye? Mbíi we bwām. Edíi mod awē Dyōb álómé, awē asáá."

35 Dós Yesue ákánne echē edáádəŋ é mbéb áte aá, "Lám, bíd ane mod áte!" Héé ébómé ane mod áse áfínté bad, boŋ ébídé mós á yəl, ésebán élógné mós.

36 Menyáké ménkōb moosyáál, bésədté nhóg ne aníníi bánken, "Nyaa e nhóbtéd ehéé nén-ε? Chán mod ákamlánne é'dáádəŋ bé mbéb ne kúmbe esyáál, é'wōgnē-ε mós?"

37 Dín dénke mós mbwóg áte esyáál áyəle mekan níme ábélé'áá.

Yesue achōŋté ekud é bad (Mat 8.14-17; Mak 1.29-34)

³⁸ Ade Yesue áhídté á ndáb e mekáne, anké á ndáb wée Simone. Antán née Simone mwaád nyaá ákonléé, ahéb ámbáá dënsog mó. Bënc̄h̄an̄ Yesue bán, ádid mó bwám.

³⁹ Dóo Yesue ásidté mó á nkæg, awúlén ásē, aláá ahéb áded aá, átede mó. Abwōg-ábwōg ahéb dëmmaá mó á yāl, ásyāā ásē, ákōb-pē bó nken.

⁴⁰ Bōōb-pōó, áde enyēn ébóótédé asud, bad bésyāā́ ábe bēnwōh̄ bad bé nkole ábe békónlé'áá nkole nyaa ne nyaa bēmpēén bó áwē. Ambán nhóg téé ekáá amín, ádidé bó bwám.

⁴¹ E'daád̄an̄ bé mbéb bōmpē é'bidé ekud é bad á yāl, é'bōnē' bán, "Edii mwán a Dyōb!" Ankáné bó áte, eémwage'aá-é aá bēhōb akan, áyāle bēmbíi bán, adii Ane awē Dyōb Awógté.

*Yesue akalé nkalan̄ ní bwám
á ndáb é mekáne é bad bé Israel
(Mak 1.35-39)*

⁴² Mbwe mbwe pírib, Yesue ansyāó á dyad-té, áké á ahángé á hōm. Bad bēmbóóté mó ahéd. Ade bédíbté mó, bēnkēnháá mó étál áke hōm.

⁴³ Dóo álāngēé bó aá, "Ntāngéne áke á myad mémpēe, ábel nēn ríláa bōmpē nkalan̄ ní bwám tāngene nkamlen ní Dyōb. Mmēn nkalan̄ móó níkáá bon̄ Dyōb álómē me."

⁴⁴ Né-ōó akalé'áá nkalan̄ ní bwám á ndáb é mekáne é mbwóg é Judeya.

5

*Yesue apwēdé bembapee
(Mat 4.18-22; Mak 1.16-20)*

¹ Mbwe nhóg Yesue antyéém á nkin mé edib é Genesaret. Bad bēnlənhéd mó áwóg eyale é Dyōb.

² Héé ányíné bétāngé myōle mébe á nkin. Bekōb-bé-súu bēnkēmbáá áwēd-te. Bēwópé'áá échab mbínzé.

³ Dóo ásólé á bōle ábe Simone, aláá mó aá, ásyānhed mó á nkin. Adyēé-'aá á bōle-té, bon̄ ábootéd bad ayáged.

⁴ Ade ámadé nē, anláá Simone aá, "Kēén bōle wée ndib édíi, bon̄ nyébwēm mbínzé."

⁵ Simone antimtén mó aá, "A-Sán̄, sēkébwēm mbínzé nkuu rísyāā́, séēkōbēē chōmchōm! Bon̄ mēbēl ngáne éhōbé."

⁶ Dóo bēbwémé mbínzé. Bēnkōb ndun e súu káōh̄ mbínzé éhape'.

⁷ Bēnlēbē baáb ábe bēbédé á bōle ábíníi bán béhye bēwōh̄gen bó. Ade baáb bēpédé, myōle mésyāā́ mébe ménlōn ne súu káōh̄ mébootéd asú ásē.

⁸ Ade Simone Petro ányíné nē, ankwē Yesue á mekuu, áhōbē aá, "A Sāngú, sōn! Syāó wée rídíi áyāle ndii mbelē-mbéb."

⁹ Simone anhōb nē áyāle émbē bóōbe baáb menyáké bwāmbwam ányín ndun e súu eche békóbé.

¹⁰ Menyáké ménkōb káōh̄ne Jemse bó Jōn, bán ábe Zēbedie, ábe bēmbē á echoh̄ é akōb á súu. Héé Yesue álāngēé Simone aá, "Weebáá'. Bootya chii nyéētédé bad nlém á abum áhíd me." ¹¹ Ade bēpēéné nímbab myōle á nkin, bēntédé chōm ésyāā́ áhed, bēbootéd-te Yesue áhíd.

*Yesue achōhté mod awē meləh̄ mékóbé
(Mat 8.1-4; Mak 1.40-45)*

¹² Mbwe nhóg Yesue abédé dyad ahóg. Mod awē meləh̄ mékóbé yāl esyāā́ ampē áwē. Anyin áde ányíné Yesue, ankwē mó á mekuu, ácháá mó aá, "A-Sán̄, nzé edáó ehele ébēl me nsán̄."

13 Dóo Yesue ábidtē ekáá, ábānē mós á yǎl bonj álāngē mós áá, “Ndáá, sáñ!” Abwōg-ábwōg nímē meləñ mēmmaá ane mod á yǎl.

14 Yesue anláá mós áá, eelāngé modmod, aláá-’ε mós áá, “Kǎg éluṁed yǎl wée prise, ásimen wε. Ebag-ke mendε ngáne mbéndé e Moseε éhedεé álúmed bad wée móssā.”

15 Ké nēngáne Yesue ánkāngē mós áá eelāngé mod, đin dēmbē ákag mós mbwóg áte esyáál áyāle nímē mbéltéd. Nē dēmbēl ndun e mod éladné mós á nkag, áwóg chóm éche áhóbéé, ne ábel ádid bós bwám.

16 Bonj nzé pónđé empě mós, ayǒgké’áá atim á ahāngé, ákáne.

Yesue achōnté mod awé awédé eped

(Mat 9.1-8; Mak 2.1-12)

17 Mbwe nhóg ámpē Yesue ayǒgté’áá bad. Befarisia ne bemeléede bé mbéndé bémbē áhed. Bémbid dyad ne dyad tée á mbwóg é Galilia ne Judeya, káñne á Jerusalem. Ngum e Dyōb empíi mós, ádid bad bé nkole bwám.

18 Dó-’áá bad behóg bépεεneé mod á mekále mín awé awédé eped. Béhéde’áá nzii eché bésōnléé mós á ndáb-te, ánaad mós á’sō-te wée Yesue.

19 Bénkēnkudté etál áyāle ndun e mod enlón áhed. Dóo béchógké á ndáb mín. Dóo bēnédté nnəñ, bésudéd ane mod bósbe mekále á etále-té á’sō-te wée Yesue.

20 Ade Yesue ányiné adúbe áđé ábe bad béwóó áte anláá ane mod awé awédé eped áá, “Amúē, nłagséné wε mbéb.”

21 Dóo bemeléede bé mbéndé ne Befarisia bébóótédé anyoo áte bánken, “Ebal é mod éhéé esyáá Dyōb nēn? Nzéé ahele se áłagsén mbéb ésebán Dyōb dēmpen?”

22 Yesue anchem bós mewēmten áte. Héε ásedtεé bós ááken, “Cheé ékás bonj nyéwōō’ enén ndin e mewēmten?”

23 Ahéé adé dyam ásad, áhób wée, ‘Nłagséné wε mbéb,’ káa áhób wée, ‘Syáá ášé, ébooted áke?’

24 Bonj mēlúmed nyé meé, Mwān-a-Moonyon awóó kunze áłagsen mbéb á nkōñsé.” Héε álāngεε ane mod awé awédé eped áá, “Nłāngε wε nēn meé, syáá ášé, étéd nímōñ mekále, ésúe’ á ndáb.”

25 Abwōg-ábwōg ane mod anhidé ášé átinté e bad, atéd nímē mekále, ásūē-’ε mós á ndáb, ákag ákēmté Dyōb.

26 Menyáké ménkōb moosyáál awé ambé áhed. Héε bébóótédé Dyōb aken ne mbwóg áte bán, “Sényiné akan dé menyáké chii nēn.”

Yesue achénlé Levi

(Mat 9.9-13; Mak 2.13-17)

27 Ambid e nē Yesue ansyáá áhed. Ade ákagké nē, annyin nsaad-a-tááε nhóg bán Leviε. Leviε andyéé ášé á ndáb eché ákóbáá tááε áte. Héε Yesue álāngεé mós nēn áá, “Hidé me.”

28 Dóo Leviε átyéémé ámin, áchēnē chóm esyáál áhīdē-’ε mós.

29 Bōōb-pōó, Leviε anchǎg sǎñkalaa a ngande áwe ndáb á đin áde Yesue. Besaad bé tááε híin ne bad bémpēe bémbē áhed.

30 Héε Befarisia ne ábāb bemeléede bé mbéndé bényonğéé áte wée Yesue ábē bambapεε, bésđtē bós bánken, “Cheé ékás bonj nyáábe besaad bé tááε ne bebel bé mbéb bémpēe nyédyāg ndyééd, nyé mwāg-ke mīm hóm ahóg?”

31 Yesue antimtén bós ne ngan áá, “Bad ábe bédyéé bwám béetógnεneé mod-a-bwel. Bad ábe békōnle’ bós bétógnéné mod a bwel.

32 Nyébii nēn bán, meépεdeé áchéle bad ábe békóbnédé á’sō é’ Dyōb, bonj mpedé áchéle bebel bé mbéb meé bésóg mbéb ábel.”

*Nsedtéd tãngene**adid á yãl nzaa á mekáne-té**(Mat 9.14-17; Mak 2.18-22)*

³³ Befarisia bémbād ahób bán, “Bembapεε ábe Jonε béménténé yãl nzaa adid á mekáne-té. Melemlem né-’áá Befarisia ábāb bembapεε bómpē bébeleé. Cheé ékás bonj ábōj bédyág ndyééd, bémwāg-ke mīm?”

³⁴ Yesuε ankwentén bó ne ngan aá, “Chán bad ábe bélébpē á ngande e e’wóngé béhele bédidé yãl nzaa á mekáne-té áde mod awé akude sómbé ádií adé ne bó?”

³⁵ Bonj epun épē éche békobénné bó mod awé akude sómbé. Echē epun dáo bédidté yãl nzaa á mekáne-té.”

³⁶ Yesuε anláá bó ngan aá, nzé mod ahóbe aá, mónabpe’ mbóté, eeséléé eped é abad ayāle mbóté ekósólé bonj ánabnáád mbóté e nchun. Nzé abelé nē, né asalé mbóté ekósólé. Ké eped ekōsólé-’ε étētāngánné ne mbóté e nchun.

³⁷ Melemlem nēngáne mod étētēē mīm mékōsólé se ahé mó á nchun mé ntyág, se ápen. Ayāle nzé abelé nē, né mīm méhōd kásj ntyág rýyééd, mīm mémād asýoge, ntyág-ke ámpē níbéb.

³⁸ Bétāngéné béhé mīm mékōsólé á apom dékōsólé.

³⁹ Bad ábe bó-’ε bémwāg mīm, béemaá’é mīm mé nchun amwé se béhéde mékōsólé. Bébele béhób bán, “Sáá mé nchun móó mébóó-ye?”

6*Nsedtéd tãngene abel dé nsón**á mbwε-mé-nkóme-áte**(Mat 12.1-8; Mak 2.23-28)*

¹ Mbwε nhóg Yesuε ne ábē bembapεε bétómé’áá á nzag e ngun-té. Nén démbē á mbwε-mé-nkóme-áte. Abē bembapεε bémbootéd e sóg é ngun apád, bépāgke’, bédyág.

² Nguse é Befarisia bényíné-’áá nē, bonj bésedté bó bánken, “Cheé ékás bonj nyébelé akan áde mbéndé éebageé kunze ábel á mbwε-mé-nkóme-áte?”

³ Héε Yesuε mó-’ε ásedtēé bó aáken, “Nédé nyéeláá’ é á kálag e Dyōb dyam áde kán Dabidε ámbenlé áde nzaa ékóbé mó ne ábē bad-ε?”

⁴ Ansól á Ndáb-e-Dyōb mó ne bad ábe bēnwoón mó, atéd e’wεle ábe é’bédé nde e Dyōb, adyé. Bonj eched mbéndé éebageé mod ké nhóg kunze ádyε ábē e’wεle étóméé prise. Mwēn andyé, ábē-’ε kásjne bad ábe bēnwoón mó donge.”

⁵ Yesuε ambádé bó áte aá, “Mwān-a-Moonyonj awóó nkamlēn kásjne ámīn e mbwε-mé-nkóme-áte.”

*Yesuε achōjté mod awé ekáá éwédé**(Mat 12.9-14; Mak 3.1-6)*

⁶ Epun émpēε Yesuε anké á ndáb e mekáne. Ambootéd bad ayáged. Nén ámpē démbē á mbwε-mé-nkóme-áte. Mod nhóg-ke ambé áhed awé ekáá émbáá éwédé.

⁷ Bemeléede bé mbéndé ne Befarisia bēnóné’áá mó chodchod, ányín nzé ádií ane mod bwām á mbwε-mé-nkóme-áte, ábel nēn békóben mó awusé.

⁸ Yesuε mó-’ε anchēm bó mewēmtēn áte. Héε Yesuε álāngεé ane mod aá, “Hyé étyéem áfinté hén.” Ane mod anwógén mó.

⁹ Dáo Yesuε ásedtēé bad aá, “Nyéláa me ké édé mbéndé ábel mbonj á mbwε-mé-nkóme-áte, káa ábel mbéb. Edé mbéndé ásonj alongé á mod, káa áwúu mó?”

¹⁰ Ahóbe nē, anone-’ε bad á mesó. Dáo álāngεé ane mod aá, “Sálé ekáá áte.” Asále áde ane mod ásánlé ekáá áte, ekáá éndyéé mó bwām ámpē.

11 Nén dénkōbēd Befarisia ne bemeléede bé mbéndé ekan̄ áte, béhægkē mó ápid mó mekáá.

*Yesuε apwεdé bembapεε bé
nlomag dyóm ne bébe
(Mat 10.1-4; Mak 3.13-19)*

12 Ambíd e pónde Yesuε ankē á ekone mín ákáne. Ankáné nkuu rísyāāl káon̄ ne mbwembwε.

13 Bon̄ áde b̄in é'kénlé, anchélé ábē bembapεε, ápwedé dyóm ne bébe áwab f̄inté, áchagé b̄ó aá, bembapεε bé n̄lomag. Abē bembapεε bé n̄lomag bébédeε,

14 Simōne awe ámbagkē d̄in aá, Petro, b̄ó mwānyan̄ Andreyā, Simōne, Jakōbe, Jōne, Filibe, Batolomyo,

15 Matyo, Tōmase, Jemse mwān awē Alfōse, Simōne mod a kán,

16 Judase, mwān awē Jemse ne Judas Iskariode awē ant̄im Yesuε asóm.

*Yesuε ayágté, achōnté-'ε ndun e mod
(Mat 4.23-25)*

17 D̄ó b̄óbe bembapεε bésyógkē á ekone sé, bēpag á h̄óm áde átánlé. Béntān bembapεε bēmpēe h̄iin ne ndun e mod áhed. Ene ndun e mod embíd á mbwóg e Judeya-té esyāál, á Jerusalem, k̄on̄ne á myad mé Tiré ne Sidon á nkin mé ed̄ib é nkwe.

18 Bēmpē nē áwóg Yesuε eche póle, ne ábel n̄én ádid bad ábe bēkonle bwām. Adidé'áá bad ábe ed̄áðan̄ bé mbéb é'tágté'áá b̄ómpē bwām.

19 Mod téé ahedáá aá m̄ó nsid̄tén mó ngáne émbēē bán, nḡine ebíde'áá mó á yāl eché edidé'áá bad bwām.

*Mekan mé nnam ne mé medim
(Mat 5.1-12)*

20 Héε ábóótédé ábē bembapεε akalēn aá,

“Nnam n̄ibē ne nyé betóótókē bé bad áyāle nyédé ásē e nkamlēn ní Dyōb.

21 Nnam n̄ibē ne nyé ábe nyédé nzaa b̄óob, áyāle Dyōb dékōdēd nyé.

Nnam n̄ibē ne nyé ábe nyélebe b̄óob áyāle nyéēwóó.

22 Nnam n̄ibē ne nyé n̄zé edé bán ngáne nyéhídeé Mwān-a-Moonyon̄, bad békós nyé, béháa nyé á yāl, bésyāā nyé, béchage-'ε nyé mín mé mbéb.

23 Nyéwóge bwām, nyébwēen̄ ám̄in n̄ímé mbwε, áyāle nsábe n̄íme nyékudtē ádyōb n̄íchábé ám̄in. Melemlem nē d̄ó besáá bé' b̄óob b̄ómpē bésyáó'áá bekal bé' d̄áðan̄.

24 Bon̄ edé nḡal ne nyé ábe nyédé nh̄on, áyāle nyēmaá echēn̄ nde akud.

25 Edé nḡal ne nyé ábe nyékódé b̄óob, áyāle pónde ēp̄e echē nyétaké nzaa.

Edé nḡal ne nyé ábe nyéwóó b̄óob, áyāle nyéēlēb, nyéch̄íí-'ε.

26 Edé nḡal ne nyé nzé moosyāál ákémte nyé. Nē d̄ó ábāb besáá békémtaa bekal bé' d̄áðan̄ bé metóm.

*Nyéðan̄ bad ábe békós nyé
(Mat 5.38-48, 7.12a)*

27 “Bon̄ nlānge nyé ábe nyéwóglan̄ me h̄én b̄óob meé, nyédan̄ bad ábe béhe de nyé k̄ok̄o, nyéēnle-'ε bad ábe békós nyé mbon̄.

28 Nyénamed bad ábe bésyāntad nyé, nyékānnad-te bad ábe bébele nyé nhel mé mekan.

29 Nzé mod abómé we abén á ak̄eg, ékunnéd mó ádíní ámpē. Nzé mod akóbne we n̄imōn̄ nkobe, weebān̄né mó ké echon̄ s̄ote.

30 Kénzéé awē achómé we ch̄óm, béé mó. Mod ké ahéé-'ε awē adumné we bwēm, weéhedné mó b̄ó ámbíd.

31 Kéchéé eché edás weé bad bébel áwōn̄, ébel ch̄ó áwāb.

32 “Nzé nyédáá bad ábe bédáá nyé bēnpɛn, né mekenag méhéé nyékudtē ne nē? Kááɲne bebel bé mbéb bǒmpē bédáá bad ábe bédáá bǒ.

33 Nzé nyébele mbon dás wée bad ábe béhenle nyé mbon bēnpɛn, né nsyáɲ ríhéé nyékudtē ne nē? Kááɲne bebel bé mbéb bǒmpē bébele nē.

34 Nzé édé nén bán bad ábe nyélyágé nlém bán bǒmpē bēbál nyé bwēm bēnpɛn bǒo nyébálee bwēm, né nsyáɲ ríhéé nyékudtē ne nē. Ké bebel bé mbéb bēbálee baáb ngáne bēbíi bán bǒmpē bēbál bǒ melemlem.

35 Bon nyédáɲ bad ábe béhede nyé kəkoo, nyébenle-’ε bǒ mbon. Nyébálee-’ε bad bwēm ésebán nyésine dyamdyam ámbíd e nē. Nē débél Dyǒb ábe nyé nsábe níme ríhábé á mǐn, nyéchagnéd-te bán, bán bé Dyǒb á Ngum. Nyébíi-’ε bán, Dyǒb áde ngol ne bad ábe béésagnán Dyǒb, ne ábe bēbébé nlém.

36 Nyéwǒɲ nlém rí ngol melemlem ngáne awēn Titée áwóó nlém rí ngol.

Nyaa eché bad bébidtē mbaku

(Mat 7.1-5)

37 “Nyéekáádtē bad, bon Dyǒb dǒmpē déekaádtē nyé. Nyéehóbé bad, bon Dyǒb dǒmpē déehǒbē nyé. Nyélagšan bad bon Dyǒb dǒmpē álagšan nyé.

38 Nyébage bad, bon Dyǒb dǒmpē ábage nyé. Akab áde nyékudtē, békín dǒ, bépuméd-te dǒ ámǐn, kááɲ ásyogke, bon bépémtéd nyé. Melemlem mé nhagtéd níme ébénlédé mǒo Dyǒb dǒmpē débénlédtē.”

39 Yesue ankalé bǒ ngan aaaken, “Mod awé akwedé ndím ahele alyágéd waáb mod a ndím-ε? Bǒ bad bēbe béehúnné ebíi-ye?”

40 Mwán-a-ayáge eetóméé mod awé ayágte mǒ, bon kénzéé awé amadé ayáge áte, abelé abé ndáogke eche awe meléede.

41 “Cheé ékáá bon éwámsán mwá púuted anyín á díd á wēn, ésebán ehele nkog níme rídé emón á díd anyín?”

42 Chán éhele-se eláá mwányon wée, ‘Amúé, mwé, ríhú wε mwá púuted á díd’, áde wéenyínē nkog níme rídé mmón á díd? A-bedog-bad! Sébé éhú nkog níme rídé mmón á díd, dǒo wétǒɲ’é púuted eché edé mwányon á díd anyín, bon ehúdt-te chǒ.

A epum dǒo bécheméé bwel

(Mat 7.16-20, 12.33-35)

43 “Alín á bwel á bwám déebeléé-se áchyáá e’pum bé mbéb. Alín á bwel dé mbéb-pe déechyáá’é e’pum é’ bwám.

44 A epum é bwel dǒo bécheméé alín á bwel. Ebyééné bwám bán, bēpādē ngun á yál e mbísan káa besabé á yál e mewáɲ.

45 Mod a bwám abele bwám áyále é’bide mǒ á nlém-té wée bwám ékóɲnéde. Mod a mbéb-pe abele mbéb áyále ríbidé mǒ á nlém-té wée mbéb nkóɲnéde. Edé né áyále, mam níme ríloné mod á nlém-té, mǒ-’aa mébide mǒ á nsal.

Belón bé ndáb bēbe

(Mat 7.24-27)

46 “Chán nyéchágéé me pǒndé tée bán, ‘A-Sán, A-Sán,’ bon nyéebélé dyam áde rílangéé nyé?”

47 Mod tée awé apedé áwem, awé awóge ábēm e’yale, bon ábelé-’ε ngáne ríhóbéé, méhagtén nyé nyaa e mod eché ákóó abé.

48 Adé néé nlón-a-ndáb, awé anlímé mekon mé ndáb se áse, ásümé ene ndáb eláá mǐn. Edíb énlónē, éból mǒ á ndáb-te ne ngine, bon énkénhenlé chǒ apán, áyále ambíi chǒ alón.

49 Bon kénzéé awé awóge ábēm e’yale bon eébele ngáne é’hóbéé adii nǎngáne mod awé anlón ndáb ésebán asumme chǒ. Ade edíb ébólé mǒ á ndáb-te, ene ndáb enkwé melemlem mé pǒndé, epáá-’ε nyaa eche ekamé ahagtén.”

7

*Yesue achõhté mbaledé
awě mod ambáá a sánze
(Mat 8.5-13)*

¹ Bad bésyāā́l bēnwōg nímén mekan níme Yesue áhóbé'áá. Ade áamáá mó ahób, anké á dyad á Kapenahum.

² A dyad-té wē, mod ambáá a sánze é Roma ambé awě akamlan mbwókēl e sánze. Awě mbaledé nhóg awě ándāngé ákónlé'áá kóŋŋ áhéde awé.

³ Néē ane mod ambáá a sánze áwógé Yesue dúu, anlóm belyáged bé dyad áá béchēnled mó Yesue, áhye áhood awě mbaledé.

⁴ Bépédé-'áá wēe Yesue, bonj béchāā mó ne nlem nhóg bán, "Hyě éhébe ane mod. Adii mod awě atāngéné nīmōj nhébe akud.

⁵ Adā́ adēd alon á bad, alóngé-'e syānē ndáb e mékáne."

⁶ Yesue anwoón bō. Bonj áde ákwógé ape á ndáb wēe ane mod ambáá a sánze, dōo mod ambáá a sánze ne álómēé baáb wēe Yesue ámpē áá, beláa mó bán, "A-Sāj, weetagté we yāl, mmén meékwognedéé ákob we nken áwēm ndáb.

⁷ Nén ábélé menkēnhenlé ké ape áwonj e'só. Bonj ké eyale chōo wénhābpē, awēm mbaledé ádyéé bwām.

⁸ Mmēn ndii mod awě adé ásē e nkamlēn, mmēn-ne nwóó sánze éche nkamlanné. Nlānge póg méé, 'Kāg', ékāg-ke nē dēn. Nlānge empée méé 'Hyāg', éhyāg-ke nē dēn. Nzé nlānge awēm mbaledé méé, 'Bēl échēn', ábélé-'e nē dēn."

⁹ Ade Yesue áwógé nē, yāl enkóm mó áte. Héē ákúnné e'só wēe ehoj é bad éche éhídé'áá mó, álāngé bō áá, "Ne mbále, nlānge nyé méé, meényīnēē mod á alon á Israel ké nhóg awě awóó nyaá e adúbe echē anén nken-e-mod áwóó."

¹⁰ Atim áde bad ábe bēnlōmmē bétímé ámbíd á ndáb, bēntān nēngāne ane mbaledé áamáá bwām adyēe.

Yesue apuidé nkúd a mmwaád mwān

¹¹ Eebeméé áte* Yesue anké á dyad áde béchāgēé bán Nain. Abē bembapēe bémbē ne mó ne ehoj é bad.

¹² Ade ápédé benben ne mmwe ní dyad, bad bémbídēn ndim ní mod níme mémbē mpōm ní mwān níme nyaá. Nyaá abédé nkúd a mmwaád. Ndun e mod echē embíd á dyad-tē, embē ne mó.

¹³ Ade Sāngú Yesue ányiné ane mmwaád, ankóbtén mó etyāg. Dōo álāngéé mó áá, "Lénéd awé!"

¹⁴ Ansídé á'sō, ásitén mekále níme bēmpēmēē ndim ní mod ámīn. Bepém bentyēem. Héē áhóbéé áá, "A-kódemod, nlānge we nēn méé, syāá ásē."

¹⁵ Dōo ane kódemod echē anwé ésyāngé áse, bonj ébootáád dyam ahób. Héē Yesue ábágé mó wēe nyaá.

¹⁶ Mbwóg ménkōb moosyā́l, békēmtē Dyōb bán, "Nkal é'dāsdāj ambáá abídé áwed tīnté," bēhābē-'e bán "Dyōb ápídé ábē bad!"

¹⁷ Mmén nkalanj tāngene Yesue ménwōgnēd mbwóg e Judeya áte esyā́l ne melonj níme méde benben.

*Jōne, Ndusene alómé ábē bembapēe wēe Yesue
(Mat 11.2-19)*

¹⁸ Bembapēe ábe Jōne bómpē bēnwōg nímén mam. Héē békíí mó aláa.

¹⁹ Dōo átédé bébe, alómé bō wēe Yesue, áá béseded mó nēn bán, "Wē-éé edé ane awě Dyōb áhóbé áá mólōm-e, ngé sébē séšine' mod ampéé?"

* 7:11 Eebeméé áte: Donge á kálag dé'só éwóó: Néē bīn é'sāngé.

20 Abê bad bépédé-'áá wée Yesue, bēlāngē mō bán, “Jōne, Ndusene alómé sé áwōŋ aáken, ‘Wē-éé edé ane awē Dyōb áhóbé áá mōšlōm-ε, ngé sébê sésine’ mod ampée?”

21 Póndé eche bépédé áhed nê, adidé'áá ekud é bad bwâm ábe betágnáá nkole nyaa ne nyaa, ábe bēnkūd medim ne bad ábe e'dáádāŋ bē mbéb é' bédé áte. Ambēl bad hūin ábe bēnkwē ndīm bényinne'.

22 Héé átímtannē Jōne ábē bembapεε áá, “Nyétime' ámbíd, nyéke nyéláa Jōne mekan nīme nyényinné did ne nīme nyéwógé. Nyéláa mō bán, bad ábe bēnkwē ndīm bényinne', ábe bésyágté'áá békag bwâm, ábe melāŋ ménkōbpē bésáá.† Ábe bēnkwē ndóg bēwógne', ábe bēnwē, bēpuude', nkalaŋ ní bwām-me ámpē níkalte' wée betóótōkē bē bad.

23 Nnam nībē-'ε ne kénzée awē eéhāŋlene nlém á abum tāŋgene me.”

Yesue alāngé bad nyaa e mod echē Jōne adti

24 Ade mēsénze nīme Jōne nīmáá atim ámbíd, Yesue ambootéd ndun e mod echē embé áhed akale tāŋgene Jōne. Ansédéd bó aáken “Póndé echē nyémídtē áke dé atán Jōne á ehyānge, cheé nyéwēmtennē bán nyéenyín? Apab á chyaa áde epub éságté-ye?”

25 Cheé nyēnkéé anōn? Mod awē ahédé kase é mesāŋ-ε? Nyébíi nēn bán, bad ábe bēwáa' kase é mesāŋ, bonj bétōgné-'ε yāl, bēdyεε dāsō á ndáb é kāŋ.

26 Cheé-ō nyēnkéé anyín? Nkal é'dáádāŋ mōo nyēnkéé anyín-ε? Nê dēn! Ne mbále, nlāŋge nyé meé, nyényíné mod awē atómé nkal é'dáádāŋ.

27 Jōne mō adé ane awē bēhóbé'áá áde bétélé e'yale ábe Dyōb áhóbé áá, ‘Nōné’, nlóme nīmēm mēsénze nīme mēsēbē wε á'sō, ábonŋen wε nzii.’

28 A mbále mod ké nhóg awē abíde á abum dé mmwáád eetóméé Jōne. Bonj ké nê, mod awē adé ndímtēn átínté e bad ábe bédé á nkamlen ní Dyōb, adé etógnēn tómaa Jōne.”

29 (Bad bésyāal ábe bēnwōg chōm éche Yesue áhóbé, kāŋne besaad bē tááse bēnkwentēn bán ntūi ní Dyōb nítāŋgéné, áyāle bēnkūd edusen éche Jōne.

30 Bonj Befarisia ne bemelēede bē mbéndé bēnchīm yāl kāŋne ntūi ní Dyōb áyāle bēmbāŋ edusen éche Jōne akob.)

31 Yesue ambád ahób aáken, “Cheé mēhāgtēnnē nyōŋgel é bad e'chii? Chán bēn békóó abé?”

32 Bédíi nēŋgāne bēndem ábe bēdyéé á dyad-tē, bonj bēlébpe nhóg ne aníní bán, ‘Sétōŋgé nyé e'lon, bonj nyéeságéé.

Sékónné nyé nkāŋgé ní kwééd, bonj ké nê nyéechyē'é awé.’

33 Ade Jōne, Ndusene ápédé, eéyoke'áá ndyééd adyé, eemwáge'áá-'ε mīm. Nyébootéd ahób bán, ‘Edáádāŋ é mbéb édé mō áte!’

34 Mwān-a-Moonyōŋ apedé, ádyāg ndyééd, á mwāg-ke mīm, nyéhōbē bán, ‘Nyénōne mō, adáá ndyééd bwāmbwam. Mmwé mīme ngēn, awōŋne belad bē tááse ne bebēl bē mbéb.’

35 Bonj káōŋ ne á asóg, mod téé awē abíi dyam abelé ahób áá, nzii e Dyōb etāŋgéné.”

Mmwáád awē bēlāgséné mbéb

36 Farisia nhóg anlébé Yesue áá ahyε ádyē ndyééd áwe ndáb. Ade ápédé áwed, andyéé áse, ádyé ndyééd.

† 7:22 **Asaad á yāl:** Nzé melāŋ ménkōb mod bétédé'áá mō nēε mod awē eesáa. Bébéné'áá mō bán eesíté wée bad bédíi.

37 Mmwaád nhóg mós-’ε abédé á dyad-tê wê, awê abédé mbelé-mbéb. Awóg áde áwógé bán Yesue adyâg ndyééd á ndáb e Farisia, ampεén apom á dyöğ dé elod é bwâm áhed.

38 Anyogén ásê benben ne mekuu níme Yesue, ábootéd achii, ásòbté’ mó mekuu ne mésad. Ampiné mó mekuu ne éché esid é nló, ámwāá mó mekuu álúmed edúbé, anyönlé-’ε mó mekuu ne ádé dyöğ dé elod é bwâm.

39 Anyín áde ane Farisia ányiné nê, anhób áwe nlém-tê aá, “Nzé nkal é’ dǎǎdǎj mós anén mod ánkongé abé, né abágé’áá abíε’ nyaa e mmwaád eche anén mmwaád awê akidtan mó ádíí ne abé áde áwóó, né abíí-’ε nén aá anén mmwaád adíi mbelé-mbéb.”

40 Héε Yesue álanğεé mó nén aá, “A-Simōn ndǎǎ wε mwǎ póle aláa.” Farisia ne ankwentén aá, “A-meléed, cheé édé? Kǎg á’sō, éláa mε.”

41 Dǎǎ Yesue áhóbéé aá, “Mod nhóg abédé awê abalé’áá bad ngáb. Ane mod akalé’áá bad bébe melúm. Akalé’áá nhóg móom mé e’kálé métaan, aníní-’ε e’kálé étáan.

42 Bó modmod békênhenlé atuε. Né-ǎǎ anlagsén bó mod téé áde alúm. Bǎǎb-pǎǎ, áyǎle bó bad bébe, nzé-módé éduǎpé wεé átomtǎn mó adǎj?”

43 Simōne antimtén mó aá, “Ndúǎpé mεé, ane awê alúm déntǎmtǎnnē achab ámín.” Dǎǎ Yesue áhóbéé aá, “Etǎjğéné.”

44 Dǎǎ ákunnéé wéε ane mmwaád, boj álanğē Simōne aá, “Enyíne anén mmwaád-ε? Ade nísle áwōj ndáb, wenkēmbaá mε mendíb wεé níwobned mekuu. Boj anén mmwaád asǎjté mε mekuu ne nímē mésad, apíné-’ε mó ne éché esid.‡

45 Wenkēnháá mε tǎl, boj taa mensól hén, eésógéé mε mekuu anyole.

46 Wenkēnwǎǎgdéte mε dyöğ á nló ákob mε nken, boj awógté mε dyöğ dé elod é bwâm á mekuu.

47 Edǎjğé é ngíne éche anén mmwaád álúmté, édé nhǎgtén ne alagsen áde ákúde áyǎle ekud é mekan mé mbéb éche ábélé. Mod-te awê béebudéé mbéb alagsen, eébudéé edǎjğé alúmed.”

48 Héε Yesue álanğεé mmwaád ne aá, “Ekudé alagsen dé mbéb áyǎle mbéb nímōj nísyǎǎl.”

49 Bad ábe bǎǎǎ bédyágé’áá ndyééd bēnsédéd yǎl bánken, “Ebál é mod éhéé chén éche éwóó kǎjne kunze álagsen mbéb?”

50 Yesue anláá mmwaád ne aá, “Adúbe áde éwóó áchójté wε, kǎg ne nsaj.”

8

Nguse é bebaád éhíde Yesue

1 Ambld e nê Yesue ambootéd ake myad ne myad, mémbaá ne mésad. Akagé’áá, ákalé’ nkalanj ní bwâm mé nkamlen ní Dyǎb. Akeéné’áá ábē bembapεε dyóm-ne-bébe.

2 Bebaád ábe e’ dǎǎdǎj bé mbéb bémbēē áte ne ábe békónlé’áá nkole mémpēε, boj áchǎǎd bó, bǎǎpé bémbē á echonj. Abé bebaád bebédéε, Maria mmwaád a dyad á Matala awê ánhúdté e’ dǎǎdǎj bé mbéb saámbe á yǎl,

3 Joanaa, mmwaád awe Kusa, mod awê abédé nló áyǎle bembaledε ábe Herǎde, Susanaa ne ekud é bebaád bémpēε. Abé bebaád bebénládtáá ábab bwēm bēn, bétǎgnán Yesue ne ábē bembapεε.

Ngan e mbál-e-bū

(Mat 13.1-9; Mak 4.1-9)

‡ 7:44 A mbwóg e bad bé Israel, nzé mod akobé’áá mod nken, antǎjğén mó mendíb abe áwohe mekuu, ahé mó tǎl, awógdé-te mó dyöğ á nló.

⁴ Ekud é bad émbíd dyad ne dyad téé áhye dé anyín Yesue. Ade beládné áte nê bɔɔb, ankalé bó ngan nén aá,

⁵ “Nkwel-é-nzag nhóg ankě mbál asob á nzag-tê. Ade ásobéé mó nê, donje dénhūn á nzii-tê, betóm bé nzii bémad mó akɔgted ámín, menɔn sómpě mémad mó asómted. ⁶ Donje dé mbál dénhūn á eláá mín. Mmê ménkɔb, bon ménhyelē áde méepedéé akwog, ngáne édíí bán ndɔɔb e eláá mín eékonjéé mendíb.

⁷ Donje ámpě dénhūn wée mekád médíí. Née bɔɔbɔ békwoǵē, mekád ménkāj ábē bwēm.

⁸ Mbál mémpě méntān ndɔɔb e bwām. Ménkwog, ríchyáá-’e bwāmbwam. Donje dé e’ sóg dénwālē mbwókel é mbum.” Ade Yesue ámadé nê, ambád áte aá, “Kénzée awě awóó metúu áwóge’.”

*Chóm éche ékǎá bon Yesue akalé’ ngan
(Mat 13.10-17; Mak 4.10-12)*

⁹ Ambíd e pónde, Yesue ábē bembapēé bēnlāá mó bán, átógned bó ene ngan.

¹⁰ Héé álāngéé bó nén aá, “Dyǔb ábágé nyé kunze ábii kun é nkamlen rí Dyǔb. Bon bad ábe belyágé ásē, bēwog chó née ngan ábel nén, bényíne’, bon béecheméé, bēwóge’, bon béēsōntānnē.

*Yesue atógké ngan e nwén-é-mbál
(Mat 13.18-23; Mak 4.13-20)*

¹¹ “Bɔɔb-pɔɔ, rítógned nyé ene ngan. Mbál rídii Eyale é Dyǔb.

¹² Mbál níme ménhūn á nzii-tê rílúmte bad ábe bēwóge eyale é Dyǔb, bon ábád ne á asóg, mpúlé mé nkǔnsé, abud á bwēm awónj, ne menyíngē mé nkǔnsé ríkāj bó nlém áte. Nê ákəə’, béeheléé kəse é e’pum achyáa.

¹³ Mbál níme ríhúné á meláá-tê rílúmte bad ábe, nzé bēwóge Eyale é Dyǔb, békobe chó ne menyíngē, bon échē eyale éewēnnádtē bó á nlém-tē. Bédúbpe Dyǔb á esónj é pónde bonj á pónde e mekəgsen bédol yāl ámbíd.

¹⁴ Mbál níme ríhúné á mekǔd-te, rílúmte bad ábe bēwóge Eyale é Dyǔb, bon kǎáj ne á asóg, mpúlé mé nkǔnsé, abud á bwēm awónj, ne menyíngē mé nkǔnsé ríkāj bó nlém áte. Nê ákəə’, béeheléé kəse é e’pum achyáa.

¹⁵ Mbál níme mó-’e méntān kəse e ndɔɔb, rílúmte bad ábe bēwóge Eyale é Dyǔb ne nlém n̄syāā, békōō-’e chó á nlém-tē. Nê ábele’ bēwesən kǎáj béchyáá e’pum.

*Nzé béchodé etrukāj, béekonjéé chó
(Mat 4.21-25)*

¹⁶ “Modmod eémāá’ e etrukāj achod se ákōō chó á ebwog-sé, káa atíbed chó á anɔj sé. Abelé ákelē chó dásó ámín, ábel bon kénzée awě asóle á ndáb, ányíne ekíde.

¹⁷ Dyam téé áde áde á e’konjéd-te débíd á nhéné. Kéchéé-’e éche énsóóm á e’konjéd ébyēen, ébíd-te á enyen.

¹⁸ Né-ɔɔ, nyétéd pónde ngáne nyéwóglanné. Kénzée awě awóó nsónten rí kun é nkamlen mí mín, Dyǔb débád mó níme nsónten abe. Ane awě mó-’e eewóó, ábád ké éche áwémténé aá mówōō.”

Túmbé eche Yesue

(Mat 12.46-50; Mak 3.31-35)

¹⁹ Bɔɔb-pɔɔ, áde Yesue nyaá ne baányaj béhyédé mó anyín. bénkēnhēnlé mó ape bēnben, áyāle etál éēbēdeé ngáne ndun e mod énlənjédte mó.

²⁰ Dóo bad belāngéé mó bán, “Pón nyoó bɔɔbe baányaj bétyéémé á ebwog, béhede-’e we anyín.”

21 Hée Yesue átímtanné bó nén aá, “Bad ábe béwóge eyale é Dyöb, bébelé-’e ngáne éché eyale éhóbeé, bóó bédé awem nyaá ne ábém baányan.”

*Yesue ahóódté ekukud
(Mat 8.23-27; Mak 4.35-41)*

22 Mbwe nhóg Yesue ansól á böle-té ne ábē bembapee, aláá bó aá, “Syáá déchabe pæd e edib eníníí.” Dóó bébwógkē eke.

23 A eke-té wē, e’chó bēnkōb Yesue. Hē dóó ekukud étáné bó áfínté e edib. Mendíb ménsól bó á böle-té káóñ, mam méhéén bó ebébtéd.

24 Hée békíí Yesue anyem ásē bonj bēlāngē mó bán, “A-Sán, a-Sán, pón syánē dewág-ōō!” Dóó ányémmé ásē, ákānnē ekukud éched áte, éhóó-’e. Edib éche éhódé áá áte chímpē énsóg ahod.

25 Dóó áseɔtēé bó aaáken, “Nédē nyéedúbpéé me-ye?” Nén dénkōbēd bó mbwóg, yál-le enkóm bó áte bwámwam béseɔtēé nhóg ne aníníí bánken, “Ebál é mod éhéé chēn, éche ékamlan káóñne ekukud ne mendíb, káóñ béwógnē-’e mó?”

*Yesue achóñté mod a Gerasin
awē e’daádəñ bé mbéb bémbēē áte
(Mat 8.28-34; Mak 5.1-20)*

26 Yesue ne ábē bembapee bēnchabé edib, bootya á Galilia, bépē á múde rímíníí, á mbwóg e Gerasin.*

27 Ade ábíde á nkin ambomén mod a dyad nhóg awē e’daádəñ bé mbéb bémbēē áte. Ebédé etún é pónde áde ane mod ééháge’áá mbóté. Eédyee’áá ké á ndáb-te, nzése á soóbaɔe.

28 Anyín áde ányíné Yesue, ankwé mó á mekuu ne esaád á nsál, ábōnē aá, “A-Yesu, Mwān a Dyöb á Ngum, cheé sóo déwóñné? Són, weekógsán me.”

29 Nē démbē áde Yesue amáá e’daádəñ bé mbéb akamlēn aá, é’bíd mó áte. Ngen ne ngen, nzé e’daádəñ bé mbéb bénsól mó áte, ké á mehangé dóó ámbēē, apádtádtáá bengəbengəbē ábe béhéde mó á mekuu ne mekáá, bonj edáádəñ é mbéb ékeené mó á ehyāñge.

30 Yesue anséɔdéd mó aaáken, “Chán ðin ádíí we?” Ankwentén aá, “Amutee.” Anhób nēngáne e’daádəñ bé mbéb híin bénsōnlé mó áte.

31 E’daádəñ bé mbéb ábed é’cháá’áá Yesue bán, eehúnté bó á echóg éché éewóo asóg,†

32 Esog é nguu ébéde áhed édyāg medyé á mbám mé ekone. Dóó ábē e’daádəñ é’cháá’é Yesue bán áteɔde bénsól ké á esog é nguu-té. Dóó Yesue ábáge bó kunze.

33 Abíd áde e’daádəñ bé mbéb hē é’bídé ane mod áte, bénsól éché nguu áte. Dóó nguu éwúbpé ásē, ényəgté’ á e’láá bé nkin mé edib, éhún á edib-té, éhó-’e.

34 Ade benon bé nguu bényíné nē, béntōm mehéle, békag bēkanlé bad nkalanj á dyad-té ne á mebwóg níme méde benben.

35 Awóg áde bad béwóge-’áá nē, bébwóge-’e ásē áke dényín dyam áde ábēnléde. Bépéde-’áá wēe Yesue ámbēē, bényín ane mod awē ánhúdté e’daádəñ bé mbéb áte ngáne ádyéé mó á akéb, ahéde mbóté á yál, ádyēē-’e bwám. Dóó mbwóg ríkóhé bó.

36 Bad ábe bēnnyínēn ðíð bēnkale bó ngáne Yesue áchóñté ane mod.

37 Hée bad bé mbwóg e Gerasin bēlāngé Yesue bán ásyəə áwāb ndəob, áyāle mbwóg ní ngine ménkōb bó. Dóó ásólé mó á böle-té, bonj ásuē’.

* **8:26 Gerasin:** Donje á kálag dé’so áwóo *Gadara*, émpēe-’e éwóo *Gegesa*. † **8:31 Ebii:** Mewēmtēn mémbē bad bán e’daádəñ bé mbéb bébē á mbwóg á ndib e ebíí káóñ né echab pónde e nkógsen epedé.

³⁸ Mod awě bénhūdtē e' d'əədəŋ bé mbéb áte anchán mós aá búmō békag, bon Yesue antiméd mós ámbíd aá,

³⁹ "Timé' áwōŋ dyad, éke ékanle bad ndəle a dyam echē Dyōb ábénlē wē." Ane mod ansú á dyad, ákag, ákanle mod téé dyam áde Yesue ábénlē mós.

*Yesue apuúdtē ngōndere póg
áchōōd-te mmwaád ampée
(Mat 1.18-25)*

⁴⁰ Ade Yesue áhúú, ndun e mod enhyē mós aságnen ne menyinje ngáne émbēē bán bésiné' áá mós.

⁴¹ Héé mod nhóg awě béchágé' áá bán Jairuse ápédé áwē. Jairuse abédé nhóg áfintē benkamleŋe á ndáb e mekáne. Ankwe Yesue á mekuu, ácháā mós aá, áhye áwe ndáb. Aá

⁴² mímē mpōm ní mwān a mmwaád ríhede awé.

Ade Yesue ákagké áwed, bad bēnləŋnéd mós.

⁴³ Mmwaád nhóg ambé áhed awě akōnlé' áá nkole níme mekií mébidé' áá mós á yāl pōndé ésyāāl. Mmē nkole níbédé mós á yāl á etún é dyóm-a-mwé ne níbe ésebán modmod ahele mós bwām adid.‡

⁴⁴ Héé ábidé Yesue ámbíd, bon ásitén Yesue mesó mé nkobe níme ánwāā'é. Abwōg-ábwōg mekií ménsōg mós abíd á yāl.

⁴⁵ Dóo Yesue ásedteé aáken, "Nzé-módé asidténe me?" Modmod enkēnkwenténne. Dóo Petro áhóbéé aá, "A-Sán, ngómē ndun e mod eləŋnéde wē, kásəŋ békáŋnéné-'e wē."

⁴⁶ Bon ké nē Yesue anhób aá, "Mod akidténe me, áyāle nwógé ngáne ngíne ebídé me á yāl."

⁴⁷ Ade ane mmwaád ányíné nē bōob aá mósēheleé yāl akoo, ambíd Yesue á' sō. Anə' áá ne mbwōg. Ankwe mós á mekuu. Héé áhóbéé á' sō wēe bad bésyāāl chōm éche ékásəŋ bon ásitén mós, ne ngáne módyéé bwām melemlém mé pōndé.

⁴⁸ Dóo Yesue áhóbéé aá, "A-mwān-a-mmwaád, adúbe ádōŋ ádíde wē bwām. Kəg ne nsəŋ."

⁴⁹ A pōndé eche Yesue áhóbéé nē, dóo mod awě bélómé wēe Jairuse ápédé bon áhōbē nēn aá, "Weétagné wē Meléede ataged. Wəŋ mwān amaá mós awé."

⁵⁰ Yesue awógé-'aá nē, bon áləŋgē Jairuse aá, "Weewógé mbwōg! Dúbé dúbpén, né mwān ádyéé wē bwām."

⁵¹ Ade Yesue ápédé wēe Jairuse áwe ndáb, enkēnháá etál aá, mod ampée áhíd mós á ndáb-te éetóméé Petro, Jōne ne Jemse, nchoo ne ane mwān sáá bō nyan.

⁵² Bad béchyé' áá, bélebé-'e. Yesue anláá bō nēn aá, "Nyéechyēē'. Ane mwān eewédeé, akúne kúnén."

⁵³ Bad bēmbootéd mós awōō, ngáne bēmbī' é bán amaá awé.

⁵⁴ Héé Yesue áchángé mós ekáá, bon áchagé mós aá, "A-mwān, páde áse."

⁵⁵ Dóo edəədəŋ étimé mós á yāl, apádé-'e áse ábwōg-ábwōg. Yesue anláá bō aá, bébe mós ndyééd, ádyê.

⁵⁶ Yāl enkóm nyaá bō sán áte bwāmbwam, bon Yesue anláá bō aá, béekanlé modmod dyam áde ábénlédé.

9

*Yesue alómé bembapēe dyóm-ne-bébe
(Mat 10.5-15; Mak 6.7-13)*

‡ 8:43 Donje á kálag dé'só ébádé bán: *Ammád chōm ésyāāl éche ánwōŋgē abébed wēe bad bé mcl.*

¹ Yesue anchélé ábê bembapεε dyôm ne bébe abwóg ahóg. Ambag bó ngíne ne kunze áhúd bad e'dáádəŋ bé mbéb áte, ne ámad nkole nyaa ne nyaa.

² Anlóm bó aá, béke békale nkalanj mé nkamlɛn ní Dyöb, béchoŋte-ε bad.

³ Dóo álánŋεé bó nɛn aá, “Nyéewánlé chòmchòm á eke, ké ntón, ké ekwε, ké ndyééd káa ngáb, modmod eewánlé-ε mbóté ébe.

⁴ Ndáb ké ehéé eché nyésólé áte, nyédyεε áwəd-te kóəŋ ne mbwε níme nyésyŋŋεé.

⁵ Dyad ké ahéé-ε áde béekobeé nyé nken, nyétədē dó, nyékúd-te ebumbú á mekuu álúmed nɛn bán échab ebébtéd éɛne bɛn.”

⁶ Héε bembapεε bébwógké ásē, békág dyad ne dyad téé, békálé nkalanj ní bwám, bédidé-ε bad bwám hóm ne hóm téé.

Herode atage áte

(Mat 14.1-12; Mak 6.14-29)

⁷ Bóob-póó Herode awé akamlánnáá alonj á Galilia anwóg mam mésyāəl níme mɛmbɛnléd. Mewɛmtɛn métágé'áá mó áte áyāle bad behóg béhóbé'áá bán, jɔne apuúdé,

⁸ ábíní bán, Elaijaa atimé ámbíd á nkōŋsé, bémpee-ε bán, nkal é'dáádəŋ nhóg a'boód mó atimé ámbíd á alonjé.

⁹ Herode anhób aá, “Mɛmbɛl bésəl jɔne nló. Nzéé ampée níwógéé bán abele nímɛn mekan?” Nê dɛmbəl ádəŋ aá mónyɛn ane Yesue.

Yesue adíté ndun e mod

(Mat 14.13-21; Mak 6.30-44; Jon 6.1-14)

¹⁰ Ade bembapεε bé nlómag béhúú ámbíd, bɛnlāá Yesue mam níme bɛbélé. Héε átédé bó bonj átimné bó á ahāŋgé á hóm á dyad á Betsaida.

¹¹ Ade amute á bad áwógé nê, dénhíd mó áwed, kóəŋ bétán mó. Akob bó bwám, ákanlé bó póle e nkamlɛn ní Dyöb, áchoŋte-ε bad ábe béhédé'áá bwám adyεε.

¹² Ade ngukél épédé dóo bembapεε bélánŋe Yesue bán, “Chené ábɛn bad, bétimé' á myad-té níme médé bɛnbɛn, ábɛl béhé ndyééd ne hóm áde bɛnaá' é. Ndyééd eésaa hɛn, e'non-ε béesaá wéε dédíí nɛn.”

¹³ Héε Yesue álánŋεé bembapεε aá, “Nyé bó nyébe bó chòm éche bédyēē.” Dóo béhóbéé bán, “Séwóó e'wɛle é'táan ne súu ébe. Ene ndyééd eéhélēē bad bésyāəl akwog.”

¹⁴ Mesonjé mé bad ábe bɛbédé áhed mɛmbē e'kálé é'táan. Bonj Yesue anláá ábɛ bembapεε aá, “Nyélad bad áte, nyékab bó bonj akab téé ábɛ móom mé bad métáan.”

¹⁵ Bɛnkáb bad áte ngáne ánhōbpɛ.

¹⁶ Héε Yesue átédé ábɛ e'wɛle é'táan ne éché súu ébe, ákabé áte, ásāgnān Dyöb bonj ábagé bembapεε aá békabpe bad.

¹⁷ Bad bésyāəl bɛndyē, békód-te kóəŋ ene ndyééd élyāg ásē, eche bɛládé áte e'lónj dyóm ne é'be.

Nzé-módé Yesue mwɛn ákóó abé?

(Mat 16.13-28; Mak 8.27-9.1)

¹⁸ Mbwε nhóg Yesue anchíb yāl áke dé akáne. Bembapεε bɛnpɛn bóo bɛmbɛ áhed. Ansɛdéd bó aáken, “Nzé-módé bad bó béhóbéé bán ndé?”

¹⁹ Béntimɛn mó bán, “Donje á bad béhóbe bán, edíi jɔne Nduɛne. Donje áhóbɛ bán, Elaijaa, bémpee bán, nkal é'dáádəŋ a'boód atimé ámbíd á alonjé.”

²⁰ Dóo Yesue áhóbéé aá, “Bonj nyébɛn-ne, nzé-módé nyéhóbéé bán ndé?” Dóo Petro áhóbéé aá, “Edíi Ane Awé Dyöb Awógté.”

²¹ Héε ásiméé bó etúu áte, álánŋε-ε bó aá béepanlé áte.

22 Ambád aá, “Mwǎn-a-Moonyon atǎngéné ákūd metake híin, bad bémbáá bǒǒbe beprise bémbáá ne bemeléede bé mbéndé bǐbǎn-’ε mǒ á yǎl. Bǐwūú mǒ, bon e’pun ábe é’lǒnténé é’láán, ápuú.”

23 Anláá moosyǎl áhed aá, “Kénzée awě adǎs me ahíd asob yǎl mendib, ápém adě awǒg mbwe téé, bon áhíde me.

24 Ayǎle kénzée awě ahede adě alongé ason, ábǒd dǒ. Kénzée-’ε awě abódé adě alongé áyǎl echém, ákūd alongé áde déemaá’.

25 Nsyǎǎj níhéé mod ákudté nzé akudé nkǒǎsé n̄syǎǎl bon abǒǒ, ké’ε abódé échě edǎǎdǎj.

26 Kénzée awě ákwǎgēn me ne ábēm e’yale, Mwǎn-a-Moonyon mǒmpē ákwǎgēn mǒ á pǒndé echě ápéé ne ehúmé échě, nǐdē ehúmé é Sǎj ne ángel éché esáá.

27 Bon á mbále, baahǒg bédé nlǒ ámín bǒǒb, béenyínénne kwééd díd, áde béésǐbpeé nkamlen ní Dyǒb anyín.”

*Yǎl ehǎǎléné Yesue
(Mat 17.1-8; Mak 9.2-8)*

28 Née émadé ké e’pun waam, áde Yesue ámáá ahǒb nē, ankeén Petro bǒ Jǎn ne Jemse á ekone m̄n ákáne.

29 Ade ákánneé nē, e’sǒ bēnhǎǎlén mǒ á nlǒ, nkobe n̄mē mǒ-’ε n̄púbé féréd, n̄mwaá-’ε áte.

30-31 Abwǎg-ábwǎg bad bébe, Mosse ne Elaijaa, bémbídēn ehúmé é ngum, bébootéd mǒ akalēn. Békálé’áá ngáne álǒnǐdtē ntii ní Dyǒb tǎngene kwééd eche áwǎé á Jerusalem.

32 E’chǒ bēnlǒn Petro ne baáb á díd. Ade békábnédé bényín ehúmé échē ne bad bébe áhed.

33 Ade ábē bad bébe bétēdtéé Yesue, dǒǒ Petro álanǎgēé mǒ aá, “A-Sǎj, ébǒǒ ngáne syǎá dédíí hén. Délǒj e’bem é’láán, échǒj, eche Mosse ne eche Elaijaa.” Anhǒb nē ésebán abíí chǒm eche áhǒbēé.

34 Eépédéé ké amad á nsǎl, bon mbag ébíd, ékúdtén bǒ. Nén dénkǒbéd bǒ mbwǒg.

35 Héé bǐwǒgé ehǒb ébide á mbag-tē nén, “Mwǎn awēm mǒ nén. Mǒǒ n̄pwéde. Nyéwǒgne mǒ.”

36 Emáá-’aá ahǒb nē dǒǒ bényíné Yesue mwēnpēn. Bénkoǒ ádén akan ésebán békánle modmod dǒ.

*Yesue achǒǎté kódemod
echě edǎǎdǎj é mbéb embǐé áte
(Mat 17.14-18; Mak 9.14-27)*

37 Ade b̄n é’sǎngé, Yesue bǒǒbe bembapee bēnsūd á ekone-sé. Ndun e mod eh̄ye mǒ abomen.

38 Héé mod nhǒg á echor é bad-tē wē álébpeé mǒ aá, “A-meléed, sǒn, ncháa’ wē meé, énon awem mwǎn á díd. Adii me mpǒm ní mwǎn.

39 Edǎǎdǎj é mbéb étagte mǒ. Nzé échǎǎgē-’ε mǒ, abelé abón esaád, ahún ásē, ánúadé kǎǎj mehod mébídē mǒ á nsǎl. Elédte mǒ achene, né émadá mǒ yǎl áched áte.

40 Mempéén mǒ wēé ábǒj bembapee, ncháj bǒ meé, bébided mǒ edǎǎdǎj é mbéb ché áte, bon béehelée.”

41 Dǒǒ Yesue átimtanné aá, “Wáá, nyé bad bē’ chii, mbeltéd n̄mēn méétyéeméé, nyéewǒǒ-’áa adúbe. Chán mǎpéé nyé ad̄yēen bon nyédúbé me? Hyēné awonj mwǎn hén.”

42 Ade ane mwän áhúé' é nê, edáádəŋ é mbéb éched émpíí ane mwän, ébəm mó ášē, ánuíadé. Dóo Yesue ákänné éché edáádəŋ é mbéb áte, ádíid ane mwän bwám, ábāg-ke mó wéé sáá.

43 Menyáké ménkōb moosyáál, ányín ndəle a akan awě Dyōb ábélé.

Yesue akánlé eche kwééd ngan ámpé

(Mat 17.22-23; Mak 9.30-32)

Ade bad bélyágé bényágéé nê, áyāle chōm éche ébénlédé, Yesue anláá bembapεε nén áá,

44 “Nyésōŋgten dyam áde ríhedeé nyé aláa bwám. Bébě Mwän-a-Moonyon á mekáá mé baányon.”

45 Bon ábē bembapεε béenkénsōŋténne chōm éche ánhəbpē. Embē néε ngan éché elélé bó atóge, bébáá'áá-'ε mó aseded.

Nzéé atómténé mod

ambáá abé á'sō é' Dyōb?

(Mat 18.1-5; Mak 9.33-37)

46 Bembapεε bēmbotéd aswanŋten tāŋgene mod awě atómténé mod ambáá abé áwab títé.

47 Yesue anchēm bó mewēmten áte. Antéd mwāmpín mí mwēndem, ápēēn mó áwe akéb.

48 Dóo álāŋgέé bó nén áá, “Kéznéé awě akobé anén mwän á đín ádém, né akobé mε. Kéznéé-'ε awě akobé mε, né akobé ane awě alómé mε. Né-óó, ane awě adé mwāmpín áwen títé, né mó atómé mod ambáá abé.”

Mod awě adé awōŋ

(Mak 9.38-40)

49 Joné anhób áá, “A-Sán, sēnnyín mod abídte bad e'dáádəŋ bé mbéb áte á đín áđon, sēnláá-'ε mó bán áśóg abel nê, áyāle eésáá ne syánē.”

50 Dóo Yesue álāŋgέé bó áá, “Nyéelāŋgé mó bán áśóg abel nê. Kéznéé awě etəŋgán syánē né adé ne syánē.”

Bébáá Yesue nken akob

51 Bəəb-pəó, pónde eche Yesue ántəŋgēnnē ake ádyōb embootéd apε. Né-óó, ammad átíi áá, mó təŋgēnē ake á Jerusalem.

52 Hé-'áá álómé mésénze á'sō. Mēnkě á mwā dyad a Samaria nhóg, ábele mó mbonšén.

53 Bon áde ápédé áwed bad bé dyad bēnkēnkobpé mó nken áyāle á Jerusalem dóo ákágé'áá.*

54 Ade bembapεε, Jemse bó Jon bényíné nê, dóo bésédté Yesue bánken, “A-Sán, edəá wéé séchéle muú ádyōb, ríhye ríhyáad bó-ye?”†

55 Bon Yesue ankuné áwab, ákännē bó áte.‡

56 Héé bóbəó békíi á dyad démpēe.

Bad ábe bēmpōn Yesue ahíd

(Mat 8.19-22)

57 Ade békagké nê, mod nhóg anláá Yesue áá, “Mēhíd wε kéhéé áde ékagké.”

* 9:53 Alon á Samaria démbé áfínté melon mé Galilia ne Judeya. Bon bad bé Israel bēnkēnkobpé bad bé Samaria néε baányan. Né-óó bad bé Samaria béekwēntannaá bad bé Israel ábe bēbídé'áá á Galilia nken akob nze békágé'áá ngande achog á Jerusalem. † 9:54 Donje á kálag é'só ébáde bán: *nēŋgáne Elaijaa ámbenlé*. ‡ 9:55 Donje á kálag dé'só ébáde bán: *anhób-pe ad*, “Nyéebíí'ε edáádəŋ éche ékamian nyé. Mwän-a-Moonyon eépédéé áwlu bad, apédé dásə áson bó.”

⁵⁸ Dóo Yesue átimtanné mó aá, “E’bubwóg é’wóó ábab e’lóm wéé bésóléé, menən-ne ámpé méwóó nítab mǔm, boŋ Mǔwān-a-Moonyoŋ eewóó’ é hǔm áde ábannéé nǔó.”

⁵⁹ Yesue anláá mod ampée aá, “Hyǎg, éhíde me.” Boŋ ane mod antimtén mó aá, “A-Sǎŋ, mwě, rísébe níke nílime echem sǎŋ.”

⁶⁰ Yesue anláá mó aá, “Mwě ndim nílime nítab ndim ní bad. Boŋ we, éhedne bán, éke ékanle bad nkalaŋ mé nkamlen ní Dyǔb.”

⁶¹ Mod ampée anláá Yesue aá, “A Sǎŋgú, mǎhíd we, boŋ mwě, rísébe níke nílyágten echem ndáb.”

⁶² Boŋ Yesue anláá mó aá, “Kénzée awé aboótédé hǔm alii, boŋ ánoné’ ámbíd, eékwognedéé ábél nsón ásé e nkamlen ní Dyǔb.”

10

Yesue alómé bembapée móom saámbé ne bébe

¹ Ámbíd e nê, Sǎŋgwéé ampwǎd bembapée bémpée móom saámbé ne bébe.* Anlóm bó á’só bébe bébe dyad téé ne hǔm téé áde ámbíí’ é aá móspě.

² Anláá bó aá, “Nzag echyáá bwámbwam, bwēm é’hednad apád, boŋ bepád béebuu’ é áte. Né-óó, nyékánne nén bán, nwóó-nzag álóm bepád.

³ Nyékag-kóó, boŋ nyébíi bán nlóme nyé née nídyoŋ ní mbód áfínté e ngǎ.

⁴ Nyéwánlé ekwe é ngáb á yǎl, ké ekwe empée, káa metámbé. Nyéébwǎg-ke mod aleled á nzii.

⁵ Ndáb ké ehéé eche nyésǔnlé, nyéleled bó nén bán, ‘Nsaŋ níbê ne nyé.’

⁶ Nzé mod a nsaŋ adé áhed, né nímmēn nsaŋ mébē ne mó. Nzé eesě, né métimén nyé bēn.

⁷ Ndáb ké ehéé eche nyésólé, nyédyēē áhed. Nyéēpenlád ndáb áte. Nyékobpe kéchéé éche bébageé nyé ádyé káa ámwé, áyāle mod a nsón atǎngéné née ákudéé níme nsábe.

⁸ Dyad ké ahéé áde nyépédé áte, boŋ békob nyé nken, nyédyē kéchéé éche bébágé nyé.

⁹ Nyéidide bad bé nkole bwám, nyéláa-’e bó nén bán, ‘Nkamlen ní Dyǔb nípédé nyé benben.’

¹⁰ Boŋ dyad ké ahéé áde béekobéé nyé nken, nyéke á ntém nzii, nyéhǔb nén bán,

¹¹ ‘Ké échén ebumbú éche émbē sé á mekuu, sékudté nyé chó, boŋ ké nê nyébíi bán nkamlen ní Dyǔb rídé benben.’

¹² Nlǎnge nyé meé, á epun é nkáásé, nkógsen níme dyad á Sodom dényínné mébē mwǎmpín tómaa níme bad ábe bédé áde dyad áte békudté.

Edé ngǔl ne bad ábe béekunne mbíd

(Mat 11.20-24)

¹³ “A-bad bé Korazin, ébēēn nyé ebébtéd! Ebēēn nyémpē ebébtéd á-bad bé Betsaida! Ayāle nzé émbē bán, ndǎle é mekan éche Dyǔb ábélé áwēn myad, émbenlé nē á dyad á Tiré ne dyad á Sidon, né émbwāá melebe se etún, bémwagtéd-te mbúbú áyāl álúmed nén bán, béhǎŋléné ádab abé dé mbéb.

¹⁴ Boŋ mbwe mé nkáásé, nkáá níme bad bé Tiré ne bé Sidon mébē mwǎmpín tómaa nímmēn.

¹⁵ Nyé bad bé Kapenahum ámpē, nyéwēmtan bán, nyémaá ape ádyǔb, boŋ bésudé nyé kǎŋ se ásé á dǔ-á-muú.”

* **10:1 Móom saámbé ne bébe:** Donje á kálag dé’só áwóó: móom saámbé.

16 Hée álāngéé bembapεε nén aá, “Kéńzéeé awě awógné nyé, né awógné me, boŋ kéńzéeé awě abáá nyé á yál, né abáá kǎŋne me. Kéńzéeé-’ε awě abáá me á yál, né abáá kǎŋne ane awě alómé me á yál.”

*Bembapεε Móom saámbé
ne bébe béhúú ámbíd*

17 Ade bembapεε móom saámbé ne bébe ábe Yesue ánlǒmmē béhúú ámbíd, bénlāá mǒ ne menyinge mésyāāl bán, “A-Sǎŋ, kǎŋne e’ dǎádǎŋ bé mbéb bénsudéd yál áwεd e’ sǒ, atúb áde sétúbé wε dǐn.”

18 Dǒo Yesue áhóbéé aá, “Nnyíné Satane ahúné ádyǒb nēŋgáne emwεdmwεd.

19 Mbagé nyé kunze ádyaa nyǒ bǒǒbe bengaabobe bé mpwεn ámín, ne átóm ngíne esyāál eche Satane áte, Satane ne ane awě akǒó syáne. Dyamdyam déebenlé nyé.

20 Boŋ ké nē ámpē, menyinge níme nyéwógéé méébǎg nén bán, áyāle e’ dǎádǎŋ éwógné nyé, boŋ pεn nyéwóg menyinge dásǒ nén bán, mǐn méténléde nyé ádyǒb.”

*Yesue awógé menyinge
(Mat 11.25-27, 13.16-17)*

21 Abwǒg-ábwǒg Edǎádǎŋ éche Esáá† énwǒgéd mǒ menyinge bwámbwam, ahób aá, “A-Tē, Sǎŋgwéé a nkoŋ ní sé ne mǐ mǐn, nsǎgnεn mǐbē ne wε áyāle elúmté mpín ní bēndem mam níme ébǎŋné bad bé debyéé ne bad bé nsǒŋtεn. Eε, a-Tē, nē dēn dǒo édǎá wεé, ébēnled.

22 Nlāa nyé mǎé, Echem Sǎŋ ebagé mekan mésyāāl áwēm mekáá. Mod ké nhóg eékǒŋtéé mwǎn ablí ésebé Dyǒb Titéε. Mod ké nhóg-ke ámpē eebíí’ é ngáne Titéε akǒŋté abé ésebé mwǎn, ne kéńzéeé awě mwǎn ádǎá aá mǒlúmed mǒ.”

23 Hée akúnne wée bembapεε, boŋ álāngē bó á kun-tē nén aá, “Nsimé ne bad ábe bényíne’ mekan níme nyényíneé nén!

24 A mbále nlāŋge nyé nén mǎé, bekal-bé-e’ dǎádǎŋ híin ne kǎŋ é bad híin bēnwánén ányín mekan níme nyényíné ne áwóg mekan níme nyéwógé boŋ bēnkényínne, bēnkénwóg-kaá.”

Ngan e mod a Samaria awě aboó nlém

25 Bǒǒb-pǒó meléede a mbéndé anhyε Yesue akǎg áte aá, “A-meléed, cheé mébenlé boŋ níkūd alonjé áde déemaá?”

26 Yesue antimtén mǒ aá, “Chán éténléde á kǎlag e mbéndé. Cheé éláá áwēd-te?”

27 Meléede a mbéndé ankwentén aá, “ ‘Étǎŋgéné bán édǎŋ Sǎŋgwéé ádǒŋ Dyǒb ne nlém nǐsyāāl, ne edǎádǎŋ ésyāāl, ne ngíne esyāál, ne mewēmten mésyāāl.’ ‘Edǎŋ-’ε mwǎnyoŋ nēŋgáne echoŋ yál.’ ”

28 Yesue anláá mǒ aá, “Ebíí akwentεn. Nzé ebelé áned, né wěkūd alonjé áde déemaá”

29 Ngáne ane mod áhédé’áá aá mǒsuud yál nzǒm, ansédéd aáken, “Nzé béchǎgεé wēn nē?”

30 Antmtεn mǒ, Yesue ankál ngan aá, “Mod a Israelé nhóg akagé’ áá eke, ámbíd á Jerusalem, átimé á Jeriko. Ade ápédé á etún-tē, bechǐb bēnkǒb mǒ, békǒbēn mǒ chǒm ésyāāl éche ánwālēē. Bēmbǒmtéd mǒ kǎŋ áhédé awé. Dǒo béchénné mǒ á nkǎg ní nzii.

31 Prisε pǒg chǒmpē esyǒgk’é’áá melemlεm mé nzii. Dǒo átáné ane mod. Ámbámé nkǎg ní nzii nímíníí.

† 10:21 Donje á kǎlag dé’ sǒ awóó Edǎádǎŋ éche Esáá; émpēe bán, éche edǎádǎŋ.

³² Mod a túmbé e Levi awě abelélé'áá nsón á Ndáb-e-Dyöb[‡] awě mómpē ampě áhed, boŋ anyín mó, ambamá melemlem.

³³ Boŋ mod a Samaria nhóg awe atómé'áá ene nzii, ampě áhed. (Bad bé Samaria βάβυε bad bé Israel béechemtanáa.) Ade ányiné mó, anwóg mó ngól,

³⁴ ákē áhed, ahé mó mel á sii-tē, ákanj chó, boŋ ápēmē mó á ésel mín. Απεινέ- 'áá mó á dyad-tē, boŋ ásōnlē mó á ndáb e beken, ábōngē mó. ³⁵ Νέε bīn é'sángé ahúd e'kálé é'táan, ábag nwóó ndáb áá, "Téd nēn, étagnan anén mod, kéchéé émpēe éche wébēbēdtē, mētímtéd we ámbīd á ehúu."

³⁶ Hée Yesue áseǵtēe ane meléede a mbéndé aáken, "A'tíntē e ábē bad beláán ábe bēntān ane mod awě bechīb bēnlāgēnnē, ahéé anlúméd áá módē waáb?"

³⁷ Meléede a mbéndé ankwentén áá, "Ane awě anwóg mó ngól." Hée Yesue álanǵeé mó áá, "Kǵg-kō, wémpē ébele' melemlem."

Mataa bó Maria békóbé Yesue nken

³⁸ Yesue ne ábē bembapēe bēmpě mwā dyad nhóg. Mmwaád nhóg awe béchógé'áá bán Mataa ankōb bó nken.

³⁹ Ane mmwaád mwānyan abedé đīn bán Maria. Maria anhyě Yesue adyēe á nkǵ, áwóg mekan nímé áyǵgté'áá.

⁴⁰ Boŋ Mataa anháǵēn áte ne nsón ní ndáb-te. Dóo áhyédé Yesue aláa áá, "A-Sánǵú, weenyínéé nēn weé, awem mwānyan atēdnédé mmēmpēn nsón nísyāǵl-ε? Láá mó weé, áhye áwōŋgen me."

⁴¹ Boŋ Yesue antímtén mó áá "A-Mata, nlém nítage we áte áyāle ekud é mekan.

⁴² Boŋ dyam ádé ahóg áde ákóó etóǵnén abé. Maria apwēdé dó, ádé-ε bwām. Meéhēlēē-'áá se nībel se békōbēn mó dó."

11

Ayǵged dé mekáne

(Mat 6.9-13, 7.7-11)

¹ Mbwe nhóg Yesue ambé hōm, ákáne'. Ade amáá akáne awě mbapēe nhóg anláá mó áá, "A-Sán, yǵgéd sé ngáne békánneé ngáne jōne án'yǵgēdtē ábē bembapēe."

² Yesue anláá bó áá, "Nzé nyēhede akáne, nyēhōb bán,

'A-Tē, edubé ébē ne ádoŋ đīn.

Mmoŋ nkamlēn níhye nítéd etál.

³ Bǵg sé echēd ndyééd e epun é bīn* mbwe téeé.

⁴ Lagsén sé nímēd mbéb,

áyāle sémpē sēlāgsan mod téeé awě apānné sé, weémwāg se sēhūn á mekǵsēn-tē.' "

⁵ Dóo áhóbéé áá, "Nzé ewóó wēn, boŋ ekii áwē melúde weé, 'Amūē, bál me e'wele é'láán hē,

⁶ sōn, nkúdē nken awě achabé abíd, awem nsón-a-echoŋ apedé áwēm. Meewóo-'áa chōm-éé nícháǵtanné mó.'

⁷ Boŋ ane wēn mó-ε atímténē we á ndáb-te áá, 'Weétagtē me. Mmaá me ekob adīb, syáābe ábēm bán sēmaá anaa ásé. Méehēnlé apáde ásé ábe we chōmchōm.'

[‡] 10:32 *Mod a túmbé e Levi:* Dyöb dēmpwēd enén túmbé ábel nsón á Ndáb-e-Dyöb. Bēwóngánnáá príse ánabe Ndáb-e-Dyöb áte ne áboŋsen ntíi ní mende. * 11:3 *Ndyééd e epun é bīn;* káa ndyééd e epun éche ehúe'.

⁸ Nláa nyé á mbále mée, saké ké ehoŋ éche nyédíí, chóo épād mó ásē. Boŋ abádnen áde wēbādnēnnē wēn, dōo dékǎŋ boŋ apádé ásē, ábē wē kéchéé éche éhédéé.

⁹ Nlāŋge nyé nēn mée, hedén Dyōb, ábē wē. Hēd, Dyōb débēl enyín, kūm ekob, Dyōb dédibnéd wē.

¹⁰ Ayāle kénzée awē ahēdné Dyōb, ákūd, awē ahédé-’ε, ānyín. Kénzée-’ε awē akumé ekob, Dyōb dédibnéd mó.

¹¹ Nyé besáá bé bān, nyé ahée mwān áhedénné súu, boŋ mó-’ε átímé ébage mó nyā?

¹² Káa nzé ahēdné wē akii á kúb, boŋ wē-’ε étímé ébage mó ngabobe a mpwēn?

¹³ Nzé e’bébtéd é’ bad nēe nyé nyébage áben bān kase é bwēm, tógtén-naa echen Sāŋ awē adé ámín? Chán-nō éebaá bad Edáádǎŋ éche Esáá ábe behédné mó chō.”

Yesue eesaa nlatén ne kǎŋ e e’daádǎŋ bé mbéb

(Mat 12.22-30; Mak 3.20-27)

¹⁴ Epun ehōg, Yesue abídté’áá mod edáádǎŋ é mbéb áte éche énkwid ane mod ebóbé. Áde émáá mó abíd áte, ane mod ambootéd dyam ahób. Nēn, dénkōbēd ndun e mod eché ebédé áhed menyáké bwāmbwam.

¹⁵ Boŋ nguse é bad énhōb bān “Belzebule, kǎŋ e e’daádǎŋ bé mbéb móo abage mó ngine ábided bad e’daádǎŋ bé mbéb áte.”

¹⁶ Bémpee ábe behédé’áá mó akag áte bēnhōb bān, álúmed bó e’chemléd ábe é’huú ádyōb.

¹⁷ Mó-’ε ambíí nímāb mewēmten, né-ǎǎ, anláá bó aá, “Aloŋ ké ahée áde ákábné áte, boŋ nchemten méesē, débēb. Abum á ndáb áde nchemtén-ne méesē, dōmpē dépāntéd áte.

¹⁸ Nzé édé bān, nkamlen níme Satane níkábné áte, chán-nō méhenlé atyéem? Nhóbe nē áyāle nyéhóbé bān, mbídté’ bad e’daádǎŋ bé mbéb áte ne ngine eché Belzebule.

¹⁹ Nzé ngine eche Belzebule chōo mbenladté ábided bad e’daádǎŋ bé mbéb áte, né ngine eche nzée-’ō ábēn bad ábe bebídté e’daádǎŋ bé mbéb bebēnladté? Bēn bóo békwid nyé nkáá.

²⁰ Boŋ ngáne édíí nēn bān ngine e Dyōb chōo mbenladté ábided bad e’daádǎŋ bé mbéb áte, nē álúmté nēn bān nkamlen ní Dyōb nípedé áfínté echēn.

²¹ Nzé ngine e mod ebōŋséné yāl, enōne áde dyad, échē chōm ké ehōg éekagké hōm.

²² Boŋ nzé mod awē atómé mó ngine, abulé mó áte, abwōgké-’ε mó, abelé ákōbēn bwēm ábe áwannéé nzum, ákabté-dε bwēm ábe ákōbné mó.

²³ Né-ǎǎ, kénzée awē eesē ne mē, né atāŋgan mē. Ane awē eewōŋgán mē álad, apáa páán.

Nzé edáádǎŋ é mbéb étímé mod á yāl ampe

(Mat 12.43-45)

²⁴ “Nzé edáádǎŋ é mbéb ébided mod áte, ébelé ébwāgē á ehyāŋge áhed abwōg áde ákōmméé áte. Nzé éekude, ébelé éhób aá, ‘Mētím ámbíd á ndáb eche mémbídté áte.’

²⁵ Ape áde épagké-’ε, ébelé étán nēe ndáb ésáá áte, bénábpé-’ε chō áte.

²⁶ Héé ékagké hōob, éke épēēn e’daádǎŋ bé mbéb bémpee saámbé ábe é’dé ebébtéd tómaa mwēn, boŋ é’hye é’sól ane mod áte, é’bwōg-ke e’dii áhed. Ákēn eched, ane mod abág ebébtéd tómaa ngáne ánsēbēē abē.”

Menyíŋge mé mbále

²⁷ Βοῶβ-ρῶό áde Yesue áhóbé nê, mmwaád nhóg áfínté e bad, ankanéd ehób ámín aá, “Nnam níbè ne abum áde áchyaá wε, ne abii áde ámwánté wε.”

²⁸ Yesue anhób aá, “Nnam mēbē dāsō né bad ábe bēwóge’ Eyale é Dyöb, bēbélé-’ε ngáne ehóbεé.”

Bad bé’ chii béeh̄t̄idεε e’chemléd did

(Mat 12.38-42)

²⁹ Amute á bad dēbootéd akāl. Héε Yesue áhóbεé nén aá, “Nyongel e’chii edii nyongel e e’bébtéd é’ bad. Béhede e’chemléd bé menyáké anyín, bon béekudté, nzése e’chemléd bé menyáké ábē Jonaa.

³⁰ Nyaa eche Jonaa ámbēē néε e’chemléd wée bad bé Ninive, chōó Mwān-a-Moonyon ábēē wée enén nyongel e bad.

³¹ A Mbwe mé Nkáásé, mmwaád awé akamlánnaá alon á Seba, ányemé á son-tē, nchoo ne nyongel e bad bé e’chii. Abíd mbón eché ékwid bō nkáá. Békwxé nkáá áyāle ambíd se nchabnede wée nkōrsé rísógé, áhye déwóglen mam mé debyéé míme Solomonε áyágté’áá. Bon chii nén mod adé hén awé átómé Solomonε.

³² A Mbwe mé Nkáásé bad bé Ninive bényemé á son-tē nchoo ne enén nyongel e bad. Bébid mbón eché ékwid enén nyongel e bad nkáá, áyāle bad bé Ninive bēntédé mímab mbéb áde Jonaa ánkáléé bō Eyale é Dyöb. Bon chii nén mod adé hén awé átómé Jonaa.

E’nyinεn bé ekide é’ yāl e mod

(Mat 5.15, 6.22-23)

³³ “Modmod eémā’ é etrukán achod se ákōō chō káa akúdtén chō † á ebwóg-sé. Bon abelé ákélé chō dāsō ámín, ábel bon kénzée awé asóle á ndáb, ányinne ekide.

³⁴ Did dōó adé ngáne etrukán é yāl e mod. Nzé did ákénlé wε áte, echoy yāl esyāal chōmpē ebélé ekélé. Bon nzé déékēnle, yāl chōmpē ebélé elón wε ne ehíntén.

³⁵ Né-óó, nyétóó, ábel chōm éche ényínte nyé ekide, éetimé abé chōm éche étimte’ nyé á ehíntén-tē.

³⁶ Nzé édé bán echoy yāl esyāal elóné ne e’nyinεn bé ekide, ésebán ehíntén édé abwóg ké ahóg, né yāl émwaa áte, melemlen ngáne etrukán épenté ekide.”

Yesue aslé Befarisia ne bemeléede bé mbéndé

(Mat 23.1-36; Mak 12.38-40)

³⁷ A pónde eche Yesue áhóbεé nê, Farisia nhóg, anchélé mó aá, áhye búmō bédyéé ndyééd áwe ndáb.

³⁸ Né-óó ankē, asól á ndáb-te, búmō bédyéē á tébele. Ane Farisia ambé menyáké anyín bán Yesue eéwopεé mekáá ngáne éhédnádtáá, bon ábootéd ndyééd adye.

³⁹ Dōó Sāngwéeé álāngεé mó aá, “Nōné’, nyé Befarisia, nyéwobpe mbwendé ne díse ámbíd e ebwóg, bon adum á bwēm ne ebébtéd bōó bélóné áwεn nlém-tē.

⁴⁰ E’dimdim é’ bad ngên! Mod awé ahagé ámbíd e ebwóg, saá mó ahagé kááñne áte-yε?

⁴¹ Bon nyétéd bwēm ábe é’dé áwéd-te, nyébage’ betóótókē bé bad. Né chōm ésyāal áyāl echén ésan.

⁴² “Medim ne nyé, Befarisia! Nyétéde ké meseb ne nduu ne byaa ábíníí é’syāal bémpee, nyébage Dyöb donge nhóg áfínté e monge dyóm. Bon

† 11:33 Donge á kálag dé’só éewóó’ é káa akúdtén chō.

nyéēhēdēē e'boŋ bé nlém ne edaŋge é Dyōb alúmed. Nyētánǵéné nímén mésyāāl abel, ésebán nyéchoḅte' nímíní.

⁴³ “Medim ne nyé Befarisia! Nyédəə metii mémháá adyεε á ndáb é mekáne, nyédəə-ε meləntən mé edúbé akud á dyən-té.

⁴⁴ Medim ne nyé! Nyédii néε soŋ éche ésósmé, éche bad bétóméé ámln, ésebán bébíí.”

⁴⁵ Dóo meléede a mbéndé nhóg álánǵéé mó aá, “A-meléed, nzé ehóbe nê nedé né esyáa' sémpe.”

⁴⁶ Yesue ankwentén mó aá, “Medim ne nyémpē bemeléede bé mbéndé! Nyépəmtad bad nted níme ríléle apém, boŋ nyébən nyéebanéé ké ekáá apémed bó mó.

⁴⁷ Medim ne nyé! Ayāle nén, bekal bé'dəədəŋ ábe besóó bənwū'ε, nyélónǵé bó soŋ.

⁴⁸ Né-óó nyébíde' mbóŋ, nyélúmte-ε bán, besóó bəmbel bwám ngáne bənwū'ε bekal bé'dəədəŋ. Nyé-'aá nyélónǵé bó soŋ.

⁴⁹ Ayāle nē, Dyōb ne áde debyéé anhób nén aá, ‘Mélómē bó ábəm bekal bé'dəədəŋ ne bəmbapεε bé nlomag, bəwū behóg, béhǵkε-ε ábíníí.’

⁵⁰ Né-óó, enén nyonǵel e bad chóo ékūd nkóǵsen áyāle bekal bé'dəədəŋ bəsyāāl ábe nímāb mekií mésyóǵké se á mbooted mé nkóŋsé,

⁵¹ mbooted ne mekií níme Abéle átímé' wéε Sakaria, awé bənwū'ε áfinté e menyán mé mendε ne hóm áde ásáá. A mbále, enén nyonǵel e bad ékūd nkóŋsen áyāle nímé mekan mésyāāl.

⁵² “Medim ne nyé bemeléede bé mbéndé! Nyékáá e'kii bé ekob é debyéé. Nyébən nyéesaá asól, nyékáa-ε bad bəmpēe ábe béhede asól.”

⁵³ Ade Yesue ásyǵǵéé áhed áke, bemeléede bé mbéndé ne Befarisia bəmbootéd mó ahób bwāmbwam, bésədtε-ε ekud e mekan.

⁵⁴ Bébélé'áá nímén mésyāāl áhíined mó melám ábel békóben mó awusé.

12

Elébé tǵǵene bad bé elanǵé

(Mat 10.26-27)

¹ Ambíd e pónde ndun e mod enladén áte, kóŋŋ etál éebédeé. Dóo Yesue ábóótédé bó akalən, mbooted ne bəmbapεε álánǵé bó nén aá, “Nyétéd pónde ne elanǵé éche Befarisia, édé nēngáne esultən.

² Dyamdyam déesaá á e'koŋnéd-te áde déebíd áwed. Ké ahóg-ke déesaá, áde ásósmé boŋ bán déebyéénné.

³ Dyam ké áhéé-ε áde nyéhóbé á ehíntən-té, déwōǵnéd á e'nyínen bé ekíde. Dyam áde nyékálé-'aá á kun-té ámbíd e ekob, dékanléd á nhéné.

Ane awé bétǵǵéné abán

(Mat 10.28-31)

⁴ “Amúé, á mbále, nyéewógé mbwóg ne moonyoŋ awé ahele awúu ekob é yál ésebán ahele dyam démpēe abel. Awáb eetóméé nē.

⁵ Nláa nyé mēé, mod awe nyétánǵéné abán, adíí ane awé néε amáá wε pemε e alonǵé akoben, awóŋ-ε ngíne eché ábwéméé wε á dū-á-muú. Ne mbále ane móo nyétánǵéné abán.

⁶ Eesaá mbále nén bán, kábpε ébe ngēn, chóo béchannéé ndun étáan-ne? Boŋ ké nē Dyōb déechatánné ké pǵg.

⁷ Dyōb ábíí kóŋŋne mesonǵé mé e'sid ábe é'dé nyé á nló. Né-óó, nyéewógé mbwóg, nyédé etóǵnén tómaa ndun, ké émbuú ké áte.

Akob Yesue káa ábáñ mós á yál
(Mat 10.32-33, 12.32, 10.19-20)

⁸ “A mbále, kénzée awè ábíd me mbón á’sò é’ baányon, Mwän-a-Moonyon mómpè ábíd mós mbón á’sò é’ ángel é Dyòb.

⁹ Bon mod awè abáá me áyál á’sò é’ baányon, me-’ε mēbāñ mós áyāl á’sò é’ ángel é Dyòb.

¹⁰ Kénzée-’ε awè ahóbé eyale é mbéb tñgene Mwän-a-Moonyon, ákūd alagsen, bon kénzée awè ahóbé e’bēbtéd é’ mekan tñgene Edáádəñ éche Esáá éekudté alagsen.

¹¹ Nzé édé bán bésómné nyé wée belyóged bé dyad ne benkamlene, nyéetágé áte, ngáne nyékáá’ é káa dyaam áde nyéhəpə,

¹² áyale nzé pónidé epedé, Edáádəñ éche Esáá éyágéd nyé chòm éche nyétəñéné ahób.”

Ngan e eyókél é nhon mí mod

¹³ Atínté e ene ndun e mod, nhóg anláá Yesue aá, “A-meléed, láá mwānned wée ákabe sómō mbwóg áte.”

¹⁴ Bon Yesue antimtén mós nén aá, “Nzé-módé abānné me née mod awè akáadte’ bad, ákabe nyé mbwóg áte?”

¹⁵ Dóo álāngéé bós moosyáál aá, “Nyétóo, nyéebanné nlém áyāle awón á bwēm, áyāle saké nhon mós ndide moonyon á alongé.”

¹⁶ Ankalé-’ε bós ngan aá, “Nhon mí mod nhóg mémbe. Anwón nzag. Ade ene nzag échyáá, embíded medyé nkute ne nkute.

¹⁷ Nhon mí mod mé ménhəb áwe nlém té aá, ‘Chán mébenlé bəəb áde étál éelyəgéé wée níkongéé medyé?’

¹⁸ Dóo ádólé áte chósón bon ahóbé aá, ‘Nén dóo mébenlé. Məpāñ échem ndáb é e’konéd, nlón émpée éche ékálé áte, bon nkúm medyé áwéd-te, ne nhon nímém nisyāál.

¹⁹ A pónidé eched-taá mēláá’ é échēm edáádəñ meé, nládté yál nhon míme medyéé mwé ne mwé. Bəəb-pəós mēched yál, ndyág, nímwág, níhogé-’ε alongé.’

²⁰ Bon Dyòb dénlāá mós nén, aá ‘Edimdim é chòm chén. Nkuu nén dēn mēkobén we pemé e alongé. Abé bwēm é’syāál ábe émáá-aá alad áte, nzé-módé wélyəgnēdtē bós?’

²¹ Nē dóo édíí ne ké nzé-módé awè akúmmé yál nhon, bon eésē nhon á’sò é’ Dyòb.”

Weétágé áte á alongé
(Mat 6.25-34)

²² Dóo Yesue álāngéé ábē bembapεε nén aá, “Né-óó nyéetágé áte á alongé se nyéhəbē nén bán cheé nyédyēē, ké’ε cheé nyéwāā’ é á yál.

²³ Alongé átomé ndyééd, échen yál-le ámpē edé etógnén tómaa mbóté.

²⁴ Nyénəne’, nkənékəñ. Mēwēnēē bwēm, méēpādēē, méēwóo-’áa hóm áde bēkongéé medyé. Kénē, Dyòb adídte mós! Nyéebii’ é bán nyédé etógnén bwāmbwam tómaa menəñ-ε?

²⁵ Nzé-módé áwen tínté ahele átāg áte káəñ, abád ké epun ehóg áwé alongé áyāle átagéé áte?*

²⁶ Néε nyé modmod nyéehelée mpín mé akan née nímé abel, cheé ékáá bon nyétagé áte áyāle mam nímé mélyógé áse?

* 12:25 Abád ké epun ehóg áwé alongé káa áchab tómaa ngáne adlí.

27 “Nyénəne’ mbonja ngáne ékwogéé. Eebeléé ntü, éebanjéé mesanj. Nlånge nyé nén meé, ké kəŋ Solomonə ne nímə nhən nisyāā eewāa’áá mbóté éche épédé échén mbonja ké póg e’boŋ.

28 Nzé Dyöb áheləse áwāādté e’sum ábē é’bāg chii boŋ chān bēhé bó á dü, né éetómme nyé awāād né-ye? Chān adúbe ádíí nyé mwāmpin nén?

29 “Nyéebanné nlém bán, cheé nyédyéé káa cheé nyémwéé. Nē déetagté nyé.

30 Echē nyaa é bwēm chōo bad bé nkōŋsé béchyeé’é akud. Awēn Titéé mwēn abíí áá nyétógnéné ábén bwēm.

31 Né-óó, nyésébe nyéhəd mam mé nkamlən í Dyöb, dōo Dyöb débéé nyé ábíníí bwēm.

Nhən níme ndé ádyöb

(Mat 6.19-21)

32 “A-bānbān, nyéewógé mbwəg. Echen Sāŋ awóó mewēmtən níme mészáá ábe nyé ngine e nkamlən.

33 Nyésóm áben bwēm, nyébag betóótökē bé bad mənē. Nyéhəd ekwé é ngáb éche éehelé amaa áse. Nyéhē nhən nímən á e’koŋnéd ábe é’dé ádyöb, wéé dyamdyam déebənle mó, wéé bechīb béehənle mó achīb, sii-’é éehənle mó adyé.

34 Nyébíí bán wéé nhən mbáǵkē mod, áhed dōo nlém-me mbáǵkē mó.

Mod-téé ábē mboŋsén

35 “Nyépūd abad, nyéchod-te etrukán,

36 nēŋgáne bad ábe básine’ echab sāŋ awē akií á ngande e e’wóngé ábel boŋ nzé ahúú húén, boŋ akumé ekob, bēnednéd mó ábwəg-ábwəg.

37 E’boŋ é’ yāl áte ne bembəlede ábe echab sāŋ épéé, boŋ atán ngáne bédyéé epin, básineé mó. A mbále áboŋsén, ádíí bó áse, atómtéd-te bó ndyééd.

38 Ké melúde dōo ámpéé, káa epəg é mbwembwə, boŋ atán bó melemlem, e’boŋ é’ yāl áte bélyāg é’tán bó.

39 Nyébíí-’é bán, nzé nwóó-ndáb abyéé’áá pónde eche nchīb ápéé, né ádyéé epin, ésebán atēdte áá, básal mó ndáb.

40 Nyémpē nyétāŋgénē mboŋsén abé, áyāle Mwān-a-Moonyonj āpē á pónde eche nyéewēmtənēé bán āpē.”

Mbəlede awē abele nímə nsón

ne nlém nhəg ne awē eebēle’

(Mat 24.45-51)

41 Petro ansedéd aáken, “A-Sāŋ, sé bēn pən-éé ékanléé enén ngan-ə, káa bad bésyāā?”

42 Sāŋgwéé ankwentén áá, “Né-óó, nyé mod té ábē néé mbəlede awē awóó debyéé, awē abele-’é mam níme eche sāŋ álāŋgé mó áá ábel. Mó adé mbəlede awē eche sāŋ ábānné áá ákamlən bembəlede ábíníí, ányín-ne nén áá békúdé ádáb akab á ndyééd pónde échē etāŋgénē.

43 Nnam mébē ne ane mbəlede awē eche sāŋ áhūū’é, boŋ atán nēŋgáne ábeléé mam níme ányāgtēnnē mó.

44 Ne mbále, nlånge nyé nén meé, ane mbəlede eche sāŋ ábané bwēm é’yāā ábe áwóó áwe mekáá áá ákamlən.

45 “Boŋ nzé ane mbəlede adé mbəlede a mbéb, boŋ ahóbé áwe nlém-té áá, ‘Ebēm áte boŋ echem sāŋ áhūū á eke-té.’ Né-óó aboótédé ábíníí bembəlede bé bebaád ne bé baachóm ábe bédé áse échē awanən, ádyāg bwēm, ámwāg-ke ním mekóbe mó,

⁴⁶ ane mbəlede eche sáŋ áhūu epun éche éewēmtené ne á pónde eché enkembíí' é aá áhūu. Né bəbwēm mós á ebwóg,[†] békógsén-ne mós ne nhel melemlem ne bad ábe bəwúú nló áte.

⁴⁷ Ane mbəlede awé abíí ntíi mé nsón míme sáá-a-ndáb, bonj eébonjsene, káa eehíde míme ntíi ámbíld, ákud mbéte e ngíne.

⁴⁸ Bonj ane awé enkembíí ntíi, bonj ábelé epandé, békūdē mós kúdtén. Mod ké ahéé awé bəbúdé abe, né-'aá bəbudtē mós ahēden. Ane-'e awe bétómténē abud dé abe, né-'aá bétómēnnē mós abud dé ahēden.

Yesue ad mōpēéné nkabén

(Mat 10.34-36)

⁴⁹ “Muú mós níhyédé akwéd á nkōŋsé. Mendāŋ-'e meé, né mēmmdak akóben.

⁵⁰ Bonj ntāŋgéné nsébé níkud edusen é metuné, mēmād-te chós akud bonj nlém mérpwiitéd me.

⁵¹ Nyewēmtan bán, nsan mós níhyédé apēen á nkōŋsé-ye? Aáy, saké nsan, nkabén mós nípēéné.

⁵² Bootya bəob áke á'sō, ndáb eché ewóó bad bétáan ékabén áte, beláán bétāŋgéné bəbe, bəbe-'e bétāŋgéné beláán.

⁵³ Kəkəə ēbē.

Sáá átāŋgēn mwán a mwenchóm, mwán a mwenchóm átāŋgēn sáá.

Nyaá átāŋgēn mwán a mmwaád,

mwán a mmwaád átāŋgēn nyaá.

Nyāŋkálé átāŋgēn mwán a mmwaád,

mod mwán a mmwaád átāŋgēn nyāŋkálé.”

E'chemléd é' bin

(Mat 16.2-3, 5.25-26)

⁵⁴ Yesue anláá amute aá, “Nzé nyényiné mbag ébide á mbəŋ, nyébelé nyéhób bán, ‘Mbúú échā bəob’, ébenléd-te áned.

⁵⁵ Nyényíne-'áa epub éhúe' á pəd e mbəŋ, nyéhōbe' bán, ‘Enyēn ébēnēd mod bəob,’ ébé-'e áned.

⁵⁶ A-bad bé elanǵé. Néé nyépédé abii ngáne beláá' é bin nén, cheé ékás bonj nyéehēlē mam míme mébenlad nyé á'sō-te chii nén achem?

⁵⁷ “Cheé ékás bonj nyébēn nyéehēlē adol áte nén bán, kəse e akan nén eché ehēdnad abel?

⁵⁸ Nzé mod ahóbé aá, mókēene wē á kóte, hēd nzii kásŋ nyúmō bétim ásé á nzii. Esebé nē, nzé ahédé wē á kóte, kóte chós-'e ébēé wē á mekáá mé plúse, plúse chós-'e éhē wē á mbwóg.

⁵⁹ A mbále, nlánge wē meé, weéhēlē-sē ebíd á ndáb e mbwóg-tē wē kásŋ né etwedé ádōŋ alúm ásyāāl.”

13

Nyétéde abel dé mbéb, nyétimēn Dyōb

¹ Ade Yesue ádíi áhóbéé nē, dós nguse é bad éche émbē áhed elāŋgēé mós ngáne Paylede ánwūú' é bad bé Galilia áde bəbágé'áá Dyōb mende mé e'lém.

² Yesue antimtén bó aá, “Néde mewēmtēn méde nyé bán, ábē bad bé Galilia ábe bēnkūd échē eben, bétómé ábiníi bésyāāl ebébtéd abé áyāle bēnwēē ene ndín e kwééd-é?

³ Aáy! Á mbále, nzé nyéétéde mímen mbéb se nyétimēn Dyōb, né nyé moosyāāl nyééwé, nyébós-'e.

[†] 12:46 Bəbwēm mós á ebwóg káa bésél mós dte e'sónj é'be.

4 Chán-náa ábínií dyòm á mod ne waam ábe ntón-ntón ní ndáb ménkúmtédte ámín á dyad é Silom, bon bówé? Nédē mewēmten médé nyé bán, béntōmtēn ebébtéd abé tómaa bad bésyāā́ ábe bénlṓj á Jerusalem-é?

5 Aáy! A mbále, nzé nyéētēdte nímen mbéb se nyé́tmēn Dyōb, né nyé moosyā́al nyéēwē, nyébóó-’é.”

Ngan e bwel abe béechyāā

6 Hée Yesue ákálé ngan aá, “Mod anwṓj alín á bwel á nzag-tē. Ankē epum é bwel ahed áwedé-mín ngen ne ngen, bon enkēnyínné ké ehóg.

7 Hée álāngēé nnōn-a-nzag aá, ‘Edé bōob mwē rílaán áde rípagké á bwel-sé hén mwē téé, bon meenyínéé epum ké ehóg. Kwel bō. Chán é’hele é’madé ahṓj á ndōob-tē ngēn?’

8 Hée nnōn-a-nzag átímtanné mó aá ‘A-sán, tedé bō ké mwē nhóg ámpē. Mēnabé bō áse, nhíí-’é bō nkúmbág.

9 Nzé é’chyáá e’pum mwē níme ríhúé’, né édé bwám. Nzé-’é béechyāā, né békwlé bō.’”

Yesue adidé mmwadd nhóg bwám á Mbwe-mé-nkóme-áte

10 Mbwe-mé-nkóme-áte nhóg, Yesue ayógté’áá bad á ndáb e mekáne póg.

11 Mmwaád ambé áhed awé edāóđā́j é mbéb émbēé áte á etún é dyòm á mwē ne waam. Embēl mbíd enwúmén mó nyaa echē éehelaá yāl asále áte bwám.

12 Ade Yesue ányiné mó, anchélé mó, aláá mó aá, “A-nyan, nkole níme ékonlé nímaá.”

13 Ade ábáné mó mekáá á nló, ane mmwaád ansalé yāl áte ábwōg-ábwōg, ábootéd-te Dyōb aken.

14 Hée mod awé abédé nló á ndáb e mekáne, álíí áyāle adid áde Yesue ádíde ane mmwaád bwám á mbwe-mé-nkóme-áte. Alāngē bad aá, “E’pun é’dé ntóób ábe mod átāngéné nsōn abel. Nzé nyédā́ bwám adyēe nyépē ábē e’pun, saké á mbwe-mé-nkóme-áte.”

15 Hée Sāngwéé ákwētanné aá, “Nyédoge bad. Nyé ahéé eéhunné nyag káa ésel á ebem-té se ákēēn chó á edíb á mbwe-mé-nkóme-áte?”

16 Anén mmwaád adí mwān awe Abrahamē. Satanē anhan mó ne nkole á etún é dyòm á mwē ne waam. Nyélaa me ké mbéb móó ríde, áhúd mó á mehanjé á mbwe-mé-nkóme-áte?”

17 Chóm éche ánhōbpē énwōgēd bad ábe bétāngánnáá mó e’sōn. Moosyā́al anwóg menyíngē áyāle mam mé ményáké níme Yesue ámbenlé.

Ngan ébe é nkamlēn ní Dyōb:

Ngan e mbál níme ríchíne (Mat 13.31-32; Mak 4.30-32)

18 Yesue anhób aá, “Chán nkamlēn ní Dyōb ríkóó abé? Cheé ríhele ríhāgtén mó-yēé?”

19 Ndii nēngáne mbwé e mbál-e-bū echē mod átédé bon ásob á nzag-tē. Ade ékwógé, éfím bwel bēn, menōn méhyé mélṓj á ngen-tē.”

Ngan e esultēn (Mat 13.33)

20 Yesue ansédéd aáken, “Cheé ríhele ríhāgtén nkamlēn ní Dyōb-é?”

21 Ndii nēngáne esultēn éche mmwaád ámuúnédé asii á pān é mbumé ní ngun éláán káó́j esule.”

*Asól á ekob éche échiné áte**(Mat 7.13-14, 21-23)*

²² Yesuε andii ambé á eke-té éche ákágé'áá á Jerusalem. Dyad téé áde átomé'áá, ámbáá ne ásad, ayágté'áá bad.

²³ Mod nhóg anseǵéd mó aáken, "A-Sánǵú, mesonǵé mé bad níme Dyöb désonǵé alongé, mébuú áte káa méebuú'é?" Yesuε anláá bad áhed aá,

²⁴ "Nyéwanen káǵn nyésól á ekob éche échiné áte, áyále, á mbále, ekud á bad éwanén asól, bonǵ béehenlé.

²⁵ Pónǵé épǵ eché nwóó-ndáb áhidéé áse, bonǵ ápēn ekob. Ene pónǵé dǵo nyébootéǵté atyéem á ebwóg, bonǵ nyékumé' ekob nyéhǵbē bán, 'A-Sánǵ, dibnéǵ sé ekob.' Mó-'ε átimtén nyé aá, 'Meebii'é wéε nyébídé.'

²⁶ Nyé-'ε nyééhǵb bán, 'Syáné dendyé ndyééd, demmwé-'ε mǵm hǵm ahóg, eyágté'áá-'ε áwéǵd myad.'

²⁷ Átimtén nyé aá, 'Syáné deewǵnǵéε dyamdyam. Nyésyǵǵ me á dǵd-te. E'bébtéd é' bad ngēn!'

²⁸ Ade nyényǵnné Abrahamε, Aisigε ne Jakǵbe bǵǵbe bekal bé'dǵǵǵǵǵ bédé á nkamlen ní Dyöb-te, bonǵ nyé pēn nyéǵhǵg á ebwóg, achii dé awé ne adyé dé mesonǵ á nsǵl, dǵo déǵtéd etǵl pónǵé eched.

²⁹ Bad bébíd á akuu ne á mbǵn, á mekonekone ne á mehúléhúlé, bétéd medii á ngande e nkamlen ní Dyöb.

³⁰ A pónǵé eched, bad ábe bēnlyǵg mbíd bǵǵ bétǵm á'sǵ, bé'sǵ-'ε bélyǵg mbíd."

*Yesuε alebe áyále bad bé Jerusalem**(Mat 23.37-39)*

³¹ Melemlem mé pónǵé nguse é Befarisia émpǵ wéε Yesuε, béléǵngē mó bán, "Syǵǵ hén, ékag hǵm démpǵe, áyále kǵn Herǵde ahede we awúu."

³² Yesuε ankwentén bǵ aá, "Nyéke nyéláa éché esǵb bán, 'Chii ne chán mǵhǵd bad e'dǵǵǵǵǵ bé mbéb áte, níǵhǵǵǵ-te bad, bonǵ súú ébe mǵmǵd nímmēm nsǵn.'

³³ Bonǵ ké chán ébēε, ntǵǵné abé á nzii chii, chán, ne sú ébe, áyále éeboo'ε bán, nkal é'dǵǵǵǵǵ áwé hǵm démpǵe ésebán á Jerusalem.

³⁴ Wóowó! A-bad bé Jerusalem, nyéwúε bekal-bé-e'dǵǵǵǵǵ nyéwúǵnnē-'ε bad meláá ábe Dyöb álómé! Nkēnwǵn áte ngen ne ngen álad nyé áte nēǵǵáne nyaá-kǵb ákúǵanné bán, bonǵ nyéehéǵéé etǵl!

³⁵ Nyénone', Dyöb déǵtéd echen ndáb. A mbále, nlǵǵge nyé nēn meé, nyéenyínénné me dǵd ámpǵ kǵǵn ne á pónǵé eche nyééhǵbpē bán, 'Nnam ne ane awé apedé á dǵn á Sǵǵú.' "

14*Yesuε achǵǵté mod awé melǵg mékǵbé*

¹ Mbwε nhóg Yesuε ankǵ ndyééd adyé wéε ndǵle a Farisia pǵg. Nén démbē a mbwε-mé-nkǵme-áte. Ade ápedé áwed, bēnǵné'áá mó chodchod.

² Mod mó-'ε ambǵ áhed awé melǵg mémbíǵté á yǵl.

³ Héε Yesuε áseǵtǵé bemeléde bé mbéndé ne Befarisia aáken, "Edé kunze áǵid mod bwǵm á mbwε-mé-nkǵme-áte, ngé éesaá?"

⁴ Bonǵ bēnkēnhǵbpé dyamdyam. Dǵo ákǵbé ane mod awe melǵg mébídé á yǵl á ekáá, áǵidé mó bwǵm, asúúǵ-te mó á ndáb.

⁵ Ámbíd e nē dǵo áseǵtǵé bǵ aáken, "Nyé ahéé adé awé mwǵn káa nyag éhǵnné echóg, bonǵ eéǵag chǵ abided ábwǵg-ábwǵg, ké émbē bán á mbwε-mé-nkǵme-áte?"

⁶ Bonǵ bēnkēnwǵǵé dyamdyam áhǵb.

Ake dé e'ken ne akob dé nken

⁷ Ade Yesue ányiné bad ábe bēnlēbēē ádyé ndyééd bésyāāl ábe bēpédé bēbóótédé medii mémbaá apwēd, ankalé bō enén ngan aá,

⁸ “Nzé mod alébpé wē ngande, weépāg-se éhéde e'dii e'mbáá, áyāle éhēle ébē né belébpé mod ampée awē adelé áte tómaa wē.

⁹ Nzé ene nyaa e mod epedé-'e, mod awē alébpé nyé moosyāāl ālāā wē aá, 'Béé anén mod atii.' A pónde eched dōó étiméé atii asad atéd ne akwáké.

¹⁰ Boŋ nzé epedé ene ndín e hōm, etédéé e'dii ábe é'dé á ahāngé, ábel nén nzé nwóo-ngande anyiné wē, mōō ālāā wē aá, 'Amúē, kē édyēé á atii ámbáá híníí.' A pónde eched dōó ékudéé edubé áfinté e bad ábe nyāābōo nyétédé tébele.

¹¹ Né-ōó, nyébii bán, kénzée awē achágté yāl, Dyōb désudéd mó. Kénzée-'e awē asúdté yāl Dyōb déchāgēd mō.”

¹² Hé-'aá álāngéé mod awē anlébé mó nén aá, “Nzé ehóbé wēé, móchage' ngande, weehóbé wēé mólébpē áboŋ bēn, káa áboŋ baányan, káa echoŋ túmbé, káa bewón bé ngáb ábe nyāābōo nyébyééné. Nzé ehídé nē, né bōmpé bēlēbē wē. Nē ábele átim ehéen ne metuuten.

¹³ Boŋ nzé echagé ngande, elébé dāsō betóótōkē bé bad, ne bad ábe bēhúné epēd, bōōbē bad ábe bēkwédé ndím.

¹⁴ Nzé ebélé nē, né wēkūd nsimé áyāle bēehēnlé wē asábe ámbid. Dyōb désábē wē áde bad bé bwām bēpuú'ē.”

Ngan e sánkalaa a ngande

(Mat 22.1-10)

¹⁵ Ade mod nhóg awē bōōbē Yesue béntēd tébele áwógé nē, dōó álāngéé Yesue aá, “Nsimé ne bad ábe bēdyē ndyééd á ngande e nkamlen ní Dyōb!”

¹⁶ Dōó Yesue álāngéé bō aá, “Mod nhóg anchāg sánkalaa a ngande, ábūd-te bad alébe.

¹⁷ Ade pónde e ngande épédé, anlóm awe mbāledē wēé beken ábe ánlēbēē aá, 'Nyéhyag, mboŋsēn rísyāāl nímaa abé.'

¹⁸ Boŋ bō moosyāāl, bēmbóotéd mechāngé abe nhógē-nhógē. Nhóg anhób aá, 'Nchané etúú, ntāngéné chó ake dé anyín. Ncháa wē, méehēnlé ahye.'

¹⁹ Ampée anhób aá, 'Bōōb nén dēn, dōó ncháné nlád ní nyag rítāan éche élié' nzag. Chóó níkgaké ahāgten nén. Són, méehēnlé ape!'

²⁰ Ampée-'e anhób aá, 'Nkudé sómbé ekóólé-ekóólé. Né-ōó, méehēnlé ape!'

²¹ Ane mbāledé antím ámbid, áke áláá eche sán mam mésyāāl. Dōó ekan ékóbé eche sán áte, boŋ álómē ane mbāledé. Anhób aá, 'Kāg mehélé, ékag á ntém ní nzii, káōŋne á mēte mé nzii mé dyad-té, éhúēn betóótōkē bé bad, ne ábe bēhúné epēd, ne ábe bēkwédé ndím, ne ábe bēehéle áke.'

²² Eebeméé áte ane mbāledé anhuú ámbid, aláá sáá-a-ndáb aá, 'A-sán, mbélé ngáne wēnhōbpē, boŋ ké nē, etál élyágé édé.'

²³ Dōó Sáá-a-ndáb áhóbéé aá, 'Kāg á nzii émbáá ne nzii é mehín, échéle kénzée wēé áhyag ábel boŋ ndáb élon.

²⁴ A mbále, mod ké nhóg awē ménsēbēē alébe, éewógkē chōm ké ehóg á nsāl á ngande-té hén! ”

Abé mbapēē

(Mat 10.37-38)

²⁵ Mbwē nhóg ndun e mod éhídé'áá Yesue ámbid. Héé ábóótédé bō aláa nén aá,

²⁶ “Nzé mod ahóbé aá, móhíde mē, ésebán achádténé nyaá, sáá, mwaád, bán, baányan, káōŋne ádé alonjé dēn, ene ndín e mod eékwognedéé ábē awēm mbapēē.

²⁷ Kénzée awē eepéme ádē awōg, boŋ áhídnē me, eékwognedee ábē awēm mbapee.

²⁸ “Nzé-módé ábē awē áwōŋ mewémten álōŋ sánkala a ndáb, boŋ eesébpē adyēe ásē, áhagten nkun níme ene ndáb étēdté mós, ábíi ké mósóhēl chós amad, káa mósóhēnlé?”

²⁹ Nzé amaá-’e ndáb asume, boŋ eéhele chós amad, moosyáál awē anyíné abelé ábootéd mós awel, béhōbē

³⁰ bán, ‘Mod nhóg ansáá ndáb, boŋ eéheleé chós amad.’

³¹ “Nzé kân póg ewémtné waáb kân bel akum, abelé asébé yál ahag á ekáá ké mesongé mé sánze níme áwóó dyam dyóm dé ekálé, béhēl ábe waáb awē áwóó sánze dyam móom mé ekálé mébe.

³² Nzé anyíné aá mósókwognedee, abelé alóm belyáged bé dyad á’sō wēe waáb, waáb adēpe mós benben, ábel nén békóm nsaj.

³³ Melemlem nē dós édíí né ké nzée awē eehúde chóm ásyāál nlém. Ene ndín e mod eékwognedee awēm mbapee ábē.

Nkwē níme mbódé e’nyin
(Mat 5.13; Mak 9.50)

³⁴ “Nyébii bán nkwe ndé chóm é bwám. Boŋ nzé mbódé alaj, chán béhele-se bényínéd mós ámpē?”

³⁵ Méesaá dyam dé abelen ámpē. Apim dós bépimeé mós. Bad ábe bēwóó metúu, bésóŋten bwám.”

15

Ngan e ndyōŋ ní mbód níme mémbo
(Mat 18.12-14)

¹ Mbwe nhóg belad bé tááse ne bebel bé mbéb bémpee, bémpe wēe Yesue.

² Dós Befarisia ne bemeléede bé mbéndé bényongeé áte bán, “Nédē anén mod awonje bebel bé mbéb, bóbōó bédyag-ke ndyééd hóm ahóg.”

³ Héē Yesue ákánlé bós ngan nén aá,

⁴ “Nzé-módé adé awē áwōŋ mbwókel é ndyōŋ ní mbód, boŋ nhóg mbóó, boŋ eétdé nímíní móom mé ndyōŋ ní mbód abog ne abog á etún-tē, áke dé ahed nímé nhóg níme mbóó kóŋ né adíbté mós?

⁵ Adibed áde ádíbte-’áa mós, áhāg mós á aból ne menyinge mésyāál.

⁶ Boŋ nēe ápédé á dyad-tē álad besón bé echoŋ ne baányan áte, aláá bós aá, ‘Syáné déwóg menyinge áyāle ndíbté nímém ndyōŋ ní mbód níme mémbo?’

⁷ Yesue ambád ámpē aá, “melemlem-’aá rílangeé nyé meé, menyinge métóm abé nē ádyōb ámín e mbelé-mbéb nhóg awē atédé abel dé mbéb boŋ átmnē Dyōb tómaa ámín e móom mé bad abog ne abog ábe bésáá, ábe béhednád ahāŋlen.

Ngan e kábpe echē embó

⁸ “Káa, mmwáad ahéé adé awē áwōŋ kábpe dyóm, boŋ nēe póg ébóó, eéchōdé’ ekag, boŋ áhedé ndáb áte, atóŋ ahed kóŋ né adíbté chós?

⁹ Adibed áde ádíbte-’áa chós, alade baáb ne baányan áte, aláá bós aá, ‘Nyéwógen me menyinge áyāle ndíbté ene kábpe echē embó me.’

¹⁰ Melemlem-’aá rílangeé nyé nén meé, menyinge métóm abé nē ádyōb ámín e mbelé-mbéb nhóg awē atédé abel dé mbéb boŋ átmnē Dyōb.”

Ngan e mwān awē ambó

¹¹ Yesue ambád ahób aá, “Mod nhóg ambé, anchyáá bán bé baachóm bébe.

12 Dóo epun ehóg, mwän asad álāngē sáá nén aá, ‘A-sán, bée me ádém akab á mbwóg áde rítāngéné akud.’ Héé sáá átédé chóm esyāāl éche ánwōngē, bonj ákabpé bō áte.

13 Nguse é e’pun étómé-’aá, bonj mwän asad áladé mímē nted rísyāāl, ákäg á alonj démpée áde áchábnédé. Awed-taá ápédé bonj ábootéd alongé á mbaambaachog, ábēbtē ngáb esyāāl echē ánwōngē.

14 Ade chóm esyāāl émáá mó áyāl né bōob, sánkalaa a nzaa anhún á alonj-tē wē. Atóg dó-’é ábóótédé mó asól áyāl ngíne-ngíne.

15 Héé akíí kunze e mod póg atán á dyad-tē wē, áchóm mwā nsón. Ane mod mó-’é alóm mó aá, áke ádítdad mó esóg é nguu.

16 Anwónj á mewēmtēn aá, mósólōntē abum ké ne medyé mé nguu, bonj modmod enkēmbaá mó chómchóm éche áhelesee adyé.

17 Dóo ádyéé chóónj, bonj ákwánlád, áhōbē aá, ‘Nōné’ ngáne bembáledé bélóné echem sánj á ndáb-te, bonj ké nē bédýág medyé méchōbe ásē, bonj me-’é ríwág nzaa hén!

18 Mēsýāā, níke ntán echem sánj, nláá mó meé, A-sán, mbelé mbéb á’sō é’ Dyōb ne á’sō é’bōnj.

19 Mmēn meékwoğnedéé áchāgned néé awonj mwän ámpē. Téd me ké nēngáne awōnj mbáledé nhóg.’

20 “Hé dóo ápádté ásē, bonj ásūē’ á dyad wēé sáá. Bonj áde ákwógé ape á ndáb nē, sáá annyín mó mwā etún. Ankóbtēn sáá ngól. Sáá annyāgéd, alúm mwän ámín, ahé mó tál.

21 Dóo mwän álāngē mó nén aá, ‘A-sán, mbelé mbéb á’sō é’ Dyōb ne á’sō é’bōnj. Meékwoğnedéé áchāgned néé mwän awōnj ámpē.’

22 Héé sáá mó-’é áchénlé ábē bembáledé, álāngē bō nén aá, ‘Nyéhyiinad me nsob míme rítómténé adənj nē, á mehélé-te. Nyéwáad mó mó á yāl. Nyéhê-’é mó ebōnj á ekáá, nyéhê-’é mó metámbe á ékuu.

23 Nyétéd nchóm-é-nyag awē dékálté nē, nyékwel mó, ábel nén, syánē moosýāāl dédyē débél-’é apaté.

24 Nyébíí bán, awem mwän nén ammad awé, bonj atimé ámbíd á alongé. Ambóó, bonj abídé áwed.’ Hé-’aá bēbóótédé ngande achog.

25 “Mmēn mēsýāāl mēmbēnléd áde mwānyanj ambáá adíí á nzag-tē. Ade áhúú, dóo áwógéé bad békóne, béságe-’é bwēm á ndáb-te.

26 Dóo áchénlé mbáledé nhóg, bonj ásedtē mó dyam áde ábēnlaad.

27 Dóo mbáledé ne álúmtéé mó áte nén aá, ‘Pón mwānyonj ahúú ámbíd-óó. Sóó akwēnlé mó nchóm-é-nyag ne, áyāle anyínēn áde ányínné mó díd ámpē, ésebán dyamdyam ábélé mó.’

28-29 “Awóg áde áwógé nē, anlīj, eékwēntene asól á ndáb-te. Héé sáá ábídé á ebwóg, bonj áhye achánj mó. Dóo mó-’é átimtanné sáá nén aá, ‘Nōné’, meé nkéndýeén wē hén mwē ne mwē áde níbēnléé wē ntū mé nsón, ésebán nwúene wē nló áte. Bonj ké echad é mbód weébāgēē me wēé, níbel apaté ne ábēm bēd.

30 Bonj ngáne awonj mwän á nlém ápédé ámbíd, mó awē amaá echon ngáb esyāāl abébed ne bekwalēe, ewúwáde mó nyag echē étómténé akāl.’

31 Héé sáá álāngéé mó nén, ‘A-mwän, wē-éé edé ne me hén pónde esyāāl. Kéchéé éche ríwóó-’é édíí échōnj.

32 Embē bwám syánē áchog ngande, áwóg menyinge. Nén, mwānyonj ammad awé, bonj atimé ámbíd á alongé. Ambóó, bonj abídé áwed.’ ”

1 Yesue anláá ábē bembapεε ámpē aá, “Nhōn mí mod nhóg mémbe. Bad bēnhye mó aláa bán awē mbālede ambáá abēbte mó ngáb.

2 Hée míme nhōn mí mod nílómé mbālede awed achág, boŋ ásedtē mó aá, ‘Ebál é pále ehéé n̄wógéé áyāl echōŋ n̄n. Lúmed me áte ngáne meson̄gé mé bwēm míme mēmbanéé áse echōŋ médíí, áyāle échē etál é nsón émáané we áte.’

3 Dóo mbālede ádólé áte chóŋ boŋ áhōbē aá, ‘Chán-nō mēbenlé bōōb áde echem sāj áhedéé me ahúd á nsón? Ngíne eésáá me echē ríkwenléé nzag. Nzé ntímé-’ε á nchōmbé, né nē dépiinéd me akwágké á ngíne.

4 Ahá, nkudé debyéé áde méhāgké, ábel boŋ ké á nsón dóo bēnhūdte me, bad bēlyāg békōb me nken áwab mendáb.’

5 “Hée áchénlé mod téé awē anwálé sáá alúm, áchāgē bó nhógē-nhógē. Ade mod e’só ápédé, ansedéd mó aaken, ‘Meson̄gé métāŋ echem sāj ekálee we?’

6 Ane mod aá, ‘Mbwókél é e’kwém é’ móí waam.’ Ane mbālede anláá mó aá, ‘Nōnē’, echōŋ kálag e melúm chō n̄n. Dyéé áse, étel á mehélé-te weé, mbwókél é e’kwém é’niin.’

7 Ansedéd mod awē alónténé bébe aá, ‘Alúm ádé we meson̄gé métāŋ?’ Ane anhōb aá, ‘Mbwókél é nkute rí ngun éláán.’ Ane mbālede anláá mó aá, ‘Kōb echōŋ kálag, étel weé, mbwókél é nkute ébe.’

8 Ade míme nhōn mí mod n̄wógé nē, ménkēméd échē ekúkú é mbālede aá, ‘Abēnlédé debyéé á bwām.’ ” Yesue ambád áte n̄n aá, “Nē dóo bad ábe behíde mekan mé nkōŋsé bédíí. Bédé mehél áhāgen échāb nyaa é bad debyéé, tómaa bad ábe behíde e’nyínen bé ekíde é’ Dyōb.”

9 Yesue ambád aá, “Nlāa-’ε nyé meé, nyēbenled nhōn mé nkōŋsé, ákōb e’chōŋ, áyāle á pónde eche mémaa’ é áte, békob nyé nken weé bad bēdyeé’ é á ngíndé ne á ngíndé.

10 Ké nzé-módé awē awánlé mpín mé akan bwām, né áwālē ámbáá bwām. Kénzēé-’ε awē eéhele mpín mé akan awále, né éehenlé ké ámbáá awále.

11 Nzé édé-’ε bán, weewánléé ngáb e nkōŋsé ngáne étāŋgéné awále, nzé-módé ábē we nhōn mí mbále.

12 Néε weewánléé nhōn míme méesē nímōŋ bwām, nzé-módé ábāg we nhōn nímōŋ mwēn?

13 “Modmod eéhēlēε-se abé mbālede a bewōŋ bébe. Alūméd nhóg edāŋge tómaa aníníí, ké’ε átlmān nhóg, abāŋge aníníí áyāl. Weéhēlēε-se ebé mbālede a bad bébe abé ahóg. Weéhēlēε-se ebé mbālede a Dyōb se ebé-’ε mbālede a mōné.”

Nguse é ngan éche Yesue

(Mat 11.12-13, 5.31-32; Mak 10.11-12)

14 Befarisia bēnwōg nímén mésyāāl, boŋ ngáne bémbēē bedāŋ bé ngáb, bēnswēdē mó swēdtēn.

15 Yesue anláá bó aá, “Nyēdíí bad ábe belúmte bán bésáá á’sō é’ bad, boŋ Dyōb ábíí nyé nlém áte. Kéchéé éche baányōŋ békēmteé, édíí abuíú ngēn á’sō é’ Dyōb.”

16 Yesue ambád bó aláa aá, “Mam míme mēntenléd á kálag é mbéndé é Dyōb, bekal bé’dáōdāŋ bōmpē bēnhōb mó káŋŋne á pónde eche jōne. Taase nē, nkalaŋ mí bwām mé nkamlēn rí Dyōb ríkanlad, mod téé-’ε abune nímé nkamlēn abé áte.

17 “Ké nēŋgáne nkoŋ rísé ne mí mín béhele bémaa, atōte ké ahóg á mbéndé e Dyōb déekwaá.

18 “Kénzēé awē anané mwaád, boŋ awōŋ mmwaád ampée, né akábé asón. Ké nzé-módé-’ε awē awóó mmwaád awē bēnáné á ndáb e’wōŋgé, né akábé asón.

19 “Nħon mí mod nhóg mémbē, kəse é mebad chóo áwáá’áá á yǎl. Mwenzē ne mwenzē móo ádyágáá mbwē téeé.

20 Ntógétóke mí mod nhóg mó-’é rínánǵé’ áá áwē mmwē mé e’ké bán Lazarose. E’kwesē bénlōn mó á yǎl.

21 Mewēmtēn mémbē mó áá, bébe mó pútedé é medyé éche éhúné’áá á tébele a nħon mí mod. Mbwé chóo épágé’áá áhed, boŋ ényāŋǵē mó e’kwesē áte.

22 “Ade ntógétóke mí mod mē ríwédé, ángel éntēd mó, ékēēn mó á akéb áde Abrahamē. Mmē nħon mí mod mómpē ménwē, bélime-’é mó.

23 A mbwóg e kwééd wē, nħon mí mod mbédé á metuné-te. Héē anyéné nló ámín boŋ anyín Abrahamē se wíní, ne Lazarose áwe akéb.

24 Dóo álébpēé nén áá, ‘A-Tē Abraham, sōn, wóg me ngol, élóm Lazarose átođe dúu dé e’mii á mendib-te, áhye áhóded me echém, áyāle meewógéé bu á dū-á-muú hén.’

25 Abrahamē anláá mó áá, ‘A-mwān, ewēmtan á pónđe eche wémbēē á nkōŋsé ngáne wēnkudtē bwēm é’ bwām, boŋ Lazarose mó-’é ákūd bwēm bé mbéb-é? Bəəb-pəə awóge mímé menyīŋge hén, wémpē edé á metuné-te.

26 Néē éhúdé nē áte, wéē sédíí ne wéē edíí, sǎŋkalaa a mbón akabé syānē áte, ábel nén mod eéhēlē asyāə wén se ápe wē. Modmod eéhēlē-’áá ásyāə wē, se ápē áwēd.’

27 Nħon mí mod ménhāb áá, ‘Ncháa-əə, a-Tē meé, élóm Lazarose á ndáb echē echem sǎŋ.

28 Nlyógé bānned bétáan. Akē álēb bó ábel nén, bómpē béepǎg á hōm dé metuné hén.’

29 Abrahamē anhób áá, ‘Béwóó metelag níme Mosē ne níme bekal bé’dəədəŋ. Béwóŋen chōm-éé bétélé áse.’

30 Nħon mí mod ménhāb áá, ‘Aáy, a-Tē Abraham. Nzé mod akii bó atán awē abidé á mbwóg é kwééd, né bétéde ábel dé mbéb bétímēn Dyób.’

31 Héē Abrahamē áhóbeé áá, ‘Nzé béekwēntene Mosē ne bekal bé’dəədəŋ awóŋen, né béewóŋné ké mod awē apuúdé á mbwóg e kwééd boŋ aláá bó.’

17

Abēled mod mbéb

(Mat 18.6-7, 21-22; Mak 9.42)

1 Yesue anláá ábē bembapēe áá, “Nyébii bán mekəŋsen níme mébelte bad mbéb métāŋǵéné nyé apií. Boŋ edé ngol ne kénzēé awē ápeén mó!

2 Embē mboŋ né bēntəə ene ndín e mod sǎŋkalaa a aláá á nkāŋ, bébwém mó á edib-te, tómaa mó ábelēd ábén bēndem mbéb.

3 Nyétēden yǎl pónđe.

“Nzé mwānyon ábelé wē dyam dé mbéb, échu mó aláa wēé nē déeboo’é. Nzé achemé-’é ádé awusé boŋ ahāŋléné, élagsén mó.

4 Nzé apānné wē ngen saámbe áyāle epun é bín, boŋ apedé-’é áwōŋ ngen saámbe áchōm alagsen áá, ‘Nhāŋléné’, etāŋǵéné mó alagsen.”

Adúbe déechinéé

5 Bembapēe bé nlomag bénlā Sǎŋgwéé bán, “Wéd sé adúbe áte.”

6 Sǎŋgwéé anhób áá, “Nzé nyēnwōŋ adúbe áde áde mwāmpīn nēŋgáne mbál-e-bū, né nyéekamlén ádén alín dé e’sáá bán, ‘A-bwel, wubé áse, éke ésumen á edib é nkwě-te’, é’wóŋnē-ne nyé.

Abel dé nsōn

7 “Détéd bán, nyé mod nhóg nyéwóó mbaledé awè akii nzag alii, káa akii ánon ndyón mí mbód. Nzé ahúú á nsón, chán wélaá’ é mó? Wélaá mó wéé, ‘Hyé édyéé ásé hén, édyé ndyééd.’

8 káa wéé, ‘Belé mé ndyééd étómted mé, étyéem-mé á nkag, kóón nímad adyé, bon ámbid é pónde, wé-’ é édyág?’

9 Nyélaa mé ké wésagnén ane mbaledé áyále ábélé níme nsón?

10 Né-óó nyémpé, nzé nyémaa chóm ésyáál éche bétíínédé nyé abel, nyéhâb bán, ‘Sédii bembaledé ngèn, nímed nsón-naa sébélé sé ngané.’”

Yesue asánté bad bé melaj dyóm

11 Ade Yesue ákagké á Jerusalem, atómé’áá á nchii ní nzii mé alon á Samaria ne alon á Galilia.

12 Asól áde ásólé mwá dyad nhóg, antán bad dyóm ábe melaj mékóbé. Béntyéem nchabnede,

13 belébpé mó ne esaad bán, “A-Yesu, a-Sán, són, wóg sé ngól!”

14 Ade ányíne bó, anláá bó aá, “Nyékaag wéé beprise, nyélúmed bó yál.” Ade békagké nê, yál é nsán bó.*

15 Bó mod nhóg, annyín nén aá módyéé bwám. Héé átímé ámbid, ákené Dyób ne ehób éche échágké.

16 Ankwe Yesue á mekuu, ásagnán mó. Anén mod abédéé mod a Samaria.

17 Yesue ansédéd mó aáken, “Eesaá mbále bán nsánté nyé bad dyóm-é? Héé ábíní abog bédíí?

18 Nédé mod ké nhóg ampée eétimeé ámbid áhye dé abe Dyób mekenag, éetóméé anén mod a nken-é?”†

19 Héé álanjéé mó aá, “Tyéém ámin, ékag. Adón adúbe ádíde wé bwám.”

Epe é nkamlen ní Dyób (Mat 24.23-28, 37-41)

20 Befarisia bénsédéd Yesue bánken, “Pónde ehéé nkamlen ní Dyób mépéé?” Yesue anláá bó aá, “Nkamlen ní Dyób méesaá dyam áde mod ányínneé díd,

21 káa dyam áde mod áhōbpé aá, ‘Nōné’, mōmén,’ káa ‘mōmíníí.’ Aáy, nkamlen ní Dyób nímaá abé áfinté echén.”

22 Héé álanjéé bembapée nén aá, ‘E’pun é’ bín é’hué á’sō ábe nyédangé bán né nyényín ké mbwe nhóg níme Mwán-a-Moonyon álumédte nyé yál, bon nyényínné.

23 Béláá nyé á pónde eched bán, ‘Mōnén,’ káa ‘Mōníníí,’ bon nyéehántán bó.

24 Áyále, ngáne emwedmwed étóméé, bon épenté ngob e Dyób ped póg ne eníníí, nê dóó epun éche Mwán-a-Moonyon ápéé ébēé.

25 Bon édēbē nē, atāngéné metuné híin akud. Kōne enén nyonjēl e bad eébanj mó áyál.

26 Ngáne émbēé á pónde eche Noa, nē dóó ébēé á pónde echē Mwán-a-Moonyon.

27 Bad bédyágé’áá medyé, bémwāg mīm, baachóm bēwóó’áá bebaád, bebaád-te békág á mewóngé kóón ne mbwe níme Noa ásólé á bōle é’mbáá-te bon mbúú echó, mesén melóne, méhōód ábē bad bésyáál.

28 Melemem nē dóó émbēé á pónde eche Lotē. Bad bédyágé’áá medyé, bémwāg mīm, békābē dyon, bēwēnē bwēm, bélōō-’ é mendáb.

* **17:14 Asaad a yál:** Nzé melaj ménkób mod bétédé’áá mó nēe mod awé eesaa. Bébéné’áá mó bán, eesité wéé bad bédíí. Prise cháo énwōn kunze ásimen mod melaj bon ébíded mbakú nén bán asáá, bon ábootéd ape wéé bad bédíí. † **17:18** Bad bé Israel béntéd bad bé Samaria nēe benzínéé. Bóbo béekagé’áá ké mwāmpin áyále nyaa e mekan mé mbwóg ne mekan mé alon. Ké nyaa e abele á Dyób ne hóm dé mekáne bémbē bó nhanjén.

29 Boŋ mbwε nίme Λοτε ásyǎngé á dyad á Sodom, nίmê mbwε dên muú ne meláá nίme méhyǎntan, mémbíd ádyǒb néε mbúú, níwúú ábê bad bésyāā.

30 Melemlem nê dǒǒ ébεε nίmê mbwε nίme Mwǎn-a-Moonyon anyínnêdtê.

31 “Echê epun, mod awê adé á nnon nί ndáb mín áde nhon rídíí mó á ndábtê, eétoǵné asud áse áhyε dé atéd mó. Melemlem-’aá mod awê adé á nzag-tê, eétoǵné atim ámbíd á ndáb.

32 Nyéwêmten dyam áde dêmbeñléd ne Λοτε mwaád.

33 Kénzée awê awóó mewêmten áson ádê alongé, ábǒd dó. Kénzée-’ε awê abódé ádê alongé, né asoó dó.

34 A mbále, bad bébe bénaá anon ahóg nkuu, bétéd nhóg, bétédê aníníí.

35 Bebaád bébe békǒg medyé, bétéd nhóg, bétédê aníníí.”‡

37 Dǒǒ bempapεε bésêdteé mó bán “A-Sǎn, héé nê débñlédté?” Yesue antimtén bó aá, “Wéε ndim mbǎgkê, áhed dǒǒ behhǒgnóné bēladnéε.”

18

Ngan e ngwεε e mod bó nkúd é mmwaád

1 Yesue ankalé ábê bempapεε ngan álúmed bó áte nén aá, bétǎngéné békǎnnê pǒndé téé ésebán béhūnte nlem á abum.

2 Anhǒb aá, “Mod abédé dyad ahóg, awê akáadte’ bad. Ane mod eebáa’áá Dyǒb, eébage’áá-’ε modmod edúbé.

3 Nkúd é mmwaád-te abédé melemlem mé dyad, eémaa’áá’ wéε ane mod. Pǒndé téé álǎngē mó aá, ‘Sé mod séwǒngné mehǒb. Káád sé ésuud me nzǒm.’

4 A mbooted ane mod enkênháá mó dúu. Boŋ ámbíd é pǒndé anláá yǎl aá, ‘Ké nēngáne méebagéé Dyǒb edúbé, méebāā-’áá modmod,

5 ngáne édíí bán anén nkúd a mmwaád ahéde me nlǒ, mǎkǎā nίme nkáá ábel nsud mó nzǒm. Esebé nê, né kǒǎn ne á asóg éemwáá aá níkún ne epε éche ápagké nén pǒndé ésyāā.’ ”

6 Héε Sǎngwéé áhǒbεé aá, “Nyéwógé chǒm-éε ekúkú é mod awê akáadte’ bad awê eebíí Dyǒb éhǒbε-ye?”

7 Nédé Dyǒb déekunné ábê bad ábe ápwéde-ye? Béchyεene’ mó nwǒngen nkuu ne mǔte, nédé ákǎlén bó metúu pǒndé té-ye?”

8 Nláa nyé meé ákun bó mehélé mehélé. Boŋ nyédúbpé bán Mwǎn-a-Moonyon átan adúbe á nkǒnsé-te á pǒndé echê ápεé-ye?”

Ngan e bad bébe ábe bēnkē akáne

9 Yesue ankál ngan empée tǎngene bad ábe bényíné-’áá yǎl néε bad ábe bésáá, bényínε-’ε bad bempεε nkǒntéd.

10 Anláá bó aá, “Bad bébe bēnkē á Ndáb-e-Dyǒb ákáne. Nhóg abédé Farisia, aníníí-’ε abé nlad-é-tááε.

11 “Ane Farisia antyéém á ámín, ákánne’, áhǒbē á nlem-tê* aá ‘A-Dyǒb, nsǎgnéné wε. Ayāle nén, meésáá nēngáne bad bempεε, ábe bédume bwém é’ bad, ábe bēbēbē nlem ábum, ábe békábe mesón á ndáb e e’wǒngé. Nsǎgnéné wε áyāle meésáa nēngáne anén nlad-é-tááε hén.

12 Ndé nén, nldide’ yǎl nzaa á mekáne-tê ngen ébe sǒndé téé. Chǒm téé éche níkudeε-’ε nkabe chó áte monje dyóm, mbagé wε akab nhóg.’

13 “Nlad-é-tááε pen antyéém nchabnede, eéhele ké mǐd anyen ádyǒb. Ambán ekáá á nlem, ákánne aá, ‘A Dyǒb, wóg me ngǒl. Ndíí mbelé-mbéb.’ ”

‡ 17:35 Donje á kálag dé’só ábádé nchoo 36: *Bad bébe bébe á nzag-tê. Bétéd nhóg, bétéde antníí.*

* 18:11 *Antyéém ámín, ákánne’, áhǒbē á nlem-tê: donje á kálag áwóó atyéém á nkǒg, ákánndá yǎl.*

14 Hée Yesue ábádé aá, “Nláa nyé nén meé, anén mod awé rídímténé nyé aláa, ansú áwe ndáb née mod awé asáá á’sò é’ Dyòb. Ayále mod ké ahée awé achágté yál, bésudéd mós. Bonj ane awé asúdté eche yál, béchāgēd mós.”

Yesue ne bānbān

(Mat 19.13-15; Mak 10.13-16)

15 Bōōb-pōō bad bépééné’áá bēndem wée Yesue nén bán ábán bó ekáá á yál ánamed bós. Ade bembapēē bényíné nē, bēnkānē ábē bad áte.

16 Bonj Yesue anchélé ábē bán, áhōbē aá “Nyétede bānbān béhyag áwēm. Nyéekáá bó áyále nén, nyaa e bad nēé bó chōó éwóó nkamlen ní Dyòb.

17 Ne mbále, nlānge nyé nén meé, kénzée awé eékobe nkamlen ní Dyòb nēngáne mwēndem, éesónlé áwēd-te.”

Mod a nkamlen

(Mat 19.16-30; Mak 10.17-31)

18 Nkamlené nhóg ansédéd Yesue aá, “A-meléed a bwám, cheé mébenlé ábel nén níkud alongé áde déemaá?”

19 Dōó Yesue ásedtée mós aáken, “Cheé ekáá bonj échāgé me meléede a bwám? Mod ké nhóg eesaá mod a bwám étóméé Dyòb dēmpen.

20 Ebíí mbéndé éche éhōbē bán, weekábé asón á ndáb e e’wōngé, weewúé mod, weechíbé’, weebíde mbōj e metóm, bée sóó ne nyon edúbé.”

21 Ane mod a nkamlen antimtén aá, “A meléed, nhíde échén mbéndé ésyāal bootya se á mwēndemé.”

22 Yesue awógé-’aá nē, bonj álāngē mós aá, “Dyam ahóg éhedne wē. Sóm bwēm é’syāal ábe éwóó, étéd nímmé mōné, ékabe betóótókē bé bad. Nzé ebelé nē, wēkūd nhōn ádyòb. Ene pónde éhye éhíde me.”

23 Awógé áde ane mod a nkamlen áwógé nē, anwóg ndutul bwāmbwam, áyále ambé nhōn bwāmbwam.

24 Yesue anyíné-’aá ngáne ásúdné bonj áhōbē aá, “Elél áte bwāmbwam behōn bé bad ásol á nkamlen ní Dyòb.

25 Edé mwān e akan sánkalaa a nyam nēé kamēl áponj á epōn é ndōnde, tómaa nhōn ní mod ásol á nkamlen ní Dyòb.

26 Bad ábe bēnwōg chōm eché Yesue ánhōbpē, bēnhōb bán nzé nēé edíí, né nzéé-’ō ahele ákud e’sooson?”

27 Dōó Yesue áhōbēé aá, “Dyam áde baányonj bényínéé bán álélé áte, déelenledéé Dyòb áte.”

28 Hée Petro áhōbē aá, “Nōné’, sētēdté ábed bwēm é’syāal áhíd wē.”

29 Dōó Yesue álāngēé bó aá, “A mbále, nlānge nyé meé, kénzée awé atēdté eche ndáb káa mwaád, káa baányan, káa sáá ne nyan káa bán, áyále nkamlen ní Dyòb,

30 ákūd nsyānj ámbíd mbád ne mbád enén pónde. Akud-te alongé áde déemaá’ á pónde échē ehúé’.”

Yesue akānlé eche

kwééd ne mpuu

ngan ámpē

(Mat 20.17-19; Mak 10.32-34)

31 Hée Yesue átímné ábē bembapēē dyóm ne bébe kun bonj, álāngē bó aá, “Pón nyébíí bán degak á Jerusalem. Mam mésyāal-le níme bekal bé’dáodānj bétélé áse tāngene Mwān-a-Moonyonj mébenléé áned.

32 Eténlédé nén bán bébé mós á mekáá mé bad ábe beesé bad bé Israel. Bó-’é béwélé mós, bésyāā mós, bésobé-’é mós meléed á yál. Bébōmtéd mós, béwúú-’é mós.

33 Bonj ámbíd e e’pun é’lāán āpuú.”

34 Boŋ bembapεε bó-ε bénkénsonjénné dyaṃdyam áyale nímén mam mésyāāl. Enén ngan entóm bó debyéé áte. Bénkénchemmé chōm éche Yesue áhóbé'áá.

*Yesue achōŋte mod a ndim
(Mat 20.20-34; Mak 10.46-52)*

35 Bōob-pōó áde Yesue ákwógé ape á dyad á Jeriko, mod a ndim nhóg andyéé á nkag ní nzii, áchōmē bwēm.

36 Awógé-'áá ndun e mod etóme, boŋ áseḋté bad dyam áde ádé.

37 Dóó bēlāngē mó bán, “Yesue, mod a Nazaret mó atóme nê.”

38 Héε ábóné áá, “A-Yesu, Mwān a mbyaa níme Dabide, wóg me ngól!”

39 Bad ábe bēmbē á'sō bēnkānē mó áte, bēlāá mó bán ádib nsāl. Boŋ mó-'ε ambé ábōnē áá, “A-Mwān a Dabid, wóg me ngól!”

40 Dóó Yesue átyéémé, boŋ áhóbē áá béhyεene ane mod. Ane mod apedé-'áá mó benben, Yesue áseḋté mó áá,

41 “Cheé éhedeé wéε, níbele wε?” Mó-'ε anhób áá, “A-Sán, bēl nínyinen ámpē.”

42 Dóó Yesue-'ε álāngē mó áá, “Nyínén-nō! Adúbe ádōŋ ádíde wε bwām.”

43 Abwōg-ábwōg ambootéd anyínen, áhídē-ε mó, ábagé Dyōb mekenag. Ade ene ndun e mod ényiné nê, bōmpē bēmbootéd Dyōb akémed.

19

*Yesue atáné nlad a
tááε bán Sakio*

1 Yesue ampōŋ á dyad á Jeriko, boŋ atómé'áá tómén.

2 Mod nhóg-ke abédé áwed bán Sakio, abédé-εε nlad-é-tááε ambáá, abé-'ε nhōn ní mod.

3 Ahédé'áá áá mónyín ane mod awe béchāgēé Yesue, boŋ nzii enkēmbagnéḋté mó, ngáne amute démbēē áhed, mó-'ε ambé esōŋ.

4 Héε ányógté á'sō boŋ áchāgkē bwel é' sikamō ábel boŋ ányín Yesue. Yesue ahúé'áá ene pēd.

5 Apedé-'áá áhed, boŋ áá mósad díḋ ámín, ányínē Sakioε. Dóó álāngēé mó áá, “Á-Sakios, súd áse á mehélé-te. Ntāngéné nken abé áwōŋ ndáb chii.”

6 Hē dóó Sakioε á súd áse ésebán abéḋte pónḋé, boŋ ákobé Yesue nken ne menyinje mésyāāl.

7 Bad bésyāāl ábe bényín nê, bényónjé'áá áte bán, “Akií nken abe á ndáb wéε mod awe adé mbelé-mbéb.”

8 Sakioε antyéém ámín, álāngē Sāngwéé áá, “Nōné', a-Sán, mētēḋ nhōn nímm, níkab mó áte e'pēd é'be, níbé epēd hóg wéε betóótōkē bé bad. Nzé éde-'ε bán nkōbné mod kéchéé á edoké-te, mētímtéd mó chó ámbíd ngen éniin.”

9 Boŋ Yesue mó-'ε anláá mó nén áá “A epun é bín é' chii, e'soosōŋ é'bágnéde ne enén ndáb. Anén mod mómpē adíí mwān a Abraham.

10 Mwān-a-Moonyon apedé ábel boŋ áhed bad ábe bēbóó, áhood-te bó.”

*Ngan eche bényāgnéḋte bembālede ngáb
(Mat 25.14-30)*

11 Bad bēwóglánáá chōm-εε Yesue áhóbé'áá. Yesue ammāḋ ape benben ne dyad á Jerusalem. Né-óó bēwēmtān bán nkamlen ní Dyōb mépē ábwōg-ábwōg.

12 Hé-'áá áhóbéé áá, “Kunze e mod póg eladé'áá yāl áke eke á alonj áde áchābnéde ábel nēn bēwóged mó kāŋ, boŋ ásuε'.

13 Ade ákagké, anchélé ábē bembālede dyōm, ábagé nhóg téé ekálé é káppe dyōm áá, ‘Nyétéd nén, nyékábe nyonjé kōsōŋ ne á pónḋé eché méhū'é.’

14 Boŋ ádē alon á bad dénkëndəŋgé mós. Bēnlōm mēsēnzē áhíd mós áláa ngómēnaa bán, ‘Sēekobēé bán anén mod ábē echēd kāŋ.’

15 “Ké nē bēmbel mós kāŋ, átīm-me ámbíd áwē dyad. Ade áhúú, ábwōg-ábwōg anlóm ábē bembalede ábē ámbagké ngáb achəg ábel boŋ ábíi nsyəŋ níme békúdē á nyoŋgē-te.

16 A’só ampē ahób aá, ‘A-Sán, échoŋ ekálē dyóm échyáá nsyáŋ níme rídē ngen dyóm.’

17 Ane mod anláá mós aá, ‘Nē ábóó, edfi mbaledē a bwám! Ngáne éhéle mekan mēsád alyəged ngáne éhednadté, mbage wē ngíne ákamlēn myad dyóm.’

18 Mbaledē awē alónténé bébe mómpē ampē ahób aá, ‘A-Sán, échoŋ ekálē dyóm échyáá nsyáŋ níme rídē ngen é’táan.’

19 Ane mod anláá ane ampē aá, ‘Wēkamlēn myad métáan.’

20 “Dós mbaledē ampēé ápédé boŋ áhōbē aá, ‘A-Sán, áboŋ e’kálē dyóm wē hén. Menkaŋ bós á wāŋgesē-tē, níkoo.

21 Mbáá’áa me ngē, ngáne mbíi bwám meé, échoŋ chōm éhūnēē á ndəob. Weébēlē boŋ edyag, ehúde-’ē wēé wēéwēnēé.’

22 Héé ane mod átímtanné ane mbaledē aá, ‘Mmōŋ nsəl mēn mós mēwū wē. Ebébtéd é mbaledē nēé wē. Nēé emōŋ émáá abíi wēé, échēm chōm éhūnēē á ndəob, ebíi-’ē wēé, meébēlē boŋ rídyag. Nēé ebíi wēé nhúde-’ē wēé mēéwēnēē,

23 cheé-ə énkəŋ boŋ weehēde echem ngáb á ndáb echē bad békōŋgēé ngáb, ábel boŋ nzé níhúú níkob chó ne nsyáŋ ámín?’

24 “Héé álāŋgēé bad ábē bényēēm á nkəg áhed aá, ‘Nyékoben mós ábē e’kálē dyóm, nyébag bós wēé mod awē awóó mbwókel e ekálē.’

25 Ábē bad bós-’ē bēnlāá mós bán, ‘A-Sán, ane mod amaá mbwókel e ekálē awōŋ!’

26 Héé ane mod átímtanné bós aá ‘Nláa nyé meé, kénzēé awē awóó, Dyōb dēbād mós ábē. Boŋ ane awē mós-’ē eewóó, Dyōb dékobén mós káəŋ ne mwámpín awē awóó.

27 Boŋ bad ábē békós me, ábē béehēde’áa bán níbē echab kāŋ, nyéhyēne bós hén. Bēwúu bós áwem e’só hén.’ ”

Yesue asólé á Jerusalem nēé kāŋ

(Mat 21.1-11; Mak 11.1-11; Jōn 12.12-19)

28 Yesue amaá-’áa enén póle akal, ábwógé ásē ampē, áke á Jerusalem.

29 Ade ákwógé apē á myad mé Betpeg ne Betani á Ekone é Menzab, anlóm bembapēé bébe aá,

30 “Nyéke á dyad áde ádé á müde níminí. Nzé nyépedé á nló ní dyad nyēēnyín ngáne bétāŋgē mwān á ésel awē mod éédííēē mbēd. Nyéhune mós, nyéhyēne hén.

31 Nzé mod asēdté nyé aáken, cheé ekáá boŋ nyéhunné chó, nyéláa mós nén bán, ‘Sāŋgwéé* atógnéné chó.’ ”

32 Bad ábē ánlōmmē békíi-’áa, bētān-ne chó melemlēn ngáne ánlāá’é bós.

33 Ade béhunnēé ésel, bewōŋ bēnsedéd bós bánken, “Cheé ekáá boŋ nyéhunné échē ésel?”

34 Bós-’ē bēnhōb bán, “Sāŋgwéé atógnéné chó.”

35 Héé bépééné chó wēé Yesue. Bēntāl échab mbóté áwedé-mín, boŋ bēchəgtē Yesue áwedé-mín.

36 Ade ábóótédé áke, bad bētánlé’áa mós échab mbóté á nzii-tē.

* 19:31 *Sāŋgwéé káa nwōŋ.*

³⁷ Ade ábóótédé Ekone é Menzab asyɔge ásol á Jerusalem, ndun e bembapɛɛ embootéd abwɛɛn ámɪn ne menyinge, békéné Dyɔb ne esaád áyale ndale é mekan esyāāl éche bényiné,

³⁸ Béhōbē bán,
“Nnam ne kǎŋ echē epag á dɪn áde Sǎŋgwéé!
Nsaŋ mǎbē ádyɔb,
Ehúmé ébê-’ɛ ne Dyɔb áde áde sɛ ámɪn!”

³⁹ Nguse é Befarisia éche énsǎblɛn amute á bad áte bɛnlāá Yesue bán, “Ameléed, láá ábōŋ bembapɛɛ bélám!”

⁴⁰ Mós-’ɛ antimtén bó aá, “Ne mbále, nzé ábén bad bédíbé nsəl, né meláá múmó mébootéd abón.”

Yesue alebe dyad á Jerusalem

⁴¹ Ade Yesue ápedé á nkǎg rí dyad á Jerusalem, annyín dyad á’sò. Dóo mészod mébóótédé mó abíd á mǐd, áchye’ Jerusalem

⁴² aá, “Embōŋ bán nyéhíi mekan nǐme mépɛɛne nsaŋ. Boŋ bǎɔb, nyéehēlēē mó anyín.

⁴³ E’pun é’ bɪn é’húe nyé á’sò á pónde echē bad ábe békós nyé bɛlɛŋnedtɛ nyé nkúmbág née e’k’é, bɛbentén-nɛ nyé pɛd esyāāl,

⁴⁴ boŋ bɛmad nyé, nyáabe áben bán moosyāāl. Aláá ké ahóg déelyagkɛ áse áyale nyénkénchemmé pónde echē Dyɔb ápedé áson ádén alongé.”

Yesue apedé á Ndáb-e-Dyɔb

(Mat 21.12-17; Mak 11.15-19; Jɔn 2.13-22)

⁴⁵ Yesue ansól á Ndáb-e-Dyɔb, ábootéd bad ábe bésómé’áá bwɛm áwɛd-te ananted,

⁴⁶ álǎŋgē bó aá, “Eténlédé á kálag e Dyɔb nɛn bán Dyɔb áhóbé aá ‘Echem ndáb ébē ndáb e mekáne.’ Boŋ nyétimté chó mbwɔg mé bechǐb.”

⁴⁷ Bootya nê, Yesue ayágté’áá bad á Ndáb-e-Dyɔb. Bepriɛ bémbáá ne bemeléede bé mbéndé bǎɔbɛ belyáged bé dyad, bó-’ɛ béhédé nzii eche bɛwúe’é mó.

⁴⁸ Nzii-’ɛ eebédéé bó ábel dyam ádii dyam, áyale moosyāāl andŋŋ e’yale ábe Yesue awóg ne kǎn esyāāl.

20

Nsɛdtéd tǎŋge ne kunze eche Yesue

(Mat 21.23-27; Mak 11.27-33)

¹ Mbwe nhóg Yesue ambé á Ndáb-e-Dyɔb áyágtɛ bad, ákanlé-’ɛ bó nkalan nǐ bwám. Héɛ beprise bémbáá, bemeléede bé mbéndé ne bad bémbáá bé dyad, bɛpédé áwē,

² boŋ bésɛdtɛ mó bánken, “Láá sé, kunze ehéé éwóó ábel nǐmɛn mekan? Nzé-módé abagé-’ɛ wɛ enén kunze?”

³ Dóo Yesue átimtanné bó aá, “Mémpe méésɛdéd nyé dyam ahóg; nyéláa me

⁴ wɛɛ kunze echē jɔne ádúsánnáá bad émbídtɛ, wɛɛ Dyɔb, káa wɛɛ moonoyŋ?”

⁵ Bɛn ne bɛn bɛmbootéd atǎŋtɛn bán, “Nzé dehóbé bán, ‘Jɔne echē kunze enhúú ne Dyɔb,’ né ásedéd syánɛ aáken, ‘Cheé-ɔ enkǎŋ boŋ nyénkéndúbé mó?”

⁶ Boŋ nzé dehóbé bán, ‘Echē kunze ehúú ne baányon,’ né ábén bad bésyāāl bɛlúm syánɛ meláá, áyale béndúbɛ bán, jɔne abédéɛ nkal é’dáádan.”

⁷ Hê dóo bétimténé mó bán, “Séebíí’ é wɛɛ ene kunze émbídtɛ.”

⁸ Dóo Yesue álǎŋgɛé bó aá, “Né ké me-’ɛ ámpɛ méeláá’ é nyé kunze echē ríwóó ábel nǐmɛn mekan.”

Ngan e bebel bé nzag ntéd
(Mat 21.33-46; Mak 12.1-12)

⁹Hée Yesue ákanléé bad ngan nén aá, “Mod nhóg ambé, ankwël nzag e e’pum é mel ábe bébenléé mím. Ambě ene nzag wée bad ábe bóbōó békáb mbote áte, ákē eke á alonj démpēe, ábēm-me áwed.

¹⁰Póndé epedé-’aá eche bepádeé e’pum, boŋ álómē mbáledē wée bebel-bé-nsón, ákobe mós adē asii dé e’pum. Hée ábē bebel-bé-nsón bēwānnē ane mbáledē, bésúúd-te mós ámbíd ne mekáá mé ngēn.

¹¹Anlóm mbáledē ampēe, boŋ bémbóm ane mómpē, bēwōgēd mós e’són bwāmbwam, bésúúd-te mómpē ámbíd ne mekáá mé ngēn.

¹²Ambé álóm awē alónténé beláán. Awed bēnlōgēn, bēbwēm-me mós ámbíd e e’ké.

¹³Hée nwóó-nzag ádolé áte chóón, boŋ áhābē aá, ‘Chán-nō mébenlé bōob? Mēlóm awem mwān awē níáá bwāmbwam. Kapóg bébe mós edúbé.’

¹⁴Boŋ áde bebel-bé-nsón bényíné mós, bēnnōnén á mesó, bēhób bán, ‘Ndyé-a-mbwóg mwēn nén. Déwúu mós, ábel eche mbwóg ésuuned syánē?’

¹⁵Dóó bēbídne mós á nzag-tē, boŋ bēwūē-’e mós.” Hée Yesue ásedtéé aáken, “Bōob-póó, cheé nwóó-nzag ábenlé bó?

¹⁶Apě awúú bó, ábē-’e ene nzag wée bebel-bé-nsón bēmpēe.” Awóg áde bad bēwógé nē, bēnhāb bán, “Ene ndín e dyam eébenlād mbēb!”

¹⁷Yesue annōn bó á mesó, ásedté bó aáken, “Chán nyésónjténé eyale é Dyōb éche éténlédé bán,

‘Aláá adē belōŋ-bé-ndáb bēnchenéé dóó átímé aláá dé etógnén abé.’

¹⁸Mod ké ahéé awē álum adē aláá ámín ábōgtēd áte. Boŋ mod awē dhūntēdte ámín, ányogtēd áte áfím mbúmbú.”

¹⁹Bemelēede bé mbéndé ne beprise bēmbáá bēnhēd nzii eche békóbeé Yesue ábwōg-ábwōg, ngáne bēnchemmé bán áyāle echáb dóó ákálé enén ngan. Boŋ bēmbāŋ bad ábe bēbédé áhed.

Nsedtéđ tñŋene asaa á tááe
(Mat 22.15-22; Mak 12.13-17)

²⁰Né-óó, bemelēede bé mbéndé ne beprise bēmbáá bēhédé’áá kase e etál, ákób mós. Bēmpwēd bad, bésábé bó, bēlóm bó áhíd mós. Abē bad bēntāŋgēn ábāntēn nén bán, bēhíde mós ne nlém nhóg, ábel boŋ békób mós awusé á nsāl, boŋ ene póndé bēbé mós á mekáá mé ngómenaa a Roma awē adé á nkamlēn.

²¹Hée bad ábe bēnlómme nē bēlāŋgēé Yesue bán, “A-melēed, sēbíí bán ehóbe’, eyágte-’e mam míme métāŋgéné. Weékwoŋádté modmod. Eyágte-’e bad mekan mé Dyōb á nyaa eché etāŋgéné bwám.

²²Mbéndé eche syáné ehóbe nén bán désanŋe’ tááe wée Kaisēe, kñŋ e Roma-ye?”

²³Boŋ Yesue anchem bó akwáb. Hée álāŋgēé bó aá,

²⁴“Nyélúmed me mōné mé ekii. Edíídnŋe éche nzéé chén, đín áde nzéé-’e đén?” Bēntimtén mós bán, “Đín ne e’só ábe Kaisēe.”

²⁵Dóó Yesue áhóbeé aá, “Nyébag-kóó Kaisēe éche édé éche Kaisēe, nyébag-ke Dyōb éche édé é Dyōb.”

²⁶Bōob-póó, nzii ké póg enkēmbáá eche békōbēnnē mós póle e awusé á nsāl. Né-óó, bēndlīb mímāb nsāl ngáne dyam dénkēmbōŋgé bó ahób. Nyaa eche Yesue ántimténne bó enkóméd bó yāl áte.

Nsedtéđ tñŋene mpuu
(Mat 22.23-33; Mak 12.18-27)

27 Donje á Besadusia bêmpĕ wĕe Yesue. Besadusia bêndübĕ bán mpuu méesaá ámbíd e kwééd.

28 Dóo bêhóbĕé bán, “A-meléed, mbéndé e Mosεε ehóbe nĕn bán, ‘Nzé mod awóo mmwaád, bonj awédé áde bó ane mmwaád béepedéé mwán awále, mwányan a abum ahóg átĕngĕné ane nkúd awónj, ábel bonj đĭn áde mwányan déébōō’.

29 Bōob-pōó, bad bébéde mod saámbé ábe bémbíd abum ahóg. Mod a’só anwónj mmwaád bonj awé áde bó mmwaád ne béepedéé bán awále.

30 Mod awĕ anlóntĕn bébe anwónj ane mmwaád. Mómĕ awĕ ésebán achyáá mwán.

31 Ámbíd é pónde awĕ anlóntĕn beláán mómĕ anwónj mó, kááj bó mod saámbé bébom mó awónj, nhóg ámbíd a aníńí. Bonj bó mod ké nhóg bénkĕnchyáá mwán ne ane mmwaád, kááj bó moosyáál béwĕ-ĕ.

32 Káájne á asóg ane mmwaád mómĕ anwĕ.

33 Bōob-pōó á pónde e mpuu, mmwaád awĕ nzĕé ane mmwaád áchagnédtĕ áyale bó moosyáál saámbé bénwónj mós?”

34 Dóo Yesue átimtanné bó aá “A pónde eche dédíí áte nĕn chii, bebaád ne baachóm béwónjĕ’.

35 Bonj bad ábe békwógnéde ábé á mpuu á kwééd bonj bésón-le á alongé dékōōlé béewónjĕ.

36 Bébéĕ nĕe ángel, béewág-kaá ámpĕ. Apuu áde hépuú’ĕ, bán bé Dyōb bōo bébéĕ.

37 Mosεε mwĕn ámpĕ álúmtĕ áte aá, bad bépuude’. Wĕe Mosεε átélé á Kálag e Dyōb aá, mwá bwel akóbe muú, achágé Sánjwĕé áhed aá, Dyōb áde Abrahamĕ, Dyōb áde Aisige ne Dyōb áde Jakōbe.

38 Dyōb ádíí Dyōb á bad ábe bédé á alongé, saké Dyōb á bad ábe béwédé. Nĕ đĕn álúmtĕ bán ne Dyōb, bó moosyáál bédé á alongé.”

39 Donje dé bemeléede bé mbéndé bénhōb bán, “A-meléed, chóm éche ehóbé étĕngĕné.”

40 Né-ōó modmod enkĕnchu’ĕ mó dyamdyam aseded ámpĕ.

Nsĕdtĕ tĕngĕne Ane-awĕ-Béwógtĕ

(Mat 22.41-46; Mak 12.35-37)

41 Héé Yesue áseđtĕé bó aáken, “Cheé ékáá bonj bad béhōbĕ bán Ane-awĕ-Béwógtĕ abidé á mbyaa níme kĕnj Dabide?”

42 Ngómĕ Dabide mwĕn ahóbé á Kálag e Ngōse aá, “Sánj Dyōbe anláá awĕm Sánjwĕé aá,

‘Dyĕé áwĕm ekáá émbáá,

43 kááj ne á pónde echĕ mébenlé bonj ékógtĕd ábōnj bad bé ekóyí ámĭn ne mekuu.’

44 Nĕe Dabide mwĕn ásebpĕ mó achág aá Sánjwĕé, chán-nō Ane-awĕ-Béwógtĕ áheleé abé awe mwán?”

Yesue abage elébé aá,

bétedĕn bemeléede bé mbéndé pónde

(Mat 23.1-36; Mak 12.38-40)

45 Bad bésyáál béwógtĕ’áá chóm éche Yesue áhóbĕé. Héé álĕngĕé bembapĕe, aá,

46 “Nyétedĕn bemeléede bé mbéndé pónde. Bédĕā mengombe ahyómĕn áte, bédĕā-ĕ bán bad béłente bó á dyōn-tĕ ne edúbé. Bédĕā metii mé edúbé adyé á ndáb e mekáne ne á hóm á ngande.

47 Bonj bōo bédume’ mbwóg é bekúd, bédogé-ĕ bad ne ntónj-ntónj mé mékáne. Echĕ nyaa é bad ékúd nkógsĕn níme níchábé ámĭn.”

21

*Mende míme nkúd a mmwaád**(Mak 12.41-44)*

¹ Ade Yesue ásádé díd, anyín néε behon bé bad behāgkē mōné á ntyóg mé mende.

² Annyin-ne ntógétōke a nkúd a mmwaád nhóg ahāg bedáεε bébe.

³ Héε ahóbεé aá, “A mbále, nlānge nyé mεé, nímén ntógétōke mé mmwaád rihédé mende á ntyóg-te tómaa bó moosyāál.

⁴ Mōné míme ábē bad behédé, ndii mōné míme ríchóbé bó ásē, boη anén mmwaád ne atóg áde ádíí ahédé mōné rísyāál míme áwóó, rísyāál míme ámbēē atōgnan yāl.”

*E'chemléd bé asóg dé nkōjsé**(Mat 24.1-2; Mak 13.1-2)*

⁵ Bembapεε behóg békálé'áá ngáne Ndáb-e-Dyōb ébóó, ngáne bélónné chókase é meláá, boη bēnābē-'ε chók áte ne mende míme bad bésāngé. Héε Yesue ahóbεé aá,

⁶ “Abén bwēm ábe nyényínεé nén, póndé ēpē eché aláá ké ahóg déelyagké ámín e waab. Bēpāntéd mō áte mésyāál.”

⁷ Bēnsédéd mō bán, “A-meléd, súútāη nén débenlédté? E'chemléd é'héé bélūméd bán nén áhede abenled?”

⁸ Yesue antimtén bó aá, “Nyétéd póndé nén mod eéputád nyé. Ekud é bad ēpē, á dīn ádēm, bédógé nyé, mod téé aá mōó módé Ane-awē-Béwōgté, behōbē bán e'pun bé asóg é'pédé áte. Boη nyéehídé bó.

⁹ Nzé nyéwógé-'ε bán bel é'wanté', káa bán ekide épāngé áte, modmod eebáá'. Mmén mekan mésyāál métāηgéné abenled, boη saké mō mélūméd bán, asóg ámáá apε.”

¹⁰ Héε álanγεé bó aá, “Aloη ahóg détyēēmēn ádíníí nzum. Nkamlen nhóg-ke rítyēēmēn mímíníí.

¹¹ Ndōob eēnēnéd ásē ngíne-ngíne. Nzaa ne nkole bébē hōm ásyāál. Mekan míme mébāηte bad mébē. E'chemléd é'mbáám̄baa bōmpē bébíd ádyōb.

¹² Mmén mésyāál médēbenléd, béhē nyé abum ámín, bétagté nyé. Békéén nyé á ndáb é mekáne, békáád nyé áwed, béhé-'ε nyé á mbwōg. Nyébii-'ε bán, bēpēén nyé á'sō é' kâη é bad ne benkamlene áyāl e dīn ádēm.

¹³ Nē débε nyé etál póndé eched, aláa bó mekan mésyāál míme nyésōηténé á yāl echém.

¹⁴ Né-óó, nyémad á nlém tē ngen póg bán nyéetāηgenεé atag áte ngáne nyékāā'ε.

¹⁵ Mmēn mēbε nyé dyam áde nyéhābpē ne debyéé áde nyéhābēnné dó, nyaa eché ábēn bad bé ekoyí béehenlé nyé atyéemēn. Béehēl-laá ahōb bán dyam áde nyéhóbεé déetāηgenεé.

¹⁶ Kāηne besóó ne benyoó, bóobe áben baányan ne bēn, bēn bépalé nyé áte, béwúú-'ε nyé nguse é bad.

¹⁷ Bad bésyāál békóó nyé áyāle dīn ádēm.

¹⁸ Ké nē, dyamdyam déebenlé nyé, ké mbum e esid póg eebóó'ε nyé á nló.

¹⁹ Nyékanη nlém ábel nyékud e'soósonη.”

*Yesue ahóbé ngáne**dyad á Jerusalem dépāā'ε**(Mat 24.15-21; Mak 13.14-19)*

²⁰ Yesue anláá bembapεε aá, “A póndé eche nyényínné sánze élāηnédé dyad á Jerusalem, dōo nyébīí'ε bán ekide éhede apāηted áte.

²¹ Nzé nyényíné nê, bad ábē bédé á Judeya bétôm mehéle béke bésəəm á e'kone mín. Ane awē adé á dyad-tê wé, ából. Awē mós-é adé ámbíd e ebwóg étəgné mós asól á dyad á Jerusalem.

²² Ayāle nén, nímé mesú níme níme ríhóbeé nê, médii e'pun bé nkógsen. Póndé eched dōo mekan níme méténlédé áse mēlōnnē.

²³ Ebē ebébtéd ne bebaád ábe bēbē nkog ne ábe bémwāntē nímé mesú. Ayāle nén, metake híin mébē á nkójsé-te, enén nyongel e bad ékūd-te metuné bwāmbwam.

²⁴ Adén alon á bad déwē á bel-tē. Békōb nguse é bad nēe betān, békēēn bó á melon mémpēe. Bad ábe béese bad bé Israel békōgtéd dyad á Jerusalem áte, kóān né póndé eche Dyōb átínédé bó émaá áte.

Epe é Mwān-a-Moonyon
(Mat 24.29-31; Mak 13.24-27)

²⁵ “Etondeε bōobe ngon ne betintine bēlūmēd e'chemléd. Edib é nkwē édūm áte, étog nēe ahóppe dé edib. Nén dékōbēd bad bé melon mé nkójsé mbwóg kóān béēbyē' nēe bēbēléé.

²⁶ Bad bēpimén ne mbwóg ní ngine áyāle ebébtéd éche éhúe á nkójsé, ngine-ε éche édé ámīn énəñnéd á e'dii.

²⁷ Ene póndé dōo bényinnē nēe Mwān-a-Moonyon áhúe'é á mbag-tē ne ngum ne ehúmé é ngine.

²⁸ A póndé eche nyényinnē nēe nímén mekan mébóótédé abenled, nyétyéem ámīn, nyésād díd, áyāle nén póndé e e'sooson emaaá nyé ape áte.”

Mel méyágte syánē debyéé
(Mat 24.32-35; Mak 13.28-31)

²⁹ Héε Yesue álángeé bó ene ngan, aá, “Nyēnən alín á ngəl bwām, káa bwel ké é'héé bēmpēe.

³⁰ Abíd áde byaa é'bootadté bó abíd, nyébēn nyébele nyébíi bán nchon rímáá abé benben.

³¹ Melemlem nzé nyényíné nímén mekan mésyāal mébenlad, nyébíi nén bán, nkamlen ní Dyōb níkwógé ape.

³² Ne mbále, nlánge nyé nén meé, enén nyongel e bad éemaá'é kóānne nímén mekan mésyāal mémáá abenled.

³³ Nkon ní mín ne nkōñ rísé bēmaá bon ábēm e'yale bēbē abé ne abé.

Nyétéd póndé

³⁴ “Nyétóo nén nyéetómté echen póndé esyāal ádyé ndyéed ne ámwé mīm bwāmbwam. Nyéēbūdē-ε atag áte áyāle mekan mé alongé. Nzé nyébele nê, né éche epun étān nyé taléd nēe melám.

³⁵ Epun eched épíi moonyon asyāal awē adé á nkójsé.

³⁶ Nyétéd póndé, póndé ésyāal. Nyékānne bán nyéwōn ngine átóm nímén mekan níme mébenléd áte, ábel nén nyéhel atyéem á'sō wēε Mwān-a-Moonyon.”

³⁷ Mmē mesú mésyāal Yesue ayágté'áá bad á Ndáb-e-Dyōb. Nzé ngukél empē, áke ánāá á ekone é Menzab.

³⁸ Nzé bín bēnsāá sángeén, ekud é bad éhyágáá mó atán á Ndáb-e-Dyōb áwóglen mó.

1 Bɔɔb-pɔɔ, Ngande e Ewɛle-é-Ngên emmad abé benben. Enén ngande ebédée dín bán Nnyíme-ámín.

2 Beprise bémbáá ne bemeléede bé mbéndé béhédé'áá nzii eché béwúé'é Yesue á mesɔɔm-té. Bébáá'áá pen bán bad bésɔɔɲɛn.

*Judase akwenténé ásóm Yesue
(Mat 26.14-16; Mak 14.10-11)*

3 Satane ansól mbapɛɛ awe Yesue nhóg áte, awé béchəgɛé bán Judase. Dín démpɛe démbɛ mó bán Iskariɔde. Ambé nhóg áfinté bembapɛɛ dyòm ne bébe.

4 Héé ásyɔɲgé boɲ, áke atán beprise bémbáá bɔɔbe bekamlen bé Ndáb-dyɔb, ábel ntii ásóm Yesue áwáb.

5 Nén dénwɔgéd bó menyinge bwámbwam. Bóbɔ bémpe á nchemten. Bénlāá mó bán bésābé mó mɔné.

6 Mɔ'-e ankwentén. Dɔɔ ábóótédé nzii ahed ásóm Yesue áwáb ésebán bad bébíí.

*Yesue aboɲsan Ngande e Nnyíme-ámín
(Mat 26.17-25; Mak 14.12-21; Jɔn 13.21-30)*

7 Bɔɔb-pɔɔ, epun é ngande e Ewɛle-é-Ngên áde béwúé'é ndyɔɲ ní mbód mé Nnyíme-ámín émpé áte.

8 Dɔɔ Yesue álóméé Petro bó Jɔn aá, “Nyéke nyéboɲsen syáné ndyééd e Ngande e Nnyíme-ámín.”

9 Bénsɛdéd mó bánken, “Héé wédəɲgé wɛé séke séboɲsen ádyé chó?”

10 Dɔɔ ákwɛntanné aá, “Nyénəne’. Nzé nyépédé á dyad-té, mod ábomén nyé awé apémé apom dé mendíb. Nyéhíd mó á ndáb ké eché eche ásonlé.

11 Nyéláa nwóó-ndáb bán, ‘Awɛd meléede aáken, héé toɲ e beken édíí eché módyɛɛ ndyééd e Nnyíme-ámín áte ne ábɛ bembapɛɛ?’

12 Bɛlúméd nyé toɲ eché ekalé áte eche bɛnápɛ áte. Ene toɲ edé ámín á ndáb-te. Nyébele syáné mboɲsén ní ndyééd áhed.”

13 Dɔɔ békíí, bétán-ne mekan melemem ngáne ánlɛbɛɛ bó, bɛmboɲsén-ne ndyééd e Ngande e Nnyíme-ámín.

*Ndyééd e Sáɲgú
(Mat 26.26-30; Mak 14.22-26; 1 Kɔr 11.23-25)*

14 Ade pónde e ndyééd épédé áte, Yesue andyɛé á tébele ne bembapɛɛ bé nlómag.

15 Héé álanɲɛé bó aá, “Mendəɲ bwámbwam mɛé ndyɛ enén ndyééd e Nnyíme-ámín ne nyé boɲ nkude metuné.

16 A mbále nlánɲe nyé mɛé méedyáá chó ámpɛ kóəɲ ne á pónde eché Dyɔb délonédte chó mbon á pónde eché nímɛ nkamlen mépɛé áte.”

17 Dɔɔ átédé mbwendé, boɲ ábagé Dyɔb mekenag, álanɲɛ'-e bó aá, “Nyékob nén, nyémwé, nyétómted nhóg ne aníníí.

18 A mbále, nlánɲe nyé mɛé bootya bɔɔb áke á'sɔ, méemwáá nímén mím ámpɛ kóəɲ né nkamlen ní Dyɔb nípédé áte.”

19 Antéd kəɲne ewɛle, ábe Dyɔb mekenag, ákabted chó áte, ábɛ'-e bó chó aá, “Echem yəl nén, ebəgnédé áyəl echɛn. Nyébele nén ákamten mɛ.”

20 Ade bémáá ndyééd ádyé ambɛl melemem ne mbwendé ní mím. Anhób aá, “Mmén mbwendé ndii melé mɛkɔɔlɛ níme nsógtɛné ne mekií nímém, níme mésyɔgé áyəl echɛn.*

21 Boɲ nyénəne’, mod awé akií mɛ ntúré, ádyág ndyééd ne mɛ hén.”

* 22:20 Donɲe á kálag dé'só éewóó'ɛ e'yale ábe Yesue ámbíd e Echem yəl nén; á nchoo 19 ne nchoo 20 rísyáal.

²² Mwän-a-Moonyon awē ngáne éténlédé, bon medim ne ane mod awē ášóm mós.

²³ Hēε bembapεε bēn ne bēn bēbóótédé nhóg ne aníní aséded, ábii bós mod awē ábēl enén ndín e dyam.

Bembapεε béswan̄tan t̄ngene

mod awe adé ambáá

²⁴ Bembapεε bēn ne bēn bēmbootéd aselen, béhedé ábii bós mod awē adé mod ambáá áwab t̄nté.

²⁵ Dós Yesue álan̄geé bós aá, “K̄ān é melon̄ élm̄te n̄gan̄len am̄in e bad ábe békamlanné. Benkamlεε béch̄age yāl bán, ‘Ebon̄-nlém̄e.’”

²⁶ Bon̄ ét̄ngeneé abé nē át̄nté ech̄ēn. Embon̄ bán ane awē adé mod ambáá át̄nté ech̄ēn, át̄im nēε ane awē atóm̄téné mp̄in abé. Ane awē mós-ε alyágte’, át̄im nēε mb̄aledé.

²⁷ Nzé bad bédé bébeε, nhóg adyεé á tébeleε, aníní-ε abenle mós, ahéé atóme waab e’del áte? Saá ane awē adyεé á tébeleε-ye? Bon̄ me, ndé áwen̄ t̄nté nēε ane awē abenle nyé.

²⁸ Nyēē nyédé bad ábe bēwéséné me á pónde eche ríkudé metuné.

²⁹ Ngáne Titéε ábágé me kunze ákamlen, né-’aá mémpē mébéé nyé.

³⁰ Nén débēl nyédyé ndyéédé, nyēm̄wé-ε m̄im hóm̄ ahóg ne me áwem nkamlen-té. Nyé mod té ádyεé-ε á atii dé nkamlen, nyékāádtē metúmbé mé Israel̄ dyóm̄ ne mébe.

Yesue ahóbé á’sō é’ pónde ad,

Petro ábān̄ mós áyāl

(Mat 26.31-35; Mak 14.27-31; Jōn 13.36-38)

³¹ “A-Sim̄on, N̄oné’! Satane akudé kunze ák̄ag nyé moosyáál, ákab-pe nyé áte. Abane bé bwám̄ ne bé mbéb̄ nēngáne mod apebe kón eche bésálté.

³² Bon̄ nkánndé wε meé adúbe áde éwóó déesudé’. Á pónde eché wétim̄nné me ámpē, éwéd baányon̄ áte.”

³³ Petro anhób aá, “A-Sán̄, ké á mbw̄og dós bétim̄néε wε káa á kwééd, mb̄ōnséné wε ahíd.”

³⁴ Dós Yesue álan̄geé mós aá, “Nlāa wε, a-Petro, nchóm-a-kúb adēhób aá mótō’ nkuu nén, wēbān̄ me áyāl ngen éláán.”

Pónde e metake ekwogé ape

³⁵ Dós Yesue ásdteé ábē bembapεε aá, “Á pónde eche ménlōmmē nyé ésebán̄ nyéwánlé ekwe é ngáb, káa ekwe, káa metámbé, nzé-chómé nyéntōgkē?” Bembapεε bēnkwentén bán, “Chóm̄chóm̄.”

³⁶ Dós Yesue álan̄geé bós aá, “B̄oob-p̄oó, mod awē awóó ekwe é ngáb ké’ε ekwe, áwále áyāl. Ane awē mós-ε eewóó nkwaté, ášóm̄ m̄im̄ nkobe, áchan̄ nkwaté.

³⁷ Nl̄nge nyé meé kálag e Dyōb ehóbé aá, ‘Bébánné mós nchoo nhóg ne bech̄ib.’ Né-’aá ébenlédte áyāl ech̄ēm. Et̄ngéné ébenléd áned.”

³⁸ Bembapεε bēnlāá mós bán, “A-Sán̄, n̄oné’, séwánlé nkwaté níbe hén.” Mós-ε antim̄tén bós aá, “Désob nē b̄oob.”†

Yesue akil akáne á ekone é Menzab

(Mat 26.36-46; Mak 14.32-42)

³⁹ Hē dós ábidé á ebwóg, áh̄idē á dyad-tē, akē á ekone é Menzab ngáne ámm̄enténné abel. Bembapεε bós-ε bēnh̄id mós ámbid.

⁴⁰ Ade bépédé áwed anlāá bós aá, “Nyékánne’ bán mekágsen̄ méepiidé nyé.”

⁴¹ Ansyáá bós á nk̄ag, asidé mwā nchabnede, akóg mebóbón̄, ákännē nén aá,

† 22:38 Désob nē b̄oob; káa Nē ákwogé.

42 “A-Tê, nzé ébóhénéde wε, ékōbēn me nímén metuné. Boŋ ké nê, saké ngáne ébóhénéde me, boŋ bēl ngáne ébóhénéde wε.”

43 Ade Yesue ákännéé nê, ángel embíd ádyōb, éhye ewéd mó áte.

44 Anwéd mekáne áte ngáne ámbēē á ndutul-tê. Ebábé éche ébídé mó á yāl émbē ngáne metóde mé mekií, étēnē’ á ndoob taáb, taáb.‡

45 Ade áamá akáne, antyéém ámín, áké wée bembapεε bébédé. Antán nées békúnéé áyāle ndutul e ngine.

46 Dóo ásedtēé bó aáken, “Cheé nyékúnéé? Nyépáde ásē, nyékáne nén mekásgen méepiidé nyé.”

Békóbé Yesue

(Mat 26.47-56; Mak 14.43-50; Jōn 18.3-11)

47 Yesue eepedéé ké amad á nsəl dóo amute á bad ápédé. Mod awé antómén bó abédéé Judase, mbapεε nhóg áfinté e bembapεε dyóm ne bébe ábe Yesue. Apedé-áá Yesue á nkag ahé mó tál.

48 Boŋ Yesue ansedéd mó aá, “A-Judas, néde ahé áde éhédé Mwān-a-Moonyon tál ádíi ásom mó-ye?”

49 Ade bembapεε ábe bóobe Yesue bébédé áhed bényíné dyam áde áhede abenled, bénsedéd mó bánken, “A-Sánjú, sēhele séwān ne níméd nkwaté-ye?”

50 Héé mbapεε nhóg átómté nkwaté, áselē ntāŋ awé prise ambáá etúu é ekáá émbáá.

51 Boŋ Yesue anláá bó aá, “Nyésob nê boob!” Ansitén mó ene ped e etúu, ádid mó bwām.

52 Héé álāngéé beprise bémbáá bóobe benkamlenε bé mésénze mé Ndáb-e-Dyōb ne belyāged bé dyad, bad ábe bēnhye mó akób aá, “Nchíb móo nyéhyédé akób, boŋ nyéwálé nkwaté ne mbid-ε?”

53 Mbwe téé syānē debágáá á Ndáb-e-Dyōb, nyēnkēmbánné me ké ekáá á yāl. Boŋ echen pónde epedé bóob. Ehintén chóo édé á nkamlen bóob.”

Petro abáá Yesue á yāl

(Mat 26.57-58, 69-75; Mak 14.53-54, 66-72; Jōn 18.12-18, 25-27)

54 Héé békóbé Yesue, boŋ békéené mó, bétimēn mó á ndáb wée Prise Ambáámbáa. Petro mó-ε ahídé-áá bó ámbíd mwā etún.

55 Bēnkonéd muú áfinté e dyad, bad belādēn áhed. Petro mómpē anhyé adyεε áhed.

56 Mbālede e mmwāád nhóg annyín nées Petro ádyéé á nkag íi dü. Dóo ánóné mó chóón, boŋ áhōbē’ aá, “Anén mod mómpē ambé ne Yesue.”

57 Boŋ Petro antāŋ aá, “A-mwān-a-mmwāád, meebii’ é me mó.”

58 Eebeméé áte, mod ampée anchem mó. Anhób aá, “Wēmpē edé nhóg áwāb echon.” Boŋ Petro anhób aá, “Amúē, weéhyāg me ngáne áyāl.”

59 Ámbíd e háwa póg mod ampée ambádnén aá, “Ntāŋten ké nhóg méesaá. Anén mod abédé ne Yesue, áyāle adíi mod a Galilia.”

60 Boŋ Petro anhób aá, “A-mod-e-ngé, meebii’ é chōm éche mmōŋ ékoo’ é ahób.”

Abwōg-ábwōg áde áhóbé nê, nchóm a kúb antón.

61 Héé Sánjwéé ákúnné boŋ mīd mébomé bó Petro. Dóo Petro áwémtnéé e’yale ábe Sánjwéé ánlāā’ é mó aá, “Nchóm-a-kúb adēhób aá móto’o’ chii nén, wēbāŋ me á yāl ngen élán.”

62 Héé ábídé á ebwōg, abálé-’ε awé. Anchii bwāmbwam.

Bébómtédé Yesue, béwélé-’ε mó

(Mat 26.67-68; Mak 14.65)

‡ 22:44 Dongé á kálag dé’só déewóo’ é nchoo 43 ne nchoo 44.

63 Βοοβ-ποό, bad ábe bēnóné'áá Yesue bēmbootéd mó awel, bébōmtád mó,

64 békanj mó mīd, bēsēdtē mó bán, “Láá sé, nzé-módé abómé wε?”

65 Bésyáá'áá mó nzyāj nyaa ne nyaa.

Bépééné Yesue wée belyáged bé dyad

(Mat 26.59-66; Mak 14.55-64; Jōn 18.19-24)

66 Née bīn é'sánjé, bad bēmbáá bé Israel, beprise bēmbáá ne bemeléede bé mbéndé bēnkōb mbom, bēpēēn Yesue áwab káánsel.

67 Hée bēsēdtéé mó bán, “Láá sé nzé wε-εé edé Ane-awē-Béwógté?” Dóo Yesue áhóbéé áá, “Ké menláá nyé, nyéedúbéé mε.

68 Ké menséded-te nyé akan, nyéekwēnténné mε.

69 Boj bootya βοοβ, Mwán-a-Moonyonj ádyéé á ekáá émbáá é Dyōb á Ngum.”

70 Bó moosyáál bēnsédéd bánken, “Nédē wε-εé edé Mwán a Dyōb-ε?” Ankwentén áá, “Nyé bēn-εé nyéhóbé bán née édíf.”

71 Dóo béhóbéé bán, “Nzōm ehéé empée déhedeé? Syānē bēn dewógé áwē nsəl.”

23

Payledé akáádté Yesue

(Mat 27.1-2, 11-14; Mak 15.1-5; Jōn 18.28-38)

1 Hée belyáged bé dyad bésyāál bétyéémé ámīn, boj békεεné mó wée Payledé.

2 Awed-taá bébóótédé mó mekan abán áyāl bán, “Sékóbé anén mod ngáne ápuutadté sé alon áte. Ahóbé nén áá, séésanjad Kaisε tááse, áhōbē-ε nén áá, mó mwēn móó módē Ane-awē-Béwógté, nédē áhōbē' áá módē kāj.”

3 Dóo Payledé ásedtéé Yesue ááken, “Wε-εé edé kāj e bad bé Israel-le?” Yesue ankwentén mó áá, “Ngáne éhóbé.”

4 Boj Payledé álāngē beprise bēmbáá ne amute á bad nén áá, “Meenyinéé atōté ké ahóg áde anén mod ákwééné.”

5 Boj bēmbē békag á'sō, béhōbē bán, “Anén mod akóne bad ne mam míme áyágtεé á mbwóg e Judeya esyáál. Ambootéd á Galilia, apedé-ε hén βοοβ.”

Herōde akáádté Yesue

6 Née Payledé áwógé nē, ansédéd ké Yesue adfi mod a Galilia.

7 Bēnlūmēd mó áte bán, nē dēn dóo édíf. Ngáne alon á Galilia abédé ásē e nkamlen míme Herōde, Payledé anlóm Yesue áwē. Herōde mwēn ámpē ambé á Jerusalem ene pōndé.

8 Ayógkε mewēmten awōj ányín Yesue áyāle awógé'áá mó dúu. Ahedé'áá áá mónyín menyáké míme ábelεε. Né-óó anwóg menyínje áde bépééné Yesue áwē.

9 Ansédéd Yesue ekud é mekan, boj Yesue enkēntimténné mó dyamdyam.

10 Beprise bēmbáá ne bemeléede bé mbéndé bēntyēēm ámīn, bēbāntád Yesue mekan áyāl.

11 Hée Herōde, bóobe éche sánze bébóótédé mó awōō, béwélé-ε mó. Dóo béwāádté mó kase é bwēm, boj álōmē mó ámbīd wée Payledé.

12 Nén dēnkāj Herōde bó Payledé bēntīm ásē éché epun; édé ape nē, búmō bēnsēbē ekōyí awonj.

Bébidté mbakú bán béwūu Yesue

(Mat 27.15-26; Mak 15.6-15; Jōn 18.39-19.16)

13 Hē dóo Payledé áládé beprise bēmbáá áte nchoo ne belyáged, ne bad bēmpēe,

14 Bonj aláŋgē bó aá, “Nyênsébé anén mod apεen áwém. Nyé bán apuutad bad nló áte. Bɔɔb-pɔɔ nhedé áte áyál éché wée nyébén nyédíí, bonj meekóbneé mó dyam dé mbéb ké ahóg áde nyéhóbé bán abelé.

15 Ké Herɔde ámpē eekóbneé mó awusé ké ahóg, né-'aá ákáá bonj álómē mó ámbíd. Bɔɔb-pɔɔ dyam dé mbéb ké ahóg déesaa áde ábélé áde álúmte bán atáŋgéné kwééd.

16 Né-ɔɔ m̄h̄h̄b békúdé mó, rítédé mó, ákag.”*

18 Dɔɔ amute ásyā́l ábónéé bán, “Téd anén mod, éwúu mó! Bídéd sé Barabase.”

19 (Barabase abédéé mod awé bēnhēē á mbwɔg áyāle bel ábe ámbóótédé á dyad-té ne awúu áde áwúé'áá bad.)

20 Ngáne Payledé ánwōŋgē mewēmten átede Yesue, ambé aláá bó nē ámpē.

21 Bonj bēmbē bēbōnē' bán, “Bomé mó á awɔg! Bomé mó á awɔg!”

22 Anláá bómpē ngen éche élónténé éláán aá, “Ayāle chán? Ebébtéd éhéé ábélé? Meekóbneé mó awusé ké ahóg áde atáŋgéné kwééd. Né-ɔɔ, m̄kūdē'ε mó, ákag.”

23 Ké nē bēmbē bēbōnē' bán ábome mó á awɔg. Kááŋ ne á asóg, échab ehób énkobnéd.

24 Payledé ambídéd mbakú aá, m̄ɔ́bēl nēŋgáne bēhóbé.

25 Antédé mod awé bēnhōbpē, awé ambé á mbwɔg áyāle bel ne awúu áde áwúé'áá bad, bonj ábagé bó Yesue aá, bétiméd mó ngáne bédáá.

Bébómmé Yesue á awɔg

(Mat 27.32-44; Mak 15.21-32; Jɔn 19.17-27)

26 Ade sánze ékεεnεé Yesue á hóm dé mpanag, émbomén Simone, mod a dyad á Sirine. Anén mod ambíd á mwá dyad awé adé á ahóngé. Héé békóbé mó, bépémtéd mó awɔg áde Yesue bán áhídne mó dó ámbíd.

27 Átínté e ndun e mod eché enanáá Yesue ámbíd, bebaád bēmbē áwed, béchyé'áá, bélebe-'ε mó.

28 Dɔɔ Yesue áóné ámbíd, aláŋgē bó nén aá, “A-bán bé bebaád bé Jerusalem, nyéechyēē' me, nyéchyε' échen yāl ne áben bán.

29 Nhóbe nē áyāle nén e'pun é' b̄n é'húé, áde bad bēhōbpē bán, 'Nnam ne ábē ábe bédé ekɔm, ne ábē ábe bééchyāá', ne ábē ábe béēmwan̄jté mbéd!' ”

30 A póndé eched dɔɔ bad bēláŋgēē mbɔɔd bán,

'kúmtéd sé ámín,'

káa e'kone bán,

'kútén sé.'

31 Nzé bēbele' mímén mésyā́l bɔɔb, áde bwel é'lyágé é'díí mendíb áte, chán-náa bēbenlé áde bwel békínne-ye?"

32 Bɔɔb-pɔɔ bēnkéén e'bébtéd é' bad é'be, ápan bó nchoo ne Yesue.

33 Ade bépédé hóm áde béchagεé bán Ebóngél é Nló, bēmbomé Yesue á awɔg, ne ábē e'bébtéd é' bad é'be. Bēmbomé nhóg á ekáá é emwed, aníní-'ε á ekáá émbáá.

34 Héé Yesue ákánneé nén aá, “A-Sán, lagsén bó áyāle béébíí'ε chóm éche bēbéléé.”† Sánze énsíd mbambú, ákab mbóté éche Yesue.

35 Ndun e mod entyéém á nkag, bēnané' chóm éche ébenlad. Bonj benkamlεε bé Israel bēwéláá mó, bēhōbē bán, “Achóŋté'áá bad bēmpēe,

* **23:16** Donge á kálag dé'só ábádé nchoo 17: Bɔɔb-pɔɔ, mwé téé, nzé Ngande e Nnylme-dm̄n embé, Payledé antáŋgén bad bé dyad mod a mbwɔg nhóg achenned. † **23:34** Donge á kálag dé'só déewóo'ε: Héé Yesue ákánneé nén aá, “A-sán, lagsén bó áyāle béébíí'ε chóm éche bēbéléé.”

áchood-tó eche yál, nzé ne mbále mó adé Ane awě Dyöb Ápwédé, boŋ Awógéd-te.”

³⁶ Sánze chómpē éwéláá mó. Empiinéd mó ebéntéd é mím,

³⁷ élanḡē mó bán, “Nzé wée edé kân e bad bé Israel, ésoŋ echoŋ yál!”

³⁸ Béntél áwe nló ámin nén bán, “Kân e bad bé Israel chíó nén.”

³⁹ Atínté e ábê e'bébtéd é' bad é'be ábe bēmboméé bóobe Yesue á awəg, nhóg ansyāŋ mó aá, “Saá we edé Ane awě Dyöb Awógté-ye? Sōŋ-ō echoŋ yál, ésoŋ-ē sémpé!”

⁴⁰ Boŋ aníní mod ankáné waáb áte aáken, “Weebáá'é Dyöb-ε? Sóo bad bébe dekudé melemlem mé nkógsen míme mómpē ákudé.

⁴¹ Boŋ pen, nkógsen míme dékudé, nítāŋgéné ne míme sóo mbéb. Boŋ anén mod ebebeleé dyam dé mbéb ké ahóg.”

⁴² Héé ane mod ábádeé ahób aá, “A-Yesu, sōn, weéchatán me á pónde eche wésōnlē á nkamlēn.”

⁴³ Dóo Yesue álanḡéé mó aá, “A mbále, nlanḡe we meé, chii nén dēn wēbē ne me á Paradis.”

Yesue awédé

(*Mat 27.45-56; Mak 15.33-41; Jōn 19.28-30*)

⁴⁴⁻⁴⁵ Bóob-póó bīn bēmbē dyam kəd. Etondeε andím, ehintén ékwē-ε ekíde áte ésyāḷ káŋŋ ne á ngāŋ éláán. Abad áde dēnkāb Ndáb-e-Dyöb áte dēnsalé áte e'ped é'be.

⁴⁶ Hē dōo Yesue álébpé esaád aá, “A-Tē, áwōŋ mekáá dōo nlyágé échem edáódaŋ!” Amaá-'aá ahób nē, ámīl-'é nlém, awé-'ε.

⁴⁷ Ade mod ambáá a sánze ányíné nē, ankéméd Dyöb nén aá, “A mbále, anén mod abédé-ε mod a bwām.”

⁴⁸ Néé ndun e mod echē enhyč anōn, ényíné mekan mé ményáké míme mébénlédé, mod téé ambán ekáá á nlém, ásuē' á ndáb.

⁴⁹ Yesue ábe besōn bésyāḷ ne bebaád ábe bēmbootéd mó anan ámbíd se á Galilia, bényéem etún, bēnōné nímén mekan mésyāḷ.

Béltmmé Yesue

(*Mat 27.57-61; Mak 15.42-47; Jōn 19.38-42*)

⁵⁰⁻⁵¹ Bóob-póó mod ambé awě abédé dīn bán Josebe. Anén mod ambíd á dyad á bad bé Israel áde béchāgeé bán Arimatia. Abédé mod a edúbé. Abédéε mod a bwām, asāŋ-ε. Kénéε ábédé mod a káánsel enkēnkwenténné mbakú echē ábíní belyágéd bé dyad bēmbídēdtē áwúu Yesue. Abédé mod nhóg awě anlyóg nlém nén aá epun épé éche Dyöb dékobpē nkamlēn.

⁵² Ankē Paylede achāŋ aá, ábe mó ndim míme Yesue.

⁵³ Néé ákudé kunze, anhúd mó á awəg, ákān mó kase e mbóm, áke alímé mó á soŋ echē bēpwógé á eláá-tē, éche béesēbpeé mod alíme áte.

⁵⁴ Nēn dēmbē á Mbwe mé mboŋsén, áde mbwe-mé-nkóme-áte nīhédé'áá abooted.

⁵⁵ Bebaád ábe bēmbootéd Yesue anan ámbíd se á Galilia, bēnhíd Josebe, bényín soŋ, bényín-ne ngáne bēnānté mó ndim á soŋ-tē.

⁵⁶ Dóo bétímé ámbíd á dyad-tē, bēboŋsán mǎg ne mekún míme bēnabnadté ndim. A mbwe-mé-nkóme-áte bēnkōmē áte ngáne mbéndé e bad bé Israel éfíde.

24

Yesue apuúde

(*Mat 28.1-10; Mak 16.1-8; Jōn 20.1-10*)

1 A epun é'sō, nédē á Sǎndé mbwembwε pírib, ábē bebaád bēnkĕ á sonj. Bēnwālē mekún mé ndim níme bēmbonjǎnné.

2 Béntān nĕé aláá áde bēnkǎlĕnnĕ nsal rí sonj ásyǎngé á e'dii.

3 Bénsǎl á sonj-tĕ, bonj bēnkĕntánné ndim níme Yesuε áwĕd-te.

4 Nĕn dĕmbootéd bó ataged á mewĕmtĕn. Dóo bad bébε bébídé tǎléd, bĕtyéém bó á nkǎg ne mesanj níme mékine' áte.

5 Ne mbwǎg bwámbwam bĕnsǎn mĭd ásĕ. Hĕé ábē bad bébε bĕlǎngĕé bó bán, "Cheé ékás bonj nyĕhedé mod awĕ adé á alongé áfíntĕ e bad ábe bĕwédé?"

6 Eésaa hĕn, apuúdé. Nyékamtĕn ngáne ánlǎá'ĕ nyé, áde ábédé á Gallia,

7 áá bĕtǎngĕné Mwǎn-a-Moonyonj ábe á mekáá mé bebel bé mbĕb, bĕbǎme mó á awǎg. Bonj ápuú á e'pun ábe é'lóntĕné é'láán."

8 Hĕ dóo ábē bebaád bĕkámtné ábē e'yale.

9 Ade bĕhúú á sonj, bĕnkálē bembapεε dyóm ne nhóg ne ábíní bĕmpĕe mam mésyǎl níme bĕnyíne.

10 Bebaád ábe bĕnkálē bembapεε bé nlómag nímén nkalanj, bĕbédĕé Maria Magdalene, Joanaa, ne Maria, nyaá awe Jemse, nchoo ne bebaád bĕmpĕe.

11 Bonj bembapεε bé nlómag bĕnwĕmtĕn bán ene pǎle edí ngwĕl. Bĕnkĕndúbĕé chǎ.

12 Hĕ dóo Petro ápádtĕ ásĕ, bonj ányǎgtĕ á sonj. Ade ápédé áwĕd anwúlĕn ásĕ, ánnĕn sonj áte. Ányín dásǎ mbóm chĕmpĕn. Dóo ásuú á ndáb. Mewĕmtĕn mékǎgládtáá mó áte tǎngĕne dyam áde ábĕnlédé.*

*Yesuε apítđ bad bébε á nzii e Emǎs
(Mak 16.12-13)*

13 Bǎǎb-pǎǎ, échĕ epun dĕn, bembapεε ábe Yesuε bébε bĕkágé'áá á dyad áde bĕchǎgĕé bán Emǎs. Ábíd á Jerusalem ápe á Emǎs ábédé etún dyam máyl saámbé.

14 Ábē bembapεε bĕkágé'áá bĕkálē nímén mekan mésyǎl níme mékĕbĕnléd.

15 Ade bĕkĕkanlé kǎǎn, dóo Yesuε mwĕn áhyédé bó atán, bonj áwonjné bó.

16 Bonj pĕn mĭd mĕnkĕnnédnédtdĕ bó, áchem mó.

17 Hĕé Yesuε ásdĕtĕé bó aáken, "Pǎle ehéé nyépagkĕ akal á eke-tĕ nĕn?"

Hĕ dóo bĕtyéémé ne ngǎl esyǎl.

18 Dóo bó mod nhóg awe bĕchǎgĕé bán Klopase, átimtánné mó aáken, "Emǎn pĕn-ĕé edé nken a mod á Jerusalem, áde wĕébíi mekan níme níkĕbĕnléd nímén mesú-yĕ?"

19 Dóo Yesuε ásdĕtĕé bó aáken, "Mekan méhéé mĕ?" Bonj bĕlǎngĕ mó bán, "Mekan níme mébĕnlédé tǎngĕne Yesuε, mod a Nazaret. Ámbé nkal é'dǎǎdǎn awĕ ahóbé'áá, ábelé-'ĕ ndǎle é mekan á'sǎ é' Dyób ne á'sǎ é' baányonj.

20 Ábĕd beprise bĕmbáá ne belyáged bé dyad bĕmbε mó á mekáá mé nkamlĕne, ábided mbakú bán bĕwúu mó. Dóo bĕbǎmmé mó á awǎg.

21 Bonj sĕnlyǎg nlĕm bán, mó adé ane awĕ áwǎbĕ bad bé Israel. Nĕé éhúdé nĕ áte, chíi dóo álǎntan e'pun é'láán taa nĕ ábĕnléde.

22 Ámĭn e nĕ ámpĕ, nguse é bebaád áfíntĕ echĕd bĕpĕénnédé sé menyáké mé pǎle. Bĕnkĕ á sonj epǎg é mbwembwε,

23 bonj bĕétǎnĕé ndim níme Yesuε. Bĕnhúu ámbíd, bĕhǎbĕ bán, ángĕl épífidé bó á ndǎg-te, élǎngĕ bó nĕn bán, Yesuε adé á alongé.

24 Nguse é bad áfíntĕ echĕd énkĕ á sonj, bĕtán chǎ melemlem nĕngáne bebaád bĕnhǎbpĕ, bonj bĕényíneé mwĕn."

* 24:12 Donje á kǎlag dé'sǎ déewóó'ĕ nchoo 12.

25 Dóo Yesue álanḡeé bó aá, “E’yókél é’ bad bóo nyédíí. Nyéewámsánné mam mésyāāl níme bekal bé’daádaḡ béhóbé adúbe!

26 Ngómē éhédnádtáá bán, Ane-awē-Béwógté ákud nímén metake mésyāāl, boḡ ákud éche ehúmé.”

27 Yesue antógnéd bó mam mésyāāl tḡḡeche eche yāl, ngáne méténlédé á Kálag e Dyób-te, mbooted ne kálag éche Mosēe ne kálag éche bekal bé’daádaḡ bésyāāl.

28 Ade bépédé benben ne dyad áde békágé’áá, Yesue anlúméd byánán eke élyágé édé mó á’só.

29 Boḡ bénkāḡ mó bán, “Hyé édyēē áwēd ngáne bīn é’máá ahín, pónde-’e emaa átóm.” Dóo áhídé bó ádyēē áwáb.

30 Ade bóbōo bédyēé ásē á tébele ádyé ndyééd, antéd ewēle, ánāméd chó, ásál chó áte, boḡ ábagé bó.

31 Hē dóo níd métánlédé bó, boḡ béchemé mó. Dóo ányóó bó á díd-te.

32 Bénlāā nhóg ne aníní bán, “Ngómē nlém ríhógkáá syānē á abum áde ákánlé’áá syānē á nzii, boḡ átānlād syānē Kálag e Dyób?”

33 Abwōg-ábwōg dóo bésyāḡé ásē, boḡ bétīm-me ámbíd á Jerusalem. Dóo bétáné bembapēe dyóm ne nhóg ngáne béládné áte hóm ahóg bóobē bembapēe bémpe.

34 Héē bembapēe ábe bétáné á ndáb-te béláḡé bó bán, “Sāḡwéé apuúde ne mbáá, apíídē-’e Simōne!”

35 Dóo bó bad bébe bómpe béhóbé dyam áde ábénlédé bó á nzii, béhōbē-’e ngáne béchéme mó áde ásaléé ewēle áte.

Yesue apíídé ábē bembapēe

(Mat 28.16-20; Mak 16.14-18; Jōn 20.19-23; Mbēl 1.6-8)

36 A pónde eche békaleé nē, dóo Yesue mwēn ábídé bó átfintē, boḡ álenté bó aá, “Nsaḡ níbē ne nyé!”†

37 Mbwōg ménkōb bó bwāmbwam, bēwēmḡán bán, bényíné nwú.

38 Dóo álanḡeé bó aá, “Cheé nyétagéé áte? Cheé nyényáḡeé á nlém-tē.

39 Nyénōn me mekáá nyénōn-ne me mekuu, boḡ nyébíi bán mmēn-éé ndé. Nyékiteḡ me yāl, nyényín nze nwú níwóó nson ne e’hid ngáne nyényínéé nwóó nēn.”

40 Ade áamáá ahób nē, anlúméd bó níme mekáá ne mekuu.‡

41 Ade belyágé bényáḡeé nē ne menyīḡe mésyāāl, békōglad-táa á nlém-tē, dóo ásedteé bó áaken, “Nyēwóó chóm éche bédyáḡkē hén-ē?”

42 Dóo bébágé mó esōḡ é súu echē bétúmē.

43 Boḡ ákobé’, ádyāḡ-ke chó áwab e’só-te.

44 Héē álanḡeé bó aá, “Mmén mam móo nílanḡé’áá nyé áde nílyágé ndé ne nyé meé, dyam téé átāḡḡé alón ngáne éténlédé áyāl echēm á kálag é mbéndé éche Mosēe ne á kálag é bekal bé’daádaḡ, ne á Kálag e Ngāse-tē.”

45 Dóo ánédte bó debyéé áte, ábel nēn bésōḡḡen Kálag e Dyób,

46 boḡ álāḡḡē-’e bó aá, “Bétélé á Kálag e Dyób nēn bán, Ane-awē-Béwógté atāḡḡéne metake ákud, awé, boḡ e’pun ábe é’lonténé é’láán, ápuu.

47 Bétélé bán, bad békaleé meloḡ mé bad mésyāāl nēn bán, bad bétēde ábel dé mbéb á díḡn á Yesu, ábel boḡ Dyób álagsen bó mbéb. Bébootéd bad níme nkalaḡ akale á Jerusalem.

48 Nyé-’áá, nyédé bad ábe bényínné nímén mekan díd.

† 24:36 Donge á kálag dé’só déewóó’ē: álenté bó ad, “Nsaḡ níbē ne nyé!” ‡ 24:40 Donge á kálag dé’só déewóó’ē nchoo 40.

⁴⁹ Mm̄n m̄lōmē nyé ch̄m éche Titée ánh̄bp̄ē áá m̄s̄lōmē nyé. Boŋ nyélȳag nyédyεε á dyad-t̄ē k̄óŋ né nyékudé ene nḡine ech̄ē ebide ám̄n.”

Yesuε ap̄ummé

(Mak 16.19-20; Mbel 1.9-11)

⁵⁰ D̄óo Yesuε ásȳáŋnédé b̄ó á dyad-t̄ē, áp̄εεné b̄ó benben ne dyad á Betani. Héε ányéné mekáá ám̄n, boŋ ánámté b̄ó.

⁵¹ Ade ánamt̄éé b̄ó n̄ē, d̄óo ách̄enn̄ē b̄ó, boŋ ap̄ummé ádyōb. §

⁵² Ab̄ē bembap̄εε b̄émbw̄ḡē m̄ó meb̄ób̄ōŋ. B̄ēnt̄īm ámb̄id á Jerusalem ne menȳiŋge m̄ésȳā̄l.

⁵³ Bék̄ag-ke á Ndáb-e-Dyōb p̄óndé ésȳā̄l, ákémed Dyōb.

Nkalan mí bwám míme Yesue ngáne

Jone átélé Ndibned ní kálag

Nkalan mí bwám ngáne Jone átélé níúmte aá Yesue adii Eyale é Dyöb éche édé á ngíndé ne á ngíndé. Eché Eyale éntím moonyon edyēē-ε átínté e bad. Mmén nkalan, Jone atélé mó ábel bad ábe béláa mó bédúbe nén bán Yesue, Mwán a Dyöb mó adé Nsoode awé Dyöb dénhəbpé aá mósłom. Anlúmed-te aá nzé bad bédúbpé mó béküd e'sooson.

A kálag té wén á mbooted, Jone alúmté ngáne baahóg béndübēē Yesue békwenten-ne áhíd mó, álúmtē-ε ngáne bémpee-ε bétəngánnáá mó, béekwentene'-ε mó adúbe. E'ped 13-17 é'hóbe təngene abé áde Yesue ne ábē bembapeε bémbeē pónde esyáál kóəñ ne epun éche békóbe mó ne mam míme ánlāá é bó ene pónde esyáál. Jone ahóbe ámpē aá nzé mod adúbpé Krístəá áküd alonje áde déemaá'.

Nkabted ní kálag

Ndibned 1.1-18

Jone, Ndusene ne bembapeε bé'sō ábe Yesue 1.19-51

Nsón míme Yesue 2.1-12.50

E'pun bé asóg ábe Yesue á Jerusalem ne benben ne Jerusalem 13.1-19.42

Mpuu míme Səngwēē ne alúmed áde álúmtáá bad yəl 20.1-31

Nsótən: Yesue alúmté yəl ámpē á Galilia 21.1-25

Eyale éntím moonyon

¹ A mbooted, byánán Dyöb déhəg nköñsé Eyale émmad abé. Eyale émbē ne Dyöb. Eché Eyale ébédeé Dyöb.

² Kóəñse á mbooted Eyale émbē höm ahóg ne Dyöb.

³ Dyöb dēmbenléd éché Eyale áhəg bwēm é'syáál. Chöm ké ehóg éesaá éche Dyöb dénhəgké ésebé ne Eyale.

⁴ Alonje ásyáál dénhū ne Eyale, áde alonje dó-'aá ápiínédé baányon e'nyínen bé ekíde.

⁵ Ábē e'nyínen bé ekíde é'pene' á ehíntén-tē, ehíntén éhēlēē bó abóded.*

⁶ Mod nhóg ampē awé Dyöb dénlōmmē. Dín dēmbē mó bán Jone.

⁷ Jone ampē áláa bad təngene abé e'nyínen bé ekíde, ábel nén bad bésyáál bəwóg, bédúbe-ε.

⁸ Saké mwən abéde abé e'nyínen bé ekíde. Ampē ábid mbón təngene abé e'nyínen bé ekíde.

⁹ Eyale chóə ébéde e'nyínen bé ekíde é' mbále ábe é'nyínte' moonyon asyáál ekíde. Mós-'aá apagé'áá á nköñsé-te.

¹⁰ Abéde á nköñsé-te, bon kénēε Dyöb dénhəgké nköñsé ne mó, nköñsé ménkénchemmé mó.

¹¹ Ampē áwē dyad bon abē bad bénkénkobpé mó.

¹² Ké nē, ambə donje á bad kunze ábē bán bé Dyöb. Abé bad bēbédeé bad ábe bēnkob mó ne adúbe áde béndübēē mó.

¹³ Béesaá bán bé Dyöb nyaa eché moonyon áchyáá'é mwán. Bénkēmbáá bán bé Dyöb byánán moonyon mó achyáá bó. Dyöb dēn dóə áde awáb Titē.

* 1:5 Ehíntén-ne éhēlēē bó abóded káa ehíntén énkénchemmé bó.

14 Eyale êntim moonyon, édyɛɛ áfíntê echêd. Anlón ne nsimé, anlúméd-te syané ngáne mbále e Dyõb ékóó abé. Dennyín échê ehúmé, ehúmé éche sáá ábágé mó nêe nímê mpom ní mwán.

15 Jone anhób mam áyāl echê, anháád aá, “Anén mod móo rílangé’áá nyé meé, ‘Mod ahúe’ ámbíd echêm awé atómé me, áyale bédêchyaá me, né adé ámín.’”

16 Alón áde álóné ne nsimé ábélé syáa moosyáál dekudé nnam ámbíd e nnam.

17 Wée Mosɛɛ dóo Dyõb dêmpoódté mbéndé. Bon nsimé ne mbále béhúú ne Yesu Krístæ.

18 Modmod eényinɛɛ Dyõb mbéd, éetóméé nímê mpom ní mwán awé adé Dyõb abé-ɛ mó á akéb. Mwẽmpɛn mó akidényín mó. Mó abélé bon Tité Dyõbɛ abyɛn.

*Jone, Ndusene ahóbé ad
móosad Ane-awé-Béwógté*

(Mat 3.1-12; Mak 1.1-8; Luk 3.1-18)

19 Baámháá bé Israel bé dyad á Jerusalem bénlõm beprisɛ ne bad bémpɛ bé túmbé e Levi wée Jone, bán béke béseded mó bánken nzé-módé ádíí.

20 Enkẽmbangé ahób, bon ampanléd bó áte aá, “Saké me ndé Ane-awé-Béwógté.”

21 Héé bésedteé mó bánken, “Nzé-õ édíí? Wɛ-ɛé edé Elaijaa?” Ankwɛntén aá, “Aáy, meésaá mó.” Bẽnsedéd mó ámpɛ bánken, “Wɛ-ɛé edé nkal é’dáádɛn awe bésinɛ-ɛ?” Antimtén bó aá, “Aáy.”

22 Kóõne á asog dóo bésedteé mó bánken, “Nzé-õ édíí? Láá sé ábel sétim ámbíd áláa bad ábe belómé sé. Nzé-módé wɛwɛ ehóbé wée módé?”

23 Héé Jone átimtanné bó ne e’yale ábe nkal é’dáádɛn Yesayaa anhõbpɛ aá, “Mé ndé ehób éche mod awé ahãnte’ á ehýãge aá, ‘Nyétii nzii eche Sáɛgwéé.’”

24 Bóob-póó Befarisia bóo bénlõm ábê bad ábe bémpɛ wée Jone.

25 Bẽnsedéd mó ámpɛ bánken, “Nzé weésɛ Ane-awé-Béwógté, weésɛ-ɛ Elaijaa káa Nkal é’dáádɛn awe bésinɛé, cheé-õ édušané bad?”

26 Héé Jone átimtanné bó aá, “Ndusan ne mendíb, bon mod adé áfíntê echên awé nyéebíí’.

27 Mó adé ane awé ápɛ ámbíd echêm. Meékwognedéé áhune ké nímê nkóó mé metámbé.”

28 Mmẽn mésyáál mẽmbɛnléd á dyad á Betani á múde mé edíb é Jodan nímíníí wée Jone ádúsánnáa bad.

Yesu, Mwán-a-Ndyon ní mbód a Dyõb

29 Néé bín é’sáɛgé, Jone anyín néé Yesuɛ áhúe’é níníí. Héé áhóbéé aá, “Nyéõne’, Mwán-a-Ndyon ní mbód a Dyõb móne. Mó ahúde’ mbéb ní bad bé nkõhse.

30 Anén mod móo rílangé’áá nyé áde ménhõbpɛ meé ‘Mod ápɛ ámbíd echêm awé atómé me, áyale bédêchyaá me, né adé ámín.’

31 Ké mmẽn menkẽmbíí’ é mó, bon mempɛ rídusan bad ne mendíb ábel bad bé Israel hébii mó.”

32 Héé Jone ábidéé mbón nén aá, “Menyín nẽngáne Edáádɛn é Dyõb ébidé ádyõb néé éláã, ésud mó á nló mín, ébɛ-ɛ ne mó.

33 Ké nê, menkẽnsónténné meé mó ne. Bon Dyõb áde dénlõm me aá rídusan bad ne mendíb démmád me aláa aá, ‘Mod awé wényinné néé edáádɛn é Dyõb ésudé á nló mín, bon étyéém áhed, mósdusén bad ne Edáádɛn éche Esáá.’

34 Nnyíné nímén mekan mésyāāl, mbíde-'e mbóŋ nén meé mó adé Mwān a Dyōb."

Bembapεε bé'sō abe Yesue

35 Néε bín é'sángé ámpē, Jone ambé áhed ne ábē bembapεε bébe.

36 Anyín née Yesue átóméé. Adé anyíné mó, anhób aá, "Nyénone', Mwān-a-Ndyōŋ ní mbód a Dyōb mō nē."

37 Adé ábē bembapεε bébe béwógé nē, bēmbotéd Yesue ahíd.

38 Ade Yesue ánóné ámbíd bon anyín nēngáne béhídeé mó ansedéd bó aáken, "Cheé nyéhedeé?" Bēntimtén mó bán, "Rabai" (awē adé bán meléede) "Héé édyé'é?"

39 Anláá bó aá, "Nyéhyag, nyényín wée ndyεé'ε." Né-óó, bēnkē anyín wée ádyεé'ε. Ade bépédé áhed ébédé dyam ngāŋ éniin é ngukél. Bēndyεé-'ε áhed káōŋ bín é'híntén bó.

40 Atínté e ábē bembapεε bébe ábe bēnwōg dyam áde Jone ánhābpē bon béhíd-te Yesue, nhóg abédé dín bán Andreyā. Andreyā abédéé Simōn Petro mwānyāŋ.

41 Né-óó dyam dé'sō, ankē mwānyāŋ Simōne ahéd. Anyíné-'aá mó bon álāngē mó aá, "Sēnyíné Ane-awē-Béwógte" (nédē Krístāō).

42 Dóó Andreyā ápééné Simōne wée Yesue. Yesue anóné-'aá Simōne chóōŋ, bon áhōbē aá, "Edíi Simōne, mwān awē Jone. Béchagé we bōōb bán Sepase." (Adén dín ádíi melemlen née Petro, nē adé ndim e aláá.)

Yesue achénlé Filibe bó Natanié

43 Néε bín é'sángé, Yesue ammāđ aá mókag á mbwóg e Galilia. Dóó ákíi Filibe atán bon álāngē mó aá, "Hídé me."

44 Filibe abédéé mod a dyad á Betsaida, melemlen mé dyad ádē Andreyā bó Petro bēmbídtē.

45 Filibe anyín Nataniéle. Héε álāngéé mó nén aá, "Sēnyíné ane mod awē Mosεε ántenlé mam áyāl echē áwe mbéndé-te. Móó káōŋne bekal-bé-e'dáōđāŋ bēntenlé mam á yāl. Adíi Yesue mod a dyad á Nazaret, mwān awē Josεbe."

46 Héε Nataniéle ásedteé mó aáken, "Dyam á bwām áhéé áhele ábíd á Nazaret?" Dóó Filibe álāngéé mó aá, "Hyé ényín."

47 Ade Yesue anyíné Nataniéle ahúé', dóó áhóbéé áyāl echē aá, "Nyénone, mwān a Israel nén sóm-sóm, awē mbeltéd ntyéémé!"

48 Héε Nataniéle ásedteé mó aáken, "Chán émwédé me abii?" Héε Yesue ákwentanné aá, "Filibe adēhób aá móchage we, nnyíné we á alín á ngal sé."

49 Héε Nataniéle áhóbéé aá, "A meléed, edíi Mwān a Dyōb. We-éé edé kāŋ e bad bé Israel."

50 Yesue antimtén mó aá, "Edúbpé áyāle nílāngé we meé nnyíné we á alín á ngal sé. Wéényín mam nímé métómé nén."

51 Héε ábádeé aá, "Ne mbāle, nílāngé nyé nén meé, nyéenyín née dyōb ánédndéé nyényín-ne née ángel é Dyōb échágkéé ésudé-'ε Mwān-a-Moonyōŋ ámín."

2

E'wóngé á dyad á Kana

1 Ámbíd e e'pun é'be, e'wóngé bēmbē á dyad á Kana á mbwóg e Galilia. Yesue nyaá ambé áhed.

2 Bēnlēbē Yesue ne ábē bembapεε bómpē á e'wóngé wē.

3 Mím mēmmaa áte. Hē dóó Yesue nyaá ápédé áwē bon álāngē mó aá, "Mím mémáá bó."

⁴Hée Yesue álan̄geé mó aá, “A-nyan, weetan̄genéé me dyam áde ntán̄gené abel aláa. Echem pónde eépédéé.”

⁵Hée nyaá akíí bembaledé bé ngande bê aláa aá, “Nyébel kéchéé éche alángé nyé aá nyébel.”

⁶Baab-póó, mbeé é meláá ébédé benben ne áhed. Echê ndín é mbeé chós bad bé Israel bébenládtáá áhé mendíb áte á nwobe ní yál á pónde e mekáne echáb. Ké ehéé etedé’áá dyam mbwókél e líta e mendíb.

⁷Hée Yesue álan̄geé bembaledé bé ngande bê aá, “Nyélóned mbeé ché ne mendíb.” Né-óó, bénlóned echê mbeé hōod ne mendíb. ⁸Dóó álan̄geé bó aá, “Nyékabe-óó mendíb baob, nyékeen wée mod awè alyágte’ mekan mé nchaged.” Né-óó, bembél aned.

⁹Ade ane mod áwógléné nímé mendíb níme mémáá mím atim, enkembíí’ é wée mébidé, (bon bembaledé ábe bēnké nímé mendíb akobe bēmbíi). Dóó áchágé mod awè akude sómbé,

¹⁰bon alángé mó aá, “Mod téé abelé asébe achágtén bad mím nímé mébóó. Bad bémaa-’áa mó amwé bwámbwam, bon ábagé bó nímé mééboo. Bon wé, etimé ekóngeé níme mébóó kááj ne baob.”

¹¹Mmén menyáké nímé Yesue ábélé á Kana á mbwóg e Galilia móó mébédé ábē e’chemléd é’sō. Hē dō-’aá álúmté echē ehúmé, ábē bembapεε bēnsūm-me nímab nlém áwē.

¹²Née nén ámáá atóm, Yesue ansyógé á dyad á Kapenahum nchoo ne nyaá, baányan ne ábē bembapεε. Bēndyε’-ε áwed nguse é e’pun.

Yesue anané bekáb bé nyongé á Ndáb-e-Dyób

(Mat 21.12-13; Mak 11.15-17; Luk 19.45-46)

¹³Adé pónde e Ngande e Nnyíme-ámín ékwógé bad bé Israel apε, Yesue anké á dyad á Jerusalem.

¹⁴Adé ápédé áwed, anké á Ndáb-e-Dyób. Antán née bad békábéé dyon. Bésómé-’áá nyag, mbód ne mbəngé, bepele-bé-məné-ε bépenlé məné.

¹⁵Hée átédé nkōod, ámané etanjú ánanné bó nchoo ne échab mbód ne nyag á Ndáb-e-Dyób wē. Ampántéd məné nímé bad bépénlé’áá áte, ákūnē-’ε betébelé ábe bépénlé’áá nímé məné ámín mekuu ámín.

¹⁶Anláá bad ábe bésómé’áá mbəngé aá, “Nyébiden beləə bēn á ebwóg. Nyéetimté ndáb echē echem Sáj ndáb e dyon.”

¹⁷Adé ábē bembapεε bényíné nē, dóó békámténé eped é kálag e Dyób éche éhóbe nén bán “A-Sáj, kán echē níwóó áyāle echoj ndáb éwūū me.”

¹⁸Hée benkamlene bé bad bé Israel bétimé ámbíd, bésēdté mó bánken, “E’chemléd é’héé éhele elúmed sé ábel sébíi bán ewóó kunze ábel enén ndín e dyam?”

¹⁹Yesue antimtén bó aá, “Nyépāj enén Ndáb-e-Dyób, mēlōj chó ámpé áyāle e’pun é’láán.”

²⁰Dóó ábē bad bēhóbéé bánken, “Enén ndáb echē bétédé móom mé mwé méniin ne mwé ntóób chós éhóbéé wéé mósłōj áyāle e’pun é’láán-ε?”

²¹Bon ndáb echē Yesue áhóbé’áá ebédéé dásō eche yál.

²²Né-óó ámbíd eche Yesue áwédé bon Dyób ápūūd mó, dóó ábē bembapεε békámténé dyam ádē ánlāá’ é bó. Béndúbē mam nímé méténlédé á kálag e Dyób, bédúbé-’ε e’yale ábe Yesue ánhōbpē.

Yesue abít mod asyóól nlém dte

²³A pónde e Ngande e Nnyíme-ámín, áde Yesue ámbēē á dyad á Jerusalem, bad híin béndúbē mó ngáne bényínnē menyáké nímé ábeléé.

²⁴Bon ké nē, Yesue enkēsummé nlém áwāb, áyāle ámbíi moosyáál áte.

²⁵ Modmod enkéntangénné mó dyam aláa tângene mod ampée áyále mwën ammad moonyonj asyáál nlém abíí áte.

3

Yesue bô Nikodemuse

¹ Mod nhóg abédé ban Nikodemuse. Abédéé nhóg awě alyágté'áá bad bé Israel abé-'é epepé é bad bé Farisia.

² Mbwe nhóg ampě wée Yesue nkuu, álāngē mó aá, "A-meléed, sêchemé nén bán, edii meléede awě Dyöb álómé. Ayále nzé Dyöb déesé ne mod, eéhēlēē-se ábelé mekan mé menyáké nímé ébēlēē."

³ Yesue ankwentén mó aá, "Ne mbále, modmod eéhēlēē-se asól á nkamlen ní Dyöb ésebán achyáádté ampě."

⁴ Nikodemuse-'é anse déd mó aáken, "Chán mod awě amaa akwog áhēle se achyáád ekóólé-ekóólé? Eesaá mbále nén bán eéhēlēē-se asól á abum adé nyaá ngen éché élonťéne ébe ábel béchyáa mó ampě-ye?"

⁵ Dóo Yesue átímtanné mó aá, "Ne mbále, nlānge we meé, nzé béechyáa mod ne mendíb ne Edáádānj eéhēlēē-se asól á nkamlen ní Dyöb."

⁶ Ane awě achyáádté ne moonyonj á ekob, adíi moonyonj. Awě mó-'é achyáádté ne Edáádānj é Dyöb adíi Edáádānj.

⁷ Weebág menyáké ngáne ríhóbé meé 'Mod atāngéne achyáád ekóólé.'

⁸ Nzé epub éhóbé bán chó étóme', ped eché édáá ake chóo ékagké. Ewóge' ntāgag nímé ébēlēé bon weebíé-'é wée ébídēé ké-'é wée ékagké. Melemlem nē dōo édíi ne mod ké ahéé awě achyáádté ne Edáádānj é Dyöb."

⁹ Héé Nikodemuse ásedteé mó aáken, "Chán nén áhēlēse ábenled?"

¹⁰ Yesue ankwentén mó aá, "Néé édíi meléede ambáá á bad bé Israel weehēlē' nímén mekan asōŋten-ne?"

¹¹ Ne mbále, nlānge we meé, dyam áde sébíi dōo séhóbéé. Sébíde-'é mbón ne dyam adé sényiné. Bon nyé modmod nyéekwentenēé chóm éche séhóbéé adúbe.

¹² Néé nlāngéé nyé mekan nímé médeé mekan mé nkōŋsé, nyéedúbpe, chán-nō nyémwéé adúbe nzé nlāngé nyé mekan nímé médeé mekan me nkonj ní mín?

¹³ Modmod eékíí' é á nkonj ní mín étōmeé Mwán-a-Moonyonj awě abíde áwed bon ápe á nkōŋsé."

¹⁴ Ngáne Moseé ámboméé nyó á akon* bon atíi dó amín á ehyānge, melemlem nē dōo bēťíí' é Mwán-a-Moonyonj.

¹⁵ Nén débenléd ábel bon kénzēé awě adúbpe mó ákud alongé áde déemaá'.

¹⁶ Dyöb átómténe bad bé nkōŋsé adānj. Né-óó anlóm nímé mpōm ní Mwán ábel kénzēé awě adúbpe mó eewág bon ákud alongé áde déemaá'.

¹⁷ Dyöb dénkénlómme awe Mwán á nkōŋsé ákáad bad. Alongé á bad dōo ánlómme mó ásonj.

¹⁸ Kénzēé awě adúbpe mó eékwaá nkáásé, bon kénzēé awě eedúbpe mó, amaa nkáásé akwe áyále eedúbpeé mpōm ní Mwán ní Dyöb.

¹⁹ Nén dōo mbakú e Dyöb édíi: E'nyínen bé ekíde é'pédé á nkōŋsé, bon baányonj bédás ehíntén tómaa e'nyínen bé ekíde áyále nímáb mbéltéd ndé mbéb.

²⁰ Kénzēé awě abele mbéb, akóó ábē e'nyínen bé ekíde, éepaá-'áá á e'nyínen bé ekíde-té ábán nén nímé mbéltéd mé mbéb méébidé áwed.

* **3:14** Nyó eche Moseé ámboméé ebédéé nyó eché ámbenlé. Nē dōo Dyöb démbenlé áchood bad ábe nyó énlédte á ehyānge. Nzé bad bēnnōn ene nyó, bédyyē bwám. Nōm 21.9.

²¹ Boŋ kénzée awë abele mam mé mbále, abíde' á e'nyínen bé ekíde ábel nén bad bényín bán kéchéé échë ábeleé awógne Dyöb.

Mbón echë Jone tângene Yesue

²² Ambíd e nê, Yesue ne ábë bemparee bënké á mbwóg e Judeya. Bóbō bëndyéé áwed nguse é e'pun, ádusán-ne bad.

²³ Jone mómpë adusánáá bad á dyad á Anon benben ne á dyad á Salim áyāle mendib mémbe áhed bwāmbwam. Bad békagé'áá awë, ádusán-ne bō.

²⁴ Nén ábédé byánán béhë Jone á mbwóg.

²⁵ Bōb-pōó, donje dé bemparee ábe Jone bépéntánnáá ne mod a Israel tângene nwohe ní yāl.

²⁶ Dōó bépédé wée Jone boŋ belāngē mó bán, “A-meléed, ekamtan mod awë nyúmō nyébédé á ped e edib é Jodan eníní? Mod awë éhóbé'áá mam á yāl echë. Nōné'! Mōó adusan bad níní! Bad híin békagke awë.”

²⁷ Jone ankwentén aá, “Modmod eéhēlē-sē ákud chōm, ésebán Dyöb ábágé mó chó.

²⁸ Nyébën nyédé me mbón nén bán menhób meé saké me ndé Ane-awë-Béwógté. Dyöb dénlōm me á'sō áboŋsen bad áyāle epe éche Ane-awë-Béwógté.

²⁹ Mod awë akude sómbé mó awóó sómbé. Boŋ nsón-a-echoŋ a mod awë akude sómbé, awë atyéeme mó á nkag áwōglān mó, abāg menyinge nzé awóge mó ehób. Né-óó, nén dōó ákás boŋ nlón ne menyinge.

³⁰ Edúbé échë étāngéné nēe échāgkéé, échēm-me ésude'.”

Ane awë abíde ádyöb atómé moosyāál

³¹ Ane awë abíde ádyöb atómé moosyāál. Ane awë mó-'e achyáádté á nkōŋsé adii mod a nkōŋsé, áhōbē-'e mam mé nkōŋsé, boŋ ane awë abíde ádyöb adé ámín e moosyāál.

³² Chōm éche ányíne ne éche áwógé chóó áhóbéé boŋ ké nê, modmod eedúbpéé mó.

³³ Boŋ kénzée awë akobé chōm échë áhóbé, né akwenténe ne nlém nisyāál aá Dyöb ádé mbále.

³⁴ Póle e Dyöb chóó mod awë Dyöb álómé áhóbéé áyāle Dyöb déenenéé ámbíd nzé abage' mod échë Edāódaŋ.

³⁵ Tité adāó awe Mwān, abagé-'e mekan mésyāál awë mekáá.

³⁶ Kénzée awë asumé nlém wée ane Mwān, akudé alongé áde déemaá'. Boŋ kénzée awë eébēl' ngáne áhóbé éekudté alongé áde déemaá', ábē akud nkōŋsen ní Dyöb.

4

Yesue ne mmwaád a Samaria

¹ Yesue ambíí aá Befarisia béwógé nén bán mókude ekud é bemparee tómaa ne Jone, módusan-ne bō.

² (Kénēe Yesue mwën éedusannaá bad, ábē bemparee bōó bédúsánnáá bad).

³ Awóg áde Befarisia bēnwōgkē nê démbēl Yesue anhidé á mbwóg e Judeya átim ámbíd á mbwóg e Galilia.

⁴ Byánán ápe á Galilia antāngén nēe ápóó a mbwóg e Samaria.

⁵ Á mbwóg e Samaria wē ampé á dyad áde béchagéé bán Sika. Adén dyad démbē benben ne ndōob echë Jakōbe ámbéé mwān Josebe se e'boód.

⁶ Ayāle ene ndoob echóg éche bélimé éche bébwélé'áá mendib áte émbē áhed. Echén echóg é mendib ébédeé éche Jakobe. Ngáne ekε énkōmēdtē Yesue andyēé á nkāg mé échē echóg é mendib. Nén ábédé dyam-éé ádé kād.

⁷ Hée mmwaád a Samaria nhóg áhyédé mendib abwεl. Yesue anláá mó áá, "Hé me mwā mendib mé amwé." ⁸ Enén pónde Yesue ábē bembapεε bēnkē á dyad-tē áchan ndyééd.

⁹ Hée ane mmwaád átímtanné mó áá "Ebé mod a Israel, me-'ε mbé mmwaád a Samaria, échōmē me mendib-ε?" (áyāle bad bé Israel ne bad bé Samaria béechemtanáá.)

¹⁰ Hée Yesue ákwentanné mó áá, "Nzé wembíi mende mé Dyōb, ebíi-'ε mod awé áhedne wε mendib, né ehēdné me mendib. Né mbagé-'ε wε mendib níme mébage alongé."

¹¹ Ane mmwaád ankwentén mó áá, "A-Sán, ké chōm éche bébwenléé mendib weewóó'é, echóg é mendib-pe échábé ásē, hée wētēdtē nímē mendib nímē mébage alongé.

¹² Echéd sáá ambáá Jakobe mōnlyágnéd sé échén echóg é mendib. Mwēn, ábē bán ne ábē e'lém é'syāā, hén-εé bémwágé'áá mendib. Nédē ehóbe bōob wεé mōtōmē Jakobe-ye."

¹³ Yesue ankwentén áá, "Kénzéé awé amwédé nímén mendib, píd ēbē ekób mó.

¹⁴ Boη kénzéé awé ámwē mendib níme mébéé mó píd éekóbpé mó mbéd. Mendib níme mébéé mó, mébē mó áte née n'yélé níme méélēnē'. Mímē mendib mébē mó alongé áde déemaá'."

¹⁵ Hée ane mmwaád álāngéé mó áá, "A-Sán, beé me nímē mendib ábel nén píd eekóbé mémpē, meépāg-ke hén ábwεl mendib ámpé."

¹⁶ Dōo Yesue álāngéé mó áá, "Kāg, éke échāg awoη nchóm, boη étim ámbíd hén."

¹⁷ Ane mmwaád antímtén Yesue áá, "Mewóó'ε nchóm."

¹⁸ Dōo Yesue áhóbeé áá, "Ekalé mbále wεé mówóó'ε nchóm. Ayāle ekéwōη bechóm bétāan, ké ane mod-te awé nyúmō nyédē bōob éesaá awoη nchóm. Dyam áde éhóbe ádé mbále."

¹⁹ Awóg áde ane mmwaád áwógé nē dōo álāngéé Yesue áá, "A-Sán, nnyíne nén meé edii nkal é'dáádāη.

²⁰ A mbōod-mín hén dōo ábēd besáá bēbágé'áá Dyōb edúbé, boη nyé bad bé Israel nyéhóbe bán á Jerusalem dōo bétāngéné Dyōb edúbé abε."

²¹ Hée Yesue álāngéé mó áá, "A-mmwaád nén, sóntén chōm éche rílanngéé wε. Pónde ehúé' echē nyéebaá Titée edúbé á mbōod-mín hén ké'ε á Jerusalem.

²² Nyé bad bé Samaria nyébage chōm éche nyéebíi'ε edúbé. Boη sé bad bé Israel sébage mó edúbé ngáne sébíi mó áyāle nēn e'soósōη é'húú dásō ne bad bé Israel.

²³ Boη pónde ehúé', emaa-'ε ne ape, echē bad ábe bēbage Titée edúbé ne nlem nhóg bébéé mó échē edúbé á Edáádāη ne á mbále-tē. Echē ndín é bad chōo Titée áhedéé áá bēbage mó edúbé.

²⁴ Dyōb ádii Edáádāη, bad-te ábe bēbage mó edúbé bétāngéné mó chō abε á Edáádāη ne á mbále-tē."

²⁵ Hée ane mmwaád álāngéé Yesue áá, "Mbíi meé Ane-awé-Béwógté āpē. Pónde echē āpéé, átānléd sé mekan mésyāā áte."

²⁶ Hée Yesue álāngéé mó áá, "Me awé sóo dekalé' me-εé ndé mó."

²⁷ Ene pónde chēn dōo ábē bembapεε bépédé. Yāl enkóm bó áte ányín née ákanléé mmwaád. Boη bó modmod éésēdtēé mó ááken, "Cheé éhēdeé?" Ké-'ε "Cheé nyé ane mmwaád nyékaléé?"

28 Ane mmwaád antedé apom dé mendib, átim ámbid á dyad-tê, áke aláá bad aá,

29 “Nyéhyag, nyényín mod awě álangé me mam mészāāl níme ríkém̄enlé. Nyé bán, saké Ane-awě-Béwógté awě bésineé nén-ε?”

30 Dóo ábē bad behídté á dyad-tê áke dé atán Yesue.

31 Ene pónde, bembapēē ábe Yesue bécháá’áá mó bán, “A-meléed dyé ndyééd.”

32 Bon Yesue ankwentén bó aá, “Nwóo ndyééd e adyé echē nyéēbii’ē.”

33 Héē ábē bembapēē bésedtēé nhóg ne aníní bánken, “mod múmó apiinédé mó ndyééd-ε?”

34 Dóo Yesue álangéé bó aá, “Echem ndyééd edii ábel nsón níme mod awě alómé me, áhóbé aá mbel, ámad-te mó.

35 Ngómē nyéyógkē ahób bán ámbid e ngon éniin, né pónde e mbote epedé? Nyénōne, nlangé nyé nén mēé nyékéled did áte, nyényín ngáne mbote émaá mbon̄sén abé, ápád á nzag-tê.

36 Ké bōob mod awě apáde adé níme nsábe akud, alade mbote é alongé áde déemaá’, ábel nén mod awě awéne bó mod awě apáde bó moosyāāl bébē menyinge.

37 Né-óó ngan echē békaleé nén bán, ‘mod nhóg awéneé, aníní-’ε ahúd edé mbále.’

38 Mē-εé nlómé nyé mbote áke dé apád éche nyéēwéneé. Bad bém̄pēē bébélé nsón, nyé-’ε nyétombwan bó nsón.”

Bad bé Samaria híin bédūbpē

39 Bad bé Samaria híin ábe bém̄bid adé dyad bédūbē Yesue áyāle mam mímē ane mmwaád anlāá’ē bó. Ane mmwaád anlāá bó aá, “Álangé me mekan mészāāl níme ríkém̄enlé.”

40 Né-óó, áde bad bé Samaria bépédé awē, bénchān mó bán ádyēē áwāb dyad. Né-óó, andyēé áwed e’pun é’be.

41 Bad híin bém̄pēē bédūbē mó áyāle áde ayóge.

42 Bénlāá ane mmwaád bán, “Saké dyam áde élangé sé dēmp̄en dóo ákák bon sēdúbé Yesue, bon sēbēn sēwógné etúu, sēbíí-’ε bán mwēn-εé akōjté Nsoode a nkōjsé abé.”

Yesue achōjté mwān a mod ambáá a ngómēnaa

43 Ámbid e e’pun é’be Yesue anhidé á mbwóg e Samaria, áke á mbwóg e Galilia.

44 Yesue mwēn anhób aá, nkal é’daádān eewóó’ē edúbé awē dyad.

45 Ade ápédé á mbwóg e Galilia, bad bēnkob mó. Bēnkob mó áyāle bém̄bē á Ngande e Nnyíme ámín á Jerusalem, bényín-ne mam mészāāl níme ámbenlé.

46 Héē Yesue átíme ámbid á Kana, wēē ántímedté mendib mím. Áhed-te dóo mod ambáá a ngómēnaa ábédé awē mwān ákónlé’áá á dyad á Kapannahum.

47 Ade ane mod áwóg bán Yesue ábidé á mbwóg e Judeya apedé á mbwóg e Galilia, ampē awē, achān mó aá áchood mwān, awē ambé benben ne kwééd.

48 Yesue anlāá mó aá, “Nyé modmod nyéedūbpēé kósj né nyényíné e’chemléd ne menyáké.”

49 Ane mod ambáá a ngómēnaa anlāá mó aá, “A-Sāj, hyāg, dékag kwééd edé ehób bán chí ekóbe awem mwān.”

50 Yesue antímtén mó aá, “Kāg, awonj mwān ábē á alongé.” Ane mod andúbé e’yale ábe Yesue, ákē-’ε.

51 Ade ane mod ádíí adé á nzii e esú dóo ábē bembəlede bébómné mós, bonj bəlāngē mós bán, “awonj mwān ábē á alongé.”

52 Dóo ásédte bós pónde echē ane mwān ámbootédte bwām abé. Bénlāá mós bán, “Ahéb déntéde mós chān á ngōj póg.”

53 Dóo ane mod ákámtené áá nímé melemem mé pónde móo Yesue anlāá é mós áá, “Awoj mwān ábē á alongé.” Né-óó, bóobē eche ndáb béndübē Yesue.

54 Abén e'chemléd bóo bembē e'chemléd ábe é'lónténé é'be ábe Yesue ámbenlé áde ábíde á mbwóg e Judeya bonj ápē á mbwóg e Galilia.

5

Yesue achōjté eped é mod

1 Ambíd e nímén mésyāāl, Yesue anké á Jerusalem á ngande e bad bé Israel.

2 A Jerusalem wē, benben ne Nsəl mé E'ké mé Ndyonj mī mbód, etonj ébédé áhed. Echén etonj béchágé'áá chós á ehób é bad bé Israel bán Betzata. Enwōj mebépé métáan.

3 A mebépé-te wē, bad bé nkole bénkūmēn áhed, ábe békwdé ndím, ábe bédé e'ped é' bad ne ábe bėwédé eped.*

5 Mod nhóg abédé áhed awē akékolé á etūn é móom mé mwē meláán ne mwē waam.

6 Ade Yesue ápedé áhed annyín ngáne ane mod ánánge ásē, abíi-'e áá nkole nímémé mós á yāl. Dóo ásédte mós áaken, “Edáá bwām adyēē-yē?”

7 Ane mod antimtén mós áá, “A-sán, meewóó' é mod awe ásléd me á etonj-tē nzé mendīb mépúútédé áte. Nlédte ahób meé rísól, né mod ampée amaa ásl.”

8 Dóo Yesue álāngéé mós áá, “Syāá ásē, étéd échonj ebúm, ékag.”

9 Abwōg-ábwōg ane mod andyē bwām, ányāg échē ebúm áte, ábootéd-te áke.

Epun éche nén dēmbēnlédte ébédéé á mbwē-mé-nkóme-áte.

10 Né-óó, anyín áde bad bėmbáá bé Israel bényíné ane mod awē Yesue ándídté bwām, bėnsédéd mós bánken, “Chii áde mbwē-mé-nkóme-áte, nzé dehidé-'e mbéndé echéd, weetāngēnéé ebúm apém se ébwāgne'.”

11 Bonj ankwentén áá, “Mod awē adidé me bwām anlāá me áá, “Téd échonj ebúm, ékag?” ”

12 Héé bésedteé mós bán, “Nzé adé ane mod awē álāngé wē áá, étéd échonj ebúm ékag?”

13 Bonj ane mod mwēn enkēnkōngé Yesue abii, ngáne Yesue ámmadté asól á amute-tē áde dēmbē áhed.

14 Ambíd enē Yesue annyín ane mod á Ndáb-e-Dyōb. Ade ányíné mós, anlāá mós áá, “Nōné', emaa bwām adyēē. Weébēlē mbéb ámpē ésebé nē, né wētōm atag ngáne étágé'áá nē.”

15 Hé dóo ane mod áhídté, bonj áke álāngē bad bėmbáá bé Israel áá Yesue móo adidé mós bwām.

16 Né-óó, bad bėmbáá bé Israel bėmbootéd Yesue mekuu ahíd áyāle achōjté mod á mbwē-mé-nkóme-áte.

17 Yesue antimtén bó áá, “Echem Sánj ayōgké nsón abel, me-'e ámpē ntāngéné nsón abel.”

* 5:3 Donje á kálag ábádé nchoo 3b-4: *Abé bad bé nkole bėmbē áhed ásin bán mendīb mépuuted áte. 4 Ebédé nén bán, pónde-té ángel eche Sāngwéé ehyagáá asud á etonj-tē wē épúuted chós áte. Nzé émbēnléd-te nē, mod á nkole ké ahéé awē ansébé asl áwéd-te nkole nímá'dá mós.*

18 Enén póle echë Yesue ánhöbpë, embël yäl ennabé bad bé Israel atod áte áwúu mó, áyále saké mbéndé e mbwe-mé-nkóme-áte, chëmpen ábóó bon achagé Dyöb aá Sáá, nédë álumte' aá bó Dyöb bétás.

Ngine e Mwän a Dyöb ehúu ne Dyöb

19 Né-óó, Yesue antimtén ábë bad bémbáá bé Israel aá, "A mbále, nlänge nyé nén meé, Mwän a Dyöb eébéleë dyam ké ahóg ne mó mwën. Mekan níme ányíneé Sáá abele' móó mómpë ábeleé. Kéchéé éche Sáá ábeleé chóó mómpë ábeleé.

20 Ngáne édíí nén bán Sáá adáó Mwän, álumte mó chöm téé éche ábeleé. Álüméd-te mó ndale é mekan éche étómé nímén, ábel ékómed nyé yäl áte.

21 Ngáne Sáá ápuudté bad bon ábagé-'e bó alongé, melemlem nê dóó Mwän mómpë ábagé alongé wée kénzéé awë adáó alongé abe.

22 Melemlem-'aá Sáá éekáadtë modmod. Abagé Mwän ngine esyáál ákáad bad.

23 Ábelé nê ábel bon bébage Mwän edúbé melemlem ngáne bébageé Sáá. Kénzéé awë eébage Mwän edúbé, né eébageé ké Sáá awë alómé Mwän edúbé.

24 Ne mbále, nlänge nyé nén meé, kénzéé awë awógé ábëm e'yale bon adúbé mod awë alómé me, akudé alongé áde déemaá', béekáad-taá mó. Amaá atóm á kwéed, asólé á alongé.

25 Ne mbále, nlänge nyé meé, pónde ehúe', emaa-'e ape, echë bad ábe béwédé béwökgë ehób e Mwän a Dyöb, bad ábe béwökgë-ché bébë á alongé.

26 Ngáne alongé áhúu ne Sáá, melemlem nê dóó ábéleé aá alongé áhúu ne Mwän ámpë.

27 Abagé-'e Mwän ngine ákáad bad áyále Mwän adii ane awë béchagéé bán Mwän-a-Moonyonj.

28 Nén déékómtë nyé yäl áte; pónde ehúe' echë bad bésyáál ábe béwédé béwökgë éché ehób,

29 bébid-te á son-tê: Bad ábe bébéleé mbon, bépuú ábë á alongé, ábe bó-'e bébéleé mbébé bépuú békud nkógsen.

Mbón áyál wée Yesue

30 "Dyamdyam déesaá áde níhele mbël ne mmën. Ngáne echem Sánj álangé me aá nkáad nê dóó nkáadtéé, né-óó mbakú echëm etyéémé. Etyéémé áyále meekáadtéé ngáne mmën níóó, bon nkáadte' ngáne mod awë alómé me áhedéé.

31 "Nzé mbidé echem yäl mbón né ene mbón echë mbídeé eékobnedéé.

32 Bon mod ampée adé awë abíde me mbón, mbí-'e nén meé, mbón echë abídeé me ekóbnéde.

33 Nyënlóm bad wée Jone, mó-aá abíde mbón tângene mbále.

34 Eesaá nén bán, moonyonj atángéné me mbón abíd. Bon nlänge nyé tângene mbón eche Jone, ábel nyédúbe me, nyékud e'soosonj.

35 Jone abédeé née etrukánj éche échodne', épenté-'e ekíde. Nyëmbé menyinje áhíd ábë e'nyinen bé ekíde áyále esón é pónde.

36 Bon nwóó mbón echë étómé ké mbón echë Jone ámbídtë. Nsón níme echem Sánj ábágé me aá níbel nímad, mmën mbíde mbón nén bán echem Sánj móó alómé me.

37 Echem Sánj awë alómé me mwën ámpë abíde me mbón. Nyééwógéé mó ehób, nyéenyiné-'aá mó mbéd.

38 Nyéédúbpéé ane awë alómé, né-óó nyéëmwagké bán éché eyale édye nyé á nlém-të.

³⁹ Nyékidte' Eyale é Dyöb ahed áte áyāle nyéwémtan bán nyééküd alongé áde déemaá' áwēd-te. Echén Eyale chén-ée éhóbe áyāl echém.

⁴⁰ Ké nê, nyééhēdēē ape awēm ábel bon nyékud alongé áde déemaá'.

⁴¹ “Saké edúbé é baányonj níhedeé.

⁴² Bon mbíi nyaa é bad éche nyéidi, mbíi-'e meé nyéewōnneé Dyöb edəŋge á nlém-té.

⁴³ Mpedé á dín áde echem Sán, nyéekobéé me, bon nzé mod ampée apedé á dín adē dēn, nyéékob mó.

⁴⁴ Nzé nyékene' nhóg ne aníní, nyéwōgē bwām, bon nyéébelēē ngáne Dyöb dēn dékenné nyé. Chán-nō nyédūbēē me?

⁴⁵ Ké nēe nyéekobéé me, nyéewémtan bán, me-éé mēlāā echem Sán meé nyéekobéé me. Mosēe awē nyélyágé nlém áwē mwēn-neé akōŋtē ane abē awē áhōb aá, nyébelé mbéb.

⁴⁶ Nzé nyénkōŋ Mosēe adúbe né nyédūbpé me, áyāle nén, áyāl echém dōo antenlé mam níme átélé.

⁴⁷ Bon nēe nyéedūbpéé mekan níme átélé, chán nyédūbēē ábēm e'yale?”

6

Yesue adidte ndun e mod

(Mat 14.13-21; Mak 6.30-44; Luk 9.10-17)

¹ Ambid e nímn mēsýāā, Yesue ne abē bembapēe bēnchabé edib é Galilia éche béchəgē bán edib é Tiberia.

² Ndun e mod ehidé'áá mó áyāle bényiné'áá menyáké níme ábélé'áá ngáne áchóŋtē'áá bad bé nkole.

³ Héé Yesue ne abē bembapēe békíí á ekone-mín bon bédýēē asē.

⁴ Póndé e Ngande e Nnyíme-ámín e bad bé Israel embé benben.

⁵ Asad áde Yesue ásádé díđ annyín ngáne ndun e mod éhúé'é mó benben. Dōo ásedtēé Filibē aáken, “Héé déchanné ndyééd eché débéé ábén bad ádyé?”

⁶ Ansédéd mó nē ákəg mó áyāle mwēn ammad abíi chōm éche ábenlé.

⁷ Filibē ankwentén aá, “Etēđ tómaa ne mbwókel é káppe ébe áchan ndyééd éche ékwognéd ábén bad bésýāā adyé ábel bon mod téé ádyé mwātiíđ.”

⁸ Dōo Yesue awē mbapēe ampée, Andreyā, Símon Petro mwānyarj áhōbéé aá,

⁹ “Mwā kódemod adé hén awē awánlé e'wēle é'táan ábe bēbénlé ngun é báli, awánlé-'e súu ébe, bon chán enén ndyééd éheléé-se ékwōg enén ndun e mod?”

¹⁰ Dōo Yesue álāngéé ábe bembapēe aá, “Nyéláa ábē bad, bédýēē asē.” Nkəákəə ambud abé á ped e adē abwōg a hóm. Né-óó, ábē bad bésýāā bēndýēé asē. A amute-té wē, baachóm bēbédé dýam e'kálé é'táan.

¹¹ Héé Yesue átédé ábē e'wēle, ásāgnān Dyöb, bon abē bembapēe békabpé bad. Ambēl melemlen ne éché súu. Mod-téé andýé ngáne áhédé'áá.

¹² Ade bō moosýāāl bémáá akód, Yesue aláá ábē bembapēe aá, “Nyélad ndyééd eché elyágé asē. Ndyééd ké pōg eebébé.”

¹³ Né-óó, áde bémáá adyé bēnlād ndyééd eché enlyōg asē, enlón e'lōŋ dyōm ne é'be.

¹⁴ Anyín áde ábē bad bényiné nímnén menyáké níme Yesue ábélé bēnhōb bán “Ne mbále, nkal e'dəəđəŋ awē bēnhōbpé bán əpē á nkōŋsé mó nén.”

¹⁵ Yesue ambíi aá bēhede mó akób ányágéd mó ábē kəŋ. Né-óó, antīm ambid á ekone-mín.

Yesue akil á mendib mín

(Mat 14.22-33; Mak 6.45-52)

16 Ngukél, bembapεε ábe Yesue bēnké á edib.

17 Bēnsól á bōle-tē, béchappé edib, bétimnád á Kapenahum. Ehíntén emmád apε áde Yesue éépédéé wée bédíí.

18 Enén pónde epub é ngine étómé'áá, épúutád-te mendib áte.

19 Bōob-pōó bembapεε bēmmád akε ké máyl méláán ké'e méniin, dōó bényíné Yesue akag á mendíb mín, átumnád bēnben ne ábab bōle. Mbwóg nī ngine ménkōb bō.

20 Bon anláá bó áá, "Me-εé ndé, nyéebáá'."

21 Héε bétédé mó á bōle-tē ne menyinge, ábwōg-ábwōg bépēēn-ne bōle á nkin wée békágé'áá.

Yesue mó adé ewele éche ébage' alongé

22 Néε bīn é'sánge, ndun e mod eché enlyǎg á múde mé edib nímíníí wée Yesue ne ábē bembapεε bémbídtē, bēnchem bán, ngukél eché entóm, bōle e'hóg bēnpen bōó bémbe áhed. Bémbíí-'ε bán Yesue enkēnsónlé áwēd-te ne ábē bembapεε. Bémbíí bán ábē bembapεε bēnpen bōó bēnké.

23 Myǎle mémpēe nīme mémbíđ á dyad á Tiberia mémpē á nkin mé edib bēnben ne hóm áde ene ndun e mod éndyēε e'wεle ámbíd eché Sǎngwéé ámáá Dyōb asǎgnεn.

24 Ade ene ndun e mod ényíné nén bán, Yesue ne ábē bembapεε béesaá áhed, bēnsól á myǎle-tē wé, béké á Kapenahum, áke dé áhed Yesue.

25 Ade ábē bad bépédé á pεd e edib eníníí, bényín Yesue. Bēnsédéd mó bán, "A-meléed, pónde ehéé épédé hén?"

26 Yesue ankwentén bó áá, "Ne mbále, nlǎnge nyé nén mεé, saké menyáké nīmē mibélé níkáá bon nyéhede mε. Nyéhede mε áyāle e'wεle ábe nyédyédé bon nyékód-te.

27 Nyéewág ntū áyāle ndyééd eché ebōode', bon nyéwág ntū áyāle ndyééd eché ebág abé ne abé á alongé áde déemaá', chó-'áá ébage alongé áde déemaá'. Ene ndyééd chōó Mwǎn-a-Moonyonj ábεé. Mōó Dyōb Titée áhédé e'chem áá ábel nē."

28 Dōó ábē bad bēnsédéd Yesue bánken, "Cheé sétǎngéné ábel, ábel bon sébel mekan nīme Dyōb áhedéé áá, sébel?"

29 Yesue ankwentén áá, "Dyam áde Dyōb áhedéé áá nyébel ádíí ádúbe mε awé álómé."

30 Bētímtén Yesue bán, "Menyáké méhéé wēbenlé nīme sényínnē bon sédúbé wε. Cheé mmōn wékongé ábel?"

31 Abēd betaa bēndyē mána á ehyǎnge ngáne éténlédé á kálag e Dyōb nén bán, 'Ambag bó e'wεle ábe é'bídé ádyōb áá bédyē.' "

32 Yesue anhōb áá, "Ne mbále, nlǎnge nyé nén mεé, saké Mosεε móombē nyé ewele éche ehúú ádyōb, bon echem Sǎj móombē nyé ewele éche ehúú ádyōb.

33 Ayāle mε-εé ndé eché ewele éche Dyōb ábágé, eché ehúú ádyōb, eché ábage baányonj bé nkōnsé alongé áde déemaá'."

34 Dōó bēlǎngéé Yesue bán, "A-Sǎj, bagé sé échén ewele pónde ésyāā."

35 Yesue anláá bó áá, "Me-εé ndé ewele éche ébage alongé áde déemaá'. Kénzée awé apedé áwēm, nzaa éékóbpé mó ámpē. Kénzée awé adúbpé mε, píđ éékóbpé mó ámpē.

36 Nlǎngé nyé nén mεé nyényíné mε bon nyéedúbpéé mε.

37 Bad bésyāā ábe echem Sǎj ábágé mε, bépē áwēm. Kénzée awé apedé áwēm, méebángé mó akob.

38 Ayāle meebídéé ádyōb ábel ngáne ébōnnédé mε. Mpedé ábel ngáne ébōnnédé echem Sǎj awé álómé mε.

39 Bonj nén ádíi mewêmten níme ane awê alómé me, aá átínté bad bésyāāl ábe ábágé me, meebódé ké nhóg, bonj aá nípuud bó moosyāāl á epun é asóg.

40 Echem Sāj ahede aá moosyāāl awê anyíné mwān, adúbé-ε mó, ákud alongé áde déemaá'. Měpuúd-ε bó á epun é asóg."

41 Abé bad bé Israel bémbootéd anyoo áte tǎngene Yesue, ahób áde áhóbé aá, "Méé ndé ewele éche ébidé ádyōb."

42 Hē dǎo bēhóbéé bánken, "Saá Yesue, mwān awê Josebe nén-ε? Ngómē debíi sáá ne nyanj? Chán-nō áhēlese áhōbē aá móbidé ádyōb?"

43 Yesue anláá bó aá, "Nyésóg anyoo áte.

44 Modmod éhēlēē-εe ápe áwēm, esebán Titée awē alómé me apééné mó áwēm. Měpuúd-ε mó á epun é asóg.

45 Eténlédé ngáne bekal bé'dǎǎdǎj bēhóbé nén bán 'Dyōb déyāgēd bó moosyāāl.' Kénzée awē awóge', áyāgkē-ε wée Titée, apag áwēm.

46 Eesaá nén bán, mod ké nhóg akényín Titée. Ane awē abídé wée Dyōb mwēmpen móo akényín Titée.

47 Ne mbále, nlānge nyé nén meé, kénzée awē adúbpe me ákūd alongé áde déemaá'.

48 Me-εé ndé ewele éche ébage alongé.

49 Abēn betaa béndyē mána á ehyānge, bonj ké nē, bēnwē.

50 Bonj ewele éche ébidé ádyōb édé nyaa eché kénzée awē adyédé chó éewáá.

51 Me-εé ndé ewele éche ébage alongé éche ébidé ádyōb. Kénzée awē adyédé eché ewele, ábē á alongé á ngíndé ne á ngíndé. Echén ewele éche mébéé nyé édíi echem yāl eché mébē ábel bonj níkǎde alongé dé nkōjsé."

52 Ade ábē bad bēwógé nē, bēnlīn, bēn ne bēn bēbootéd-ε mpentēn ní ngíne, bésedté bánken, "Chán anén mod áhēle atéd eche yāl, ábe syānē aá dédyāg?"

53 Yesue anláá bó aá, "Ne mbále, nlānge nyé nén meé, nzé nyéedyéde yāl e Mwān-a-Moonyon nyēmwe-ε níme mekií, nyéekudté alongé áde déemaá'.

54 Kénzée awē adyédé echem yāl, amwé-ε níme mekií, ákūd alongé áde déemaá', mēpuúd-ε mó á epun é asóg.

55 Ayāle echem yāl chǎ ekōjté ndyééd abé, níme mekií-ε mékoj mmítéd abé.

56 Kénzée awē adyédé echem yāl, amwé-ε níme mekií, alyagé adé ne me, me-ε nlyagé ndé ne mó.

57 Titée awē akǎa bonj bad bēbé á alongé, mó alómé me, mó akǎǎ-ε bonj mbé á alongé. Melemlem née kénzée awē adyédé echem yāl, mébenlé abé á alongé.

58 Né-ǎǎ, me-εé ndé ewele éche ébidé ádyōb. Meesaá nēngáne ewele éche ábēn betaa béndyē, bonj ké nē bēwé. Bonj kénzée awē ádyē echem yāl ábē á alongé á ngíndé ne ngíndé."

59 Yesue anhób níme mēsyāāl áde áyǎgté'áá á ndáb e mekáne e bad bé Israel á Kapenahum.

E'yale abe Yesue é'pene' alongé áde déemaá'

60 Ade bad hiin ábe bēhídé'áá Yesue bēwógé níme mekan bēnhōb bán, "Adén ayóge álélé ahíd. Nzée ahele ákob ene ndín e dyam?"

61 Yesue ambíi aá, bényonje áte áyāl eché, né-ǎǎ anláá bó aá, "Nē áwag nyé á yāl-ε?"

62 Chán-nō nyéhōbpē áde nyényínnē Mwān-a-Moonyon apumme' ámbíd ámín wée ámbídté!

63 Edǎǎdǎj é Dyōb chóo ébage' alongé. Ekob é yāl éesaá dyamdyam. E'yale ábe nílangé nyé é'dii edǎǎdǎj ne alongé.

64 Boŋ ké nê, nyé donge á bad nyéedúbpeé.” (Bootya á pónde éche Yesue ábóótédé ayáged, ambíí bad ábe béedúbé, abíí-’e mod awé ášom mó.)

65 Ambád ahób aá, “Nén dɔɔ ákás boŋ nláá nyé meé modmod eéheléé-se ape awem káŋ né echem Sáŋ abelé boŋ apē áwem.”

66 Bootya ene pónde nê dénkáŋ bad ábe béhidé’áá Yesue bésog mó ahíd, bétim-me ámbid.

67 Héé Yesue áseɔteé ábē bembapee dyóm ne bébe aá, “Nyémpē nyéhede atim ámbid-e?”

68 Simon Petro ankwentén mó aá, “A-Sáŋ, wée nzéé sékéé? We-éé ewóó e’yale ábe é’kəə’ boŋ mod ákūd alongé áde déemaá’.

69 Sédúbpé sēbíf-’e bán, we-éé edé Ane-awé-Asáá awé abidé wée Dyób.”

70 Héé Yesue ákwentanné bó aá, “Eesaá mbále bán mpwede nyé bad dyóm ne bébe-yé? Boŋ ké nê, nyé mod nhóg adii mod a Satan.”

71 Judase, mwān a Simon Iskariode móo Yesue áhóbé’áá. Kénée ámbēē mbapee nhóg áftinté e bembapee dyóm ne bébe, mó anké Yesue nturé.

7

Yesue ne baányan

1 Ámbid e nímén mésyāāl, Yesue akagé’áá mebwóg ne mebwóg á mbwóg e Galilia. Enkēndangé ake á mbwóg e Judeya áyale bad bé Israel béhéde’áá mó awúu.

2 Bɔɔb-ɔɔ, Ngande e E’bem * e bad bé Israel embé benben.

3 Héé Yesue baányan belángeé mó bán, “Etángeé adén abwóg á hóm ahide, éke á mbwóg e Judeya ábel bad ábe béhíde we bényín menyáké níme ébeleé.

4 Mod eébéléé nsón á e’kɔŋnéd-te, nzé ahede aá móbyéen. Ngáne ébeleé nímén mekan mésyāāl ébel nkóŋsé nisyāāl mbíí we.”

5 (Ké Yesue baányan bēnkēndúbéé mó.)

6 Héé Yesue álángeé bó aá, “Echem pónde eépédéé. Boŋ ne nyé, echen pónde edé pónde ésyāāl.

7 Nkóŋsé méehelée-se níkɔɔ nyé. Boŋ níkɔɔ me áyale mpanlad bó nímāb mewusé áte.

8 Nyébó nyékag á ngande. Méekaá áwed áyale echem pónde eépédéé.”

9 Yesue amaá-’áá ahób nê, abé abé á Galilia.

Yesue akii Ngande e E’bem á Jerusalem

10 Ámbid e pónde áde Yesue baányan bémáá ake á Ngande e E’bem, mómpē anké áwed. Boŋ enkēnlúmédte yāl. Anké nyaa eché bad bēnkēmbíí’ é ndín e mod eché adíí.

11 Benkamlene bé Israel béhéde’áá mó á ngande-tê, bésedte bánken, “Héé mómó adíí?”

12 Áftinté e ndun e mod eché embé á ngande-tê wē, donge á bad béhóbé’áá bán, “Adii mod a bwām,” ábíníí-’e bán, “Aáy, adoge bad dogén.”

13 Boŋ bó modmod bēnkēmbidédte yāl áwed áyale bebáá’áá bad bēmbáá bé Israel.

14 Áde ngande ékwógé ape áftinté, Yesue anké asól á Ndáb-e-Dyób, ábootéd ayáged.

15 Yāl enkóm benkamlene áte bwāmbwam tǎŋgene áde ayáge. Né-ɔɔ, bēnsédéd bánken, “Chán anén mod ámwédé nímén mam mésyāāl abíí áde éekíí’ é á esukéle é mbéndé?”

* **7:2 Ngande e E’bem:** ebédéé ngande eché bad bé Israel bebélé’áá ákamten pónde eché ábab betaa bédyéé’áá á e’bem-tê áde bebédé á chyánge, áde béhidte á Egipto.

16 Héé Yesue ákwentanné bó aá, “Ayáged áde ní'yágtéé déesaá ádêm. Adii áde mod awě alómé me.

17 Kéncéé awě awémtnéne abel ngáne Dyöb áhedeé, ábfi ké ádêm ayáge ahúú ne Dyöb ké' é ahúú ne mmén.

18 Kéncéé awě ahóbne eché kunze, abele nê áhede eche yál edúbé. Boñ mod awě ahedte' mod awě alómé mós edúbé, asáá nlém á abum, eesaá mod a metóm.

19 Eesaá mbále nén bán, Mosée abagé nyé mbéndé-ye? Ké nê, nyé modmod ehídeé mbéndé éched. Cheé ékásá boñ nyéhedeé me awúú?”

20 Dóó ene ndun e mod ékwentanné mós bán, “Edáádəñ é mbéb édé we áte. Benzébádé béhede we awúú?”

21 Yesue ankwentén bó aá, “Nsón nhóg míme mbéle, níkómté nyé moosyáál yál áte.

22 Mosée ambě nyé mbéndé aá, nyéyage áben bán (kénée edíí bán, saké Mosée móombootéd. Abēn betaa bóó bémbootéd). Né-óó, nyéyage bad á Mbwe-mé-nkóme-áte.

23 Nzé béyagé mod á mbwe-mé-nkóme-áte, ábel béebōō' mbéndé e Mosée, cheé ékásá boñ nyélinné me áyále nídíde mod bwám á mbwe-mé-nkóme-áte.

24 Nyéekáádté dyam áde mbéle ngáne nyényíné, nyékaad ngáne éhednadté.”

Bán Yesue môdé Ane awě básiné-ye?

25 Héé dóó donge á bad bé Jerusalem béhóbéé bánken, “Saá mod awě béhedeé awúú mó nén-é?”

26 Nyénóné', akanle bad á tál e ékwée, bad bémháá béesaá-'aá mó dyamdyam aláa. Kapóg bébíí bán ne mbále, môdé Ane-awě-Béwógté-yóó!

27 Boñ éhehéé-é ébé nê, áyále debíí bán pónde eché Ane-awě-Béwógté ápéé, modmod éebíí é wée ábíde. Debíí wée anén mod ábíde.”

28 Yesue ambé áyágté' á Ndáb-e-Dyöb. Ade áyágtéé dóó áchágté ehób ámín aá, “Ée, nyébíí me bwám, nyébíí-'é wée mbíde. Meépedéé hén ne mmén. Ane awě alómé me adé mbále. Nyéebíí' é mó,

29 boñ me pən mbíí mó áyále áwě dóó mbíde, mó-'aá alómé me.”

30 Ade áhóbé nê, béhéde' áá mó akób, boñ modmod enkémbánné mó ké ekáá á yál, áyále eche pónde enkémpaá.

31 Ké nê bad híin áfínté ene ndun e mod béndübé mó. Béhóbé' áá bánken, “Ade Ane-awě-Béwógté ápéé, ábél e'chemléd bé menyáké, míme nítóme míme anén mod ábéle-ye?”

Befarisia bélómé bad akób Yesue

32 Befarisia bénywóg née bad bényongéé áte, béhóbéé mímén mekan tñgene Yesue. Né-óó bóóbe beprise bémháá bénlóm bembáledé akób mó.

33 Héé Yesue áhóbéé aá, “Ndíi ndé ne nyé, boñ mwämpín ní pónde mēsū ámbíd wée ane awě alómé me.

34 Ámbíd ené, nyééhéd me, boñ nyéenyínné, wée mébēē-'é nyéehenlé ape áhed.”

35 Nê démbél benkamlene bésedte nhóg ne aníníí bánken, “Héé anén mod múmó áhedeé ake, wée syánē déehenlé mó anyín? Ahede ake á alon á Grikia wée ábéd bad bédíí á ebwóg áyáged bad bé Grikia-ye?”

36 Ahóbé' aá dééhéd mó boñ déenyínné mó. Aá déehenlé-'é ape wée móbēē. Cheé nê álúmtéé?”

E'dib bé mendib mé alongé áde déemaad'

³⁷ Epun é asóg é ngande éche éntōmtēn etógnén abé áyale ene ngande émpě. Yesue antyéém amín, dōo áchágté ehób amín, áhōbē aá, “kénzée awé píd ékóbé áhyag awēm áhye ámwē mendíb.

³⁸ Kénzée awé adúbpé me, Kálag e Dyób ehóbe aá, ‘e’díb bé mendíb mé alongé bēbídé mó áte é’sobpe.’”

³⁹ Edəəðəŋ éche Esáá chōo Yesue áhóbé’áá. Chōo bad ábe béndübē mó bēntāŋgēnnē akud. Ene pónké né Edəəðəŋ éche Esáá éepédēē wée ábē bad áyale ene pónké ne Dyób déélūmtēē ehúmé éche Yesue.

Bad békábné áte á atón áde Yesue

⁴⁰ Donje á bad átínté ene ndun e mod ábe bēnwōg nēē Yesue áhóbēé nímén mekan bēnhōb bán, “Ne mbále, anén mod adii nkal é’ dəəðəŋ awé ápě.”

⁴¹ Bad bémpee bēhóbé’áá bán, “Módé Ane-awē-Béwógté awé ápě.” Ké nē, bémpee bēhóbé’áá bán, “Ane-awē-Béwógté eéhēlēē-se abíd á Galilia.

⁴² Eténlédé á Kálag e Dyób nén bán, Ane-awē-Béwógté ábíd á túmbé e Dabid á dyad á Betlehem wée Dabidē ámbídtē.”

⁴³ Né-ōó, bad bēnkabén áte á atón áde Yesue.

⁴⁴ Donje á bad bēhédé’áá mó akób boŋ modmod enkēmbánné mó ké ekáá á yál.

Baámháá bé Israēl béekwētenéé Yesue adúbe

⁴⁵ Kóəŋne ásōg bambəlede bé Ndáb-e-Dyób bēntīm wée beprise bémháá ne Befarisia. Héē beprise bémháá ne Befarisia bésēdtēé bó bánken, “Cheé ékás boŋ nyéepēene mó hén?”

⁴⁶ Héē ábē bambəlede bēhóbēé bán, “Modmod eéhóbēé ndín é mam éche anén mod áhóbéé.”

⁴⁷ Dōo Befarisia bésēdtēé bó bánken, “Nédé ane mod adogé kóəŋne nyémpē-ye?”

⁴⁸ Nyékényín nēē mod ambáá ké’ e Farisia nhóg adúbpé mó? Ké nhóg eédúbpéé mó.

⁴⁹ Enén ndun e mod eebii’ é mbéndé e Mose. Né-ōó ebómán édé ne bó.”

⁵⁰ Farisia nhóg awé béchágé’áá bán Nikodemuse awé ansébé Yesue aké de anyín, anláá bó aá,

⁵¹ “Eche syánē mbéndé eébagéé kunze nén dékōgsen mod áde déekáadtēé mó, áwóglēn dyam áde ábélé.”

⁵² Ade áhóbé nē, bēntíntén mó bánken, “We ámpé ebídé á Galilia-ye? Héd áte á Kálag e Dyób, wēnyín nén wē nkal é’ dəəðəŋ eebídēé á Galilia.”

Mmwaád awé akábé asón

⁵³ Ámbíd enē moosyáál ansú áwe ndáb.

8

¹ Yesue pen ankě á Ekone é Menzab.

² Née bín é’sángé mbwembwe, antīm ámbíd á Ndáb-e-Dyób. Ndun e mod empě áwē. Andyéé ásé ábootéd bó ayáged.

³ Bemeléede bé mbéndé ne Befarisia bémpeeén mmwaád nhóg áwē, awé békóbé nēē akábéé asón á ndáb e e’wóngé. Bēntíí ane mmwaád átínté echáb,

⁴ boŋ bēlāŋgē Yesue bán, “A-meléed, békóbé anén mmwaád nēē akábéé asón á ndáb e e’wóngé.

⁵ A mbéndé eche syánē, Mosee anhób aá, enén ndín e mmwaád bélúm chó meláá kóəŋ áwē, chán-nō wē-é éhóbé?”

⁶ Bēnsédéd mó nē áhíí mó melám, ábel nén békóben mó awusé. Boŋ Yesue anwúlén ásé, ábootéd bwēm atel á ndəəb-tē ne ábē e’mii.

7 Ade bɛbádnéné mós asɛded, antíi yál amín, aláá bós aá, “Nyé ké ahéé awé eébélé mbéé abé mod a’ sós álúm mós meláá.”

8 Anwúlén mós ásé ámpé átelé’ ábɛ bwém á ndóob-tɛ.

9 Ade abé bad bɛwógé nê bémbootéd ahide nhógɛ-nhógɛ. Bad bɛmbáá bós bɛnsébé akɛ, boŋ bɛsád bɛhídɛ’. Kááŋ ne á sósɔg Yesue mwémpɛn anlyáɔg, ane mmwaaád-tɛ abé atyéém áhed.

10 Ade Yesue átíídé yál amín, dós ásɛdtɛé ane mmwaaád aá, “A-mmwaaád nɛn, héé bad ábɛ bɛpɛɛné wɛ hén bɛdíí? Modmod eélyáɔgɛé hén awé ahóbɛ aá bɛwúu wɛ-yɛ?”

11 Ane mmwaaád ankwɛntén aá, “A Sán modmod.” Héé Yesue álanɔgɛé mós aá, “Né mɛmpɛ mééhóbpɛ mɛé bɛwúu wɛ. Kág wɛ, boŋ weébɛlɛ mbéé ámpɛ.”*

Yesue mósé e’nyinɛn bé ekide bé nkòŋsé

12 Yesue anláá abé bad ámpɛ aá, “Mɛé ndé e’nyinɛn bé ekide é’ bad bé nkòŋsé. Kɛnzɛé awé ahíde mɛ, éekáá á ehíntén-tɛ, boŋ ákúd e’nyinɛn bé ekide ábɛ é’báge’ alonɔgɛ.”

13 Dós Befarisia bɛlanɔgɛé mós bán, “Ebíde echoŋ yál mbóŋ, né-ós mbóŋ echoŋ eékoɛnedɛé.”

14 Yesue ankwɛntén aá, “Kɛnéɛ mmɛn mbídeé echem yál mbóŋ, echem mbóŋ edé mbále, áyále mbíi wéɛ mbíde, mbíi-’ɛ wéɛ nkagkɛ, boŋ nyé, nyéebíi-’ɛ wéɛ mbíde, nyéebíi-’áa wéɛ nkagkɛ.”

15 Nyékáadte bad á nyaa e moonyoŋ. Meekáádtɛé modmod.

16 Ké menkáád-tɛ ké káádtén, echem mbakú edé mbále, áyále meekáádtɛé ne mmɛn, boŋ nkáadte, ne ane awé alómé mɛ.

17 Néɛ bɛhúde ké nê áte, á mbéndé echɛn, étɛnlédé nɛn bán nzé bad bɛbɛ bɛbíde dyaɛm mbóŋ, boŋ bɛhóbɛ melemlem mé dyaɛm, né ene mbóŋ edé mbóŋ e mbále.

18 Nyébii-ós nɛn bán nwóó mbóŋ ébɛ, mmɛn ne mod awé alómé mɛ, awé adé echem Sán.”

19 Héé dós Befarisia bɛsɛdtɛé mós bán, “Héé sós adíí?” Ankwɛntén bós aá, “Nyéebíi-’ɛ mɛ, nyéebíi-’áa ké echem Sán. Nzé nyémbíi mɛ, né nyéebíi kááŋne echem Sán.”

20 Yesue anhób abɛn e’yale áde áyágtɛé á Ndáb-e-Dyób-tɛ, bɛnbɛn ne wéɛ bɛkoŋgɛé moné. Boŋ modmod enkɛnkóbpɛ mós, áyále eche pónde échɛ bɛkóbɛé mós enkɛmpáá.

21 Yesue anláá abé bad ámpɛ aá, “Mékɛ, nzé mmaá-’ɛ akɛ, nyééhɛd mɛ, boŋ nyéenyínné, né-ós nyéɛwɛ áwɛn mbéé-tɛ. Wéɛ mébɛɛ, nyéehɛnlɛ apɛ áhed.”

22 Héé bad bɛmbáá bé Israel bɛsɛdtɛé bán, “Ahóbɛ’ aá, wéɛ mókɛé aá syánɛ déehɛnlɛ apɛ áhed, múmós ahɛde yál awúu-yɛ?”

23 Anláá bós aá, “Nyédii bad ábɛ bɛbíde ásé wɛn, boŋ mɛ pɛn, mbíde amín. Nyébíde á nkòŋsé wɛn, mɛ pɛn, meebídeé á nkòŋsé wɛn.”

24 Nê dós ákásá boŋ rílanɔgɛ nyé mɛé, “Nyéɛwɛ áwɛn mbéé-tɛ. Nzé nyéedúbpe bán, ‘Ndíi Mod Awé Ndíi,’ né nyéɛwɛ-’ɛ áwɛn mbéé-tɛ.”

25 Héé bɛsɛdtɛé mós bánken, “Nzé-módé édíí?” Dós ákwɛntanné bós aá, “Nyaa e mod échɛ rílanɔgɛ nyé se á mbooted mɛé ndé chós rídíi.”

26 Nwóó mam híin ahób tɛŋgene nyé, ne ákáad nyé. Boŋ mod awé alómé mɛ adíi mod á mbále, mekan nímɛ rílanɔgɛ-’áa nyé hén á nkòŋsé médii mekan nímɛ ríwógé áwɛ.”

27 Ade Yesue ahóbɛ nê, bɛnkɛnsɔŋtɛnné bán Sáa awé adé amín mós ahóbɛé.

* 8:11 Ekud e kálag é’só éewóó’ɛ échɛn epɛd (7.53-8.11).

²⁸ Hée Yesue álângeé bó aá, “Póndé echě nyémadté Mwän-a-Moonyon abane ámín, dóo nyébbí’ é bán, ‘Ndé mod awě ríhóbé meé ndé.’ Nyébbí-’ é bán, meébbéé dyamdyam ne kunze echém, bonj dyam áde ríhóbéé ádii dyam áde echem Sán áyágté me.

²⁹ Ane awě alómé me, adé-’ é ne me, eétedté mměmpen, áyāle mbēle’ mekan nímě mébónnéde mós.”

³⁰ Bad híin ábe bėnwōg née Yesue áhóbéé nímén mekan, bėndūbē mós.

Nzée adé sáá awě bad bé Israel’

³¹ Hée Yesue álângeé bad bé Israel ábe bėndūbē mós aá, “Nzė nyédii nyéhíde’ ádém ayáge, né nyékōnté ábēm bembapee abé.

³² Né nyébbí’ mbále, né ene mbále ěhūd-te nyé á mehan-tē.”

³³ Bėnkwentén bán, “Sėdii nchyaátén níme Abrahamē. Sėébbéé-’ áa ntān a mod mbėd. Chán-nō éhele éhóbé wée sėebáá á mehan-tē?”

³⁴ Yesue ankwentén bó aá, “Ne mbále, nlanje nyé meé, kėnzée awě abele mbėb adii ntān a mbėb.

³⁵ Ntān eebákgé á túmbé-te abé ne abé, bonj mwän a túmbé, adii mwän a túmbé póndé ésyāal.

³⁶ Né-óó, nzė Mwän ahúde nyé á mehan-tē, né dyamdyam deetėdtė nyé ntān ampė.

³⁷ Mbíi meé nyėdii nchyaátén níme Abrahamē, bonj ké nē, nyéhede me awúu, áyāle nyééhėdėé ádém ayáge ahíd.

³⁸ Nlanje nyé mekan níme echem Sán álúmté me. Nyé-’ é nyėbele mekan níme echen sán alánjé nyé.”

³⁹ Bėnkwentén mós bán, “Abrahamē adii eched sánj.” Yesue anláá bó aá, “Nzė nyėnkōn bán ábe Abrahamē abé, né nyėbele’ mekan níme Abrahamē abéle’ áá.

⁴⁰ Mekan mėsýāal níme ríkėmbenlė rídii áláa nyé mbále echě ríwógé wée Dyōb. Kėnē, nyéhede me awúu. Abrahamē eėbele’ áá, enén ndín e dyam.

⁴¹ Nyėbele mekan níme echen sánj ábeleé.” Bėnkwentén mós bán, “Dyōb dėmpen-ėé séwóó née eched Sánj, bėėchyáa-’ áa sé á asón.”

⁴² Dóo Yesue álângeé bó aá, “Nzė Dyōb dėnkōn echen Sánj abé, né nyėdás me, áyāle nímídé wée Dyōb ndé-’ é hén bōob. Meėpedéé ne mměn, bonj mós alómé me.

⁴³ Nzom echě ekáá bonj nyééhėdė’ me ehób awóg, edii nyééhėdėé ábēm e’yale awóg.

⁴⁴ Nyėdii bán ábe echen sánj, Satanē, níme mewėmten mós-’ áá nyėdás ahíd. Se á mbooted, adii ane awě awúe’ bad, eėkwógnėdėé mbále mbėd, áyāle mbále eesáá mós áte. Nzė akale metóm, né abele níme nsón áyāle adii nkal a metóm, abé-’ é sáá a metóm.

⁴⁵ Nyėedúbpėé me, áyāle nkanle nyé mbále.

⁴⁶ Nyé ahée ahėle alúmed áá, mbéle mbėb? Nzė nkanle nyé mbále, cheé-’ é káá bonj nyėedúbpė me?

⁴⁷ Kėnzée awě ahúu ne Dyōb, awógé eyale é Dyōb. Nzom echě ekáá bonj nyėewóglán edii, nyéesáá bán bé Dyōb.”

Bad bé Israel bėekobéé ayáge áde Yesue

⁴⁸ Hée abé bad bé Israel bėtimtanné Yesue bánken, “Eesáá mbále bán, sėnkāl mbále áde séhóbé bán, edii mod a Samaria, edáádān é mbėb edé-’ é wé áte-ye?”

⁴⁹ Ankwentén bó aá, “Edáádān é mbėb eesáá me áte. Mbage echem Sán edúbé, bonj nyėpen nyėėbāgėé me edúbé.

50 Mmën meéhædtæ yäl edúbé, bonj mod adé awë ahæde' aá nkud edúbé, mó-'aá, abage mbakú echë etånjéné.

51 Ne mbále, nlånje nyé meé, kénzée awë abele' chõm-ée rí'yágtéé, éewáá mbéd."

52 Dóo ábë bad belånjéé mó bán, "Bóob dóo sébíí bán, edáádæj é mbéb édé wε áte. Abrahamε anwé, bekal bé'dáádæj bómpë bénwë. Bonj bóob éhõbë wεε mod awë adúbpé wε, éewáá mbéd.

53 Echéd sánj Abrahamε anwé. Ewémtné wεé mótõmë mó-yε? Bekal-bé-e'dáádæj bómpë bénwë. Nzé-módé wεwε éwémtnané wεé módé?"

54 Héε Yesuε ákwentanné bó aá, "Nzé nhædte echem yäl edúbé, né échë edúbé éesaá dyamdyam. Echem Sánj awë nyéhóbéé bán mó adé nyé sáá, mó abage mε edúbé.

55 Nyéébíí' é mó mbéd, bonj mbíí mó. Nzé nhóbé meé meebíí' é mó, né ndé nkal a metóm née nyé. Bonj mbíí mó, mbele-'ε mam níme áhóbéé.

56 Echen sánj Abrahamε ambé menyinje aá, móðnyín epun échë mépéé, annyín-ne chõ, abé-'ε menyinje bwámbwam."

57 Dóo bésædtéé mó bán, "Áde wéépédēē móom mé mwé métáan, wεé mónyínë Abrahamε-yε?"

58 Yesuε ankwentén bó aá, "Ne mbále, nlånje nyé nén meé, byánán béchyāā Abrahamε, 'Ndé.' "

59 Ade ábë bad bēwógé nē, dóo bébóótédé meláá ahæd, álúm mó. Bonj Yesuε ansóom, abíd-te á Ndáb-e-Dyõb.

9

Yesuε achõjté mod awë béchyááné ndím

1 Ade Yesuε átóméé, dóo ányiné mod awë béchyááné ndím.

2 Dóo ábë bembapεε bésædtéé mó bán, "A-meléed, mbéb níme nzéé ríkás bonj béchyáá anén mod ne ndím? Mbéb níme mwën-ε, káa níme sáá bó nyan?"

3 Yesuε ankwentén bó aá, "Saké níme mbéb ríkás, saá-kaá níme sáá bó nyan. Bonj nén ábénlédé ábel ngíne e Dyõb ébíí áwed awë yäl.

4 Ngáne bín é'dlí ényínnéé ámín, detånjéné débél nsón níme ane awë álómé me. Ehíntén ékwógé apε áde mod éehenlé nsón abel.

5 Bóob áde nídíí á nkõjsé, mε-εé ndé e'nyínen bé ekíde bé nkõjsé."

6 Ade Yesuε ámáá ahób nē, ansob aléed á ndóob, atób dó bonj áwõgté ane mod a ndím á míd,

7 álånjē mó aá, "Kág, éwobe e'só á etonj é Silom" (ádë dín ádé nén bán, "Bélómé"). Né-óó, ane mod ankë, áwõbë-'ε míd. Antím ámbíd, ányínne'.

8 Héε bad ábe bémbíí mó ne bad ábe bényínáá ngáne áchõméé bwëm, bésædtéé bán, "Saá anén mod ayõgkë adyεε asë, áchõméé bwëm-ε?"

9 Donje dénhõb bán, "Módé," ábiníí-'ε bán, "Aáy! Awágne mó wágnén." Bonj ane mod mwën anhób aá, "Mmën-εé ndé."

10 Dóo bésædtéé mó bán, "Chán-nõ émwéde abootéd dé anyínen?"

11 Ankwentén bó aá, "Mod awë béchagéé bán, Yesuε, antób elóob, awógéd mε chõ á míd, aláá-'ε mε aá níke á etonj é Silom, níke níwobe míd. Né-óó, menkë. Awobe áde níwóbpé míd, níbootéd-te anyínen."

12 Bēnsædéd mó bán, "Héé ane mod adíí?" Ankwentén bó aá, "Meebíí' é."

Befarisia béhédé áte ngáne Yesuε áchõjté mod a ndím

13 Bēnkéén ane mod awë ankwë ndím wεε Befarisia.

14 Epun éche Yesue ántõbpē elõob ánēdē-’ε ane mod mīd áte, ébédēε Mbwe-mé-nkõme-áte.

15 Befarisia bēnsedéd ane mod awē ankwē ndīm ámpē bánken, “Chán émwédé abootéd dé anyīnen.” Hée álāngēé bõ aá, “Antõb elõob awõgéd me á mīd. Ade rīwõbpē e’sõ, rībootéd-te anyīnen.”

16 Hē dõo donge á Befarisia bēhõbēé nēn bán, “Anēn mod awē abelē ádēn dyam, eéhelēε-se abē mod awē Dyõb álómé, áyāle eékonjēé mbéndé e Mbwe-mé-nkõme-áte.” Boj ábīnī-’ε bēhõbē’áá bánken, “Chán mod a mbéb áheleε ábelé’ échēn ndīm e menyáké?” Nēn dēmpēēn nkabēn átīnté echáb.

17 Né-õ, Befarisia bēnsedéd ane mod ámpē bánken, “Ngáne éhõbē wēé mõbelé boj ényīnne’, cheé éwóó ahõb á yāl eché?” Hée ane mod ákwēntanné bõ aá, “Adīi nkál é’dáõdõj.”

18 Ké nē, bad bé Israel bēnkēndúbēé bán, ane mod ansébé ndīm akwε. Nē dēmbēl bēnchēlē sáá bõ nyaj.

19 Bēnsedéd bõ bánken, “Nyēε nyēchyaá anēn mod awē nyéhõbē bán, béchyaá ne ndīm-ε? Chán-nõ ébēnlédé boj anyīnne bõob?”

20 Dõo sáá bõ nyaj bēkwēntanné bán, “Sēbīi bán awed mwān mõdé, sēbīi-’ε bán bēnchyaá mõ ne ndīm.

21 Boj séekoo’é abīi ngáne ámwédé anyīnen, séebīi-’áa mod awē abelē boj anyīnne’. Nyésedte mõ, eésáá mwēndem, mwēn áhõb.”

22 Bēnhõb nē áyāle bēbáá’áá bad bé Israel. Bad bé Israel bēnhõb bán, kénzēé awē adúbpe aá Yesue mõdé Ane-awē-Béwõgté, bēnan mõ á ndáb e mekáne.

23 Nē dõo dēnkõj boj sáá bõ nyaj bēhõb bán, “Nyésedte mõ, eésáá mwēndem, mwēn áhõb.”

24 Hée ábē bad bé Israel bēchēnlēé ane mod awē Yesue ándīdté bwām ngen éché élõnténé ébε, boj bēlāngē mõ bán, “Kāl echoj mbāle á dīn á Dyõb. Sēbīi bán anēn mod awē achõjté wε adīi mod a mbéb.”

25 Dõo ane mod átīmtanné bõ aá, “Meebīi’ε me ké adé mod a mbéb ké’ε eésáá. Dyam ahõg áde rībīi, adé nēn, menkwē ndīm boj bõob nnyīnne’.”

26 Hée bésedteé mõ bánken, “Cheé ámbenlé boj ébootéd anyīnen?”

27 Ankwentén bõ aá, “Mmaá nyé aláa boj kēnē, nyéedúbpeé me. Cheé nyéhēdēé bán ríláa nyé ámpē? Nyémpē nyéhēde’ ábē bembapēε abé-yε?”

28 Hée bésyáõ’é mõ, bēhõbē bán, “Wε-εé edé mbapēε awē ane mod. Sēdīi bembapēε ábe Mosεε.

29 Sēbīi bán, Dyõb dénhõb wēε Mosεε, boj séebīi’ε wēε anēn mod pen ábīdε.”

30 Ane mod ankwentén aá, “Nēn adé nkõmtēn rī yāl áte. Nyéebīi’ε wēε ábīdε, boj kēnē abelē nnyīnne’.

31 Debīi bán, Dyõb déekwentánné mekáne mé bad bé mbéb, boj akwentan mekáne mīme bad ábe bēbage mõ edúbé, bēbēlé-’ε mam mīme áhēdēé.

32 Taasε nkõj sε rībootad mod eéwõgēε mbéd, bán mod abelē mod awē béchyaáané ndīm anyīnne’.

33 Nzé anēn mod awē achõjté me enkēmbé mod a Dyõb, né eéhele’áá-se ábel enēn ndīm e dyam.”

34 Dõo ábē bad bēkwēntanné mõ bán, “Béchyaá wε á mbéb-te, ékwõg-ke á mbéb-te, boj bõob éhēdε sé ayõged-ε?” Hée dõo bēbīdté mõ á ndáb e mekáne.

Ndīm e edáõdõj

35 Ade Yesue áwõgē bán bēbīdté ane mod awē ánchõódté á ndáb e mekáne, anhēd mõ. Ade anyīné mõ, ansedéd mõ aaken, “Edúbpeé Mwān-a-Moonyõj-ε?”

36 Ane mod antīmtén mõ aá, “A-Sáj nzéé adé Mwān-a-Moonyõj, láá mé ábel nēn rīdúbe mõ?”

³⁷ Yesue anláá mó aá, “Emaa mó anyín, nyúm̄-’aá nyékale’ nén.”

³⁸ Héε ane mod áhóbéé aá, “A-sáj, ndúbpé!” Abwóg-ke mebóbón̄ ábe mó edúbé.

³⁹ Yesue anhób aá, “Mpedé á nkõjsé wén, ákáad bad ábel nén bad ábe békwédé ndim bényín̄en, ábe bó-’ε bényín̄ne’, békwe ndim.”

⁴⁰ Ade donje á Befarisia ábe bóbbe Yesue bémbē áhed béwógé nē, bēns̄edéd mó bánken, “Sédúbpé bán, weehóbéé wεé sémpē sékwédé ndim?”

⁴¹ Yesue anláá bó aá, “Nzé nyēnkwe ndim, né mbéb méesaá nyé á yāl. Bon̄ bób̄ áde nyéhóbéé bán nyényín̄ne’, mbéb rídí rídé nyé á yāl.”

10

Ngan e Nnon a r̄dȳon̄ ní mbód ne éche mbód

¹ Yesue anhób aá, “Ne mbále, nl̄ange nyé mεé, kénz̄éé awē eépoó á mmwe mé abem á mbód, bon̄ átim achágé p̄ed empée, adii nch̄ib, abé-’ε mod e ewúen.

² Mod awē apoo’ á mmwe mé abem módé Nnon a r̄dȳon̄ ní mbód.

³ Mod awē an̄one abem adibnad mó ekob. Achage mbód téé ne d̄in, ábidnē-’ε ch̄ó.

⁴ Ábidnē-’aá ch̄ó, atómén ch̄ó, ch̄ó-’ε éh̄idē mó, áyāle ébíí éche ehób.

⁵ Bon̄ éché mbód éeh̄id̄éé nken mbéd. Ebelé’ ébāā’ mó á yāl báan, áyāle écheméé éche ehób.”

⁶ Yesue ankalé bó enén ngan bon̄ bék̄ns̄on̄jt̄enné.

Yesue aá móó módé

Nnon a r̄dȳon̄ ní mbód a bwám

⁷ Né-óó, Yesue ambád ámpē aá, “Ne mbále, nl̄ange nyé nén mε-εé, méε ndé mmwe mé ekob wεε mbód époo’é.

⁸ Byánán m̄p̄é, bad bésyāal ábe bésébp̄e ap̄e bébédéε bech̄ib ne bad bé ewúen, bon̄ mbód éek̄n̄wóḡenné bō.

⁹ Mε-εé ndé ekob. Kénz̄éé awē apoo’ áwēm, ák̄ud e’soos̄on̄. As̄l, ábid-te ésebán mod atagte mó. Ákud-te kéchéé éche áh̄edéé.

¹⁰ Nch̄ib apag dás̄ó ách̄ib, áwúu ne ábébed. Mpedé ábel bon̄ békud alongé áde áloné mbon.

¹¹ Mε-εé ndé nnon-a-mbód a bwám. Nnon-a-mbód a bwám adé mbon̄s̄én áwé á nló níme éche mbód.

¹² Mod awē bétédé á ns̄on̄ tédén, ánon mbód, áde mw̄en éesaá nnon-a-mbód, áde éesaá-’aá nwóó-mbód, ányín̄é nyín̄én̄ n̄éε nḡa ehúé’é, ách̄en̄ mbód, átom mehélé. Ene pón̄dé d̄o nḡa ésogeé mbód, éch̄in̄í-’ε ep̄anj̄t̄éd áte.

¹³ Ane mod atóme mehélé áyāle adii mod awē bétédé á ns̄on̄ tédén, eew̄on̄n̄éé éché mbód pón̄dé.

¹⁴ Méε ndé nnon-a-mbód a bwám. Mbíí échem mbód, échem mbód-te ébíí mε.

¹⁵ Melemlem n̄é d̄o Titée ábíí mε, mε-’ε mbíí mó. Mb̄on̄s̄én̄é-’ε áwé á nló níme échem mbód.

¹⁶ Nwóó-’ε mbód émp̄ee éche ées̄é á abem-té wén, nt̄ánḡéné ch̄ómp̄e ap̄een, ch̄ómp̄e éw̄oḡ échem ehób, né-óó, abem déb̄ē ahóg, nnon-a-mbód-te nhóg.

¹⁷ Titée ad̄á mε, áyāle mb̄on̄s̄én̄é áwé ábel r̄ikud ád̄em alongé ámbid ámp̄e.

¹⁸ Modmod eékobn̄éé mε ád̄em alongé, bon̄ mbage d̄o ne mm̄en. Nwóó nḡine ábe ád̄em alongé, nwóó-’ε nḡine átéd d̄ó ámp̄e. Nén d̄o Titée álán̄gé mε aá mb̄el.”

¹⁹ Abén e’yale ábe Yesue b̄emp̄ēn̄ nkabén áf̄int̄é e bad bé Israel ámp̄e.

²⁰ Bó bad hiin behóbé'áá nén bán, "Edaððan é mbéb édé mó áte, apedé min. Chán nyéhéle nyéwöglán mó?"

²¹ Bonj bémpée behóbé'áá bán, "Mod awë edaððan é mbéb édii áte eehóbéé échén ndín e mekan. Edaððan é mbéb éhéle ébël mod awë akwedé ndím anyínen-ε?"

Bad bé Israel bébáá Yesue á yäl

²² Ngande e Nnamed rí Ndáb-e-Dyöb ékóbté'áá á Jerusalem. Nén ábédé á pondé éche ahéb ábákgē bwámbwam.

²³ Yesue ahyómmé'áá á abepé á Ndáb-e-Dyöb áde béchágé'áá bán Abepé áde Solomoné.

²⁴ Bad bé Israel bēnlənnéd mó, bése dté mó bán, "Póndé ehéé wεwε wésökgé sé abane á edibelónéé-te? Nzé wε-εé édé Ane-awë-Béwógté, épanléd sé áte."

²⁵ Yesue ankwentén áá, "Mmaá nyé aláá, bonj nyéedúbpéé. Nsón níme níbeleé á dín áde awēm Titée, mēn níbide me mbóñ.

²⁶ Bonj nyéedúbpéé áyāle nyéesáá échēm mbód.

²⁷ Echem mbód éwóge échēm ehób. Mbíi chód, chód-áá éhíde me. ²⁸ Mbage bó alongé áde déemaá, béewáá-áá mbéd. Modmod eéhēlēε-se ásoğ bó áwēm mekáá.

²⁹ Chóm eché awēm Titée ábágé me étómé chóm ésyāäl, * modmod eéhēlēε-se ásoğ bó á mekáá níme Titée.

³⁰ Sé Tité sédii mod nhóg."

³¹ Bad bé Israel béntēd meláá ámpē álúm Yesue.

³² Bonj anláá bó áá, "Nlúmté nyé ekud é nsón ní bwām éche ébidé ne echem Sán. Nyéhede me meláá álúm, áwúu me. Mmē nsón níhéé nyéhedeé me meláá álúmen."

³³ Dóó békwentanné bán, "Séehēdēε wε meláá álúm áyāle nsón ní bwām níme ébéle. Bonj sélúme wε meláá áyāle ésyáó Dyöb."

³⁴ Yesue anláá bó áá, "Ngómé éténlédé áwen Kálag e Mbéndé nén bán, Dyöb áhóbé áá, 'Nyédii myöb.'

³⁵ Debíi nén bán, eyale é Dyöb éekwagké. Dyöb dēnchäg bad ábe ánlómēnné échē eyale áá bédii myöb.

³⁶ Me-εé Dyöb ánámte bonj álóm-me á nkōñsé, chán-nō nyéhéle nyéhōbe bán, nsyáó Dyöb áyāle ní túmé ahób meé ndii Mwán a Dyöb?

³⁷ Nzé meébēle nsón níme Titée, nyéedúbpé me.

³⁸ Bonj nzé édé nén bán mbele mó, nyédúbé níme nsón ké nyéedúbpe mmēn, ábel nén nyébii nyésōñten-ne ngen póg ne ésyāäl nén bán, Titée adé me áte, me-ε mbé mó áte ngen póg ne ngen ésyāäl."

³⁹ Mmēn mam níme ánhōbpē mēmbēl bēnwanén mó akób ámpē, bonj ámbid bó á mekáá.

⁴⁰ Ámbid enē, Yesue antím ámbid á pēd e edib é Jodan enínií, á abwóg á hōm wēε Jone, Nduseñe ádúsánnáá bad, ádyēε áhed.

⁴¹ Ndun e mod epagé'áá áwē. Abé bad behóbé'áá bán, "Jone, Nduseñe eébéle'áá menyáké bonj kéchéé éche áhóbé tñngene anén mod édé mbále."

⁴² Né-óó, ndun e mod eché embé áhed, endúbé Yesue.

11

Kwééd eche Lazarose

¹ Mod nhóg ambé awë béchágé'áá bán Lazarose, akōnlé'áá. Lazarose ne baányan bé bebaád, Maria ne Mataa bédyéé'áá á dyad á Betani.

* **10:29** Chóm eché awēm Titée ábdgé me étómé chóm ésyāäl: donge á kálag dé'só áwóó Titée awé abage me bó, átomé chóm ésyāäl.

² Anén Maria awè mwānyan Lazarose akónléd'áá, mō anwógéd Yesue dyöğ dé elod é bwám á mekuu, boŋ apínnéd échē esid.

³ Né-óó, Maria bō Mataa bō bénlóm nsəl wée Yesue bán, “A-Sán, awonj nsón a nlem akonle’.”

⁴ Ade Yesue áwógé nímén nlébtéd anhób aá, “Mmén nkole méesógké ne kwééd. Nén ábénlédé ábe Dyöb ehúmé, ábel boŋ Mwán a Dyöb ákud edúbé.”

⁵ Yesue andəŋ Mataa, Maria ne Lazarose.

⁶ Ké nê, áde áwógé bán, Lazarose akonle andii ambé wée ámbēē e'pun é'be.

⁷ Héé álángeé ábē bembapēē aá, “Détim ámbíd á Judeya.”

⁸ Dóo ábe bembapēē bélángeé mō bán “A-melééd, kíné saá áwed dōo bad béhéde'áá wé meláá awúen súútəŋ'ε?”

⁹ Yesue ankwentén bō aá, “Eesaá mbále bán müte ríwóó dyóm á háwa ne ébe-ye? Bad ábe békag müte béekwagké áyāle bédé ne ane awé adé e'nyínen bé ekide bé nkōŋsé.

¹⁰ Boŋ nzé békag nkuu, dōo békwagké áyāle e'nyínen bé ekide béesaá.”

¹¹ Ade Yesue ámáá ahób nén ambád ámpē aá, “Awéd nsón Lazarose akúne, boŋ nkag mō anyem ásé.”

¹² Abē bembapēē bénlāá mō bán, “A-Sán, nzé akúne né ádyéé bwám.”

¹³ Yesue ahóbé'áá nén áyāle ambíí aá, Lazarose awédé, boŋ ábē bembapēē bēnwēmtēn bán, ahóbe aá, akúne kúnén.

¹⁴ Né-óó, Yesue ampanléd bō áte aá, “Lazarose awédé,

¹⁵ boŋ á yəl echēn, ndé menyíŋge nén meé meebédeé áhed ábel boŋ nyédúbe. Syānē dékag-kóó áwed bōob.”

¹⁶ Hē dōo Tōmase (awé bēnchuí'é bán, Nhéd) álángeé baáb bembapēē aá, “Syānē ámpē dékag áwed ábel boŋ nzé kwééd chō edé déwē ne Meléede.”

Yesue mō adé mpuu ne alonjé

¹⁷ Bōob-póó, áde Yesue ápédé á Betani, antán néē bémáá Lazarose alíme. Ene pónde né nímé ndim ríkēbē á soŋ-té e'pun é'niin.

¹⁸ Bootya á Betani ápe á Jerusalem ábédé dyam máyl mébe.

¹⁹ Ekud é bad bé Israel ényhē wée Mataa bō Maria áwenned bō áyāle kwééd eche awab mwānyan.

²⁰ Ade Mataa áwógé bán, Yesue ahúé', ankě mō abomen á nzii, boŋ Maria anlyöğ á ndáb.

²¹ Dōo Mataa álángeé Yesue aá, “A-Sán, nzé wembé hén né mwānned eewédeé.

²² Boŋ ké nê, mbíí meé ké bōob kéchéé éche ésédté Dyöb, Dyöb débē wé.”

²³ Yesue anláá mō aá, “Mwānyon ábē á alonjé ámpē.”

²⁴ Mataa antimtén mō aá, “Mbíí meé ápuú á pónde e mpuu mbwe mé asóg.”

²⁵ Dōo Yesue alánjé mō aá, “Me-éé ndé mpuu né alonjé. Nzé mod adúbpé me, ké anwé, ábē abé á alonjé.

²⁶ Kénzéé awé adé á alonjé boŋ adúbé-ε me, éewáá mbéd. Edúbpé né-ye?”

²⁷ Héé Mataa ákwentanné aá, “Ée, A-Sán, ndúbpé meé wé-éé edé Ane-awé-Béwógté, Mwán a Dyöb awé Dyöb ahóbé aá, ápē á nkōŋsé.”

Yesue achii

²⁸ Ade Mataa ahóbé nê, antim ámbíd, áké áchəg mwānyan Maria kun, aláá mō aá, “Meléede adé hén, asedte-ε wé.”

²⁹ Ade Maria áwógé nê, anhidé ásé mehélé, áke atán Yesue.

³⁰ Bōob-póó, Yesue enkēmpaá asól á dyad-té, andii ambé wée Mataa ántānnē mō.

³¹ Ade bad bé Israel ábe bébedé á ndáb-te ne Maria áwenned mó, bényíné néé ábídé á ndáb-te ne mehélé, anyægte á son, bēnwēmtēn bān, akag achii. Né-ɔ́, bēnhīd mó.

³² Ade Maria ápedé wée Yesue ámbēē bon anyín mó, ankwē mó á mekuu, ahōb aá, “A-Sāj, nzé wembé hén, né mwānned eewédéé.”

³³ Anyín áde Yesue ányíné néé Maria áchyeé’é, anyín-ne néé bad ábe bēnhīd mó béchyeé’é, ngol enkonned mó, átāg-ke áte á nlém-tē bwāmbwam.

³⁴ Ansedéd aaken, “Héé nyélimmé mó?” Bēnkwēntēn bān, “A-Sāj, hyē ényín.”

³⁵ Yesue anchii.

³⁶ Héé bad bé Israel bēhōbēé bān, “Nédē ankōŋ mó adəŋ-óó!”

³⁷ Bon bó donge á bad bēnhōb bān, “Ngómē ambēl mod awē ankwē ndím anyínne. Eéhele’ aá-se ábel Lazarose eewág-ε?”

Yesue apuúdté Lazarose

³⁸ Ngol enkonned Yesue á nlém ámpē. Né-ɔ́, anké á son. Ene son ebédéé son eché bēpwógé aláá áte, bon békútēn chō nsəl ne aláá.

³⁹ Héé Yesue álānggēé ábē bad aá, “Nyéhūd adē aláá.” Dóo Mataa, mod awē awédé mwānyan ahōbēé aá, “A-Sāj, ndim mémād abooted dé achum bəəb áyāle nkídembé á son-tē bəəb e’pun é’niin.”

⁴⁰ Dóo Yesue álānggēé mó aá “Meelānggēé wε meé nzé edúbpé né wēnyín Ngum e Dyōb-ε?”

⁴¹ Né-ɔ́, ábē bad bēnhūd adē aláá á nsəl ní son. Dóo Yesue ánóné ámīn bon ahōbē aá, “A-Tē, nságnéné wε áyāle éwógé me mekáne.

⁴² Mbíi meé eyōgké me mekáne awóg, bon nhōbe nēn ábel bon ábēn bad ábe bédé hén bédúbe bān, wε-εé elómé me.”

⁴³ Ade amáá ahōb nē dóo áchágté ehōb ámīn bon áchēnlē Lazarose aá, “A-Lazaros, bíd áwed!”

⁴⁴ Ane mod awē ammād awé abíd-te áwed. Mbóm éche bēnkaánné mó mekuu ne mekáá ne tumbé eché bēnkaánné mó e’so, émbē ébē mó á yāl. Yesue anláá bó aá, “Nyéhune mó ábē bwēm á yāl, ákag.”

Béhagke Yesue

(Mat 26.1-5; Mak 14.1-2; Luk 22.1-2)

⁴⁵ Bad bé Israel ábe bēnkē Maria á mewenned bényín mekan míme Yesue ámbenlé, bēndübē-’ε Yesue.

⁴⁶ Bon bó donge á bad bēnkē Befarisia atán, béléáá bó mam míme Yesue ábélé.

⁴⁷ Héé beprise bēmbáá ne Befarisia béchēnlé mbom ní káánsel. Bēnhōb bān, “Cheé débēnlé bəəb? Detānggéné dyam ábel áyāle anén mod ábele menyáké bwāmbwam!

⁴⁸ Nzé detēdté bān, ákeene nímén mekan á’sō né moosyāál ádübē mó. Nzé moosyāál adúbpe-’ε mó, né bad bé Roma bēpē, békōbēn-ne syānē eché Ndáb-e-Dyōb, békōbēn-ne syānē ádēd alon.”

⁴⁹ Dóo mod nhóg átínté echáb awē béchágé’áá bān Kaifase, awē abédé prise ambáambáa míme mwē, ahōbēé aá, “Nyéebíi’ε dyamdyam.

⁵⁰ Nyéenyínéé nēn bān ébóó bān, mod nhóg áwē á nló ní moosyāál tómaa alon ásyāál ábóó?”

⁵¹ Kénéé ahōbē’áá nē, saké nímē mewēmtēn mēn móo ahōbné’áá nē. Ngáne abédé prise ambáambáa míme mwē, ahōbē’áá dyam áde débēnléd, á sō e’póndé, aá Yesue áwē á nló ní bad bé Israel.

⁵² Saá-kaá á nló ní bad bé Israel bēnpēn, bon kōŋne álad bad bé Dyōb bésyāál ábe bémáá ahenté áte hōm ahóg, ábel bēbē mod nhóg.

⁵³ Bootya éché epun bad bémbáá bé Israel bêmbootéd Yesue aháge, áwúu mó.

⁵⁴ Nén dëmbël Yesue eebide'aa á nhéné ámpē átínté e bad bé Israel. Bóobe ábē bembapē bēnhidē békē á dyad áde béchagēé bán Efrem, bēdyēē-ε áwed. Adé dyad ábédé benben ne ehýange.

⁵⁵ Póndé e ngande e Nnyíme-ámín embé benben. Né-óó, bad hiin bémbld myad ne myad, békē á akuu á Jerusalem áwobe échab yál ngáne mbéndé e Mosē ēhédé'áá, ábonşen ngande e Nnyíme-ámín.

⁵⁶ Abē bad bé Israel bēmbē bēhédé Yesue. Ade bēládne á Ndáb-e-Dyób bésédte'áá, nhóg ne aniní bánken, "Chán nyéwémtné, nyédübpé bán, áhye ngande-ye?"

⁵⁷ Beprişe bēmbáá ne Befarisia bēntómēd ehángé bán, kénzéé awē anyiné Yesue áhye áláa bó, ábel bonj békób mó.

12

Béwógte Yesue á Betani (Mat 26.6-13; Mak 14.3-9)

¹ Ade ngande e Nnyíme-ámín élyágé e'pun ntóób, Yesue ankē á Betani wée Lazarose awē ámpuúdté ádyéé'áá.

² Bēmbelē Yesue ndyééd áhed. Mataa mó antómēd ene ndyééd. Lazarose ambē nhóg átínté e bad ábe bóobe Yesue bēbédé á tébele ádyé ndyééd.

³ Héé Maria átédé epom é dyöğ dé elod á bwám áde álélé nkun bwámbwam. Adé dyöğ bēbénlé dó nád.* Anwógéd Yesue á mekuu, apiné-ε mó mekuu ne échē esid é nló. Elod é bwám énlög ndáb áte esyáál.

⁴ Dóo Judas Iskariode, mbapēē nhóg awē émbēē bán mó ášóm Yesue áhóbēé áá.

⁵ "Cheé bēnkēnsómme áden dyöğ, bétéd nímén mōné békē bēbē betóótökē bé bad? Béhélé'áá-se bésóm áde dyöğ dyam-ée áde nsábe ní mwē nhóg."

⁶ Judase anhób nē, saké áyale abédé betóótökē bé bad ngol, bonj áyale abédēē nchib. Ngáne abédé mod awē awánládtaá bóbōo ekwe é mōné, ayöğké'áá mōné atéd ámbld.

⁷ Bonj Yesue anhób áá, "Tédé mó, ákoo áde ályágé áse ábel bonj ábenled dó mbwe nime bēlímēē me.

⁸ Betóótökē bé bad bédé ne nyé póndé téé bonj me pen méebáá ne nyé póndé esyáál."

Béhagke Lazarose

⁹ Ene póndé-óó, bad bé Israel hiin bēnwög bán, Yesue adé á Betani. Né-óó, bēnkē áwed. Saké Yesue mwēmpen mó ankñ bonj békē áwed, bonj bēnkē Lazarose anyín awē Yesue ámpuúdté.

¹⁰ Né-óó, Beprişe bēmbáá bēhágké'áá káñne Lazarose áwúu mó,

¹¹ áyale bad bé Israel bétédte'áá bó, bédübpē Yesue. Béndübē Yesue áyale dyam áde dēmbenléd ne Lazarose.

Yesue asólé á Jerusalem nēe kñ (Mat 21.1-11; Mak 11.1-11; Luk 19.28-40)

¹² Nēe bñn é'sángé, ndun e mod echē enhyē á Ngande e Nnyíme-ámín bēnwög bán Yesue apag á Jerusalem.

¹³ Hé dōo bésélé e'kikag é' mii bonj békäg mó abomen á nzii. Béhágé'áá e'saad bán, "Hosána! Nnam mbē ne ane awē apedé á dñn áde Sánşwéé. Nnam mbē ne kñn e bad bé Israel!"

* **12:3 Nád:** Nád edii mbonja echē ewóó elod é bwám eche bēbenléé móg mé elod é bwám.

14 Yesue anküd etum é ésel, ádíí-'ε chó. Nén démbenléd ngáne éténlédé á kálag e Dyöb nén bán,

15 "A-bad bé Zayon, nyéebáá',
nyénone' echén kân ehúé',
ediídé-'ε etum é ésel."

16 A póndé echè nímén mekan mébénlédé, bembapεε ábe Yesue bénkensónténné. Bon áde Yesue ámpuú'ε ne ehúmé é Dyöb, dáo bënchemmé bán mam níme mébénlédé tângene Yesue móo mēntenléd, á yäl eché.

17 Ndun e mod echè embé ne Yesue áde áchénlé Lazarose á son-tê bon ápuudté mó, embé ékalé' nímé nkalan.

18 Né-óo ndun e mod enké Yesue abomen áyāle ábén e'chemléd bé menyáké ábe ámbenlé.

19 Héε Befarisia bélāngéé nhóg ne aníní bán, "Nyénone! Káñne bōōb deéhéléé dyamdyam abel. Nkōñsé ísyāāl níhide mó."

Bad bé Grikia béhede Yesue

20 Donje á bad bé Grikia bémbē áttinté e bad ábe bēnké ngande e Nnyíme-ámín á Jerusalem, áke dé abe Dyöb edúbé.

21 Bēmpé wée Filibe. Filibe awé ambíd á dyad á Betsaida á mbwóg e Galilia. Bēnlāá mó bán, "A-Sánj, sēdáo Yesue anyín."

22 Filibe anké Andreyá aláa. Dáo bó bad bébe békíí Yesue aláa.

23 Yesue ankwentén bó aá, "Póndé epedé eché ehúmé e Mwān-a-Moonyon ennyínēdtē.

24 Ne mbále, nlānge nyé nén meé, mbum e ngun póg edíí mbum e ngun póg, káñj né béwéné chó á ndōōb-tê bon ewé. Ewág-káa, bon echyáá mbum é ngun émpēe éche ébuú áte.

25 Mod awé adáo adē alongé, ábōd dó. Mod awé mó-'ε akáo adē alongé, á nkōñsé-te wén, ákáo dó á alongé áde déemaá'.

26 Kénzée awé abenle me, atāngéné awēm mbaledé abé. Ké héé-'ε wée rídíí, awēm mbaledé atāngéné abé áhed. Echem Sánj ábē-'ε kénzée awé abenle me edúbé.

Yesue ahóbé tângene eche kwééd

27 "Bōōb-pōo, nlém nítage me áte. Cheé-ō méhōbpé? Nhōb meé, 'A-Tê, weémwág-se metake níme méhúé' métán me-ye?" Aáy, méehōbpé nē, áyāle enén póndé e metake chō ekáo bon nípag wén.

28 A-Tê, lúméd echōñ ngum." Héε ehōb ébídeé á Dyöb nén bán, "Nlúmté echēm ngum, mēlúméd-te chō ámpē."

29 Ene ndun e mod eché embé áhed enwóg éché ehōb. Bēnhōb bán dyöb dáo ákúme áte. Bad bēmpēe bēnhōb bán, ángel chō ehóbé áwe.

30 Yesue anláá bó aá, "Áyāle echēn dáo échén ehōb ébídeé, saké áyāl echēm.

31 Póndé epedé eché Dyöb dékāadtē nímén nkōñsé. Nkamlēn níme nkamlēne á nkōñsé mékwé bōōb.

32 Bon áde bēmadté me anyen ámín, mēdōl bad bésyāāl áwēm."

33 (Yesue anhób nē álúmed ndín e kwééd eché áwēε.)

34 Ndun e mod eché embé áhed enkwentén mó bán, "Sēwógé á mbéndé-te bán Ane-awé-Béwógté ábē á ngíndé ne á ngíndé. Chán-nō ehóbéé wée 'Bétāngéné bényēn Mwān-a-Moonyon ámín.' Nzéé adé anén 'Mwān-a-Moonyon?'"

35 Dáo Yesue álāngéé bó aá, "E'nyínen bé ekíde bēbē ne nyé á esój e póndé ngēn. Nyékag bōōb áde e'nyínen bé ekíde é'díí é'díí, ábel bon ehíntén éékōbē nyé. Mod awé akag á ehíntén-tē eebyéé'ε wée ákagké.

³⁶ Nyédúbe e'nyinen bé ekide bɔɔb áde é'díí ne nyé, ábel nén nyébê bán bé e'nyinen bé ekide."

Bad bé Israel béedti béedúbpeé Yesue

Ade Yesue áamáá nímén mekan mésyāāl ahób, antedé bó, áke ásōm wée béenyinné mó.

³⁷ Kénéé ene ndun e mod énnýinnē ábén e'chemléd bé menyáké é'syāāl ábe Yesue ámbenlé, békéndúbéé mó.

³⁸ Nén démbenléd álóned e'yale ábe nkal é'dáádəŋ Yesayaa ánhōbpē aá, "A-Sán, nzéé adúbpé eyale éche sékálé, nzé-módé akidényin ngum echōŋ áchēm-me chós?"

³⁹ Né-ɔɔ, béehelé'aá-se bédúbe. Yesayaa ahóbé hōm démpēe aá,

⁴⁰ "Dyōb ákwidé bó ndím, ábē-ε bó nlém mé aláá, ábel nén nímab míd méenyinné', béēsōŋtanne.

Nzé bébélé-ε nê, né bétimén me, né mēchoód-te bó."

⁴¹ Yesayaa anhób nén áyāle annyin ehúmé éche Yesue, anhób-pe áyāl eché.

⁴² Ké nê, bad híin béndúbē Yesue, káəŋne donge á bad bémáá. Boŋ ngáne bábáá'á Befarisia, békēnlúmédte yāl, ában nén bán béébídté bó á ndáb é mekáne.

⁴³ Bébélé'áá nê áyāle bēndəŋ mekenag mé baányonŋ tómaa mé Dyōb.

E'yale ábe Yesue békāād bad

⁴⁴ Héé Yesue áchágté ehób ámín áhōbē aá, "Kénzée awē adúbpé me, eedúbpéé mmēmpen, adúbpé káəŋne ane awē alómé me.

⁴⁵ Kénzée-ε awē anyiné me, anyiné ane awē alómé me.

⁴⁶ Mpedé á nkōŋsé nēé e'nyinen bé ekide, ábel boŋ kénzée awē adúbpé me, eélyāgē á ehintén-té.

⁴⁷ Kénzée awē awógé ábēm e'yale, boŋ eékoŋge bó, saké me nkáadte mó. Meekáádtéé mó áyāle meépédeé ákaad nkōŋsé boŋ mpedé ásonŋ bad bé nkōŋsé.

⁴⁸ Kénzée awē abáá me á yāl boŋ eékobe-ε ábēm e'yale, awóó mod awē ákāād mó. Abēm e'yale bēn bóɔ békāād mó á mbwe mé asóg.

⁴⁹ Ebē nê, áyāle mee hóbéé nímén mésyāāl ne echēm kunze. Boŋ Titée awē alómé me, álāŋgé me chōm éche nítāŋgéné ahób.

⁵⁰ Mbíí meé kéchéé éché álāŋgé me aá ríhōb épene alongé áde déemaá'. Né-ɔɔ, kéchéé éche ríhōbēé, nhōbe' chō ngáne Titée álāŋgé me."

13

Yesue awōbpé abē bembapee mekuu

¹ Epun é ngande e Nnyíme-ámín énylāg nēé chān. Yesue ambíí aá eche pónde emaa ape eché mó'tāŋgéné nkōŋsé atede, áke wée eche Sán. Andəŋ bad bé nkōŋsé ábe béndúbē mó, alúméd-te éché edəŋge káəŋne á asóg.

² Yesue ne ábē bembapee bédýágé'áá ndyééd ngukél, Satanε-ε ammad Judas Iskariode mwān awē Simōne mewēmten mé mbéb ásóled áte ásóm Yesue.

³ Yesue ambíí aá eche Sán abagé mekan mésyāāl áwe mekáá. Ambíí-ε aá móhūū wée Dyōb mótime-ε ámbíí wée Dyōb.

⁴ Ade bédýákgē ndyééd nê, Yesue anhidé ásē, ahúd nkob á yāl, atád tábele á nkgog.

⁵ Héé áhédé mendib á kúmbe-té, boŋ ábootéd ábē bembapee mekuu awobe, ápinnad tábele awē ánwāā'é á nkgog.

6 Ade ápédé wée Simōn Petro dóo Simōne ásedtée mó aá, “A-Sán, ehede me mekuu awobe-ye?”

7 Yesue ankwentén mó aá, “Weéhēēē-se esójtén dyam áde mbéleé bōob, bon ámbid e nímén mesýāál dóo wésójtēnnē.”

8 Héé Petro áhóbéé aá, “Aáy, weéwóbpéé me mekuu mbéd.” Yesue antimtén mó aá, “Nzé meéwobpe we mekuu né wéewóngé dyamdyam abele ne me.”

9 Simōn Petro anláá mó aá, “A-Sán, né saké mekuu mēmpen-éé wéwobéé me. Wéwobé me káájne mekáá ne nló!”

10 Yesue ankwentén aá, “Mod awé amaá mendíb awog, yāl esyāál emaa mó asán, eetāngeneé mendíb awóg ámpē, étōmēé áwobe mekuu. * Nyēmaa asán, bon saké nyé moosýāál nyēsáá.”

11 Yesue ammad abii mod awé āsōm mó. Néé dēnkāj bon ahób aá saké moosýāál asáá.

12 Ade amáá bó mekuu awobe, anhé nímē nkob á yāl, áfīm ámbid áwē e'dii. Héé ásedtée bó aaken, “Nyésójténé dyam áde mbénlé nyé-ye?”

13 Nyēchage me Meléede, nyēchage-ε me Sánjwéé. Nyētāngéné, áyāle nē dēn dóo ndíí.

14 Né-óó, nzé me awé ndé nyé Sánjwéé mbé-ε nyé Meléede nwóbpé nyé mekuu, né nyémpē nyētāngéné nhóg ne aníní mekuu awobe.

15 Nlúmté nyé elānsén éche nyētāngéné ahíd ábel nēn nyémpē nyébel ngáne mbénlé nyé.

16 Ne mbále nlānge nyé nēn meé, mbaledé eetóméé eche sán, mod awé bélómé-ε eetóméé mod awé alómé mó.

17 Bōob áde nyébíí nímén mam, nnam mébē ne nyé nzé nyébele mó.

18 “Meehóbéé nyé moosýāál. Mbíí bad ábe nípwédé. Bon e'yale ábe é'ténlédé á Kálag e Dyób é'tāngéné alón. Eténlédé nēn bán, ‘Mod awé sūms sedyāg ndyééd akūnnéné me yāl.’

19 Nlānge nyé nēn bōob, áde ébēnlédēé ábel nēn néé ébénlédé, nyédúbe nēn bán, ‘Ndíí mó Awé Ndíí.’

20 Ne mbále, nlānge nyé nēn meé, kénzée awé akobé mod awé nílómé, akobé me. Kénzée-ε awé akobé me né akobé ane awé alómé me.”

Yesue ahóbé á'só é' pōndé ad bésōm mó

(Mat 26.20-25; Mak 14.17-21; Luk 22.21-23)

21 Ade Yesue amáá nímén mekan ahób ndutul enlóg mó á nlém-tē, ápanléd-tē ábē bembapee áte aá, “Ne mbále, nlānge nyé nēn meé, nyé mod nhóg ábē me á mekáá mé bad bé ekoyí.”

22 Héé ábē bembapee bēnōnné á mesó, áyāle bēnkēmbíí-é mod awé áhóbéé.

23 Mbapee nhóg, awé Yesue ándāngé, andyē mó á akéb.

24 Dóo Simōn Petro ápebtanné ane mbapee mīd, áhōbē aá, “Sedéd mó mod awé áhóbéé.”

25 Dóo ane mbapee ásidtē Yesue á yāl-tē, ásedtē mó aáken, “A-Sán, nzéé éhóbéé?”

26 Yesue ankwentén mó aá, “Mod awé métódéé ewele á díse-tē bon nímē mó, mó adé ane mod.” Héé átédé ewele, átdtē á díse-tē, ábagé Judase, mwān awé Simōn Iskariode.

27 Akob áde Judase ákóbé éché ewele, Satane ansól mó áte. Dóo Yesue álāngéé mó aá, “Dyam áde éhédeé ábel bēl dó á mehélé-te.”

28 Bon mod ké nhóg awé bóbōó bedyágé'áá ndyééd enkēnsójtēnnē chōm-éé ékás bon Yesue aláá Judase nē.

* 13:10 Donje á kálag dé'só déewóó'é éetóméé áwobe mekuu.

²⁹ Ngáne édíí bán Judase mō akōngé'áá ekwe é moné, donje á bembapεε bénwēmtēn bán Yesue alānge mō aá áke áchan bwēm ábe bébenlédte á ngande, ké'ε chōm éche bébéé betóótókε bé bad.

³⁰ Ade Judase ákóbé ewele éche Yesue ábágé mō kobén, ambíd ebwóg. Ehíntén énkwe.

Yesue abagé mbéndé e ekóólé

³¹ Ade Judase amáá abíd dōo Yesue áhóbéé aá, “Bōob-pōó ehúmé e Mwān-a-Moonyon ényínnédé. Ehúmé é Dyōb-pe ámpé ényínnéd mbwiined ne mwān.

³² Nzé Dyōb ákúdé ehúmé ámbíd e Mwān, né Dyōb dēn ámpé débēl ehúmé é Mwān ényínned. Abēl-le nē ábwōg-ábwōg.

³³ A-baányan, echem pónde ábē ne nyé, edé esōj. Nyéēhēd me, bonj ngáne ménlāá' é bad bé Israel, melemlen nē dōo rílanjéé nyé bōob, mēé, ‘Wéé ríkagké, nyéehenlé ape áhed.’

³⁴ Mbage nyé mbéndé ekóólé bōob, nēn nyédəj nhóg ne aníníí. Ngáne rídás nyé, nyémpé nyédəj nhóg ne aníníí.

³⁵ Nzé nyédəá nhóg ne aníníí, né mod téé ábfi aá nyédii ábēm bembapεε.”

Yesue ahóbé ngáne Petro abāngé mō á yāl

(Mat 26.31-35; Mak 14.27-31; Luk 22.31-34)

³⁶ Simōn Petro ansədéd Yesue aáken, “A-Sánj, héé éhedéé áke?” Yesue antímtén mō aá, “Weéhēlē-se ehíd me bōob wéé ríkagké, bonj ámbíd e pónde wēhíd me.”

³⁷ Petro ansədéd mō aá, “A-Sánj, cheé ékáá bonj meéhēlē se nhíd we bōob? Mbōjséné áwé á nló rímōj.”

³⁸ Héé Yesue ákwentanné mō aá, “Ekoó abonjēn dé awé á nló rímēm-ε? Ne mbále, nlanje we mēé, nchóm-a-kúb adēhób aá mótōo’, wēbanj me á yāl ngen éláán.”

14

Yesue mō adé Nzii e mbále

echē epεene alonjé

¹ Dōo Yesue ábádéé ábē bembapεε aláa aá, “Nyéētagté nlém á abum. Nyésum nlém wéé Dyōb, nyésum-me kóōjne áwēm.

² Tonj ébuú áte á ndáb echē echem Sánj. Nkag-ke áwed ábonjēn nyé hōm. Nzé énkémbé nē, né menkēnlāá' é nyé mēé nkag nyé hōm abonjēn.

³ Nzé nkii'-ε nyé hōm abonjēn, mētīm ámbíd, rihye ntéd nyé ábē ne me, ábel nyémpé nyébē hōm áde rídii.

⁴ Nyébii' nzii echē etime' wéé ríkagké.”

⁵ Héé Tōmasé álāngéé mō aá, “A-Sánj, séebii' é wéé ékagké. Chán-nō sébweé nzii abii echē etime áwed?”

⁶ Yesue ankwentén mō aá, “Méé ndé nzii echē ekag wéé echem Sánj, mbále ehúé' ne me, me-'aá mbage alonjé. Modmod eéhēlē-se ápe wéé echem Sánj, ésebán abwedé áwēm.”

⁷ Héé Yesue álāngéé ábē bembapεε aá, “Bōob áde nyébii' me, nyéēbfi kóōjne echem Sánj.* Bootya bōob nyēnyíne mō, nyébii'-ε mō.”

⁸ Filibe anlāá mō aá, “A-Sánj, lúméd-te sé Titéε. Chōm ésyāāl éche séhedéé étóméé nē.”

* 14:7 Bōob áde nyébii' me, nyéēbfi kóōjne echem Sánj; donje á kálag dé'só áwóó nzé nyēnkōj me abii, né nyéēbfi kóōjne echem Sánj.

⁹ Yesue ankwentén aá, “A-Filib, nkémbē ne nyé á etún é póndé, chán-nō éhéléé-se ehōb wéé mōbīí' é me? Kénzée awè anyíné me né anyíné Titée. Chán-nō éhéléé-se ehōb wéé ‘Lúméd sé Titée?’

¹⁰ Weedúbpeé wéé echem Sáj adíí me áte, me-’é mbé mó áte-ye?” Héé Yesue alángeé ábē bembapee aá, “Mam níme rílángeé nyé méebídeé áwēm dēn. Bon echem Sáj awé adé me áte mó abele mímé nsón.

¹¹ Nyédúbe me ngáne nhóbé meé echem Sáj adíí me áte, me-’é mbé mó áte. Nzé nyéedúbpe nē, nyédúbé ké áyāle mam mé menyáké níme mbéleé.

¹² Ne mbále, nlánge nyé nén meé, kénzée awé adúbpe me, ábēl mam mímé mbéleé. Ábēl-le káōñne mekan níme métómé nímén áyāle nkag wéé Titée.

¹³ Mēbēl-le kéchéé éche nyésédté á dīn ádém ábel nén ngum eché Titée ényínned ámbíd e Mwān.

¹⁴ Nzé nyésédté me kéchéé á dīn ádém, mēbel chó.”

Yesue ad mōālōm Edāōdāñ éche Esáá

¹⁵ Yesue ambád ahób aá, “Nzé nyédāó me, né nyéēhíd echem mbéndé.

¹⁶ Mēlāā Titée, ábē-’é nyé Nwōñgene ampée, awé ábē ne nyé á ngíndé ne á ngíndé.

¹⁷ Ane Nwōñgene mó adé Edāōdāñ échē ébidte’ mbále áwed tññgene Dyōb. Bad bé nkōñsé béehelée-se békob mó, áyāle béēnyínē mó, béébīí-’aá mó. Bon nyébíí mó áyāle adé ne nyé, ábē-’é nyé áte.†

¹⁸ Nzé nkíí, méetedéé nyé menyuu. Mētīm ámbíd áwēn.

¹⁹ Mwāmpín mí póndé, nkōñsé méenyínné me ámpē. Bon nyépen nyéēnyín me. Ngáne mébēē á alongé, nyémpē nyéēbē.

²⁰ Nzé échē epun épédé, nyéēbīí bán ndé echem Sáj áte, nyé-’é nyébé me áte, melemlen ngáne me-’é nídíí nyé áte.

²¹ Kénzée awé akobé echem mbéndé, áhídē-’é chó, mó adé mod awé adāó me. Kénzée awé adāó-’é me, echem Sáj mó-’é ádāñ mó. Mémpē mēdāñ mó nlúméd-te mó yāl.”

²² Dōō Judase (saké Judas Iskariōde) áhóbéé aá, “Bon A-Sáj, chán wélúmēdte sé yāl bon weelúmté nkōñsé pen?”

²³ Yesue ankwentén aá, “Nzé mod adāó me, áhíd ábēm e’yale. Echem Sáj ádāñ mó, sé echem Sáj-’é séēpē awé, sédyēē-’é ne mó.

²⁴ Nzé mod eédā me, eehídeé ádém ayáge. Adén ayáge áde nyéwógé déesaá ádém. Adíí áde Titée awé álómé me.

²⁵ “Nlángé nyé nímén mésyāā́ áde nídíí ndé ne nyé.

²⁶ Nwōñgene, Edāōdāñ éche Esáá awé Titée álómmē á dīn ádém, áyāgēd nyé mekan mésyāā́l ábēl-le nyékamtán mekan mésyāā́l níme rílángeé nyé.

²⁷ Nsan móó ríyágnédé nyé. Mmēm nsan móó mbageé nyé. Meébāgēē nyé mó ngáne nkōñsé mbageé. Nyéētagté nlem á abum, nyéewógé mbwóg.

²⁸ Nyēnwóg nēé nhóbé meé ‘Mētedé nyé bon mētīm ámbíd áwēn.’ Nzé nyēndāñ me né nyéēwóg menyínge bán nkag wéé Titée áyāle Titée atómé me.

²⁹ Nlángé nyé nén bōōb áde ébēnlēdēē, ábel nén nzé ébēnlédé, nyédúbe.

³⁰ Syānē déebudté pónde awōñ ákal ámpē, áyāle nkamlēne a nkōñsé ahúé’. Eewóó-’é ngíne ké póg ámín echēm.

³¹ Bon kénē mēchennéd mó yāl mbēl ngáne echem Sáj áhóbé aá mbēl, ábel bon nkōñsé mbīí nén bán, ndāó echem Sáj. Né-’aá ákás bon mbéle kéchéé éche áhóbé aá mbēl.

“Nyéhyag syánē déhide hén.

† 14:17 Ábē-’é nyé áte; donge á kálag dé’só áwóó adé-’é nyé áte.

15

Yesue mâ akoó alín dé epum á bwel abé

1 “Me-εé ndé alín dé epum é bwel, alín dé epum é bwel dën dën. Echem Sáj-’ε abé mbelé-nzag.

2 Ahúde’ ngen ké ehéé echë edé me á yál, echë eechyáá’ e’pum, ápagké-’ε ké ehéé echë echyáá’ e’pum, ábel bonj ébonj yál ébude-’ε achyáa.

3 Ayáge áde ní’yágté nyé ábélé nyémaa asán.

4 Nyélyag nyébê ne me, mémpé mlyǎg mbé ne nyé. Ngen chën eéhelēē-se echyáá e’pum áde éesaá á alín á bwel. Melemlem née nyémpé nyéehelēē-se nyéchyáá e’pum ésebán nyédé ne me.

5 “Me-εé ndé alín dé epum é bwel, nyé-’ε nyébé ngen. Nzé mod adíí adé ne me bonj me-’ε ndé ne mó áchyáa e’pum bwámbwam. Nyéehelēē-se nyébél dyamdyam ésebé ne me.

6 Nzé mod eesē ne me, béhūd mó née ngen. Ene ngen ebelé ekintéd. Béladeé échē ndín é ngen áte, bébwém chó á muú-te, éhyán-’ε.

7 Nzé nyédíí nyédé ne me, bonj ádém ayáge-’ε adíí adé nyé áte, kéchéé éche nyésédté, nyéékúd.

8 Edúbé éche echem Sáj ényínnad nzé nyébudé e’pum achyáa, nê-’aa débél nyébé ábém bembapεε.

9 Ngáne echem Sáj ádáá me, melemlem née mémpé rídáá nyé. Né-óó nyédíí nyébé ne me ábel bonj mbê rídaj nyé.

10 Nzé nyéhídé échém mbéndé, né mēbē rídaj nyé. Melemlem nê dáo ríhídéé mbéndé éché echem Sáj, adíí adáá-’ε me.

11 Nlángé nyé nímmén mésyāā́ ábel nén nyémpé nyéwóg nyaa e menyinje eché níwogεé, nímmén menyinje mélón-ne mbon.

12 Echem mbéndé edíí nén, nyédaj nhóg ne aníníí melemlem nēngáne rídáá nyé.

13 Nzé mod awédé á nló mí baáb, né alúmté edajge éche étómténé achab amín.

14 Nzé nyébele’ mekan níme rílánjé nyé meé nyébél né nyédíí ábém besón.

15 Meéchāgēē nyé bembaledε ámpē, áyāle bembaledε béébyēē’ε mam níme echab sáj ábeléé. Bonj ríchāgεé nyé meé ábém besón áyāle nlánjé nyé mam mésyāā́ níme echem Sáj álánjé me.

16 Nyéēpwεdεé me, bonj me-εé mpwεdé nyé, nlóm-me nyé ábel mekan níme méchyáa e’pum é’ bwám. Nyaa é mekan éché ébē abé ne abé. Nzé nyébelé-’ε nē, echem Sáj ábē nyé kéchéé éche nyésédté á dín ádém.

17 Mmén mam mésyāā́ níme rílánjéé nyé-óó, médíí nén meé, nyédaj nhóg ne aníníí.”

Bad bé nkōjsé békóó nyé

18 Yesue ambád ábē bembapεε aláa aa, “Nzé nkōjsé ríkóó nyé, nyébíí nén bán meé bésébpé akóó.

19 Nzé nyémbé nēngáne bad bé nkōjsé, né nkōjsé métēd nyé nēngáne ábē bad. Bonj mpwεdé nyé áfínté e bad bé nkōjsé. Nyéésaa bad bé nkōjsé. Né-’aa ákáó bonj nkōjsé ríkóó nyé.

20 Nyéwémten ehób éche ménlāā́’ε nyé meé ‘Mbaledε eetóméé eche sáj.’ Nzé bēmbané me á metake-té né bēbané nyémpé á metake-té. Nzé bēnhíd ádém ayáge né bēhíd-te ádén ámpé.

21 Bēbel nyé nímmén mekan mésyāā́ á yál á dín ádém, áyāle béébíí’ε ane awé alómé me.

²² Nzé menkèmpɛ boŋ nláá bó nímén mam, né nímab mbéb méenyínnedéé. Boŋ bɔɔb, béewóó é nɔɔm ké póg áyāle nímab mbéb.

²³ Kénzée awé akóó me, akóó kááŋne echem Sánj.

²⁴ Nzé menkèmbel ndín é mam átínté echáb éche mod ampée ébɛlɛɛ mbéd, né nímab mbéb méenyínnedéé. Boŋ bɔɔb bényiné mekan méesyāāl níme mbéle, ké nê bédii békóó me, békóó-é echem Sánj.

²⁵ Nén adé álóned e'yale ábe é'ténlédé á mbéndé echáb bán, 'Nɔɔm ké póg enkèmbáá eche békóóné me.'

²⁶ Nwòŋgene ábid wée Titée. Adii Edáádɔŋ éche ébele' boŋ bad bésóŋtén mbále. Adé mébɛɛ ne Titée mëlómé nyé mó, mó-'aá álāá nyé mam tɔŋgene me.

²⁷ Nyémpɛ nyéɛhɔb mam tɔŋgene me áyāle nyédé ne me se á mbooted.

16

¹ "Nlángé nyé nímén méesyāāl ábel boŋ nyéétimné mbíd.

² Bédídé nyé á ndáb é mekáne. A mbále pónDé ehúe' eche kénzée awé áwúú nyé áwémtínné aá móbenle Dyòb.

³ Bébél nímén mam áyāle béébii' é echem Sánj béébii-'aá me.

⁴ Nlángé nyé nímén mam méesyāāl ábel boŋ nzé pónDé epedé eché nímén mekan mébenladdé, nyéekamtén bán menláá' nyé.

Nsón níme Edáádɔŋ ébenlé

"Menkènláá' é nyé nímén mekan á mbooted, áyāle membé ne nyé.

⁵ Boŋ bɔɔb, nkag wée mod awé álómé me. Ké nê, nyé modmod nyéesedtéé me bánken 'Hée ékagké?'

⁶ Aláa adé nílángé nyé nímén mekan ábéle ndutul elógé nyé á nlem-té.

⁷ Ne mbále, nlangé nyé nén meé, édé mboŋ nén bán níke. Áyāle nzé meékii, né Nwòŋgene éepaá áwēn. Boŋ nzé nkii, mëlómé nyé mó.

⁸ Ade ápée, áluméd bad bé nkòŋsé nén aá nímab nsòŋtén níme bəwánlé tɔŋgene ábel dé mbéb ne ábel mekan níme mėsáá méetɔŋgenéé. Béésòŋténéé-é nyaa eché Dyòb ákáadtéé.

⁹ Mmab nsòŋtén méetɔŋgenéé tɔŋgene mbéb, áyāle béedúbpɛé me.

¹⁰ Méetɔŋgenéé tɔŋgene ábel dé mekan níme mėsáá, áyāle nkag wée Titée, nyéenyín-naá me ámpɛ.

¹¹ Méetɔŋgenéé tɔŋgene nyaa eché Dyòb ákáadtéé, áyāle amaá nkamlɛne a nkòŋsé akáad.

¹² "Ndií nwóó ekud é mekan álāa nyé boŋ nímé mekan métom nyé áte.

¹³ Boŋ áde Edáádɔŋ é mbále épée, ábél nyébii mbále esyáál. Eehóbenné eché kunze chēn. Dyam áde bēlāā' é mó dóó áhòbɛ, álāā-é nyé mam níme mébenléd pónDé eché ehúe' á'sò.

¹⁴ Achāgéd échēm edúbé ámin áyāle kéchéé éche áwógé áwēm chíó mó-é álāā' é nyé.

¹⁵ Kéchéé éche echem Sánj áwóó édii échēm. Nê dóó ákáá boŋ níhòbē meé Edáádɔŋ étéd kéchéé éche níhóbé, éláá nyé."

Ndutul éttim meryiŋge

¹⁶ Hée Yesue ábádeé aá, "Mwámpín ní pónDé nyéenyínné me ámpɛ, mwámpín ní pónDé-é ámbíd ené nyéenyín me."

¹⁷ Dóó donje dé bembapɛɛ bésedtéé nhóg ne anínií bánken, "Cheé áwémténé ahób, álāa syānē aá, 'Mwámpín ní pónDé nyéenyínné me ámpɛ, mwámpín ní pónDé-é ámbíd e nê nyéenyín me?' Ahób-pe ámpɛ aá, 'Áyāle nkag wée Titée.'"

¹⁸ Bémɛ bésedtéé bánken, "Cheé áwémténé ahób, ahób aá, 'Mwámpín ní pónDé?' Séesòŋténéé dyam áde áhóbéé."

19 Yesue ammad abii aá, béhede mó dyam aseded. Né-óó, anláá bó aá, “Dyam áde nhóbé meé, ‘Mwámpín ní pónde nyéenyinné me ámpē, mwámpín ní pónde-’é ámbíd e nê, nyéenyín me,’ dóo nyésedtéé nhóg ne aníníi-yé?”

20 Ne mbále, nlánge nyé meé, nyééchií, nyéleb-pe, boŋ nkòŋsé méwōg menyinge. Nyéésudén, boŋ nímé nsuden métim menyinge.

21 Mmwaad awé ahede achyáá abelé ásudén áyāle eche pónde e metake epedé. Boŋ nzé amaá achyáá abelé awóg menyinge, áyāle moonyon achyáádté á nkòŋsé.

22 Nê dóo édíi ne nyé. Nyésüdné bōob, boŋ mēnyín nyémpē. Ene pónde nímén nlém mélōn ne menyinge, modmod éehēnlé-’aá nyé nímé menyinge akoben.

23 Ade échē epun épēé, nyéesédédté me dyamdyam. Ne mbále, nlánge nyé nén meé Titée ábē nyé kéchéé échē nyésédté á dín ádēm.*

24 Kóŋŋne bōob nyééhēdnēé mó chómchóm á dín ádēm. Nyéhēden mó, nyéékúd ábel nén nímén menyinge mélōg mbon.”

Yesue atómé nkòŋsé áte

25 Yesue ambád ábē bembapēē aláa aá, “Mbēnlédé ngan aláa nyé ekud é mekan. Pónde ehúé’ échē méebēnlédé ngan. Méláa-’é nyé mekan tǎŋgene Titée, nyaa échē nyésōŋtēnnē.

26 Echē epun, nyééhēdné mó kéchéé á dín ádēm. Méetōgén-naá mó aláa meé áwōŋgen nyé,

27 áyāle Titée mwēn adáá nyé. Adáá nyé áyāle nyédáá me, nyédúbpé-’é bán mbídé áwē.

28 Membíd wée Titée, nǐpē á nkòŋsé-te, bōob-pe ntēdte nkòŋsé, ntime ámbíd wée Titée.”

29 Héé ábē bembapēē béhóbéé bán, “Ehóbe bōob ngáne sésōŋtēnnē, weébēnládté ngan.

30 Sēbíi bōob bán ebíi mekan mésyāāl, éehēdnád-taá bán modmod áseded we dyamdyam. Nén ábelé sēdúbpé bán ebídé wée Dyōb.”

31 Dóo Yesue ákwentanné bó aá, “Nyédúbpé bōob-’é?”

32 Nyénōne! Pónde ehúé’, emaa-’é ape, áde nyépāŋtádté áte. Mod tée atóm mehélé wée ábidé, nyétēdē mmēmpēn. Boŋ ké nê, meésáá mmēmpēn, Titée adé ne me.

33 Nlánge nyé nímén mekan ábel nén nyébē nsaj abé ádē nyédíi ne me. Nyéékúd metake á nkòŋsé-te boŋ nyéwēd nlém á abum. Ntómé nkòŋsé áte.”

17

Yesue akánnédé eche yāl

1 Ade Yesue amáá nímén mekan mésyāāl ahóó, dóo ánóné ámin boŋ ahóbe aá, “A-Tē, pónde emaa ape. Lúmed bad ehúmé échē awōŋ Mwán, ábel nén awōŋ Mwán mómpē álúmed ehúmé échōŋ.

2 Ebágé mó kunze ákamlen moosyāāl, ábel nén ábe bad bésyāāl ábe ebágé mó alongé áde déemaá’.

3 Alongé áde déemaá’ ádíi nén bébii we, mmōn awé edé Dyōb á mbále, ne ábíi Yesu Křístōo, awé élóomé.

4 Mbídté échōŋ ehúmé áwed á nkòŋsé amad áde nímádé nsón níme ebágé me.

* 16:23 Titée ábē nyé kéchéé échē nyésédté á dín ádēm: donje á kálag áwóo Nzé nyésédté Titée kéchéé, ábē nyé chí á dín ádēm.

⁵ Bɔɔb-pɔɔ a-Sán, bídéd échêh ehúmé áwed, wée mmõh édíí. Melemlem mé edúbé níme ménwõngē ne we, nkõnsé rídé ahób bán mbootad.

Yesue akánnédé abē bembapεε

⁶ “Mbélé bad bé nkõnsé abe ébágé me bebíí we. Bébédée ábõh, wembě me bɔ, bebēl-’ε ngáne ehóbé wée bebēl.

⁷ Bébíí bɔɔb bán kéchéé éche ébágé me, ébídé áwõh.

⁸ Nlángé bɔ mam mésyāāl níme élánagé me wée ríláa bɔ, bédúbpé-’ε nímé mam. Bébíí ne mbále bán áwõh dɔɔ núbídé, bédúbpé-’ε bán we-εé elómé me.

⁹ Nkánnad bɔ. Meekánnádté bad bé nkõnsé. Bõh nkánnad bad ábe ébágé me, áyāle bédíí ábõh.

¹⁰ Bad bésyāāl ábe bédé ábêm bédíí ábõh, ábõh-’ε bésyāāl bédíí ábêm, bebídté-’ε échêh ehúmé áwed.

¹¹ Bɔɔb-pɔɔ, mwāmpín ní pónde méebáá á nkõnsé-te ámpē. Bõh bédíí bédé á nkõnsé-te. Nhyag áwõh. Titée awē Asáá, kəá bɔ á ngine e dín ádõh, dín áde ébágé mé. Ngine echē ébágé me ábel nēn bebē mod nhóg, melemlem ngáne sóo-’ε ámpē dédíí mod nhóg.

¹² Ade mbédé ne bɔ, menkəá bɔ á ngine e dín ádõh, dín áde wēmbéé me.* Nkõngé bɔ, bɔ mod ké nhóg-ke eebɔ’ε étóméé mod awē émmadté abē bán ábɔ ábel bõh ébenled ngáne éténlédé á kálag e Dyõb.

¹³ Bɔɔb-pɔɔ, nhyag áwõh. Nhóbe-’ε nímén mekan ngáne ndíí rídé á nkõnsé ábel bõh nímāb menyĩngē mélón mbon, melemlem ngáne nímēm-me mélóné mbon.

¹⁴ Nlángé bɔ mam mésyāāl níme élánagé me wée ríláa bɔ. Bɔɔb-pɔɔ bad bé nkõnsé békóó bɔ áyāle béesaá bad bé nkõnsé ámpē, melemlem ngáne me ámpē méesaá mod a nkõnsé.

¹⁵ Meehóbéé meé éhúd bɔ á nkõnsé-te, bõh nhóbe’ meé ékəá’ bɔ ábel bõh Mod e Ebébtéd ebēlē’ bɔ mbéb.

¹⁶ Béesaá bad bé nkõnsé melemlem nēngáne méesaá mod a nkõnsé.

¹⁷ Benléd echorõ mbále ábel bõh béhel we abele. Echõh eyale édé mbále.

¹⁸ Nlómé bɔ á nkõnsé-te melemlem nēngáne wēmpē wénlõmmē me á nkõnsé-te.

¹⁹ A etútú écháb membě echem yāl ábele we ábel bõh bómpē bebē échab yāl ábel bõh békõh we abele.

Yesue akánnédé bad abē bēedúbé mɔ bésyāāl

²⁰ “Meekánnádté ábêm bembapεε bēnpēn bõh nkánnad kóõhne bad ábe bédúbpé me áyāle mam níme bēwógé áwāb.

²¹ Nkánne’ meé bɔ moosyāál bebē mod nhóg. A-Tē, bɔ moosyāál bebē mod nhóg ne sóo, melemlem nēngáne édíí ne me, me-’ε mbé ne we. Bébē mod nhóg ábel nēn nkõnsé rídúbe bán we-εé elómé me.

²² Ehúmé éche ébágé me, me-’ε mbagé bɔ. Mbagé bɔ ábel bõh bebē mod nhóg melemlem nēngáne sóo dédíí mod nhóg.

²³ Ndé mod nhóg ne bɔ, we-’ε edé mod nhóg ne me. Nēn débēl békõh mod nhóg abé. Békõh mod nhóg abé ábel bõh nkõnsé núbíí bán we-εé elómé me, bebíí-’ε bán edáá bɔ melemlem nēngáne édáá me.

²⁴ A-Tē, ébágé me bɔ, bebē wée rídíí, ábel bõh bényín echêh ehúmé. Wembě me ehúmé áyāle wendāh me se á mbooted mé nkõnsé.

²⁵ A-Tē, we-εé ebele mam nímé mésáá. Nkõnsé méebíí’ε we, bõh mbíí we, ábēn-ne ámpē bebíí bán we-εé elómé me.

* **17:12** Menkəá bɔ á ngine e dín áde wēmbéé me: donje a kálag awóó á ngine e dín adõh ménkəá bad abe ébágé me.

26 Mbélé bébii wε, mēbēl-le ámpē ábel nén edəŋge échē édóó me ébē bó áte, me-ε ámpē mbē ne bó.”

18

Békóbé Yesue

(Mat 26.47-56; Mak 14.43-50; Luk 22.47-53)

1 Ade Yesue amáá akáne, bóobε ábē bembapεε bēnhidé, béchábē mwā edib a Kidron ámin. Nzag embé áhed, bénsāl áwēd-te.

2 Judase, ntúrē awē Yesue ambii adē abwóg á hóm, áyāle Yesue ne ábē bembapεε bēmmentén aladen áhed.

3 Né-óó, Judase antómén echoŋ é sánze ne bembaledε bé Ndáb-e-Dyób ábe beprise bémháá ne Befarisia bēnlómme, békē wée Yesue ábédé. Ábē bad bēnhód e'kag, bēwálé e'trúkán ne bwēm é' nzum.

4 Yesue amháad mam mésyāāl nime mébenléd ne mó abii, ké nē, ambidéd yāl áwed, ásdēd bó aáken, “Nzé nyéhedeé?”

5 Bēnkwentén mó bán, “séhede Yesue, mod a dyad á Nazaret.” Yesue ankwentén bó aá, “Me-εé ndé mó.” Judase ntúrē awē Yesue ambé áhed ne ábē bad.

6 Ade Yesue áhóbé aá, “Me-εé ndé mó,” bēntimén mbid, békwe áse.

7 Hē dóo Yesue ásedtεé bó ámpē aáken, “Nzé nyéhedeé?” Bēnkwentén bán, “Yesue a dyad á Nazaret.”

8 Héε Yesue ákwentanné bó aá, “Nlángé nyé méé, me-εé ndé mó. Né-óó, nzé nyéhede me, nyétēdē ábén bad ábe bédé ne me, békag.”

9 Nén dēmbenléd álóned e'yale ábe ánhōbpē aá, “A-Sán, áfintē e bad ábe wēmbéé me, meebódéé ké nhóg.”

10 Simōn Petro anwálé nkwáté. Héε ádólé nímé nkwáté boŋ átōmtē, áselē etúé é ekáá é mbáá é mbaledε awē prise ambáámbáa. Ane mbaledε abédé dīn bán, Malkuse.

11 Yesue anláá Petro aá, “Timéd nkwáté á abám. Nédē, meetēŋgenéé metuné nime echem Sán áfúinéde me akud-ε?”

Békééné Yesue wée Anase

12 Héε échē echoŋ é sánze ne awáb mod ambáá nchoo ne bembaledε bé bad bé Israel békóbé Yesue béhanj mó.

13 Bénsēbē mó akεen wée Anase. Anase abédéε sán-kálé awē Kaifase awē abédé prise ambáámbáa nímé mwē.

14 Kaifase ne, mó ambē bad bémháá bé Israel elébé aá ébóó bán mod nhóg áwē á nló ní bad bésyāāl.

Petro abáá Yesue á yāl

(Mat 26.69-70; Mak 14.66-68; Luk 22.55-57)

15 Simōn Petro ne mbapεε ampée béhidé'áá Yesue. Prise ambáámbáa ambii ane mbapεε, né-óó ane mbapεε ansól eyáde éche prise ambáámbáa wée bénsālennē Yesue.

16 Petro pen anlyǎg á mmwe mé e'ké. Dóo ane mbapεε awē prise ambáámbáa ámbii' é átimé ámbid á mmwe, ákālēn ngōndéré echē enoné'áá mmwe boŋ ásołtē Petro á eyáde-tē.

17 Ene ngōndéré ansedéd Petro aáken “Kiné wémpē wéesaá mbapεε nhóg awē ene mod-ε?” Petro ankwentén mó aá, “Aáy, meesaá.”

18 Bóob-óó, ahéb dēmbē. Né-óó, bembaledε ábe prise ambáámbáa ne bembaledε bé Ndáb-e-Dyób bēnkonéd muú bétyéém áhed bēwāle'. Petro mómpē ambé áhed, atyéém áwālē muú.

*Prise ambáambáa akáadte Yesue**(Mat 26.59-66; Mak 14.55-64; Luk 22.66-71)*

¹⁹ Prise ambáambáa esēdté'áa Yesue tãngene ábē bembapεε ne ádē ayáge.

²⁰ Yesue ankwentén mós aá, “Mam mésyāāl níme rílangé'áa bad nhóbé'áa mós á nhéné. Ayáged ádém ásyāāl-ε, ábédé á Ndáb é mekáne ne á Ndáb-e-Dyób wée bad bé Israel bésyāāl béladnéé. Meéhóbéé-ε dyamdyam á kun-té.

²¹ Cheé-ō esēdtéé me ámpē. Sedéd bad ábe bēnwōg mam níme rílangé bós. Bébíí mam níme ríhóbé.”

²² Ade Yesue áhóbé nē, mbáledε nhóg ambōm mós abén ahób aá, “Chán éhele ehābē nē wée prise ambáambáa?”

²³ Yesue antimtén mós aá, “Nzé nhóbé dyam áde déetãngene, ehób dós moosyāál áwōg. Bonj nzé édé bán nhóbé dyam áde átãngéné, cheé ékáá bonj ébāmé me?”

²⁴ Dós Anase áhóbé aá, békεen Yesue wée Kaifase, prise ambáambáa. Yesue ambé abé á mehanj.

*Petro abáa Yesue á yāl ámpē**(Mat 26.71-75; Mak 14.69-72; Luk 22.58-62)*

²⁵ Βοῦβ-ρῶς, Σίμων Πετρο ambé atyéém áhed áwālē muú. Héε bad ábe bémbē áhed béseǵtéé mós bán, “Kíné wēmpē weésaa mbapεε nhóg awé ane mod-ε?” Petro antánj aá, “Aáy, meésaa.”

²⁶ Mbáledε awé prise ambáambáa nhóg, mwānyanj mós Petro ánsēnlē etúu, anchágéd ehób ámín, aláa Petro aá, “Kíné meenyíneé nyúmō á nzag-té-ye?”

²⁷ Petro antánj ámpē. Abwōg-ábwōg, nchóm á kúb antónj.

*Payledε akáádté Yesue**(Mat 27.1-2, 11-14; Mak 15.1-5; Luk 23.1-5)*

²⁸ Bad bé Israel bēnhidné Yesue á ndáb wée Kaifase békēen mós á eyáde e nkamlenε ambáa. Nén ábédé epog é mbwεmbwε. Bēn bēnkēnsónlē á ndáb-te ábán nēn béenyínnád mbinde á'sō é' Dyób * ábel bédyē Ngande e Nnyíme-ámín.

²⁹ Né-ῶς, Payledε nkamlenε ambáa á bad bé Roma, ambíd e ebwōg áke atán bós, ásedté bós aáken, “Awusé áhéé nyéhóbé bán anén mod abelé?”

³⁰ Bēnkwentén mós bán, “Nzé anén mod enkēmbé ebébtéd é mod, né séēbageé mós áwōnj mekáa.”

³¹ Payledε anláa bós aá, “Nyé bēn nyétéd mós, nyébenled mbéndé echēn nyékáad mós.” Héε bad bé Israel bélangéé mós bán, “Séewóó'ε kunze áwúu mod.”

³² Nén dēmbēnléd álóned e'yale ábe Yesue ánhōbpē álúmed nyaa e kwééd eche áwēē.

³³ Payledε ansól á ndáb-te ámpē, áchāg Yesue, ásedéd mós aá, “Wε-εé édé kånj e bad bé Israel-le?”

³⁴ Yesue ankwentén aá, “Mmōn-εé ehóbe nē ngé bad bēmpēe bós bélangē wε mam á yāl echēm?”

³⁵ Payledε ankwentén aá, “Ndé mod á Israel-le? Abōnj bad ne beprise bémbáa bós bébágé wε áwēm mekáa. Cheé ébélé?”

³⁶ Yesue ankwentén aá, “Mmēm nkamlenε meésaa á nkōjsé wén. Nzé nímēm nkamlenε mémbē á nkōjsé wén, né ábēm bēmbáledε bēwān, ábel nēn bad béebagé me á mekáa mé bad bé Israel. Bonj nímēm nkamlenε meésaa mé nkōjsé.”

* **18:28** Bad bé Israel béndubē nēn bán nzé mod asslé á ndáb é mod awé eéε mod á Israel, né awógté yāl mbinde. Ne bós, enén ndín é mod ebágáa mbinde á'sō é' Dyób epun saámbe. Enén pónde esyāál éhéle'áa-se adyē Ngande e Nnyíme-ámín.

³⁷ Dóo Paylede ásedtée mó aá, “Nédē edē kâḡ-ε?” Yesue ankwentén aá, “Wε-εé ehóbē weé ndé kâḡ. Nzom echē ekáá boḡ béchyáá me, nḡpē á nkōḡsé wén, edii ábíbd móḡ e mbále. Mod ké ahéé awé adé mod a mbále awóglan me.”

³⁸ Paylede ansedéd mó aá, “Cheé edé mbále?”

Bán Yesue atáḡgéné awé

(Mat 27.15-31; Mak 15.6-20; Luk 23.13-25)

Ade Paylede amáá mó aseded nén, ambíd á ebwóg ámpē ake atán bad bé Israel, anláá bó aá, “Meekóbnεé anén mod awusé ké ahóg áde méhōbpē meé béwúu mó.

³⁹ Boḡ nyēwóó elem nén bán, ntáḡgéné nyé mod a mbwog nhóg abídted á pónde e Ngande e Nnyíme-ámín. Nyédáá bán níbídted nyé kâḡ e bad bé Israel-le?”

⁴⁰ Bēnkwentén mó ne e’saad bán, “Aáy! Séēhēdēē mó. Bídtéd sé Barabase.” (Barabase abédé-ε nchíb ambáá.)

19

¹ Dóo Paylede áhóbē aá béke bébom Yesue.

² Sánze éntēd ngen é mechā bélóḡ ekóté éche émbē néε ekóté é kâḡ, béhē mó chō á nló, béhē-ε mó mengombe níme méyáge’ á yál, níme méwágné mengombe mé kâḡ.

³ Bésídté’áá mó benben, béhōbē bán, “A kâḡ e bad bé Israel, edúbé ébē ne we.” Bébómé’áá mó kōḡḡne mebén.

⁴ Paylede ambíd á ebwóg ámpē, aláá ábē bad aá, “Nyénone’, mbítdaad nyé mó á ebwóg, ábel nén nyébii bán, meekóbnεé mó awusé ké ahóg.”

⁵ Né-óó, Yesue ambíd á ebwóg ne ekóté e mechā á nló, mengombe níme méyáge’ mó-ε mébé mó á yál. Héε Paylede álāḡgeé bó aá, “Nyénone’ awedé mod-e nén!”

⁶ Ade beprise bémbáá ne bembaledé bé Ndáb-e-Dyōb bényíne mó, bēmbóótéd abón bán, “Bomé mó á awog! Bomé mó á awog!” Paylede anláá bó aá, “Nyé bēn nyétéd mó, nyébome mó á awog, áyāle meekóbnεé mó awusé ké ahóg.”

⁷ Abē bad bēntímtén Paylede bán, “Sēwóó mbéndé echē ehōbe nén bán atáḡgéné awé áyāle ahóbē aá módii Mwān a Dyōb.”

⁸ Ade Paylede áwógé nén, mbwóg mēnnabé mó akób.

⁹ Antīm ámbíd á eyáde-té ámpē, ásedēd Yesue aá, “Héé ébíde?” Boḡ Yesue enkēnkadénné mó.

¹⁰ Né-óó, Paylede anláá mó aá, “Weéhēdēē me akwenten-ε? Weebii’ é nén weé nwóó kunze áhób meé béchene we, nwōḡ-ε kunze áhób meé bébome we á awog-ε?”

¹¹ Yesue ankwentén mó aá, “Weewóó’ é kunze ké póg ámín echēm ésebán Dyōb ábágé we ene kunze. Né-óó, mod awé abagé me áwōḡ mekáá abelé mbēb níme rítómténé achab ámín.”

¹² Ade Paylede áwógé nē anhéḡ nzii átede Yesue, boḡ ábē bad béhē e’saad bán, “Nzé etédte anén mod né weesáá nson awé Kaisεε. Kénzée awé ahóbē aá, módē kâḡ né atāḡgan Kaisεε.”

¹³ Ade Paylede áwógé nén, ambídén Yesue á ebwóg, ádyēē atii dé nkamlen. Adé hōm wéε ándyεé’ é béchógé’áá dō bán, Eyáde éche bēnábndé Meláá. A ehób é Hibru béchoge bán, Gabata.

¹⁴ Bōob-óó, nén abédé á epun é mboḡsén é Ngande e Nnyíme-ámín, dyam kəd. Paylede anláá ábē bad bé Israel aá, “Echen kâḡ chō nén!”

15 Abé bad bénhē e'saad bán, "Wúú mós! Wúú mós! Bomé mós á awóg!" Héé Payledé ásédteé bós aá, "Mbome echen kân á awóg-ε?" Beprise bémbáá bēnkwētén mós bán, "Séewóó' é kân empée étóméé Kaisεε."

16 Dóó Payledé ábágé Yesuε áwab mekáá ábome mós á awóg.

Bébómmé Yesuε á awóg

(Mat 27.32-44; Mak 15.21-32; Luk 23.26-43)

Né-óó, bēnhidnéé Yesuε.

17 Yesuε mwēn ampém áde awóg bootya á dyad-tē ákēēn dós hóm áde béchəgεé bán, "Hóm dé Ebóngél é Nló," áde béchəgεé á ehób é Hibru bán Golgota.

18 Ahed-taá bēmboméé mós á awóg. Bēmbomé bad bébε bémpēe á awóg áhed, nhóg pēd póg, aníní-'ε pēd eníní, Yesuε abé áfnté.

19 Payledé antél á abámbe aá, "Yesuε, mod a dyad á Nazaret, kân e bad bé Israel," abádé á awóg á nló-mín wéε Yesuε.

20 Wéε bēmboméé Yesuε á awóg démbē benben ne Jerusalem. Né-óó, bad hiin bēnlāy chóm éche bēntenlé. Chóm éche ántenlé, antel chó á ehób é Hibru, átel é ehób é Latin, ne é ehób é Grikia.

21 Beprise bémbáá bēnlāá Payledé bán, "Wéétélē wéé 'Kân e bad bé Israel,' tēl wéé, 'Anén mod ahóbé aá, mε-εé ndé kân e bad bé Israel.'"

22 Payledé anláá bós aá, "Chóm éche rítélé mmaá atel."

23 Ade sánze émáá Yesuε abome á awóg, bēntéd éche mbóté, békabted chó áte monje méniin, bós mod té atéd akab ahóg. Bēntéd kóáñne mbóté éche béhágkē áte. Ene mbóté bēnkēmbaá' é chó hómhóm. Embé bootya ámín ápε ásé enkēnwóngé mbom.

24 Héé belángeé nhóg ne aníní bán, "Syánē deésalé chó. Désid mbambú ányin mod awé átéd chó." Nén dēmbenléd áloned e'yale ábe é'ténlédé á Kálag e Dyób nén bán,

"Bén ne bēn bēnkáb échēm mbóté. Bēnsid-te mbambú ákab rímēm nsob."

Né-óó, nē dóó éché sánze émbenlé.

25 Yesuε nyaá, nyaá mwānyan, Maria awé abédé Klopase mwaád ne Maria Magdalene béntyēēm benben ne á awóg áde Yesuε.

26 Ade Yesuε ányiné nyaá ne mbapεε awé ádós bétyéémé áhed, anláá nyaá aá, "A-nyan, mwān wε nε."

27 Héé álángeé ane mbapεε mómpē aá, "Nyoó nε." Bootya ene pónde ane mbapεε antéd Yesuε nyaá, áfīmēn mós áwē nádab.

Yesuε awédé

(Mat 27.45-56; Mak 15.33-41; Luk 23.44-49)

28 Ambid e nē, Yesuε annyin aá mekan mésyōāl mémáá. Alóned-te ngáne éténlédé á Kálag e Dyób anhób aá "Píd ekóbé mε."

29 Kúmbe embé áhed, ebéntéd é mīm énlōg áwēd-te. Né-óó bēntodé kuchá á ebéntéd é mīm-té wē, bésōm á ntōñ ní ngen e hísob, béhē mós á nsāl.

30 Ade Yesuε ámwédé ebéntéd é mīm chē, anhób aá, "Emáá." Héé ámógé nló, awé-'ε.

Bésóó Yesuε akonj á aheb

31 Bóob-póó, éché epun ébédé Mbwe mé mbonjén mé mbwe-mé-nkóme-áte. Bad bé Israel-le béhéde'aá bán ndim mibe mibe á awóg á mbwe-mé-nkóme-áte, tanje ngáne éché epun é nkóme áte étómtēnnε edúbé abé. Né-óó bēntān Payledé bán, ábe bós kunze ábóg bad ábe bēbómmé á awóg mekuu ne áhúd bós á awóg.

³² Né-ɔ́, échê sánze ênkĕ ébóg mekuu níme bad ábe bêmboméé bóɔbe Yesue á awɔg. Bénsébē níme nhóg abóg, bébóg-ke níme aníníí.

³³ Boŋ áde bépédé wée Yesue béntān nées áamáá awé. Né-ɔ́, bēnkētogénné mó mekuu abóg.

³⁴ Ké nê, sánze póg ensoŋ mó akoŋ á aheb. Abwōg-ábwōg mekií ne mendīb bēmbíd.

³⁵ Mod awé annyín nées nímén mekan mébénlédé, abidé mbóŋ, eche mbóŋ edé-'e mbále. Abíí nén aá, mókale' mbále, ahóbe-'e nímén mam ábel nén nyémpē nyédúbe.

³⁶ Mmén mam mébénlédé álóned e'yale ábe é'ténlédé á Kálag e Dyōb nén bán, "Béebógké ehid échē ké ehóg."

³⁷ Eténlédé á kálag e Dyōb ámpē nén bán, "Bénōn ane awé bésóó akoŋ."

Béltmmé Yesue

(*Mat 27.57-61; Mak 15.42-47; Luk 23.50-56*)

³⁸ Ambíd enê, Josebe awé ambíd á dyad á Arimatia, anláá Payledé aá, ábe mó kunze áted ndim níme Yesue. Josebe abédéé mbapée awé Yesue, boŋ énkēmbidédte yál áwed áyāle abáá'áá bad bé Israel. Payledé ambé mó kunze áted ndim níme Yesue. Né-ɔ́, ankĕ Yesue ndim atéd.

³⁹ Nikodemuse awé ansébé Yesue ake dé anyín nkuu, bó Joseb bēnkĕ. Bédĕkĕ anwálé mekúle níme bēnabnadte ndim nímé bébénlé Mía ne Alas.* Adé dyōg abédé dyam móom mé kīlo meláan ne kīlo étāan.

⁴⁰ Béntēd ndim níme Yesue, békāān mó mbóm ne níme mekúle. Nén dōo elem é bad bé Israel áboŋsen ndim émbēē.

⁴¹ Bóob-póɔ, nzag embé wée bēnwū'é Yesue. Soŋ e ekóólé ebédé á nzag-tē wē, échē bēnkēmpaa ndim ké nhóg abane áte.

⁴² Né-ɔ́, ngáne échē epun ebédé mbwe mé mboŋsén mé mbwe-mé-nkóme áte, ene soŋ-ε ebé benben, bēmbané Yesue ndim áwēd-te.

20

Yesue apuidé

(*Mat 28.1-8; Mak 16.1-8; Luk 24.1-12*)

¹ A Sōndé, epog é mbwēmbwē, áde ehintén émbēē éhé, Maria Magdalene ankĕ á soŋ wée bēnlimēē Yesue. Ade apédé áhed, antán nées behúde aláá áde bēnkālēnnē nsāl rí soŋ. ² Héé átómé mehélé, boŋ áke atán Simōn Petro ne mbapée ampée awé búmō bebédé. Ane mbapée abédéé mbapée awé Yesue ándāngé. Dōo Maria álāngéé bó aá, "Behúde Sāŋgwéé ndim á soŋ-tē, séebii-'áa wée bebánné mó."

³ Dōo Petro bó ane mbapée behídté boŋ békāg á soŋ.

⁴ Bó moosyál bényágté'áá, boŋ mbapée aníníí anyágté'áá tómaa Petro. Né-ɔ́, ansébé ape á soŋ.

⁵ Anwúlén ásé ásad díd á soŋ-tē, anyín mbóm éche bēnkaánné Yesue, boŋ enkēnsónlé á soŋ-tē.

⁶ Simōne ahúé'áá mó ámbíd, apedé-'áa pēén asól-le á soŋ-tē. Antán mbóm éche bēnkaánné Yesue áhed.

⁷ Antán-ne abad áte bēnkaánné Yesue nló. Adé abad déēbédéé hōm ahóg ne mbóm, déndāōn áte pēd póg.

⁸ Héé aníníí mbapée awé ansébé ape á soŋ mómpē asólé áwēd-te. Annyín ábē bwēm, adúbé-'ε.

⁹ Ké nê, bēnkēnsōŋtēnné chōm éche éténlédé á Kálag e Dyōb nén bán Yesue atāŋgéné apuu.

* **19:39** Alas: Abédéé mekúle níme bébénládtáá ánabned ndim.

10 Ambíd é nê, ábê bembapεε bēntīm ámbíd á ndáb.

Yesue alúmté Maria Magdalene yǎl
(Mat 28.9-10; Mak 16.9-11)

11 Βαῶβ-ρῶδ Maria anlyǎg á nsál ní son, áchyeé'. Ade áchyeé' é nê dῶῶ áwúnle ásē, bonj ásadé díd á son-tê.

12 Asad áde ásadé díd, annyín ángel ébe. Echê ángel énhē e'púpe é' mbóté, édyεε wée bēnaadté ndim nīme Yesue. Nhóg andyεé á pεd e nló, aníní'-ε á pεd e mekuu.

13 Echê ángel énsedéd Maria bán, "A-mmwaád, cheé échyeé'?" Anláá bó aá, "Nchye' áyāle bétédé ndim nīme awem Sǎngwéé, meebii'-áa wée bebánné mῶ."

14 Ade ámáá ahób nê, ankunnéd, anyín nēε mod atyéémé áhed. Ane mod abéde Yesue bonj enkēmbíí' é aá Yesue mῶ adé.

15 Yesue asedéd mῶ aá, "A-mmwaád, cheé échyeé'? Nzéé éhedeé'?" Maria anwémtén aá mod awē abele nsón á nzag-tê wē mῶ adé. Né-ῶῶ, anláá mῶ aá, "A-sǎn, nzé wε-εé etédé mῶ ndim, eláá me wée ébánné, ábel bonj níke nítéd mῶ."

16 Héε Yesue áchagεé mῶ aá, "A-Maria!" Dῶῶ Maria ákúnné yǎl áwē bonj ahóbé á ehób é Híbru aá, "Rabóni!" (awē adé nēn bán, "Meléede").

17 Yesue anláá mῶ aá, "Weésítan me, áyāle meétíméé ámbíd wée Titée. Bonj kǎg wée ábēm bembapεε, ábēm baányan, éláa bó wεé, ntime' ámbíd wée echem Sǎn, awē adé káǎne echen Sǎn. Mῶ adé Dyób ádēm, abé'-ε ádēn."

18 Né-ῶῶ, Maria Magdalene ankē, aláá bembapεε aá, mónyínē Sǎngwéé. Anláá'-ε bó mam mésyāāl nīme álángé mῶ.

Yesue alúmté ábē bembapεε yǎl
(Mat 28.16-20; Mak 16.14-18; Luk 24.36-49)

19 Echê epun é Sōndé chēn, ngukél, bembapεε ábe Yesue bēnladén áte á ndáb-te bēpēn-ne ekob áyāle bebáá'áa bad bé Israel. Yesue ampē, atyéém áfínté echáb, aláá bó aá, "Nsanj núbē ne nyé."

20 Ade ámáá ahób nê, anlúmed bó nímē mekáá, alúmed-te bó aheb. Bembapεε bebédé menyinge bwāmbwam ányín Sǎngwéé.

21 Dῶῶ Yesue álángεé bó ampē aá, "Nsanj núbē ne nyé. Ngáne Titée álómé me, melemlem nê dῶῶ mémpē nílóméé nyé."

22 Ade ámáá ahób nê, anhébé bó peme, aláá'-ε bó aá, "Nyékob Edáǎdǎn éche Esáá.

23 Kénzéé awē nyélagésné mbéb, né nīme mbéb níkúde alagsen. Kénzéé'-ε awē nyéelagséneé nímē mbéb, né méekudeé alagsen."

Yesue alúmté Tῶmase yǎl

24 Tῶmase mbapεε nhóg áfínté e bembapεε dyóm ne bébe ábe Yesue, awē béchágé'áa bán Nhéd, enkēmbáá ne baáb áde Yesue ápéde.

25 Né-ῶῶ, áde ahúú baáb bēnlāā mῶ bán, "Sényíné Sǎngwéé." Bonj anláá bó aá, "Esebán ninyíné meban nīme bēmboméé mῶ tῶne á mekáá bonj nísōm-me e'mii á meban-tê áwed, mbíbd-te ekáá áwē aheb, meédúbéé mbéd."

26 Ambíd e e'pun waam, bembapεε bēnladén áte á ndáb-te ampē. Tῶmase mῶmpē ambé áhed. Bēmpēn e'kob, bonj Yesue ampē, atyéém áfínté echáb. Anláá bó aá, "Nsanj núbē ne nyé."

27 Héε álángεé Tῶmase aá, "Sōm e'mii á mebanj hén. Nῶnē' me mekáá, éhyene'-ε ekáá, ébid me chῶ á aheb. Sóg mod abé awē eedúbé', dúbé!"

28 Tῶmase ankwentén mῶ aá, "A-Sáá awēm, a-Dyób ádēm."

29 Yesue anláá mῶ aá, "Saá áyāle ényíné me dῶῶ édúbpe-yε? Nnam ne bad ábe béenyine bonj kéné, bédúbe."

Nzom eché ekáῶ bonj bétéle' enén kǎlag

30 Yesue ambël ekud é menyáké émpée éche ábē bembapεε bémbēē ásē éche béeteleé á kálag-tē wén.

31 Boη nímén mésyāēl méténlédé ábel nén nyédúbe* bán, Yesue mó adé Anewé-Béwógté, Mwán a Dyób. Nzé nyédúbpé-ε mó, né nyékudé alongé áde déemaá' á đin áde.

21

Yesue alúmté ábē bembapεε yāl ámpē

1 Ambíd e nímén mésyāēl, anlúméd ábē bembapεε yāl ámpē á nkin mé edib é Tiberia. Nyaa echē ánlúmédte bó yāl ebédē nén,

2 epun ehóg Simōn Petro, Tōmasε (awē béchégé'áá Nhéd), Nataniεε (awē ambíd á dyad á Kana á mbwóg e Galilia), bán ábe Zεbediε, ne bembapεε ábe Yesue bémpēe bébe, bēnladén hōm ahóg.

3 Héε Simōn Petro álangéé bó aá, "Nkag súu akób." Bēntimtén mó bán, "Sémpé sééhíd wε." Né-óó, bēnhidé béke bésól á bōle-tē. Boη nímē nkuu nisyāēl bēnkēnkóbpé chōmchōm.

4 Ade bīn é'boótédé akéle, Yesue antyéém á nkin mé edib. Boη ábē bembapεε bēnkēmbíí' é bán mó adé.

5 Dóó Yesue ásedtēé bó aá, "A-běđ, nyéékōbēē chōmchōm-ε?" Bēnkwenntén mó bán, "Aáy, séékōbēē."

6 Anláá bó aá, "Nyébwēm mbínzé á pēd e ekáá é mbáá é bōle, nyéékōb." Né-óó, bēmbwēm mbínzé ene pēd. Bēnkēnhēnlé ene mbínzé adol áyāle súu émbē áwēd-te bwāmbwam.

7 Dóó mbapεε awē Yesue ándangé áhóbεé aá, "Sángwéé mó adé!" Awóg áde Simōn Petro áwógé bán, SÁNGWÉÉ mó adé, anhé megombe á yāl (áyāle anhūd bwēm á yāl). Dóó áhébé á edib-te.

8 Boη ábiníí bembapεε bémpē á nkin á bōle-tē, bédolé mbínzé. Ene mbínzé enlōn ne súu. Wéε bēmbídēnnē bōle ápe á nkin dēnkēnchabpé, ábédé dyam mbwókεl e méta póg.

9 Ade bépédé á nkin bēntān muú mé mekáηled. Súu ébédé áwēd ámīn ne ewεle.

10 Yesue anláá bó aá, "Nyéhyεene' donje á súu áde nyékóbé bōób."

11 Né-óó, Simōn Petro ansól á bōle-tē, ádol ene mbínzé á nkin. Súu émbáá enlōn ene mbínzé áte. Ebédé mbwókεl móom métāan ne éláán. Kénéε échē súu émbuú' é áte, ene mbínzé enkēnsaléé.

12 Yesue anláá bó aá, "Nyéhyε nyédyē ndyééd." Ábē bembapεε bó modmod enkēnchu' é mó asēded aáken, "Nzé-módé édíí?" Bēmbíí bán, SÁNGWÉÉ mó adé.

13 Dóó Yesue átédé ewεle boη ábagé bó. Ambël melemlem ne súu.

14 Nén ábédé ngen echē élónténé éláán, echē Yesue álúmté ábē bembapεε yāl á pónde echē ámáá apuu.

Yesue asēdté Petro ké adáó mó

15 Ade bémáá ndyééd adyε, Yesue asēdéd Simōn Petro aá, "A-Simōn, mwán a Jōn, edáó me tōmaa ábēn bembapεε-yε?" Simōne ankwenntén aá, "Éε, a-Sán, ebíí wεé ndáó wε." Yesue anláá mó aá, "Tógén ábēm bán bé ndyōη ní mbód."

16 Yesue ansēdéd mó ngen éche élónténé ébe aá, "A-Simōn, mwán a Jōn, edáó me-yε?" Petro antimtén mó aá, "Éε, a-Sán, ebíí wε ndáó wε." Yesue anláá mó aá, "Tógén nímēm ndyōη ní mbód."

17 Yesue asēdéd mó ngen échē élónténé éláán aá, "A-Simōn, Mwán é Jōn edáó me-yε?" Yāl enhóó Petro áte áde Yesue ásēdté mó ngen échē élónténé éláán

* 20:31 Nyédúbe; donje á Kálag dé e'só awóó nyébē nyédúbe.

aaken, “Edəə mə-yε?” Né-ɔ́, anláá Yesue aá, “A-Sán, ebíí mam mésyāəl. Ebíí wéé ndəə wε.” Yesue anláá mó aá “Təgén nímém ndyən mí mbód.

¹⁸ Ne mbále, nlanje wε nén mée, áde ébédé etum, mmón epúdé’áá abad, ékäg-ke kéhée wée édás. Bon áde wéchunné wəsád mekáá, mod ampée awáád wε abad, ákēn-nε wε wée wéedəə’é ake.”

¹⁹ (Yesue anhób nê álúmed nyaa e kwééd echě Petro áwēē, álúmed ehúmé é Dyəb.) Ambíd e nê dɔ́ Yesue álanjeé mó aá, “Hídé mε.”

Yesue ne mbapεε awě ádás

²⁰ Dɔ́ Petro ánóné ámbíd bon ányínē’ née mbapεε ampée áhídéé bó. Ane mbapεε abédée mbapεε awě Yesue ándəngé. Móɔ andyεé Yesue á akéb á póndé éche bédyágé’áá ndyééd ngukél, bon ášədéd Yesue aá ken, nzé-módé ášóm mó.

²¹ Anyín áde Petro ányíné-’aá mó, anhób aá, “A-Sán, chán-náa anén mod?”

²² Yesue ankwentén mó aá, “Nzé nhede mée ábê á alonje káəne póndé echě mépée, chán nê ánóné wε? Hídé mε.”

²³ Né-ɔ́, énkánléd átínté e bad ábe behídé’áá Yesue hóm ásyāəl nén bán ane mbapεε éewáá, kénéε Yesue énkénhóbpe aá, éewáá. Anhób dásā aá, “Nzé nhede mée ábê á alonje káəne póndé echě mépée, chán nê ánóné wε?”

²⁴ Ane mbapεε mó abíde mbón áyál e nímén mekan, mó-’aá atelé mó ášé. Debí-’ε bán, kéchéé echě áhóbé éde mbále.

Asóg á kálag echě Jone

²⁵ Ekud é mam émpēé éde éche Yesue ábélé. Nzé bėnhōb bán bétele’ mésyāəl ášé, ahóg ámbíd e ádíńí, nwėmtan mée né nkōjsé méekwogké echě kálag ahé áte.

Kálag e Mbɛltéd níme bembapɛɛ bé nlómag Ndibned ní kálag

Mod awe atelé kálag e Lukase mó atelé-'e kálag e Mbɛltéd. Mekan níme enén kálag mékoo'é alúmed áte médii álaa bad ngáne Edáádəŋ éche Esáá énwōŋgēnnē bad ábe bēhídé'áá Yesue ákal nkalaní ní bwám tŋŋene Yesue á Jerusalem, á mbwóg é Judeya ne Samaria ne á mesóg mé nkōŋsé. Elúmte ngáne adúbe á bad bé Krísto ábédé álóned chóm éche bad bé Israel béndübɛɛ. Enén kálag elúmte ngáne adúbe á bad bé Krísto ábóótédé á Jerusalem ámbíd e mpume níme Krístəə ne ngáne akíi mebwóg mémpɛe. Atón áde áde etógnén áde enén kálag élúmte'é ámpé ádíi nsón níme Edáádəŋ éche Esáá ébɛlé. Empé ne ngíne ámín e bad ábe bédúbpé á mbwɛ ní Pentekos.

Nkabtéd ní kálag

Abonŋɛn bad ábe békale nkalaní ní bwám 1.1-26

a. Póle e asóg eche Yesue ne ábē Bembapɛɛ 1.1-14

b. Mod awé atédé Judase échē etál nēŋgáne mbapɛɛ 1.15-26

Nkalaní níme Yesue níkálté á Jerusalem 2.1-8.3

Nkalaní níme Yesue níkálté á Judeya ne á Samaria 8.4-12.25

Nsón níme Paale 13.1-28.31

a. Eke é'só áke dé abel nsón 13.1-14.28

b. Mbom níme bembapɛɛ bé nlómag ne belyáged bé mwembé á Jerusalem 15.1-35

c. Meke níme mélónténé mébe áke dé abel nsón 15.36-18.22

d. Meke níme mélónténé méláán áke dé abel nsón 18.23-21.6

e. Paale adé á mbwóg á Jerusalem, á Kaisaria ne á Roma 21.17-28.31

Titée Dyóbe ad mósólom

Edáádəŋ éche Esáá

¹ A-Tiofilos, mod a edúbé, á kálag eché nísebpé atel, mentél mekan ásē níme Yesue ámbenlé ne níme áyágté'áá bad. Ámbél nímén mekan bootya á pónde eché ámbootédte níme nsón,

² kóŋŋne, á pónde eche Dyób dēmbenlé bon ápūmē. Byánán ápumé, ámbenléd ngíne e Edáádəŋ éche Esáá, álaa bad ábe ámpwɛdté nēŋgáne ábē bembapɛɛ bé nlómag mekan níme bétŋŋéné abel.

³ Bootya áde Yesue áwédé, ápe móom mé e'pun méniin, anlúmed ábē bembapɛɛ bé nlómag yál ngen ne ngen, álúmed nén áá ne mbále móde á alongé. Bényinnáá mó did ákanlé-'e bó tŋŋene nkamlen ní Dyób.

⁴ Pónde póg áde bósóbō bédyáŋkē ndyééd, ansím bó etúu áte aláá bó áá, "Nyéhídté á dyad á Jerusalem. Nyésine' nde eché Titée awēm álánŋé nyé áá mshōbē áá mósóbē nyé. Ene nde chōo ménlāā'é nyé.

⁵ Jŋɛ adūsánnáá bad ne mendíb, bon ámbíd e nguse e e'pun bōob, bédusén nyé ne Edáádəŋ éche Esáá."

Yesue apūmmé

(Mak 16.19-20; Luk 24.50-53)

⁶ Pónde póg bembapɛɛ bé nlómag bōobe Yesue bēnladén hōm ahóg. Héé bésedte'é mó bānken, "Á-Sán, láá sé. Mmén mesú dōo wēbenlé bon bad bé Israel bēwōŋ ngíne ámpé ákamlen echab yál-e?"

7 Hée Yesue átímtanné bó aá, “Títée mó abenlad eche ngíne átti pónde ne mekag níme kéchéé ébenlédté. Nyéewoo’é kunze ábíi pónde eche nímén mekan mébenlédté.

8 Boŋ áde Edáádəŋ éche Esáá épií’é nyé nyékũd ngíne, hé-’aá nyékanléé bad mekan níme nyényíné tɔŋgene me á dyad á Jerusalem, á mbwóg é Judeya, ne e Samaria ésyā́l káŋ nyépē á metóŋgé mé nkòŋsé mésyā́l.”

9 Yesue amaá-’aá bó aláa nê, dɔ́o Dyòb ábélé boŋ ápúmē ámín. Ade bédii bēnɔ́nēé mó nê, mbag énkütēn mó, bēnkēnyín-naá mó ámpē.

10 Bembapēé bēmbē bētānē mĩd áte bēnɔ́nē’ ngáne Yesue ákagké ámín, dɔ́o bad bēbe ábe bēhédé mbóté éche épúbe’ bēbídé táléd, bétyéém bó á nkəg.

11 Hée ábē bad bēbe bésēdtéé bó bánken “A-bad bé Galilia, chee nyétyéémé hēn, nyénɔ́nēé ámín? Anēn Yesue awē Dyòb ábélé boŋ áhídē áfínté echēn, ápúmē ámín, áfím ámbíd melemlem ngáne nyényíné akag ámín.”

Matiasē atédé etál éche Judasē

12 Hée bembapēé bé nlómag bēhídte á Ekone é Menzab, bétím ámbíd á Jerusalem. Echē eke ébédé dyam epəd é Máyl ehóg.

13 Ade bésólé á dyad-tē, bēnkē bésól á toŋ eche bédyéé’áá áte. Ene toŋ ebédé á esón é ndáb éche édé ámín. Abé bembapēé bé nlómag bēbédéé Petro, Jone, Jemse ne Andreyā, Filibē ne Tɔmase, Batolómoyo ne Matyo, Jemse, mwān awe Alfɔse ne Simɔne awē anwón kán e alon, ne Judasē mwān awē Jemse.

14 Ábēn bembapēé bégógké’áá aladen áte hóm ahóg ákáne nchoo ne bebaád, Maria, Yesue nyaa, ne Yesue baányan.

15 Mmē mesú mēn, bad ábe bēndübē Yesue bēnladén áte. Bēbédé dyam mbwókel ne móom mé bad mébe. Hée Petro átyéémé ámín áfínté echáb boŋ áhóbē aá,

16 “A-baányan, mekan níme méténléde á kálag e Dyòb métəŋgéné alón. Edáádəŋ éche Esáá énhōb á’sō é pónde á nsəl níme Dabidē tɔŋgene Judasē awē antómén bad ábe bēnkē Yesue akób.

17 Judasē abédé nhóg áfínté e syānē. Yesue ampwəd mó ábel nímén nsón melemlem nēŋgáne ámpwēdté syānē.

18 (Móné níme ánkudté áyāle ebébtéd éche ámbēnlé, anchanén mó etúú. A etúú-te wē dēn-naá ánsəŋgé dúu, awé-’e, abum ákán mó, mmii mbíd-te mó áwed.

19 Bad bésyā́l á Jerusalem bēnwóg ádén akan, né-ɔ́o bēnchəg áde hóm áwab ehób-te bán Akeldama, nédē, ‘Ndəɔb e mekií.’) ”

20 Petro ambád ahób aá, “Nēn ábēnlédé ngáne éténlédé a kálag e ngəse é Dyòb nēn bán,

‘Áde hóm áfím e’bwógen

modmod eelóó’ áhed.’

Éténlédé-’e nēn bán,

‘Mod ampée átéd eche etál é nsón.’

21 “Né-ɔ́o, éhedne’ nēn bán dépwed mod nhóg. Ane mod atəŋgéné abé mod awé abágáá ne syānē pónde ésyā́l eche echəd Səŋ Yesue ne syānē dékágé’áá mebwóg ne mebwóg,

22 bootyaa á pónde echē Jone ádúsannáá bad ápe á pónde echē Dyòb dēmbēnlé boŋ Yesue ápúmē. Mómpē atəŋgéné abé mod awé ambé mbón áde Yesue ámpuú’é.”

23 Hē dɔ́o bēpwédé bad bēbe, Josebe awē bēpwántánnáá bán Basabase (béchágé’áá mómpē bán Justuse) bó Matiasē.

24 Dɔ́o békánnēé bán, “A-Səŋ ebíi mod asyā́l nlém áte. Lúméd sé mod awē épwédé áfínté e ábēn bad bēbe,

25 átéd etál nɛɛ mod a nlómag, éche Judasɛ átédte bon mwɛn átimé' éche epɛd éche ébonédé mó.”

26 Né-óó, bɛnsíd mbambú áluɛmed bó mod awɛ bɛpɛwɛdtɛ. Dóó mbambú élúmtɛ bó ápɛwɛd Matiasɛ. Né-óó, bɛmbád Matiasɛ á mesonǵé mé bembapɛɛ bé nlómag ábiníí dyóm ne nhóg.

2

Eɛ éche Edáádɛn éche Esáá

1 Ade ngande e Pentekos épédé, bad ábe bédúbpɛ Krístəə bɛsyáál bɛnɛladɛn áte hóm ahóg.*

2 Abwǵ-ábwǵ esaád émbíd ámín. Ebédé nɛɛ ekukud é ngine éche étóme'. Echɛ esaád énlón ene ndáb esyáál áte echɛ ábɛ bad ábe bédúbpɛ bɛmbɛɛ áte.

3 Hɛ dóó bényínɛ bwɛm nɛngáne muú mímɛ nwágnɛ nɛɛ e'chém ntyéémɛ mod-téé á nló-mín.

4 Edáádɛn éche Esáá émpíí bó moosyáál, mod-téé ábootéd mehób mé bad bɛmpɛe ahób mímɛ béesebɛɛ ayáge. Edáádɛn chóó élyágtɛ'áá bó áhób kéchéé éche bɛhóbɛ'áá.

5 Enɛn pónde bad bé Israel ábe békánáá Dyób bɛbédé á Jerusalem. Abɛn bad bɛmbíd mebwóg ne mebwóg á nkǵnsɛ.

6 Awóg áde bɛwógé échɛn esaád, ndun e mod enɛladɛn áte wɛɛ ábɛ bad ábe bédúbpɛ bɛbédé. Yál enkóm bó áte bwámɛwam áyále ngáne bad ábe bédúbpɛ bɛhóbɛ'áá ábiníí bad bó mod-téé áchɛmɛ' échɛ ehób.

7 Ne nkǵmtɛn ní yál áte, bɛnsɛdéd bán, “Kínɛ saá á mbwóg e Galilia ábɛn bad bɛsyáál bɛbíde-yɛ?”

8 Chán-nó ébɛnlédɛ bon syáá mod-té áwógɛ' ngáne bɛhóbɛɛ éche ehób.

9 Átíntɛ e syánɛ, baahóg bɛbíde á melon mé Patia, Média ne Elam; melon mé Mesopotemia, Judeya ne Kapadosia; melon mé Ponto ne mé Esia,

10 melon mé Frigia ne Pamfilia, alon á Egipto ne mebwóg mé alon á Libia, bɛnɛn ne Sirine syánɛ bad behóg debíde á dyad á Roma.

11 Átíntɛ e ábɛn bad bɛsyáál donǵe achyáádtɛ ne bad bé Israel, ábiníí-'ɛ bad ábe béesɛ bad bé Israel ábe bɛhíde' adúbe á bad bé Israel. Syánɛ bad behóg debíde á alon á Kret ne á alon dé Arebia bon kɛnɛ, syánɛ mod téé awóge ngáne bɛhóbɛɛ áwe ehób-te ndale é mekan éche Dyób ábɛlé.”

12 Yál enkóm bó áte bényáǵ-kɛ bwámɛwam, bɛsɛdtɛ nhóg ne aníníí bánken, “Chán nɛn ádíí-yɛ?”

13 Kénɛ, donǵe á bad bɛwɛlé'áá bad ábe bédúbpɛ, bɛhóbɛ bán bɛmáá mím amwɛ.

Póle eche Petro

14 Héɛ Petro átyéémɛ ámín átíntɛ e ábiníí bembapɛɛ bé nlómag dyóm ne nhóg, áchágtɛ ehób, álangɛ ndun e mod echɛ embɛ áhed áá, “A-baányan bé Israel ne nyɛ baasyáál ábe nyɛdyɛɛ á Jerusalem, nyélám metúu níláa nyɛ ngáne nɛn ádíí.

15 Abɛn bad bɛmɛwɛdɛɛ mím ngáne nyéwɛmtannɛ. Bɛn é'dii bɛɛɛb ngón abog é mbwɛmbwɛ ngɛn.

16 Bon nɛn ábɛnlédɛ ntíined ne e'yale ábe nkal é edáádɛn Joel ánhóbɛ áá,

17 Dyób áhóbɛ nɛn áá,

‘A e'pun bé asóg,

mélóm échɛm Edáádɛn éche Esáá épíí moosyáál.

* 2:1 Nzé móom mé e'pun métaan méntóm ámbíd e ngande e Nnyíme-ámín dóó enɛn ngande ébágáá. Echɛ epun chóó bad bé Israel bɛdyáǵé'áá ngande e mpád ní bwɛm.

Abén bãn bé bebaád ne bé baachóm bɛhãbɛ mam níme mébɛnléd á'sò é pón dé.

Echén kóddébad ényĩnɛ ndóg éche éhúú ne mɛ, abɛn bechun bé bad-tɛ bɛnaŋgé nló.

¹⁸ Nê dɛn-ɛ é mébɛnlé.

Mɛlóm échɛm Edǎǎdɛŋ níme mesú, épii ké ábɛm bembǎledɛ, bebaád ne baachóm,

boŋ bɛhãbɛ mam níme níhúú ne mɛ, níme mébɛnléd á'sò é' pón dé.

¹⁹ Mɛlúméd menyáké ádyõb

nlúmed-tɛ e'chemléd á nkõŋsɛ.

Mekii mɛsyógé, muú níchodɛn, mwɛntud-tɛ níbide'.

²⁰ Etondɛɛ ákwɛ ehíntɛn,

ngɔn-nɛ éyág nɛé mekii.

Mmɛn mekan mébɛnléd epun embáá é ehúmé é Sǎŋgú édɛhób bán épag.

²¹ Ene pón dé kɛnzéé awé akwɛntɛné aá Yesuɛ adé mós Sǎŋgwéé áküd e'soosõŋ.'

²² Petro ambád ámpɛ aá, "A-bad bé Israel, nyélám metúu nyéwógɛn chóm éche níhɛdɛé ahób. Dyõb dɛmbɛl Yesuɛ mod a Nazaret ábɛl ndǎle é mekan mé menyáké ne e'chemléd álúmed nyé nɛn aá mós mwɛn-nɛé mólómɛ mós. Nyéhɛn nyébii nɛ bwám áyǎle nɛn áfíntɛ echɛn dǎo nɛ dɛmbɛnléd tɛ.

²³ Dyõb dɛmmad abii, ámad-tɛ atii nɛn aá nyéwúu Yesuɛ abɛ áde nyɛmbɛ mós á mekáá mé bad bé ekoyí, boŋ bɛbõmɛ-ɛ mós á awóg.

²⁴ Boŋ kɛnɛ, Dyõb dɛmpuúid mós, ahúd mós á metuné mé kwééd, áyǎle kwééd éehɛle'áá-sɛ éhaŋ mós.

²⁵ Dabidɛ anhób tǎŋgene mós aá,

'Nnyínɛ'áá Sǎŋgwéé áwɛm á'sò-tɛ pón dé ésyǎal.

Adé mé á ekáá émbáá, né-ɔ́, meétǎgɛɛ áte.

²⁶ Nê ábélɛ nlónɛ ne menyinɛ

nkale-ɛ pǎle ne menyinɛ mɛsyǎal.

Echem yǎl-lɛ ámpɛ éwǎlé e'lyág bé nlém abé áde nídíí á alongé.

²⁷ Áyǎle wéemwǎá-sɛ edǎǎdɛŋ échɛm émǎānɛd á mbwóg e kwééd, wéemwǎá-ɛ wɛ ndim níme awõŋ mbǎledɛ níbɔ́ á son-tɛ.

²⁸ Elúmté mɛ menzii níme nípɛnɛ' alongé, abé áde wɛbɛɛ-ɛ mɛ á akéb mɛbɛ menyinɛ.'

²⁹ Petro ambád ámpɛ aá, "A-baányan, nlǎŋge nyé ne aláa dɛn nɛn mɛé Dabidɛ awesyǎnɛ sáá ambáá, anwé. Bɛnlímɛ mós, echɛ sonj edé-ɛ hɛn kǎáŋne chii.

³⁰ Dabidɛ abédɛɛ nkal é'dǎǎdɛŋ, ambíí-ɛ chóm éche Dyõb dɛnhõbpɛ aá mósɛbɛ mós. Dyõb dɛmmwɛ melɛ nɛn aá mós tɛd mwǎn á mbyaa níme Dabidɛ móbɛl mós kǎŋ melemlem nɛŋgǎne Dabidɛ ámbɛɛ kǎŋ.

³¹ Dabidɛ ammád anyín á'sò é' pón dé, dyam áde Dyõb dɛbɛnlé, né-ɔ́, anhób mam tǎŋgene mpuu níme Ane-awé-Béwóg tɛ. Anhób aá, 'Dyõb dɛnkɛmmwǎá aá ámaaned á mbwóg e kwééd, ndim ménkɛmbɔ́-áá mós á son-tɛ.'

³² Ane Yesuɛ mós-'áá Dyõb ápuúdtɛ, sé moosyǎal sɛdɛ-ɛ mbõŋ bán apuúdé.

³³ Dyõb ábágé mós atii dé edúbé áwe ekáá émbáá. Abágé-ɛ mós Edǎǎdɛŋ éche Esáá éche ánhõbpɛ aá mósɛbɛ mós. Yesuɛ mós-ɛ abágé sé échɛ Edǎǎdɛŋ, chǎ-'áá ékáá boŋ nyényínɛ', nyéwõgɛ-ɛ kéchéé échɛ ébɛnlad chii.

³⁴ Debíí nɛn bán Dabidɛ enkɛmpumɛé, boŋ kɛnɛ anhób aá,

'Sǎŋ Dyõbɛ anlǎá awem Sǎŋgwéé aá,

Dyɛé áwɛm ekáá émbáá,

35 kááñne á pónde echê mébenlé bonj ékəgtéd ábōñ bad bé ekəyí ámín ne mekuu.’”

36 Petro ambád ahób aá, “Né-óó, nyé bad bé Israel bésyāāl nyékonj abii nén bán anén Yesue awé nyébómmé á awog mwēn-naá Dyōb dēmbenlé ábē Sāngwéé mō-’áá adé Ane-awē-Béwógté.”

37 Awóg áde ábē bad béwógé pōle eche Petro, entagéd bō á mewēmtēn-té bwāmbwam. Héé béseđtēé Petro ne abiní bembapēé bé nlomag bánken, “A-baányan, cheé-ō sətāngéné abel?”

38 Petro antimén bō aá, “Nyémod-téé nyétimēn Dyōb, nyéteđe alongé dé mbéb bonj nyékud edusen á đin áde Yesu Krístəə, ábel nén Dyōb álagsen nyé mbéb Dyōb dēbē-’ε nyé echê nde, Edəəđəñ éche Esáá.

39 Nyébii nén bán chōm eche Dyōb áhóbé aá mōōbe nyé éđii áyāl echēn ne áben bán ébē-’ε ké áyāl e bad ábe bédé nchabnede. Edé ne moosyāāl awé Sāngwéé ádeđ Dyōb, áchēnlé ábē ne mō.”

40 Petro anléb bō, aláá-ε bō mekan mémpēe híin. Ansím bō etúu áte ahób aá, “Mod-téé ásonj áde alongé, ésebé nē, né Dyōb dəkōgsen nyé melemlem ngáne ákōgsēnnē enén nyonjəl e ebébtəd.”

41 Bad híin béndübē dyam áde Petro ánhōbpē bédusén-ne bō. Mmē mbwe mesonjé mé bad níme mémbad ámín e bad ábe béndübē, mébédé dyam e’kálé é’láán.

42 Bēmbané nlém áyáge mekan níme bembapēé bé nlomag béyógté-’áá bō, bébē-’ε nlatēn ne bad ábe bédübpē Krístəə. Bōōbōó békānnē’, bédyāg-ke ndyééd hōm ahóg.

Nlatén mī bad ábe bédübpé

43 Bembapēé bé nlomag bēbélé-’áá menyáké, bélümtē-’ε e’chemléd híin. Kénzég awé annyín antágé nsəl áte.

44 Bad bésyāāl ábe béndübē Yesue bēmbē bēkeene’ nlatén á’sō. Chōm-tē-’ε éche mod ánwōngē ébédé é moosyāāl.

45 Bésómáá-’áá bwēm, békāb ne mod-té ngáne ántōgnēnnē.

46 Béyógté-’áá aladen hōm ahóg epun-té á Ndáb-e-Dyōb ákáne. Bédyáge-’áá ndyééd hōm ahóg áwāb mendáb ne nlém nhóg ne menyinge mésyāāl.

47 Békéné-’áá Dyōb, bad bésyāāl béwóón-ne bō nlém mī bwām. Epun-tē-’ε Dyōb ábáđáá bad ábe békúde’ e’sósonj ámín e mesonjé mé bad ábe bédübpé.

3

Petro achōñté mod awē awéde eped

1 Mbwe nhóg Petro bō Jōn békáge-’áá á Ndáb-e-Dyōb. Nén ábédé á ngāñ é’láán é müte, pónde echê bad béyógté-’áá áke á mekáne.

2 Mod nhóg mō-’ε ambé á mmwe mé eyáde é Ndáb-e-Dyōb. Bécháge-’áá nímé mmwe bán, Mmwe níme Mbóó. Ane mod anwé eped se áde béchyáá mō. Epun-té bépémé-’áá mō, bēbānē mō á mmwe hē, áchōmē mōné wéé bad ábe békáge-’áá á Ndáb-e-Dyōb.

3 Anyín áde anyíné Petro bō Jōn bésále’ á Ndáb-e-Dyōb-te, anchóm bō nde.

4 Dōó bēnənéé mō chóónj, bonj Petro áhōbē aá, “Nóné’ sé!”

5 Héé ane mod ánóné bō ne mewēmtēn nén aá mōókūd chōm áwāb.

6 Dōó Petro áhóbéé aá, “Meewóó-’ε mōné ké nhóg bonj chōm éche níwóó chōó mbéé wē. A đin áde Yesu Krístəə a Nazaret, hidé áse, ékag!”

7 Dōó Petro áchánjé ane mod ekáá émbáá, bonj áwōngān mō átyéem ámín. Ábwōg-ábwōg mekuu ne mekoge nímé ane mod ménwēdned.

8 Anhēb, atyéem ámín, ábootéd-te áke. Ansíl á Ndáb-e-Dyōb ne Petro bō Jōn, ákag, áhebé’ ámín, ábagé-’ε Dyōb mekenag.

⁹ Bad bésyāāl ábe bébéde áhed bényīn nées ákagké ákēmtē-’ε Dyōb.

¹⁰ Bēnchem mós bán mós abédé mod awē adyē’áá á Mmwε nīme Mbóó nī Ndáb-e-Dyōb áchōmē bwēm. Yāl enkóm bó áte, bébé-’ε menyáké ne dyam áde ábēnlédé ne mós.

*Pśle eche Petro dhóbe
á Ndáb-e-Dyōb*

¹¹ Yāl enkóm bad bésyāāl áte ábe bémbē á Ndáb-e-Dyōb. Né-óó bēnnyāgéd béke bétán Petro bó Jōn á abebpē á Ndáb-e-Dyōb áde bēchágé’áá bán Abebpé áde Solomonε. Ene pónde ane mod awē Petro bó Jōn bēnchoódté, ambé áhídé bó.

¹² Ade Petro ányíné ábē bad, anláá bó aá, “A-bānned bé Israel, cheé ékás bóñ nēn ákōmtē nyé yāl áte? Chán-nō nyénōnēé sé nē? Nyēwēmtan nēn bán échēd ngīne chēn, ké’ε asāñ adé sésáá á’sō é’ Dyōb dōo ákás bóñ sébel anén mod ábootéd akε-yε?”

¹³ Dyōb áde Abrahamε, Aisigε ne Jakōbe bébenléé, nédē Dyōb adé ábēd betaa, álúmté ehúmé éche awe mbāledε Yesuε. Nyēmbε mós á mekáá mé benkamlenε, nyēbán-’ε mós áyāl á’sō wēε Payledε. Ké áde Payledε ánwēmtēnné mós atēde, nyēmbé nyēbán mós áyāl.

¹⁴ Abédé mod awē asáá, abé-’ε ane awē abele mekan nīme métāngéné, bóñ nyēmbāñ mós áyāl. Nyētīm nyécháā’ Payledε bán áchenned nyé mod awē awúε’ bad.

¹⁵ Né-óó nyēnkāñ bēwúú mod awē apiinad bad alongé á mbāle, bóñ Dyōb dēmpuúd mós. Sébēn sēnyínné nīmē mekan dīd.

¹⁶ Anén mod awē nyényínéé nēn, awē nyébíí-’ε bwām, ngīne echē dīn áde Yesuε áwóó ne adúbe áde áwóó ne adúbe áde áwánlé áyāle adé dīn, dōo ábágé anén mod awē anwé eped ngīne, ádíd-’ε mós bwām. Nyé bēn nyényíné-’ε.

¹⁷ “Bōob-pōó, a-baányāñ mbíí nēn meé, kéchéé éche nyáābe áben belyáged nyēmbēnlé Yesuε, nyēmbēl chō áyāle nyēnkēmbíí’ε chōm éche nyébeleé.

¹⁸ Kénéé ébēnlédé-’áá nē, Dyōb dēn dōo álónté ábē e’yale se’ bóód áde ánlāá’ε bekal bé’daádāñ bésyāāl áá bēhōb bán Ane-awē-Béwógté ákūd metake.

¹⁹ Né-óó, nyétēde áden abé dé mbéb, nyétimēn Dyōb ábel bóñ ábóded nyé mbéb.

²⁰ Nzé nyébelé nē, né pónde épē echē Sāngwéé áhóódté nyé nlém. Ene pónde-’áá álómēé nyé Ane-awē-Béwógté, nédē Yesuε, awē ápwédte nyé.

²¹ Yesuε atāngéné asébe dé adyεε ádyōb kásñ pónde épe echē Dyōb déhāñlénne mekan mésyāāl bóñ métim ekóólé. Nēn dōo Dyōb dēmbēnlé se’ bóód áá bekal bé’daádāñ ábe bésáá bēláa bad.

²² Moseε mwēn anhób aá, ‘Sāngwéé awē adé áden Dyōb ápwédé nyé nkal é’daádāñ áfínté e ábēn bad melemlε nēε mε. Nyébel chōm ésyāāl éche álangé nyé aá nyébel.

²³ Kénzēé awē eewógne ane nkal é’daádāñ, Dyōb déhūd mós áfínté e bad bé Dyōb abóded-’ε mós.’

²⁴ Bekal bé’daádāñ ábíníí ámpē bootya Samwεle ne ábe bēmpē ámbíd echē, bó moosyāál bēnwālē nlébtéd, bēhōb-pε mekan nīme mébenléd nīmēn mesu.

²⁵ Dyam áde Dyōb dénhōbpē mbwiined ne bekal bé’daádāñ abédéé áyāl echēn, nyēmpē nyēwóó-’ε akab áyāle melé nīme Dyōb démmwēé ne ábēn betaa. Dyōb dénlāá Abrahamε aá, ‘Mēnaméd moonyōñ asyāāl á nkōñsé mbwiined ne nīmōñ nchyáátēn.’

²⁶ Né-óó, Dyōb dēmpwéd awē mbāledε. Ade ápwédé mós, áwēn dōo ánsēbēé mós álóm ánamed nyé ábel áde ábenlé bóñ nyétēde nīmēn mbeltéd mé mbéb.”

4

Kóte ekaádté Petro b́ Jón

¹ Petro b́ Jón bédii békánlé'áá bad mekan, d́o nguse é beprise ne mod ambáá a plúse a Ndáb-e-Dyõb, ne nguse e Besadusia bépédé ẃe bémbéẽ.

² Bënliñ áyale ábê bembapere bé nlomag bébe béyágté'áá bad bán Yesue apuúdé, eche élúmte nén bán bad ábe béwédé bébê á alongé ampê.

³ Bénkõb Petro b́ Jõne béhé b́ á mbwõg. Ngáne b́n b́mmadté ahín, bémbé áhed ḱáñ ne mbwẽmbwẽ.

⁴ Kénéé b́nkõbpé Petro b́ Jõne, ndun e mod eche enwóg mam míme békánlé'áá b́, endúbe. Mesongé mé bad ábe bédúbpé ménchagé mépê dyam e'kálé é' bad é'táan.

⁵ Néé b́n é'sángé, benkamlene bé Israel, bad bémbáá bé dyad ne bemeléde bé mbéndé b́nladén áte á Jerusalem.

⁶ Anase awé abédé prise ambáámbáa ambé áhed, ne Kaifase, Jõne, Alesandaa ne bad b́mpêe ábe bédé á túmbé echê Prise Ambáámbáa.

⁷ Béntfi Petro b́ Jõne áwab e'sõ-te, boñ b́sẽdté b́ bánken "Chán nyémwédé anén mod awé anwé eped bwám adid? Ngíne ne d́n áde nzéé nyébénlédé?"

⁸ Héé Edaáðan eche Esáá épíídé Petro, élon-ne mó áte. D́o áhóbéé áá, "A-benkamlene ne bad bémbáá bé dyad,

⁹ nyéchagé sé h́n chii ákáad sé áyale mboñ míme sébénlé anén mod awé anwé eped ne ngáne ámwédé bwám adyere.

¹⁰ Nyé bad bé Israel nyébii-õ nén bán anén mod awé atyéémé nyé á'sõ-te adyee bwám á ngíne e d́n áde Yesu Ḱristaa, mod a Nazaret. Nyémbomé mó á awõg boñ Dyõb démpuú mó.

¹¹ Mó adé ane awé éténlédé á kálag e Dyõb áyál echê nén bán, 'Aláá áde belón bé ndáb b́nchenéé d́o átímé aláá dé etógnén.'

¹² "E'soõson béesaá ne mod ampée éetóméé Yesue, áyale d́n démpêe déesaá á nkõñse-te ẃn áde Dyõb ábágé moonyon áde átàngéné syané ason."

¹³ Bõõb-põõ, yál enkóm bad bé kóte áte ányín nén bán Petro b́ Jõne béhóbé ésebán mbwõg ké nhóg rídé b́ áte. Bénsõñtên-ne nén bán bédii bad bé ngên ábe béeyágbé kálag embáá. D́o béchéme nén bán bõõ bébágé'áá pónde ésyáal ne Yesue.

¹⁴ Boñ ngáne b́nnyínné néé mod awé Petro b́ Jõne b́nchoódté atyéémé áhed ne b́, dyam dénkẽmboñgé b́ ahób.

¹⁵ Né-õõ, b́nláá b́ bán bébíd á ndáb e kóte. Bébidé-'áá b́, b́n ne b́n bébootéd akal,

¹⁶ b́sẽdté bánken, "Chán débénlé ábén bad? Moosyáal á Jerusalem abii áá bõõ bébélé enén ndale e menyáké. Deéhẽẽ-se dehób bán béebelé.

¹⁷ Boñ detàngéné ábén bad etúu asím áte nén bán bésõg bad akale tângene Yesue, ábel boñ mímén nkalan méekanlád se nkağ á'sõ."

¹⁸ D́o béchénlé b́ ámbid ampê boñ b́símé b́ etúu áte bán béehedéé awóg ampê mbéd néé béhóbéé ké'ẽ béyágtéé á d́n áde Yesue.

¹⁹ Boñ Petro b́ Jón b́ntimtén b́ bán, "Nyé b́n nyéhõb chõm-éé étàngéné á'sõ é' Dyõb. Awógen nyé káa áwógen Dyõb?"

²⁰ Áyale sé pen séehẽẽ-se sédib nsal bán séekanlé mam míme sé b́n sényínné did séwógen-ne etúu."

²¹ Bad bé kóte b́nlyõg b́sím b́ etúu áte ngíne ngíne. Ámbid ené b́nchené b́, áyale b́nkényínné nzii echê béhele békágsén b́ áyale bad b́syáal békémté'áá Dyõb tângene dyam áde ábénlédé.

²² Mod awě menyáké mēmbɛnléd-té áyāl boŋ ádyɛɛ bwám antóm móom mé mwě méniin.

*Bad abe bédúbpé békáñne bán
Dyòb abe bó e'wéd bé nlem*

²³ Ade bad bé kóte bétéd-té Petro bó Jone, bēnkě echoŋ é bad bé Krísto atán, beláá bó mam nime beprise bémháá ne bad bémháá bé kóte beláŋgé bó.

²⁴ Ade abé bad bé Krísto bėwógé nē, bēnlād nsal ákáne. Bēnlāā Dyòb bán, “Títée, wé awě ehagé nkoŋ ní mín ne ní sé, edíb é nkwě ne bwēm é'syāāl abe é'dé bó áte,

²⁵ wenlóm Edāádəŋ éche Esáá wée eched sán ambáá Dabide, awòŋ mbəlede wée ébel áhòb ábén e'yale nén aá,

‘Cheé ékásá boŋ bad ábe béesé bad bé Israel bélie’ bwámbwam?
Cheé ékásá-’e boŋ bad bébelé e'háké ngēn?

²⁶ Kāŋ é nkōŋsé élade yāl,

benkamlɛnɛ-’e ámpē békóbe mbom

átəŋgen Sán Dyòbe ne Ane-awě-Áwógté.’

²⁷ Ebénlédé nē dēn. Herode bó Pontus Paylede bēnkōb mbom á dyad-té hén ne bad ábe béesé bad bé Israel ne belyóged bé bad bé Israel. Bēmbel nē áhage Yesue awòŋ mbəlede awě Asáá awě Éwógté.

²⁸ Bēnkōb mbom ábel mam nime mmòŋ wēmmadté atii ne echoŋ ngíne á'sò é' pónde mébēnléd.

²⁹ A-Sán, bəəb-ɔɔ, mmòŋ énon akím áde békíméé, ébe sé ábòŋ bembəlede nlem ákal échón eyale ésebán sėwóge mbwóg.

³⁰ Lúmed echoŋ ngíne édidé bad bwám. Ebel-le séhel e'chemléd ne menyáké abel á dín áde Yesue, awòŋ mbəlede awě asáá.”

³¹ Bémáá-'aá akáne, hóm áde bēnladénné áte ánəŋned. Bó moosyāāl bēnlōn ne Edāádəŋ éche Esáá bébootéd-te eyale é Dyòb akal ésebán mbwóg níde bó áte.

Bad abe bédúbpé bėbele mekan née mod nhóg

³² Bad bėsyāāl abe bédúbpé bēnwōŋ nlem nhóg ne mewēmtɛn mehóg. Modmod eehóbe'aá aá móó mówōó échén ké'e échíní boŋ bwēm é'syāāl bēmbē bó ntéd.

³³ Bembapɛɛ bé nlómag bēmbē békale' ne ngíne esyāāl nén bán bédé mbón nén bán Dyòb ápuúdté Sánjú Yesue. Dyòb-pe démbād bó nsimé abe ámín e nsimé.

³⁴ Modmod eetóge'aá chòm átínté echáb. Pónde ne pónde té bad abé bēnwōŋ e'túú ké'e ndáb bėsómé'aá chó, bépēn nímé məné,

³⁵ bēbē bembapɛɛ bé nlómag, bó-'e bétédé'aá békáb ne mod-téé ngáne ántōgnēnē.

³⁶ Nē dáo Josebe, mod a túmbé e Levi awě béchyáá á alon á Sayprus ámbenlé. Bembapɛɛ bé nlómag bėchágé'aá mó bán Banabase, (nédē mod awě awéde bad nlem á abum.)

³⁷ Ansóm etúú, atéd nímé məné, ábe wée bembapɛɛ bé nlómag.

5

Ananiasɛ ne Safiraa

¹ Mod nhóg abédé bán Ananiasɛ, mwaád-te bán Safiraa. Bómpē bėnsóm donge á bwēm ádáb.

² Boŋ ankoó donge á məné ámbíd, mwaád-te ámpē ambii. Ananiasɛ ampéén məné nime mēnlyǎg ásé wée bembapɛɛ bé nlómag.

³ Hée Petro álángeé mó nén aá, “A-Ananias, cheé ékás boŋ ehé Satane etál weé ásól we á nlém-té. Bóob-póó, abelé we ekánlé Edaádəŋ éche Esáá metóm akoo áde ékóngé epeđ é mənə nıme ésoǵné bwēm.

⁴ Edéhób wē mósóme’ etúú ébédéé ehoŋ, áde émáá-’e chó asóm ámpē, mənə nımed nıbédéé nımōŋ. Cheé ékás boŋ etí áwōŋ nlém-té weé móbel enén nđın e akan? Saké moonyoŋ ékánlé metóm boŋ Dyób dáo ékánlé metóm!”

⁵ Awóg áde Ananiasé áwógé nén, anhún ásē, awé-’e. Mbwóg ń ngıne ménkōb bad bésyā́l ábe bənwōg ádén dyam.

⁶ Kódebad émpē áhed, bétéd mó ndım, bəkaŋ mó béke bélime.

⁷ Dyam háwa éláán ámbıd enē, Ananiasé mwaád ampē, enkəmbı́ı́é pen dyam áde ábénlédé.

⁸ Petro ansədéd mó aá, “Láa me, mənə nısyā́l mén nıme nyékúde áyāl e etúú éche nyé awoŋ nchóm nyénsōmmē-ye?” Safıraa ankwentén mó aá, “Ee, nısyā́l mē.”

⁹ Dáo Petro álángeé mó aá, “Cheé ékás boŋ nyékəgé’ Edaádəŋ éche Sánŋwéé? Nóné, bad ábe bélimmé awoŋ nchóm bóó bédé á mmwe nıńı́, bétéd-te wəmpē ndım hē bóob.”

¹⁰ Abwōg-ábwōg ane mmwaád anhún ásē á’sō-te wée Petro, awé-’e. Eché kódebad énsól á ndáb-te bényın bán amaa awé. Dáo bəbídné mó ndım á ebwóg béke bélimé á nkəg ń soŋ wée nchóm.

¹¹ Mbwóg ń ngıne ménkōb mwembé nısyā́l ne bad bésyā́l ábe bənwōg ádén dyam.

Bad bé nlómag bəbéle menyáké hiın

¹² Bembapəe bé nlómag bəbéle’áá e’chemléd ne menyáké hiın átınté e bad. Bad ábe bédúbpé-’e bəyógkə’áá abom nēe mod nhóg á Abepé á Solomonə á Ndáb-e-Dyób.

¹³ Kénée bad bəchágé’áá bó đın á bwám, bėđı́ı́ bəbáá’áá bó alaten.

¹⁴ Boŋ kénē, ekud é bebaád ne baachóm ábe bédúbpé Sánŋú Yesue, bésle’áá áwáb nlatén, mesoŋgé mé bad ábe bédúbpé rıchágke’.

¹⁵ Mekan nıme bembapəe bé nlómag bəbéle’áá mənkaŋ bad bəpēmē bad bé nkole bəbanné’ bó á nkəg ń nzıı́ á menoŋ ne á e’búm mın. Bəbéle’áá nē ne mewəmtən nén bán, nzé Petro atóme’ ké tómen échē edaádəŋ éhūn bó á yál bėdyē bwám.

¹⁶ Ekud é bad émbıd káŋne á myad nıme méde benben ne dyad á Jerusalem. Bənwālē ábáb bad bé nkole áyāl ne bad ábe e’daádəŋ bé mbéł é’tágté’áá. Bembapəe bé nlómag bəndı́d moosyā́l bwám.

Béhédé bembapəe bé nlómag á mbwōg

¹⁷ Ene pónde-’ó prıse ambáábáa ne échē ehoŋ é bad néde, bad bé epepé é Besadusia bəmbé kónjı́ bwámbwam ne bembapəe bé nlómag.

¹⁸ Bənkōb bembapəe bé nlómag, bəhé bó á ndáb e mbwōg nıme ńıde á dyad té.

¹⁹ Boŋ nımé nkıı, áŋgel e Sánŋú enhyē ekob é mbwōg adıbe ebı́deđ-te bó. Enláá bó aá,

²⁰ “Nyékag á ndáb e Dyób, nyélanŋe’ bad mam mėsýā́l t̄ŋŋene ádén alonŋé dékṓle.”

²¹ Bembapəe bé nlómag bənwōŋen ene áŋgel. Bın é’sánŋé-’áá, béke bésól á Ndáb-e-Dyób, bəbootéd bad ayáged.

Ene pónde-’áá prıse ambáábáa ne échē ehoŋ é bad, bənchēlē mbom ń mbwōg nıme ménlád belyáged bé Israel bésyā́l. A mbom hē dáo bəlóme nlébtéd á mbwōg nén bán bəpəen bembapəe bé nlómag áwáb.

22 Boḡ áde sánze épédé á ndáb e mbwḡg, bénkëntánné bembapεε bé nlómag áwéd-te. Né-ḡḡ bëntim ámbíd, béke beláá ábē bad á mbom bán,

23 “Sēpedé á ndáb e mbwḡg, sētáné ngáne bépéné chó hóm ásyāāl. Bad ábe bēnḡne mbwḡg-ke bó moosyāāl bédé wεε mod-té ánḡne mmwe mé e'ké. Boḡ ádé sédíbpé ekob, séetáné mod ké nhóg áwéd-te.”

24 Ade mod ambáá a plūse é ndáb e Dyōb ne beprise bēmbáá bēwógé nē, bényāg, bánken “Chán nén ádíí?”

25 Hē dḡo mod nhóg ápedé áhed boḡ álāngē bó áá, “Nyébii nén bán bad ábe nyénhēē á mbwḡg, bédé á Ndáb-e-Dyōb bēyágtē bad.”

26 Dḡo mod ambáá a plūse é Ndáb-e-Dyōb ábidé ne ábē bad, boḡ béke bēkōbē bembapεε bé nlómag, bēpεεné' bō. Boḡ pen bénkēnkóbēnné bó ewānge áyāle bēbáá'áá bán bad ábe bēmbē áhed bēlūm bó meláá.

27 Bēnsālēn bó á ndáb-te, bētíí bó á'sō é' mbwḡg. Hē dḡo prise ambáámbáá ábótédé bó akáad, álāngé bó nén áá,

28 “Sēnsím nyé etúu áte nén bán nyéēkεεné' ayáge áde anén mod á'sō ámpē. Bḡḡb-ḡḡḡ, Nyénḡne' chóm-ēē nyébélé. Nyébélé moosyāál á Jerusalem awógé ádén ayáge. Nyéhede-ε kwééd echē abán áwéd nló.”

29 Hēε Petro ne ábíníí bembapεε bé nlómag bétimtánné bó bán “Dyōb dḡo sētāngéné awógen, saké baányonḡ.

30 Ade nyémáá Yesue abome á awḡg, nyēwúú-ε mḡ, Dyōb áde ábēd betaa, dēmpuúd mḡ.

31 Dyōb dēnchāgēd mḡ, ábānē-ε mḡ á ekáá é mbáá nēε Nlyáged ne Nsoode. Ambēl nē ábel boḡ álúmed bad bé Israel nzii eche bēchenéé ádab abé dé mbéb boḡ Dyōb álagsén bó.

32 Sébēn sēnyínné nímén mekan díd. Edáádāḡ eche Esáá chómpē ébide' mbōḡ. Chó-áá édé nde echē Dyōb ábageé bad ábe bēwógé mḡ.”

Elébé eche Gamaliel

33 Ade mbwḡg eche endyεé áse éwógé nē, bēnlin bwāmbwam kóāḡ bēhedé-ε bán bēwúu bembapεε bé nlómag.

34 Boḡ mod a mbwḡg nhóg áfíntē echáb, awē bēchágé'áá bán Gamalielε antyéém ámín. Anén mod abédεε Farisia, abé-ε meléede a mbéndé awē bad bésyāāl bēbágé'áá edúbé bwāmbwam. Anhób áá bésébe bēbídēn ábē bembapεε bé nlómag á ebwḡg.

35 Dḡo álāngéé bad bé mbwḡg áá, “A-baányonḡ bé Israel, nyétéd pónde ne chóm-ēē nyéhedeé ábén bad ábel.

36 Eēchābēē áte áde mod awē bēchágé'áá bán Tiodase ábidáá dúu, ákumé' ekáá á tál áá módē mod. Bad ábe bēnhíd mḡ ámbíd bēbédé dyam mbwḡkel éniin. Boḡ kóāḡ ne á asóg bēnwúu mḡ, ábē bad-te bēpántéd áte, échē epepé chó-ε ébḡḡ.

37 Ámbíd e pónde, mod awe bēchágé'áá bán Judase mod a Galilia mómpē ámbíd á pónde e tóngé. Ámbēl ndun e mod enhíd mómpē boḡ kóāḡne á asóg bēnwúu mḡ, ábē bad-te bēpántéd áte.

38 Bḡḡb-ḡḡḡ, áyāle ádén dyam, nlānge nyé nén mēé nyéte de ábén bad békag, nyéēbēlε bó dyam. Áyāle nzé édé nén bán nímén ntii kéε ádén dyam áhúú ne moonyonḡ, né dēn dékwē.

39 Boḡ nzé édé bán áhúú ne Dyōb, né nyéehenlé bó dyam ábel, né kóāḡne á asóg nyéēnyín bán Dyōb dḡo nyétāngánné.”

Bad bé mbwḡg bēnkōb elébé eche Gamaliel

40 Hēε bēchénlé bembapεε bé nlómag bán bēsāl á ndáb. Bēnkūdē bó, bésím-ε bó etúu áte bán bēhedéé awóg ámpē nēε bētúbéé dīn áde Yesue. Dḡo bétédte bó bán békag.

41 Bembapεε bé nlomag bényasáá á'só é' mbwóg. Bémbe menyinge ányín nén Dyób ányiné áá békwoǵnéde ákud akwáké á dín áde Yesue.

42 Epun ne epun-té békágé'áá á ndáb e Dyób ne á ndáb é bad, béyāgtē bad, békale-'ε nkalanj míme Yesue, Ane-awě-Béwógté.

6

Mwembé mépwéde bad saámbe áwóngen

1 Bóob-póó, ngáne mesongé mé bad ábe bédúbpé méchágké'áá acháge ne acháge, nswan̄ten mémbíd áfínté e bad bé Israel ábe béhóbé'áá ehób é Grikia ne ábe béhóbé'áá ehób é dyad. Bad ábe béhóbé'áá ehób é Grikia béhóbé'áá bán ábāb bekúid béekudéé akab á mōné áde békābpāá bekúid epun-téé.

2 Héε bembapεε bé nlomag dyóm ne bébe béladéé bad ábe bédúbpé bésyāāl áte bonj bélāngē bó bán, "Eeboo' é nén bán sétede akal dé eyale é Dyób ábel bonj séhíde nkabted ní mōné ámbíd.

3 Né-óó, a-baányarj nyépwed bad saámbe áfínté echên, ábe béwóó edubé, ábe Edááðanj éche Esáá élyógtéé, bébii-'ε akan, ábel nén sébane mímén ntíi áwab mekáá.

4 Ene pōndé séébé eched yāl esyāál ákáne ne ákal nkalanj ní bwām."

5 Moosyāál anwóg menyinge ne dyam áde bembapεε bé nlomag bénhōbpē. Né-óó, bēmpwēd Stefanuse. Abédéε mod awě andúbé bwāmbwam. Edááðanj éche Esáá-'ε élyāgtē mó. Bēmpwēd káōne Filibe, Prokorose, Nikanoo, Timone, Pamenase ne Nikolause. Nikolause abédéε mod awě ámbíd á dyad á Antyog, eebédeé mod á Israel bonj antimé adúbe á bad bé Israel.

6 Bēmpēén áben bad á'só wéε bembapεε bé nlomag. Bembapεε bé nlomag bēnkānnēd bó bébán-ne bó mekáá á nló.

7 Né-óó, eyale e Dyób émbē ékanlād mbwóg áte esyāál ékäg á'só. Mesongé mé bad ábe bēndúbē á Jerusalem méchágké'áá acháge ne acháge. Ekud é beprise chómpē émbóotéd nkalanj ní bwām ahíd.

Békóbe Stefanuse

8 Bóob-póó Stefanuse abédé-éé mod awě áde alonjé álúmté'áá nsimé ní Dyób bwāmbwam. Awónj ngíne ábel ndale é mekan é menyáké áfínté e bad.

9 Bonj baahóg bēmbóotéd mó apentēn. Abē bad bébédeé bad ábe bēmbíd á echon é bad éche émmētén ake á ndáb e mekáne eche béchágé'áá bán ndáb e mekáne e betān ábe bēnkēmbé betān ámpē. Abé bad bébédeé bad bé Israel ábe bēmbíd á myad mé Sirine ne Alesandria. Bóobe bad bé Israel bēmpēe ábe bēmbíd á mbwóg e Silisia ne e Esia, bēmbóotéd aswan̄ten ne Stefanuse.

10 Bonj Edááðanj éche Esáá émbē mó nyaa e debyéé eche nzé anhób dyam, béhele áá dō apele.

11 Né-óó bénsāl baahóg áte bán béhōb nén bán "Séwógé néε Stefanuse ásyāáé Moseε, ásyāā-'ε Dyób."

12 Né-'áá bēmbēnlé bonj békón bad bé dyad, békón bad bēmbáá bé dyad ne bemelēede bé mbéndé. Héε békóbe Stefanuse bonj békēnéé mó á'só é' bad bé mbwóg.

13 Hé-'áá bēpééne bad ábíd mó mbónj é metóm. Abē bad bénhōb nén bán, "Anén mod ahóbe' mekan mé mbéb pōndé ésyāāl tāngene Ndáb-e-Dyób éché esáá ne tāngene mbéndé eche Dyób ábágé syáné.

14 Séwógé néε áhóbeé áá ane Yesue, mod á Nazaret, āpān Ndáb-e-Dyób áhānjén-ne e'lem ábe Moseε ályágnéde syáné."

15 Bad bésyāāl ábe bébédeé á ndáb e mbom bēnsūm mīd wéε Stefanuse. Bēnyín néε e'só é'peneé mó néε e'só é' ángel.

7

*Stefanusɛ abɛnlédé myarǵó
mí bad bé Israel ákǵá*

¹ Prise ambáambáa anse déd Stefanusɛ aáken, “Mmén mekan mésyǵǵál níme ábɛn bad béhóbé wɛ áyǵl, médé mbále-ye?”

² Dóo Stefanusɛ ábóótédé bad bé káánsɛl pǵle akale. Anhób aá, “A-baányan ne besáá ábɛm, nyélám metúu. Dyób dé ehúmé dɛmpíi echɛd sǵn Abrahamɛ áde ábédé á mbwǵg e Mesopotemia, adɛhób aá mókag adyɛɛ á dyad á Haran.

³ Dyób dénláá mó aá ‘Tɛdé echoŋ túmbé, ɛtɛde-ɛ ádoŋ aloŋ ɛkag á ndoob eche mɛlúmɛdtɛ wɛ.’

⁴ Né-óó, Abrahamɛ antɛdé ndoob e Kaldeya áhyɛ ádyɛ á dyad á Haran. Ambíid e kwééd eche Abrahamɛ sáá, Dyób dɛmbɛl Abrahamɛ áke ádyɛ á ndoob eche nyédíi áhed nɛn bɔob.

⁵ Ene pón dé Dyób dénkɛmbáá Abrahamɛ ké ábɛn á ndoob eche ándáasɛnnɛ mó. Boŋ pɛn Dyób dénhób nɛn aá ene ndoob ɛsuuned bó níme mbyaa. Pón dé eche Dyób dénláá-ɛ Abrahamɛ nɛ, eenkɛnwálɛɛ mwǵn ké nhóg.

⁶ Dyób dénláá mó nɛn aá, ‘Mmóŋ mbyaa mɛbɛ beken á aloŋ á bad bémpɛe. Awed-taá bɛbɛɛ betǵn, békúd-tɛ metuné etún é pón dé ɛche édé dyam mbwǵkel é mwɛ ɛniin.

⁷ Boŋ mɛkǵgsɛn ádé aloŋ á bad áde bɛbɛnlɛɛ néɛ betǵn. Ambíid enɛ, nímóŋ mbyaa mɛbíid á aloŋ-tɛ wɛ, bɛtɛm áyǵl é ádɛn abwǵg á hóm, békǵnnɛ á dɛn ádɛm áhed.’

⁸ Héɛ Dyób ábɛlé boŋ Abrahamɛ ápɛ á nchemtɛn ne mó tǵngɛne ngáne béyagɛɛ bad, nɛngáne e’chemléd bé mɛlɛ níme Dyób ámwédé ne ábɛ bad. Né-óó, Abrahamɛ an’yǵg awe mwǵn Aisigɛ ámbíid e e’pun saámbé áde béchyáá mó. Aisigɛ mó-ɛ an’yǵg awe mwǵn Jakɔbɛ, Jakɔbɛ mó-ɛ áyǵg ábe bǵn dyóm ne bɛbɛ ábe bédé ábɛd betaa.

⁹ “Ábɛ betaa bɛnwóon mwǵnyan nhóg, Josebɛ kónji á nlem-tɛ. Né-óó, bénsóm mó nɛngáne ntǵn. Bad ábe bénsómmɛ mó áwáb, bɛnkɛén mó á aloŋ á Egipto. Boŋ Dyób dɛmbɛ mó ámbíid,

¹⁰ ábɛl-lɛ atóm metake mésyǵǵál áte. Dyób dɛmbɛl Farao kǵn e Egipto anwógɛn Josebɛ menyɛŋgɛ ábɛ-ɛ Josebɛ débyɛɛ, áde ápédé áwe á sɔ. Nɛn dɛmbɛl Farao ambɛ Josebɛ atii á ngómenaá ámɛn é aloŋ ne ámɛn é ábɛ bwɛm é’syǵǵál.

¹¹ Ambíid enɛ, nzaa e ngine empɛ á aloŋ á Egipto ne á aloŋ á Kanahan. Ene nzaa empɛɛn metake mé ngine, ábɛd betaa bɛnkɛnwóŋ-’aá ndyééd eche bédyǵkɛ.

¹² Né-óó, áde Jakɔbɛ áwógé bǵn ndyééd edé á Egipto, anlóm ábe bǵn áwed. Nédé ábɛd betaa. Nɛ dóo ábédé bó ngen e’só áke áwed.

¹³ Ade bǵn ábe Jakɔbɛ békíi á Egipto ngen ɛche élóntɛné ɛbɛ, Josebɛ ampálɛ yǵl áte wɛɛ baányan. Hé dóo Farao ásóŋtɛné tǵngɛne túmbé echɛ Josebɛ.

¹⁴ Né-óó, Josebɛ anlyǵtɛn baányan aá bɛláa sáá Jakɔbɛ, áhyag ne eche túmbé esyǵǵál á Egipto. Bó moosyǵǵál bɛbédé móom mé mod saámbé ne bɛtǵan.

¹⁵ Dóo Jakɔbɛ bó moosyǵǵál békíi á Egipto. Awed-taá mó ne ábe bǵn, betaa ábe syǵnɛ bɛndyɛɛ’ɛ kóŋ béwɛ-ɛ.

¹⁶ Ambíid e nɛ, bɛntɛd bó ndim bɛsúɛn ámbíid á dyad á Shekem, bɛlímé mó áwed á ndoob echɛ Abrahamɛ áchanɛnnɛ mɔné wɛɛ bǵn bé túmbé e Hamɔ.

¹⁷ “Ade pón dé ékwógé apɛ echɛ Dyób délónɛdtɛ dyam áde ánláá’ɛ Abrahamɛ aá móóbɛl, mesongɛ níme ábɛd bad ábe bɛbédé á Egipto mɛmmǵd acháge bwǵmbwam.

18 Κάθηνε á asóg, k̄η empée echē enkēmbíi myaṅgó míme Joseβε, emp̄ē á nkaml̄en.

19 Anw̄ōṅ akw̄ab t̄aṅgene ábēd betaa átagtē-’ε bó. Ank̄η βétēdē ábab bán á ebw̄óg, ábel boṅ béwē.

20 Mm̄ē mesú d̄óo béchyáá Mos̄εε. Abédēē mw̄an awē ambōṅ bw̄ambwam. Bēntōgēn m̄ó á ndáb w̄ēε sáá á et̄un é ngon éláan.

21 Ambíd enē d̄óo βétédte m̄ó á ebw̄óg-te. H̄ēε mw̄an a mm̄waád awē Farao ádíbtē m̄ó, átēdē m̄ó ngáne awē mw̄an, átoṅné-’ε m̄ó k̄óṅ ákwogé’.

22 Bén’yāgēd Mos̄εε debyéé á bad bé Egipto ásyāal k̄óṅ abé ndale e mod á nh̄óbtéd ne á mbeltéd.

23 “Ade Mos̄εε ápédé móom mé mw̄ē ménin, mewēmten mēmpíi m̄ó áke dényín baányan βé Israel.

24 Antán ngáne mod a Egipto átagtēé mw̄ányan nh̄óg. D̄óo ákíi áhed átimten. Anw̄ōṅēn m̄ó áwúé-’ε ane mod a Egipto.

25 Mos̄εε anwém̄tēn aá ábē bad béchem n̄ēn bán Dyōb áhede m̄ó abenled áhúb b̄ó á mekáá mé bad bé Egipto, boṅ βénkēnyínné nē.

26 Epun éche ébádténé, antán ábē bad βé Israel bébe b̄ēn ne b̄ēn béwane’. Anh̄ēd nzii eche áyālēε bó ákóm nsarj. D̄óo álāṅgēε bó aá, ‘Eesaá mbále bán baányan b̄óo nyédíi-yε? Chán-n̄ó nyé mod-té áhedeé waáb alógen?’

27 Boṅ ane mod awē ahedé’áá waáb alógen nē, antínéd Mos̄εε á nk̄ag ásedtē m̄ó aaken, ‘Nzé-módé abagē kunze aá ékamlan ne ákáad sé?’

28 Ehedē mēmpē awúu ngáne éwúu mod a Egipto ch̄an-ε?’

29 Awóg áde Mos̄εε áwogé nē, ansōb ákē á mbw̄óg e bad βé Midian. Awed-tá ádyéε k̄óṅ boṅ áchyāá ábe bán βé baachóm bébe.

30 “Ambíd e móom mé mw̄ē ménin d̄óo ángel épíidē Mos̄εε á ehyāṅge. Empíi m̄ó á muú-te, mímé ménkōbēn mw̄á bw̄el. Nēn ábédé b̄ēnben ne mb̄ood e Sinai.

31 Ade Mos̄εε ányíné ádēn akan, menyáké ménkōb m̄ó. Ansídé b̄ēnben aá m̄ótōṅ anon bw̄am, d̄óo áwogé eh̄ób éche Sáṅgwéé nēn aá,

32 ‘M̄ēε ndé Dyōb áde ábōṅ betaa, Dyōb áde Abrahame, Aisige ne Jakōbe b̄ébēnlé’áá.’ Ne mbw̄óg í ngíne Mos̄εε enkēnchu’ é anon áhed.

33 H̄ēε Sáṅgwéé álāṅgēε m̄ó aá ‘Húd metámbé á mekuu áyāle abw̄óg á h̄ōm áde étyéémé nēn ádíi h̄ōm áde ásáá.

34 Nnyíné ngáne ábēm bad ábe bédé á alon á Egipto békudéé metake bw̄ambwam. Nw̄ógé ngáne béwennadté d̄óo nhyédé bó awōṅgen. B̄oob-p̄oó hyāg, m̄ēlōm wε á Egipto.’

35 Anén Mos̄εε m̄óo bad βé Israel bémbāṅgē á ȳl boṅ b̄ésedte m̄ó bánken, ‘Nzé-módé abagē wε kunze ákamlan ne ákáad sé?’ M̄ó-’aá Dyōb dénlōmmē ákamlan ne áson abē bad. Nēn dēmbenléd áde ángel émpíi’ é m̄ó áde bw̄el βénkōbpē muú.

36 Mos̄εε awed m̄óo ambídēn bad βé Israel á Egipto. Amb̄ēl ne e’chemléd áwed ne á Eyáke é edib é nk̄wē. Amb̄ēl-le menyáké ne e’chemléd áde b̄ébédé á ehyāṅge á et̄un é móom mé mw̄ē ménin.

37 Anén Mos̄εε m̄óo anláá bad βé Israel aá, ‘Dyōb délōmē nyé nkal é’ dáōd̄an awē ábid áf̄inté ech̄ēn meleml̄em n̄ēngáne álómé me.’

38 Meleml̄em mé Mos̄εε m̄óobédé nlatēn ne ábēd bad á ehyāṅge. Abédé áwed ne ábēd betaa áde ángel eche Dyōb dénlōmēnnē nlébtéd á Mb̄ood e Sinai énh̄ōbpē áwāb. Mm̄én nlébtéd míme Mos̄εε ánkudtē w̄ēε ángel m̄óo syānē dédíi déhídeé.

39 “Ábēd betaa βénkēnw̄ógēnné Mos̄εε, boṅ bémbāṅ m̄ó á ȳl, b̄étimé béwēm̄tān átim ambíd á Egipto.

40 Ade Mosee ályágé adé á mbɔɔd e Sinai dɔɔ bad bé Israel bɛlɔ́ngɛé mwányan Arɔ́ne bán, ‘Belé sé bwém ábe bébɛ nɛ́ngáne myòb ábe bɛlyágéd sé áyale séebli’ é dyam áde ábɛnlédé ne Mosee awé ambidéd sé á Egipto.’

41 Héé bébélé chòm éche éwágné mwán a nyag bonj bébootéd e lém awúu ábe chɔ́ mende. Bɛ́mbel káájne ngande, áwóg menyinje ne chòm éche bébɛnlé nímab mekáá.

42 Dɔɔ Dyòb ákúnnédé bɔ́ mbíd bonj áchenné’ bɔ́ ákánned ngumɛ éche édé ámín. Ebɛnlédé ngáne étɛnlédé á kálag e bekal bé’ dɔ́ádɔ́n nɛ́n bán, ‘A-bad bé Israel, áde nyémbɛ́ á ehyánje á etún é móom mé mwé méniin saké meé nyékwénlé’ áá káa nyétúmmé’ áá e lém ábe mende.

43 Téndé eché dyòb áde béchagɛ́ bán Molek mɔ́ nyémpɛ́mɛ.

Ediidingɛ-’ɛ éche tintine a dyòb áde béchagɛ́ bán Refan chɔ́ nyéhyómnaá. Mmɛ́n myòb mɔ́ nyébɛnlé mekáá bonj nyébwɔ́gkɛ mebóbɔ́j. Né-ɔ́, mɛ́bɛn nyé, nɔ́m nyé hóm áde áchábnédé tómaa alɔ́j á Babilɔ́n.’ ”

44 Stefanuse ambé abád ámpɛ́ áá, “Ade ábɛd betaa bébédé á ehyánje bɛ́nwɔ́j Ebem é Dyòb eché élúmte nɛ́n bán Dyòb áde ne bɔ́. Bɛ́nlɔ́j chɔ́ nyaa eché Dyòb dénláá’ é Mosee áá álɔ́j chɔ́. Nsáaned níme Dyòb délúmédte Mosee mɔ́ ánhídtɛ.

45 Ambíd e pónde ábɛd betaa bɛ́nkòb ene tɛ́nde á mekáá níme ábab besáá. Bɛ́nwálé chɔ́ áyál áde bɔ́ɔbe Josua békóbné melɔ́j ndɔ́ɔb eché Dyòb dénnanéé bɔ́ bad áte. Ene tɛ́nde embé ebé áhed káájne á pónde eché Dabidɛ.

46 Nsimé nɔ́ Dyòb níhídé’ áá Dabidɛ. Né-ɔ́, anchánj Dyòb áá ábe mɔ́ kunze málɔ́o Dyòb áde Jakòbe ábɛnlé’ áá ndáb.

47 Bonj Solomone, Dabidɛ mwán, mɔ́ antúm Dyòb ene ndáb alóo.

48 Bonj kɛ́nɛ Dyòb á Ngum édyɛ́ɛ’ é á ndáb eché baányonj bɛ́lɔ́jné mekáá. Edé nɛ́n ngáne nkal é’ dɔ́ádɔ́n nhóg ahóbé áá Dyòb ahóbé áá,

49 ‘Nkɔ́j mímín mɔ́ ndé ádɛm atii dé nkamlɛn, nkò́nsé-’ɛ níbɛ wéɛ níbannéé mekuu.

Nyaa e ndáb ehéé nyéhele-se nyélóo me?

Ké’ɛ héé mékɔ́mmɛ́ áte?

50 Mmɛ́n meémaa’ é ábɛn bwém abel-ɛ?’ ”

51 Stefanuse ambád ahób áá, “Nyédii bad ábe bɛ́wúu nɔ́ áte. Nyélelé nɛ́m á abum. Nyékólé metúu áyál e eyale é Dyòb. Nyédii melemlem nɛ́ngáne ábɛn betaa, nyétánjan Edɔ́ádɔ́j éche Esáá.

52 Nkal é’ dɔ́ádɔ́j ké nhóg alyágé áse awé enkénkúd metake á mekáá níme ábɛn betaa-ye? Bɛ́nwúu mésɛ́nze mé Dyòb mésyáál níme se’ bɔ́ɔd mɛ́mbɛ́l ehánje áyál e epɛ́ éche Ane awé abele mekan níme métánjɛ́né. Nyé-’ɛ bɔ́ɔb nyésómé mɔ́, nyéwúu-’ɛ mɔ́.

53 Nyé bɛ́n-naá nyékudé mbéndé éche Dyòb álómé mbwiined ne éche ángɛ́l bonj kɛ́nɛ nyééhídé chɔ́.”

Bélumé Stefanuse meláá

54 Ade bad bé mbwóg bɛ́wógé mekan níme Stefanuse áhóbé, bɛ́nlɔ́j bwámbwam kááj yál ésógé bɔ́ áte.

55 Stefanuse-’ɛ Edɔ́ádɔ́j éche Esáá énlɔ́n mɔ́ áte. Néɛ ánóné ámín ányíne’ ehúmɛ é Dyòb, ányíne’ Yesue ngáne átyéémé Dyòb á ekáá émbáá.

56 Dɔ́o áhóbéé áá, “Nyénonɛ’, nyínyine’ néɛ dyòb ánédnédé, Mwán-a-Moonyonj átyéémé Dyòb é ekáá émbáá.”

57 Héé bad bé mbwóg béhédé esaád é ngine békútɛ́n-ne metúu ne mekáá bonj bɔ́ moosyáál bébɔ́nlád mɔ́. 58 Béndol mɔ́ bɛ́syájnéd mɔ́ á dyad-tɛ́, bébootéd mɔ́ meláá alúm. Bad ábe bɛ́ntyéem mbónj ákògsɛn Stefanuse

bénhūd mímāb nkob áyāl béke bébanē á'sō-te wée kódemod póg bán Sōle ánohe bō.*

⁵⁹ Ade béluméé Stefanuse meláá nē, ankánē aá, “A-Sángú Yesu, mmōŋ kōb échēm edáádāŋ.”

⁶⁰ Dōo ábwógé mebóbōŋ boŋ ákántē ehób ámín aá, “A-Sán, lagsén bō mímén mbéb míme bébéléé.” Amaá-aá ahób nē, awé-é.

8

¹ Sōle abédé áse ákwentén-ne aá béwúu Stefanuse.

Metuné mébéle Ebese épāŋtédé dte

Eché epun chēn mwembé mé Jerusalem mēmbootéd metake mé ngine akud á mekáá mé bad bé Israel. Bad ábe bédúbpé bésyāāl bēmpāŋtéd áte á mbwóg e Judeya né e Samaria ésyāāl. Boŋ bembapēé bé nlómag bēnpēn-éé bēnlyāg.

² Nguse é bad ábe bēmbané mímab nlém n̄syāāl ábele Dyōb bēnlímē Stefanuse. Béchyēé', bélebé-'é mós.

³ Boŋ Sōle mós-'é ahédáá mwembé abóded. Ahúé'áá enén ndáb átimé eníní, ábídtē bō á ebwóg, bebaád ne baachóm, ahág-ke bō á mbwōg.

Filibé akalé nkalaŋ ní bwām á Samaria

⁴ Bad ábe bédúbpé bēmpāŋtéd áte, békag bēkalé nkalaŋ ní bwām.

⁵ Filibé mós anké á dyad ambáá á mbwóg e Samaria ákanlé bad t̄ngene Anewé-Béwógté.

⁶ Ade ndun e mod éwógé mam míme Filibé áhóbeé bényín-ne e'chemléd bé menyáké ábe ábelé, bēntōŋ metúu atále áte áwóg dyam áde áhóbeé.

⁷ Filibé ambēl e'dáádāŋ bé mbéb é'syāŋgé'áá ekud é bad áte ne e'saad é' ngine, ekud é bad-te ábe yāl énwēē eped ne ábe bésyógté'áá bēndyēé bwām.

⁸ Nén dēmbēl bad bésyāāl á dyad-tē wē béwóg menyīŋge bwāmbwam.

⁹ Bōob-pōs, mod nhóg abédé áde dyad áte bán Simōne, akumé'áá ngaŋ eche ekómté'áá bad bé Samaria yāl áte bwāmbwam. Akumé'áá ekáá á t̄l aá modmod eépedéé mós.

¹⁰ Bad bésyāāl á dyad, ndale é bad ne bekwēkwē bé bad bēmbané nlém áwē, béhōbē-'é bán, “Anén mod adii ngume e Dyōb eché béchágéé bán, Ngum embáá.”

¹¹ Bēmbané nlém áwē áyāle á etūn é pónde ankōŋ bad yāl akómed áte ne eché ngaŋ eché akumé'áá.

¹² Boŋ áde bédúbpé nkalaŋ míme Filibé ánkaleé bō t̄ngene nkalaŋ ní bwām mé nkamlen ní Dyōb ne t̄ngene Yesu Krístāa, bēnkūd edusen, bebaád ne baachóm.

¹³ Simōne mwēn ámpē andúbé, ákūd-te edusen. Ambootéd Filibé ahíd kéhéé áde ákágé'áá. Yāl enkóm mós áte áde ányiné mbeltéd mmé menyáké míme Filibé ábelé'áá.

¹⁴ Bembapēé bé nlómag bēnwōg á Jerusalem bán bad bé Samaria békóbé eyale é Dyōb, héé bélómé Petro bō Jōne áwed.

¹⁵ Ade bépédé áwed bēnkānnēd bad ábe bédúbpé nén bán békud Edáádāŋ éche Esáá.

¹⁶ Bēnkānnēd bō áyāle bēnkēmpaá Edáádāŋ éche Esáá akud. Bēndusén bō dásō á d̄n áde Sāŋgú Yesue.

¹⁷ Dōo Petro bō Jōne bébané bō mekáá á nló bō-'é békudé' Edáádāŋ éche Esáá.

* **7:58** Afinté e bad bé Israel émbē nén bán ábe bébíde mbōŋ bán mod ábelé awuse bōs bébágé'áá bad bé'só álum mós meláá.

18 Ade Simɔne ányíné aá nzé bembapεε bé nlómag bébáne mod ekáá á nló akude' Edáádəŋ éche Esáá, ambídéd mɔné áβε Petro bó Jɔn,

19 áhəbε aá, “Nyébag mémpe enén ngine ábel bonj kénzée awé ríbané ekáá á nló akud Edáádəŋ éche Esáá.”

20 Petro antimtén mɔ aá, “Nzé ewémténé wée móhele-se móchānēn nde e Dyób mɔné, nyáabe rímōŋ mɔné nyékag á dü-á-muú.

21 Weewóó'é akab ké ahóg áyāl e rímɛd nsón áyāle rímōŋ nlém méeeboó'é áte á'só é' Dyób.

22 Kunnéd-te mbíd étimen Dyób, áyāle rímén mewémtēn mé mbéb ríme éwóó áte, ékáne' wée Sánŋwée álagsen we áyāle awémtēn áde éwémténé enén ndín e akan.

23 Mmaá anyín nén meé, kán emaa wε akób áte, mbéb-pe ríhédé wε á mehanŋé-te.”

24 Hée Simɔne álánŋεé Petro bó Jɔn aá, “Són, nyékánned me wée Sánŋwée, ábel bonj rímén mésyāal ríme nyéhóbé ké ahóg déebenlád ne me.”

25 Ade Petro bó Jɔn bémaa mam mésyāal ahób tŋgene Yesue, bémad-te nkalanj ríme Sánŋwée akal, bēntīm ámbíd á Jerusalem. A nzii á esú békálé'áá nkalanj ní bwám ríme Yesue á myad mé mbwóg e Samaria híin.

Filibé bó mod e alonj dé Etoopia

26 Mmíní mbwe ángel e Sánŋu enláá Filibe aá, “Ladé yāl, ékag á ped e mbəŋ wée nzii eché ebíde á Jerusalem áke á Gaza étóméé” Béebenládte enén nzii ámpε.

27 Filibe abəŋséné-'aá ákág-ke. Hée ábomné soŋ e mod á nzii ngáne ásué'é áwé alonj. Anén mod abédée ndale e mod awé akamlánnáá, ánoné-'é ngáb eche Kandése, mmwaád awe akamlánnáá alonj dé Etoopia. Ane mod anké áá Jerusalem.

28 A ehúu ámbíd éché, andyéé á ebambam. Ngáne ákágé'áá, áláá'áá kálag eché nkal é'dáádəŋ Yesayaa.

29 Hée Edáádəŋ éche Esáá élanŋεé Filibe aá, “Kág á ebambam hē, ébē chó benben.”

30 Filibe annyagéd áhed, dóo áwógé ngáne ane mod áláa'é kálag e nkal é'dáádəŋ Yesayaa. Dóo ásedtée mó aáken “Esóŋtan chóm éche éláa'é-ye?”

31 Ane mod antimén mó aá “Chán mémwée asóŋten áde mod éétānledéé me áte?” Né-óó, anchélé Filibe aá ácháge á ebambam, bómō bédyēē áhed.

32 Eped éche ane mod ákóó'áá aláŋ ébédée nén, “Abédée nēngáne rídyoŋ ní mbód ríme békagké awúu, ambé-'ε ngáne mwán a rídyoŋ ní mbód awé béseleé nyoŋ bonj eéchyēē', enkénhóbpε dyamdyam.

33 “Bēnsudéd mó edúbé, békōbēn-ne mó kunze.

Nzé-módé átuŋ ríme nchyáátén dín áde édíí bán bēnhūd mó ámín á nkōŋsé.”

34 Ane mod ansédéd Filibe aáken, “Nzé-módé ane nkal é'dáádəŋ áhóbéé, eche yāl chēne ké'ε mod ampée?”

35 Hée Filibe álánŋεé mó nkalanj ní bwám ríme Yesue, átānlād mó mekan áte, mbóoted ne échén eped.

36 Ade békagké nē, bēmpε hōm áde mendíb médíí. Hée ane mod áhóbéé aá, “Mendíb móō mén. Weédūsānnē me ngen póg-ε?”*

* 8:36 Donŋe á kálag dé'só ábádé nchoo 37: *Filibé anlád mó ad, “Nhele rídusen we, nzése edúbpε Yesue ne nlém nhóg.” Ane mod ankwentén ad, “Náúbpε nén meé Yesu Krístə adli Mwán a Dyób.”*

³⁸ Ane mod anhób aá bétii ebambam. Dóo bó Filibe bésúdé ásē bésól á mendíb-te bonj Filibe ádusán mós.

³⁹ Bébídé-'aá á mendíb-te bídén, Edáádəŋ é Səŋgú ékēēn-ne Filibe. Ane mod eenyíne-'aá mós ámpē bonj ambé ákág, alón-ne ne menyíŋge.

⁴⁰ Filibe annyín yəl á dyad á Azotus ábooted-te ake dyad ne dyad té, ákalé' nkalanj ní bwám, káəŋ ápe á dyad á Kaisaria.

9

Səle atimé Yesue adube (Mbél 22.6-16; 26.12-18)

¹ Bəəb-pəó Səle ambé ákímē' áwúu bembapee ábe Səŋgwéé. Ankē wéé prise ambáambáa,

² aláá mós aá átel kálag échē ábeé belyáged bé ndáb é mekáne é Damaskos, ábel nén áwəŋ kunze echē nzé anyíne' bad ké bēhéé ábe bēhíde' nzii e Yesue áwed, áhanj bós, ken bebaád-'e ké' e baachóm, akób bós, ákēēn bós á Jerusalem.

³ Dóo Səle áhídté bonj ákag. A nzii e Damaskos wē, áde ádíi benben ne dyad, emwedmwed émbíd ádyəb, épen mós yəl esyáál.

⁴ Anhún á ndəəb. Dóo áwógé ehób élanjgē mós aá, "A-Səol, á-Səol, cheé ékás bonj étagte me?"

⁵ Səle ansedéd aaaken, "A-Səŋ, nzé-módé ne?" Dóo échē ehób étimtanné mós aá, "Me-éé ndé Yesue awé étagteé.

⁶ Bəəb-pəó, hidé ásē, ékag á dyad-té, áhed dóo bēlāā-'é we chöm éche étəŋgéné abel." ⁷ Bad ábe bəəbe Səle bēnwəŋ bēntyéem, dyam déeboo bós ahób. Bēnwəŋ ehób bonj bēnkənyínné mod awé ahóbe'.

⁸ Səle anhidé ásē, ánēdē míd áte, bonj eenyíne-'aá ekíde. Né-óó, bēnchāā mós é ekáá, békēēn mós á dyad-té á Damaskos.

⁹ Andyéé e'pun é'láán áde eenyíneé ekíde. Ene pónde esyáál-le eemwédeé, eedyéde-'áa chómchóm.

¹⁰ A Damaskos mod abédé awé andúbé Yesue, béchágé-'aá mós bán, Ananiase. Annyín ndóg. A ndóg-te wē, Səŋgú Yesue anchəŋ mós aá, "A-Ananiase." Ananiase ankwentén aá "Me nén, a-Səŋ."

¹¹ Dóo Səŋgwéé álanjgēé mós aá, "Bonjén, éke á nkonj ní nzii míme béchəŋgé bán Ntyéémé. Wəpē á ndáb wéé Judase. Nzé epedé áhed, ésedéd mod awé abídé á dyad á Tasus, béchəŋge mós bán Səle. Adé áhed bəəb akáanne'.

¹² anyíne-'e ndóg. A ndóg-te wē, anyíne' mod awé béchəŋgé bán Ananiase, abané mós mekáá á nló ábel bonj anyínen ámpē."

¹³ Ananiase antimtén mós aá "A-Səŋ, nkénwəŋ ane mod dúu bwámbwam ne nhel ní mekan míme ákébenlé ábəŋ bad áyál á Jerusalem.

¹⁴ Apedé-'e á Damaskos hén ne nŋine echē beprise bémháá bebágé mós ákób bad bésyáál ábe békáanne' á dín ádəŋ."

¹⁵ Bonj Səŋgwéé anláá Ananiase aá, "Kág, áyāle nén mpwədə anén mod ábele me. Mós ábəl bad ábe béese' bad bé Israel, échab kəŋ é bad, ne bad bé Israel bebíi me.

¹⁶ Mmēn mēlūmēd-te mós metake míme ákudté áyál echēm."

¹⁷ Né-óó, Ananiase ankē, asól á ndáb echē Səle ámbēē áte, abán mós mekáá á nló, álanjgē mós aá, "A-mwánned Səol, Səŋgwéé mós alómé me, néde, Yesue mwēn awé ampíi we á pónde eche éhyagké wén. Alómé me áwəŋ ábel nén ényínen ámpē élon-ne ne Edáádəŋ éche Esáá."

¹⁸ Abwəŋ-ábwwəŋ bwēm bémbíid Səle á míd ábe bédé nēŋgáne e'kíd é' súu, ábooted-te anyínen. Héé ápádté ásē bonj bédusán-ne mós.

¹⁹ Andyé ndyééd, amaá-'aá ndyééd adyé bonj yəl étimé mós áte.

Sòle akalé eyale é Dyòb á Damaskos

Sòle andyεé á Damaskos nguse é e'pun ne bad ábe béndübē Yesue.

²⁰ Anké á ndáb é mekáne ésebán abébe pónde ákanle bad t̄ngene Yesue, áá mó adé Mwán a Dyòb.

²¹ Ȳl enkóm mod téé áte awé anwóg mó póle á nsal. Bésédte bánken, “Saá anén mod mó awúε'áá bad ábe bétúbé'áá d̄n áde Yesue á Jerusalem-ε? Eesaá mbále nén nzom eché ápééné hén edí ákób bó átimen-ne bó ámbíd wéε beprise bémháá-ye?”

²² Bon Sòle ambé akalé' nímé nkalan ákág á'so ngíne ngíne. Metote míme ámbéé álúmed nén bán Yesue mó adé Ane-awé-Béwógté, mént̄ngēn nyaa eché bad bé Israel ábe bébédé á Damaskos bénkēnwóγγé dyamdyam ahób.

²³ Ámbíd e e'pun híin bad bé Israel bēnladén áte áhóγγe Sòle ngáne béwúú-é mó.

²⁴ Bon Sòle anwóg nt̄ii míme bébélé. Bénóné'áá mmwe mé e'ké ní dyad nkuu ne müte ábel béwúú mó.

²⁵ Bon nkuu nhóg Sòle ábē bambapεε béntéd mó, béhé mó á elón-tē, bēbídéd mó á epón é eséd bé e'ké ábe bēnl̄ngned dyad, bon bésüdéd mó ámbíd e ebwóg.

Sòle atimé ámbíd á Jerusalem

²⁶ Sòle anké á Jerusalem. Ade ápédé áwed, anwanén áá móbē ne bad ábe bédúbpe Yesue bon ábē bad bēháá'áá mó áyāle bēnkēndúbéé bán mómpε adúbpe Yesue.

²⁷ Héε Banabase ách̄ngē mó á ekáá bon ákεεné mó wéε bambapεε bé nlomag. Anchemtéd bó áte ngáne Sòle ányíné S̄ngwéé á ndóg-te á nzii ne chóm éche S̄ngwéé álángé mó. Anláá-ε bó ngáne Sòle álángé'áá bad mam t̄ngene Yesue á Damaskos ésebán abáa' dyamdyam.

²⁸ Né-óó, Sòle ambé ne bó, ákag mebwóg mésyāál á Jerusalem akalé' nkalan ní bwám á d̄n áde S̄ngwéé ésebán abáa' dyamdyam.

²⁹ Akánlé'áá kóš̄ne bad bé Israel ábe bēhóbé'áá ehób é Grikia áswant̄n-ne ne bó. Dóó bēbóótéd nzii ahed áwúú mó.

³⁰ Ade bad ábe bédúbpe Yesue bésónténé bán béhede Sòle awúú, béntéd mó bésyognéd mó á dyad á Kaisaria bon bēlómē mó á dyad á Tásus.

³¹ Né-óó, ene pónde esyāál bad ábe béndübē Yesue á mbwóg e Judeya esyāál, á Galilia ne á Samaria bémbe ne nsan, béwón-ε mbwóg ní Dyòb áte nē ábel béwúú áte, Edáád̄ng éche Esáá éwōngān-ne bó.

Petro akii a myad mé Lida ne Jopa

³² Petro akagé'áá mbwóg áte esyāál. Ebédé pónde póg eche akíi bad bé Dyòb ábe bébédé á dyad á Lida aleled.

³³ Ade ápédé áwed, antán mod awé béch̄γγéé bán Aniesε. Esón é mekuu énwē mó, átimēn ndáb mwé waam.

³⁴ Petro anláá mó áá, “A-Anies, Yesu Kr̄st̄ə ád̄id wε bwám hén b̄əəb. Pádé ásē éname ádon an̄n.” Ábwōγγ-ábwōγγ Aniesε ampádé ásē.

³⁵ Ade bad bésyāál ábe bédyéé'áá á Lida ne Shar̄n bényíné néε ane mod ádyéé bwám, bēmbootéd S̄ngú Yesue adúbe.

³⁶ Mwáád nhóg abédé á dyad á Jopa awé béch̄γγé'áá bán Tabitaa, andúbé Yesue. (D̄n á Tabitaa á ehób é Grikia ád̄ii bán D̄okase nédē e'sél.) A alongé áde ásyāál mbon mó ne móš ábéláá áwōngān-ne betóótókē bé bad.

³⁷ Mmē mesú-'óó, ankwε nkole awé-ε. Bēnwobé mó ndim bétéd mó bēbānē á tonj e ndáb eché ebédé ám̄n.

³⁸ Βαοβ-ρσδ dyad á Jopa dénkênchabnédté dyad á Lida áyāl. Né-σδ, áde bad ábe bédúbpé Yesue béwógé bán Petro adé á Lida, bénlóm bad bébe áwē, ne mechéngé nén bán, “Són hyág á mehélé-te.”

³⁹ Né-σδ Petro ambonśén, βσδβσδ βέκē-’ε. Ade ápédé áwed, bénchāgnēd mó á tonj e ndáb eche ebédé ámín. Bekúd bé bebaád bénlājnéd mó, béchyé’, bélúmtē-’ε mó mbóté ne nkobe níme Dσkase ámbājnédté bσ áde ábédé á alongé.

⁴⁰ Petro ambidéd bσ moosyāł á ebwóg, akóg mebóbōnj ábootéd-te akáne. Dσδ akúnné yāl á ndim bonj áhóbé aá, “A-Tabita, páde ásē!” Tabitaa andibé míd áte. Anyín áde anyiné Petro, ampáde ásē.

⁴¹ Petro ansād ekáá, awóngén ānyen mó ásē. Dσδ áchénlé bad ábe béndūbē Yesue, ne bekúd bé bebaád ábe bémbē áhed, bonj álúmtē bσ Tabitaa áde ádíí á alongé.

⁴² Mmén nkalanj mēnkanléd á dyad á Jopa áte ásyāł a etún é pónde, ekud é bad édúbé-’ε Sānjú Yesue.

⁴³ Petro andyéé á Jopa nguse é e’pun. Andyéé á ndáb e mod awē abelé’áá nsón mé e’kob é’ nyam, awē béchágé’áá bán Simōne.

10

Petro akii wée mod awē eésē mod a Israel

¹ Mod a Roma nhóg abédé á dyad a Kaisaria bán Kōneliōse. Akāmlánáá echorj é mbwókel e sánze éché béchágé’áá bán, “Echorj é mbwókel e sánze é Italia.”

² Kōneliōse abédé mod awē ahidé’áá mekan mé Dyōb ámbíd. Mwēn ne eche ndáb esyāł bebēnlé’áá Dyōb. Ansálé ekáá áte, áwōngān betóótōkē bé bad bé Israel, ákännē-’ε pónde ésyāł.

³ Ebédé dyam ngānj élaán mūte nhóg, anyín ndóg. A ndóg-te wē ankōj ángel e Dyōb anyín. Enchég mó aá, “A-Kōneliōs.”

⁴ Annan ángel ne chóōj, ne mbwóg, bonj ásedté nén aá, “A-Sānj, cheé édé?” Ángel enkwētén mó aá “Dyōb áwógé nímmōj mekáne, anyínē-’ε ábōnj e’bonj bé nlém. Adé-’ε mbonśén ákwētēn wē mekáne.

⁵ Βαοβ-ρσδ, lóm bad á Jopa, békē béchéle mod nhóg awē đin ádíí mó bán Simōn awē béchāgēé bán Petro.

⁶ Adé nken á ndáb e mod nhóg awē akínte’ e’kob é’ nyam awe béchāgēé bán, Simōne. Simōne ne adyéé’ á nkæg mé edīb é nkwē.”

⁷ Dσδ ángel eched éhídte, bonj Kōneliōse áchénlé ábē bembālede bé ndáb bébe, ne sánze póg eché chímpē ehidé’áá mekan mé Dyōb ámbíd, ebé-’ε sánze eché enoné’áá Kōneliōse.

⁸ Alánjé-’áá bσ dyam áde ábēnlédé, alóm-me bσ á Jopa.

⁹ Ade békagké, néε bīn é’sānjgé, áde békwógé ape á Jopa, Petro anchágé á ndáb mún ákáne. Nē ábédé dyam kād.

¹⁰ Nzaa enkób mó, áđānj-’ε ndyééd adyé. Ade bébonsanné ndyééd, anyín ndóg.

¹¹ Anyín ngáne ngob e dyōb énédnédé. Chōm émbíd nēngáne sánkalaa a abad, ébé néε béchāngé dσ mekéb méniin, bésudté dσ áse.

¹² A abad-tē wē, ndín é nyam ésyāł émbē áwēd-te; éche ékeene’ mekuu méniin, éche édole abum ásē ne menōn mé ahín. ¹³ Héε áwógé ehób élanje mó nén “A-Petro, syāó ásē, éwúu échén nyam, édyág.”

14 Boḡ Petro anhób aá, “A-Sáḡ, meéhēlē se mbēl ene ndín e dyam. Meedyédéé chōmchōm mbéd éche mbéndé ehóbé aá béedyāg, ké’ε éche éesáa á’sō é’ Dyōb.” *

15 Echē ehób émbād mós aláa nén aá, “Weetédé chōm ké ehóg éche Dyōb ahóbé aá éesáa, wēé éesáa’ε.”

16 Nén dēmbenléd ngen éláan. Dóo bétímné adé abad ámbíd ádyōb.

17 Petro adololé’áá áte ábíi chōm éche ene ndóg élúmtéé. Ene pónde dso bad ábe Kōneliōse ánlōmmē bédíbté wēé ndáb eche Simōne edíí. Bentyēm á mmwe mé e’kē.

18 Héé bélēbpéé ehób bánken, “Nken adé áte wē awē béchagēé Simōn Petro-ye?”

19 Ade Petro ádíi adólé áte ásoḡten chōm éche ndóg élúmtéé dso Edaádāḡ éche Esáa elāḡgēé mós aá, “Wóglén! Bad beláán bépédé, béhede we.

20 Né-ḡḡ lād yāl, ésud á ndáb mín, weebáá bós ahíd áyāle mēé nlómé bós.”

21 Né-ḡḡ, Petro ansúd áse, áke atán ábē bad, álāḡgē bós aá, “Méé ndé ane mod awē nyéhedeé. Cheé épídé nyé hén?”

22 Béntimtén mós bán, “Mod ambáá a sánze, Kōneliōse móo alómé sé. Adii mod a bwām awē abenle Dyōb. Bad bé Israel bésyāal-le bébage mós edúbé éche échábé ámín. Ángel e Dyōb elāḡgē mós nén aá álébe we áwē ndáb, ábel nén áwōg dyam adé étāḡgéné mós aláa.”

23 Petro awógé-’aá nē, asóléd bós á ndáb, ábē-’ε bós e’noḡ,† Boḡ Petro ansóléd ábē bad á ndáb kénéé béébédéé bad bé Israel. Néé bín é’sāḡgē, Petro anlād yāl, ahíd ábē bad. Nguse é bad ábe bédúbpé Yesue á Jopa bómpē bēnwōón bós.

24 Epuḡ ehóg ámbíd e nē, Petro hémpé á Kaisaria. Kōneliōse mwēn, áde abum á ndáb, ne ábē besón bé echoḡ ábe ánlēbēē, bésíné’áá Petro bós.

25 Ade Petro áhedeé asól á ndáb, Kōneliōse ankē mós atán, ákwe mós á mekuu, ábwāam-me áse ábe mós edúbé.

26 Boḡ Petro annyen mós áse ahób aá, “Tyéém ámín. Mémpē ndii moonyoḡ ngēn.”

27 Petro ambé ákanlé Kōneliōse adé bésóleé á ndáb-te. Antán néé ndun e mod éládné á ndáb-te.

28 Héé álāḡgēé bós nén aá, “Nyé bēn nyébíi bwām nén bán edé mod a Israel mbéndé áwoon mod awē eesé mod a Israel ké’ε ásol áwe ndáb. Boḡ Dyōb álúmté me nén aá meéchāḡē modmod mēé adé mod awē eesáa ké’ε néé mod awē adé mbinde á’sō é’ Dyōb.

29 Né-ḡḡ, áde élómé me achāḡ mempádé áse ábwōg-ábwōg, menkēnhóbpe mēé méehyaá. Bōob-pōḡ, nsedte we, cheé ékás boḡ élómé me achāḡ?”

30 Héé Kōneliōse ákwentanné mós aá, “Sú éláán chii, néé bōob, nkánné’áá áwēm ndáb-te á ngāḡ éláán é’ mūte. Dóo mod awē awáá mesan nímé mémwaa’ áte átyéémé me á’sō-te taléd.

31 Boḡ áhōbē aá, ‘A-Kōneliōs, Dyōb awógé we mekáne, ányíné-’ε ábōḡ e’boḡ bé nlém.

32 Lóm mod á Jopa, áke áchéle Simōne awē béchagēé bán Petro. Adé nken á ndáb wēé mod nhōg awē ákínte’ e’kob é’ nyam awē béchagēé bán Simōne. Simōne ne adyē’ á nkāḡ mé edíb é nkwē.’

33 Né-ḡḡ menlóm we atéd ábwōg-ábwōg. Ebelé-’ε bwām ngáne épédé. Bōob-pōḡ sé moosyāal séde hén, Dyōb adé-’ε né syánē. Sésine’ áwōg dyam ké ahéé áde Sáḡ Dyōbe álāḡgē we aá éláa sé.”

Petro akánlé Kōneliōse nkaḡaḡ ní bwām

* **10:14** Bad bé Israel bēnwōḡ mbéndé éche énkēmbē bós kunze ádyé donḡe á bwēm. † **10:23** Bad bé Israel béeslíte’áá mod awē eesé mod a Israel áwab ndáb.

34 Dóo Petro áhéde póle á nsal aá, “Bóob dóo mbíí meé Dyöb átédé moosyáál nyaa póg.

35 Akobe kénzéé awě abage mó edúbé awě abele-’ε mekan níme métáŋgené, ké alon áhéé ane mod ábídé.

36 Nyébií nkalan níme Dyöb dénlómēē bad bé Israel. Mmē nkalan mbédéē tŋgene ákal nkalan ní bwám mé nsan níme nípedé mbwiined ne Yesu Krístæ. Mó adé Sŋŋwéé á moosyáál.

37 Nyébií-’ε dyam áde dēmbenléd mbwóg e Judeya áte esyáál mbooted ne á Galilia. Nén dēmbē áde Jone ámáá bad aláá tŋgene edusen.

38 Nyébií nén bán Dyöb dénwōgēd Yesue, mod á Nazaret, ábe mó Edáádŋj éche Esáá ábē-’ε mó ngine. Yesue akagé’áá hóm téé ábelé mbon. Ngáne Dyöb démbē-’áá ne mó, adidé’áá bad bésyáál ábe bēmbē ásē e ngine e Satan bwám.

39 Sé bēn sēnyínné mekan mésyāāl níme ámbenlé á alon á bad bé Israel ne á Jerusalem dīd. Bēnwū mó, abome áde bēmbomēé mó á awōg.

40 Bon Dyöb dēmpuúd mó ámbíd e e’pun é’láán, ábel-ε bad bényín mó.

41 Saké bad bésyāāl bényín-ne mó. Bad ábe Dyöb dēmmadé apwēd, bós bényín mó. Nédé sé ábe sēndyē ndyééd sēmwe-’ε mmítéd ne mó.

42 Anlyágtén sé áá sékanle bad nkalan ní bwám, sébide-’ε mbóŋj nén bán mó móde Ane awě Dyöb ápwédé, ákaad bad ábe bédé á alongé ne ábe bēwédé.

43 Bekal bédáádŋj bésyāāl bēnhōb tŋgene mó bán, mod ké ahéé awě adúbpé mó, Dyöb délāgsén mó mbéb. Nén dēbenléd á ngine e áde dīn.”

44 Ade Petro ádíí áhóbéé nē, Edáádŋj éche Esáá énsūd ásē, épī moosyáál awě áwóglánnáá níme nkalan.

45 Bad bé Israel ábe béndübē Yesue, ábe bóobe Petro bēmbíd á Jopa bēmbē menyáké bwámbwam ányín nén bán Dyöb ábágé eché nde e Edáádŋj éche Esáá kóŋne wēe bad ábe béesē bad bé Israel.

46 Bēnwōg ngáne bēhóbéé mehób mémpēe, bēbagé-’ε Dyöb ehumé. Dóo Petro áhóbēe aá,

47 “Ábén bad békúde Edáádŋj éche Esáá melemlem ngáne sēmpē sēnkudté. Né-óó, nzé-módé ahēle-se ahób aá bēdusán bó ne mendíb?”

48 Hé-’áá áhóbé aá bēdusán bó á dīn á Yesu Krístæ. Dóo ábē bad bēlāngé mó bán ádyēe ne bó nguse e e’pun.

11

Petro ahóbé tŋgene chōm éche ábélé

1 Bembapēe bé nlomag ne bad bēmpēe ábe bédúbpe Yesue á mbwóg e Judeya-tē esyáál, bēnwōg bán bad ábe béesē bad bé Israel bómpē békóbé eyale é Dyöb.

2 Ade Petro átimé ámbíd á Jerusalem, bad ábe bēhóbé’áá bán bētŋgené bad ábe béesē bad bé Israel ayag, bēmbootéd mó ahób bán,

3 “Cheé ékás bon ékág wēe bad ábe béesē bad bé Israel, bad ábe bēeyagée bon nyáábō nyedyāg-ke kóŋne ndyééd hóm ahóg?”

4 Hé-’áá Petro áhéde nkalan á nsal, aláá bó mekan mésyāāl ngáne mēmbenlédte se á mbooted.

5 “Mbédé á mekáne á dyad á Jopa bon rínyínē ndóg. Chōm émbíd á ádyöb nēŋgáne sŋŋkalaa á abad, ébē néε bēchāngé dó mekéb méniin, bésudté dó ásē. Bēnsudéd dó áwēm e’só-te.

6 Ade rínóné áwēd-te menyín nyam éche édé á abad-tē, nyam é mehín, nyam éche édole abum, ne menon mé ahín.

7 Hée níwógé ehób élanje me nén aá, 'A-Petro, syáá ásē, éwúe' échén nyam, édyág.'

8 Boŋ me-ε menhób meé, 'A-Sán meéhēlē-se mbēl ene ndín e dyam. Chómchóm éche mbéndé ehóbé aá béedyág kéε éche éesáa á'só é' Dyób éēsōlē me á nsal mbéd.'

9 Ehób émbid ádyób ampé nén 'Weetédé' chóm ké ehóg éche Dyób áhóbé aá éesáa, wéé éesāá'.

10 Nén dēmbenléd ngen élaán. Dóo bétimné chóm ésyāāl ádyób.

11 Ene pónde chēn dóo bad beláán ábe bébidé á dyad á Kaisaria ábe belómé áwēm, bépédé á ndáb echē ndyéé'áá áte.

12 Edáádəŋ éche Esáá énlāā me áá syāābōo sékag, áá meebáá bó ahíd. Ábe bad ntóób ábe bédúbpé Krístəá ábe bébidé á Jopa bómpé bēnhíd me á Kaisaria. Syāābōo moosyāāl sēnkē sēsól á ndáb wēe Kōneliōse.

13 Kōneliōse anláá sé ngáne anyíné ángel etyéémé áwe ndáb boŋ ene ángel eláá mó aá, 'Lóm mod á Jopa áke áchəg mod awé mīn mésyāāl médíí bán Sīmōn Petro.

14 Nzé apedé ālāā nyé póle eche ēbēl boŋ Dyób ásoŋ ádoŋ alongé, ásoŋ-ε ádoŋ abum á ndáb.'

15 Ambid enē, mboótédé-'aá dyam ahób, Edáádəŋ éche Esáá épiidé bó melemlem nēngáne ėmpii' é sé á mbooted.

16 Dóo níkámtné dyam áde Sāngwéé ánhōbpē. Áhób aá, 'Jōne adūsánnáá bad ne mendib boŋ bédusén nyé ne Edáádəŋ éche Esáá.'

17 Enyínnad nén bán Dyób ábágé ábén bad ábe béesē bad bé Israel melemlem me nde míme ámbéé syánē áde dédúbpé Sāngú Yesu Krístəá. Nzéé-ō nídíí ákəŋ ntíí ní Dyób?''

18 Ade béwógé nē, bénsōg Petro mekan ahób áyāl, bébootéd Dyób aken. Béhóbé'áá bán, "Dyób ábágé káəŋne bad ábe béesē bad bé Israel étál átede nímbab mbéb átimen Dyób, ákud-tə alongé áde déemaá'."

Mwembé mbóótédé á dyad á Antyog

19 Bōob-pōó, áde béwúú Stefanuse, bad ábe bēmpāntəd áte áyāle metake míme békúdáá, bó donje á bad bēnkē káəŋse á Fonisia, donje ákē á Saiprus, ábíní-ε béké á Antyog. Békágé'áá, bėkanlé dásš bad bé Israel bēnpən nkalan ní bwām.

20 Boŋ bad bēmpēe ábe bēndúbē Yesue ábe bēmbíd á myad mé Saiprus ne Sirine, bēnkē á Antyog, bėkanlé káəŋne bad bé Grikia, bēlāngē-ε bó nkalan ní bwām tēŋene Sāngú Yesue.

21 Ngíne e Sāngú embé ne bó. Ndun e mod endúbe, étimēn-ne Sāngwéé.

22 Mmē myāngó mēmpē á metúu mé bad bé mwembé ní Jerusalem. Né-ōó, bēnlōm Banabase á dyad á Antyog áke dényín bó áwed.

23 Ade apédé áwed boŋ anyín ngáne Dyób ánamté bad, anwóg menyínje, ambē-ε bó elébé aá béhíde' Sāngwéé ne nlém nhóg.

24 Banabase abédéε mod a bwām, Edáádəŋ éche Esáá émbē ne mó, adúbe dénwū-ε mó áte bwāmbwam, ekud é bad-tə éndúbē.

25 Dóo Banabase ákíí á dyad á Tasus áhəd Sōole.

26 Ade ányíné mó, ampēén mó á Antyog. Né-ōó á etún é mwē nhóg, bó bad bēbe bėbómé'áá ne bad bé mwembé. Bēn'yāgēd-tə ndun e mod. Á Antyog wē dóo bésébpé bad ábe bédúbpé Yesue díŋ achuu bán Bad bé Krísto.

27 Mmē mesú dēn, donje á bekal bē'dáədəŋ bēnhidé á Jerusalem bėke á Antyog.

²⁸ Bó mod nhóg awě béchágé'áá bán Agabusē antyéém ámín. A ngíne e Edásdān échē Esáá, anhób aá, "Nzaa e ngíne ekwógé ape, ēbē-ε nkōnsé-te rísyāl." Nén dēmbēnléd-te á pónde eche Kladios ábédé á nkamlēn.

²⁹ Bembapēε bēntīl nēn bán bó mod téé bēlómē nwōngēn wée bad ábe bédúbpé Yesue á mbwóg e Judeya ngáne bó mod téé áhenlé akud.

³⁰ Nē dēn-naá bēmbēnlé. Bēnlād mōné, bēlómén Banabase bó Sōal ábe wée belyáged bé mwembé.

12

Herode áditi apīnad bad ábe bédúbpé metake

¹ Bēnben ne ene pónde chēn, kōh Herode ambootéd donje á bad bé mwembé ahé á meséb.

² Ambēl bēnkōb Jemse, Jōne mwānyān, bēwúén mó nkwáté.

³ Ade ányíné nēn aá nē áwógté bad bé Israel menyīnge, ankē á'sō, ábel békób Petro. Nén dēmbēnléd á pónde e Ngande e Ewēle é Ngēn.

⁴ Ade bémáá Petro akób, anlóm mó á mbwóg. Bēmbané e'choh é' sánze é'niin ānon mó. Echoh téé énwōh sánze éniin. Herode anwōh mewēmten ákád mó á'sō é' mbwóg nzé Ngande e Nnyíme ámín etómé.

⁵ Né-ōó bēmbane Petro á mbwóg. Boh bad békánné'áá Dyōb ngíne ngíne áyāl échē.

Angel ebídté Petro á mbwóg

⁶ Herode ahedé'áá Petro apēen á'sō é' bad mbwēmbwē. Mmē nkūu mēn níme Herode ánwōngē mewēmten ápēen Petro á'sō é' bad chán ábíní, Petro akúné'áá áfínté e sánze ébe. Bēnhē mó bengōbēngōbē pēd ébe, sánze émpēe ébe énoné mmwē ní ndáb e mbwóg.

⁷ Dóó ángel e Sāngú ebíde táled, ndáb e mbwóg épené áte. Ángel ne enságéd Petro á ekágél, ényem mó áse, élánge mó aá, "Pádé áse á mehélé-te." Abwōg-ábwōg bengōbēngōbē bēnhunnéd mó á mekáá.

⁸ Dóó ángel élángeé mó aá, "Wéd ngáá atád, étád-te nkōod mé metámbé." Petro ambēl áned. Dóó ángel élángeé mó aá, "Hé mbóté á yāl, éhíde me."

⁹ Petro anhíd chō, bēbíd á ndáb e mbwóg. Boh kénē enkēmbíí'é ké dyam áde ángel ébeleé dēn ákoo abēnled. Anwēmten aá mōnyíne' ndóg.

¹⁰ Bētóm echoh e sánze é'só ámín, bétóm-me éche élónténe é'be kōsh ne á asóg bēmpē á mmwē mé e'ké bé e'kii níme mbídé'áá á dyad-tē. Nsāl mé e'ké mēndibnéd ne mó mwēn. Héε bēbídé boh bēhídé nzii. Ade békagké nē dēn dóó ángel ne étédté Petro ábwōg-ábwōg.

¹¹ Héε debyéé ápédé Petro boh áhōbē aá, "Bōob dóó mbíí meé dyam dēn dóó ákoo' abēnled. Sāngwéé alómé eche ángel, asóó-ε me á mekáá níme Herode, abelé-ε mbídé mekan mésyāl áte níme bad bé Israel bēnwēmtenē me abel."

¹² Achemé'áá dyam áde ábēnlad ne mó, dóó ákíí á ndáb wée Maria, awé achyáá Jōn Makōse. Ndu e mod enladén áhed békánné'.

¹³ Ade Petro ápédé ankūm ekob éche édé á ebwōg-te boh mbāledé a mmwáád nhóg bán Rodaa, áhye ánoné mod awé akume ekob.

¹⁴ Anchem Petro ehób. Dó-'áá ne menyīnge mésyāl áchādtēnē ekob adibe, atóm mehélé ámbíd á ndáb-te boh áke aláá bad aá, "Petro atyéémé á ebwōg-te."

¹⁵ Bēnlāá mó bán, "Epag mīn!" Boh ambé álánge bó aá chōm éche mōhōbēé édé mbāle. Dóó bēhōbēé bán, "Né eche ángel chō édé."

¹⁶ Ade nímén mésyāl mébēnladté Petro ambé ákumé' ekob. Kōshne á asóg bēndibé ekob. Bényíné-'áá mó, yāl ekóm bó áte bwāmbwam.

17 Ampebtén bɔ ekáá áá bɛlám ehób, bonj álúmtɛ bɔ áte ngáne Sánjwéé ábidtɛ mɔ á mbwɔg. Anláá bɔ áá, “Nyéláa Jemse ne bad ábiníí ábe bɔmpɛ bédúbpɛ Yesue nímén mekan.” Dɔɔ átedtɛ bɔ bonj ákag hóm démpɛe.

18 Ade bɛn é'sánjé, sánze éche énoné'áá Petro êmpuuted á mewêmtɛn bwámbwam áyále bɛnkɛmbíí'é chóm éche ébɛnlédé Petro.

19 Hɛrɔde anlóm bad áá bɛhɛd mɔ bonj bɛnkɛnhɛnlé mɔ anyín. Héé ákáádtɛ éché sánze bonj ábagé mbakú áá bɛwúu bɔ. Ade nímén mésyāāl métómé Hɛrɔde ansyáá á Judeya áke ádyɛé á Kaisaria á esónj é pónéd.

Hɛrɔde awédé

20 Ene pónédé Hɛrɔde anwóón bad bé myad mé Tirɛ ne Sidon melingá níme méchábé ámin. Né-ɔɔ, bad bɛmbíd nímé myad mébe áke dényín mɔ. Mod awé bɛnsɛbɛé áke dɛtán ábel bɔɔbe kánj bétim áse abédéé Blastuse. Blastuse abédéé mbáledɛ á ndáb e kánj. Bɛmbɛl nɛ áyále á alonj wéé Hɛrɔde dɔɔ nímab medyé mébidé'áá.

21 Epun éche Hɛrɔde ántíí'é épédé-'áá áte, awáá megombe mé kánj, ádyɛé atii dé nkamlɛn bonj ábootéd bɔ mam aláa.

22 Ade ámáá ahób, ábɛ bad bɛmbootéd abón bán, “Dyɔb dɛn dɔɔ áhóbe' saké moonyonj.”

23 Abwɔg-ábwwɔg ángɛl e Sánjú embɛl Hɛrɔde ankwɛ nkole áyále enkɛmbáa Dyɔb edúbé. E'kɛn bé abum béndyɛ mɔ áte, awé-'ɛ.

24 Eyale é Dyɔb chɔ-'ɛ émbɛ ékanláád ékag á'ɔɔ.

25 Banabase bɔ Sɔɔl bɛmmáð nímab nsón bɛhídɛ-'ɛ á Jerusalem. Ade bɛhídɛé, bɛnwálɛ Jɔn Makɔse áyál.

13

Edáádɛn éche Esáá épwédé, bɛlómé-'ɛ Banabase bɔ Paale

1 A mwembé mé Antyɔg, donje dé bekal bɛ'dáádɛn ne bemeléede bɛbédé áwed. Ábɛ bad bɛbédéé Banabase, Simionɛ (awe bɛchágé'áá bán Ehíndɛɛ), Lusíɔse (awe ámbíd á Sirinɛ), Manahɛnɛ (awe bɔ Ngómenaa Hɛrɔde bɛkwógé hóm ahóg) ne Sɔɔle.

2 A pónédé éché bɛbɛnléé Sánjwéé bédidé-'ɛ yál nzaa á mekáne-tɛ, dɔɔ Edáádɛn éche Esáá élanjéé bɔ nɛn áá, “Nyébanned mɛ Banabase bɔ Sɔɔl ábel bonj bɛbele mɛ nsón níme nɔpwédé bɔ mɛé bɛbel.”

3 Ábɛ bekal bɛ'dáádɛn ne bemeléede bɛnkánɛ, bédid-tɛ yál nzaa á mekáne-tɛ, bɛbán Banabase bɔ Sɔɔl mekáá á nló bonj bɛlómé bɔ bán bɛkag.

Banabase bɔ Paal bétánɛ nkum-é-nganj, Elimase

4 Né-ɔɔ, Edáádɛn éche Esáá énlóm Banabase bɔ Paale. Dɔɔ békíí á dyad á Selusia. Ahed-taá bɛsyánjé bonj bɛkáğ á mbwɔg e Saiprus eche mendíb melánjédé.

5 Ade bɛpédé á dyad á Salamis, bɛkálé'áá eyale é Dyɔb á ndáb é mekáne. Bɛnwálɛ Jɔn Makɔse áyál áwónjɛn bɔ.

6 Bɛnkɛ ádé alonj áte áde mendíb melánjédé kóónj bɛpɛ á dyad á Pafos. Ade bɛpédé áhed, bɛntán mod a nganj nhóg awé bɛchágé'áá bán Báá Yesu. Abédéé mod á Israel awé anchág yál áá módíi nkal é'dáádɛn a Dyɔb.

7 Báá Yesue abédéé nsón a echonj awé Segyus Paoluse. Segyus Paoluse mɔ abédé nkamlɛnɛ a ene mbwɔg éché mendíb mɛnlánjédé. Abédéé mod awé anwónj debyéé bwámbwam. Ane ngómenaa anchéle Banabase bɔ Sɔɔl áyále ahédé'áá eyale é Dyɔb awóg.

⁸ Bon anén mod awě dīn dēmbēē á ehób é Grikia bán Elimase enkēnháá bó etál. Ahedé'áá aá nkamlene a mbwóg eedúbpé nkalaj mī bwām.

⁹ Dóo Soolé awě bēchágé'áá ámpē bán Paale, ngáne ánlōnnē ne Edaádaj eche Esaá, áóné ane mod a ngaj á mīd-te,

¹⁰ Bon ahóbē aá, "A-mwān a Satan! Ekóo dyam ké ahéé áde áde bwām. Mwane mé mbēb mwēn ne mwēn-ēē ríloné we áte. Póndé ésyāal ebelé éhedé wēe móhəŋlən mbále eche Səŋgwéé mótimed chó metóm.

¹¹ Səŋgú Dyōbē ákōgsēn we bəab nēn dēn. Wēkwē ndīm, wēenyínēnné-ē á esón é póndé." Abwōg-ábwōg Elimase anwóg nēngáne mbag ékwédé mós á mīd-te, ábootéd-te ahyóm áhed mod awe áchāā mós á ekáá.

¹² Ade ngōmenaa ányíné dyam áde ábēnlédé, andúbé Yesue. Yəl enkóm mó áte bwāmbwam áyāl e ayáge áde Paale bó Banabase báyógté'áá tēngene Səŋgú Yesue.

Paale bó Banabase bépédé á dyad á Antyōg

¹³ Paale bóbē baáb bēnsōl a Stíma a Pafos béke kóəŋ bēpē á dyad á Pega á mbwóg e Pamfilia. Bon Jōn Makose anlyóg bó áwed asú mós ámbíd á Jerusalem.

¹⁴ Bēnsyāá á Pega bēpē á dyad á Antyōg á alonj á Pisidia. A mbwe-mé-nkóme-áte, bēnkē á ndáb e mekáne bēdyēē asé.

¹⁵ Bēnwōg néē bēláá eped á kálag e mbéndé eche Mosēe ne á kálag e metelag mé bekal bē'daádaj. Ade bémáá alāj dōo belyáged bē ndáb e mekáne bēlébpē Paale bó Banabase nēn bán, "A-baányan, nzé nyēwóó póle eché eewēd bad nlém á abum, nyéhób chó."

¹⁶ Dóo Paale átyéémé ámín, apebtán bó ekáá aá bēlám ehób, bon abootéd dyam ahób.

Anhób aá, "A-baányan bé Israel ne bad bēmpēe ábe nyédé hén bəab ábe nyēbenle Dyōb, nyéwōglən me.

¹⁷ Dyōb á bad bé Israel dēmpwēd ábēd betaa ábēl-le ábē bad bēbūū áte á póndé eche bēbédé néē beken á alonj á Egipto. Ámbíd enē, ámbenléd eche ngíne eché echabé ámín ábided bó á Egipto.

¹⁸ A etún é móom mé mwē méniin, anwesén bó á ehyanje.

¹⁹ Dyōb dēmbēbēd melonj saámbé á ndəab e Kanahan, ábē-ē echāb ndəab wēe ábē bad.

²⁰ Mmēn mésyāal mēmbenléd á etún é dyam mbwókel e mwē éniin ne móom mé mwē métaan. Ámbíd enén, Dyōb dēmbē bó bad ábe bēkáādtē kóəŋne á póndé eché nkal é'daádaj Samwele.

²¹ Ade bēhéde kəŋ, Dyōb dēmbē bó Soolé, mwān awe Kische. Ámbíd á túmbé e Benjamin, abédéē kəŋ á etún e móom mé mwē méniin.

²² Dóo Dyōb áhúdé Soolé á atii. Áhúdé-'aá mós, átfimēd Dabide. Anhób tēngene Dabide aá, 'Nkudé nyaa e mod eche rídás, Dabide, mwān awe Jesē. Adii mod awě ábēl mam mésyāal nime ríhedéé méé ábēl.'

²³ Yesue mós-ē awě abídé á nchyaátén nime Dabide mós Dyōb dēmbenléd Nsoode á bad bé Israel, ngáne ánhōbpē aá mósōbēl.

²⁴ Byánán Yesue ábootéd nime nsón, Jōne álangé'áá bad bé Israel aá békunned mbíd, bētede nímab mbéb, békud-te edusen.

²⁵ Ade Jōne ákwógé nime nsón amad, ansédéd bad aaiken, 'Nzé-módé nyéwēmténé bán ndé. Saké me ndé ane awě nyésinéē. Nyénəne', Áhúē' ámbíd echēm, mmēn meékwoonedéé áhune mós metámbé á mekuu.' "

²⁶ Paale ámbád ahób aá, "A-baányan bé mbyaa nime Abrahamē ne bad ábe bēbenle Dyōb hén bəab, syānē-ēé bēlómme nímén nkalaj mé e'sooson.

27 Bad ábe bédyéé'áá á Jerusalem ne ábab belyóged bénkémbí'é bán Yesue móo adé Nsoode. Bénkénsójtén-naá metelag mé bekal bé'dáádəŋ níme beláá'áá á mbwε-mé-nkóme-áte téé. Kénê bém̄b̄l mekan níme bekal bé edáádəŋ béh̄h̄bp̄é ménl̄on, ahób áde béh̄h̄bp̄é bán b́ewúu Yesue.

28 Kénéε bénkénkudtə n̄zom eché bétóméd̄tə mbakú nén bán at̄əŋgéné awé, b́enlāā Payledε bán ábel b́ewúu Yesue.

29 Ade b́emáá mekan mésyāal abel ngáne méténlédé á kálag e Dyōb t̄əŋgene mó, b́ensudéd mó á awəg, b́ebānē mó á soŋ-t̄.

30 Boŋ Dyōb d̄empuúđ mó. Ambíd e n̄é,

31 anlúmed̄ ȳl ngen ne ngen ẃεε bad ábe b́ósb̄o b́enwōŋ bootya á Galilia áp̄ε á Jerusalem. B́oob áb̄é bad b́óó b́ékanle' bad bé Israel dyam áde b́enyín̄n̄é.

32 B́oob-p̄oó n̄m̄én nkalan̄ n̄í bwām móo sépiínédé nyé. M̄m̄é nkalan̄ n̄ídi n̄én bán dyam áde Dyōb dénh̄h̄bp̄é áá móób̄é áb̄ed betaa alónté d̄ó ne syánē.

33 Alónté dyam áde ánh̄h̄bp̄é ne syánē awé dedé n̄chyaátén n̄m̄āb, apuud áde apúúdté Yesue. Né-'áá éténlédé á kálag e Nḡase e Dyōb eché elóntén̄é ébe bán,

'Edii awem mwān,
chii ndii Sóó.'

34 Dyōb d̄empuúđ mó ésebán atime ámbíd á ndoob se áb̄o. Dyōb dénh̄h̄b̄ t̄əŋgene n̄é áá,

'M̄b̄ě w̄ε n̄nam n̄í ngəŋgú, n̄íme méehid̄tə ásé, n̄íme ménh̄h̄bp̄é m̄éé m̄b̄ě k̄ān Dabidε.'

35 Né-'áá áh̄óbé p̄ed empée ẃεε éténlédé bán,
'Ẃéekw̄ent̄énn̄é ẃεε awōŋ mbaledε awé abenle w̄ε ne nlém nhóg áb̄o á soŋ-t̄.'

36 Debii nén bán áde k̄ān Dabidε ábédé á alongé, ab̄nl̄é'áá Dyōb ngáne Dyōb áh̄édé'áá. Ambíd e n̄é, anẃé, b́elímé mó ẃεε b́enl̄m̄ēē áb̄é betaa, áb̄oó-'ε.

37 Boŋ ane awé Dyōb d̄empuúdté, enk̄emb̄oó-'ε.

38 B́oob-p̄oó, a-baányan, nyét̄əŋgéné abii bwām nén bán, Yesue mó akáá boŋ b́ékanlé nyé bán Dyōb álagsan bad mbéb.

39 Nyébii-'ε nén bán kénz̄éé awé adúbp̄é mó akóbnédé á'sō é' Dyōb n̄éε mod awé at̄əŋgéné. Mbéndé e Mose eéh̄ele'áá-se ébel ákobnéd.

40 Né-oó, nyétéd pón̄d̄é ábel boŋ dyam dé ebébtéd áde bekal bé'dáádəŋ béh̄h̄bp̄é déeb̄enlāád ne nyé. Béh̄h̄b̄ bán,

41 'N̄oné', nyé bad ábe nyéwele Dyōb! Ȳl̄ ék̄ōm nyé áte, nyéew̄-ε,

áyale n̄én, dyam áde mébenlé n̄m̄én mesú,
ádii dyam áde nyéedúbéé ké mod anlúmed̄ nyé áte.' "

42 Pón̄d̄é eché Paale b́ó Banabase b́ébidéé á ndáb e mekáne, bad b́enlāā b́ó bán b́ep̄é ámp̄é á mbwε-mé-nkóme-áte n̄íme r̄h̄úé' áhye délāá b́ó n̄ímé mekan ámp̄é.

43 Ade bad b́emáá ahide á mekáne, bad bé Israel híin ne bad híin b́emp̄ē ábe b́enwōŋ adúbe á bad bé Israel b́enh̄íd Paale b́ó Banabase. Paale b́ó Banabase b́enkalén áb̄é bad, b́ewéd-t̄e b́ó nlém á abum bán b́éb̄é b́ekude n̄m̄én nsimé n̄íme Dyōb ábágé b́ó.

44 A mbwε-mé-nkóme-áte n̄íme mém̄b̄adt̄en, benben ne baásyāal ábe b́ebédé á dyad-t̄é w̄é, b́em̄maá ámbíd, áhye déwóg eyale éche Sáŋgẃéé.

45 Ade bad bé Israel b́enyíné ene ndun e mod, kónj̄i embé b́ó áte bwám̄bwam. Dyam téé áde Paale áh̄óbé'áá, b́éh̄óbé'áá bán ádii metóm, b́éh̄óbé-'ε mó mekan mé mbéb á ȳl̄.

46 Paale b́ó Banabase b́ém̄b̄é b́éh̄óbé b́oob ésebán b́ebáa' dyamdyam. B́éh̄óbé'áá nén bán, "Nyé bad bé Israel nyéε sént̄əŋgēnn̄é eyale é Dyōb asébe dé akale. Boŋ ngáne nyébáá ch́ó áyāl, nyéétédé-'áá ȳl̄ n̄éε bad ábe

békwoǵnéde ákud alongé áde déemaá', né-óó, sɛ́ɛ́ɛde nyé, séke wée bad ábe béesɛ bad bé Israel.

⁴⁷ Dyam áde Dyöb áhóbé aá débel ádíi, nén, 'Mbánné wɛ néé e'nyínen bé ekíde é' bad ábe béesɛ bad bé Israel ábel bon bad bé nkòǵsé bésyáál békud e'sooson áwon mbíd.' "

⁴⁸ Ade bad ábe béébéde bad bé Israel békóǵé nê, bém̄bē menyinǵe, békɛné-'ɛ nkalaǵ níme Sǵǵwéé. Bad ábe bépweǵnéde nén bán békúd alongé áde déemaá' béndübē Sǵǵú Yesue.

⁴⁹ Moosyáál awé ambé ene pɛd e mbwóg anwóg nkalaǵ níme Sǵǵwéé.

⁵⁰ Bon bad bé Israel békón baám̄báá bé dyad ne bebaád bém̄báá ábe békénlé'áá Dyöb. Béchódé-'aá Paale bó Banabase yál áte, bén̄n-ne bó áwab mbwóg.

⁵¹ Ade békédeé ake, békúd ebumbú á mekuu álúmed ábē bad nén bán nkòǵɛn ne bó. Ade bém̄áá ábel nê béké á dyad á Ekoniom.

⁵² Bad ábe béndübē Yesue á dyad á Antyog békón ne menyinǵe békón-ne ne Edáðan éche Esáá.

14

Nkalaǵ ní bwám nípedé á dyad dé Ekoniom

¹ Ade Paale bó Banabase bépédé á Ekoniom, béké á ndáb e mekáne. Békál nkalaǵ níme Yesue áwed, nyaa eché bad híin bé Israel ne ábe béébéde bad bé Israel béndübē Yesue.

² Bon bad bé Israel ábe békénkobé adúbe, békón bad ábe béesɛ bad bé Israel, béké bó mewém̄ten mé mbéb áte tǵǵene bad ábe béndübē Yesue.

³ Paale bó Banabase bém̄bém̄ áhed, békálé nkalaǵ tǵǵene dyam á bwám áde Dyöb ábénlé bad ésebán békáá' dyamdyam. Sǵǵú Yesue ambél békúlmed e'chemléd, békél-le menyáké híin, álúmed nén bán mam ním̄é ábē bembape békálé'áá tǵǵene ním̄é nsimé méde mbále.

⁴ Nkabén mém̄bē áttínté e bad bé dyad. Donǵe á bad békím̄én bad bé Israel ábíní-'ɛ békím̄én bembape bé nlómag.

⁵ Dóo bad ábe béesɛ bad bé Israel ne bad bé Israel nchoo ne ábāb benkam̄lɛnɛ békíde bán békagéd Paale bó Banabase bán békúlmed bó meláá.

⁶ Ade Paale békónné nê, békón béké á mbwóg e Likonia békól á myad mé Litra ne Debe ne abwóg áde ábédé benben.

⁷ Békálé'áá nkalaǵ ní bwám ním̄é mebwóg mésyáál.

Mam níme mébénléde ne Paale bó Banabase

⁸ Mod abédé á dyad á Litra, mekuu ménwē mó. Nê dóo békhyāá' é mó, eékí-'áá mbéd.

⁹ Ade Paale ákálé nkalaǵ ní bwám, ambé áhed áwóǵlān. Paale annyín aá awóó adúbe aá móhele módyéé bwám, dóo Paale ánné mó chóǵ,

¹⁰ bon áchǵtɛ ehób ámín aá "Syáó ásé, étyéem ámín." Ane mod ahebé-'aá ámín, ábootéd-ɛ ake.

¹¹ Ade ndun e mod eché ebédé áhed ényíne dyam áde Paale ábélé, béké e'sáá á ehób é Likonia bán, "Myöb mésubé áse métimé baanyon, áhye dé awóǵɛn sé."

¹² Békǵ Banabase bán mó adé dyöb áde békǵé bán Zeuse békǵ-ke Paale bán mó adé dyöb áde békǵé bán Hɛmɛse áyále mó áhób'áá búm̄.

¹³ Abón áde békénlé'áá dyöb áde békǵé bán Zeuse áte ábédé ámbíd e dyad. Né-óó, prise awé Zeuse ampɛn nyag ne mbonja á mmwe mé e'ké é dyad. Ambel nê, áyále bókbe ene ndun e mod békéde'áá Paale bó Banabase méde ábe.

14 Ade Banabase bó Paale béwógé dyaam áde ábê bad béhedeé abel, bénsaltdé mbóté á yál, bényágéd bésól áfinté e ene ndun e mod bébōnē béhōbē bán,

15 “Cheé ékás bon nyébelé nēn? Sēmpē sēdii baányon melemlem ngáne nyēē nyédii. Sēpedé hēn, ákale nyé nkalan ní bwám níme Yesue, ábēl bon nyéchene ábēn bwēm ábe béesē dyaam dé abelen, nyéhíde Dyób dé alongé áde áhágé nkon ní mín, ní sé ne edib e nkwe ne bwēm é’syāal ábe é’dé áwēd-te.

16 Bósd Dyób déntédé bad bésyāal ábēl kéchéé éche bédás.

17 Bon kéné, alúmte e’chemléd nēn aá módē, abel áde ábeléé mekan mé bwám. Alómme nyé mbúú echē ebide ádyób, ábagé-’e nyé mbote á pónde eche etángéné. Abage nyé medyé, áwōgtē-’e nyé menyinge.”

18 Ké nēngáne Paale bó Banabase bénhōbpē nímén mekan mésyāal, éebédeé bó mwán e akan ákōn bad ábe mendē níme béhédé’áá abe.

19 Donge á bad bé Israel bémbíd á dyad á Antyog á mbwóg e Pisidia, bébid-te á dyad á Ekoniom bēpē á Listra. Béntéd ene ndun e mod nlém á abum, bósbōo bélúm Paale meláá, bédol mó ásē, bébided mó á dyad-tē ne mewēmten nēn bán awédé.

20 Bon áde bad ábe bédúbpé bēpédé bon bēlōnéd mó, anhidé ásē átm ámbid á dyad-tē. Néé bīn é’sángé, dōo bó Banabase békíí á dyad á Debe.

Paale bó Banabase bétimé ámbid á Antyog

21 Paale bó Banabase bēnkāl nkalan ní bwám á dyad á Debe, bēmbēl bad híin bétim bēbé bembapēē ábe Yesue. Ámbid enē, bēntim ámbid á myad mé Listra, Ekoniom ne Antyog á mbwóg e Pisidia.

22 Hóm ké áhéé áde bēmpēé, bēyágté’áá bad ábe bédúbpé Yesue béwéde-’e bó nlém á abum, ábēl bētyeem á adúbe-tē. Bēyágté’áá bó bán “Detángéné metake akud bon déésāl á nkamlen ní Dyób.”

23 Mwembé ké ríhéé níme bēmpēé, bēpwédáá bad ábe bēlyágte’ níme mwembé. Nzé bēnkānē, bēdid-te yál nzaa á mekáne-tē, bēbē belyáged á mekáá níme Sāngwéé awé bésúmé nlém á yál.

24 Ade bémádé mbwóg e Pisidia áte, bēmpē á mbwóg e Pamfilia.

25 Bēnkāl eyale é Dyób á dyad á Pēga, bon bēsyógké á dyad á Atalia.

26 Áhed-táá bēsyángé bon bēchabpé edib, betimé ámbid á Antyog, wēē bēnkānēdtē bó bán nsimé ní Dyób nílyáged bó áyāle nsón níme bémádé bóob.

27 Ade bēpédé á Antyog, bēnlād bad bé mwembé áte, bēláá bó mekan mésyāal níme Dyób ábēlé mbwiined ne bó. Bēnlāā-’e bó ngáne Dyób ánédte nzii echē bad ábe béesē bad bé Israel bédúbpé Yesue.

28 Bēnkoód-te mwá adyēe áwēd ne bad ábe bédúbpé Yesue.

15

Mbom níkóbté á Jerusalem ámad ehōb á mwembé-te

1 Bad behóg bēmbíd á mbwóg e Judeya bēpē á Antyog. Bēmbootéd bad ayáged nēn bán, “Nzé bēeyage mod ngáne mbéndé e Mose éhedeé, né éekudté e soosonj.”

2 Nēn dēmbēl Paale bó Banabase bēswāntánnáá ngine ngine káon bósbōo bétii bán Paale bó Banabase ne nguse é bad émpēe bēké á Jerusalem, bēké bēnyín bembapēē bé nlomag ne belyáged bé mwembé tāngene áde áton.

3 Bad bé mwembé bēnyáged bó á nzii. Bēmbwé á mbwóg é Fonia ne Samaria bēlángé bad ngáne bad ábe béesē bad bé Israel bédúbpé Dyób. Mmén nkalan ménwōgéd bad ábe bédúbpé Yesue menyinge.

4 Ade Paale bó Banabase bépédé á Jerusalem, mwembé níme médé áwed, bembapere bé nlomag ne belyáged bé mwembé bēnkob bó nken. Paale bó Banabase bēnlāā bó mekan níme Dyōb ábélé mbwiined ne bó.

5 Bonj donje á bad ábe bédúbpé Yesue ábe bémbé epepe éche Befarisia bentyēm ámín, bēhób bán, “Bétánjéné bad ábe béese bad bé Israel ábe bédúbpé Yesue ayag, beláá-’é bó bán bétánjéné mbéndé éche Mosee ahíd.”

6 Dóo bembapere bé nlomag ne belyáged bé mwembé békóbé mbom ānon adē akan áte.

7 Ade belébé aswanjen dóo Petro átyéémé ámín bonj áhōbē aá, “A-baányan, édē etūn é pōndé bōob áde Dyōb ápwédé me áfinté echēn, ákale bad ábe béese bad bé Israel nkalanj ní bwām ábel nēn bēwōg mó bédúbe-’e.

8 Dyōb áde ábíí-’e moosyāl nlém áte, alúmté aá móbagé bad ábe béese bad bé Israel kunze ádúbe, abe áde ábágé bó Edáádānj éche Esáá melemlen ngáne ábágé syánē ámpē.

9 Dyōb dénkéntédé bó aá bédé nhājén ne syáné ké mwāmpín. Anlagsén bó mbéb áyāle adúbe áde bēnwālē.

10 Bōob-pōó, cheé ékás bonj nyéhédé’ Dyōb akag, ápémed bad ábe bédúbpé Yesue nted níme ábēd betaa bēnkēnhenlé apém níme ké syáné déheleé apém?

11 Eeboo’ é nē! Dedúbpé dekadé-’e e’soosoj mbwiined ne nsimé níme Sāngú Yesue, melemlen ngáne bómpē békúdé.”

12 Moosyāl anlám ehób bēwōglān Banabase bó Paal. Banabase bó Paal békánlé’ áá bó e’chemléd ne menyáké níme Dyōb ábélé mbwiined ne bó áfinté e bad ábe béese bad bé Israel.

13 Ade bēmadné, dóo Jemse áhōbēé aá, “A-baányan, nyéwōglēn me!

14 Simōne alúmté syánē áte hēn bōob ngáne Dyōb ábootédé ábē e’bonj bé nlém alúmed wēe bad ábe béese bad bé Israel, átéd áde átédé bad áfinté echāb ábē ábē bad.

15 Nēn dēn ábélé e’yale ábē nkal é’dáádānj é’lóné. Eténlédé nēn bán,

16 ‘Me Sāngwéé nhóbé meé, nzé nēn ámáá atóm, mēpē ámpē,

mēlōnj ndáb echē Dabide ámpē echē empáa.

Mēlōnj chōm ésyāāl éche émpāntēd áte nítmēd-te chó ngáne énsēbēē abē.

17 Nē débēl bad bé nkōjsé bēsyāāl bēpē áwēm,

nīpwédé bad ábe béese bad bé Israel ábē ábēm bad. Me Sāngwéé meé nhóbe.

18 Mēe mbelé bonj nímén mekan mébyéén se’ bōód.’ ”

19 Dóo Jemse ákagké á’sō aá, “Ne me, nímém mewēmten médé nēn meé deétagtē bad ábe béese bad bé Israel ábe bétímné Dyōb.

20 Chōm éche détánjéné abel édii átele bó kálag nēn bán bēedyāg medyé nímé bēbágé myōb mémpēe née mende, áyāle nímé medyé méésáa’é, bēekābē mesón, bēedyāg nyam echē bēesēlēē nkāj, bēedyāg-ke mekií.

21 Debíí nēn bán se’ bōód beláá’áá mbéndé éche Mosee á ndáb é mekáne á mbwe-mé-nkóme-áte. Békale-’e ábē e’yale dyad ne dyad téé.”

Béténlé bad ábe béese bad bé Israel kálag

22 Dóo bembapere bé nlomag ne belyáged bé mwembé, ne bad bé mwembé bēsyāāl bēnyíné nēn bán ébóó bán bēpwēd bad áfinté echāb, bēlóm bó á Antyōg nchoo ne Paale bó Banabase. Bēmpwēd Judase awé bēchágé’áá bán Basabase bó Sailas, bó bad bēbe ábe belyágté’áá áfinté echāb.

23 Kálag eche bēnlōmēnnē bó á Antyōg, ebédé nēn, “Sé bembapere bé nlomag, ne belyáged bé mwembé, áben baányan, sēlōmme nyé melēnten. Nyé ábe nyédé bānned ábe nyéese bad bé Israel. Nyé ábe nyédye á dyad á Antyōg ne á mbwōg é Siria ne Silisia.

²⁴ Sēsōŋténé nén bán bad behóg ábe bébíde áwēd, bēmpĕ áwēn, bépuutád nyé nló áte ne mam níme béhóbé'áá. Bon nyébii nén bán sēnkēmbagké bó kunze ábel nē.

²⁵ Né-ɔ́, sédyéé áse moosyáál sētíídé nén bán ébóó sépweɗ donje á bad álóm bó áwēn. Béwoón Paale bó Banabase ábe sédáá bwámbwam.

²⁶ Bó bad bébe bébage yál ábele echēd Sáj Yesu Krístəá ésebán bébáá' kwééd.

²⁷ Né-ɔ́, sélómme nyé Judase bó Sailas, bélāá nyé melemlém mé mekan níme séténlé nyé.

²⁸ Edəádəŋ éche Esáá élyágté sé átii nén séetagté nyé ne mekan mémpĕe étóméé nímén mekan níme médé etognén.

²⁹ Nyéedyág medyé níme bébágé myóɓ mémpĕe néé mendé, nyéedyág mekií, nyéedyág nyam ké póg eché béésélé nkáŋ, nyéekābĕ-'é mesón. Nzé nyéebĕlé nímén mekan né ébōŋ. Dénýinne' ámpĕ."

³⁰ Ade bémáá ene kálag atel, bénylāgēd ábĕ bad á nzii, béke-'é á Antyɔg. Ade bépédé áwed, bēnlād bad ábe bédúbpé Yesuε bésyāál áte bon bébe bó kálag.

³¹ Ade ábĕ bad béláá ene kálag, bēmbĕ menyinge bwámbwam áyāle nkaləŋ mé e'wēd bé nlém níme mbédé áwēd-te.

³² Judase bó Sailas bébédéé bekal bé'dəádəŋ, bēnkálén-ne bó áyāle e etún é pónde, bēnhādĕd bó mewēmten bēwēd-te bó nlém á abum.

³³ Ade bélébé mwá adyεε áwed, bad ábe bédúbpé Yesuε bénylāgēd bó ne nsəŋ bon bétím ámbíd wée bad ábe bēnlóm bó.*

³⁵ Paale bó Banabase bēndyεé á Antyɔg mwá etún é pónde. Býāgtĕ, bēkalé-'é eyale éche Sāŋgwéé nlatén ne ekud é bad émpĕe.

Paale bó Banabase békabné áte

³⁶ Eebeméé áte ámbíd enĕ, dóo Paale álāŋgĕé Banabase aá, "Détim ámbíd, déke dénɔn ábēd baányəŋ bé Krísto dyad-té áde dékálé nkaləŋ níme Sāŋgwéé, bon déhēd-te áte ngáne mekan mékééneé bó."

³⁷ Banabase anwóŋ mewēmten áwāle Jɔn Makɔse áyāl,

³⁸ bon Paale annyín aá éetāŋgenéé, áyāle Jɔn Makɔse ansébé bó achene á nzii áde béepídĕs nsón á asóg. Antédé bó á dyad á Pamfilia átím ámbíd.

³⁹ Mpenten ní ngíne mēmpĕ átínté echāb kósŋ békābĕn áte. Banabase antéd Makɔse béchābĕ edib békĕ á aloŋ a Saiprus.

⁴⁰ Paale ámpĕ ampwēd Sailase. Baányəŋ bé Krísto bēnkānnĕd bó bán nsimé níme Sāŋgwéé nlyágté bó.

⁴¹ Paale ambwēn Sailase á mbwóg e Siria ne Silisia békag bēwēdĕ mwembé áte.

16

Timotie awōŋné Paale bó Sailas

¹ Paale bēnkĕ á myad mé Debe ne Listra. Mod nhóg abédé áwed awé béchágé'áá bán Timotie. Nyaá abédéé mmwáád a Israel, mómpĕ andúbé Yesuε, bon sáá abédéé mod a Grikia.

² Bad ábe bédúbpé Krístəá á myad mé Listra ne Ekɔniom bésyāál bēnhōb mam mé bwám tāŋgene Timotie.

³ Ngáne Paale áhéde'áá Timotie awāle áyāl, an'yag mó. Ambel nē áyāle bad bé Israel ábe bébédé níme mebwóg bēmbíí bán Timotie sáá adii mod a Grikia.

* 15:33 Donje á kálag dé'só ábádé nchoo 34: 'Bon Sailase pen antii ad mólyóg dhed.'

⁴ Paale bó Timoti békágé'áá myad ne myad bélāngē bad ábe bédúbpé Krístā mekan níme bembapεε bé nlomag ne belyáged bé mwembé bé Jerusalem bétídé, bélāngē-ε bó bán béhíde nímé mekan.

⁵ Né-óó, mwembé rísyāāl mēmbootéd awúu áte á adúbe-té mesongé mé bad-te méchāgkē epun-téé.

Paale anyiné ndóg

⁶ Paale bóóbe baáb bēmbwē á mbwóg e Frigia ne Galesia áyāle Edāádāη éche Esáá énkēnkwenténné áá bēkal nkalanj mī bwām á mbwóg e Asia.

⁷ Ade bēpédé á nchii nī mbwóg e Misia bēnwanén asól á mbwóg e Bitinia, boη Edāádāη éche Yesue énkēm mwaá áá bésól.

⁸ Né-óó, bēntōm á Misia, bésyōgē káāη bēpē á dyad á Troas.

⁹ Mmē nkou Paale annyín ndóg. A ndóg-te wē, mod á mbwóg e Masēdonia antyéem ácháā mó áá, “Hyāg, á Masēdonia, éhye éwōngen sé.”

¹⁰ Paale amaa'-áá ndóg anyín, dōó séládé yāl áke á Masēdonia áyāle sēndōl áte nēn bán Dyōb áchénlé sé ákal nkalanj mī bwām áwāb.

Mmwaád nhóg awē bēchāgēé

bán Lidia adúbpé

¹¹ Sēnsól á Stīma á Troas, sékē á Samotras ésebán sētyéeme á nzii. Néε bīn é'sāngé sētímé' á Niopoli.

¹² Sébídé-'áá áhed, séke á Filipi. Filipi adii dyad ámbáá á mbwóg e Masēdonia. Abédé káāηne dyad áde mbéndé é Roma chēmpen chóó bēbēnládtáá. Sēdyéé áhed nguse é e'pun.

¹³ A Mbwe-mé-nkōme-áte, sēnsyāó á dyad-té sékē á nkin mé edīb. Sēnwémtén bán sētān abwóg á hōm áhed wée bad bé Israel békānné. Sēnwéyé áhed ne bebaád ábe séntānnē néε bēlādndé áhed, syāābōó sékale'.

¹⁴ Átínté e ábē bebaád mmwaád nhóg abédé áhed awē bēchāgē'áá bán Lidia awē ambíd á dyad á Tiatira. Akábé'áá nyongé, ásomé' mebad níme méyāge' níme mélélé nkun. Ane mmwaád abēnlé'áá Dyōb. Sāngwéé ankéldé-te mó nlem á abum áwōglēn chōm éche Paale áhōbēé.

¹⁵ Bēndusén mwēn ne eche ndáb esyāāl. Ambíd enē, anlébé sé áwe ndáb. Anhōb áá, “Nzé édé bán nyétédé me nēngāne mod awē akoó Yesue adúbe, nyéhye nyédyēē áwēm ndáb.” Ambádnén sé káāη sékē-ε.

Béhédé Paale bō Sailas á mbwóg

¹⁶ Epun ehóg-kōó, sēnké á abwóg dé mekáne, dōó ngōndéré e ntāη póg étáné sé. Edāádāη é mbéb émbē mó áte, ébélé'áá álāngē bad mam níme mēbenléd á'sō é pōndé. Ene nganj éché ákúme'áá embēl bad ábe bēnchan mó ntāη békúde ndun e mōné.

¹⁷ Héε ábóótédé syāābe Paale ahíd, ábōnē áá, “Abén bad bēdii bembālede ábe Dyōb á Ngum. Béhyédé nyé aláa ngāne nyémwéé e'soosōη akud.”

¹⁸ Ene ngōndéré elébé abel nē, epun ne epun-té. Káāηne á asóg Paale anlīη, dōó ákúnnédé boη álāngē' éché edāádāη éche émbē ene ngōndéré áá, “A dīn á Yesu Krístā, nkamlan we nēn meé, bíd enēn ngōndéré áte!” Abwōg-ábwōg éché edāádāη émbid mó áte.

¹⁹ Ade bad ábe bēnchān ene ngōndéré ntāη, bényíné bán nzii e ngáb ekónlédé bō, bēntōl Paale bō Sailas bēdolé bō, békēēn bō wée benkamlene ábe bēbédé átínté e dyad.

²⁰ Bēmpēén bō wée benkamlene bé Roma, bélāngē bō bán, “Abén bad bēdii bad bé Israel, boη bēpédé áwēd hén, bēpēénē mpongé.

²¹ Bényágte bad e'lem bé mbéb ábe mbéndé éche syáné éehedéé. Syánē bēn dedii bad bé Roma, né-óó, deéhēlēē-se dékob nē, deéhēlēē-ε-se dehid nē.”

22 Amute dǒmpɛ dénsɔl áte ábónléd Paale bó Sailas. Dǒo benkamlenɛ bé Roma bésáltédé bó mbóté behú-d-ɛ bó chǒ á yǎl. Dǒo bɛlómé bad bán béswádtéd bó e'tanǵu.

23 Bémáá-'aá bó awanɛn bwám bonj behāg bó á mbwǒg, bɛláá-'ɛ nnǒné mbwǒg bán eehúdé bó ǫ́d á yǎl.

24 Bɛláǵɛ-'aá nnǒné mbwǒg nê, ahé bó á tonj e ndáb e meláá eché edé áte. Anhé bó e'p'wǒg á mekuu.

25 Dyam melúde mé nkuu, Paale bó Sailas békánné-'aá békǒnnɛ-'ɛ Dyǒb ngǒse. Bad bé mbwǒg ábiníí bésyǎál bɛwǒglánnáá bó.

26 Ábwǒg-ábwǒg dǒo ndǒob énnǵnéde áse ngíne-ngíne. Ndáb e mbwǒg énnǵnéde se á mekon. Melemlem mé pǒndé e'kob é'syǎál béndibnéd, bengǒbengǒbɛ ábe bémbe bad bésyǎál áyál bɛnhunnéd.

27 Ade nnǒné mbwǒg ápádté áse bonj anyín ngáne e'kob é'syǎál é'nédnéde, anwémten áá bad bé mbwǒg bésyǎál bémáá asob. Héɛ átédé páá áá mǒsoo' yǎl.

28 Dǒo Paale áchǒgté ehǒb ámín bonj álebpe áá, "Weewúé yǎl! Sé moosyǎál sɛdé hén!"

29 Héɛ nnǒné mbwǒg áhǒbé áá bɛpiined mó etrukán, asól á ndáb-te, ákwɛ Paale bó Sailas á mekuu ánnǎ' ne mbwǒg ní ngíne.

30 Dǒo ábídné bó á ebwǒg bonj áse dté bó aáken, "A besán, cheé nítǵngéné abel ákud e'soóson?"

31 Bɛnlāá mó bán "Dúbé Sǎǵgú Yesue, bonj ékud e'soóson, ádǒn abum á ndáb dǒmpɛ dékúd."

32 Bɛnkálé mó ne moosyǎál awé ambé mó á ndáb nkalanj ní bwám níme Sǎǵwéé.

33 Ene pǒndé chɛn, níme nkuu, ane nnǒné mbwǒg antéd bó, áwǒbɛ bó sii áte. Hê dɛn bɛndusɛn mó ne eche ndáb esyǎál.

34 Dǒo ásonlé Paale bó Banabase á ndáb-te bonj ábagé bó ndyééd. Mwɛn ne áde abum á ndáb bémbe menyinǵe áyále adúbe.

35 Néɛ bín é'sǎǵgɛ, benkamlenɛ bɛnlǒm plúse ne nlébtéd nɛn bán, "Nyéchene ábɛ bad békag."

36 Héɛ nnǒné mbwǒg álǎǵgɛ Paale áá, "Benkamlenɛ bɛlómé nlébtéd nɛn bán béchene nyé Sailas. Né-ǒǒ, nyébid nyékag ne nsanj."

37 Dǒo Paale álǎǵgɛ éché plúse nɛn áá, "Béswádtédé sé e'tanǵu á nhéné áde séebɛléɛ dyamdiam, áde sédíí-'aá bad bé alonj á Roma, behé-'ɛ sé á mbwǒg. Bonj bǒob behédé sé abided á mesǒom-tɛ-yɛ? Eehéɛ-se ébé nê. Abé benkamlenɛ bé Roma bɛn bétǎǵngéné apɛ behye bɛbíded sé."

38 Plúse énkɛ benkamlenɛ bé Roma aláa ngáne Paale áhǒbé. Ade ábɛ benkamlenɛ bɛwǒgɛ bán Paale bó Sailas bédii bad bé Roma, mbwǒg menkób bó.

39 Né-ǒǒ, bɛnkɛ Paale bó Sailas achán, bɛbíded bó á mbwǒg bɛláá-'ɛ bó bán ébonj bán bésyǎá áwáb dyad.

40 Paale bó Sailas bɛmbíd á ndáb e mbwǒg, békɛ á ndáb wɛɛ Lidia. Ade bɛpédé áhed, bɛntán bad ábe bédúbpé Kristǎa. Paale bó Sailas bɛnlāá ábɛ bad e'yale ábe é'wéde bó nlem á abum. Bémáá-'aá bó aláa bonj bésyǎǵɛ.

17

Paale bó Sailas békít á Tesalonika

1 Paale bó Sailas bɛmpǒǵ á myad mé Amfipolis ne Apolonia, bɛpɛ á dyad á Tesalonika. Ndáb e mekáne e bad bé Israel embé áhed.

² Paale ammentén ake á ndáb e mekáne, né-óó anké áwed. Andyéé áwed sòndé élaán. A Mbwe mé Nkóme áte téé, akánlé'áá bad nkalaj ngáne mbídé á kálag e Dyòb.

³ Atógnádtáá bó mam míme ákánlé'áá bó, álumtē-'ε bó áte nén aá Ane-awē-Béwógté atógné néε ákúdé metake ápuū-'ε ámbíd e kwééd. Alángé'áá bó aá "Anén Yesue awē nílángéé nyé nén, mó adé Ane-awē-Béwógté."

⁴ Donje á bad béndübē bán chòm éche Paale áhóbeé édé mbále, né-óó, bēntimén Paale bó Sailas. Bad bé Grikia híin ábe béndübē Dyòb ne ndale é bebaád bé dyad híin bómpē bēntimén Paale bó Sailas.

⁵ Bon donje á bad bé Israel bésídé'áá Paale bó Sailas. Né-óó, bēnlād donje á bad bé mpongé áte, ábe bēbédé á dyad-tē. Bēmbuú áte bépēēn-ne etógké é ngíne. Bēmpēēn epuutéd dyad áte ásyāāl, bēból á ndáb wéeé Jasene ábel bon békòb Paale bó Sailas bēbídén bó á tál e ékwéé.

⁶ Bon áde bēnoné Paale bó Sailas bon béenyíne bó, bēndòl Jasene ne bad bēmpēe ábe bédúbpe Yesue, bépēēn bó á'só é benkamlene bé dyad. Bébóné'áá bán, "Ábén bad bépēēn epuutéd hóm ásyāāl. Bóob-póó, bépédé kááñne áwe syané dyad.

⁷ Jasene ákōō-'ε bó áwe ndáb. Bébó' mbéndé eche Kaisεε. Béhóbe nén bán kñh empée edé eché béchagéé bán Yesue."

⁸ Mmén mekan míme bēnhōbpē mēmbēl ene ndun e mod ne benkamlene bé dyad bépuuted.

⁹ Benkamlene bé dyad bēmbēl Jasene ne bad ábe bédúbpe ábe bēnkōbpē, bóóbóó bésábé mōné ábel bétēde bó, bon bétēdté bó.

Paale hóbe baab békúde metake á Beria

¹⁰ Bín é'híné-'áá hínén, bad ábe bédúbpe Yesue bélóm Paale bó Sailas á Beria. Ade bépédé áwed bēnké á ndáb e mekáne.

¹¹ Bad bé Beria bēnwōñ nlem áwóglēn eyale é Dyòb tómaa bad bé Tesalonika. Epun-tē, bēláá'áá kálag e Dyòb ásonñten ányín ké mekan míme Paale bó Sailas bēhóbe'áá médé mbále.

¹² Ekud é bad éndübē. Ndale é bebaád bé Grikia híin ne baachóm bé Grikia híin bómpē béndübē.

¹³ Bon áde bad bé Israel bé Tesalonika bēwógé bán Paale akalé eyale é Dyòb kááñne á Beria, bēmpē áwed, bēbōōtēd ekud é bad asól áte ápēēn epuutéd.

¹⁴ Abwōg-ábwōg dōó bad ábe bédúbpe Yesue bélómé Paale á nkin mé edib é nkwe, bon Sailas bó Timoti pen bēnlýāg á Beria.

¹⁵ Bad ábe bēnké Paale alyáged, bēnkēēn mó kááñ bépēēn mó á dyad á Atens bon bétimé ámbíd á Beria. Ade bétiméé ámbíd, Paale anlyágtén bó aá bēláá Sailase bó Timoti nén bán béhye bétán mó á Atens ésebán bēbēbte pónde.

Paale akanlé bad bé Atens

¹⁶ Paale andyē á Atens ásiné' Sailase bó Timoti. Ngáne ásiné'áá bó, nlem mēmbēb mó á abum bwám bwam áyāle annyín nén aá myòb mēmpēe míme bēbageé edúbé mēlóné dyad áte ásyāāl.

¹⁷ Né-óó anké á ndáb é mekáne ákanlé bad bé Israel ne bad ábe béesē bad bé Israel ábe bēbage Dyòb edúbé. Akagé'áá kááñne áfinté e dyad epun téé ákanlé kēnzéé awē ampē áhed.

¹⁸ Bóóbe bad ábe bēbédé á e'pēpé ábe bēchágé'áá bán Epikurian ne Stoik bómpē bēpéntánáá. Donje ásedtē'áá bán, "Cheé anén mod awé abíde dúu múmó áhóbeé áde éebii'ε dyamdyam?" Bēmpēe bēhóbe'áá bán "Edé kabyánán áhóbe tññene myòb mēmpēe." Béhóbe'áá nē, áyāle álángé'áá bó tññene Yesue ne mpuu.

19 Dóo bétédé Paale békēēn mós á káánsel e mbwóg eche béchágé'áá bán Ariopagus.* Béhñb bán “Sédáá adén ayóge dékōlē áde élanḡeé bad asōḡten.

20 Donḡe á mam áde éhóbéé adé sé nken á etúu, séédāḡ-’e mós asōḡten.”

21 Bad bé Atens bésyāāl ne beken ábe bébédé áwed, bébébté'áá echab póndé esyāāl ákal ne áwóḡlen nkalan tḡngene dyam dékōlē-té.

22 Dóo Paale átyéémé amín á'só é káánsel é Ariopagus bon áhóbé nén aá, “A-bad bé Atens nnyine’ nén meé, nyébage myób edúbé bwámbwam.

23 Nhóbe nén áyāle áde nítóméé nyé á dyad-té, nnóné mebón níme nyébageé myób edúbé. Nnyíne abwóg ahóg áde nyétélé áhed nén bán, ‘Hóm áde dyób áde déebyéene.’ Adé dyób áde nyébageé edúbé kénéé nyéébíí’ é dós, dós nlanḡeé nyé bōb.

24 Dyób áde áhágé nkōḡsé ne chóm esyāāl éche édé áwed-te, mós adé Sāḡwéé a nkon mí mín ne rísé. Eedyēē’ é á ndáb é myób éche baányon bélónné mekáá,

25 eéhēdē-’áá chómchóm éche déhele débe mós abele áde débēnléé mós. Ngáne édíí nén bán mwēn-éé abage alongé, ábage pemē ne kéchéé éche déhédeé.

26 Mod nhóg mós ánsēbēē ahḡ bon metúmbé mé nkōḡsé mésyāāl mébíđ mbwínde ne ane mod nhóg. Abelé bēdyēē-’e nkōḡsé áte nsyāāl. Adéhób aá móhage bós ammad póndé atíi ne mebwóg wée bēdyéé-’é.

27 Ambel nén, ábel bon béhed mós, nzé béhéde-’e mós béhele-se bényín mós awóg áde bēwógé mós áyāl. Kénē, Dyób déechabnedéé syánē modmod áyāl.

28 Edé nēḡgáne mod nhóg áhóbé aá, ‘Abé áde dedíí ne mós, dedé á alongé, dekaḡ, dedé-’e chóm éche dedíí.’

Edé-’e ámpē ngáne bekal bé ngan béhóbé bán, ‘Syánē ámpē dedíí ábe bán.’

29 Ngáne dedíí-’áá bán bé Dyób, deetḡngeneé néé dékamtanné nén bán Dyób ádíi nēḡgáne chóm éche bēbēnléé gól, sílva ké’ é aláá áde baányon bēbēnléde ádad debyéé bon bēlónn mekáá.

30 A póndé eche bad bēnkēmbíí’ é Dyób, Dyób dénkéntédté mbéb nímad nēḡgáne dyam. Bon bōb alánḡe’ moosyāāl hóm-té aá bétede nímad mbeltéd mé mbéh.

31 Amaá-’e epun é bín atíi, éche ákáādtē mod-téé nkōḡsé áte nsyāāl nyaa eché etḡḡné. Apwedé mod awé ákáād níme nkáá. Alúmté-’e moosyāāl aá ane mod akwōḡnéde, apuud áde apúúdté mós á kwéed.”

32 Ade ábē bad bēwógé Paale ahóbé tḡngene mpuu, donḡe á bad bēwéláá mós bon bós donḡe á bad bēhñb bán, “Sēhede bán ékale sé níme nkalan ámpē.”

33 Ambíd e nē, Paale anhidé átínté echáb.

34 Kóḡḡ ne á asóg, nguse é bad éntimén Paale bédúbé-’e Yesue. Atínté e ábē bad, mod abédé áhed awé béchágé'áá bán Dionsiasē. Abédéé mod á káánsel e Ariopagus. Mmwaád ámpē abédé áhed awé béchágé'áá bán Damarisē ne bad bēmpēe.

18

Paale akil á dyad á Kōrinto

1 Ambíd enē, Paale anhidé á dyad á Atens áké á dyad á Kōrinto.

2 Ade ápédé áwed antán mod á Israel nhóg awé béchágé'áá bán Akwilaa. Bēchyaá mós á Pontus. Mmē mesú mēn dós bós mwaád, Prísilia bēmbídté á

* 17:19 **Ariopagus:** Abédéé káánsel e mbwóg á dyad á Atens.

Italia. Bémblá á Italia áyāle Kaisēē a Roma, Kladiosē antóméd ehāngé aá bad bé Israel bésyāāl bésyāā á dyad á Roma. Paale ankĕ Akwilaa bó mwaád anyín.

³ Andyēén bó bōbōō bébele nsōn. Bómpē, bēlóó'áá tēnde ákud mōné mímé bētoḡnanné yāl melemlem nēngāne mōmpē ábélé'áá.

⁴ Mbwe má é Nkóme áte tēé, Paale akagé'áá á ndáb e mekáne, ákanlé bad bé Israel ne bad bé Grikia ábél bédúbe mam níme áhóbéé.

⁵ Ade Sailase bó Timoti bēbídé á Masēdonia boḡ bētán Paale, ambĕ eche yāl esyāál ákal nkaḡān mī bwām. Alúmté'áá bad bé Israel áte aá Yesue mó adé Ane-awĕ-Béwōgté.

⁶ Boḡ bēpéntánnáá mó, bēhōbē-'e mó mekan mé mbéb áyāl. Nĕ dēmbĕl Paale ankūd ebumbú á yāl álúmed bó nén aá nkōgsēn ní Dyōb n̄sine' bó, aláá-'e bó aá, “Nzé nyēbōó, né nyēbĕn-ēē nyēbelé. Meésáá me áte. Bootya bōōb, nkag nkaḡān mī bwām akal wēē bad ábe béesĕ bad bé Israel.”

⁷ Né-ōó Paale antedé bó áke ádyēé' wēē mod nhōg awĕ béchágé'áá bán Titus Justuse. Tituse abágé'áá Dyōb edúbé, ndáb embé-'e mó bēnbēn ne ndáb e mekáne e bad bé Israel.

⁸ Krispuse awĕ alyāgté'áá ndáb e mekáne mōmpē andúbé Sāngwéé nchoo ne adĕ abum á ndáb ásyāāl. Bad híin-ne ábe bém̄ē á dyad á Kōrinto, bēnwōg nímĕ nkaḡān, bédúbe, békūd-te edusen.

⁹ Ebédé nkuu nhōg Paale annyin ndōg. A ndōg-te wĕ, Sāngwéé anláá mó aá “Weebáá”, kanlé bó ékag á'sō, weétimné mbíd.

¹⁰ Bíí nén wēē ndé ne wē, modmod éhĕlēē wē dyamdyam abel, áyāle ábĕm bad híin bédé á dyad-tĕ hĕn.”

¹¹ Né-ōó, Paale andyēé áwed mwĕ nhōg ne eped, áyāgtĕ bad eyale é Dyōb.

¹² Ade Kaisēē ábélé Galio nkamlēē ambáá á mbwōg e Akaya, bad bé Israel ábe bēmbĕ áwed bēnladĕn, békóh Paale, békēēn mó á kóte.

¹³ Bēnhōb nén bán “Anĕn mod atéde bad nlém á abum aá bēbēnle Dyōb, nyaa echĕ eetēngene ngāne mbéndé éhóbéé.”

¹⁴ Ade Paale áhóbé áá móhōb dyam, dōo nkamlēē Galio álāngēé bad bé Israel aá, “Nzé adĕn akan dēmbĕ nēē awusé ké'ē dyam dé ebébtéd áde mod ábélé, né nwóó nzōm áwōglēn nyé bad bé Israel.”

¹⁵ Boḡ ngāne édíí bán ádíi dyam dé mpentēn tāngene e'yale, mĭn ne échen mbéndé, nyēbĕn nyémad dō. Meekáádtēé éché ndín é mehób.”

¹⁶ Nĕn dēmbĕl Galio anan bó á ndáb e kóte.

¹⁷ Héē bó moosyāál bétólé mod awĕ alyāgté'áá ndáb e mekáne awĕ béchágé'áá bán Sōstēne, boḡ bēbōmé mó á'sō é' kóte. Boḡ nén dēnkēmbēnlé Galio dyamdyam.

Paale atimé ámbld á Antyōg

¹⁸ Paale ankoód mwā adyēē á Kōrinto ne bad ábe bédúbpé Krīstāē. Dōo átédte bó, boḡ asól á stíma, áchappé edīb é nkwxĕ ákág á mbwōg e Siria. Adĕkĕ, ankĕ ne Prísilia bó Akwilaa. Adĕhidé á dyad á Sēnkria, ankāēn nló áyāle melĕ níme ámmwēē.*

¹⁹ Bēmpĕ á Efesus. Ade bēpédé áwed, Paale antedé Prísilia bó Akwilaa, ákē á ndáb e mekáne bōōbe bad bé Israel békale'.

²⁰ Abĕ bad bēnlāā mó bán bōbōō békood mwā adyēē ámpĕ, boḡ enkĕnkwentēnné.

²¹ Boḡ adé áhídté, anláá bó aá “Nzé ntii ní Dyōb mōsō ndé, né mĕtīm ámbld áwĕn.” Né-ōó, ansól á stíma áhídté-'e á Efesus.

* **18:18** Bad bé Israel bēnwōn elem nén bán, nzé mod amwédé melĕ boḡ alógté nímĕ melĕ atāngéne nēē ákōngné nló.

²² Ade ápedé á dyad á Kaisaria, ankë á Jerusalem, áke álɛɛɛ bad bé mwembé, bon ákág á Antyog.

²³ Ade ákɛɛɛpɛ mwä adyɛɛ áwed, anhidé, ákɛ á mbwóg e Galesia ne Frigia ábage bad ábe bédúbpɛ Yesuɛ bésyāɛɛ elébé áwéd bó nlém á abum.

Apolosɛ akalé eyale é Dyöb

á myad mé Efesus ne Kōrinto

²⁴ Ambíid enɛ, mod á Israel nhóg awé béchágé'áá bán Apolosɛ awé bɛnchyaá' é á dyad dé Alesandria ampé á Efesus. Anén mod abyéé'áá dyam ahób bwámbwam, ansóntɛn-ne kálag e Dyöb bwám.

²⁵ An'yógé mekan mé nzii e Sánjú. Akalé'áá, áyāgtɛ-'ɛ bad mekan níme Yesuɛ nyaa eche etāngɛné ne kán esyāɛɛ. Bon pɛn edusen éche Jone chɛmpɛn chós ámbíí' é.

²⁶ Ambootéd póle akal á ndáb e mekáne ésebán abáa' dyamdyam. Ade Prisia bó Akwilaa béwógé mekan níme áhóbɛɛ, bɛntéd mós, békɛɛn mós wɛɛ bédyéé'áá. Hé-'áá bélúmté mós mekan mé nzii e Dyöb áte nyaa eche etāngɛné.

²⁷ Apolosɛ antíí áá mókag á alon á Akaya. Né-ɔ́, bad ábe béndúbɛ á Efesus bɛnwōngɛn mós. Bɛntelɛ bad ábe bédúbpɛ Yesuɛ á Akaya nɛn bán nzé apedé, békob mós nken. Ade ápedé áwed, anwōngɛn bad bwámbwam ábe béndúbɛ Yesuɛ áyāle nsimé ní Dyöb níme békúidɛ.

²⁸ Ne mpɛntɛn ngíne, antóm bad bé Israel áte áfíntɛ e bad. Abɛnlád metón níme mébidé á kálag e Dyöb álúmed nɛn bán Yesuɛ mós adé Ane-awé-Béwógtɛ.

19

Paalɛ akii á Efesus

¹ Apolosɛ ambé abé á Kōrinto, dós Paalɛ ápóó ene pɛd e mbwóg áte bon ápag á Efesus. Antán nguse é bad áwed ábe bédúbpɛ Yesuɛ.

² Dós áseɛtɛé bó áá “Ade nyéndúbɛɛ nyɛnkúid Edáádɛn eche Esáá-ye?” Bɛntimɛn mós bán, “Aáy, sééwōgɛɛ ké wógɛn bán chóm édé éche béchágɛɛ bán Edáádɛn eche Esáá.”

³ Paalɛ ansɛdéd bó áaken, “Nyaa e edusen ehéé-'ō nyɛnkudtɛ?” Bɛnkwɛntɛn bán, “Nyaa e edusen ehéé Jone áhóbé'áá.”

⁴ Paalɛ anláá bó áá, “Nyaa edusen ehéé Jone áhóbé'áá ebédéé áyāle bad ábe bétédɛ ábel dé mbéb, Jone álāngɛ-'ɛ bad bé Israel áá bédúbe ane awé ápɛ ámbíid eché, nédɛ Yesuɛ.”

⁵ Ade ábɛ bad béwógé chóm éche Paalɛ áhóbé, bɛndusɛn bó á dín áde Sánjú Yesuɛ.

⁶ Paalɛ ambán bó mekáá á nló, Edáádɛn eche Esáá éptí-'ɛ bó. Dós bɛbóótédɛ mehób mémpɛe ahób níme bad béesóntánne, békálɛ-'ɛ nkalan ní Dyöb.

⁷ Abé bad bɛbédé dyam dyóm ne bɛɛ.

⁸ Paalɛ andyɛ áwed dyam ngon éláán. Póndɛ-tɛ akagé'áá á ndáb e mekáne, ákanlé bó ésebán abáa' dyamdyam. Bósɔ́ bɛpɛntánnaá, áwané-'ɛ áte ábel bédúbe nɛn bán chóm éche áhóbɛɛ tāngɛne nkamlɛn ní Dyöb édé mbále.

⁹ Bon bó donge á bad bɛnwū nló áte, békobpe adúbe, bɛhōbɛ-'ɛ mekan mé mbéb tāngɛne Nzii e Sánjú á'sō é bad bésyāɛɛ. Né-ɔ́, Paalɛ antédé bó, ákɛɛn bad ábe bédúbpɛ. Epun-tɛ* bósɔ́ bɛpɛntánnaá á ndáb e ayáge eché meléede Tiranuse.

¹⁰ Paalɛ ambɛl nɛn á etún é mwɛ nibe. Nɛ dɛmbɛɛɛ bad bé Israel ne bad ábe béesɛ bad bé Israel ábe bédyéé'áá á mbwóg e Esia bɛnwōg eyale é Dyöb.

* 19:9 Donge á kálag dé'só ábádɛ nchoo bootya dyóm á ngón ne póg e' mbwɛmbwɛ ápɛ ngón éniin é' ngukél.

*Bän ábe Skeva bewartné abided
bad e'daádaj bé mbéb áte*

11 Dyöb dëmbël Paale ábelé mam mé menyáké míme bad békëmmënténné anyín.

12 Bad bétédé'áá ké betumbë ké'ε bewáŋgeε ábe Paale ábénlédé, békëēn wée bad bé nkole, bēbēnlád bō ámad bō nkole, bēbidtē-ε bō e'daádaj bé mbéb áte.

13 Donje á bad bé Israel ábe bōmpē békágé'áá mebwóg ne mebwóg bēbidté bad e'daádaj bé mbéb áte, bōmpē bēnwanén ábenled dín áde Sǎngú Yesue ábel nímén nsón. Béláŋgé'áá e'daádaj bé mbéb bán, “Nkamlan nyé á dín áde Yesue awē Paale ákanlé bad, nén meé nyébíd ane mod áte.”

14 Prisē ambáambáa á bad bé Israel nhóg abédé awē béchágé'áá bán Skeva. Anchyáá bán bé baachóm saámbe. Abē bán bōs bēbélé'áá nē.

15 Bōŋ póndé póg, edaádaj é mbéb énlāá bō nén áá “Mbíi Yesue, mbíi-ε Paale, benzéé nyé-ε nyédíi?”

16 Héε ane mod awē edaádaj é mbéb ebédé áte, ábónlédé bō ne ngíne esyáál, átóm-me bō áte. Bédéhób bán bétóme mehélé né amaá bō álógen, ámad-tē bō mbóté anyabted.

17 Bad bé Israel ne bad ábe béesē bad bé Israel ábe bēdyéé'áá á Efesus bēnwōg ádén dyam. Ade bēwógé dó, mbwóg ménkōb bō bwámbwam. Dín áde Sǎngú Yesue dó-ε dēnkūd edúbé éche échábé ámín.

18 Bad híin ábe bēndübē, bēmpē á nhéné, bēpanlé yál áte, bēhōbē' mekan mé mbéb míme békēbēnlé.

19 Bad híin ábe békúmé'áá nǎŋ bēntēd échab kálag éche bēbēnládtáá ákun nǎŋ, bēpēēn chós, bēhyáád chós á nhéné. Kálag ésyáál éche bēnhyaadte éhéláá-se ébe nkun dyam móom mé míliōn metáan.

20 Mmén mekan mésyáál míme mébēnládtáá ménkōŋ bad híin bēndübē eyale éche Sǎŋgwéé, míme nkalan ríkanlád-tē ngíne ngíne.

Mpongé nípédé á dyad dé Efesus

21 Ade nímén mekan mémáá abenled, Paale ammād awē nlém-té áá mōspōŋ á mbwóg é Masēdonia ne á Akaya bōŋ ákag á Jerusalem. Dōó áhóbéé áá, “Nzé mbídé á Jerusalem ntǎŋgéné áke á Roma.”

22 Né-óó, anlóm bad bébe ábe bēwōŋgánnáá mós, Timotie bō Erastus á Masēdonia, mwēn-ne ályāg á mbwóg e Esia, ádyēē ámpē mwā esōŋ é póndé.

23 Enén póndé chēn dōs mpuutéđ ní ngíne mbédé á Efesus tǎŋgene Nzii e Sǎngú eché bad bēhídé'áá.

24 Mod nhóg abédé bán Demētruse. Alúé'áá bwēm bé e'kii. Abelé'áá bwēm ábe bēnwāgen bwēm é' ndáb e dyöb áde bēchágé'áá bán Atemise. Mmén nsón nípínádtáá ábe bad bé nsón nsyǎŋ míme ríchábé ámín.

25 Anlád ábē bad bé nsón áte ne bad ábe bōmpē bēbélé'áá ene ndín e nsón, álāŋgē bō áá, “Amúē, nyébíi nén bán míme syánē nhōn rísyáál ríhúú ne nímén nsón míme débēléé nén.

26 Bōob-pōs, nyébēn nyēnyíne', nyēwóge-ε chōm éche anén Paale ábeléé. Áhóbe nén áá myöb míme bēbēnlé mekáá méesaá myöb ne abé dēn. Abelé-ε bad híin ábe bédé á Efesus ne á mbwóg esyáál e Esia, bēdūbpé bán mam míme áhóbéé médé mbále.

27 Né-óó mbáá' nén meé, nyoŋgé eche syánē ébēb dín. Saá-kaá nē dēmpēn, mbáá' meé káōŋne ndáb e ndále e dyöb, Atemise chōmpē éebáá dyam dé abelen ámpē. Bad bēnyínné mós ámpē nēε dyam, áde édíi-áá bán adíi dyöb áde bad bé Esia bēsyáál ne bad bé nkōŋsé bēsyáál bēbēnléé.”

28 Ade ene ndun e mod éwógé nē bēnliŋ bwámbwam, bébootéd-tē abón bán, “Atemise, dyöb dé Efesus adé ngum tómaa myöb mésyáál.”

²⁹ Mmê mpuuted mênkonnéd dyad áte ásyāā. Ene ndun e mod entāl Gayōse bō Aristakuse ábe bém̄bíd á Masēdonia ábe bōōbe Paale bēnwōŋ. Béntōmēn bō mehélé, békēēn bō á ndáb e mbom e bad bé dyad.

³⁰ Paale mwēn amboŋsēn ábid ene ndun e mod á'sō, boŋ bad ábe bédúbpé Yesue bēnkēnkwentēnné.

³¹ Nguse é bad ábe bēhōbpáá mbwōg ábe bōōbe Paale bēwóó'áá, bōmpē bēnlōmē mó nlébtéd, ne mechángé nēn bán eékāgē' áá mōkag bad atyéem á'sō wēé beládné.

³² Ene pōndé, epuuted êmpé á mbom-tê. Donje á bad bēbōnē' áyāle dyam ahóg, ábíní-'é bēbōnē áyāle ádíní, áyāle bō bad híin bēnkēmbíí' é ké atón áde áládé bō áhed.

³³ Ngáne edíí nēn bán Alēsandaa móo bad bé Israel béntōmēdtē á'sō, bad behóg beláŋgē' áá mó bán mó atōŋgéné bad mekan alúmed áte. Héē Alēsandaa álúmté ekáá áá bad belám ehób. Ahedé' áá bad alúmed áte nēn áá saké bōōbe ábē bad békáá boŋ mpuuted míbé.

³⁴ Boŋ áde bad béchémé nēn bán Alēsandaa adii mod a Israel, bō moosyāál bēmbootéd abón bán, "Atēmise, dyōb dé Efesus adé ngum tōmaa myōb mēsyāāl." Bēmbōn nēn áyāle háwa ébē.

³⁵ Káōŋ ne á asóg, mod a mbwōg nhóg mó ambēd bad áte. Anhób áá, "A-baānyañ bé Efesus, moosyāál abíí áá dyad dé Efesus dōo ánoŋe ndáb e mekáne eche Atēmise, eche syānē ndāle e dyōb. Moosyāál abíí-'é áá ádén dyad dō anōne káōŋne aláá á ngōŋú áde ábidé ámín.

³⁶ Ngáne nyé moosyāál nyébíí-'áá nēn bán modmod eēhēlēē-se ahé nímén mekan nswañ, éebo' é bán nyépeēn mpongé ké nhóg.

³⁷ Ké nēngáne nyépééné ábén bad hén, bēchíbēé chōmchōm á ndáb é myōb, bēhōbēé-'é áded dyōb mekan mé mbéb áyāl.

³⁸ Né-óó, nzé Demetruse ne ábē bad bé nsón bēwōŋné mod mehób, bēbíi nēn bán e'pun é' kóte é'dé, bad bé mbwōg-ke bédé ábe békáadte. Béhele-se bésómén ane mod áhed.

³⁹ Nzé-'é chōm émpēe édé éche nyéko' é áhed né mbom mí bad bé dyad, móo mēyālē, ngáne mbéndé ékaléé.

⁴⁰ Nhōbe nēn áyāle dyam áde ábēnlédé chii, ngōmena a Roma áhōb áá syāné depēéné mpongé. Nzōm ké póg eésáá echē débēléé nímén mpuuted nysyāāl. Nzōm e bwám ké póg-ke eésáá echē dehele débē bō áyāle nímén mpuuted."

⁴¹ Ade ámáá ahób nē anláá bad áá mod tée asúé' áwe ndáb.

20

Paale akít á Masēdonia ne á Grikia

¹ Ade mpuuted nímáá boŋ ekíde émad ahōo áte, Paale anlād bad ábe bédúbpé Yesue áte, ályāgtān bō ne e'yale ábe é'wéde bō nlém á abum. Ade ámáá bō alyāgtēn dōo áhídté, boŋ ákág á Masēdonia.

² Akagé' áá echē mbwōg, álāŋgē bad nkalan híin níme ríwéde bō nlém á abum. Dōo ápédé á Akaya.

³ Andyēé-'é áhed á etún e ngōn éláán. Abōŋsánnáá áke á alon á Siria, dōo ásoŋténé áá bad bé Israel bēhāgke mó áwúu mó. Héē áfídé áá móōtīm ámbíd móbwē á Masēdonia.

⁴ Bad híin bēnwōón mó. Bébédé Sopataa, mwān awe Piiruse awē ambíd á Beria, Aristakuse bō Sekundus ábe bém̄bíd á dyad a Tesalonika. Gayōse awē ambíd á dyad a Debē, Timotiē, ne Tikikuse bō Trofimus ábe bém̄bíd á mbwōg e Esia.

⁵ Ábén bad bēnkē á'sō, bésíné' sé a dyad á Troas.

⁶ Ade Ngande e Ewele é Ngên étómé, sênsól bõle á dyad á Filipi, boŋ ámbɛd e e'pun étáan sêntán bó a Troas.

Paale adĩmténé ake á Troas

⁷ A Satedé ngukél,* sênladén áte hõm ahóg ádyé ndyééd álúmed edəŋge é Sánjú. Paale akánlé'áá bó póle. Akaláá akal ne akal, kóŋne melúde mé nkuu, ngáne édífí nén bán antəŋgən ake néε bɛn é'sánge.

⁸ Bēnchõd e'trukán hɛn á toŋ ámɛn wéε sēnladēnnē.

⁹ Kódemod póg ébéde echē béchágé'áá bán Yutikuse andyεé á wɛnde, e'chó é'kééné'áá mó mwátɛd tíd ngáne e'chó bémbεε mó á did. Achabed áde Paale ánachabédte póle áte, dēnkən ansól á e'chó-te bwámbwam. Dóo ápódté á toŋ ámɛn á ndágke eláán, ahún á ndəɔb. Békíí-'áá mó atéd, bétānē amaá awé.

¹⁰ Paale ansūd á ndáb mɛn wē, akúdén mó ámɛn boŋ áseb mó. Dóo álāŋgeé bad aá “Nyéētāgē áte, eewédeé, adii adé á alongé.”

¹¹ Dóo Paale átimé ámbɛd á ndáb mɛn, ásal ewele áte boŋ bóɔbe bad ábe bédúbpé Krístəə bédyāg. Bóɔbóo bēnkoód adyεε, békálé' póle kóŋ bɛn é'sáa, boŋ ákag.

¹² Bényāgēd ene kódemod á ndáb áde mwēn ádíí alongé. Abé bad bémbε menyɛŋge bwámbwam.

Paale bésyāngé á Troas, békii á Miletus

¹³ Sēmbé á'só sēsól á stɛma-tē, sēpõŋ á edíb é nkwe, séké á dyad á Asəs. Awed dóo sēntəŋgēnnē Paale apém. Anhób aá sēbē á'só áyāle nzii e dyad-tē chóo ánkēénnē.

¹⁴ Ade átáné sé á dyad á Asəs, sēmpém mó á stɛma-tē boŋ syáábóo sékág á dyad á Mitilēnē.

¹⁵ Sēhɛdté-'áá hē boŋ néε bɛn é'sánge sékag kóŋ sēpāg á nkin rí dyad á Kios. Bɛn bán bésāā ámpē é'sánned sé á nkin rí dyad á Saməs, epun éche émbātēn sēpāg á nkin rí dyad á Miletus.

¹⁶ Paale antíí nén aá sētóm dyad dé Efesus ámɛn ábɛl boŋ sēébébté pónde á mbwóg e Esia. Ahédé'áá aá mówámsen ape á Jerusalem epun é Pēntekəs édēhób bán chó épag áte.

Paale alyágténé belyáged bé mwembé bé Efesus

¹⁷ Ade sēpédé á dyad á Miletus, Paale anlóm nsəl wéε belyáged bé mwembé bé Efesus, aá bétān mó á Miletus.

¹⁸ Bépédé-'áá boŋ álāŋgē bó nén aá “Nyébēn nyébíí ngáne mɛbédé ne nyé bootya epun é'só áde nsumé mekuu á mbwóg e Esia.

¹⁹ Mbēnlé'áá Sāŋgwéé ne asuded á yāl ásyāāl, ríkudé ndutul ne mekəgsen áyāle ahəge áde bad bé Israel béhágké'áá me.

²⁰ Nyébēn nyébíí bán áde ríkánlé'áá nyé nkalan mɛ bwām, r'yāgtē-'ε nyé á nhéné, ne áwen mendáb, menkēnkəŋnédté nyé dyamdyam áde déntəŋgən nyé awóŋgən.

²¹ Melemlem nēŋgáne mēnsimmē bad bé Israel etúu áte nē dó-'áá mēnsimmē bad ábe béesē bad bé Israel mēé bétede ádāb ábɛl dé mbéb, bétimen Dyób, bédúbé-'ε awed Sāŋgwéé, Yesue.

²² Bəɔb-póo, Edəədəŋ éche Esáá élúmtē mε áte aá ntəŋgéné ake á Jerusalem, meebíí-'áá chõm éche ébenléd ne mε awed.

²³ Mbíí pēn nén mēé dyad-té áde ríkagké Edəədəŋ éche Esáá émáá mε etúu asím áte nén aá mbwóg ne ndutul bóo bésine me.

* **20:7** Donje á kálag áhédé nén bán: *á epun é'só é sɛndé.*

24 Boŋ meetédée ádêm alongé nées dyaam, nhede meé nípid nímmém nsón á asóg, nímad-te nsón níme Sánjú Yesue ábágé me áte. Mmém nsón nídíi ákal nkalaŋ ní bwám tâŋgene nsímé níme Dyób álúmtéé baányon.

25 “Mbédé áfínté echên, níkanlé nyé nkalaŋ tâŋgene nkamlen ní Dyób. Bɔɔb-pɔɔ mbíí nén meé nyé modmod nyéenyínné me ámpé.

26 Né-ɔɔ, nkoo’ nyé aláa chíi nén meé, nzé nyé mod ké ahée abódé áde alongé, nyébíi nén bán meésáa me áte,

27 áyále nén dyaam deésáa áde mbáá nyé aláa tâŋgene mekan mésyáál níme Dyób áfíídé áa mɔɔbɛl.

28 Nyétédén yál pónidé, nyénɔne-’e abem á bad áde Edáádəŋ éche Esáá ébánné ásé echên, bwám. Nyébé nées benɔn bé mbód ánon bad bé Dyób. Abél níme mwembé níde níme, mbwiined ne kwééd eché Mwán awédé á awɔg.

29 Mbíi nén meé, nzé mmaá aké, bad bépé áfínté echên melemlem nêŋgáne esɔb ésóléé á abem á mbód. Béehidé-’áa áde béébébtéé nyé mwembé.

30 Pónidé épé áde bad bébídté áfínté echên dên, bénabpé metóm, ábel bad ábe bédúbpé Yesue béhíde bó.

31 Né-ɔɔ, nyétéd pónidé nyékamtan-ne nén bán ní’yágté’áa nyé moosyáál nkúu ne mûte á etún é mwé níláan á metake-té.

32 Bɔɔb-pɔɔ, nlyáge nyé á mekáá mé Dyób meé mwên ánon nyé. Nkalaŋ níme nílángé nyé tâŋgene nsímé ní Dyób méwɔŋgɛn nyé. Nwóó ngíne áwéd nyé áte, mɛbɛ-’e nyé nsímé níme Dyób ákóŋnéde ábɛ bad.

33 Menkênwɔŋgé nílem áte áted mod sílva, ké’e gól ké’e mbóté.

34 Nyébén nyébíi bán nímmém mekáá mên mɔɔ mbénlé nsón boŋ níkud ngáb éche syáabe ábêm bad ábe sébélé’áa nsón séchánné’áa kéchéé éche séntɔgnɛnne.

35 Nlúmté nyé á menzii mésyáál nén meé nyéwéd yál áte ábel nsón ngáne mbélé’áa, ábel boŋ nyéwɔŋgan bad bé nkole, nyékamtan-ne e’yale ábe Sánjú Yesu ánhɔbpé áa, ‘Edé nnam mod ábe tómaa ákob.’ ”

36 Paale amaá-’áa ahób nê, bɔɔbɛ ábɛ bad bébwóg mebólón békáne.

37 Bó baasyáál béchyé’áa áde bɔɔbɔ béhéneé tál bésòmñe-’e ályágtɛn mɔ.

38 Chóm éche émbud bó ndutul awóged ébédéé ahób áde Paale ánhɔbpé áa béenyínné mɔ ámpé mbéd. Dɔɔ békíi mɔ ályáged á stíma.

21

Paale akii á Jerusalem

1 Sényágtɛn bó séké-’e. Sénsól á stíma. Sénchabé edib ésebán sétyéeme hómhóm káŋ sépé á dyad á Kos. Nées bíŋ é’sángé, sémpé á dyad á Rodes. Sésyáŋgé-’áa hê, sékag á dyad á Patara.

2 Awed dɔɔ sétáné stíma eché ekag á Fonisia. Sésólé-’áa boŋ sébwógkɛ’ eke.

3 Sémpé á abwóg á hóm áde sényínáa alon á Saiprus áde áde á mendíb-te. Sémamé dɔ sésyógkɛ á mbəŋ sétímé á mbwóg e Siria. Sénsúd á dyad á Tíre áyále áhed dɔɔ stíma éntəŋgɛnné nted asuded.

4 Séntán donge á bad áwed ábe bédúbpé Yesue, sémbé-’e ne bó áyále e’pun saámbé. Edáádəŋ éche Esáá ényáged bó beláa Paale bán eékag á Jerusalem.

5 Boŋ áde echéd pónidé émáá áte séntédé bó séké. Abé bad bésyáál, ne ábab bebaád bɔɔbɛ bán bénye sé ályáged káŋ syáábɔ sébíi á dyad-té, sépé á nkin mé edib. Syáábɔ moosyáál sémbwóg mebólón, sékánne’.

6 Sémaa-’áa akáne dɔɔ syáábɔ sélyágtɛné, séslé á stíma boŋ bó-’e bétímé ámbíd á ndáb.

7 Sênhidé á dyad á Tíre, sékéené échēd eke á'sō, sépē á dyad á Tolēma. Ade sépédé áwed, sēnlēléd bad ábe bédúbpé Yesue, sédyēē-ē ne bó epun ehóg.

8 Née bīn é'sánggē sēnhidé á Tolēma sékē á dyad á Kaisaria. Ade sépédé áwed sēnkē á ndáb echē nkal-é nkalaj ní bwám nhóg awē béchágé'áá bán Filibē, sédyēē áhed. Filibē abédé nhóg áfintē e bad saámbé ábe bēmpwēdtē née benwōngēne á mwembé ní Jerusalem.

9 Anchyáá bán bé bebaád bēniin ábe bēnkēmbíi mwēnchóm. Béhóbé'áá mam níme níhúú ne Dyób.

10 Ade sédíi áwed, dōo nkal é edāádaj nhóg awē béchágé'áá bán Akabuse ábíde á mbwóg e Judeya bon ápe.

11 Apedé-'áá wēe sémbēē bon átēdē ngáá awē Paale, átádnē níme mekuu ne mekáá bon áhōbē áá, "Edāádaj éche Esáá éhóbé áá, nēn dōo bad bé Israel bētádtē mod awe awóó anén ngáá á Jerusalem, bēbē-ē mó á mekáá mé bad ábe béesē bad bé Israel."

12 Ade séwógé nēn, syáabe bad bēmpēe sēncháj Paale bán eékāg á Jerusalem.

13 Dōo Paale áhóbēé áá, "Chee nyébeleé nē, nyéebíi'ē bán nzé nyéchyē' nyéhúnte me nílem á abum-ē? Saké átád me á Jerusalem dēmpēn-ēé mbōnséné, mbōnséné ké awē, ábele áde níbenléé Sájgú Yesue."

14 Sēnkēnhenlé mé nílem ahājlen á abum, né-ōō sēnchené sēhób bán, "Ebenled ngáne Dyób áfíidē."

15 Sēndyēé á Kaisaria nguse é e'pun, dōo séládé yāl bon sékāg á Jerusalem.

16 Donje á bad ábe bédúbpé Yesue ábe bēbíde á Kaisaria bómpē bēnwoón sé. Bēnkēén sé á ndáb e mod nhóg wēe séntāngēnnē adyēe. Béchágé'áá ane mod bán Naasine. Ambíd á dyad á Saiprus, abédé-ē nhóg awē anlyág Krístā adúbe.

Paale akii Jemse anyin

17 Ade sépédé á Jerusalem, bad bé Krísto ábe bédé áwed bēnkob sé nken ne menyinge.

18 Née bīn é'sánggē syáabe Paale sēnke Jemse anyín. Belyáged bé mwembé bēbédé áhed.

19 Paale anléléd bó. Ade ámáá bó aleled, anhídé bó chōm ésyāāl éche Dyób ábélé áfintē e bad ábe béesē bad bé Israel mbwiined ne nsón níme mó Paale ábélé.

20 Ade bémáá chōm éche Paale áhóbé awóg, bēnken Dyób. Dōo bēlāngēé Paale bán, "Mmōj enyine' née mekan médíi á Jerusalem hén. E'kálé ne e'kálé é' bad bé Israel bédúbpé Dyób bōob. Béhíde-ē mbéndé e Mosee ne kán esyáál.

21 Bēlāngé-ē bó nēn bán eyágte bad bé Israel bēsyāāl ábe bédé melon mémpēe nēn wē bééhídē mbéndé e Mosee. Bán elānge bó wēé béeyagé ábab bán, wēé bééhídē-ē elem éche syáne.

22 Bētāngéné-ē awóg bán epedé. Chán-nō débenlé bōob?

23 Né-ōō, éhíd ngáne sēlāā'ē wē. Bad bédé hén bēniin ábe bēmwédé melē mé Dyób.

24 Wēhíd bó nyáábōo nyéke á nwoobe, ésabned-te bó kéchéé éche bēhédné bó. Ene pōndé dōo béhele békāān nló. Nēn débēl moosyāál ábīl áá dyam ké áhéé áde bēhóbé wē á yāl déesaá mbále. Bēbīl-ē bán mmōj ámpē ebele mekan ngáne mbéndé eche Mosee éhedéé.

25 Bon pēn sēlōmmé bad ábe béesē bad bé Israel ábe bédúbpé Krístā kálag nēn bán béedyág ndyééd echē bēbágé myób mémpēe née mende, bēémwāg mekii, béedyág nyam eche béesinnēé nkāj, bēékābē-ē mesón."

²⁶ Né-ɔɔ, née bɪn é' sánjé Paale antéd ábê bad, bɔɔbɔɔ békɛ á nwobe. Dɔɔ ásolé á Ndáb-e-Dyɔb, ahób e'pun é'tɔɔ nwobe métedtɛ bɔ. Ambíd enê-'é dɔɔ bɛbɛé mende á nló nɪme bɔ mod-tɛ.

Békóbé Paale

²⁷ Ade e'pun saámbe bé nwobe é'kwógé ape á asóg, dɔɔ nguse é bad bé Israel ábe bɛmbíd a mbwóg e Esia bényíné Paale á Ndáb-e-Dyɔb. Héé bɛpɛéné mpuutéed bon bésɔle bad áte, békóbé Paale.

²⁸ Bɛmbootéd abón bán, “A-bad bé Israel nyéhyag sé hén-ee! Anén mod mɔ akag hóm-tɛ áyágtɛ bad áá bad bé Israel, mbéndé éche Mosɛɛ, bɔɔbɛ Ndáb-e-Dyɔb, béesaá chómchóm. Ké bɔɔb dɛn apɛéné donje á bad ábe béésé bad bé Israel á Ndáb-e-Dyɔb-te, nê ábélé-'é enén ndáb e Dyɔb eesáa' é ampɛ.”

²⁹ (Chóm éche énkəɔɔ bon béhóbé nê édíi áyale bényinn Trofimuse, mod a dyad dé Efesus bɔ Paal bɛwóó á dyad-tɛ. Né-ɔɔ, bɛnwɛmtɛn nɛn bán Paale asónlé mɔ á Ndáb-e-Dyɔb.)

³⁰ Dyad ásyāál dɛmpuutéed áte, bad bɛsyāál bɛbíid áwed béhé Paale abum amín, bédolé mɔ kəɔɔn bɛbíidén mɔ á Ndáb-e-Dyɔb. Abwɔg-ábwwg bédib-pe ekob é Ndáb-e-Dyɔb.

³¹ Ade ábê bad béhɛdɛé Paale awúu nê, dɔɔ bad behóg békíi mod ambáá a sánze a Roma aláa bán mpuutéed níde dyad á Jerusalem áte ásyāál.

³² Abwɔg-ábwwg mod ambáá a sánze eebɛbtɛé pónde. Ampwɛd sánze émbáá ne esad ásyɔgnéd bɔ á dyad tɛ wɛɛ bad bɛnkaánné. Bad bényíné-'aa ahúene sánze dɔɔ bésógé Paale abɔmtdɛ.

³³ Dɔɔ mod ambáá a sánze asídtɛ wɛɛ Paale ábédé akób mɔ, ahób áá béhaan mɔ bengɔbɛngɔbɛ bɛbɛ. Héé ásedtɛé ááken. “Nzé-módé nɛn? Cheé ábélé?”

³⁴ Bad bɛmbootéd abón. Baahóg béhóbé échén, ábíníi béhóbé échíníi. Mpuutéed níbédé nya a eche mod ambáá a sánze énkénhɛnlé chóm éche ékóó abɛnled ahɛd áte. Né-ɔɔ, anláá ábê bad áá békɛɛn Paale á ndáb e meláá.

³⁵ Bɛnkɛén mɔ kəɔɔn bɛpɛɛn mɔ wɛɛ mbwóg ébédé á mmwɛ ní ndáb e meláá. Bon áde bɛpédé ásl, bɛmpɛm mɔ amín pɛmɛn áyale amute dɛmmád ayág.

³⁶ Abê bad bɛsyāál béhíidé'áá bɔ ámbíd, bɛbɔnɛ bán, “Bɛwúu mɔ!”

Paale alúmtɛ áte áá mɔskwedéé nkáá

³⁷ Ade béhóbé bán békɛɛne Paale á ndáb e meláá, dɔɔ álánjɛé mod ambáá á sánze nɛn áá mɔwóó mwá dyam aláa mɔ. Dɔɔ ane mod a mbáá a sánze áhóbɛé áá, “Nédé ehóbe ehób é Grikia?”

³⁸ Nédé saké wɛ edé ane mod a Egipto awɛ ampɛ hén pónde póg bon ábootéd mpuutéed. Anléd e'kálé é sánze é'niin, bad bé ewúɛn, ákɛɛn bɔ á ehyanje.”

³⁹ Héé Paale álánjɛé mɔ áá, “Ndií mod a Israel awɛ abídé á dyad á Tasus á mbwóg e Silisia. Mod awɛ abídé á dyad áde áde etógnɛn. Són émwɛ níláa ábén bad akan.”

⁴⁰ Mod ambáá a sánze ambɛ mɔ kunze áá áhób akan. Né-ɔɔ, Paale antyém á'só é' ndáb, alúmed ekáá, ekíde énhɔɔ baámm! Dɔɔ ábóótédé bɔ akalɛn á ehób é Hibru.

22

¹ “A-besán ne baányan ábɛm, nyéwóglɛn mɛ. Nhɛde nyé alúmed áte nɛn mɛé meékwedéé nkáá.”

² Awóg áde bɛwógé née Paale áhóbne bɔ ehób é Hibru, bɛntɔɔn metúu atále áte. Héé Paale ákagké á'só áhóbé áá,

³ “Ndií mod a Israel. Béchyáá mɛ á dyad á Tasus á mbwóg e Silisia, bon á dyad á Jerusalem hén dɔɔ nkwógé. Mbédé mwán a esukéle awɛ Gamalia. Áwe mekáá dɔɔ nítoó mekan mé mbéndé nɪme ábɛd betaa béhíidé'áá ayáge. Mémpɛ mbɛnláá Dyɔb ne kán esyāál melemlem ngáne nyémpɛ nyébenléé mɔ.

4 Bad ábe béhidé'áá Nzii é Krísto menhé bó á meséb, kóŋŋ donje áwāg. Nkóbé'áá bebaád ne baachóm ríhāg-ke bó á mbwōg.

5 Priŋe ambaámbáa ne kaánsel e bad bémbáá esyáál béhele bébid me mbón bán mbále chōó ríkaleé. Menkob kálag áwāb eché béténlé bānned bé Israel ábe bédé á dyad á Damaskos. Né-óó, menké áwed ákób ábê bad, áhanj bó, ápeen-ne bó ámbíd á Jerusalem ábel békógsen bó.

*Paale ahóbé ngáne ámwédé Yesue adube
(Mbél 9.1-19; 26.12-18)*

6 "Áde ríkagké, née nípédé benben ne dyad á Damaskos, emwēdmwēd é ngíne émbíd ámín taléd, épēn me yāl esyáál. Nén dēmbenléd dyam kəd é' mūte.

7 Dóó ríhúné á ndóob bonj ríwōgē ehób élanje me áá 'A-Sool, á-Sool, cheé ékáo bonj étagté me?'

8 Dóó nŋedtéé mó meé ken 'Nzéé édíí A-Sánj?' Bonj áhóbē áá, 'Me-éé ndé Yesue á Nazaret awé étagtéé, awé éhéde á meséb.'

9 Bad ábe syáábōó sēbédé bēnnýn eché emwēdmwēd bonj bēnkēnwógké ehób éche mod awé ahóbé'áá áwēm.

10 Dóó nŋedtéé meé, 'A-Sánj cheé rítāngéné abel?' Dóó Sāngwéé álāngéé me áá, 'Hidé áse ékag á dyad tē á Damaskos. Nzé epedé áwed bēláā we chóm esyáál éche Dyōb áttíde áá ébel.'

11 Eché emwēdmwēd é ngíne émbēl meéhele'áá anyínen. Né-óó, bad ábe syáábōó sēbédé bēnchōó me á ekáá bēkēn me á dyad tē á Damaskos.

12 "Mod abédé á Damaskos awé béchógé'áá bán Ananiase. Abédeé mod awé abēnlé'áá Dyōb, áhíde-'e mbéndé éche syānē bad bé Israel. Anwōŋ edúbé bwāmbwam áttinté e bad bé Israel ábe bédé á Damaskos.

13 Ananiase ámpē áwēm, atyéem me á nkag, bonj áhóbē áá, 'A-mwānned Sool, bootéd anyínen ámpē.' Ábwōg-ábwōg membootéd anyínen ámpē, rínané-'e mó.

14 Anhóbé áá, 'Dyōb áde ábēd betaa ápwédé we ábii níme ntii, ányín awé mbēde awé abele mekan níme metāngéné, áwōg-ke ane mbālede ehób á nsāl.

15 We-éé wēbid mó mbón álāa bad bēsyáál chóm éche ényíné ne éche éwógé.

16 Bōob-póó, cheé-ō ésinéé? Pádé áse, ékwentēn wéé Yesue mó adé we Sāngwéé bédusen we. Nén débēl Dyōb déwobé nímoŋ mbéb.'

*Paale ad Dyōb dlómé mó wéé
bad ábe béesē bad bé Israel*

17 "Mentím ámbíd á Jerusalem. Ade ríkānnéé á Ndáb-e-Dyōb mennyín ndóg.

18 Á ndóg-te wē mennyín Sāngwéé. Anláá me áá, 'Belé mehélé éwamsen ahíde á Jerusalem áyāle bad ábe bédé á Jerusalem hén bēekobpé chóm éche wéhōbpé tāngene me.'

19 Dóó me-'e ríkwentanné Sāngwéé nén meé, 'A-Sánj ábén bad bēbíí bwām nén bán nkagé'áá á ndáb é mekáne ríkōbē, ríwanné-'e bad ábe bédúbpe we.

20 Á pónde eche bēwúé'é Stefanuse awé ahóbé'áá mam tāngene we, mmēn membé áhed, ríkwentén meé bēwúú mó, me-'áá menwálé nkobe níme bad ábe bēnwūú mó.

21 Dóó Sāngwéé álāngéé me áá, 'Kāg, áyāle mēlōm we nchabnede, wéé bad ábe béesē bad bé Israel.' "

22 Ábē bad bēmbē bēwōglān Paale káŋŋne á pónde eche áttúbé díŋ áá mókag wéé bad ábe béesē bad bé Israel. Hé dóó ábē bad bēbóótédé abón bán "Nyémaden mó! Nyéwúú mó! Eékwognedéé ábē á alongé."

23 Bébóné'áá bēpebté mbóté ámín, bēpumtē-'e ebumbú ámín.

24 Héε mod ambáá a sánze álángeé éche sánze aá bétêd Paale béκεεν mó á ndáb e meláá. Anláá-ε bó aá béswádted mó e'tanjú ábel bonj áhób nζom eché ekáá bonj bad bé Israel bétogké mó.

25 Bonj áde beháá mó ábel béswádted mó e'tanjú, dóo Paale áseɔtεé sánze eché embé mó benben aáken, "Mbéndé ebagé kunze nén bán béswádted mod awé mbéndé e Roma ébélé mó mod a Roma e'tanjú áde béekáadtεé mó-ye?"

26 Ade ene sánze éwógé nê, ankε wée mod ambáá a sánze áseɔtεé mó aáken, "Cheé wεwε ébelεé? Ane mod adii mod a Roma."

27 Dóo ane mod ambáá a sánze ákii wée Paale bonj áseɔtεé mó aáken, "Láá me, mod a Roma móo édíi-ye?" Dóo Paale ákwentanné aá, "Eε."

28 Héε mod ambáá a sánze áhóbéé aá, "Nsábpé nkúú mí moné bonj ngómenaa a Roma ákwentén aá níbê mod a Roma." Dóo Paale áhóbéé aá, "Me pen ndé mod a Roma se á nchyáátén."

29 Ade bad ábe behédé'áá Paale awanen béwógé nê, ábwóg-ábwóg béntedé mó, bésidé ámbíd. Mbwóg ménkōb ane mod ambáá a sánze áde ádíbté nén aá Paale adii mod a Roma aá móhede-ε mó á mehanj áde mónkéntánjénné.

Paale atyéémé á nkáásé á'só é' káánsel

30 Mod ambáá a sánze ahédé'áá akonj dé ahead áte ásojten chōm éche bad bé Israel behóbé bán Paale abelé. Né-óó, néε bīn é'sánjé, anhób aá behūd Paale bengóbéngóbé á mekáá, anlébé-ε beprise bémbáá ne káánsel esyáál aá bóóboó békōb mbom. Dóo átéde Paale bonj áttíde mó á'só ábáb.

23

1 Paale annōn ábê bad bé káánsel á míd mé mbom, bonj áhōbē aá "A-baányan, káájne e'chii, nlém nísáá me á abum bwámbwam nyaa eché ádēm alongé ádíi á'só é' Dyōb."

2 Héε prise ambáámháa, Ananiase, álángeé bad ábe bébéde benben ne Paale aá bébom mó abén á nsál.

3 Dóo Paale áhóbéé aá, "Dyōb ámpé débōm wε. Ehóhó é chōm chén! Edyεé hē ebēnlad mbéndé ákáad me, bonj ké nê, mmōn ebóo' mbéndé áhób áde éhóbé wéé bébom me."

4 Héε bad ábe bémbē benben ne Paale bélángeé mó nén bán, "Esyáá' prise ambáámháa a Dyōb."

5 Paale ankwentén bó nén aá, "A-baányan, menkēmbíí'ε meé mó adé prise ambáámháa. Eyale e Dyōb éhóbé aá, 'Mod eetánjengeé mod awé akamlan bad mekan mé mbéb áhób áyāl.' "

6 Ade Paale anyiné aá áttinté e echonj é bad éche ébéde áhed, baahóg bédé bad bé epepé é Sadusia ábíní-ε bédé bad bé epepé é Farisia, anchágéd ehób aláá bad bé káánsel aá, "A-baányan, ndii mod a epepé é Farisia mbé-ε mwān a mod a epepé é Farisia. Ndé á nkáásé hén áyāle nén nsumé nlém nén meé bad ábe béwédé bépuú ámpē."

7 Ahób áde áhóbé nê, bad bé epepé é Farisia ne bé epepé é Sadusia bémbōotéd aslen. Echonj é bad éche ébéde áhed énkabén áte.

8 (Nén dēmbēnléd áyāle bad bé epepé e Sadusia bēndūbē nén bán nzé mod awédé eépuudéé ámpē, bédúbé bán ángel éesaá, bédúbé-ε nén bán e'dáádānj béesaá. Bonj Befarisia pen bēndūbē bán mímén metón mesyāāl meláán medé.)

9 Ehób émbē échágké ábē bad ngine ngine dóo donje dé bemelēede bé mbéndé ábe bémbé a epepé é Befarisia bétyéémé ámln, bébōotéd abón ngine ngine bán, "Sényīnneé anén mod awusé ké ahóg. Kapóg né edáádānj ké'ε ángel ekoó mó dyam aláá!"

10 Mmê mpenten ménchāgē nyaa echē nlém rihúné'áá ane mod ambáá a sánze aá béhele bényāb Paale áte. Né-ɔɔ, anláá éche sánze aá béke á amute-tē wē, béhūt Paale á mekáá nīme ábē bad bonj békeɛn mɔ á ndáb e meláá.

11 Mmê nkuu dēn, Sāngwēé antyéém Paale á nkəg, aláá mɔ aá, “Weebáá’, ngáne ébidé me mbónj á Jerusalem, wēbid me mbónj ampē á Roma.”

Béhógké Paale

12 Nēe bīn é'sāngé mbwembwē, nguse é bad bé Israel bēmbōm bébel ntii, bémwē melē nēn bán béedyáá chōmchōm, béemwáá-'aá chōmchōm kááj ne béwúú Paale.

13 Bó bad ábe bēmbel nímén ntii bēntōm móom méniin.

14 Dɔɔ békíí wēe beprise bēmbáá ne belyáged bé dyad bonj belāngē bó nēn bán, “Sēm wédé melē ne amwé dēn nēn bán séeháá chōmchōm á nsəl kááj né séwúú Paale.

15 Né-ɔɔ, nyáabe bad bé káánsel nyélóme mod ambáá a sánze a bad bé Roma nsəl nēn bán ápiined nyé Paale. Nyébámntan nēn bán nyékoo' mam mémpēe ahed áte áyāl echē. Bonj sé pen sēēbē mbonjsén áwúú mɔ adēhób aá mōpag hén.”

16 Bonj Paale mwānyan a mmwáád mwān anwóg ntii nīme bēbélé áwúú Paale. Né-ɔɔ, ankē á ndáb e meláá áke aláá mɔ.

17 Dɔɔ Paale áchāgēé sánze póg bonj álāngē chɔ aá, “Kēené' enén kódemod wēe mod ambáá a sánze awóó dyam áláa mɔ.”

18 Hée ene sánze étédé ene kódemod bonj ákeɛné mɔ wēe mod ambáá a sánze. Hée ene sánze élanḡéé mod a mbáá a sánze aá, “Paale awē adé á mbwəg mɔ achāgē me áá nīpeɛn enén kódemod áwōn áyāle enén kódemod ewóó dyam áláa wē.”

19 Dɔɔ ane mod ambáá a sánze áchāngé mɔ á ekáá bonj ásidnād mɔ á nkəg ásedtē mɔ aá “Cheé éhedéé me aláa?”

20 Dɔɔ ene kódemod élanḡéé mɔ aá, “Bad bēmbáá bé Israel bétíidé nēn bán bēlāá wē bán épeɛn Paale á'sō é' káánsel, ne mbámntan nēn bán káánsel ehede mam mémpēe atónj dé ahed áte tājene Paale.

21 Bonj weewóglán bó áyāle bad bédé tómaa móom méniin ábe bésóom ásin mɔ. Bémwédé melē nēn bán béedyáá chōmchōm béemwáá-'aá chōmchōm kááj né béwúú mɔ. Bémáá abonjsen, bésine-'e chōm éche wéhōbpē.”

22 Dɔɔ ane mod ambáá a sánze álāngéé mɔ aá, “Weelāngé modmod wēe mólāngē me ádén dyam.” Amaá-'aá ahób nē dɔɔ álāngé ene kódemod aá ákag.

Békééné Paale wēe nkamlene, Feligse

23 Dɔɔ ane mod ambáá a sánze áchénlé éche sánze émbáá émpēe ébe bonj álāngē bó nēn aá, “Nyétéd mbwókel é sánze ébe, nyébonjsen chɔ áke á Kaisaria nchoo ne sánze móom saámbe éche ékeɛne hōse ne mbwókel é sánze ébe éche éwanne mekonj. Nyáábɔo nyébonjsen nyéhíde dyam ngāj abog nkuu.

24 Nyéhede-'e Paale hōse eche ékeén mɔ. Nyélyáged mɔ nyépeɛn mɔ wēe nkamlene Feligse ésebán dyam dé mbéb ábenlédé mɔ.”

25 Bédékē antel kálag eche bēnwālēē echē ehóbe nēn aá,

26 “Me, Kladios Lisias me-éé ntenle wē, nkamlene a edúbé ambáá, Feligse. Nlēté wē.

27 Bad bé Israel bēnkōb anén mod bēhedé-'e mɔ awúú. Nsōnténé-'aá meé adii mod a Roma, dɔɔ syáabe échēm sánze sékíí mɔ ahúd áwab mekáá.

28 Nhédé'áá meé nībii chōm éche bēhóbé bán abelé. Né-ɔɔ, menkéén mɔ á káánsel.

29 Nhédé áte nnyíné nén mée eébeléé dyam áde álúmte nén bán atónǵéné awé ké'ε atónǵéné ake á mbwǵ. Mam mésyāāl níme behóbé bán abelé médii mam níme ménone échab mbéndé.

30 Bélánǵé-'aá me bán bad bé Israel behǵeke mós áwúu mós, dóo rílóme mós áwǵǵ abwǵ-abwǵ. Nlánǵé-'ε bad ábe behíde mós mekuu mée, behye beláa we chǵm éche behóbé bán abelé."

31 Eché sánze émbǵl ngáne bénlāā'ε bós bán bébel. Béntéd Paale bekéēn mós nkuu ne nkuu kǵǵ bepēēn mós á dyad á Antipatris.

32 Néε bǵn é'sánǵé, sánze éche ékéénáá mekuu éntǵm ámbǵd á ndáb e meláá, bétédé sánze éche ékéénáá hǵse ákεεn Paale.

33 Bénkēēn mós á dyad á Kaisaria. Ade bepédé bembǵ nkamlene ene kálag bebē-'ε Paale áwe mekáá.

34 Ade ane nkamlene aláá ene kálag ansedé Paale aáken mbwǵg ehéé abídé. Ade ásǵnténe aá Paale abídé á mbwǵg e Silisia,

35 anhób aá, "Mǵwǵg kéchéé éche éwóó ahób nzé bad ábe behíde we mekuu bepédé." Héε álánǵé sánze aá bekéεn Paale á ndáb e kǵǵ eche kǵǵ Herode ánlǵǵé, bénone-'ε mós áhed.

24

Paale atyéémé á nkáásé d'sǵ wée Feligse

1 Ámbǵd e e'pun é'táan, prǵse ámbáámbáa Ananiase, anké á Kaisaria nchoo ne donǵe á bad bémbáá bé dyad ne mod á mbéndé nhǵg awé behǵǵé-'aá bán Tetuluse. Bǵmpǵ á'sǵ wée nkamlene Feligse, behób mekan níme behóbé bán Paale abelé.

2 Dóo behǵǵé Tetuluse boǵ ábootéd Paale mekan ahób á yǵl, aá, "A-nkamlen Feligse, we awé edubé échábé ámǵn. Debyéé áde ébenladte ákamlen ápéénédé syáné nsaj á etún é pǵndé. Ebelé-'ε nhǵǵlén híin níme nǵpééné mbǵǵ áwǵd alǵǵ-té.

3 Sékóbé-'ε nǵ hǵm ásyāāl ne pǵndé ésyāāl. Sésáǵnan-ne we bwámbwam.

4 Meéhēdēē nén mée nǵbud we pǵndé abébed boǵ pen ndáá achǵǵ nén mée ébenled áboǵ e'boǵ bénlém, éhǵ sé mwá etál, éwǵǵlén mwá dyam awé séwóó ahób.

5 Sǵnyíné nén bán anén mod adé ekun é mbéǵ áfǵnté e bad. Apeéné epuutéd áfǵnté e bad bé Israel nkǵǵsé áte rǵsyāāl, adé-'ε nlyáǵed nhǵg a epepé e Naazarin.

6 Aponé edubé é ndáb e Dyǵb asuded, dóo sékóbé mós. *

8 Nzé esǵdté mós, mekan níme aláā'ε we mmǵǵ wényǵn nén wée chǵm éche sehóbéé édé mbále."

9 Bad bé Israel ábe bembǵ áhed, bǵmpǵ bénsǵl áte behób bán mekan níme Tetuluse áhóbéé médé mbále.

Paale akáádé nkáá d'sǵ wée Feligse

10 Héε dóo nkamlene, Feligse ábáǵé Paale etál aá áhób akan, boǵ Paale ábootéd ahób aá, "A-sǵǵ, mbǵǵ nén mée ekékāā nkáásé á alǵǵ té hén á etún é pǵndé, né-ǵǵ ndé menyǵǵǵe ákáa nǵmǵm nkáá áwǵǵ e'sǵ.

11 Nzé ehedé áte, mmǵǵ wényǵn nén wée éétǵmēē dyǵm dé e'pun ne é'be áde rǵkǵ á Jerusalem ábe Dyǵb edubé.

12 Ké epun bad bé Israel béétánéé néε sé mod sépentanné á Ndáb-e-Dyǵb, béétāne-'áa néε nǵpuutadté bad, ken á ndáb e mekáne ké'ε kéhéé á dyad té.

* **24:6** Donǵe á kálag dé'sǵ ébáde nchoo 6b-8a: *Sǵntǵl bán sékáde mós ngáne eché mbéndé éhóbé. 7 Boǵ mod ámbáá á sánze, Lisiasse, ampǵ akǵbǵn sé mós ne epame. 8 Dóo Lisiasse áhóbéé ad bad ábe béwǵǵné mós dyam bepǵ áwǵǵ e'sǵ.*

¹³ Béewóó'é chómchóm éche élúmte nén bán mam níme béhóbé bán mbélé médé mbále.

¹⁴ Bon nkwentan pen nén meé, mbenle Dyöb áde ábēd betaa bēbēnlé'áá, ahíd áde níhídeé Nzii echē etāngéné. Ndúbpé káōñne mam mésyāal níme méténlédé á mbéndé e Mosēe ne á kálag é bekal bé'daádāñ.

¹⁵ Mēmpē nsumé nlém ne Dyöb melemlem née ábēn bad bēn ámpē, nén meé bad bēsyāal bēpuú, bé bwām ne bé mbéb.

¹⁶ Nē dō-'áá akásá bon níwané áte pónde ésyāal ábel bon nlém rísāñ me á abum á'sō é' Dyöb ne á'sō é baányon.

¹⁷ Mensyāg ake á Jerusalem nguse é mwē, né-ōó menkē áwed áwanled ábēm bad mwā mōné ne ábe Dyöb mēnde.

¹⁸ Ade níhídeé nímén mekan ámbíd, dōó ábēn bad bētáné me á Ndáb-e-Dyöb, áde nímáá mekún mé nwoobe amad. Ndun e mod eebédéé áhed, mpuuté-d-te ménkēmbáá.

¹⁹ Bon bad bé Israel bēbédé áhed ábe bēmbíd á mbwóg e Esia. Ké bad bēbágé'áá bēpag áwōñ áláa we dyam áde níbélé né bōó bēntāngēñ ape, nzé émbē nén bán membēl dyam.

²⁰ Ké'ε ábēn bad ábe bédé hēn, bēn bēláa we dyam dé mbéb áde mēmbenlé áde bēnkāádtē nímmēn nkáá á'sō é' káánsel,

²¹ éetómēé dyam ahóg áde mēmbenlé. Menchágéd ehób nén meé 'Békaádtē me chii nén áyāle ndúbpé nén meé bad ábe bēwédé bēpuú.' "

²² Feligse abédéé mod awē ammád Nzii e mbále asōñten. Dō-'áá áhúdē nkáásé ášē. Anláá bó áá, "Nzé nkamlene Lisiasē apedé, dōó mēbídēdtē nímén nkáá mbakú."

²³ Hé-'áá álāngé sōnze e mbáá echē enōné'áá Paale áá átéd Paale, ábē ánōne mó. Áá, bon pen ábe mó mwā kunze áhé-'ε etál nén besón ábe Paale béhyēnad mó kéchéé éche atōngéné.

Paale atyéémé d'sō wée Feligse bó Drusilia

²⁴ Nguse é e'pun ámbíd enē, Feligse ampēen mwaád Drusilia. Drusilia abédéé mwān á Israel. Feligse anlóm Paale achæg, áwóglēn nkalan níme Paale álāngéé mó tēngene adúbe á Yesu Krístā.

²⁵ Paale aboótédé-'áá mó akale, álāngē mó ngáne mod átāngéné abé á bwām awále, ngáne mod átāngéné yāl acháá bwām, ne Epun é nkáá eche éhúé'. Dōó mbwóg níkóbé Feligse. Héé áhóbéé áá "Sébé ekag bōob. Nzé nkudé etál ámpē mēchéle we."

²⁶ Mewēnten mēbédé mó ámpē áá Paale ábe mó mwā mōné ámbíd-ámbíd, nén dēmbēl alómé'áá mó achæg pónde té ákanlé mó.

²⁷ Nén dēmbenléd áyāle mwē níbe, dōó Pokus Festuse átédé etál éche Feligse née nkamlene. Ngáne Feligse áhédé'áá áá bad bé Israel bēwógen mó bwām, antédé Paale á mbwóg.

25

Paale áá Kaisēé múmó akáad mó

¹ Festuse ampē á mbwóg e Kaisaria átéd atii dé nkamlēn. E'pun é'láán ámbíd enē, ámbíd á mbwóg e Kaisaria áké á Jerusalem.

² Á Jerusalem wē, beprise bēmbáá ne bad bēmbáá bé Israel bēnlāā Festuse mekan níme béhóbé bán Paale ábelé. Bēnchāñ Festuse

³ bán áwōñgen bó ábel bēpēen Paale á Jerusalem. Bēnlāā mó nē áyāle bēnhæg áwúu mó á nzii.

⁴ Festuse antimtén bó áá, "Paale adé á mbwóg á Kaisaria, mmēn-ne mēñm ámbíd áwed mwāmpñ m pónde.

5 Né-ɔ́, nzé édé nén bán Paale abelé dyam dé mbé́b, ábēn bad bémbáá béhíd me á Kaisaria, bésómēn mó.”

6 Festuse andyɛ́é á Jerusalem ámpē dyam e'pun waam ké'ε dyóm boŋ átimé' á Kaisaria. Néε bīn é'sánǵé, andyɛ́é ásé ákáád nkáá. Anhób aá bépēεn Paale á kóte.

7 Ade bépé́né Paale, bad bé Israel ábe bémbíd á Jerusalem béntyēem mó benben bébootéd e'bébtéd é' mekan ahób, ábe béhóbé bán abelé, boŋ bēnkēnhēnlé alúmed nén bán akoó nímé mekan abel.

8 Paale anhób aá mekan níme béhóbéé mó áyāl méesaá mbále. Anhób aá, “Meébeleé dyamdiam áde álúmté bán ntǵngan mbéndé e bad bé Israel, ké'ε Ndáb-e-Dyǔǔb ké'ε Kaisεε a Roma.”

9 Festuse ahedé'áá aá mókud dīn á bwám á'sǔ é' bad bé Israel. Né-ɔ́, ansédéd Paale aá, “Ebǔnséné ake á Jerusalem ábel nén níkáád wε áwed tǵngene nímén mam níme béhóbéé wε á yǎl-ε?”

10 Paale anhób aá, “A kóte eche Kaisεε a Roma dǔǔ ntyéémé nén, áhed dǔ-'aá bétǵngéné me akáád. Meébeleé bad bé Israel dyam dé mbé́b ké ahóg, mmǔn ámpē ebíi nē bwám.

11 Nzé édé nén bán mbóó mbéndé eché ekwǔgnédé mbakú e kwééd, né nkǔnténé awé. Boŋ nzé édé nén bán mam níme béhóbéé me áyāl méesaá mbále, né modmod eewóó'ε kunze ábe me áwab mekáá. Né-ɔ́, nhóbe nén meé Kaisεε múmó akáád me.”

12 Dǔǔ Festuse álǔnténé nló ne ábe bad ábe bélébé mó, boŋ ákwentán aá, “Ngáne é máá ahób wǔ Kaisεε móǔkáád wε, etǵngéné ake wéε Kaisεε.”

Festuse alúmté kǵn Agripa nkáá níme Paale áte

13 Nguse é e'pun ámbíd ené, kǵn Agripa bó Benise, bémpǔ á Kaisaria ákob Festuse nken.

14 Ade bémádé áwed nguse é e'pun, Festuse anlúmed kǵn Agripa ehób eche Paale áte. Anláá mǔ aá, “Mod adé hén awé Feligse ánchenéé á mbwǔg.

15 Ade nǔpédé-'ε á Jerusalem, beprise bémbáá bé Israel ne bad bémbáá bé dyad bénhób mam níme béhóbé bán abelé, béchǵn-'ε me bán nkwid mǔ nkáá.

16 Boŋ me-'ε menláá bó meé bad bé Roma béwóó elem nén, béehelée-se bébídéd mbakú nén bán mod akwedé nkáá, ésebán asébpé akáádé níme nkáá á'sǔ wéε bad ábe bésómné mǔ. Bétǵngéné mǔ etál abe ákáá níme nkáá.

17 Né-ɔ́, áde bépédé hén, menkēmbébédté pǔndé. Néε bīn é'sánǵé sánǵén, menyéé ásé á kóte nhób-pe meé bépēεn mǔ.

18 Bad ábe bésómné mǔ béntyēem amin áhób mam níme ábelé, boŋ bēnkēnhóbpe bán abelé dyam dé mbé́b ké ahóg áde ménwēmtēnné meé béhób bán abelé.

19 Ehób ésyāāl ébédéε nswan níme bēnwǔngē ne Paale tǵngene adúbe ádá ne dīn á mod nhóg awé béchǔgée bán Yesue awé amaá awé boŋ Paale ahóbe aá adé á alǔngé.

20 Menkēnkǔngé abíi ngáne níhéláá-se níhēd nímén mekan áte, né-ɔ́, mensédéd Paale nzé áǔǵn ake á Jerusalem ábel boŋ békáád mǔ áwed tǵngene mekan níme béhóbé bán abelé.

21 Boŋ Paale anhób aá bébē bébane mǔ á mbwǔg kǔǔn ne á pǔndé eche Kaisεε ábídédte níme nkáá mbakú. Né-ɔ́, menhób meé sánze ébē éno ne mǔ kǔǔn ne á pǔndé eche mélǔmmé mǔ wē Kaisεε.”

22 Héε kǵn Agripa álǵngéé Festuse aá, “Mmēn mǔdǵn anén mod awǔglēn.” Festuse antimtén mǔ aá, “Wǔwǔglēn mǔ chǵn.”

²³ Née bìn é'sánjé, Agripa bó mwānyān Benise bēmpɛ ne edúbé ésyāāl ne esimo. Bénsāl á ndáb eché mbwóg éládné'áá nchoo ne sánze é mbáámháa ne bad bémháá bé dyad. Festuse anhób áá béke bétéd Paale bépɛɛn mó.

²⁴ Dóo Festuse áhóbéé áá, "A-kān Agripa ne bad bésyāāl ábe syāábō sédé hén. Anén mod awé nyényinéé hén nén, adii mod awé bad bé Israel, ábe bédé wén ne ábe bédé á Jerusalem bépééné ehób áwēm bán abele mekan mé mbéb. Béhág e'saad nén bán eetāngɛnɛé abé á alongé.

²⁵ Bon mmén meenyinéé dyamdiam áde anén mod ábélé áde átāngɛné kwééd. Ngáne edii-'áá bán mwēn-éé anhób áá Kaisɛɛ mwēn-éé ákād níme nkáá, né-óó, nhóbe meé mēlóm mó áwed.

²⁶ Ké nê, meékoo'é dyam awón áde mételéé Kaisɛɛ áyāl eché. Né-óó, mpɛéné mó hén á'só é' bad, bwāmbwam á'só ábón, a-kān Agripa, ábel bon nzé mmaá éche ehób ahed áte, níwón chóm éche métenlé.

²⁷ Ayāle nén éebáá bwām me álóm mod á mbwóg ésebán nlúmte áte bwām dyam áde ákóó ábel."

26

Paale akáádé níme nkáá á'só wée kān Agripa

¹ Dóo kān Agripa álāngɛé Paale áá, "Ewóó kunze bōob áhób dyam." Paale ansálé ekáá áte, bon ábootéd akáa. Anhób áá,

² "A-kān Agripa, ntédé nén meé yāl eboó me áte ányín nén ntyéémé áwon e'só chíi ákáa áhúd mekan mésyāāl áyāl níme ábén bad bé Israel béhóbéé bán mbélé.

³ Nhóbe nê áyāle nén, mbii nén meé edii mod awé asónténé e'lem é' bad bé Israel, ne wée nswānten mbídéé bó. Né-óó ncháa we nén méé éched yāl, éwóglɛn me.

⁴ Abēm bad bé Israel bébíi alongé ádém se á mwéndemé áde níbéde á Jerusalem.

⁵ Bélyógé me abii. Nzé bédás'-é, né bèn béhelé bébid mbón nén bán se á mbóted, mbéde mod a epepé éche éhíde' níméd mekan mé Dyób ámbid nyaa eché ewúú áte. Nhíde' ngáne mod a epepé é Befarisia átāngɛné ábel.

⁶ Bōob-pōó, nzé ntyéémé á nkáásé hén chíi, né edii áyāle e'lyág bé nlém ábe níwóó nén meé Dyób débelé ábéd betaa chóm éche ánhóbpe áá móóbelé bó.

⁷ Adén dyam dó-'áá nímed metúmbé dyóm ne mébe mésúmé nlém áyāl bán békúd, ábe áde bébagéé Dyób edúbé nkúu ne múte. Bon ábén e'lyág bé nlém bèn-naá é'kás bon bad bé Israel béhóbé' me mam mé mbéb á yāl, a-kān.

⁸ Cheé ékás bon nyé bad bé Israel nyééhélé adúbe nén bán Dyób ápuudte bad ámbid e kwééd?

⁹ Mmén ámpɛ menwémten meé ntāngɛné née níhédé nzii ésyāāl ábébed dín áde Yesue, mod a Nazaret.

¹⁰ Né-'áá mēmbɛnlé á Jerusalem. Menkúd kunze wée beprise bémháá, nhé-'é bad bé Dyób híin á mbwóg. Nzé bémbíded-te mbakú nén bán bétāngɛné awé, mémpɛ nkwěntánnáá.

¹¹ Memmentén bó akógsɛn á ndáb é mekáne ésyāāl, níhedé nén meé béhób Yesue mam mé mbéb áyāl. Ekan énkób me áte áyāl echáb nyaa eché níkágé'áá á myad mé melonj mémpɛe átagéd bó.

Paale ahóbé ngáne ámwéde Yesue atimɛn

(Mbél 9.1-19; 22.6-16)

¹² "Enén nzóm chíó ekás bon níkág á Damaskós ne kunze ne ekag éche beprise bémháá bémbéé me.

13 A-kâŋ, á nzii wê, dyam kəd, dɔs-’áá rínyíné e’nyínen bé ekíde ábe é’pene’ tómaa enyɛn, é’bídé ámín é’lɔŋnéd me ne bad ábe syáábɔ sɛnwɔŋ.

14 Sé moosyáál sɛnhún áse. Héé ríwógé ehób élanŋe me á ehób é Hibru aá, ‘A-Sɔɔl, á-Sɔɔl, cheé ékásá boŋ ehé me á meséb. Nzum eché éwannéé me edii nɛŋgáne mwán ákwagleé abii anyan. Eché yál chɛn-éé ábeleé mbéb.’

15 Dɔs rísédíté mɔ méé ‘A-Sán, Nzé-módé édífí?’ Dɔs Sáŋgwéé átímtanné me aá, ‘Me-éé ndé Yesue awé éhágkè á meséb.

16 Bɔɔb-pɔɔ, hidé áse étyéem ámín. Mpiídé we ápwed we nɛŋgáne áwɛm mbáledé. We-éé wɛláá bad ábe belyógé áse chòm éche ényíné chii ne éche mélúmédíté we á pónidé eché ehúe’ á sɔ.

17 Mɛsɔŋ ádɔŋ alongé á mekáá mé bad bé Israel ne á mekáá mé bad ábe béesé bad bé Israel ábe mélómme we áwab.

18 We-éé wɛnedé bó míd ábel behíde á ehintén-té, békud e’nyínen bé ekíde, behíde-’é áse e nkamlen ní Satan bétim á nkamlen ní Dyób. Nê débɛl békúd alagsɛn dé mbéb, bébɛ-’é hóm ahóg ne bad ábe Dyób ásánté ne adúbe áde bédúbpé me.’

Paale ahóbé chòm éche ékásá boŋ bad bé Israel bésómén mɔ

19 “Né-ɔɔ, a-kâŋ Agripa, ndóg eché ményínné eché ehúú ádyób, menkɛmbáŋgé chɔ ahíd.

20 Bootya hê, membootéd nkalaŋ ní bwám akal, membootéd á dyad á Damaskɔs, níke á Jerusalem boŋ rítimé’ á mbwóg e Israel ésyáál, ne á mbwóg e bad ábe béesé bad bé Israel. Nkánlé’áá bó meé bétéde nymáb mbéb bétimɛn Dyób, bébele-’é mekan níme mélúmte’ nɛn bán bétédíté nítab mbéb.

21 Akal áde níkalé’áá nímén nkalaŋ dɔs dénkáŋ boŋ bad bé Israel békób me áde níbéde á Ndáb-e-Dyób bépɔn-ne me awúu.

22 Boŋ kásáŋne bɔɔb, Dyób dén dɔs ákɛwɔŋŋɛn me. Né-ɔɔ, ntyéémé hén ákale nyé moosyáál mbále. Ken bad ábe bédé etógnén ké’é ábe béesé etógnén. Mekan níme níhóbéé médíi melemlen mé mekan níme bekal bédáádáŋ ne Mosee bénhɔbpé bán mébenléd.

23 Bénhɔb bán Ane-awé-Béwógté atɛŋŋéné ákúd metake, abé-’é mod a’só ápuu. Akalé bad aá e’nyínen bé ekíde é’pente’ ábɛd bad bé Israel ekíde bɔɔb é’pente-’é bad ábe béesé bad bé Israel.”

24 Nyaa eche Paale ánkáá’é embɛl Festuse ankané mɔ áte aá, “A-Paal weesáa’é-ye? Adɔŋ ayáge ámbáá áhede we mɛn apid-é?”

25 Paale ankwentén aá, “A-kâŋ e edúbé, meépagkè mɛn. Chòm éche níhóbéé édé mbále níhóbne-’é debyéé.

26 Mɛpanléd kâŋ nímén mekan mésyáál áte áyále mbíi méé asóŋténé nímén mekan. Ndúbpé nɛn méé mwɛn asóŋténé akan téé áde ábenlédé, áyále dyam áde ábenlédé déebenledéé á e’koŋnéd-te.

27 A-kâŋ Agripa, edúbé mekan níme bekal bédáádáŋ bétélé áse-ye? Mbíi méé edúbé mɔ.”

28 Agripa antímtén Paale aá, “Ayál e anén mwá esón á pónidé dɔs éwémtené weé móhɛle móbɛl rítimɛn adúbé á Krístá?”

29 Paale ankwentén aá, “Ebê ké á esón é pónidé eche echabé áte, nkánne’ Dyób nɛn méé, we ne moosyáál awé awóglan me, ábê ngáne rídí. Boŋ pɛn meekánnéé méé behê nyé bengɔbɛngɔbɛ ngáne behédé me nɛn.”

30 Dɔs kâŋ, nkamlenɛ Festuse, mwányan a kâŋ, Benise ne bad bésyáál ábe bébéde áhed behídté áse áke.

31 Bémáá-'aá abíd, áde békagké nê dōó bēbóótédé akal nén bán, “Anén mod eébeleé dyamdyam áde ákwógnédé áhób bán bēwúu mós ké'ε bēhē mós á mbwōg.”

32 Hēε Agripa álángeé Fεstuse aá, “Nheláá-se rítēdē anén mod nzé enkēnhób aá Kaisεε mós mād níme nkáá.”

27

Paale ahídté áke á Roma

1 Ade bémáá atíi bán sēsól á stíma áke á alon á Italia, bēmbē Paale ne bad bé mbwōg bēmpēε á mekáá wēε mod a mbáá a sánze awē béchágé'áá bán Julíεε. Julíεε akamlánáá echoŋ é sánze éche béchágé'áá bán “Echoŋ é sánze é Kaisεε.”

2 Sēsól stíma á dyad á Adramitium. Ene stíma emmád aboŋsen áke á nkin mé edíb é nkwē á mbwōg e Esia. Dōó sēbwōgké eke. Sédé áke sēnwálé Aristakuse. Aristakuse abédéε mod a mbwōg a Masēdonia, awē ambíd á dyad á Tesalonika.

3 Nēε bín é'sángg, sēmpē á dyad á Sidon. Julíεε amboón Paale nlém. Antédé aá áke ányín baáb, bēbe mós kéchéé éche átógnéné.

4 Sēnhidé hē, sēbwōgké eke. Boŋ ngáne édíi bán epub é ngine échómmé'áá sé á'sō-te, sēmbamé epub, sēbwē benben ne mbwōg e Saiprus pēd eche epub énkēmbáá ngine. Saiprus abédéε mbwōg eché mendíb mēnləŋnédte.

5 Hēε sétédte nkin á pēd e mbwōg e Silisia ne mbwōg e Pamfilia boŋ sēsél á edíb é nkwē-te sēpāg á dyad á Mira á mbwōg e Lisia.

6 Awed mod ambáá a sánze annyín stíma eche ebídé á Alesandria etime' á Italia dōó áhéde sé áwēd-te.

7 Bootya hē, stíma ekeéné sé mwāləŋləŋ e'pun híin bō-'ε é'tóme' sēdēhób bán sēpag á dyad á Sinidus. Ngáne édíi bán epub échómmé'áá sé á'sō-te, sēnkēnhēnlé áke á'sō ene pēd. Nē-ōó sēmbamé sēpōŋ á pēd e mbəŋ wēε epub éebude'áá atóm. Sēntóm á Kep Salmōn sēpē á mbwōg e Kret eché mendíb mēləŋnédé.

8 Sēmbamé nkəg mé edíb mēn ne mēn, sēdēhób bán sēpag á hōm áde béchagéé bán Sef Habōs. Adē hōm déechabnedéé dyad á Lasi áyāl.

9 Sēndyεé áwed bwāmbwam kósŋ ényínnéd nén bán nzé sékii á'sō né dyam dé mbéb áhεle ábenléd sé, áyāle ene pónde mwē mēmmád ape á asóg. Epub é ngande e abε dé mende mé Alagsen dé mbéb chō-'ε emmad atóm. Né-ōó, Paale ambε bós elébé aá,

10 “Amúē, nnyíne nén mēé bootya hén bōob éhele ébēēŋ syānē ebébtéd ákeεn échén eke á'sō. Nted mébēb bwāmbwam, stíma ebéb, nló m bad-te níhele rítóm.”

11 Boŋ ane mod a mbáá a sánze andúbé dásō chōm éche mod ambáá a stíma ne mod awē awóó stíma bēnhōbpē, enkēndúbéé chōm eche Paale ánhōbpē.

12 Adé abwōg á hōm áde stíma émbēε áhed, dénkēmbáá hōm áde mod áhele ádyεé á pónde eché ekukud étóméé. Né-ōó, bad ábe bēndəŋ nén bán békag á'sō bēwanen bépe á dyad á Fonis bōó bēmbuú áte. Fonis abédéε hōm áde bēbannéé stíma á mbwōg e Kret áde ánəne' á akuu ne á mbəŋ. Áhed-taá bēhélé'áá-se bēdyε á pónde e ahéb á ngine.

Ekukud étané Paale bós á edib é nkwē-te

13 Mwā epub awē abídé á mbəŋ ambootéd atóm. Dōó ábē bad békámténé bán béhele bēkéεn nímb ntíi á'sō. Né-ōó, bēnhūd ekii éche bēbwōgnεé stíma, boŋ bēbammé' nkin mé edíb m mbwōg e Kret.

14 Boŋ béepedéé ké áke boŋ epub é ngine éche béchagéé bán “Epub é pēd e akuu” ébidén ekukud á Kret ébootéd atóm ne ngine.

15 Echê epub éntīnēd stīma. Nzii enkēmbáá áke á'sō wée epub ébídēé. Né-óó, sēnsóg yāl awaned áte akēen stīma á'sō, sétēdē nēn bán epub cháchá ékēene' chóp pēd eche édás chō akēen.

16 Ade sépóó á pēd e mbān e mwā dyad awē adé á mendīb-te awē béchagēé bán Kauda, sēnkūd mwā etál wée epub éebude'aá atóm. Ahed dōó séwánné kááñ boj sēnappé bōle ábe sédólé'áá ámbíd e'dii, ábel boj béesanlé áte. Sédé amád abel nē chōm émāá sé á yāl.

17 Bēndōl bōle, bésóléd bō á stīma-tē, bēbíd-te nkōod á stīma sēwéd bó atád. Bēbáá'áá nēn bán béhele bétómén nló, bēhún á nsí-te á nkin mé edīb á alonj á Libia, né-óó, bēnsudéd abad* áse áde ábele boj stīma ékag mehélé, bētēdē bán epub chō ne chō ékēen stīma.

18 Ekukud émbē étōmnē' ngīne. Bīn é'sánjé-'áá boj bébootéd donje dé nted ahúd bēbwēmē' á mendīb-te.

19 Néé bīn é'sánjé ámpē, bébootéd donje á bwēm atéd ábe bēbēnlé'áá ádol stīma, bēbwémé á edīb-te. Bēn bēnkōñ abel nē.

20 E'pun hīn bēntōm ésebán sēnyīne' enyen ké'ε betintine, epub-pe émbē étōmē ne ngīne esyáál. Kááñ ne á asóg, sēnhúd yāl nlēm bán sēmádné.

21 Sēmadé e'pun hīn ésebán mod ahele ké ndyééd adyé. Hē dōó Paale átyéémé amīn áfīntē e bad bésyāal boj áhōbē aá, "A-baányan, nyēmbé nyēwóglan mē áde ríhóbé mēé deéhídté á Kret. Nzé nyēnwógén mē, né deékudēé nímén metake ne enén mbólón echē dékudé nēn bōob.

22 Bōob-pōó, ncháá nyé nēn mēé nyēwéd nlém á abum, nló ní mod méetómme, stīma chēmpen chōó ébēb.

23 Nhóbe nē áyāle nēn nkuu nīme rítómé nēn ángel e Dyōb áde áwóó mē áde nībēnle-'áá empií mē, eláá mē aá,

24 'A-Paal, weewógé' mbwóg, etánjéné atyéem á'sō wée Kaisēε. Nlēm ní bwām nīme Dyōb áwōñné-'áá wε, nībélé asoó alongé á bad bésyāal ábe nyáábōo nyédé.'

25 Né-óó, a-baányan, nyēwéd nlēm á abum, áyāle nēn ndúbpé mēé mekan mésyāal mébēnléd ngāne bēlāngē mē.

26 Epub étánjéné néé étínté syáné á nkin."

27 Ámbíd e'pun dyōm ne é'niin nkuu, áde sédii sédíí á edīb é nkwxé é Adria, dōó dyam melúde mé nkuu, bad ábe bédole stīma békámténé bán kapóg syáábōo sékwogé abíd á nkin.

28 Héε bētédé nkōod nīme bētádé chōm eche édélé áyāl boj bēbwēmé á edīb-te ányín ngāne edīb épédé achab áse. Dōó bédíbté bán e'che bé edīb áse é'dé móom mé méta méniin. Mwāmpín ní pónde ámbíd e nē, bēmbwēm ámpē, bényín bán e'che bé edīb áse édé móom mé méta meláán.

29 Bēwógé'áá mbwóg nēn bán stīma éke ebul á meláa-tē, né-óó, bēntēd e'kii ábe bēbwōgnadté stīma é'niin, bēhūnéd bó ámbíd boj bébootéd akāne nēn bán bīn é'sáa mehélé.

30 Héε bad ábe bédole' stīma, bēbóótédé nzii ahed ásob. Bēnsudéd bōle á mendīb-te, bēbāmtān bán békag ekii eche bēbwōgnadté stīma asudéd á'sō é' stīma.

31 Dōó Paale álānjéé mod ambáá á sánze ne sánze éche élyágé áse aá, "Nzé ábén bad ábe bédole stīma béese á stīma-tē hēn, nyéelyágé nlēm nēn bán nyéēbē á alongé."

32 Né-óó, échē sánze énsēl nímé nkōod nīme ménchāā bōle bētēdē bó é'hóo'.

* 27:17 Donje á kálag dé'só áwóó, ekii éche ébwogke stīma á mendīb-te.

³³ Ade b̄in é'kwógé asáa, Paale anchán b̄o moosyáál aá bédyê mwă ndyééd. Anláa b̄o aá, "Nyékédyê b̄oob, dyóm dé e'pun ne é'niin, ene pónde esyáál-le nyéedyédēē chómchóm.

³⁴ Ncháa-óó nyé n̄n meé nyédyê ndyééd. Moonyonj atánjéné ndyééd adyé ábē áml̄n. Ké mbum e esid póg éebóó'é."

³⁵ Ade Paale ámáa ahób n̄n, antéd ewele á'sō wée b̄o moosyáál, aságn̄n Dyób, ásál áte boj ábootéd adyé.

³⁶ N̄n dénwd̄ b̄o nl̄m á abum, b̄o mod-téé adyé-'e mwă ndyééd.

³⁷ Mesonjé mé bad bésyáál ábe s̄ebédé á st̄ima-t̄é, n̄bédé mbwók̄el ébe móom saámbe ne ntóób.†

³⁸ Ade moosyáál ámáa akód, b̄ensyóg ngun éche ébédé á st̄ima-t̄é á edib-te ábel boj st̄ima éhéle áte.

St̄ima epángé áte

³⁹ Ade b̄in é'k̄nlé, bad ábe bédole' st̄ima b̄enk̄enchemmé nk̄ag mé edib wée b̄ebédé. Boj b̄ennyin nkin wée st̄ima éhéle etyéem. D̄oó b̄etíídé n̄n bán nzé st̄ima eh̄ele áp̄ē áhed, né b̄éb̄ēl áke ásonj ȳl áhed.

⁴⁰ B̄éns̄ēl nk̄oód n̄me m̄enchāā e'k̄ii ábe b̄éw̄ognéé st̄ima, b̄éhúnéd b̄o á mendib-te, b̄éhūne-'e bes̄anj̄kalaa b̄é e'ped b̄é mebámbe ábe é'hyómte st̄ima. Héé b̄épódté abad áte á ped e'sō e st̄ima ábel boj epub éf̄inte st̄ima á'sō. Héé s̄ebóótédé áke á nkin.

⁴¹ Boj áde sékagk̄é n̄ē, d̄oó st̄ima ébómé ȳl á akúd dé ns̄í á mendib sé. Atyóg áde ped e'sō e st̄ima étyágé-'aá n̄ē, st̄ima enk̄enh̄enlé áke ámp̄ē, boj ped e mb̄id embootéd ap̄anj̄ted áte áȳale mendib méhúené'áá nḡine mébómé ȳl áhed.

⁴² S̄anze émbel nt̄ii bán b̄éwūū bad b̄é mbwóg b̄esyáál, ábel n̄n b̄o modmod béenyalé' á nkin se b̄esob.

⁴³ Boj mod a mbáa á s̄anze ahedé'áá aá m̄osonj Paale alongé, né-óó, anláa s̄anze aá ébelelé n̄ē. Ant̄im aláa moosyáál aá bad ábe b̄eh̄ele anyal b̄óbó b̄ésébe beh̄eb á edib-te b̄ényal b̄ekag á nkin.

⁴⁴ Aá ábe b̄ó-'e b̄élyágé ás̄ē, b̄éch̄añned e'ped é' st̄ima b̄éh̄ide b̄o ámb̄id. Né-'aá, s̄ébéle boj sé moosyáál s̄ép̄ē á nkin ésebán dyamdyam ábele sé modmod.

28

Paale b̄edyéé á Malta

¹ Ade s̄emáa ap̄e á nkin ésebán dyam dé mb̄éb áb̄elé sé modmod, d̄oó s̄ésónt̄éné n̄n bán ene mbwóg ech̄é edé á edib-te wée s̄ebédé, b̄éch̄aḡéé ch̄o bán Malta.

² Bad b̄é dyad ábe s̄étané áhed b̄énwōnḡēn sé. Mbúú embootéd achó, ah̄eb-pe áb̄é, né-óó, b̄ēnkonéd muú bán s̄éwále', b̄ékōb-pe sé nken.

³ Paale anl̄ad nḡen é l̄on áte á mbág. Ade áh̄agk̄é ch̄o á d̄ū, d̄oó píí e nȳš éb̄idé á mbág n̄ l̄on-t̄é áde muú r̄ínané ch̄o, boj ekób m̄o á ekáá etyág-k̄e áhed.

⁴ Ade áb̄é bad b̄é dyad b̄ényin̄é ene nȳš ek̄ēnl̄né Paale á ekáá d̄oó b̄el̄anḡéé nhóg ne aníní bán, "An̄én mod ad̄ii mod aw̄é aw̄úe' bad. Aponé kwééd á edib-te boj k̄én̄ē nk̄áásé n̄ Dyób n̄díi nk̄óbé m̄o."

⁵ Boj Paale answág ekáá ahúnéd ene nȳš á d̄ū-te ésebán ene nȳš ebele m̄o dyamdyam.

⁶ B̄ésíné'áá bán ábooted achíd, ké' é áh̄ūn ás̄ē mp̄at̄ep̄ém áw̄ē. Boj n̄éé b̄ék̄ésinn̄é k̄ás̄ñ ésebán dyamdyam ábenlad m̄o, d̄oó b̄éh̄añl̄éné mew̄emten boj b̄étimé ahób bán, "An̄én mod ad̄ii dyób."

† 27:37 Donje á k̄alag dé'sō áwóó mbwók̄el ébe móom saámbe ne ntóób, donje-'e móom saámbe ne ntóób donje-'e áwóó mbwók̄el ébe móom saámbe ne nt̄áan.

7 Nzag ébédé bɛnben ne wée sémbɛɛ nê. Mod awê anwónj échê nzag béchágé'áá mó bán Publíose. Mó abédé nkamlɛnɛ ambáá a ene mbwóg echê ebédé á edib-te. Ankob sé nken achágéd-te sé bwám.

8 Publíose sáá abédé á anɔŋ dé nkole, ahéb dénsog mó, ekwagɛnɛ-'ɛ akób mó. Paale ankê awê ton-tê, akáne', abán mó mekáá á nló, ádíid-te mó bwám.

9 Ade bad béwógé nê bad bé nkole bémpɛɛ ábe bébédé á dyad-tê wê, bémpɛ wée Paale ádíid-te bó bwám.

10 Bɛmɛ sé ndɛ hiin. Ade sébwógké ekɛ, bénhíí sé bwɛm á stíma-tê ábe sébɛnlédte á nzii.

Paale bébidé á Malta bépédé á Roma

11 Sɛmadé á mbwóg e Malta ngɔn éláán boŋ sésólɛ stíma echê embíd á Alessandria. Béchágé'áá ene stíma bán, "Myòb níme méde Nhéd." Sédé asyáá né ene stíma ekédyɛɛ áde hóm ene pónde e ahéb á ngine esyáál.

12 Sɛnkê, sɛpɛ á dyad á Sirakus. Sɛmmád áwed e'pun é'láán.

13 Bootya hê dóó sékíí boŋ sɛpág á dyad ambáá a Regium. Néɛ bín é'sáŋgé epub émbootéd abíd á pɛd e mbəŋ. Ambíd e e'pun é'be sɛmpɛ á dyad á Putioli.

14 Sɛndibéd bad áwed ábe bédúbpe Krístəə. Bɛnlāá sé bán sébê ne bó sɔndé póg. Néɛ sékíí boŋ sɛpag á Roma.

15 Bānɛd ábe bédúbpe Krístəə bɛnwóg bán séhúɛ', né-ɔó, bémpɛ káŋŋɛ á hóm áde béchágé'áá bán Dyon á Apíəs, donŋɛ-'ɛ bésinɛ sé hóm áde béchágé'áá bán Ndáb é Beken Eláán. Ade Paale ányíné bó, anságnɛn Dyòb, nlém ríwédnéd-te mó á abum.

Paale apedé á Roma

16 Ade sɛpédé á dyad á Roma bɛntédé Paale bán ábê ne mó mwɛn boŋ bɛmbané sənze bán éno-ne mó.

17 Ambíd e e'pun é'láán Paale anchélé bad bémbáá bé Israel ábe bédé á dyad-tɛ wê á mbom. Ade bépédé anláá bó áá, "A-baányan bé Israel, menkɛmbɛnlé ábɛd bad dyam dé mbéb ké ahóg, menkɛmbɛl-laá dyam dé mbéb ké ahóg tɔŋgene e'lem ábe ábesyánɛ betaa belyógké syáne. Boŋ kénê, ábɛd bad bɛnkób mɛ á Jerusalem bɛbɛ-'ɛ mɛ á mekáá mɛ benkamlɛnɛ bé Roma. Né-ɔó ndé hén néɛ mod a mbwəg.

18 Ade benkamlɛnɛ bé Roma bémáá mɛ akáad, béhédé'áá mɛ achene, áyālɛ bɛnkɛnkudtɛ nzom ké póg echê elúmte nɛn bán ntɔŋgénɛ kwééd.

19 Boŋ bad bé Israel bɛnkɛnkwenténné bán bétede mɛ, né-ɔó, menhób mɛɛ Kaisɛɛ móɔmád nímmɛ nkáá. Kénê-'ɛ ménkɛnwóŋgé dyamdyam dé mbéb áhób tɔŋgene ábɛm bad.

20 Nɛn dɔ-'áá akásó boŋ ríchɛnlɛ nyé ábɛl boŋ syáne dékal. A mbále ndáás mɛɛ nyébíí nɛn bán nzé bengɔbɛngɔbɛ bédé mé á mekáá, né édíí áyále mod awê bad bé Israel bésúme áyál bán ápɛ."

21 Héɛ ábê belyógéd bɛlɔŋŋɛɛ Paale bán, "Séékúdeɛ kálag ké póg echê ebídé á Judeya áyál echòŋ. Mod awe syáne ké nhóg-ke eébidɛɛ áwed se ápɛɛn nlébtéd ké nhóg ké'ɛ ehób é mbéb áyál echòŋ.

22 Boŋ séédəŋ nímoŋ mewɛmtɛn awóg, áyále sébíí nɛn bán hóm-téɛ bad béhóbe mam mé mbéb tɔŋgene echén epepé éche édíí áte."

23 Né-ɔó, bóobɛ Paale bɛntíí akag áde béhyɛ mó awóglɛn. Echê epun épédé-'áá ndun e mod épɛ-'ɛ wée Paale ádyéé'áá. Paale ambootéd bó mekan mé nkamlɛn ní Dyòb akale bootya mbwɛmbwɛ káŋŋ ne ngukél. Anwanɛn ábɛl bédúbe Yesue. Abɛnládtáá e'pɛd ábe é'bíde á kálag e mbéndé e Mose ne á metelag mé bekal mé'ááɔdɔŋ ábɛl bédúbe nɛn bán Yesue mó adé Krístəə.

24 Bó donŋɛ á bad bɛndúbɛ mó, boŋ donŋɛ dénkɛndúbéé bán chòm éche áhóbɛ éde mbále.

²⁵ Né-óó, bêmbootéd apentɛn áde békagké. Bédêkě, Paalɛ anláá bó aá, “Edáádəŋ éche Esáá éntəŋgɛn áde élangé nkal é’dáádəŋ Yesayaa mekan aá álaa ábɛn betaa aá,

²⁶ Kág, élaa ábɛ bad wɛé, nyéewóg nyéwóg-kɛ ámpɛ bon nyéesóŋtɛnné mbéd, nyéɛnɔn nyénɔn-nɛ ámpɛ bon nyéenyínné mbéd.

²⁷ Nhóbe nê áyale ábɛn bad bélélé nlém á abum, békólé nímab metúu, bédíbɛ-’ɛ nímab mɪd.

Nzé enkɛmbé nê, né nímab mɪd ményínne’ nímab metúu méwógne’ nímab nlém-mɛ nísóŋtɛn.

Né bétimén mɛ né mǎchoód-tɛ bó.’ ”

²⁸ Héɛ Paalɛ ásógtɛé nén aá, “Nyébii-óó nén bán nkalan mé e’choóchoŋ míme Dyɔb álómé, alómé mó bɔɔb wéɛ bad ábe béesɛ bad bé Israel. Bɛwóglɛn-nɛ mɔ.” *

³⁰ Paalɛ andyɛé áwed mwɛ mɛɛ á ndáb eché mwɛn ásápé’áá. Bad bésyāɛl ábe béhyágé’áá áwɛ akobé’áá-’ɛ bó nken.

³¹ Akalé’áá nkalan mé nkamlɛn ní Dyɔb áyāgtɛ-’ɛ bad tɛŋgɛnɛ Sánjú Yesu Křístəə ésebán abáa’ dyamdyam, modmod enkɛnkɔŋ-’áá mó áhób dyam.

* **28:28** Donje á kálag dé’só ábádé nchoo 29: *Ade Paalɛ dhśbé nɛn bad bé Israel abe bébédé ahed, bɛnhidɛ bɛn ne bɛn, bébootéd-tɛ apentɛn bwámbwam.*

Kálag echë Paalε áténlé Baá Roma Ndibned n kálag

Kálag echë Paale áténlé bad bé Roma ebédεε ábonjen bó áyāl e epe éche ántfi'ε ápe á mwembé míme rídé áwed. Enén kálag elúmte chóm éche adúbe á Krísto ne ngáne alonjé á bad bé Krísto átánjéné abé. Paale akoó ahób áwédte aá, "Nkalanj m bwám nílúmte nyaa eche Dyób ábeléé bonj bad békobnéd áwe e'só. Adúbe dós ákəə bonj bad békobnéd á'só é' Dyób" (1.17).

Paale alúmté áte aá éhednad bán bad bésyāāl békobnad á'só é' Dyób áyāle bó moosyāāl bédé áse e ngíne e mbéb. Aá mbwiined ne adúbe áde bédúbpé Yesu Krístəə dós nē ábenladté.

Paale alúmté áte ámpē aá mod akude alonjé dékōšlē abé áde ádíí mod nhóg ne Krístəə. Ene ndín e mod abelé abé nsanj ne Dyób, Edəəđənj é Dyób-pe ébelé éhúd mós áse e ngíne e mbéb ne e kwééd. Asógté ne elébé éche ábágé bad ne mekenag míme ábágé Dyób.

Nkabtéđ n kálag

Ndibned ne atón áde kálag ékoo'ε ahób 1.1-17

E'soósonj é'hednad ne moosyāāl 1.18-3.20

Nzii e Dyób ákud e'soósonj 3.21-4.25

Alonjé dékōšlē abé ne Krístəə 5.1-8.39

Bad bé Israel ne ntíí rí Dyób 9.1-11.36

Abé á mod a Krísto 12.1-15.13

Nsógtən ne melentən 15.14-16.27

Paale alómé melentən

¹ Mε, Paale, mbəledε awē Yesu Krístəə, mε-εé ntelé enén kálag. Dyób ápwédé me ábe awé mbapεε a nlomag, ábe-ε mε nsón ákal míme nkalanj m bwám.

² Mmē nkalanj mōš Dyób dénhōbpé á'só é' pónDé aá mōšbē ábē bad. Anláá bekal bé'dəəđənj mam tñjgene míme nkalanj ngáne bétélé mós áse á Kálag e echë Esáá.

³ Mmēn nkalanj rídii tñjgene awe Mwān. A nyaa e moonyonj, ane Mwān anchyáád á mbyaa míme Dabidε.

⁴ A nyaa e Edəəđənj, Dyób dénlūmēd á ngíne e Edəəđənj éche Esáá aá mós adé Mwān a Dyób, apuud áde ámpuúdté mós. Áne Mwān adii awed Sánjgwéé, Yesu Krístəə.

⁵ A dín adē dós Dyób ábágé mε nsimé ábel-le mε mbapεε a nlomag ábel bonj bad ábe beesé bad bé Israel bédúbe, bəwógne-ε Krístəə. Nén débēl áde dín déwōnj edúbé.

⁶ Nyémpē ábe nyédé á alonj á Roma, nyédé áttinté e bad ábe Dyób ápwédé aá bebē bad ábe Yesu Krístəə.

⁷ Né-šš, ntenle nyé moosyāāl awé adé á Roma. Nyédii bad ábe Dyób ádás, apwedé-ε nyé, ábē ábē bad.

Nsimé ne nsanj míme ríhúú ne Dyób, Titéε awéd ne Sánjú Yesu Krístəə mbē ne nyé.

Paale aságnan Dyób

⁸ Dyam dé'sō, nságnan ádēm Dyób áyāle nyé moosyāāl á dín áde Yesu Krístəə. Nságnan mós áyāle adúbe áde nyédúbpé Yesuε ákanlaad nkōjšé áte rísyāāl.

⁹ Dyöb áde níbenléé ne nlém nhóg akal áde níkaléé nkalanj ní bwám tângene awe Mwán, áde me mbónj nén aá nkamtan nyé akamtan ne akamtan,

¹⁰ pónde téé nzé nkánne'. Nkánne' nén meé Dyöb ábel níhel nyé ahye dényín, nzé nê ábòhénéde mó.

¹¹ Ndáá bwámbwam meé rínyín nyé ábel bonj nzé mpedé, níwéd nyé áte ne nnam níme Edáádánj é Dyöb ébáge me.

¹² Dyam áde níhóbeé ádíi nén meé, syánē mod-té áwéd nhóg ne aníniú nlém á abum. Adúbe ádēn áwéd me nlém á abum, ádēm-me ámpē áwéd nyé.

¹³ A-baányan, ndáá meé nyébíi bán nkénwōj mewēmtan ngen ne ngen áhye dényín nyé, bonj káánj ne bōb nzii eénédnédeé. Ndáá meé nípe wē ábel nsón áfínté echēn níme méchyaá e'pun melemlen ngáne níbélé áfínté e bad ábe béesē bad bé Israel bémpēe.

¹⁴ Nsón níme níwóó nídií ákale bad bésyāāl nkalanj ní bwám, ken bad bé dyad-ε, ké'ε bad bé ahín. Ntāngéné mó akal wēε bad ábe béwóó debyéé ne ábe béwóó.

¹⁵ Nê dō-'aá ákásō bonj nwōj nlém bwámbwam ákale nyémpē ábe nyédé á Roma nkalanj ní bwám.

Nkalanj ní bwám níwóó ngine

¹⁶ Meekwágéé ákal nkalanj ní bwám áyāle mós níde ngine e Dyöb echē epíinéde moosyāál awē adúbpé mó e'soósōj mbooted ne bad bé Israel átimé' wēε bad ábe béesē bad bé Israel.

¹⁷ Mmēn nkalanj ní bwám nílúmtē' syánē nyaa eche Dyöb ábeleé bonj bad békobnéde awe e'só. Bad békobnad á'sō é' Dyöb adúbe áde bédúbpé. Adúbe dōó ákásō' bonj bad békobnéde á'sō é' Dyöb. Nén áde ne ngáne éténléde á kálag e Dyöb nén bán, "Mod awē akóbnéde á'sō é' Dyöb adúbe áde adúbpé, ábē á alonjé."

Moonyōj asyāál abelé mbéb á'sō é' Dyöb

¹⁸ Dyöb álúmtē' níme melingá. Mébíde ádyöb tângene mbéltéd mé mbéb níme bad bébeleé ne e'bébtéd é' mekan ábe bad bébeleé. Mmé mbéltéd mé mbéb níkásō' bad áhíd mbále.

¹⁹ Dyöb álúmtē' bó níme melingá áyāle nén bébíi mam mésyāāl níme bad bétāngéné abíi tângene Dyöb bwám áyāle Dyöb dēn álúmté bó.

²⁰ Se á mbooted áde Dyöb dēnhagké nkōhsé, bwēm ábe áhágé é'lúmtē bad bwám nén bán mam mé Dyöb níme mod éenyínnēé díid méde ne mbále. Enyínnad-tē nén bán echē ngum edé á ngíndé ne á ngíndé, adé-ε ámín e bwēm ésyāāl. Né-óó béwóó' é mbámten ké nhóg ákud alagsen.

²¹ Kénéé bébíi bán Dyöb áde, béebagéé mó edúbé néε Dyöb, béésāgnān-naá mó. Bonj pen nímbab mewēmtan mēmbóotéd mam níme méesē dyamdyam akamtan, ehíntēn ékáá'-ε bó mewēmtan.

²² Béhóbe bán béwóó debyéé, bonj bétímé e'yóké é' bad.

²³ Bésóbe Dyöb áde áde á ngíndé ne á ngíndé edúbé abε, bétímé bébage bwēm ábe bad béhāgné mekáá á nwágén ní bwēm ábe é'wág, bwēm néε moonyōj, menān, nyam ké'ε nyó.

²⁴ Né-óó, Dyöb átédte áá esíí é mekan mé ekob é yāl ékamlan bó ábel mbinde é mekan éche ésutde bó edúbé.

²⁵ Bétédte mbále éche edé tângene Dyöb béhíde' metóm. Bétédte ábe Dyöb áde áhágé bwēm ésyāāl edúbé, bétímé bébage bwēm ábe áhágé. Dyöb dō-'aá bétāngéné mekenag abε á ngíndé ne á ngíndé. Ebē nē.

²⁶ Né-óó, Dyöb áhúdé bó míd áyāl, átédte bó áá béhíde échab esíí ábel mekan mé mbinde. Bebaád bélyáge' bechóm anājnéd, bénañnad baachóm bémpēe, áde béétāngénéé ábel nē.

²⁷ Baachóm bǎmpē bélyáge' bebaád anaŋned ngáne étáŋgéné abé, béwōō' esí é ngine anaŋned baáb baachóm. Baachóm bébele mekan mé e'són ne baachóm bémpēe. Nē ábele' békudtad yǎl nkógsen níme bétáŋgéné akud áyāle nímnē mekan níme bébeleé.

²⁸ Ngáne edíí-'aá nén bán ábén bad béewōŋneé Dyōb pónde á alongé ádá, Dyōb áhúdé bǎ mǐd áyāl aá békεene nímaab mewémten mé mbéb á'sǎ, bébele mam níme béetēŋeneé abel.

²⁹ Mbeltéd mé mbéb rǐsyāal níkáá bǎ nlém áte. Bébébé nlém, bédé ngoód, béliúte e'béb bé nlém, bédé kǎnjí, béwúe bad, bédás kǎkǎ, bédás edogké, bédé akwáb, bédás bad ahób ámbíd.

³⁰ Bédás bad mam ahób á yǎl ábēbed bǎ dǐn, békóó Dyōb, bésyāā bad, bédé epame, bédé kúmbe, bédáa' ebébtéd ahag, béewōŋneé ábab besáá ne benyaá.

³¹ Bédé eyókél, béelǒntēē akag, béewóó' é edāŋge á nlém-té, béewóó-'áa nlém ní ngól.

³² Bébíí nén bán Dyōb áhóbé nén aá bad ábe bébele' échē ndín é mekan bétáŋgéné awé, boŋ kénē bédíí bébele nímnē mekan. Saá-kaá nē dēmpen, békēnte bad ábe bébele échē ndín é mekan káŋŋne kémten.

2

Bad bé Israel béēhtēē mbéndé

¹ Né-ǎ, nyé mod ké ahéé awé akáadte bad bémpēe, ábē kénzéé, eewóó' é mbámten ké nhóg ákud alagsen. Ayāle nén nzé ekáadte bad áde mmōn ámpē ébeleé melemlem mé akan níme ekáadteé bǎ, né ekwide' káŋŋne ehoŋ yǎl nkáá.

² Bébíí nén bán mbakú échē Dyōb ábídtēé tǎŋgene bad ábe bébele' échē ndín é mekan étáŋgéné.

³ Bǎǎb-pǎǎ, nzé nyé mod ké ahéé abídte mbakú áyāl e mod ampēe, boŋ mwēn ábele melemlem mé akan, awémténé aá móhele móbid mbakú e Dyōb áte-ye?

⁴ Ké'ε aboŋ áde Dyōb ábóó nlém bwámbwam, áchábtédé nyé e'kǎd áte, áwesén-ne nyé, nyéetédéé dǎ nēe dyam. Nyébíí nén bán e'boŋ bé nlém ábe Dyōb áwánlé áyāl échēn, é'díí ábe nyé etál áte de áden abé dé mbéb.

⁵ Nyélelé nlém á abum, nyéēhēdēē-'aá Dyōb atimen, né-ǎ, nyéladte yǎl nkógsen ní Dyōb áte. Akógsen-ne nyé á Epun é nkáásé. Echē Epun Dyōb délūméd nímnē melingá, alúmed-te aá mókáadte' nyaa échē étáŋgéné.

⁶ Asābē mod téé nchoo ne nsón níme ábelé.

⁷ Bad ábe bepéné mekuu ábel mam níme métáŋgéné ne áhed ehúmé ne edúbé, bébē á alongé á ngíndé ne á ngíndé. Echē ndín é bad Dyōb débē bǎ alongé áde déemaá'.

⁸ Bad bémpēe-ε bédé ábe bétōŋtan dásǎ échab yǎl, béebeléé mam níme métáŋgéné, bétímé bébele dásǎ e'bébtéd é' mekan. Echē ndín é bad, Dyōb délūméd bǎ nímnē melingá akógsen-ne bǎ.

⁹ Baásyāal ábe bébele mbéb, Dyōb débēl bétāg bwámbwam, béwóg-ke ndutul, mbooted ne bad bé Israel átimé' wéε bad ábe béesē bad bé Israel.

¹⁰ Boŋ ne bad ábe bébele bwám, Dyōb débē bǎ ehúmé, edúbé ne nsāŋ, mbooted ne bad bé Israel átimé' wéε bad ábe béesē bad bé Israel.

¹¹ Nyébíí nén bán Dyōb déekwognádté modmod.

¹² Bad ábe béewóó mbéndé é Moseε, bébele mbéb. Dyōb dékaad-te bǎ ésebān abenlad mbéndé, bēbōō' é. Bad bé Israel-le, bǎ ábe béwóó mbéndé é Mose, bébele mbéb, Dyōb débēnléd mbéndé ákáad bǎ.

¹³ Saké awóg áde mod áwógé mbéndé dǎǎ ákǎǎ' boŋ ákobnéd á'sǎ é' Dyōb, ahíd áde mod áhídeé échē mbéndé dǎǎ ákǎǎ boŋ ákobnéd á'sǎ é' Dyōb.

14 Bad ábe béesë bad bé Israel, béewoo'ë mbéndé, boŋ pónde ké ehéé eché bébénlédé nímab mewëmtɛn boŋ bébel chõm éche mbéndé éhóbé, né bélúmte nén bán kénéé béewoo'ë mbéndé, áwab nlém-té bébíí nhəŋlɛn átínté e mboŋ ne mbé.

15 Mmab mbəltéd nłúmte nén bán chõm éche mbéndé éhɛdɛé éténlédé bó á nlém-té, bébíí-ɛ nén bán nímab nlém rılánge bó bán édé nê. Mmab nlém nłúmte bó ké dyam áde bébélé áde mbéb ké'ɛ ábóó.

16 Né-ɔ́, á Epun é nkáásé, Dyõb dékaād bad béyāā nchoo ne chõm éche békámtné ké'ɛ éche bébélé ké á kun-té. Abɛ Yesuɛ ene kunze ákáad bad. Adén akan dɔ́ rılánge bad nzé nkale' nkalaj ní bwām.

Bad bé Israel ne echab mbéndé

17 Bɔɔb-pɔ́, nyé ábe nyéchəge yāl bán bad bé Israel, nyésumé nlém áyāl e mbéndé éche Moseɛ, nyékumé-ɛ ekáá á tál bán Dyõb ádíí adén Dyõb.

18 Nyébíí chõm éche Dyõb áhɛdɛé áá nyébel, nyébíí-ɛ nén bán nyétəŋgéné néɛ nyéhíde chõm éche étəŋgéné, ngáne nyéyáɡké mbéndé.

19 Nyétédé yāl nén bán nyéé nyélyáɡte bad ábe békwédé ndím abíí áde bébíí'ɛ Dyõb, nyédúbpé bán nyéé nyédé néɛ etrukánj éche bad ábe bédé á ehíntɛn-té.

20 Nyétédé yāl néɛ bad ábe belébe' e'yókél é' bad. Bán nyé-'áá nyéyáɡte' bad ábe bébíí dyamdyam. Nyétédé yāl nê áyāle nyéwëmtan bán ngáne nyébíí mbéndé é Dyõb bwām, nyébíí mekan méyāā, nyébíí-ɛ mbále.

21 Bɔɔb-pɔ́, ngáne édíí bán nyéé nyéyáɡte bad bémpɛe, cheé ékáá boŋ nyéeyáɡtɛ échen yāl? Nyékanle bad bán bééchibɛ', nyé bɛn nyééchibéé-ye?

22 Nyé ábe nyélanje bad bán béékábɛ mesón á ndáb e e'wóngé, nyébɛn nyéekábéé mesón-ɛ? Nyékó abele á myõb mémpɛe, boŋ nyéékáɡké á mebón mé myõb nyéchibɛ bwɛm-ɛ? *

23 Nyékume ekáá á tál bán nyéwóó mbéndé é Mose, boŋ nyésudte Dyõb edúbe abóó áde nyéboó'ɛ éche mbéndé.

24 Eténlédé á kálag e Dyõb nén bán, “Bad ábe béesë bad bé Israel béhõbe' Dyõb mam mé mbéb á yāl áyāle mekan níme nyébelɛé.”

25 Nzé nyéhíde' mbéndé, né ayag áde nyéyagéé bad ákóó etógnén abé á'sõ é' Dyõb. Boŋ nzé nyééhíde' mbéndé, né ayag áde béyagéé nyé, déesáá dyamdyam.

26 Bɔɔb-pɔ́, nzé édé bán mod awɛ béeyagéé abele ngáne mbéndé éhɛdɛé, né Dyõb dékõb mɔ́ néɛ mod awɛ béyagé.

27 Né-ɔ́, bad ábe béhíde' mbéndé kénéé béeyagéé bó, bélúmte nyé bad bé Israel bán mekan níme nyébelɛé méetəŋgenɛé. Béyagéé nyé, nyéwóó-ɛ mbéndé éche éténlédé á kálag, boŋ nyééhídeé chõ.

28 Nyébíí-ɔ́ nén bán, saké bad ábe betõmte' mekún álúmed nén bán bédé bad bé Dyõb bóó békóó bad bé Israel abé. Saá-kaá ayag áde béyagéé mod á ekob é yāl éche ényínnad dɔ́ ákəə' boŋ mod ákõŋ mod a Israel abé.

29 Boŋ mod awɛ akõŋtɛ mod a Israel abé adíí mod awɛ adé mod a Israel á nlém-té, nádé, mod awɛ béyagéé á nlém-té. Edəsdəŋ é Dyõb chõ-'áá ébele nímén nsón, saké ahíd áde mod áhíd mbéndé éche betélé ásé. Dyõb dɔ́ ákəne' ene ndín e mod, saké baányonj.

3

Dyõb ábele ngáne áhõbɛ

* 2:22 Mebón níme bad bé' bɔ́od mébédéé ndáb éche énwõŋ bwɛm áte ábe é'lélɛ nkun.

1 Nsyáŋ ríhée-ɔ́ rídé ábɛ́ mod a Israel? Ké-'ε nyaa e nsyáŋ ehéé edé áyag mod álúmed bán adé mod a Dyóɔ́b?

2 Nsyáŋ rídé bwámbwam. Dyam dé'só, áwab mekáá dɔ́ɔ́ Dyóɔ́b dɛ́mbɛ́é éché eyale.

3 Ngáne édífí bán bó bad behóg béebɛ́le'aá ngáne Dyóɔ́b dénhɔ́ɔ́pɛ́ aá bébɛ́l, nédé Dyóɔ́b dɔ́mpɛ́ déebɛ́nlɛ́ chòm éche ánhɔ́ɔ́pɛ́ aá móɔ́ɔ́ɛ́l-ε?

4 Eesaá nê. Kénéε moonyon asyáál ádíí nkal a metóm, Dyóɔ́b adé mbále pónde ésyáál. Eténlédé á kálag e Dyóɔ́b nɛ́n bán, "Nzé ehóɔ́bɛ́ dyam, bad bétáŋgɛ́né anyín nɛ́n bán dyam áde éhóɔ́bɛ́ adé mbále. Nzé békáadte wε, ekáa nyaa eché étáŋgɛ́né."

5 Boŋ nzé edé nɛ́n bán mam mé mbéɔ́ níme débɛ́lɛ́é mɛ́lúmtɛ́ bwám bán Dyóɔ́b déekwognádtɛ́ modmod, chán-nɔ́ déhɔ́ɔ́pɛ́? Nédé dehele dehóɔ́b nɛ́n bán Dyóɔ́b ábɛ́lɛ́ awusé ákógsɛ́n syáné áyále mbéɔ́ níme débɛ́lɛ́-ye? (Debyéé á moonyon dɔ́ɔ́ ríhóɔ́nɛ́é nɛ́n.)

6 Eesaá nê. Nzé émbɛ́ nɛ́n bán nyaa eche Dyóɔ́b ákáadtɛ́é edé awusé, né chán-nɔ́ áhɛ́le akáád nkóŋsɛ́?

7 Boŋ nzé edé nɛ́n bán dyam dé metóm áde ríkálɛ́ álúmtɛ́ ngáne Dyóɔ́b ápédɛ́ mbále abé nyaa eché bad bébage-'aá mó ehúmɛ́, né chee-ɔ́ ékásó boŋ Dyóɔ́b ábɛ́ ákáádtɛ́ mε néε mod awé abɛ́lɛ́ mbéɔ́?

8 Chee-ɔ́ syáné déehóɔ́ɔ́ɛ́ nɛ́n bán, "Syáné débɛ́l mbéɔ́ ábɛ́l boŋ mboŋ rínyínned?" Donje á bad béhóɔ́bɛ́ syáné mam mé mbéɔ́ áyáɔ́ bán dehóɔ́bɛ́ adé akan. Dyóɔ́b dékógsɛ́n abé bad ábɛ́ béhóɔ́bɛ́ nê nyaa éche étáŋgɛ́né.

Modmod eéɛ́lɛ́é ngáne Dyóɔ́b áhɛ́dɛ́é ad débɛ́l

9 Chán-nɔ́ syáné déhɔ́ɔ́pɛ́? Nyéwémtné bán syáné bad bé Israel detómɛ́ bad ábɛ́ béésɛ́ bad bé Israel-ɛ́? Eesaá nê. Mmaá álúmed nɛ́n mɛ́é ngíne e mbéɔ́ ekamlan bad bé Israel ne bad ábɛ́ béésɛ́ bad bé Israel nyaa póg.

10 Eténlédé á kálag e Dyóɔ́b nɛ́n bán, "Modmod eesaá áwɛ́ abɛ́le ngáne Dyóɔ́b áhɛ́dɛ́é. Mod ké nhóg eesaá.

11 Mod eesaá awé asóŋtɛ́né mbále táŋgɛ́ne Dyóɔ́b, modmod eesaá-'aá awé awane áte ábíi Dyóɔ́b.

12 Moosyáál abáá Dyóɔ́b á yál.

Bó moosyáál bétímɛ́ béwóó abé dé mbéɔ́.

Bó modmod eéɛ́lɛ́é dyam áde átáŋgɛ́né. Bó mod ké nhóg mwɛ́n eesaá.

13 E'yale ábɛ́ é'bíde bó á nsál é'díi néε soŋ eché béékútnɛ́é.

Béɛ́nɛ́lad échab echém é nsál ádog bad. E'yale ábɛ́ é'bíde bó á nsál é'díi néε kem e píi e nyá.

14 Mbon é mehóɔ́b ne e'bébtéd bé mehóɔ́b bɛ́n ne bɛ́n bóó é'bíde bó á nsál.

15 Mekuu méhɛ́nɛ́l bó ásɛ́ ásyáɔ́g mekií.

16 Kéhéé áde bétómɛ́é ebébtéd ne metake bóó bélyáɔ́gɛ́é.

17 Bééɔ́ɔ́'í nsaŋ.

18 Bééwóó-'áa mbwóg rí Dyóɔ́b ké nhóg áte."

19 Bɔ́ɔ́ɔ́-bɔ́ɔ́, debíi nɛ́n bán mekan níme bétélɛ́ á kálag e mbéndɛ́, mɛ́nɔ́ne bad bésyáál ábɛ́ bémbɛ́é éché mbéndɛ́. Né-ɔ́ɔ́ modmod ééɛ́lɛ́é-sɛ́ ádíɔ́ɔ́ nsál áte áhóɔ́b aá mósuú nzɔ́m. Ken mod a Israel, ké'ε mod awé eésɛ́ mod a Israel. Moosyáál átyéém á'só é' Dyóɔ́b.

20 Nyéɔ́ɔ́ɔ́ nɛ́n bán modmod ééɛ́lɛ́é-sɛ́ ákobnéd á'só é' Dyóɔ́b áyále áhídeé mam níme mbéndɛ́ éhóɔ́bɛ́é. Mbéndɛ́ edíi dás'ɔ́ álúmed bad bán bébɛ́lɛ́ mbéɔ́.

Adúbe dɔ́ɔ́ ákɔ́ boŋ bad békobnád á'só é' Dyóɔ́b

21 Boŋ bɔ́ɔ́ɔ́ dɔ́ɔ́ Dyóɔ́b álúmtɛ́ syáné nzii eché bad békobnadtɛ́ áwɛ́ e'só. Ene nzii eewóó'έ dyamdyam ábɛ́l ne mbéndɛ́ é Mosé. Eché mbéndɛ́ ne bekal bé'dááɔ́ɔ́ɔ́ɔ́ béhóɔ́bɛ́ mam táŋgɛ́ne ene nzii se' bɔ́ɔ́ɔ́.

²² Ene nzii edii nén, mod ké ahéé awě adúbpé Yesu Krístəə, mó akobnad á'so é' Dyöb. Nhəŋlén ké nhóg méesaá ken mod adé mod a Israel-le, ken mod éesaá.

²³ Moosyaál abelé mbéb, modmod eékwognedéé ákud ehúmé é Dyöb.

²⁴ Nsimé ní Dyöb mbéle Dyöb átéde bad néé bad ábe békóbnédé áwe e'só. Abagé nímé nsimé ngên. Abelé nê aköde áde Yesu Krístəə ákódté bad ábe bédúbpé mó.

²⁵ Dyöb démbě mó néé mende aá awě áwen nló. Bad béküd-te alagsen dé mbéb áyāle bédúbpé mó. Dyöb ábélé nê, ákon bad bésyāal alúmed nén aá móbele mekan nyaa echě etəŋgéné. Ngen e'só Dyöb awésánnáa bad, eekógsan-naá bad ábe bēbéle'áa mbéb.

²⁶ Bəəb-pəə enén póndé, alúmté bad aá móbele' mekan nyaa echě etəŋgéné, alúmté-'e bad aá mókōb kenzéé awě adúbpé Yesue.

²⁷ Ngáne edii-'aá nê, chee-ə dékumneé ekáá á təl? Nê déehednéé. Mbéndé ehéé ehóbe nê? Dekume' ekáá á təl áyāle déhíde mbéndé-ye? Aáy. Deékūmēē ekáá á təl áyāle nén, adúbe áde dédúbpé Yesue dáo ákəə bonj déküd e'soosonj.

²⁸ Syāné denyine nén bán mod akobnad á'so é' Dyöb adúbe áde adúbpé Yesu Krístəə saké áyāle ahíd áde ahídeé mbéndé.

²⁹ Ké-'e nyēwəmtan nén bán Dyöb adii Dyöb á bad bé Israel dēmpen-ε? Saá mó adé káəŋne Dyöb á bad ábe béesě bad bé Israel-le? Eε, mó adé kəŋne Dyöb á bad ábe béesě bad bé Israel.

³⁰ Dyöb adii ahóg. Né-ə, átəd bad ábe bəyágé néé bad ábe békóbnédé áwe e'só nzé bédúbpé Yesu Krístəə. Melemlem néé átédte bad ábe bēeyagéé nzé bōmpě bédúbpé Yesu Krístəə.

³¹ Chán-nə déhōbpě bəəb? Nédě dehóbe nén bán atəd áde Dyöb átédé bad néé bad ábe békóbnédé áwe e'só, adúbe áde bédúbpé Yesu Krístəə álúmté nén bán bad bēéhíde mbéndé ámpě-ye? Aáy, éesaá nê. Bonj pen chōm éche mbéndé ehóbeé chōs syāné débānéé mekáá.

4

Adúbe dáo dənəkəŋ bonj Dyöb ákob Abrahame

¹ Chán-nə déhōbpě təŋgene taa awěd, Abrahamε? Cheé ěmbenléd á póndé echě?

² Nzé ankobnéd á'so é' Dyöb áyāle mekan níme ámbenlé, né anwōŋ dyam áde ákumneé ekáá á təl. Bonj eéhele'aá-se awōŋ dyam ké ahóg áde ákumneé ekáá á təl á'so é' Dyöb.

³ Eéhele'aá abel nê. Kálag e Dyöb ehóbe nén aá "Abrahame andúbé Dyöb, né-ə, Dyöb déntəd mó néé mod awě akóbnédé áwe e'só."

⁴ Nzé mod abelé nsón, bēbéle bésábé mó áyāle nsón níme ábélé. Mmē nsábe méebāgkē ndε. Ndii chōm éche átəŋgéné akud áyāle ebábé éche ásálté.

⁵ Bonj nzé mod eébéle nsón bonj asumé nlém nén aá adúbe áde módubpé Dyöb dáo débě bonj mókobnéd á'so é' Dyöb, né Dyöb áde ábele bonj bad ábe bēbéle mbéb békóbnéd áwe e'só, déntəd mó néé mod awě akóbnédé áwě e'só adúbe áde adúbpé mó.

⁶ Melemlem nê dáo Dabide ánhōbpě təŋgene nnam níme rídé ne bad ábe Dyöb átédé aá békóbnédé áwe e'só, kénéé edii bán bēebeleé nsón ké nhóg.

⁷ Dabide ánhób aá, "Nnam ne bad ábe Dyöb álágséné nímab mewusé bonj abóded nímab mbéb.

⁸ Nnam ne mod awě Səŋ Dyöbe éetúbpé nímé mbéb dīn ámpě."

⁹ Nédě bad ábe bəyágé bēnpen bōs béküd nímé nnam níme Dabide áhóbé, ngé bad ábe bēeyagéé bōmpě békud mó? Demaá ahób nén bán kálag e Dyöb

ehóbe aá, “Abrahamε andúbé Dyóβ, né-óó, Dyóβ déntēd mó néε mod awē akóβnéde áwe e’só.”

¹⁰ Póndé ehéé Dyóβ dēnchǝgké mó aá adé mod awē akóβnéde áwe e’só? Ade béeyāgēē mó, ngé áde bēmaá mó ayag? Nē dēmbēnléd áde béeyāgēē mó.

¹¹ Bēn’yag mó áde Dyóβ ámaá mó akob. Ayag áde bēn’yagké mó dēmbē e’chemléd ábe é’sógtan nēn bán akóβnéde á’só é’ Dyóβ adúbe áde ádúbpé, kénéε édíí bán áde ánkobnédté á’só é’ Dyóβ bēnkēn’yagké mó. Nē ábédé ábel boŋ Abrahamε ábē sáá a bad béesyāal ábe béeyagēé, ábe békóβnéde á’só e’ Dyóβ adúbe áde bédúbpé Dyóβ.

¹² Nē ábédé ámpē ábel ábē-ε sáá a bad ábe béyagé ábe bómpē bédúbpé Dyóβ melemlen ngáne Abrahamε echēd sán andúbēē á póndé eche béeyāgēē mó.

Adúbe dǝo akǝa’ boŋ mod akud chǝm eche Dyóβ áhóbe

¹³ Dyam démpēε áde débíí adíi nēn bán, se’ boód Dyóβ dénlāá Abrahamε ne níme nchyaátēn aá móšbē nkǝnsé áwab mekáá. Dyóβ dénkēnhóbpé nēn áyāle Abrahamε áhíde’áá eche mbéndé. Dyóβ dénhǝb nē áyāle Abrahamε andúbé mó, Dyóβ átéd-te mó néε mod awē akóβnéde áwe e’só.

¹⁴ Nzé émbē nēn bán bad ábe behíde mbéndé bóo békúδ chǝm eche Dyóβ áhóbe aá móšbē, né adúbe áde bad bédúbpé Dyóβ adé ngēn. Né chǝm eche Dyóβ áhóbe-ε aá móšbē éesaá dyamdyam.

¹⁵ Chǝm eche mbéndé ébeleé édíi dásǝ ápiined bad meliŋgá mé Dyóβ. Boŋ nzé mbéndé eése, abóo á mbéndé déεbagké.

¹⁶ Nē dǝ-’aá akǝa’ boŋ Dyóβ álāŋgē dásǝ bad ábe bédúbpé mó aá móšbēl dyam áde móhóbe. Abelé nē ábel boŋ ényíned nēn bán níme nsimé móš níkáá boŋ álāŋgē nchyaátēn níme Abrahamε ngen pǝg ne ngen ésyāal aá móšbelé bó dyam áde móhóbe. Saké bad ábe behíde mbéndé bēnpen bóó ámbεé akag. Ámbε kǝŋne bad béesyāal ábe bédúbpé Dyóβ ngáne Abrahamε ándúbēē. Abrahamε adíi sáá awē syánē moosyāal.

¹⁷ Eténlédé á kálag e Dyóβ nēn bán Dyóβ dénlāá Abrahamε aá, “Mbelé we sáá a meloŋ híin.” Né-óó, Abrahamε mó adé syánē sáá á’só é’ Dyóβ. Dyóβ áde Abrahamε ádúbpé mó adé Dyóβ áde ábage bad ábe bēwédé alongé, dǝ-’aá áhóbe’ boŋ mekan níme méesé mébē.

¹⁸ Abrahamε andúbé Dyóβ ásūm-me níme nlém áwē, kénéε édíi bán á mǝd mé moonyoŋ, nzǝm ké pǝg enkēmbáá echē elúmte bán mam níme Dyóβ dénhǝbpé aá mbēnléd mbēnléd-te. Andúbé aá móšbē “Sáá a meloŋ híin” ngáne Dyóβ dénlāá’é mó aá, “Mmǝŋ nchyaátēn mébuú áte néε betintine.”

¹⁹ Ade Dyóβ álāŋgē Abrahamε nē, ambé dyam mbwókel e mwē. Ambíí aá móšlyagēé moonyoŋ ámpē, abíí-ε aá mwaád Seraa adé ekǝm. Boŋ ké nē, adúbe dénkēnsudté mó.

²⁰ Nlém méehúne’ aá mó tǝŋgene dyam áde Dyóβ dénhǝbpé aá móšbelé mó, boŋ adúbe dénwēd mó áte, ábage Dyóβ ehúmé.

²¹ Ammáδ áwe nlém-tē nēn aá Dyóβ débēl chǝm eche áhóbe aá móšbēl.

²² Né-óó, adúbe áde Abrahamε dénkǝŋ Dyóβ déntēd mó néε mod awē abele mekan ngáne Dyóβ áhedéε.

²³ Bǝoβ-pǝo, e’yale ábe é’ténlédé nēn bán, “Dyóβ déntēd mó néε mod awē abele mekan ngáne áhedéε” béesaá áyāle Abrahamε mwēmpēn.

²⁴ Abē e’yale é’dé áyāl e syánē ámpē. Dyóβ détéδ syánē ámpē ábe dedúbpé néε ábe bad, mó apuúdté Yesu Krístǝ, Sǝŋgwéé awēδ.

²⁵ Krístǝ móo Dyóβ dēmbéε aá áwē áyāle mbéβ nímed. Dyóβ ápuúdté mó ábel boŋ dékud nzii ákobned á’só é’ Dyóβ.

5

Depedé á nchemtɛn ne Dyõb

¹ Né-ɔɔ, ngáne édíí bán adúbe áde dédúbpé ábélé Dyõb átédé syánē nēe bad ábe békóbnédé áwe e'só, syánē dedé nsaŋ ne Dyõb. Echɛd Sán, Yesu Krístæ mó akáá boŋ debé nsaŋ ne Dyõb.

² Mó-'áá adíbnédé syánē nzii eché adúbe áde dédúbpé ábélé boŋ syánē debíí nsimé ní Dyõb. Né-ɔɔ, dedé menyinŋe bwámbwam áyále desumé nlém nén bán deékúð ehúmé é Dyõb.

³ Dedé menyinŋe ámpé áyál e metake níme dékudεé, debíí nén bán metake mɛpɛɛne' e'wéd bé nlém.

⁴ E'wéd bé nlém-me é'bele dewõŋ abé áde ákobnad ne Dyõb. Adé akobned áde dékobnadté-'ε á'só é' Dyõb dó-'áá ábele boŋ dewõŋ e'lyág bé nlém nén bán Dyõb débél chõm éche áhóbé áá móðbelé syánē.

⁵ Nzé delyáge-'ε nlém, déebídté mekáá mé ngên áyále nén, Dyõb álúmté syánē ngáne ápedé syánē adan abel áde ábélé boŋ éché edanŋe ésoł syánē á nlém-té. Abélé nén abε áde ábágé syánē éché Edáádanŋ éche Esáá.

⁶ Ade dénkénwõŋgé ngine ké póg áwõŋgen éche syánē yál, Krístæ anwé á nló nímed, bebél bé mbéb á pónde eche Dyõb déntí'é.

⁷ Elélé áte mod áwé á nló ní mod awé abele' mekan níme métánŋéné á'só é' Dyõb. Kapóg-ke mod ahele ákwentén áwé á nló ní mod a bwám.

⁸ Boŋ Dyõb álúmté syánē áá módáá syánē áyále nén ambél áá Krístæ áwé á nló nímed áde dédíí débédé bebél bé mbéb.

⁹ Dekóbnédé á'só é' Dyõb áyále mekií níme Yesuε níme mésyógké á nló nímed. Nzé mekií níme Yesuε níme mésyógké á nló nímed mébélé dékóbnédé á'só e' Dyõb, nén déélúmtéé syánē bán Krístæ átom syánē asonŋ nê ásé e melinŋá mé Dyõb-ε?

¹⁰ Ade débédé bad bé ekoyí bé Dyõb, kwééd eché awe Mwán áwédé embél dépé á nchemtɛn ne mó. Ngáne édíí-'áá bán depedé á nchemtɛn ne Dyõb, abé áde awe Mwán ádíí á alonŋé, á asóg, ásonŋ syánē.

¹¹ Saá-kaá nê dɛmpɛn, boŋ dewóge menyinŋe áyále Dyõb ábélé syánē dedé ábē bad, mbwiined ne echɛd Sán Yesu Krístæ, mó awé akáá boŋ debé á nchemtɛn ne Dyõb.

Nhəŋlén níme níde áttnté e Adame bó Krístæ

¹² Mod nhóg mó ambél boŋ mbéb nípe á nkõŋs-te, mbéb mó-'áá nípééné kwééd. Né-ɔɔ, moosyaál awág áyále moonyon asyaál abelé mbéb.

¹³ Dyõb ádéhób áá móbage bad mbéndé, né bad bébele mbéb á nkõŋs-te. Boŋ kéhéé wéε mbéndé éesaá, modmod éhéléé-se áhób áá mod abóó mbéndé.

¹⁴ Boŋ kénê, bootya á pónde eche Adame ápe á pónde eche Moseε, pónde eche Dyõb ábágé mbéndé, kwééd enwõŋ ngine ámín e moonyon asyaál. Bad bewartáá kénê bɛnkɛmbóó'é mbéndé e Dyõb melemlen ngáne Adame ámbõð'é.

Adame abédé á nwágén níme ane awé antánŋén ape, nédé Krístæ.

¹⁵ Abé bad bébe béesaá nyaa póg, áyále nén ndε eché Dyõb ábágé bad ngên, eche Yesu Krístæ ápééné, éesaá melemlen nɛŋŋáne dyaam áde mbéb níme Adame mɛmpɛénné. Edé mbále bán bad híin bewartáá áyále mbéb níme mod nhóg ábélé. Boŋ nsimé ní Dyõb níchábé ámín bwámbwam tómaa níme mbéb. Bad híin békúde ndε e Dyõb ngên nyaa eché echabé ámín, ámbíd e mod nhóg, Yesu Krístæ.

¹⁶ Ndε e Dyõb-pe ámpé éesaá melemlen nēe dyaam áde mbéb níme Adame ámbɛnlé dɛmpɛénné. Mmē mbéb nhóg níme Adame níkáá moosyaál akwedé

nkáá á'só é' Dyöb. Boŋ ene nde ekáá Dyöb átédé bad née bad ábe békóbnédé awé e'só, kénéé édíí bán bad bébele mbéb ábel ne ábel.

¹⁷ Edé mbále bán mbéb níme mod nhóg Adame ámbenlé, mbéle bad bésyāāl bédé asé e ngíne e kwééd. Boŋ akan áde aníní mod nhóg, Yesu Krístāá ábélé, átómténé ngíne abé. Nén débēl bad bésyāāl ábe békúdé nsimé ní Dyöb níme ríhábé ámín békóbnéd-te áwe e'só békúd alongé áde déemaá', bēwōŋ ngíne ámín e chóm ésyāāl.

¹⁸ Né-óó, níme mbéb nhóg níme Adame ámbenlé, mēmbēl Dyöb dēnkwid baasyāāl nkáá. Melemlem nē dāo dyam á bwām ahóg áde Krístāá ábélé dēmbenlé bad bésyāāl békóbnéd á'só é' Dyöb, békúd-te alongé.

¹⁹ Awógen áde mod nhóg, Adame, énkénwógénné Dyöb dēmbēl moonyon asyāāl ambé mod a mbéb. Melemlem nē dāo awógen áde mod nhóg, Krístāá awógné Dyöb, ábélé bad híin békóbnédé á'só é' Dyöb.

²⁰ Dyöb dēmpēn mbéndé ábel ábel dé mbéb ákag á'só. Boŋ kéhéé wéé ábel dé mbéb ákagké á'só, nsimé ní Dyöb mbéle níkag á'só tómaa nē.

²¹ Né-óó, ngáne mbéb níwóó ngíne ápēen kwééd, nē dāo nsimé ní Dyöb mómpe níwóó ngíne ábel boŋ bad békóbnéd á'só é' Dyöb, békúd alongé áde déemaá' mbwiined ne Yesu Krístāá, Sāŋgwéé awéd.

6

Mbéb níwúú syánē boŋ Yesu: apuúdté syánē

¹ Chán-nō déhābpē bōō? Edé bán débē débēle mbéb ábel boŋ nsimé ní Dyöb ríhágke-ε?

² Aáy éesaá nē. Syāá dewédé, deewóó' é dyamdyam ábel ne mbéb ámpē. Chán-nō déhēle debé débélé' mbéb?

³ Nyéebii' é nēn bán áde dékúdé edusen boŋ debé mod nhóg ne Krístāá denwé ne mós-yé?

⁴ Edusen éche syánē dēnkudté, élúmté' bán syánē dewédé, béliímé-'ε syánē ne mós. Nén dēmbenléd ábel boŋ déwōŋ abé dékōālē. Nén áde melemlem ne ngáne Titéé apuúdté Krístāá ne éche ehúmé á alongé dékōālē.

⁵ Nzé syánē dedé nhóg ne mós áyāl e éche kwééd né syánē débē nhóg ámpē ne mós áde apuúé.

⁶ Debíí bán áde bēmboméé Krístāá á awōg, bēmbomnéd mós abé áde dēnwōŋgē bōōd. Ábel boŋ ngíne eché áde abé dé' bōōd áde ábéltaá syánē mbéb ébōō ne abōō ásyāāl. Nén débēl mbéb méetédte syánē ntāŋ ámpē.

⁷ Nzé mod awédé, mbéb méekamláné mós ámpē.

⁸ Bōōb-póó, ngáne dewédé ne Krístāá, dedúbpé bán débē á alongé ne mós.

⁹ Syánē dedúbpé nē áyāle debíí bán Krístāá apuúdé, éewáá-'aa ámpē. Kwééd eewóó-'aa ngíne ké póg ámín eché ámpē.

¹⁰ Awé áde awédé, mbéb méewóó' é dyam ké ahóg ábel ne mós ámpē. Alongé áde ádíí-'ε áte bōōb ádíi alongé áde ádíí ne Dyöb.

¹¹ Melemlem nē dāo nyémpē nyétāŋgéné yāl anyín née bad ábe bēwédé, ábel boŋ mbéb méekamlán nyé ámpē. Nyényín-ne yāl née bad ábe bédé á alongé ne Dyöb mbwiined ne Yesu Krístāá.

¹² Né-óó, nyéemwāg se mbéb níkamlán echen yāl e moonyon eché éwāg. Né débēl nyéehídéé mekan mé esíí mé ekob é yāl ámpē.

¹³ Nyéetāŋgené-'ε née nyétédte echēn pēd e yāl ké póg á mbéb-te se nyébenléd chō ábel mekan mé mbéb. Boŋ pēn, nyébe yāl wéé Dyöb née bad ábe bēbídte á kwééd-te, boŋ bébe bō alongé dékōālē. Nyébe echen yāl esyāāl á mekáá mé Dyöb ábel boŋ ábenlad nyé ábel mekan níme métāŋgéné á'só é' Dyöb.

¹⁴ Mbé́b méetânɣenɛ́é nɛ́e níkámléné nyé. Nyéésaá ásɛ e mbéndé boŋ nyédé ásɛ e nsimé rí Dyôb.

Débê betân ábel mekan ngáne Dyôb áhedé

¹⁵ Chán-nō déhōbpɛ́ bōob? Ngáne dédíí ásɛ e nsimé rí Dyôb, nédé débê débele mbé́b áyále deésaá ásɛ e mbéndé ámpɛ́-ye? Aáy, éesaá nê.

¹⁶ Nyéebíí' é bán nzé mod abagé yál nɛ́e ntân ásɛ e mod ampée, ábel kéchéé éche ane mod áhóbéé, né adíi ntân awé ane mod-ɛ? Bad ábe bébágé yál ábel mekan mé mbé́b, chōm éche békudéé édíi kwééd. Boŋ mod awé abagé yál ábel ngáne Dyôb áhedéé, abág mod awé ábele mekan níme métânɣéné á'sō é' Dyôb.

¹⁷ Nságnɛn níbê ne Dyôb. Nyé ábe nyémbé betân ásɛ e mbé́b, nyétimé nyéhíde mbále e mekan méesyā́l níme béyágté nyé ne nlém nhóg.

¹⁸ Bōob-pɛ áde Dyôb áhúdé nyé ásɛ e ngíne e mbé́b nyétimé betân, ábel mekan ngáne Dyôb áhedéé.

¹⁹ Nhóbe nímén méesyā́l á nyaa e moonoyŋ áyále nén nyé nɛ́ngáne baányŋ, nsōɣtɛn méechabéé nyé ámín. Ngen e'só, nyémbɛ́ echen yál esyā́l nɛ́e betân, nyébelé mbinde é mekan ne e'bébtéd é mekan, nyébelé-'ɛ ebébtéd chɛn ne chɛn, nyékag á'sō. Bōob-pōo nyétânɣéné echen yál esyā́l abe nɛ́e betân, ábel mekan ngáne Dyôb áhedéé, nén débél alongé ádɛn désāŋ.

²⁰ Ngen e'só áde nyébédé betân ásɛ e mbé́b, nyénkénwóngé dyam abelen mekan níme Dyôb áhedéé áá nyébel.

²¹ Nsyāŋ níhéé nyénkudtɛ áde nyébeláá mekan níme mékwágtɛ nyé bōob. Chōm éche nímé mekan mépɛɛɛ́ édíi kwééd.

²² Boŋ bōob, Dyôb áhúdé nyé ásɛ e ngíne e mbé́b, betân bé Dyôb-páá nyédíí. Nsyāŋ níme nyékudéé nídi nén bán Dyôb ábélé nyésaá ngáne ábê bad betânɣéné asāŋ. Nê débél nyéekúd alongé áde déemaá'.

²³ Nyébií nén bán nsábe níme mbé́b nípɛɛɛ́ nídi kwééd. Boŋ ndɛ eché Dyôb ábagéé bad ngɛn edii alongé áde déemaá'. Dekude dō, abé áde dédíí ne Yesu Krístaa, Sāŋgwéé awéd.

7

Bad bé Krísto béesaá ásɛ e mbéndé ámpɛ́

¹ A-baányŋ, nyédíi bad ábe bébíi mbéndé. Nyéebíí' é bán mbéndé ekamlan mod dāsō á pónde éche ádíí á alongé-ye?

² Détéd elánɣɛ́n áyál e ehób é e'wóngé. Nzé mmwaád awóó nchóm, mbéndé ehóbe nén bán atánɣéné abé ne nchóm pónde esyā́l éche nchóm ádíí á alongé. Boŋ nzé nchóm awédé, mbéndé e e'wóngé eekóbéé mó ámpɛ́.

³ Né-ōó, nzé adyééné mod ampée áde nchóm ádíi ádíí á alongé né béchag mó bán adíi nkáb-a-mesón. Boŋ nzé nchóm awédé né awóó kunze á'sō é' mbéndé, nzé awóó-'ɛ nchóm ampée, ene pónde, né eekábéé asón.

⁴ A-baányŋ, nê dōo édíi ne nyémpɛ́. Mbéndé eékamlánné nyé ámpɛ́ áyále awé áde Yesue áwédé, nyémpɛ́ nyéwédé. Bōob-pōo, nyédíi bad ábe mod ampée, Yesue awé Dyôb ápuúdté, ábel boŋ nyébele Dyôb bwám.

⁵ Áyále á pónde éche áded abé á moonoyŋ akámlánnáá syáné, mbéndé epuúdté'áá syáné esíí é mekan mé ekob é yál áte. Nén ábéláá débélé' mekan mé mbé́b níme mépɛɛɛ́ kwééd.

⁶ Boŋ bōob dehídtɛ ásɛ e mbéndé, awé áde déwédé. Né-ōó, mbéndé eché ekámlánnáá syáné nɛ́e betân eékamlánné ne syáné ámpɛ́. Nén ábélé dehíde dāsō nzii ekóólé bōob ábele Dyôb. Debenle mó nyaa eché Edáádāŋ é Dyôb élanɣéé syáné, saké nhídtɛn ne mbéndé éche bétéléé ásɛ.

Mbéndé e Dyöb chò elúmte' syánē níméd mbéb

7 Chán-nō déhōbpē bōob? Nédē déhōb bán mbéndé edé mbéb-ε? Aáy, deéhēlē-ε se dehób nē. Boḡ mbéndé chò ekáá boḡ mbíí chòm éche mbéb rídíí. Nzé mbéndé enkénhōb aá mod eesíídé chòm é mod, né meebíí' é nén mēé ásií chòm é mod ádē mbéb.

8 Boḡ ene mbéndé ennyēm mē mewēmten mé mbéb ásē, ébel níbootéd bwēm é' bad asii nyaa ne nyaa. Nzé mbéndé eesé, né mbéb méesaá dyamdyam.

9 Póndé ebédé echē ménkēmbíí' é mbéndé. Boḡ á póndé echē mbíí mbéndé, esíí é abel dé mbéb ēmpuú mē áte, nwé-'ε.

10 Mbéndé eche Dyöb ábágé aá chò epēene alongé chóchó étím mē awúú.

11 Mbéb ménkud etál ámbíd e mbéndé, rídōg mē, mbel mbéb. Né-óó mbéb móó ríwúú mē.

12 Né-óó, denyíne nén bán mbéndé chēn esáá, chòm-éε mbéndé éhóbeé esáá, étāḡgéné, édé-'ε bwām.

13 Nédē nē álúmte nén bán chòm éche édé bwām étímé mē nē kwééd apiined-ε? Aáy, éesaá nē. Saké mbéndé chò epíínédé mē kwééd, mbéb móó nípóó ámbíd e mbéndé, chòm eché édé bwām, ápiined mē kwééd. Nén dēmbenléd ábel nén bad bényín ngáne mbéb rídíí. Né-óó, mbéndé e Dyöb ebēle' mbéb rílúmte eche ngíne bwāmbwam.

Nzum echē ewante' moonyoḡ áte

14 Debíí nén bán mbéndé eche déhóbeé edii chòm é edáádāḡ. Boḡ ndii moonyoḡ a ekob. Ndii nēε mod awé bésómé ásē e mbéb nēε ntāḡ.

15 Meesóḡtánné mbéltéd nímēm. Mam níme níhedeé abel, meéhēlēε mó. Mam níme níkós móó rítiméé abel.

16 Bōob-póó, abel áde níbeleé chòm éche méehedeé abel, nén álúmte bán nkwxnténé mēé mbéndé edé bwām.

17 Boḡ á mbále saké mmēn nkoo' abel, mbéb níme rídé mē áte móó mbelte mē nē.

18 Mbíí mēé dyam á bwām ké ahóg déesaá mē áte, nédē, ne nlém ní moonyoḡ níme ríwóó, kénéε edíí bán nlém rídé mē áte ábel dyam á bwām, meéhēlēε dó abel.

19 Meéhēlēε dyam á bwām áde rídás abel, boḡ dyam dé mbéb áde méehedeé abel, dóó rítiméé abel.

20 Bōob-póó abel áde níbeleé dyam áde méehedeé abel, nén álúmte nén bán saké mmēn nkoo' nímé mam abel ámpē. Boḡ mbéb níme rídé mē áte móó mbelte mē mó.

21 Né-óó, nnyíne nén mēé mbéndé edé echē ekamlan mē. Póndé téé áde níhedeé dyam á bwām abel, mbéb móó ríwāmsan mē ekáá ape.

22 Awēm nlém-té, mbéndé e Dyöb chò rídás ahíd ne nlém rísyāál.

23 Boḡ nnyíne nén mēé mbéndé empée edé echē ekamlan échēm ekob é yāl, echē ewane nzum ne mbéndé echē nímēm nlém rídás. Ene mbéndé ehaá mē, ebélé-'ε ndé ntāḡ a mbéb. Mmē mbéb mó-'aá nkamlan échēm ekob é yāl.

24 Ebál é etyāg éche étáné mē! Nzé-módé ásoḡ mē á mekáá mé échén ekob é yāl, éche épíinad mē kwééd?

25 Nságnen mbē ne Dyöb. Asoó ádēm alongé mbwiined ne Mwān, awεd Sāḡgwéé, Yesu Krístā. Né-óó, mmēmpen ndé mbíd ébe, nímēm nlém rílange mē áhíd mbéndé é Dyöb boḡ échēm ekob é yāl éhide mbéb níme rídé mē áte.

8

Alongé áde Edáádāḡ é Dyöb ébagéé

1 Bōob-póó, Dyöb déekwidéé modmod nkáá awé adé nhóg ne Yesu Krístā.

² Mbéndé e Edǎǎdǎŋ echê epiinad syǎnê alongé, abé áde dédíí ne Yesu Krístǎǎ, ehúidé me á mehanj mé mbéndé e mbéb ne á mekáá mé kwééd.

³ Mbéndé enkênhenlé mbéb amad áyǎle nêñ baányonj bénkênwóngé ngíne ahíd chók. Né-óó, Dyób ábélé dyam áde mbéndé enkênhenlé abel. Anlóm awe Mwǎn ne ekob é yǎl e moonyonj éche ébele mbéb, ábóded ngíne e mbéb. Abel áde Dyób dêmbeñlé nêñ dêmboðéd ngíne e mbéb ámin e moonyonj a ekob.

⁴ Dyób dêmbeñlé nê ábel bonj bad ábe bééhídê mam ne ngíne e moonyonj bonj bétimé' behídê mekan ne ngíne e Edǎǎdǎŋ é Dyób, bébel mekan nyaa echê etǎngéné melemlem ngáne mbéndé ehóbéé aá bébel.

⁵ Bad ábe bébele mekan ngáne écháb ekob é yǎl élanǵéé bó, bébelé bésun nímab nlém áyǎl e mekan mé ekob é yǎl. Bonj bad ábe bébele mekan ngáne Edǎǎdǎŋ é Dyób élanǵéé bó, bébelé bésun nímab nlém áyǎl e Edǎǎdǎŋ é Dyób.

⁶ Nzé mod asúmé nlém áyǎl e mekan mé ekob é yǎl, né áwê. Bonj nzé mod asúmé nlém áyǎl e mekan mé Edǎǎdǎŋ né Dyób débe mó alongé áde déemaá' ne nsañ.

⁷ Nzé mekan mé ekob é yǎl mékamlan mod, ane mod abelé ákǎó Dyób áyǎle eehídéé mbéndé é Dyób, eéhlê-'aá chók ahíd ne ahíd dên.

⁸ Nêñ álúmte bán bad ábe behíde échab esíí é mekan mé ekob é yǎl, béehéléé Dyób menyinǵe awóged.

⁹ Bonj ne nyé, nyéehéleé mekan ngáne ekob é yǎl éhedéé aá nyébel. Nyébele' dásó ngáne Edǎǎdǎŋ éhedéé aá nyébel, nzé édé bán ne mbále Edǎǎdǎŋ é Dyób édé nyé áte. Kénzée awê Edǎǎdǎŋ éche Krístǎǎ éesaá áte, né eesaá ne Krístǎǎ.

¹⁰ Bonj nzé Krístǎǎ adé nyé áte, nyéde á alongé áyǎle Krístǎǎ abelé nyékóbnédé á'só é' Dyób kénée edíí bán échên ekob é yǎl éwê áyǎle mbéb níme nyébéle.

¹¹ Nzé Edǎǎdǎŋ éche Dyób áde dêmpuúd Yesue édé nyé áte, né ké échên ekob é yǎl éche éwág émmad awé, né Dyób áde ápuúdté Krístǎǎ dépuúd chók. Abel nêñ á ngíne e Edǎǎdǎŋ éche édé nyé áte.

¹² Né-óó, A-baányan, dyam áde áde détǎngéné ahíd déesaá dyam dé ekob é yǎl, saké ábé ngáne ekob é yǎl éhedéé.

¹³ Áyǎle nzé nyébele ngáne ekob é yǎl éhedéé né nyééwê. Bonj nzé á ngíne e Edǎǎdǎŋ é Dyób nyéwúú mbeltéd mé mbéb níme nyébeleé, né nyéékúð alongé.

¹⁴ Dyam áde áde ádíí nêñ, bad bésyǎal ábe Edǎǎdǎŋ é Dyób élyǎgtéé, bedíí bán bé Dyób.

¹⁵ Edǎǎdǎŋ éche Dyób ábágé nyé éebeléé-se nyébé nêé betǎñ, nyébé á mbwóg-te. Bonj pên Edǎǎdǎŋ é Dyób ébélé nyékoó bán bé Dyób abé. Ngíne echê échê Edǎǎdǎŋ chók-'aá ekáó bonj délêbpé Dyób bán, "A-Tê! Echem Sǎñ!"

¹⁶ Edǎǎdǎŋ é Dyób ébélé syǎnê debíí á nlém-tê nêñ bán dedíí bán bé Dyób.

¹⁷ Bǎǎb-pǎǎ, ngáne dédíí ábe bán, déékúð nnam nime Dyób ákóñnéde ábe bán, syǎnê déékúð-te bwêm ábe Dyób ákóñnéde mó, nzé ne mbále syǎnê dekwénténé átag ne Krístǎǎ ábel syǎnê ámpé dékúð ehúmé éche Dyób débéé mó.

Ehúmé éche bad bé Dyób békúdté

¹⁸ Nnyíne' nêñ meé, metake níme dékúdeé bǎǎb méesaá dyamdyam nzé behágténé mó ne ehúmé éche bélúmédte syǎnê á pónde echê ehúé á'só.

¹⁹ Bwêm ábe Dyób áhágé á nkóñsé é'sine' ne e'lyág bé nlém, pónde echê Dyób délúmtênne ábe bán. Abelé nê ne ehúmé ésyǎal.

²⁰ Embê nêñ bán bwêm ábe behágé é'díí ehóhó ngên. Saké ábé bwêm bèn bǎǎ béntíí bán ébê nê bonj Dyób dǎǎ déntíí. Ambel nê ne e'lyág bé nlém aá epun épé éche

²¹ mǎhũdte ábê bwẽm bẽn á mehan mé ngine echê ebɔɔdte bwẽm, bǎmpê békũd-te kunze ákud melelem mé ehúmé éche Dyõb ábageé ábê bán.

²² Debíi nén bán kǎán ne' bɔɔb, bwẽm é'syǎál é'kǎne' ne e'we ábe bẽwógéé ábe é'dé n̄ngáne e'we bé achád.

²³ Bon saké nhagté d mwẽmpen ríkane'. Syánê bẽn awê dewóó Edǎádɛn éche Dyõb ábágé syánê n̄ngáne ndê e'só, syánê ámpê dekǎne' á nlém-tê. Debǎnné nlém n̄syǎál ásin pǎndé echê Dyõb débenlé bon dékõn ábe bán abé, ahúd syánê yǎl esyǎál á mehan-tê, ábe syánê yǎl ékǎlê.

²⁴ Taase dekode e'soosõn delyágé nlém bán deékũd chõm éche Dyõb áhóbé aá mǎbêl. Bon pen nzé denyine chõm éche delyágé nlém bán deékũd, né saké e'lyág bé nlém bǎo é'kóó abê nê. Nzé-módé ahele alyág nlém áyál e chõm éche ámáá akud?

²⁵ Bon, dechedé yǎl ásin chõm éche dényin̄n̄, dekoó-'e chõs ásin.

²⁶ Melelem nê dǎo Edǎádɛn é Dyõb éwõnganné syánê áyále deewóó'ê ngine. Deebii'ê ngáne détongéné akáne bon Edǎádɛn chẽn chõo ékǎnnad syánê ne nheemed míme rítómé e'yale bé nsál.

²⁷ Dyõb ánone syánê nlém áte, abii-'e mewẽmten mé Edǎádɛn áyále Edǎádɛn ékǎnnad bad bé Dyõb nyaa eche áhedeé.

²⁸ Debíi nén bán dyam-té áde ábenlad Dyõb ábele dǎo á mbon mí bad ábe bédǎo mǎ, * ábe áchénlé ábel ngáne áhedeé.

²⁹ Dyõb dẽmmad atii nén aá bad ábe mǎmmadté apwẽd ádǎb abé ábê n̄ngáne abé áde awe Mwǎn ábel bon ane Mwǎn ábê Mwǎn á'só áfinté e baányan.

³⁰ Né-ɔó, bad ábe Dyõb dẽmmadté apwẽd, anchélé bǎo ábê ábê bad. Ahe áchénlé-'e áhóbé aá békóbnédé áwe e'só, ábe bǎ-'e békóbnédé áwe e'só, abagé bǎ éche ehúmé.

Dyõb ádǎo syánê mbwiined ne Yesu Krístǎo

³¹ Nzé denoné m̄m̄n mekan m̄esyǎál áte, cheé déhele dehób? Nzé Dyõb ádê ne syánê, né nzé ahele at̄ngén syánê?

³² Née Dyõb déeb̄nḡnéé ké awe Mwǎn. Antéd mǎ, ábe mǎ aá áwê á nló míme syánê moosyǎál, né éebaá syánê kéchéé émp̄ee éche déhédné mǎ-yê?

³³ Nzé-módé áh̄b aá bad ábe Dyõb ápwédé békwdé nkáá? Dyõb d̄n dǎo áh̄b n̄n aá dedii bad ábe békóbnédé áwê e'só.

³⁴ Nzé-módé-õ áh̄b aá dekwédé nkáá? Yesu Krístǎo awédé, ápuu, adyẽé-'e á ekáá émbáá é Dyõb, áhed-taá ákǎnnadté syánê.

³⁵ Nzéé-õ ahele ábel bon Krístǎo asóg syánê ad̄n? Mekan míme melénlédé syánê áte, ké'ẽ ndutul, káa ahé áde bad béh̄gk̄e syánê á meséb? Nzaa, káa awõn áde déwóó'ê mbóté? Nzé-'e akíme áde bad békímméé syánê? Ké'ẽ awúu áde bad béhedeé syánê awúu?

³⁶ Kálag e Dyõb ehóbé aá,

“Pǎndé téé bad bẽwúé sé áyál echõn.

Bényine sé n̄ngáne r̄dyõn mí mbód míme békagk̄e awúu.”

³⁷ M̄m̄n mekan m̄esyǎál mébenlad bon detómé mǎ áte, mbwiined ne Krístǎo, mǎ awê adǎo syánê bon áwõnḡn-ne syánê.

³⁸ Mbii bwám nén meé chõmchõm éesaá éche éhele-se épán ed̄nḡe éche Krístǎo ádǎo syánê. Ken kwééd-ẽ, ké'ẽ alongé. Ken ángel-ẽ, ké'ẽ benkamlene, ké'ẽ ngine éche édé ádyõb. Ken pǎndé eche dedii áte n̄n, ké'ẽ pǎndé echê ehúe.

* **8:28** Dyam-té áde ábenlad Dyõb ábele dǎo á mbon mí bad ábe bédǎo mǎ; donge á kálag áwóó mam m̄esyǎál mébenlad á mbon míme bad ábe bédǎo Dyõb.

39 Ké ngine e nkoŋ nímín, ké'ε e nkoŋ nísé, chǒmchǒm éesaá átínté e nħagtdé nísyāäl éche éhele épāŋ edaŋge éche Dyǒb áwǒŋné syánē mbwiined ne Yesu Křístā, awed Sáŋgwéé.

9

Dyǒb ne abē bad bé Israēl

¹ Nkale' mbále nēŋgáne mod awē adúbpé Křístā, meékālēē metóm. Mmēm nlém míme Edāódaŋ éche Esáá élyágtéé, nílāŋge me nén aá chǒm éche rǐhóbéé édé mbále.

² Ndutul e ngine ne metake mé ngine bédé me á nlém-té

³ áyāl e abēm bad, abēm baanyaŋ ábe syāábōō sēdé mekií mehóg. Ayāl echáb nhede' nén meé né Dyǒb dēmbē me ebómán, ábēl-le meebág ne Křístā.

⁴ Abēm bad bédii bad bé Israēl. Dyǒb áhóbé aá mótdéé bó néε abē bán, alúmté'-ε bó éche ehúmé. Dyǒb dēmpé á nchemten ne bó, abε-ε bó mbéndé. Anlúmedé bó ngáne bétāŋgéné mó edúbé abε, bó'-aá ánlāá'ε aá móšbelé chǒm éche ánhǒbpē aá móšbēl.

⁵ Bédii bad bé mbyaa níme abēd betaa ábe bēmbē se á mbooted. Ade Křístā áchyáádté-'aá, mómpē néε moonyoŋ, áwāb mbyaa dǒó ámbídtē. Mekεnag mébē ne Dyǒb á ngíndé ne á ngíndé, mó awē ákamlan chǒm ásyāäl. Ebē nē.

⁶ Meehóbéé nén meé Dyǒb déebenlé chǒm éche ánhǒbpē aá móšbēl. Edé bán saké bad bésyāäl ábe bēbíde' á mbyaa nί Israēl bédé bad bé Dyǒb.

⁷ Saá-kaá bán bésyāäl ábe Abrahame bédé bán bé Dyǒb. Dyǒb dénlāā Abrahame aá, "Á mbyaa míme awoŋ mwān Aisige dǒó bán ábe rǐhóbé meé mébē wε bēbídtē."

⁸ Nén álúmtē nén bán bán ábe béchyáá á nyaa e moonyoŋ béesaá bán bé Dyǒb. Boŋ bán ábe bēnchyāá'ε nhídtē ne ngáne Dyǒb dénlāá'ε Abrahame aá móšbēl, bǒó békoo'ε átóŋ nēŋgáne bán bé mbyaa míme Abrahame.

⁹ Ade Dyǒb dénlāā'ε Abrahame aá móšbelé mó dyam áde móhóbé, Dyǒb dénhǒb aá, "Mēřfm ámbíd á pǒndé eche rítíde. Ene pǒndé Seraa áwālē mwān a mwēnchóm."

¹⁰ Saá-kaá nē dēmpēn. Sáá nhóg móó Rebekaa ábe bán bé baachóm bébe bēnwǒŋgē. Ane sáá abédéε awesyánē taa, Aisige.

¹¹⁻¹² Á pǒndé éche béechyāā'ε abē bán, áde béébfí'ε abel dé mbéb ké'ε mboŋ, Dyǒb dénlāā Rebekaa aá, "Mwān ambáá ábē mbāledε awe mwān asad." Dyǒb dēmbēl nén ábel ényínned nén bán nímē mewēmtēn móó ámbēnlédte ábel mwān nhóg ábe ášē e aníní. Embonjédé mó ápwēd mod awē ádáá apwēd, saké áyāle dyam áde ane mod ábélé.

¹³ Eténlédé á kálag e Dyǒb ngáne Dyǒb áhóbé aá, "Mendāŋ Jakǒbe boŋ ríkōō Esao."

¹⁴ Chán-nō déhǒbpē bǒob? Néde deéhǒb bán Dyǒb ákwognad baahóg-ε? Aáy, éesaá nē.

¹⁵ Se' bǒód, Dyǒb dénlāā Mosεε aá, "Mēwǒg kénzéeé ngǒl awē rídáó ngǒl awóg, mēlūmēd-te e'boŋ bé nlém wéε kénzéeé awē ndáó alúmed."

¹⁶ Né-óó, mpwēdtédé nί Dyǒb méewóó'ε dyamdyam ábel ne chǒm éche bad béhedéé bán ébenled ké'ε éche bēbéléé. Dyǒb dǒó ábenlad ábē e'boŋ bé nlém ábel kéchéé éche áwémténé ábel.

¹⁷ Eténlédé á kálag e Dyǒb nén bán Dyǒb dénlāā Farao aá, "Mpwede wε kāŋ ábel boŋ mēnled wε álúmed echem ngine ne ábel boŋ ádēm řin ákanled nkǒŋsé áte nísyāäl."

¹⁸ Né-óó, Dyǒb álúmtē' ábe e'boŋ bé nlém wéε kénzéeé awē ápwédé, áwēde'-ε kénzéeé nló áte awē ápwédé aá áwúu nló áte.

Meliŋgá mé Dyǒb ne e'boŋ bé nlém é' Dyǒb

19 Kapóg nyé mod nhóg nyé̄sedéd me bánken, “Nzé nê dóo édífí, cheé ékáá bon Dyöb ábê áhābē’ aá bad bébélé mewusé? Debíí bán modmod ééhē̄ē̄-se ahób aá mó̄benlé dyam áde Dyöb áhóbé aá ábel.”

20 Bon we moonyon, nzé-módé édífí áseded Dyöb dyam? Mbeé e mḡg ééhē̄ē̄-se ésedte’ mod awé abelé chó aá, “Cheé ékáá bon éhágé me nyaa eché éhágé me?”

21 Nyébii nén bán ntumé-mbeé, awóó kunze ábēlen hyḡg ábe ábenlé mbeé nyaa eché ádáá. Nzé adáá, ahēlese atéd hyḡg ábē̄lén mbeé ébe; póg ebé mbeé e edúbé, eníníí-’e ebé mbeé eché bébenladté pónde ésyā̄l.

22 Kapóg Dyöb áhédé’ aá nímē meliḡgá alúmed, áhedé-’e aá bad bényín eche ngíne. Bon anched yāl bwámbwam áwesen bad ábe bēmbēl bon áliḡ. Abe bad bēntāḡēn-ne nkógsen akud.

23 Kapóg-ke Dyöb dēnwēm̄tēn-ne álúmed éche ehúmé é ngíne ámín e bad ábe álúmté e’bon bé nlem. Amaá ábē bad abon̄sen akud éche ehúmé.

24 Syānē dedé-’e áfinté e ábē bad ábe áchénlé. Saá-kaá áfinté e bad bé Israel dēmpen dóo áchénlé syānē. Achénlé syānē donḡe á bad kááḡne áfinté e bad ábe bées̄ bad bé Israel.

25 Á kálag e Hoseya, Dyöb áhóbé nén aá,

“Bad ábe bēnkēmbé ábēm bad,
mēchḡg bó mēé bédé ‘Ábēm bad.’

Aloḡ áde ménkēdāḡgé mēchḡg dó mēé ádíi ‘Aloḡ áde rídáá.’

26 Melemlen mé hōm wēe ménlāā-’aá bó mēé ‘Nyéesaá ábēm bad’, áhed-taá mēchḡgké bó mēé bédii ábēm bán, bán bé Dyöb áde ábage’ aloḡgé.”

27 Nkal é’dáádāḡ Yesayaa anháád tāḡgene bad bé Israel aá, “Ké mesoḡgé mé bad bé Israel mēm̄buú áte nēe nsíi nímē rídé á nkḡg mé edib é nkwe, nguse chēmpen chōo ékūd e’sooson.

28 Sāḡwēé éebébedté pónde ábel mekan mésyā̄l nímē átómté mbakú aá mó̄bēl á nkōḡsé.”

29 Nén adé nēḡgāne Yesayaa ánhōbpē aá, “Nzé Sāḡ Dyöb á Ngume enkēnyágné syānē donḡe dé nchyáátén, né debágáá nēe myad mé Sodom ne Gomora.”

Paale akánnédé bad bé Israel

30 Chán-nō déhōbpē bōb? Bad ábe bées̄ bad bé Israel bétimé békóbnédé á’sō é’ Dyöb mbwiined ne adúbe áde bédúbpe Krístə, kénéé édífí bán béewane aá áte ákobned á’sō é’ Dyöb.

31 Bon bad bé Israel bēwáné’ aá áte bēhedé bán bēhíd mbéndé ábel bon békobned á’sō é’ Dyöb, bon bēnkēhenlé.

32 Cheé ékáá bon bēnkēhél? Bēnkēhenlé áyāle nén bēwáné’ aá áte ákobned á’sō é’ Dyöb áyāle nsón míme bēn bébélé saké áyāle adúbe áde bédúbpe Dyöb. Bēnkód ekuu á aláá adé bad békodé ekuu, békwe-’e.

33 Eténlédé á kálag e Dyöb tāḡgene nē, nén bán,

“Nyénone’, mbanne aláá á Zayon

áde débēl bon bad békodé ekuu,

aláá áde débēl bon bad békweg.

Bon kenzéé awé adúbpe mó éehúú’ é ne mekáá mé ngēn.”

10

1 A-baányan, ndáá ne nímēm̄ nlem rísyā̄l nén mēé ábēm bad bé Israel békud e’sooson, nkánnad-te bó mēé nē abenled.

2 Mbíde bó mbóḡ nén mēé bédáá Dyöb abele ne nlem rísyā̄l. Bon béekoo’ é asōḡten ngāne bētāḡéné mó abele.

3 Béesōḡṡṡṡṡṡṡ ngáne Dyōb ábeleé boḡ bad békobnéd áwe e'só. Bétímé béhede nzii echáb chēn echē ēbēl boḡ békobnéd á'sō é' Dyōb. Né-óó, béesudtéé yāl áhíd nzii echē Dyōb átífidé ábel bad békobned áwē e'só.

4 Krístæ abelé nsón míme mbéndé éntāḡḡṡṡṡṡ abel, né-óó, kénzée awē adúbpé mó, akobnad á'só é' Dyōb.

E'soosoj é'bágnédé ne metúmbé mésyāāl

5 Se' boód, Mosē antēl tāḡḡṡṡṡṡ akobned áde mod ákobnadté á'sō e' Dyōb áyale áhídeé mbéndé. Anhób aá, “Kénzée awē abele chōm ésyāāl éche mbéndé éhóbéé, ákūd alonggé áde déemaá’.”

6 Boḡ éténlédé á kálag e Dyōb bán nyaa eche adúbe ábeleé boḡ mod ákobnéd á'sō é' Dyōb edii, “Weehóbé áwoḡ nlém-tē nēn weé, nzé-módé ákē ámín, ádyōb.” (Nédē, áhúd Krístæ ámín, ásuded mó ásē.)

7 Ké-'é “Nzé-módé ákē ásē á echóg éche éewóo asóg?” (Nédē áhúd Krístæ á echóg éche éewóo asóg ápeen mó ámbíd á alonggé.)

8 Chōm-éé kálag e Dyōb éhóbé édii nēn aá “Eyale é Dyōb édé we benben. Edé ekale chó, édé-'é we á nlém-tē.” Mmē nkalaḡ nídií nkalaḡ míme sékaleé nēn bán nyētāḡḡṡṡṡṡ adúbe awōḡ.

9 Nzé ehóbné nsal nēn weé, Yesue adii Sāḡḡwéeé, edúbpé-'é awōḡ nlém-tē nēn wē Dyōb démpuud mó, né wēkūd e'soosoj.

10 Ayale nēn nzé edúbpé á nlém-tē, Dyōb ábele' ékobnéd áwe é'só. Nzé ehóbné nsal ne weé módubpé, ebelé ékūd e'soosoj.

11 Kálag e Dyōb ehóbé nēn aá “Kénzée awē adúbpé mó, éehúú' é ne mekáá mé ngēn.”

12 Nēn adé ne moosyāāl, ken mod adé mod a Israel, ken mod eesaá mod a Israel. Dyōb adii Sāḡḡwéeé á moosyāāl nyaa póg, abude-'é kénzée anamed awē ahēdné mó nwōḡḡṡṡṡṡ.

13 Kálag e Dyōb ehóbe aá, “Kénzée awē achagé đín áde Sāḡḡwéeé aá ásonj mó, ákūd e'soosoj.”

14 Boḡ chán béhele béchəḡ mó bán ásonj adáb alonggé áde béedúbpéé mó? Chán-ne béhele bédúbé mó, nzé béewóge míme nkalaḡ? Chán-nō béhele béwóg míme nkalaḡ nzé bad béekanle bó mó?

15 Chán-ne bad béhele béke béekanlé bad míme nkalaḡ áde mod éelóméé bó? Eténlédé á kálag e Dyōb nēn bán, “Nzé mod apeéné nkalaḡ ní bwám, ébelé épeen enyijge.”

16 Boḡ saké moosyāál akobé nkalaḡ ní bwám. Nkal é' dāádəḡ Yesayaa mwēn anhób tāḡḡṡṡṡṡ nē aá, “A-Sāj, bó ahéé adúbpé nkalaḡ míme sékálé?”

17 Né-óó, adúbe ápag ne awóg áde mod áwógé nkalaḡ, bad bétāḡḡṡṡṡṡ-'é nkalaḡ míme Krístæ akal boḡ bad bédúbē mó.

18 Boḡ ndáó aseded nēn meé ken, édé mbále nēn bán bénkēnwógkē míme nkalaḡ-'é? Bénwóg mó bwám. Eténlédé á kálag e Dyōb nēn bán,

“Ehób éche bad ábe békálé'áá nímé nkalaḡ énwōḡṡṡṡṡ nkōḡsé áte rísyāāl. Ábāb e'yale bémpé mesóg mé nkōḡsé áte mésyāāl.”

19 Ndáó aseded nēn meé ken, bad bé Israel bénkēnsōḡṡṡṡṡ nímé nkalaḡ-'é? Mosē móo asébpé ahób nēn aá Dyōb áhóbé aá,

“Mēnaméd bad ábe béekoo alonj abé, ábel boḡ nyéwóon bó kónjí.

Mēnaméd bad ábe bédé eyókél ábel boḡ nyélinj.”

20 Nkal é' dāádəḡ Yesayaa mómpē ankweṡṡṡṡṡ anhób ngáne Dyōb dénhōbpē. Anhób á tál e ékwéé aá,

“Bad ábe béehede'áá me bényíné me.

Menlúmed yāl wéé bad ábe béesedte'áá me.”

21 Boŋ Yesayaa anhób t̄ngene bad bé Israel aá Dyõb áhóbé aá, “Bootya mbwembwε k̄óŋ ne ngukél, nlyǵé mekáá meé ábêm bad bétim ámbíd áwêm, boŋ béwúú nló áte, béewógné-’aá me.”

11

Dyõb déebáa’ε ábē bad bé Israel á yāl ne abāŋ ásyāāl

1 B̄oob-póó, ndáá aseded nén meéken, Dyõb ábáá ábē bad áyāl-ε? Eesaá nē. Mm̄n̄ ndii mod a Israel awé abidé á mbyaa nime Abrahamε, á túmbé e Benjamin.

2 Dyõb déebáa’ε ábē bad áyāl. Bédii bad ábe ápwédé se á mbooted. Nyébii chõm éche éténlédé á kálag e Dyõb ngáne Elaijaa ácháá’áá Dyõb, álangé mó mekan nime bad bé Israel bébélé’áá.

3 Anláá Dyõb aá, “A-Sán, ábén bad béwúú áboŋ bekal bé’daád̄an̄ bésyāāl, bep̄ant̄ed-ε ním̄oŋ menyán mé mende. Mm̄mp̄en-εé nlyǵé, béhede-ε mémp̄ε awúú.”

4 Chán Dyõb d̄enk̄w̄ent̄énné mó? Ank̄w̄ent̄én mó aá, “Mbānné bad ekálé saámbé ábē ábêm bad. Bédii bad ábe béebagé Baale, dyõb dé metóm, edúbé.”

5 Nē d̄óó édii k̄óŋ ne b̄oob. Nguse é bad bé Israel édii édé ábe Dyõb ápwédé ne ním̄ε nsimé.

6 Ap̄w̄ed áde ápwédé bó ádii áyāle ním̄ε nsimé saké áyāle mekan nime bébélé. Nzé émb̄ε nén bán dyam áde bad bébélé d̄óó ák̄áá boŋ Dyõb ápw̄ed bó, néd̄ε né saké nsimé m̄óó ápw̄éd̄né b̄ó.

7 Cheé-̄ nén álúmt̄éé? Bad bé Israel b̄enk̄k̄ud̄té chõm éche békóó ah̄ed. Bad ábe Dyõb ápwédé b̄enk̄k̄ud̄ chõm éche béhédé’áá, boŋ ábínii, nlém ménl̄l̄ bó á abum.

8 Eténlédé á kálag e Dyõb nén bán “Dyõb d̄émb̄el bó edim̄d̄im. K̄óŋne e’chii, béenȳinn̄ē, béewógné-’aá.”

9 Dabide m̄ómp̄ε anhób aá, “Nk̄anne’ nén meé ébel bw̄ém ábe é’wógte bó menȳiŋge, b̄óbó é’b̄ε bó n̄éε melám.

Nk̄anne nén meé, bék̄w̄ε, Dyõb ákógs̄en-ne bó, áyāle mekan nime bébélé.

10 Nk̄anne nén meé Dyõb ákwid bó ndim̄ ábel boŋ béehelé anyin̄en. Nk̄anne nén meé áp̄emt̄ed-ε bó nted nime n̄d̄elé nime ményag bó mbid p̄ond̄é ésyāāl.”

11 Né-̄óó, ns̄ed̄te nén meé ken áde bad bé Israel b̄enk̄od̄té ekuu boŋ bék̄w̄ε, b̄enk̄w̄é ne ak̄w̄ε ásyāāl-ε? Aáy éesaá nē. Ábel áde b̄émb̄enl̄é mb̄éb̄ d̄émb̄él Dyõb d̄émb̄é bad ábe béés̄é bad bé Israel et̄ál ákud e’soós̄oŋ, ábel boŋ bad bé Israel béb̄é k̄ónj̄i.

12 Ak̄w̄ε áde bad bé Israel b̄enk̄w̄éé, ápiínédé bad bé nk̄oŋs̄é ábínii bésyāāl nsimé híin. Abé-’ε áde bad bé Israel b̄émb̄ēé atóg áyāl e mekan mé ed̄áád̄an̄ d̄émpiinéd bad ábe béés̄é bad bé Israel nsimé ní Dyõb. Nzé Dyõb áh̄ele áp̄é bad ábe béés̄é bad bé Israel anamed nē, áde bad bé Israel bébélé mb̄éb̄, né chán-n̄ó n̄nam mép̄éé abé nime áb̄éé áde bad bé Israel bésyāāl békud̄té e’soós̄oŋ.

Bad ábe béés̄é bad bé Israel bééb̄ag k̄úmbe áyāle békud̄é e’soós̄oŋ

13 Chõm éche níh̄ed̄é ah̄ób nén b̄oob, nyé bad ábe nyéés̄é bad bé Israel, nyéé r̄l̄anḡéé. Ndií mbap̄ε a nlómag a bad ábe béés̄é bad bé Israel, né-̄óó mbage’ ním̄ém̄ nsón edúbé ésyāāl.

14 Kap̄óg nh̄elé mb̄él b̄anned bé Israel béb̄é k̄ónj̄i bó doŋge á bad b̄ómp̄ε békud̄ e’soós̄oŋ.

15 Abāŋ áde Dyöb dëmbāngē bad bé Israel á yāl dëmbēl Dyöb dëntīm ásē ne bad bé nkōŋsé bésyāāl. Bōob-pōó, chán-nō ébēē áde Dyöb dékōbpé bad bé Israel ámbíd ámpē néē abē bad? Ebē byánán bad ábe bēwédé bēpūtúdé ámbíd.

16 Nzé bēbágé Dyöb eped é ewele é'sō néē mende, nē alúmte bán échē ewele ésyāāl édii échē. Nzé bēbágé-'e Dyöb nkan ní bwel, né ngen chōmpē edii échē.

17 Bēpagké donje á ngen á bwel é menzab ábe bēwéné, bēbādtē á ngen é bwel é menzab ábe é'kwogē' á ahín-tē. Nyé bad ábe nyéēsē bad bé Israel nyédii nēngāne échē ngen é bwel bé ahín échē chōmpē ekude mendib níme mébídé á nkan ní bwel é' bwām.

18 Ngāne édii-'áá nē, nyéetāngeneé néē nyédii kúmbe se nyénōné échínii ngen échē bésélé, nkóŋté. Nzé nyédé kúmbe nyéēchatán nēn bán saké nyé nyéchéngé nkan boŋ nkan mōó ríchāngé nyé.

19 Nyéhele nyékume' ekáá á tāl bán bēhúde échē ngen ábel boŋ bēbáde nyé áhed.

20 Nē adé mbále. Bēhúde bó áhed áyāle bēnkëndúbéé, nyé-'e bétímté nyé áhed áyāle nyédúbé. Boŋ nyéebág kúmbe. Boŋ pen nyéé mbwōg.

21 Néē Dyöb dēnkēmbāngé bad bé Israel akōgsen, bó ábe bédé nēngāne ngen échē énsēbē abé, nyéwēmtan bán ābāŋ nyé akōgsen-ne?

22 Nyényine nēn bán, ped pōg Dyöb ábóó nlém, ped enínii-'e alelé áte. Alelé áte wēē bad ábe bēpáné nzii boŋ abōŋné nyé nlém nzé nyédé nyéhíde' eche nzii. Boŋ nzé nyéehídé chós, né áhūd nyémpē.

23 Nzé bad bé Israel ámpē bétédte ábab e'wúu bé nló áte boŋ bétímné Dyöb, Dyöb déted bó ámbíd ámpē. Awóó ngīne ábel nē.

24 Nyé bad ábe béēsē bad bé Israel, nyé ábe nyédé nēngāne ngen e bwel bé ahín-tē, néē Dyöb áhélé nyé ahúd á bwel bé ahín-tē, abádé nyé á bwel ábe bēwéné, nyéwēmtan bán éehēlēē-se atéd bad bé Israel átímed bó ámbíd áhed ámpē-yē? Bad bé Israel bōó bédé nēngāne ngen e bwel échē énsēbē abé áyāl e ábē bwel.

Dyöb áwóge' moosyāal ngal

25 A-baányan, nhede méé nyésōŋten dyan áde káŋŋne bōob modmod éésōŋtēnēē, ábel boŋ nyéewémtán bán nyétómténé debyéé awōŋ. Nhede méé nyésōŋten bán e'lel bé nlém á abum ábe donje á bad bé Israel bēbē káŋŋ né bad ábe béēsē bad bé Israel ábe bédúbé bésyāāl, bédúbé.

26 Nēn débenléd ábel boŋ bad bé Israel bésyāāl békud e'soóŋ. Eténlédé á kálag e Dyöb nēn bán, "Nsōode ábíd a Zayōn.

Abōdéd abé dé mbéb áde mbyaa níme Jakōbe níwóó.

27 A pónde échē mébōdédte nítab mbéb dōó mépéé á nchemten ne bó."

28 Bad bé Israel bédé bad bé ekōyi bé Dyöb bōob áyāle bédúbépeé nkan ní bwām, nēn ábénlédé ábel boŋ nyé bad ábe nyéēsē bad bé Israel nyékud e'soóŋ. Kénéé édii nē Dyöb ápwédé bad bé Israel, adii adāē-'e bó áyāle melé níme ámmwēē ne ábāb betaa.

29 Nēn adé áyāle nzé Dyöb ápwédé mod boŋ anāmté mó, né ápwédé, anāmté-'e mó.

30 Bōód, nyéē nyénwúén Dyöb nló áte, boŋ bōob awúen áde bad bé Israel bēwúéné Dyöb nló áte, ábélé Dyöb áwóge nyé ngal, awōŋgēn-ne nyé áwógen mó.

31 Né-ó bōob, bad bé Israel híin bēwúéné Dyöb nló áte. Dyöb déwōg bó ngal, awōŋgēn-ne bó áwógen mómpē. Ábel nē ábel boŋ áwōg bómpē ngal melemlem ngāne ánwōgké nyé bad ábe béēsē bad bé Israel.

³² Dyöb ábelé e'wúu bé nló áte é' bad é'dé nées é'hédé bó á mbwəg ábel bon áwóg bó baasyāal ngəl.

Bad bébe Dyöb mekenag

³³ Nyénəne' ngáne Dyöb ápedé nhən abé! Nyénəne' ngáne ábíí mam mésyāal, awón-é debyéé áde áchábé ámín. Modmod ééhələē-se asónjén ngáne Dyöb ábeléé mam. Modmod ééhələē-se asónjén-ne nyaa eche Dyöb ábeléé mam.

³⁴ Eténlédé á kálag e Dyöb nén bán
"Nzé-módé ahele se ábíí mewəmtən mé Dyöb.
Nzé-módé ahele aléb Dyöb.

³⁵ Nzé-módé akébé Dyöb chöm
ábel bon Dyöb ásábe mó ámbíd."

³⁶ Dyöb dóo áhágé bwəm ésyāal. Mó akəə bon ábé bwəm é'syāal é'bé. Mó-'aa awóó ábé bwəm é'syāal. Ehúmé ébē ne Dyöb á ngíndé ne á ngíndé. Ebē nē.

12

Nyaa eché éhednadté bán

alongé á bad bé Krísto abé

¹ Né-ə, a-baányən, ngáne Dyöb áwógé syānē ngəl bwāmbwam, ncháa' nyé meé nyébē nées mende níme médé á alongé. Mmé mende mésán, mékobned-te ne Dyöb. Nén dóo áde nyaa eché éhednadté bán nyébage Dyöb edúbé.

² Nyéehidé' mbéltéd ní bad bé nkōnsé. Bon nyémwe Dyöb áhənjən nyé nlém á abum, ábel nén nyéwōn abé dékōlē. Nē débəl nyéəsonjén nyéhídé-é mam ngáne Dyöb áhədəé. Nyéébíí mbon, nyébíí mam níme méwógte Dyöb menyinje, nyébíí-é mam níme métənjéné.

³ Ne nsimé níme Dyöb ábágé me, nlanje nyé nén meé, nyé modmod eenyíné yəl aa mótomtənē abé tómaa ngáne módíí. Bon mod-té ányín yəl ngáne ákóó abé. Mod-té ányín yəl nchoo ne nde eché Dyöb ábágé mó nées mod awé adúbpé.

⁴ Yəl e moonyon edíí póg, ewóó pág ne pág, pág téé-é ewóó níme nsón.

⁵ Melemlem nē dóo edíí ne syāá bad bé Krísto. Debuú áte bon dedíí yəl póg ne Krístə, syāá modmod eesaá ne mó mwən.

⁶ Dyöb ábénlé nímē nsimé ábe syáné mod té eché nde, ékábné-é áte. Nzé Dyöb ábágé mod nde áhób mekan á dín á Dyöb, ane mod áhōbē' nímē mekan nchoo ne adúbe áde áwóó.

⁷ Nzé mod awóó nde ábele bad, ábenle bó. Mod awe mó-é awóó nde áyáged, áyágte bad.

⁸ Mod awé awóó nde áwéd bad nlém á abum, áwéde bó nlém á abum. Mod awé awóó nde ábíded chöm á ekáá áwōngən bad, áwōngan bad, eénōnē ámbíd. Awé awóó nde ályáged bad, ályágte bad nyaa eché etənjéné. Mod awé mó-é awóó nde áwóg bad ngəl, áwóge bad ngəl ne menyinje.

⁹ Mod téé ákon bad adəj. Mod téé ákəə ebébtám. Mod téé ásum mekuu ábel dyam á bwám.

¹⁰ Mod téé ádəj mwānyən ne nlém nisyāal. Mod téé ábage waáb edúbé tómaa ngáne ábagé eche yəl.

¹¹ Mod eéchēdē yəl ábel nsón. Mod téé áwəd mekáá áte, ábenle-é Səngwéé ne nlém nisyāal.

¹² E'lyág bé nlém ábe mod téé awóó ábēn bó menyinje. Mod téé áched yəl á metake-té. Mod téé áwəsen-ne á mekáne-té.

¹³ Átínté e nyé bad bé Krísto, nzé nyé mod nhóg atógé chöm, waáb awé awóó chō awōngén mó. Kénzēé awé apedé áwən, nyékōb mó nken bwám.

14 Nyékánne nén bán Dyöb ánamed bad ábe béhéde nyé á meséb. Nyéekánné nén bán békud ebómán, nyékánne dásō bán Dyöb ánamed bó.

15 Nyéwóg menyinje ne bad ábe béwógé menyinje, nyéleb-pe ne bad ábe bébe'.

16 Nyébê nsal nhóg ne nhóg ne aníní. Nyéenyēnē dúu ámín. Nyébê ehoj ne bad ábe béesē dyamdyam. Mod eewémtán aá mótōmtēnē debyéé awónj.

17 Nzé mod abelé we mbéb weétimtán mó mbéb. Boj pen etáŋgéné ewémtán ábel mboj á'sō é' bad bésyāā.

18 Mod téé áhed nzii ábē nsaj ne moosyāā.

19 A-baányaj, nzé mod abelé nyé dyam dé mbéb, nyé bēn nyéētimtán mó. Nyétéde Dyöb dēn ákōgsen mó. Nhóbe nén áyāle, éténlédé á kálag e Dyöb nén bán, Dyöb áhābe aá, "Me-éé ntímtan mbéb ké ríhéé nímé mod ábélé. Me Sāngwéé me-éé nhóbe'."

20 Eténlédé á kálag e Dyöb hōm démpēe pen bán, "Nzé nzaa ewag ábōj bad bé ekōyí, ehé bó ndyééd, nzé píde ekóbé bó, ébe bó chōm éche bémwákē. Nzé ebelé nē, ekwágte bó, béhéde-ε nzii eche béhājanné."

21 Mod eémwāg-se mbéb ríkamlán mó. Boj nímēn mboj rítōm mbéb áte.

13

Nyébage benkamlenε edúbé

1 Mod téé áwōgne benkamlenε ábe békamlan mó. Áyāle nkamlen ké nhóg méesaá nímé Dyöb déetíidé. Dyöb dō-'aá ábánné benkamlenε bésyāā á atii.

2 Né-ōó, kénzéé awē eewōgné' mod awē akamlan mó, né eewōgnéé ntii rí Dyöb. Bad ábe bébele nē, béhéde yāl nkōgsen.

3 Bad ábe bébele bwām, béēwōgēē benkamlenε mbwóg. Boj bad ábe bébele ebébtéd bóó béwōge benkamlenε mbwóg. Nzé weéhédé weé móbán nkamlenε, ébelé mekan mé bwām. Nzé ebelé nē, né ákēmtē we.

4 Nkamlenε adii mbāledé a Dyöb awē Dyöb ábánné áwōŋgen we. Boj nzé ebele mekan mé mbéb étáŋgéné mó abāj, áyāle ngine eché áwóó ákōgsen bad eesaá ngēn. Adii mbāledé a Dyöb awē Dyöb ábánné ákōgsen bad ábe bébele mekan mé mbéb.

5 Né-ōó, mod atáŋgéné benkamlenε awōgen, saké áyāle ábāá'ε nkōgsen démpen, boj kóŋne áyāle ábíí nén aá nímé nlém rílāŋgé mó aá mótāŋgēnē ábel nē.

6 Né-'aá, nyétáŋgéné tááse ámpē asaa, áyāle Dyöb dōó bad ábe bésanje tááse bébenlé.

7 Nyésábpe mod téé chōm éche nyétáŋgéné mó asábe. Ken tááse-ye, ké'ε mōné ké ríhéé nímé bēlāŋgé nyé bán nyésábe áyāle bwēm ábe nyéwóó. Nyébāa bad ábe nyétáŋgéné abāj, nyébage-ε bad edúbé ábe nyétáŋgéné edúbé ábe.

Nyédaŋ nhóg ne aníní

8 Mod eewánlé modmod alúm. Alúm áde nyé mod téé átáŋgéné awále adii ádaŋ nhóg ne aníní. Kénzéé awē adāó waáb, né alónté mbéndé esyāā.

9 Mbéndé édé nén bán, "Mod eekábé asón á ndáb e e'wōŋgé. Mod eewúé mod, mod eechíbé. Mod eesíde chōm é mod." Echén mbéndé ne échíní esyāāl chōó éladné boj ébé mbéndé póg. Ene mbéndé edii nén bán, "Dōj mwānyoj ngāne édáó ehoj yāl."

10 Nzé mod adāó mwānyaj eébēlēē mó mbéb. Né-ōó, edāŋge élónte mbéndé esyāā.

11 Ngáne nyébíí-’ε nén bán pónde emaa ape echě nyétàngéné akábned, nyétàngéné akábned, áyāle pónde e e’sooson eche syáné edé benben tómaa ngáne énsēbēē abé áde dédúbpé Krístæ dúbpen.

12 Ehintén emáá ape, bin é’kwogé asáa. Né-óó, déte de mbeltéd mé mbéb míme débélé’áá. Déwáa bwēm é’ nzum áwan nzum e e’nyinen bé ekide.

13 Déwále abé á bwām néε bad ábe bédé á e’nyinen bé ekide. Nyéekāg á ngande éche bad bémwākē mīm bonj mékōbē bós, nyéekábé mesón. Nyéébēlē-’ε e’tongé é’ mekan. Nyéēsēnlé’, nyéebāg-ke kónji.

14 Bonj nyéwōn abé áde Sāngú Yesu Krístæ. Nyéebāgē mekan mé esíí mé ekob é yāl etál, nyéébēlē ngáne échēn ekob é yāl éche ébēlte nyé mbéb éhedeé áá nyébéle.

14

Mod eekáadtē waab

1 Nyékobe bad ábe adab adúbe déewúu’ é áte. Nyéépētān-ne tāngene mam míme bēwémtné nén bán bétāngéné abel, ké’ε béetāngeneé abel.

2 Adúbe áde donje á bad ábāgé bós etál ádyé kéchéé bonj bad ábe adúbe déewúu’ é áte, bēedyākē donje á bwēm.

3 Bad ábe bēdyāg kéchéé béēnyīnē bad ábe bēedyāg donje á bwēm nkōntéd. Bad ábe bō-’ε bēedyāg donje á bwēm bēekáadtē bad ábe bēdyāg kéchéé áyāle bós moosyāál békōbnédé ne Dyōb.

4 Nzé-módé edíí ákādē mbāledε a mod ampée? Eche Sān chēn chós etāngéné ahób áá dyam áde ábēlé ádē bwām ké’ε déesaa bwām. Bonj Sāngwéé eche ngīne éwōngēn ane mbāledε ábel dyam á bwām.

5 Bad behóg bétédé donje dé e’pun bán áde etógnén tómaa ábiníí e’pun. Bad behóg-ke bétédé nén bán e’pun é’syāál é’díi nyaa póg. Mod-té átēd nén áá kéchéé éche mōwémtné, étāngéné ne mós.

6 Bad ábe bétédé bán epun ehóg edé etógnén tómaa ábiníí e’pun, bébele nē ábe Sāngwéé edúbé. Bad ábe bō-’ε ampē bēdyāg kéchéé, bōmpē bébele nē ábe Sāngwéé edúbé áyāle bésāgnan Dyōb áyāl e ene ndyééd. Bad ábe bō-’ε bēedyāg donje á bwēm, bōmpē bébele nē ábe Sāngwéé edúbé, bésāgnan-ne Dyōb.

7 Syáné modmod eesáá á alongé ne mós mwēn, modmod eewág-kaá ne mós mwēn.

8 Nzé dedé á alongé, né dedé á alongé ábel ngáne Sāngwéé áhedeé. Nzé dewédé-’ε né dewédé áwóged Sāngwéé menyinge. Né-óó, ken dedé á alongé, ké’ε dewédé, á mekáá míme Sāngwéé dós dédíí.

9 Nzom echě ekós bonj Krístæ awé, ápūū-’ε, abé á alongé, edii ábel bonj ábē Sāngwéé awé bad ábe bēwédé ne ábe bédé á alongé.

10 Cheé-ō ékás bonj ékāadtē mwānyon? Ké’ε, cheé ékás bonj ényīnē’ mwānyon nkōntéd? Ébíí nén wεé syáné moosyāál deétyēem á nkáásé á’só é’ Dyōb.

11 Eténlédé á kálag e Dyōb bán,
 “Dyōb áhóbé áá, ngáne nídíí á alongé,
 moosyāál atāngéné me mebóbōn abwóge,
 moosyāál ákēnē-’ε me áá me-εé ndé Dyōb.”

12 Né-óó, syáné mod téé deétyēem á’só é’ Dyōb, áláa mós chōm té eche débélé.

Mod eébeltē mwānyan mbéb

¹³ Né-óó, syánē modmod eekáádté waáb, boŋ pen mod téé ámad áwē nlém-té aá móótāŋgeneé dyam abel mbéd áde débēl boŋ mwānyan akōd ekuu káa ahún á mbéb-te.

¹⁴ Abé áde nídí mod nhóg ne Sánjú Yesue, ábélé nkoó abii nén meé ndyééd ké póg eesáá eché eesáá á'só é' Dyób. Boŋ nzé mod adúbpé aá ndyééd edé eché eesáá á'só é' Dyób, eedyág ch́.

¹⁵ Nzé edyág ch́m ké éhéé boŋ nē ábele' mwānyon aníní ebébtéd, né weewānlené mwānyon edaŋge. Weémwāg-se ch́m éche edyágké ebébéed alongé áde mod awē Krístāá áwédé áwē nló.

¹⁶ Weémwāg-se kunze eche éwóó néé mod awe adúbe áwúú áte, ebēl mod abel mbéb, ábel boŋ bad béhābē' wε mekan mé mbéb áyāl.

¹⁷ Saké adyé á ndyééd ne amwé á mím d́óó áde etógnén á nkamlen rí Dyób. Mekan níme méde etógnén médí áwóŋ abé áde átāŋgéné á'só é' Dyób, ábē nsan ne ábē menyinje níme níhúú ne Edáádāŋ éche Esáá.

¹⁸ Kénzée awé abenle Krístāá nē, akobnad á'só é' Dyób, bad ámpé bebélé béhób bán abele dyam á bwām.

¹⁹ Né-óó syánē déwéd yāl áte débele mekan níme mépεene nsan, ne níme méwōŋgan syánē áwéd nhóg ne aníní áte.

²⁰ Ehób é ndyééd éebelé-se nyébébéed nsón níme Dyób ábélé. Ndyééd ésyāāl ésaá á'só é' Dyób. Boŋ edé awusé adyé kéchéé eche ebēl boŋ mod ámpée ákwε.

²¹ Ebóó mod eébēl' ch́m éche éhele-se ebēl boŋ mwānyan akōd ekuu. Ken ádyé nyam-ε, ké'ε ámwé mím, ké'ε ádyé kéchéé émpée.

²² Kéchéé éche édúbpé tāŋgene nímén mekan, edíi áftnté e nyé Dyób. Nnam ne mod awé abii aá móobeléé dyam áde áde mbéb tāŋgene dyam áde ámáá alúmed á ábóó.

²³ Boŋ kénzée awé nlém níkágladté á abum nén aá móótāŋgeneé nyaa e ndyééd póg adyé boŋ átim ch́ adyé, né Dyób déhāb aá abelé mbéb áyāle eébenledéé áde adúbe ábel ch́m éche átāŋgéné abel. Nzé mod abelé dyam áde nlém níkágladté mó á abum aá átāŋgéné káa déetāŋgeneé, né abelé mbéb.

15

Awoged bad menyinje, saké échéd yāl

¹ Syánē awe adúbe áwúú áte, detāŋgéné néé déwōŋgéné bad ábe adúbe déewúú' é áte. Deébēlē mekan dásō nyaa eché ebōŋnédeé syánē bēn.

² Syánē mod téé átāŋgéné néé ábeléé mam nyaa eché ewógte mwānyan menyinje, áwéd mó adúbe áte.

³ Ké Krístāá mwēn eébele' aá mam dásō nyaa eché ewógte' mwēn menyinje. Boŋ abelé' aá ngáne éténlédé á kálag e Dyób nén bán "Nzyāŋ ésyāāl éche bad bésyāā' aá wε, étímnédé mε."

⁴ Mam mésyāāl níme bēntenlé á kálag e Dyób se' boód, bēntel mó áyáged syánē. Nē démbē ábel déwōŋ e'lyág bé nlém ábe é'húú ne eyale é Dyób éche ébele boŋ déwesán, éwēde-'ε syánē nlém á abum.

⁵ Nkánne nén meé Dyób áde ábele boŋ déwesán, áde áwēde-'ε syánē nlém á abum, ábel nyébē á nchemten ne nhóg ne aníní ngáne nyéhídeé Yesu Krístāá,

⁶ ábel boŋ nlatén níme nyédíi níbel nyébē nsāl nhóg áken Dyób, Sáá awé awéd Sánjú Yesu Krístāá.

Nyékob nhóg ne aníní

⁷ Né-óó nyékob nhóg ne aníní melemlen ngáne Krístāá akóbé nyé ábel boŋ bad békene Dyób.

⁸ Nlânge nyé nén mée Krístaa atimé mbàledé a bad bé Israel, àbel boŋ álóned akag áde Dyòb dèmbéé betaa. Nê dénlùméd-te nén bán Dyòb ákale mbále.

⁹ Ampè-ε àbel boŋ bad ábe béesé bad bé Israel, bébe Dyòb mekenag áyāle ngal eche awógé bó. Né-’áá éténlédé á kálag e Dyòb nén bán, “Né-óó mèkèn wε átínté e bad ábe béesé bad bé Israel, mèkòn-ne nkóngé àken ádonŋ dín.”

¹⁰ Eténlédé ampè nén bán,

“Nyé bad ábe nyéésé bad bé Israel, nyéwógen bad bé Dyòb menyinŋe.”

¹¹ Eténlédé-ε ampè bán,

“Nyé bad ábe nyéésé bad bé Israel, nyékene’ Dyòb, bad bé nkòŋsé bésyāal-le békene mó.”

¹² Nkal é’daádəŋ Yesayaa mómpè ahóbé ngáne éténlédé bán,

“Mod àbíd á nchyaátén míme Jesε

awé àpè àkamlen bad ábe béesé bad bé Israel.

Awé-’áá bad ábe béesé bad bé Israel bésummé nlém.”

¹³ Nkánne nén mée, Dyòb áde ábage’ e’lyóg bé nlém àbel nyélón ne menyinŋe mésyāal nyébé-ε nsan áyāle adúbe áde nyédúbpé. Nê débél ngíne e Edáádəŋ éche Esáá ébél áden adúbe dékwogé akwog ne akwog.

Nzəm eché ekáó boŋ Paalε átélé’ enén kálag

¹⁴ A-baányan, mmén mbíí bwám nén mée nyé bèn nyéwóó nlém mí bwám àbel mam míme Dyòb áhedéé áá nyébel, nyésòŋténé-ε mam bwám, nyékwognéd-te áyóged nhóg ne aníníí.

¹⁵ Boŋ kéné, donŋe á mekan áde áde ríténlé nyé á kálag-té wén. Ntelé mó, àkamten nyé mímén mekan mésyāal ésebán mbáa’ dyamdyam. Nsimé míme Dyòb ábágé me móó mbélel boŋ rítélé mímén mekan.

¹⁶ Dyòb ábágé me míme nsimé àbé mbàledé awe Yesu Krístaa, ákale bad ábe béesé bad bé Israel nkalaŋ mí bwám. Mbele mímén nsón néε prise ákal nkalaŋ mí bwám míme níhuú ne Dyòb, àbel nén bad ábe béesé bad bé Israel bébé mendé míme mbágé boŋ mékobnéd á’só é’ Dyòb. Dyòb dékob bó áyāle Edáádəŋ éche Esáá ébéle básáá á’só é’ Dyòb.

¹⁷ Né-óó, ngáne nííí ne Yesu Krístaa, nwóó nzəm ákum ekáá á tál áyāle nsón míme mbenléé Dyòb.

¹⁸ Méeheleε-se nhób dyamdyam démpée éetóméé àhób tɔŋgene nsón míme Krístaa ábéle boŋ níhel abel, àbel bad ábe béesé bad bé Israel bébele ngáne Dyòb áhedéé áá bébel. Mekan míme níhóbé ne míme mbélel móó médé mekan míme betɔŋgéné ahób míme betɔŋgéné-ε abel.

¹⁹ Membél míme mam á ngíne e e’chemléd ne menyáké, ne á ngíne e Edáádəŋ é Dyòb. Nén dèmbél menkál Nkalaŋ mí Bwám míme Krístaa bwám ngáne níkágé’áá bootya á Jerusalem àpe á mbwóg e Ilirikum.

²⁰ Nkénwòŋ nlém ákal Nkalaŋ mí Bwám mebwóg míme modmod éépédéε mbéd átúb dín áde Krístaa. Membel nê àbel boŋ meékāg wéε mod ampée ámaa nsón abooted.

²¹ Nén áde ngáne éténlédé á kálag e Dyòb nén bán,

“Bad ábe béewógé néε béhóbé áyāl eché, bényín, ábe bó-ε béewógé áyāl eché mbéd, bésòŋtén.”

Paalε abelé ntií àke á dyad á Roma

²² Mmén meke míme níkágé’áá móó mékáó boŋ meéhele àpe áwən.

²³ Boŋ bəəb, ngáne mímadé nsón échén ped é mbwóg, nwóó nlém áte bwámbwam àpe áwən, ngáne níkénwòŋgē mwě ne mwě.

²⁴ Měbwě áwēn nzé nkaḡ á alon ḡ Spen. Nwóó mewēmten meé mēnyīn nyé nzé nkaḡ, meé nyéwōngēn-ne me áke áwed. Bon pen, mēdyéé ne nyé mwāmpin, dehóded nhóg ne aníní nlem, bon rikag.

²⁵ Bon ɔɔɔ, ndé á nzii áke á Jerusalem áke déwōngēn bad bé Dyōb ábe bédé áwed.

²⁶ Bad bé Krīsto ábe bédé á mbwóg e Masedonia ne á mbwóg e Akaya bényiné nēn bán ébōn bán belad mōné belóme betóótokē bé bad ábe bédé áfinté e bad bé Dyōb ábe bédé á Jerusalem.

²⁷ Bényiné nēn bán ébóó bébel nē, bán betāngéné bó áwōngēn. Ngáne edíi bán nnam míme Dyōb ábágé bad bé Israel, bébenlad mó ne bad ábe béésē bad bé Israel, ébóó bán bad ábe béésē bad bé Israel bōmpē béwōngēn bad bé Israel bwēm nēngáne medyé, mōné ne mbóté.

²⁸ Nzé mímádé mímén nsón á Jerusalem, áde mímáá bó mōné abe míme beládté bó, mēhidé áke á alon ḡ Spen. Ene pónde dó-'á métyēmmé ányín nyé.

²⁹ Mbíi-'e meé nzé mpedé, échēm epē ébēl nyéékūd nnam míme Krīstā míme ríloné mbon.

³⁰ A-bānned, á dīn áde Sāngú Yesu Krīstā, ne áyāle edānge éche éhuú ne échē Edaádān, ncháa nyé nēn meé syánē délad mekáá déwēd me akānned nēn bán Dyōb áwōngēn me.

³¹ Nyékāne nēn bán Dyōb ánōn me ábel nēn bad ábe béédúbpe Krīstā bébebelé me dyam dé mbéb ké ahóg nzé ndé á Judeya. Nyékāne-'e nēn bán mōné míme mékiinédte betóótokē bé bad áfinté e bad bé Dyōb á Jerusalem, békob mó.

³² Ámbíd enē dóó mépéé áwēn ne menyīnge, nzé Dyōb áhede áá ébē áned, ábel bon ríkóme áte nzé ndé ne nyé.

³³ Dyōb dé nsaj ábē ne nyé moosyáál. Ebē nē.

16

Paale alómmé badb melentēn

¹ Ndáó meé nyébii bán awe syánē mwānyaj a mmwáád Fibii, awē awōngan ábel nsón á mwembé míme ndé á dyad á Senkria, ábele nsón mí bwām.

² Nzé apedé áwēn nyékob mó nken á dīn á Sāngú ngáne bad bé Dyōb betāngéné ábel. Nyébe-'e mó nwōngēn ké ríhée míme áhédné nyé. Nyébii bán mómpē akéwōngēn ekud é bad, awōngēn-ne me ámpē.

³ Nyélenté me Priskaa bó nchóm Akwilaa ábe syáábɔ sébelé' nsón míme Yesu Krīstā.

⁴ Bēnkwentén awé á nló nímēm. Nságnan bó. Saá-kaá mwēmpen nságnan bó, bon kááne mwembé míme bad ábe béésē bad bé Israel rísyáál, bōmpē béságnan bó.

⁵ Nyélenté me kááne bad bé mwembé míme ríbome' áwab ndáb.

Nyélenté me awem nsón-a-nlém, Epanetuse, adii mod awé abédé mod a'só ádube Krīstā á mbwóg e Esia.

⁶ Nyélenté me Maria, akébel nsón bwāmbwam áfinté echēn.

⁷ Nyélenté me kááne Andronikuse bó Junia, ábe syáábɔ sédé bad bé Israel, bēmbē-'e á mbwóg ne me. Bébyééné bwām áfinté e bembape bé nlomag, bēndúbē-'e Krīstā bon médúbē.

⁸ Nyélenté me Amplatuse, adii mod awé adé awem nsón-a-nlém awé rídáá á dīn á Sāngú.

⁹ Nyélenté me kááne Ubanuse awé syáábɔ sébenle' Krīstā nsón. Nyélenté me kááne Stakise, awem nsón-a-nlém.

¹⁰ Nyé́lented me Apelése, awě nímē mbeltéd ní bwám rínyinnédé nén bān ríkóbnédé ne Krístə. Nyé́lented me káshne bad bé abum á ndáb áde Aristobuluse.

¹¹ Nyé́lented me Herodyone, awě adé awem mwānyan a Israel. Bad ábe bédé abum á ndáb áde Nasisuse ábe bédúbpé Krístə, nyé́lented me bó á dín á Sǎngú.

¹² Nyé́lented me Trifane bó Trifosa, bebaád ábe bēbenle' Sǎngwéé nsón. Nyé́lented me Pesisuse awem nsón-a-nlém, awě akébel nsón bwámbwam á dín áde Sǎngwéé.

¹³ Nyé́lented me Rufuse, awě Sǎngwéé ápwédé ábele mó. Nyé́lented me káshne nyaa, atédé me nées awe mwán.

¹⁴ Nyé́lented me Asinkrituse, Flegone, Hemese, Patrobuse, Hemase, bǎnned bé Krísto ábe bóbōó bēbome'.

¹⁵ Nyé́lented me Filologuse bó Julia. Nyé́lented-te me bǎnned bé Krísto bé baachóm, Olimpase bó Neriuse ne mwānyan a mmwaád ne bad bé Dyöb bésyāäl ábe bédé ne bó.

¹⁶ Nyéhê nhóg ne anínií tǎl ne edənge é Krístə. Mwembé rísyāäl rílómmé nyé melenten.

Nhyágtén mé asóg

¹⁷ A-baányan, ncháa nyé me-éé nyétéd pónké ne bad ábe bēpeene' nkabén átínté echén, ábe bēpante bad nzii. Bényágte nyé ayáge áde apentan ayáge áde nyénsēbēē ayáge. Nyéehídé ábē bad.

¹⁸ Nyéehídé bó áyāle saké awed Sǎngú Krístə bēbenléé boŋ pen mam níme mébóŋnédé bēn móó bēbeléé. Bényinte' nsal áte, bēhóbé-é mekan átéd bad ábe bēēsōŋtān bwám nlém á abum.

¹⁹ Bad bésyāäl bēwógé nyaa eche nyésúmé mekuu áhíd nkalaj ní bwám. Né-óó, mbééné nyé menyinŋe. Boŋ nhede nén meé nyébii ábel mekan mé bwám, nhedé-'e nén meé nyéebíe' dyamdyam tǎŋgene abel dé mbéb.

²⁰ Dyöb dé nsan ákwógé Satane ahinten áwēn ekuu-sé. Nsimé níme awed Sǎngwéé, Yesu Krístə mbē ne nyé.

²¹ Timotié awé súmā sébele nsón, alómmé nyé melenten. Lusiose, Jasene, ne Sosipataa, bǎnned bé Israel bómpē bélómmé nyé melenten.

²² Me, Tetiuse awé ntenle' Paale enén kálag, mémpē nlómme' nyé melenten nées awen mwānyan a Krísto.

²³ Gayose alómmé nyé melenten. Awe ndáb dōó sédíí, áhed-taá mwembé mboméé. Erastuse, nkoó-móné a dyad, ne Kwatuse, awed mwānyan bómpē bélénté nyé. *

Mekáne mé asóg

²⁵ Syánē débē Dyöb ehúmé áyāle nén áwóó ngine áwéd nyé adúbe áte. Nē dō-aa ménlāá'é nyé áde ríkánlé nyé Nkalaj ní Bwám tǎŋgene Yesu Krístə. Mmē nkalaj rídii mbále eché Dyöb dēnkoó'é se etún, ekénlúmédté bad.

²⁶ Boŋ bōob alúmté syánē. Abídté mó áwed bōob ne mekan níme bekal bé dǎsdəŋ bēntenlé á kálag e Dyöb. Abelé nē ábel boŋ bad bé meloŋ mésyāäl bēwógne mó. Nén ábenlédé ngáne Dyöb dénhōbpé aa ébenléd. Mó adé á ngíndé ne á ngíndé.

* **16:23** Doŋge á kálag dé'só ábádé nchoo 24: Nē, nsimé níme awed Sǎngú Yesu Krístə mbē ne nyé bādsyāäl. Ebē nē. Kálag émpēé ébádé nímén nchoo ámbíde e nchoo 27.

²⁷ Dyõb dẽmpen dõõ áwóó debyéé ásyããl. Débe mós mekenag áyãle chõm éche Yesu Krĩstãã ábélé, á ngíndé ne á ngíndé. Ebê nê.[†]

[†] **16:27** Donje á kálag áwóó nchoo 25-27 hén ne ámbld e nchoo 14.23; émpẽe éwóó mós ámbld e nímén nchoo mwẽmpen 14.23; donje áwóó mós ámbld e nchoo 15.33.

Kálag e'só echë Paalε áténlé

Baá Kōrinto

Ndibned n kálag

Kálag e'só eche Paalε átélé, bad bé Krīsto ábe bédé á mwembé n Kōrinto bōó ántelée chō. Paalε átélé enén kálag tãngene ndutul éche bad bé mwembé békúdáá á alongé ádab, békudé'-ε ndutul tãngene ádab adúbe. Póndé echë Paalε átélé enén kálag, dyad á Kōrinto dōó ábédé nló n dyad á mbwóg e Akaya á póndé e nkamlen e bad bé Roma. Adé dyad démbýēēn bwámbwam áyāl e mekan nēngáne nyongé echë etómnádtáá áwed, mekan mé mbwóg nímáb bémbēēn mó kúmbe, abel dé mekan mé mbinde déntōm áte áwed, bébēnl'áá'-ε myōb hīn.

Mekan nīme Paalε ákóó awéd áte médii nkabén ne mbinde e mekan éche edé á mwembé-te. Ahóbe káōñne tãngene nyaa echë bad bēnōnēé e'wōngé, nlém nīme bad bétãngéné awōñ átií ké dyam ábóó káa déeboo'é, nyaa echë Edásdāñ éche Esáá ébageé bad nde ne tãngene mpuu. Akóó alúmed áte chōm éche nkalan nī bwám ríhóbeé tãngene nīmēn mekan.

A eped dyōm ne e'láán Paalε ahóbe tãngene edāñge. Echë eped chō'-áá bad bétómtné abii áfinté e enén kálag esyáál.

Nkabted n kálag

Ndibned 1.1-9

Nkabén nīme rídé a mwembé-te 1.10-4.21

Mekan mé mbinde ne alongé á túmbé 5.1-7.40

Mbēltéd nī Bad bé Krīsto ne bad ábe béedúbpe Krīstā 8.1-11.1

Alongé á mwembé ne abele á Dyōb 11.2-14.40

Mpuu nīme Krīstā ne nī bad bé Krīsto 15.1-58

Nde eche beládté bad bé Krīsto bé Jerusalem 16.1-4

Mekan nīme mēnōne bad bēn ne nsógtēn 16.5-24

¹ Mē Paalε, awē Dyōb ápwédé ábē mbapεε a nlómag awē Yesu Krīstā ngáne Yesu Krīstā apwédé mē ábē awē mbapεε ngáne Dyōb déntfī'é, mē ne Sōstene, awe syánē mwānyan, sēē sēténlé nyé enén kálag.

² Mwembé nī bad bé Dyōb ábe bédé á dyad á Kōrinto, nyēē nitenléé enén kálag. Dyōb áchénlé nyé ábē ábē bad ábe bésáá. Asánté'-ε nyé abé áde nyédii ne Yesu Krīstā. Melemlem nē dōó ápwédé bad bémpēe ábe bédé hōm-téé, ábe bébēnlad dīn áde awe syánē Sāngwéé, Yesu Krīstā. Adii awab Sāngwéé, abé'-ε awe syánē.

³ Nsimé ne nsan nīme ríhúú ne Dyōb, Titée awéd ne nīme Sāngú Yesu Krīstā, nībē ne nyé.

Paalε aságnan Dyōb áyāl e

mwembé n Kōrinto

⁴ Nságnan Dyōb póndé téé áyāl echēn, áyāle nsimé nīme ábágé nyé mbwi-ined ne Yesu Krīstā.

⁵ Abé áde nyédii mod nhóg ne Yesu Krīstā ábélé Dyōb ábágé nyé chōm ésyáál nyaa echë elóné mbon. Abelé nyékale nīmē nkalan nyaa eche ehēdnad, nyésōjténé'-ε mam mésyāál bwám tãngene nīmē mekan.

⁶ Nén álúmte bán nkalan tãngene Yesu Krīstā nīme sékánlé nyé ríkóó nyé asól á nlém-té.

⁷ Né-óó, nyéetógéé nde ké póg ábele Dyōb, ngáne nyésinēé póndé eche Sāngú Yesu Krīstā álúmēdté yál.

8 Sǎngú Yesu Krístæ mwën-εε ǎbēl adúbe áwúú nyé áte káǎne á asóg dé nkǒnsé ǎbel nén á epun éche ǎpεε ákáad bad, bad bééhǒbē bán dyam dé mbéb ké ahóg ádé áde nyébélé.

9 Dyǒb ǎbele' ngáne áhóbé aá mósǒbēl, mó apwεdé-ε nyé ǎbé mod nhóg ne awe Mwán, Yesu Krístæ.

Paale aá nkabén méébāg áfínté e bad bé Dyǒb

10 A-baányan, ncháa' nyé á ðin áde Sǎngú Yesu Krístæ nén meé, nyé moosyáál nyéε á nchemtan áyál e kéchéé éche nyéhóbéé ǎbel bonj nkabén méébāg áfínté echên. Bonj pen nyébê mod nhóg á mewêmtan ne áyál e kéchéé éche nyéhóbé bán nyébele'.

11 A-baányan, nhóbe nén áyále bad ǎbe Kloo béléngé me bán nyé bēn ne bēn nyésenle'.

12 Chǒm éche rǎhóbéé édíi nén, áfínté echên, baahóg béhóbé' bán "Ndíi mod awé ahíde ayáge áde Paale", donje bán, "Ndíi mod awé ahíde ayáge áde Apolose", ǎbiní bán, "Nhíde ayáge áde Petro", bémpée-ε bán "Ndíi mod awé ahíde ayáge áde Krístæ."

13 Nédé nyéhede ahób bán Krístæ akǎbné áte-yε? Me Paale-εé bēmboméé á awóg á nló nímēn'ε? Ké'ε á ðin áðem, me Paale, dǒo bēndusénné nyé?

14 Nságnan Dyǒb nén meé menkëndusénné nyé modmod éetóméε Krispuse bó Gayos.

15 Né-ǒó, nyé modmod nyééhēlēε se nyéhób bán nyékudé edusen á ðin áðem.

16 (Mendusén káǎne abum á ndáb áde Stefanuse. Méékāmtānnē pen me ndúséné mod ampée.)

17 Krístæ enkēnlómmé me ádusen bad. Bonj pen anlóm me ákal nkalan ní bwám, menkál-le mó ésebán mbenlad e'yale ǎbe é'lúmte debyéé á moonyonj. Nzé membēnléd e'yale ǎbe é'lúmte debyéé á moonyonj né nkalan tǎngene kwééd eche Yesue áwéde á awóg, méebáá dyamdyam.

Paale aá Krístæ adli ngine ne debyéé á Dyǒb

18 Dyam áde rǎhóbéé ádíi nén, nkalan tǎngene kwééd eche Krístæ áwéde á awóg ndíi chǒm éche édé eyókél wéε bad ǎbe béké á dù á muú. Bonj ne syáné bad ǎbe békúd e'sóosoj, nímé nkalan rídii ngine e Dyǒb.

19 Eténlédé á kálag e Dyǒb nén bán Dyǒb áhóbé aá, "Mēbel debyéé áde bad ǎbe bēwēmtan bán bēwóó debyéé ányínned nén déesaá dyamdyam, mēlúmēd-te nén meé bad ǎbe bēwēmtan bán bēbíi dyam, béebíi'ε dyamdyam."

20 Né-ǒó, élúmte nén bán mod a debyéé éesaá dyamdyam, meléede a mbéndé a bad bé Israel éesaá dyamdyam. Bad ǎbe béléngε bad mekan ne debyéé éenén pónde béesaá dyamdyam. Dyǒb álúmté aá debyéé dé nkǒnsé ádíi eyókél ngēn.

21 Ngáne édíi bán Dyǒb ǎbénlédé áde debyéé ǎbel bonj bad bé nkǒnsé béebenlád ádab debyéé ǎbíi mó, mó Dyǒb amaá atíi aá mósǒsj alonjé á bad ngáne bédúbpé nkalan níme sékaleé tǎngene Krístæ. Kénée bad ǎbe béebíi Dyǒb bétédé nén bán póle e e'yókél é' bad chǒo sékaleé.

22 Bad bé Israel bédæ bán bényín e'chemléd é' menyáké bonj bédúbē, bad bé Grikia-ε béhéde debyéé áde áchábé ámín.

23 Bonj sé pen, sékale nén bán Krístæ, Ane-awé-Béwógté, anwé á awóg. Ne bad bé Israel, nímé nkalan rídii dyam áde bēnkēndǎngé awóg ne awóg ðen, ne bad ǎbe bó-ε béésé bad bé Israel, nímé nkalan rídii eyókél ngēn.

24 Boŋ Dyōb áchénlê donge á bad ábē ábē bad. Bó donge á bad bédii bad bé Israel, ábiníi-'e bad bé Grikiá. Ne ábén bad nímē nkalanj níme sékaléé rídií Krístəə, mó adé ngine e Dyōb, mó-'aá adé debyéé á Dyōb.

25 Chōm éche ényinnad nées eyókél é Dyōb étómé debyéé á moonyonj. Eche chō-'e ényinnad nées ewomwom é Dyōb, étómé ngine e moonyonj.

26 A-baányan, nyékamten nyaá é bad éche nyébédé á pónde eche Dyōb áchénlê nyé ábē ábē bad. Bad bé nkōŋsé bényiŋ nyé nguse é bad nées bad ábe bəwóó debyéé. Nyé nguse é bad nyébédé benkamlen. Nyé nguse é bad nyēmbíd á túmbé é benkamlen.

27 Boŋ Dyōb ápwédé bad ábe bad bé nkōŋsé béntēdtē nées e'yókél é' bad. Abelé nē ákwágéd bad ábe béchágé yál á nkōŋsé-te nén bán bəwóó debyéé. Dyōb dēmpwəd-te bad ábe nkōŋsé ményinnē nées bad ábe béésé etógnén. Ambel nē ákwágéd benkamlen.

28 Dyōb dēmpwəd bad ábe bad bé nkōŋsé bényiŋnē bán bédé nkōŋtéd, ápwéd ábe bényiŋnē bán béesaá dyaŋdyam, bad ábe bényiŋnē bán béesaá dyaŋ dé abelen. Dyōb dēmbel nē álúmed nén aá mam níme bad bé nkōŋsé bényiŋé bán médé etógnén, méesaá chōmchōm.

29 Ambəl nē ábel boŋ modmod eékūmē' ekáá á tál á'sō é' Dyōb.

30 Chōm éche ábénlê nyé chōə ekáá boŋ nyébē mod nhōg ne Yesu Krístəə. Mekan níme Yesu Krístəə ámbenlê, ne syánē, debii bán ádii debyéé á Dyōb. Nédē, Yesu Krístəə mó abelé boŋ syánē débélé mekan níme métəŋgéné, debé bad ábe bésáá, mó-'aá akódté syánē á mbéb-te.

31 Né-ɔ́, éténlédé á kálag e Dyōb nén bán "Kénzée awé akume ekáá á tál, akume' ekáá á tál dásō áyale dyaŋ áde Sangwée ábénlê mó."

2

Paale abénlédé ngine e Dyōb ákal nkalanj təŋgene kwééd eche Yesu

1 A-baányan, áde nípédé awen ákale nyé nkalanj níme nḥóbe mam təŋgene Dyōb,* meébenlád-taá e'yale é'mbáá ké' debyéé ámbáá.

2 Membel nén áyale áde nḥbédé átínté echēn memmād á nlém-tē nén mēé méébenlê dyaŋ dēmpēe étóméé ákal nkalanj təŋgene Yesu Krístəə ne kwééd echē áwédé á awog.

3 Ade nḥbédé ne nyé menkēnkwoŋnédte mmēn ábel nsón, mbwóg nḥbédé mē áte, nlém nḥhūnē-'e mē á abum.

4 Ade n'yágté'áá nyé, nikanlé-'e nyé, póle echē rílanḡé'áá nyé eebédéé póle echē etéde bad nlém á abum echē edé debyéé ámbáá áte. Meékanle'áá-'e nyé ne debyéé ámbáá ábel nén nyédúbe chōm éche rílanḡéé nyé. Boŋ pen áde ríkanlé'áá nyé nkalanj ní Dyōb, mekan níme nḥóbe'áá mēlúmté'áá bán ngine e Edáádəŋ é Dyōb edé áwəd-te.

5 Meéhede'áá mēé nyédúbe nkalanj ní Dyōb áyale mod ábénlédé debyéé ámbáá ákale nyé mó. Boŋ nḥedáá mēé nyédúbe nímē nkalanj ngáne Dyōb dēn ábénlédé eche ngine ábel nyédúbe.

Debyéé áde dḥiú ne Dyōb

6 Kénē-'e ámpē, nzé séde ne bad ábe bémáá awúu áte á adúbe-tē, sébelé sébenlád debyéé nzé sékanle bó póle. Adé debyéé pen déebāḡkē debyéé áde mod a nkōŋsé ábenladté. Déesaá-'aá debyéé áde ké benkamlen bé nkōŋsé bé' chii bēbenladté. Ábē benkamlen bédii bad ábe nḥmab nkamlen mēbēé á esón é pondé.

* 2:1 Mam təŋgene Dyōb; donge á kálag dé'só áwóó: mam təŋgene mekan mé e'koŋnéd mé Dyōb.

7 Debyéé áde sébenladté ádíí debyéé áde Dyöb ábágé sé. Sékale ntíí ní kun níme Dyöb ábénlédé ádē debyéé ábel. Ngen e'só Dyöb dénkénlúmedté modmod níme nntíí áte. Mmén ntíí níme Dyöb áttíídé ahóbé aá syánē ámpē dēbē ášē e éche ehúmé á pónidé echē ehúé'. Dyöb déntíí aá móšbelé syánē nē se áde ééhāgēē nkōjšé.

8 Nkamlēē a nkōjšé ké nhóg enkénsónténné ádén debyéé á Dyöb. Ayāle nzé bénsóntēn chōm éche Dyöb ábéláá, né bénkénwúú' é Sāngwéé a edúbé abome áde bēmboméé mós á awōg.

9 Boj kénē-'e ámpē, éténlédé á kálag e Dyöb nén bán, "Mam níme Dyöb ábōjšéné ábele ábē bad ábe bédás mós, médíí mam níme modmod éényínēē mbéd, níme modmod ééwōgēē mbéd, níme modmod éékāmtēnēē-'aá áwe nlém-té mbéd."

10 Mmén mekan móó Dyöb álúmté syánē. Echē edáádān chōš ánlōmmē álúmed syánē níme mekan. Edáádān énoe mekan méšyāšl áte, ébíí-'e mekan méšyāšl, kááñne mekan mé Dyöb níme mod éeheléé-se awámsén asóntēn.

11 Modmod eebyéé' é mewēmtēn mé mod ampée. Edáádān éche édé mod áte chōš ébyéé' níme mewēmtēn. Melelem nē dōó modmod éebíí' é mewēmtēn mé Dyöb, étōmēé Edáádān é Dyöb.

12 Edáádān éche syánē déwóó éhúú ne Dyöb. Deewóó' é edáádān é nkōjšé. Dyöb ábágé syánē échēn Edáádān ábel désóntēn mam méšyāšl níme ábééné syánē níme nsímé.

13 Né-šó, séēbēnládté e'yale ábe moonyon ábenladté áde debyéé áyáged bad. Boj sébenlad e'yale ábe Edáádān é Dyöb élyágtéé sé áhób. Sébenlad e'yale ábe Edáádān élánggēé sé tāngene níme mekan.

14 Mod awé eewóó Edáádān é Dyöb áte eedúbpéé mekan níme Edáádān é Dyöb élánggēé bad áyāle anyine mó eyóké. Ééhēlēē-'e mó asóntēn áyāle Edáádān éche Esáá chēmpēn chōó éwōngān bad ádol mekan mé Dyöb áte bwám.

15 Mod awé awóó Edáádān áte ádol mekan méšyāšl áte bwám. Boj modmod ééhēlēē-se asóntēn mewēmtēn níme ane mod.

16 Edé nén ngáne éténlédé á kálag e Dyöb nén bán, "Nzé-módé abíí mewēmtēn níme Sāngwéé? Nzé-módé ahēle se aléb-pe mós?"

Boj syánē dewóó mewēmtēn níme Krístā.

3

Paale aá bembáledé bé Dyöb bōó bō moosyāšl bédíí

1 A-baányān bé Krísto, meéhele'aá sé nláá nyé mekan ngáne rílanggēé bad ábe adúbe ádāb áwúú áte áyāš e mekan mé Dyöb. Boj nlánggē'áá nyé mam ngáne rílanggēé bad ábe bēwóó mewēmtēn mé moonyon a ekob. Nyébédé nēē nkáál, mentéd nyé nēē bad ábe bēmbootéd ábē mod nhóg ne Krístā.

2 Abíí dōó nkáál nímwáá' é, eedyággké ndyééd echē elélé. Né-'aá me-'e mēmbootédté nyé mam níme méelele áte tāngene nkalan ní Dyöb áyáged. Menkényágedté nyé mam níme mewúú áte, áyāle ene pónidé nyénkénkwogké ákob mós. Ké bōob-pe nyéekwōgēē ákob mós.

3 Ayāle nyédíí nyéhíde' mekan mé ekob é yāl, nyéwánléné nhóg ne aníní kónjí, nyé bēn ne bēn nyéšwanjān-ne. Bōob áde nyédíí nyébeléé níme mekan éélúmtēē bán nyédíí nyéhíde échēn esíí é mekan mé ekob é yāl-e? A mbále, nyébeléé nēē bad ábe bēwóó dás nsóntēn ní moonyon.

4 Chōm éche ékás boj ríhōbē nén édíí nén, áttínté échēn bad behóg béhōbe bán, "Ndíí mod awé ahíde ayáge áde Paale," ábíníí-'e bán, "Ndíí mod awé

ahíde ayáge áde Apolose.” Enén ndín e mbeltéd elúmte’ bán nyéwóó dás nsónḡten m̄ moonyoḡ.

⁵ Bəob-póó, nzéé Apolose adíí? Nzéé me, Paale-’e rdíí? Bembəlede bé Dyöb ngén bəó sédíí. Séwōngéné nyé ádúbe Krístəə. Sé mod téé abele nsón míme Sāngwéé abágé mó aá abél.

⁶ Ndíí mod awé awéné mbál-e-bū, Apolose-’e mó adé mod awé asyogé’áá ene mbál mendíb áyāl, boḡ Dyöb dəó démbəl boḡ mbál ríkwoge’ saké sé.

⁷ Né-óó, mod awé awéné ne mod awé asyogé mendíb b́ modmod béesaá etógnén. Mod awé adé etógnén adíí Dyöb. Mó abele boḡ mbál ríkwoge’.

⁸ Mod awé awéné ne mod awé asyogé mendíb bébeleé nsón nhóg, Dyöb dəsabə-’e b́ mod téé nchoo ne nsón míme abél.

⁹ Bembəlede bé Dyöb ábe bébele nsón nhóg b́ sédíí. Nyé bad ábe nyédúbpé-’e nyédíí nēḡgáne nzag eché Dyöb áwóó. Nhele ríhəgtén-ne nyémpé ábē nēḡgáne ndáb eché Dyöb álóó’.

¹⁰ Mbēnlédé nsimé míme Dyöb abágé me abel nsón nēḡgáne nlóó-ndáb awé awóó debyéé álón ndáb. Mensáá nsón rí Dyöb áfnté echēn, bembəlede bēmpēe békēené nsón míme rísáádé á’ s̄o. Boḡ kénzée awé álóó’ atāḡgéné atéd pónde ḡgáne álóó’ é amín e nsón míme bémáá asáa.

¹¹ Ayāle modmod éhēlēē-se abel nsáaned mēmpēe éetóméé míme rímáá abel. Mmē nsáaned rdíí ayáge áde rí’yágté nyé tāḡgene Yesu Krístəə nén meé, Dyöb ásoo’ áded alongé mbwiined ne Yesu Krístəə.

¹² Donḡe dé bembəlede bēbenlad bwēm nēḡgáne ḡól, sílva ne meláá mé etógnén ákēen mímé nsón á’ s̄o. Bembəlede bēmpēe-’e bēbenlad bwēm bé nsón bēmpēe ábe é’ bídé áyāl e mel, ne ábe é’ dé byaá, ákēen nsón á’ s̄o míme bésáádé.

¹³ Pónde epé eché moosyaál ányínnē nyaa e nsón eché mod téé ápédé abel. Ayāle á epun éche Yesue ápéé ábídéd mam mésyāal áwed. Ebē nēḡgáne mod awé ahédé bwēm á dū, boḡ muú mbəl anyín éche éhele-se éhyāḡ ne eche éehelé-se éhyāḡ.

¹⁴ Nzé nsón míme mbəlede abélé amín e nsón míme bémáá asáa méehyáa, né ákud nsábe.

¹⁵ Boḡ nzé nsón míme mbəlede abélé amín e nsón míme bémáá asáa ríhyáa, ane mbəlede éekudté chómchóm, boḡ kéné, mwēn adíí abé mod nhóg ne Krístəə. Boḡ pen abē nēḡgáne mod awé abídné mehélé á ndáb-te eché ehyáa. Adíí abé á alongé boḡ chóm ésyāal éche áwóó émad ahyaḡ.

¹⁶ Ndúbpé meé nyébíí bán nyédíí abón áde Dyöb ádye’ é áte. Edəádəḡ é Dyöb édé áfnté echēn.

¹⁷ Kénzée awé abéhte abón á Dyöb, Dyöb débēbēd ane mod, ayāle nén wēe Dyöb ádye’ é adíí hóm áde ádē ḡḡḡ. Nyébēn-naá nyédé ádē hóm áde ádē ḡḡḡ.

¹⁸ Modmod eédōḡe yāl. Kénzée awé awémténé áfnté echēn aá mówōó debyéé á nkōḡsə-te wén, átimed yāl eyókéł é mod abel boḡ akōḡ debyéé awóḡ.

¹⁹ Nlāḡge nyé nén ayāle, dyam áde bad bé nkōḡsə bényínéé bán áde debyéé dəó Dyöb ányínéé née eyókéł é akan. Debíí bán nén ádē mbáale ayāle éténlédé á kálag e Dyöb nén bán, “Bad bēwēmḡtan bán bēwóó debyéé boḡ Dyöb ábenlad ádab debyéé dēn ákób ádab akwáb.”

²⁰ Eténlédé ámpē nén bán, “Sāḡgwéé abíí aá bad ábe bēwēmḡtan bán bēwóó debyéé ádab debyéé déesaá dyamdyam.”

²¹ Né-óó, modmod eékūmnē baányoḡ ekáá á tāl, ayāle nyéé Dyöb abágé bwēm é’syāal.

²² Dyöb álómé me, Apolose ne Petro áwōḡḡen nyé. Bwēm é’syāal ábe Dyöb áhágé á nkōḡsə, abagé nyé b́ ábenled. Ké nyébé á alongé ké’ e nyéwé, Dyöb

ábélé nê á mbonj nímēn. Mekan-ne níme mébenlad ne nyé bɔɔb ne níme mébenléd ne nyé á pónde eche ehúe' á'sò, médií á mbonj nímēn. Abén bad bésyāal ne ábén bwēm é'syāal Dyòb ábágé nyé bɔ.

²³ Nyédii bad ábe Krístəə, Krístəə mɔ'-e abé ane awé Dyòb áwóó.

4

Paale aa Dyòb ápwéde bó ábele Krístəə

¹ Nyétéd sé nēngáne bad ábe bébenle Krístəə, ábe Dyòb ábélé aa bélānge bad mekan mé e'konjéd.

² Chòm éche éhednad bán éché ndín é bembəlede bébel édií ábel nsón bwām níme echaɔ sāj ábágé bó aa bébel.

³ Bonj me meewóó' é pónde ábel ne kéchéé éche nyé ké'e mod ampée áwóó áhób tēngene nsón níme Dyòb ábágé me aa mbel. Ké mmēn meehóbéé tēngene nsón níme mbelée, ké mbóó ké'e méebóó'.

⁴ Meenyínéé awusé ké ahóg áyāl e nsón níme mbelée bonj nê déélumtēē nēn bán chòm ésyāal éche mbelée étāngéné. Sāngwéé mwēmpēn mɔ abii nsón níme mbelée, ké ntāngéné ké'e méētāngeneé.

⁵ Né-ɔɔ, nyéehóbé bán mod abelé nsón mí bwām ké'e abelé nsón mé mbéb áde pónde éepédēē ábel nê. Ene pónde épē áde Sāngú Yesu Krístəə ápéé. Ade ápéé, ábidéd bwēm ábe é'bedé á ehintén-tē á e'nyinen bé ekide abidéd-tē bad mewēmten áwed níme modmod enkēmbí'.

Ene pónde dɔ-'aa Dyòb dékenné mod téé ngáne ápédé nsón abel.

⁶ A-baányanj bé Krísto, nhóbe' nímēn mésyāal áyāl echēm ne Apolose áwōngēn nyé ásoñtēn. Ntède sé bad bébe nēngáne elānsēn ábel nyéyáge e'yale ábe béhóbéé nēn bán "Mod ábele dásɔ mekan níme méténlédé." Modmod ekumné mod nhóg ekáá á tál se ányiné anínii nkóñtéd.

⁷ Dyòb áhágé mod nhóg etógnén tómaa anínii-ye? Cheé mod ádíí éche Dyòb déebelée bonj abé? Cheé-ɔ mod ákuménne ekáá á tál, áde édií bán kéchéé éche mod ádíí Dyòb dɔɔ ábélé mɔ?

⁸ Bɔɔb nēn nyélumte byánán nyēwóó chòm ésyāal éche nyétógnéné. Nyélumte byánán nyésudé nhon. Nyétédte sé bembəlede, nyé bēn nyēwēmtan bán nyédii kāñ. Mendāñ nēn mēé nyékonj kāñ abé ábel bonj sémpé sékamlan ne nyé.

⁹ Nwēmтан nēn mēé Dyòb ábélé aa sé bembapēe bé nlomag sébē nēngáne bad ábe béesē etógnén áfinté e bad. Sédii nēngáne bad ábe bétómté mbakú bán séwē. Nhóbe nēn áyale bad bésyāal bēnone sé ányin chòm éche ébenlad ne sé. Saá-kaá bad bēnpēn bonj káñ ne ángel éñone sé.

¹⁰ Bad bényíne sé nēe e'yókél é' bad áyale sébenléé Krístəə. Bonj nyépen nyēwēmtan bán nyēwóó debyéé áyale nyédii nhóg ne Krístəə. Bad bēwēmtan bán séewóó' é ngine ábel dyamdyam bonj nyēwēmtan bán nyēwóó ngine éché ehúú ne Dyòb. Bad béebagéé sé edubé bonj bébage nyé edubé.

¹¹ Káñne ne bɔɔb, séewóó' é chòm éche sédyákgē ne éche sémwákgē. Séewóó' é mbóté éche ékwógé sé ahé. Séyókgé mbéte akud á mekáá mé bad. Séewóó' é wée sédyéé'.

¹² Sébele ntú ní ngine ábel bonj sékud chòm éche séwōnganné éched yāl. Nzé bad bésyā' sé sēlānge bó bán mekan mébéen bó bwām. Nzé bad bébele sékude metake, séwēsan.

¹³ Nzé bad béhóbe sé mekan mé mbéb áyāl, séhóbe bó mekan mé bwām áyāl. Ké bɔɔb bad bédii bényíne sé mbinde áwab díd-te. Séesaá dyam dé abelen áwab.

¹⁴ Ntele nén saké áwóged nyé e'són bon ntenle nyé áléb nyé tângene mekan míme nyétàngéné abii. Ayāle nyédii nêngáne ábém bán ábe rídáá.

¹⁵ Kénée edii bán nyéwóó bemeléede bé Krīsto híin, mod nhóg mwēmpen mó adé nêngáne sáá awēn. Apēen áde nípiínédé nyé nkalanj ní bwám ábélé ndii nêngáne sáá awēn a Krīstā.

¹⁶ Né-óó, ncháa nyé nén mēé nyébele mekan míme mémpē mbéleé.

¹⁷ Nén dóó akáá bon rílóme Timotie áwēn. Adii nêngáne awem mwān á dīn á Sāngú. Ndáá mó, ayǒgké-'e mekan ábel ngáne éhēdnadté. Nzé apedé ákamtén nyé nyaa e alongé eche ríwóó nêngáne mod a Krīsto. Ene nyaa e alongé edé nchoo ne chóm éche rí'yágté mwembé ké ríhée míme níkagké áte áyaged.

¹⁸ Nyé donje á bad nyédé kúmbe, nyéwēmtān bán méepāá áwēn.

¹⁹ Bon nzé Sāngwée akwēténé, nkwogé ape áwēn. Ene pónde-'aá méhēdté áte ábii chóm éche ábê bad ábe bédé kúmbe békoo'é ábel. Mébfi ké békónté ngíne awónj eché ehúú ne Dyób ké'ε nsəl ngēn móó bēbēléé áte.

²⁰ Nkamlen rí Dyób méesaá chóm éche edé á nhóbtéd, bon rídii ngíne eché elúmté' á mbéltéd.

²¹ Ahée abōhénéde nyé, nyédáá bán nzé mpedé áwēn níkógsan nyé áyāl e kúmbe eche nyédíí ké'ε nyédáá bán nzé mpedé rílúmed nyé nlem mé edānje, ríchedne nyé yǎl?

5

Paale ahóbé tângene akáb dé mesón á mwembé rí Kōrinto

¹ Nwógé nén bán mod nhóg átínté echēn akábe asón, nyaa e asón eché ké bad ábe béebii Dyób béehelée se békāb. Chóm éche ríhóbeé edii nén mēé, mod nhóg átínté echēn akábe asón ne sáá mwaád.

² Chán-nō nyéhele nyébé kúmbe áde edii bán ane mod nímmē mbéb rítàngéné nyé dásō ndutul awóged. Mó awé ábele enén ndín e dyam, nyétàngéné nēe nyénáné mó átínté echēn.

³ Nhóbe mēé nyébel nē áyāle kénée méesaá ne nyé, nkamtan nyé pónde tée. Nhóbe byánán ndé ne nyé nén mēé mmaá mbakú atómed,

⁴ ne kunze eche Sāngú Yesu Krīstā ábágé mē, nhóbe nén mēé nyékógsen ane mod awé ábélé nímmē mbéb. Nzé nyéládné, ébē byánán ndé ne nyé, awed Sāngú Yesu Krīstā ábe nyé ngíne ábel kéchéé éche nyéwēmténé ábel.

⁵ Nhede mēé nyébe ane mod á mekáá míme Satané ábel bon Satané ábébed eché ekob é yǎl. Kénée edii bán Satané ábébed eché ekob é yǎl, Yesue ášōj eché edáádāj á epun éche ápéé ákáad.

⁶ Nyéetàngenée kúmbe abé. Nyébii nén bán mbumé rí ngun rísonle' nzé bēhédé mwā esulten áwēd-te, melemlem nē dóó ane mod awé ábelé nímmē mbéb áhele ábel bad bēmpēe bēbel mbéb.

⁷ Nyéhúd esulten é nchun ésyāā, ábel bon nyébé nêngáne mbumé mékōōlē míme méēwóo esulten, né-'aá nyékóó abé. Nyédé nén áyāle Krīstā anwé á nló nímmē. Mó ambé nēe Mwān-a-Ndyōj ní mbód awé bēmbēé nēe mendē mé ngande e Nnyíme-ámīn, áyāl e mbéb ní bad.

⁸ Né-óó, nyéwóg menyínje ne ene ngande, esulten é nchun éébāg ámpē. Abé ádēd ábē pónde ésyāā nêngáne abé á bad bé Dyób, deebēlē e' bēbtéd é' mekan, deebébe-'ε nlem á abum. Bon pen déwōj abé dékōōlē, déhíde Krīstā ne nlem nhóg, dékale-'ε mbále.

⁹ Kálag eché mēntelée nyé menláá nyé mēé nyééhojnē' bad ábe békábe mesón.

¹⁰ Saké bad ábe béedúbpe Dyöb bóo ríhóbáá, kénéé edíí bán bó donje á bad békábe mesón, bédé ngoód, bédé bechíb, donje ábenlé-’ε myöb mé metóm. Weéhēlē-se ebān échén ndín é bad á yāl kááj né ehídté á nkōjnsé.

¹¹ Boj bad ábe mēntelée nyé mée nyéehōnē bédii bad ábe béchágé yāl bán bédii bad bé Krísto boj békābē mesón, bēbē ngoód, bēbagé myöb mé metóm edúbé, bēhābē bad mekan mé mbéb á yāl, bémwāg mīm bwāmbwam mékōbē bó, bēbē-’ε bad ábe béchíbe’. Nyéedyág ké ndyééd ne échén ndín é bad.

¹² Meewóo’ε kunze ké póg áhób mée békógsen bad ábe béesē bad bé Dyöb. Bad ábe bédé á mwembé-te bóo nyétāngéné akógsen.

¹³ Dyöb dóo dékāād bad ábe béesē á mwembé-te. Eténlédé á kálag e Dyöb nén bán, “Nyéhúd mod awē abele mbéb áfínté echēn.”

6

Mod eesōmné mwānyaj

wée bad ábe béedúbpe Krístəə

¹ Nzé nyé mod ké ahée awánléné mwānyaj a Krísto dyam, éékāg wée mod awē eedúbpe Krístəə aá akāad bó. Boj pen áke wée bad bé Dyöb ábel bétimed bó áse.

² Nyébii nén bán bad bé Dyöb bóo békāād bad bé nkōjnsé. Né-óó, ngáne edíí bán nyéekāād bad bé nkōjnsé, nyétāngéné néε nyékāadteé mpíntéd mé mekan.

³ Nyébii bán syānē-εé dékāād ángel. Néε edíí-’aá nē, chán-nō déehelée baá mam ábe bétoge mbóó áfínté echen mbwe-tée amad?

⁴ Né-óó, nzé échē ndín é mam épédé áfínté echēn, nyéētīm chó néε atéd, nyékeēn wée bad ábe mwembé méétédēε néε dyam bán bóobó bémade nyé chó-ye?

⁵ E’son ne nyé. Nédē modmod eesáá áfínté echēn awē awóó debyée akóm nsaj áfínté e mod bó mwānyaj ábe bēwánléné-ye?

⁶ Boj mod atime mwānyaj akēen á kóte, bad ábe béedúbpe Dyöb békāadte-’ε búmō.

⁷ Asōmēn áde nyēsōmnēé nhóg ne aníníí á kóte álúmte bán nyékwédé ne akwe dēn. Edé mboj mwānyaj ápanen we tómaa we ákēen mó á kóte.

⁸ Boj nyétíme nyépanne, nyédoge-’ε nhóg ne aníníí, nyēbele nē káájne wée baányoj bé Krísto.

⁹ Nyébii nén bán bad ábe bébele e’bēbtéd é’ mekan béebáá á nkamlen rí Dyöb. Modmod eédōgē nyé. Bad ábe békábe mesón, bad ábe bébenle myöb mé metóm, bad ábe békábe mesón á ndáb e e’wóngé, baachóm ábe bēnājnad baáb baachóm bēmpēe, ábēn bad bésyāāl bó modmod béebáá á nkamlen rí Dyöb.

¹⁰ Bad ábe béchíbe’, bad ábe bédé ngoód, bad ábe bēbágé yāl á amwé á mīm, bad ábe bēhóbe bad mekan mé mbéb á yāl ne bad ábe bédumne bad bwēm bó modmod béebáá á nkamlen rí Dyöb.

¹¹ Nyé donje á bad nyēbeláá échén ndín é mekan. Boj á dīn áde Sāngú Yesu Krístəə ne á Edāádaj éche áded Dyöb, bēhúdé nyé mīmén mbéb á yāl, nyédé bad ábe bésáá, Dyöb ábánné nyé néε bad ábe bésáá, nyékōbnédé-’ε á sō’ é’ Dyöb.

Nyēbenlad echen yāl ábe Dyöb edúbé

¹² Nyé mod nhóg ahele ahób aá, “Nwóó kunze ábel kéchéé éche rídáá abel.” Nē áde mbále. Boj pen saké chōm ésyāāl éche mod ábeleé éwōngan. Mod ahele ahób aá “Nwóó kunze ábel kéchéé éche rídáá abel.” Boj chōm ké éhéé étēngēné néε étédéé mē ntāj.

13 Mod ampée ahele ahób aá “Bébéle ndyééd áyále abum, bébéle-le abum áyále ndyééd.” Nê adé mbále. Boŋ Dyöb débél abé bwém bépé á asóg. Dyöb déebeléé alongé á moonyon aá bébenle mbinde é mekan boŋ abelé dó aá bébenle Sánŋwéé, Sánŋwéé mót-aá atagne yál e moonyon.

14 Dyöb dēmpuúd Sánŋwéé, nê dót-aá ábenlédté eche ngine ápuud syáne.

15 Nyéebii' é nén bán échen yál chós édé pág éche ébéle yál eche Yesue-yé? Né-ós, nhele ntéd pág é yál éche Krístəə boŋ nke rlatén ne yál e akwalee-yé? Eetāŋgeneé abé nê mbéd!

16 Ké' é nyéebii' é bán mod awé atédé eche yál boŋ álatén yál e akwalee abelé búmā bétímé yál póg-é? Eténléde á kálag e Dyöb nén bán, “Eché yál ébe étim yál póg.”

17 Boŋ mod awé mót-é adé nhóg ne Sánŋwéé abele átim mod nhóg ne mót á edáádəŋ.

18 Nyéewó' é dyam dé abel ne mbinde é mekan. Mbéb ké ríhée mémpēe míme mod abeléé méenənée eche yál. Mod awé akábé asón abelé mbéb tāŋgene eche yál.

19 Nyéebii' é bán échen yál edii abón áde Edáádəŋ éche Esáá édyee' é áte-yé? Dyöb dós ábágé nyé échen yál. Saké nyé nyéwóó chós, Dyöb dós áwóó nyé.

20 Dyöb ácháné nyé ne nkun míme ríhábé ámin. Né-ós, nyébenled échen yál ábe Dyöb edubé.

7

Paale alébe bad tāŋgene e'wónŋé

1 Bəəb-pós, mēlāā nyé tāŋgene mekan míme nyétélé á kálag eché nyéténlé me. Ebóó bán mod eewó' mmwáád.*

2 Boŋ ngáne edii bán akáb dé mesón abúú áte bwámbwam, ébóó bán mwēnchóm téé áwón awé mmwáád, mmwáád téé-é awón awe nchóm.

3 Mwēnchóm téé atāŋgéné abelé' mekan míme mwēnchóm atāŋgéné mwaád abele, mmwáád téé-é atāŋgéné abelé mekan míme mmwáád atāŋgéné nchóm abele.

4 Mmwáád mwēn eékamlánne eche yál, nchóm mót akamlan mót, melemlem nê dós mwēnchóm eékamlánne eche yál, mwaád mót akamlan mót.

5 Nyé ábe nyéwónné, mod ké nhóg eebáŋné waáb e'non é'sé, éetóméé né nyé bēn nyéchémtné bán nyébel nê á esón é pónde, ábel boŋ nyéwón pónde e bwám akáne. Boŋ pen ámbid e nê nyétāŋgéné abé ámpé ngáne nyéensebēē abé, ábel boŋ Satane eepiinád nyé mekəŋsen akáb asón.

6 Meehóbéé nén meé nnyáŋte nyé ábel nê, boŋ nhóbe meé nê dós ébóó bán nyébel.

7 Mendəŋ pen meé bad bésyāal bebē áde béewōŋnéé néé me. Boŋ mod téé awóó nde eche Dyöb ábágé mót. Abelé donŋe á bad aá béwōŋ mewémten áwón mmwáád ké' é nchóm, ábel-le ábinii' aá béewōō'.

8 Bəəb-pós nlāŋge nyé bad ábe béewōō bebaád ké' é bechóm ne ábe bédé bekúd meé, ébóó bán nyéewóó bebaád ké' é bechóm ngáne me-é méewóó' é.

9 Boŋ pen, nzé nyéehel yál akób, mod-téé awón mmwáád ké' é nchóm. Nhóbe nén áyále édé mbon mod áwón mmwáád ké' é mmwáád áwón nchóm, tómaa áwón esii' é ngine áte weé né mósōwón áde wéewóó' é.

10 Bəəb-pós, ne bad ábe béwóó bebaád ké' é bechóm, saké me nhóbe' pen, Sánŋú Yesue mót ahóbe'. Ahóbe nén aá mmwáád eetāŋgeneé nchóm atede.

* 7:1 Eewóó' mmwáád, donŋe á kálag áwóó: *eénaŋnáád mmwáád.*

11 Boŋ nzé édé bán atédte nchóm, atánǵéné adyεε ésebán awóó' nchóm ampée, ké'ε bó nchóm bétfm ásē. Mwenchóm-me eetánǵeneé nées ánáné mwaád á e'wónǵé.

12 Bɔɔb-pɔɔ, ne nyé bad ábe nyélyagé ásē, me-éé nhóbe' saké Sánǵú Yesue. Nhóbe nén meé, mod awé adúbpé awé awóó mmwaád awé eedúbpe boŋ ákwentén aá búmɔ bédyεε, ane mod eénané' ene ndín e mmwaád á e'wónǵé.

13 Nzé mmwaád, awé mó-ε adúbpé awóó mod awé eedúbpe awé ákwenténé mó awón, ane mmwaád eetánǵeneé ane mod atede.

14 Nhóbe nē áyāle nzé mod awé eedúbpe awóó mmwaád awé adúbpé, ákobnéd á'só é' Dyób, abé áde ádíí mod nhóg ne mmwaád awé adúbpé. Melemlem, nzé mmwaád awé eedúbpe awóó mod awé adúbpé, ane mmwaád ákobnéd á'só é' Dyób abé áde ádíí nhóg ne mod awé adúbpé. Nzé énkembé nē, né bán ábe áben bad béchyáa' é béekobnádté á'só é' Dyób. Boŋ édé nén bán békobnad á'só é' Dyób.

15 Boŋ pen nzé mod awé adúbpé awóó mod awé eedúbpe, boŋ awé eedúbpe ahóbe aá e'wónǵé é'maa nyétédé, é'maa. Nzé nē ábenléde, mod awé adúbpé awóó kunze ádyεε nē ésebán bényágte mó ádyεε á ndáb e e'wónǵé. Dyób áhede aá syáné débē nsaŋ ne nhóg ne aníníí.

16 We, mmwaád awé adúbpé Yesue, kapóg ehele ésōŋ alongé áde awōŋ nchóm awé eedúbpe. Melemlem ne we mwenchóm awé edúbpé, kapóg ehele ésōŋ alongé áde awōŋ mmwaád awé eedúbpe.

Paale aá bad bébē ngáne Dyób dēmpwēdté bǔ

17 Boŋ pen Sánǵú Yesue amaá atíí ngáne alongé áde syáné mod té átánǵéné abé. Né-ɔɔ, syáné mod téé ábē nyaa eché ámbēē áde Dyób dēmpwēdté syáné aá débē ábē bad. Adén dyam dɔɔ nlanǵeé mwembé té.

18 Nzé edé mod awé bēmmadté ayag boŋ ámbíd e pónde Dyób ápwēd we, weétfmē e'chemléd ahúd ábe é'lúmte nén bán bēn'yág we. Melemlem, nzé edé mod awé bēnkēn'yagké boŋ Dyób ápwēd we, weémwāg-se bēyāg we.

19 Ké bēyágé mod ké'ε béeyagēé mó, nē déesaá etógnén. Chóm éche édé etógnén édíí áhíd mbéndé é Dyób.

20 Mod téé ábē nyaa eché ámbēē áde Dyób dēmpwēdté mó.

21 Nzé wembé ntāŋ á pónde eché Dyób dēmpwēdté we, nén déetagté we. Boŋ nzé echoŋ sán ahóbe aá wéebáá ntāŋ ámpē, ékōb áned.

22 Mod awé ambé ntāŋ Dyób ádēhób aá mǔpwede mó adíí nées kunze áyāle Sánǵú Yesue ahúde mó á mehaŋ. Melemlem nē mod awé enkembé ntāŋ Dyób ádēhób aá mǔpwede mó. Apwēd áde Dyób ápwédé mó ábélé adíí ntāŋ awé Krístā.

23 Dyób ácháné nyé ne nkun níme nchábé ámín. Né-ɔɔ, nyéewóglán bad ábe bēlanǵe nyé mekan níme nyétánǵéné ábel.

24 A-baányan, nhede meé mod téé áwōŋ alongé áde ánwōŋgē áde Dyób ápwédé mó.

Paale ahóbe tǎŋgene bekúd

ne bad ábe béewóó bebáád ké'ε bechóm

25 Bɔɔb-pɔɔ, tǎŋgene bad ábe béewóó bebaád ké'ε bechóm, Sánǵú Yesue eelánǵeé me chóm éche rítánǵéné nyé aláa tǎŋgene adén atón. Boŋ ké nē, awōŋgen áde Sánǵwéé áwónǵéné me ábē mod awé bad bésúme nlem áyāl, mēláá nyé dyam áde mbíí meé átánǵéné.

26 Nnyíné nén meé ngáne ndutum édíí enén pónde, ébóó bán mod adyεε ésebán awóó' mmwaád ké'ε nchóm.

²⁷ Nzé mod amaa mmwaaád awón, eétdtē mós. Nzé mod eewóo mmwaaád, eéhdē mmwaaád awē áwóó'é.

²⁸ Bonj nzé mod awóo mmwaaád, eébeleé mbéb. Nzé mmwaaád-te awóo nchóm eébeleé mbéb. Ké nê-é bad ábe béwóo bebaád ne bebaád ábe béwóo bechóm békudé metake híin á alongé ádá. Nzom eché ekáá bonj ríhóbē nē edii, nhede meé béekudé nímén metake.

²⁹ A-baányan, chóm éche níwémténé nyé aláa edii nén, póndé eché déwóo á nkòjsé edé esón. Né-óó, bootya bób mod awē awóo mmwaaád ábii nén áa mmwaaád eésáá chóm éche étómténé etógnén abé áwē alongé.

³⁰ Melelem ne bad ábe bésudne', béétédé nē nées dyam áde átómténé etógnén abé. Abe bó-é bédé menyinge, béétédé nē nées dyam áde átómténé etógnén abé. Bad ábe béchane bwém béétédé bán bwém ábe béchaneé bós étómténé etógnén abé á alongé ádá.

³¹ Bad ábe béhíde mekan mé nkòjsé ámbíd, béebanné nlém á yál e nímé mekan. Ayále mekan mésyāál níme débéléé á nkòjsé-te chii, mépé á asóg.

³² Nhede meé dyamdyam déetagté nyé nlém á abum. Mod awē eewóo mmwaaád, Sāngwéé móo ákamtanné póndé ésyāál, ngáne ábenlé-é bonj awóged Sāngwéé menyinge.

³³ Bonj mod awē awóo mmwaaád mekan mé nkòjsé mwén ne mwén móo ákamtanné póndé ésyāál. Póndé téé akamtan ngáne átāngéné mwaád menyinge awóged.

³⁴ Né-óó, akamtan mekan mébe akamtan ahóg. Mmwaaád-te awē eewóo nchóm, ké-é mwán a mwaád awē eébií mwénchóm, Sāngwéé móo ákamtanné ne ngáne ábeléé mós. Mekan mésyāál níme ábeléé níme nlém nisyāál mbág áhed ábel ásán á'só é' Dyób. Bonj mmwaaád awē awóo nchóm mekan mé nkòjsé mwén ne mwén móo ákamtanné. Póndé téé akamtan ngáne átāngéné nchóm menyinge awóged.

³⁵ Nhóbe nímén mekan mésyāál ábel bonj méwōngén nyé. Meehóbéé meé nyétāngéné mós ahíd. Bonj nhede meé níwōngén nyé áhíd chóm éche étāngéné ábel bonj nyébenle Sāngwéé ne nlém nhóg.

³⁶ Nzé mod anyiné áa móohenlé yál akób ásin kááj mósōwōn mmwaaád awē áhóbé áa mósōwō', ákag á'só áwōn mós ngáne nímé mewémtén mélāngé mós. Nē déesaá mbéb.

³⁷ Bonj nzé mod amaa atii áwe nlém-té, áde béēnyāgtéé mós bonj akóbé yál, amadé-é á nlém-té áa mósōwōngé ane mmwaaád awē áhóbé áa mósōwōn, né abelé dyam áde áde bwám.

³⁸ Né-óó, nzé mod awóo mmwaaád né abelé dyam á bwám. Mod awē mós-é akóbé yál bonj eewóo mmwaaád abelé dyam áde ábós bwámbwam.

³⁹ Mmwaaád awē awóo nchóm atāngéné abé ne nchóm á alongé áde ásyāál. Bonj pen nzé nchóm awédé, awóo kunze áwōn mod awē ádáá. Ane mod pen átāngéné abé mod awē adúbpé Sāngwéé.

⁴⁰ Bonj ne me, nnyiné meé mmwaaád awē nchóm awédé, ábe menyinge nzé adyéé nē áde éewóó'é nchóm ampée. Mbii nén meé Edáádān é Dyób chós élyāgté me áhób nímén mekan.

8

*Paale ahóbé tāngene medyé
nime bébagéé e'diidinge*

¹ Bób-póó, nhóbe tāngene medyé nime bad bébagéé e'diidinge nées mende. Edé mbále ngáne éhóbnédé nén bán "Syánē moosyāál debii dyam." Ene ndín e e'bií bé akan ebele mod abág kúmbe. Bonj edāngé éwéde syáné áte.

² Nzé mod awêmtan aá móbíí dyam, ane mod eébíí' é dyam ngáne átàngéné abii.

³ Bonj nzé mod adáo Dyöb, Dyöb ábelé ábíí mó.

⁴ Bóob-póó, ríhòb tângene adyé dé medyé níme bébágéé ediidinge née mende. Debíí nén bán e'diidinge, néde myöb níme bébénlé mekáá, méesaá dyamdyam. Dyöb ahóg dèmpen dóó adé.

⁵ Bad béhòbe bán myöb mémpèe níme béchágéé bán myöb méde á nkonj ní mín ké' é á nkonj ríse. Éde-' é mbále bán myöb níme bad bèn bébénlé mekáá ne besángwéé bé nkòjse híin bédé.

⁶ Bonj kéné debíí bán Dyöb ahóg dóó adé. Mó adé Titée awè ahagé chòm ésyāā, mó akáá-' é bonj debé á alongé. Sàngwéé nhóg mwèmpen-naá adé. Mó adé Yesu Krístā. Mbwiined ne mó dóó béchágé chòm ésyāā. Mbwiined ne mó dó-' aá dédíí á nkòjse.

⁷ Bonj saké moosyāā abíí nímén mekan. Donge á bad pen béménténé ábè e'diidinge edúbé abe nyaa eche káón ne chii nzé bédyág medyé, bédíí béwémtan bán bégage nímé myöb edúbé. Nlém méewúú' é bó á abum, né-óó bémémtan bán nímé medyé mébele béesaā' é á'só é' Dyöb.

⁸ Ndyééd éehéle-se ébāl bad bésán á'só é' Dyöb. Deéhéle-se debé bad bé mbéb nzé dedyéde chó ké' é debé bad bé bwám áde déedyédeé chó.

⁹ Nyétéd pónde pen ngáne nyébenladtè kunze eché ebágnédé nyé bad bé Krísto. Nyébenlad chó nyaa eche nyébenlé se áben baányan bé Krísto ábe nímab nlém méewúú' é á abum béhún á mbéb-te.

¹⁰ Nzé mod awè nlém méewúú' é á abum anyiné nyé ábe nyéhóbé bán nyébíí akan nyédyág medyé á abón áde nímé myöb, nyéebíí' é bán nén déted mó nlém á abum ádyé medyé níme bébágé ábè e'diidinge née mende-ye?

¹¹ Né-óó, wé awè echagé yāl wéé mod awè abíí akan, ehede wéé mwányon awè Krístā áwéde áwe nló awè áyāle ábòñ e'bíí bé akan-é?

¹² Nzé ebelé mbéb wéé mwányon, né Krístā móó ébélé mbéb áyāle ebelé mwányon a Krísto ebébtéd, ebébté-' é mó nlém á abum.

¹³ Né-óó, nzé ndyééd eche ndyágkè ebele mwānned a Krísto ahúne' á mbébté, né méedyáá ene ndyééd ámpè mbéd, ábel bonj, éébélè se mwānned ahún á mbéb-te.

9

Kunze e bembapèe bé nlomag ne nsón níme bétàngéné abel

¹ Me, Paale ndíí mod awè awóó kunze nêngáne bad bémpeé ábe bédúbpé. Ndíí mbapèe a nlomag. Nnyíne Yesue, Sàngwéé awèd. Nyéé nyéde nêngáne mbakú áyāl e nsón níme Sàngwéé ábélé mbwiined ne me.

² Ké bad bémpeé béenyíne me nêngáne mbapèe a nlomag, nyépen nyékobé me nén bán ndíí mbapèe a nlomag. Abé áde nyédíí ne Sàngwéé nyé bèn nyéde née e'chem ábe é'lumte bán ndíí mbapèe a nlomag.

³ Mekan níme mbélé nílāngè bad ábe béhòbe me mam áyāl médíí nén:

⁴ Séewóó' é kunze bad ábe sé ndyééd ne mmítéd áyāl e nsón níme sébeléé-ye?

⁵ Séewóó' é kunze átéd mmwāád awè adúbpé Krístā áhoon sé áke meke melemlen ngáne ábíníí bembapèe bé nlomag bébeléé-ye? Saá nê dóó Sàngwéé baányan ne Petro bébeléé-ye?

⁶ Sé Banabase bènpen-éé sétàngéné nsón abel átogen éched yāl-le?

7 Sánze ehéé ébelé nsón boŋ mwèn átogné eche yál? Nzé-módé áwōŋ nzag e besabé boŋ eedyág ké epum é sabé ehóg? Nzé-módé adé awé abōŋge nyag ésebán amine' ch́o mebíi ákud mílíg?

8 Saké á nsōŋten ní moonŋŋ dēmpen ríhóbéé mímên mam, mbéndé e Mose ch́ompē ehóbé melemlēm.

9 Ehóbe nén aá, “Weetádé nyag nsal eche esálte ngun.” Bōob-pōó, nén álumte nén bán Dyōb átédé nyag etógnén-ε?

10 Saá syánē bēn-εé ákōŋtēé ahób-ε? Syánē bēn-εé dekáá boŋ átélé nē. Mod awé akwēle nzag abele aá móókūd mbote, mod awé mó'-ε asálte ngun abele nsón aá móókūd ngun.

11 Sé bembapēé bé nlomag sēwéné mekan mé e'dáodāŋ áfínté echēn. Edé mbéb nzé sehédné nyé mekan mé nkōŋsé-yε?

12 Nzé bad bēmpēe béwóó kunze áhedēn nyé bwēm, né sēwóó'ε kunze áhedēn nyé bwēm tómaa bō-yε?

Boŋ sébēnledéé enén kunze. Sēkwēnténé metake mésyāāl, ábel boŋ nén déékāá' akal dé nkalaŋ ní bwām níme sékaleé tāŋgene Krístāā.

13 Nyēbíi bwām bán bad ábe bébele nsón á Ndáb-e-Dyōb, áhed d́ó b́ó'-ε békudéé echab ndyééd. Melemlēm nē d́ó bad ábe bébele nsón ábe mendé á menyán mé mendé, áhed d́ó bébelé békud akab dé mendé.

14 Melemlēm nē d́ó Sāŋgwéé áhóbé aá bad ábe békale nkalaŋ ní bwām békud ntōgēn wée bad ábe bēkanléé níme nkalaŋ.

15 Kénéé édífí nē, meébēnledéé enén kunze ké póg. Saá-kaá nē ákáá boŋ rítelé' enén kálag ábel boŋ bēbēnle me nímén mésyāāl. Mēkwēntén áwé tómaa mod ábel meewóó' nzwóm ákum ekáá á tál tāŋgene nímmēm nsón.

16 Meewóó'ε kunze ákum ekáá á tál áyāle nkalaŋ ní bwām níme ríkaleé. Dyōb dēn d́ó áhóbé aá níbel nímén nsón. Medim ne me nzé meékale nkalaŋ ní bwām.

17 Nzé mmēn-εé mēmpwēd nímén nsón níme níbeleé, né nsine nsábe. Boŋ ngáne meépwe déé mó, Dyōb dēn d́ó ábágé me mó aá níbel.

18 Nsábe ríhée-ō ríkudéé? Nsábe níme ríkudéé nídíi nēn, nzé nkale nkalaŋ ní bwām meéhédné bad nsábe, meébēnládtē kunze eché rítāŋgéné abēnled akal áde ríkaleé nkalaŋ ní bwām.

19 Ndé ne mmēn, meésáá ásē e mod. Boŋ mbelé yál ntāŋ a bad bésyāāl ábel boŋ bad híin bétim bad ábe Krísto.

20 Ade níbeleé nsón ne bad bé Israel, mbele mam nēe mod a Israel ábel boŋ bétim bad bé Krísto. Kénéé édífí bán mmēn meésáá ásē e mbéndé eche Moseε, ndé byánán nhíde ch́ó áde níbeleé nsón áfínté e bad ábe behíde ch́ó. Mbele nén ábel boŋ bétimēn Krístāā.

21 Melemlēm nzé mbele nsón áfínté e bad ábe béesé ásē e mbéndé é Mose, mbelé níbelé' mam nēe b́ó. Mbele nén ábel boŋ bétimēn Krístāā. Nén déesáá bán meehídéé mbéndé é Dyōb. Mmēn nkoó abé ásē e mbéndé e Krísto.

22 Nzé ndé ne bad ábe ádab adúbe déewúu'ε áte, mbelé mbé nēe b́ó ábel boŋ bétimēn Krístāā. Né-óó, ntímé abé ngáne ébōŋnédté mod téé. Mbēnlad nzii ké ehéé ábel boŋ nísoŋ alongé áde b́ó donje á bad.

23 Mbele nímén mésyāāl áyāle nhede méé nkalaŋ ní bwām ríkanlad, ábel boŋ ríkud nnam níme níme nkalaŋ nípēneé.

24 Nyēbíi bán bad híin bényōgte mehélé boŋ mod nhóg abelé atóm baáb, ákūd-tε nsábe. Né-óó, nyényōgte ábel boŋ nyékud nsábe.

25 Mod ké ahéé awé aboŋsan ányōged mehélé abelé ásūdéd yál. Abele nén ábel boŋ béwáad mó ekóté é edubé é mbonja. Eché ekóté éebemeé, ébēb. Boŋ nsón níme sébeleé, sébele mó ákud nsábe níme mébē á ngíndé ne á ngíndé.

26 Nē ákáá meényōgtéé kéchán, meeluméé'-ε ábēm e'chog kéchán.

²⁷ Né-òó, nwéde yǎl áte, nsudte-’ε chós ábel bonj ébel kéchéé éche níhedeé me ébel. Mbele nén ábel bonj meémā bad bémpee nkalanj ní bwām akale bonj mmèn meékudé nsábe.

10

Paale aá bad bébenlád myöb mé metóm

¹ A-baányan, ndáó meé nyékamten ábed betaa ábe Mosεε ályágté’áá áde bébidé á Egipto. Dyöb dénlómē bós mbag eché elyágté’áá bós. Bós moosyáál bémponj á edíb é nkwe’te é sebán béhóó’.

² Aponj áde bémponjé á edíb é nkwe’-te ne abé áde bémbwē áse e mbag démbël bénküd edusen, béhídē-’ε Mosεε.

³ Bós moosyáál béndyē ndyééd e edáádəŋ eche Dyöb dénlómē bós mbwiined ne menyáké.

⁴ Melemlem bémmwē-’ε mmítéd mé edáádəŋ níme Dyöb dénlómē bós mbwiined ne menyáké. Bémmwē mendíb níme Dyöb démbenlé bonj mébid á ndim e aláá-te eché embé ne bós. Ene ndim e aláá ebédéε Krístā. *

⁵ Bonj kéné Dyöb dénkénwógénne bós bad híin menyinge. Nē dénkəŋ anwúú bós, ndim níhəntéd bós áte á ehyánge.

⁶ Bəəb-əəó, nímén mekan mésyāāl médii nēŋgáne eláŋsén ásim syánē etúu áte, nén deewóó nlém ábel mbéb ngáne bébélé’áá.

⁷ Nyéébenlé myöb mémpēe ngáne bós donje á bad bébenlé’áá. Eténlédé á kálag e Dyöb nén bán, “Ábē bad béndyē áse, bédyāg bwēm, bémwāg mīm, bébélé-’ε mbinde é mekan.”

⁸ Syánē deekábé mesón ngáne bós donje á bad bébélé’áá. Nén démbël Dyöb dénkəsgən bós, bós bad móom mé e’kálé mébe ne e’kálé é’láán bēwé epun ehóg.

⁹ Syánē deekāgē Sāŋwéé ngáne ábed betaa bémbenlé bonj nyó éwúú bós.

¹⁰ Syánē deenyonád Dyöb áte ngáne bós donje á bad bébélé’áá. Dyöb dénlóm áŋgel e kwééd ewúú bós.

¹¹ Mmén mam mésyāāl mémbenléd ábel mébē nēŋgáne eláŋsén wéε bad bémpee, béntél-łe mó áse ásim syánē etúu áte. Syánē dedé bəəb á pónde eché nkəŋsé níkwógə əpε á asóg.

¹² Né-òó, mod a Krísto ké ahéé awé awémténé aá mótyēēmē á adube-tē átéd pónde ábel bonj eékwag.

¹³ Mekəsgen ké méhéé níme métáné wε, médii nyaa e mekəsgen eché etáne bad bémpee. Bonj Dyöb áwóó nlém nímé bad béhele-se bésun mó nlém á yǎl, éemwaa’áa-’ε aá ékud mekəsgen níme métómé wε. Pónde eché mekəsgen mēpéé, ábēl ebíd mó áte, abe áde ábéé wε ngíne átóm mó áte.

Paale aá bad béetəŋgené

ake á ngande é myöb mémpēe

¹⁴ Né-òó, a-baányan, nyéébenlé myöb mé metóm.

¹⁵ Nhóbe áwən nēε bad ábe níbíí meé bēwóó debyéé. Nyébēn nyédol áte chöm éche nílangé nyé.

¹⁶ Pónde eche syánē ábe dedúbpe démiúdeé mbwendé ní mīm nhóg, debage Dyöb nságnén níme Krístā. Melemlem ne ewele éche débélé déladné ádyé, debélé dedyé yǎl eché Krístā.

¹⁷ Ngáne édíí bán ewele édíí ehóg, kénéε syánē débúú áte, dedii yǎl póg, áyāle melemlem mé ewele móó dedyággē.

* **10:4** Ene ndim e aláá ebédéε Krístā: Bad bé Israel bémbíí bán ndim e aláá embé ne bós ngáne bekágé’áá á ehyánge. Paale aá ene ndim e aláá ebédéε Krístā, Krístā-’ε abédé ne bós.

18 Nyénone bad bé Israel, bad ábe bédyág medyé míme bébágé nêngáne mende á menyán, bómpē bəlatan á menyán mé mende ábe Dyōb edúbé.

19 Cheé nkoo' é ahób hén? Nhóbé meé e'diidinge ábe bad bébagéé mende, ne míme mende míme bébagéé, bédé dyam-ε?

20 Aáy, chóm éche ríhóbéé édií nén meé, mende míme bébagéé á menyán míme bad ábe béédúbpe Dyōb, saké Dyōb dōó bébagéé mó, e'daádəŋ bé mbéb bōó bébagéé. Meéhēdēē meé nyéwōŋ dyamdyam abel ne e'daádəŋ bé mbéb.

21 Nyéehēlēē-se nyémīdē mbwendé míme Sāŋgwéé nyémīdē-ε míme e'daádəŋ bé mbéb. Nyéehēlēē-se nyéladné' ádyé ndyééd á menyán mé mende míme Sāŋgwéé, nyéladné-ε ádyé á menyán mé e'daádəŋ bé mbéb.

22 Dehede Dyōb kónjí ahé áte-ye? Dewēmtan bán dedé ngine tómaa mó-ye?

Kéchéé éche débéléé débél chó ábe Dyōb edúbé

23 Bad béhóbe nén bán “Dewóó kunze ábel kéchéé éche dédáá abel.” Nê ádé mbále, bon saké chóm ésyāál ébóó abel. “Dewóó kunze ábel kéchéé éche dédáá abel”, bon saké chóm ésyāál épeene nsyáŋ.

24 Nyé modmod eéhēdē chóm éche épiinad mwēmpen bwám bon nyéhede chóm éche éwōŋgan bad bémpēe.

25 Nyéwóó kunze ádyé kéchéé éche nyécháné á dyon-té áde nyéesedtéé dyam áde débél bon nlém ríkogléd nyé á abum tŋŋene éche chóm éche nyécháné.

26 Eténlédé á kálag e Dyōb nén bán, “Nkōŋsé ne chóm ésyāál éche édé áwēd-te bédíí ábe Sāŋgwéé.”

27 Nzé mod awé eedúbpe Dyōb alébpé wε áhye dé ádyé ndyééd, bon etíidé wéé mókag, edyé kéchéé éche ábágé wε éseban esedte mó dyamdyam tŋŋene ene ndyééd. Nlém méekoglád wε á abum áseded dyam tŋŋene ene ndyééd.

28 Bon nzé mod alángé wε áá “Enén ndyééd bēmbé chó néε mende wéε e'diidinge,” weedyág chó áyál eché ne ábel bon nlém méekoglád modmod á abum.

29 Nédé, saké ngáne nê débēnlé bon nlém ríkogléd wε á abum bon bwāmbwam ngáne nê débēnlé bon aníní mod átagé áte á nlém-té. Cheé ékəŋ bon nlém míme ríkoglad mod ampée á abum níbel bon meébēnlad kunze eché ebágnédé me?

30 Nzé mbagé Dyōb mesáŋnen áyāle ndyééd eché ábágé me, chán édií bán mod ampée ahele áhóbé me mam mé mbéb áyál, áyāle mbágé mesáŋnen.

31 Né-óó, kéchéé éche mod ábeléé, ké ádyág ké ámwāg, ábele chó ésyāál nyaa eché ebage Dyōb edúbé.

32 Nyébele chóm téé nyaa eché éepeénné mpuutéé, ken wéε bad bé Israel, bad ábe béésē bad bé Israel, ké'ε mwembé ní Dyōb.

33 Nyébele mam melelem ngáne níbeléé. Nwane áte áwóged mod asyāál menyinje áyál e chóm téé éche mbéléé. Meéhēlēē chóm éche ébōŋnéde me bon mbele chóm éche ébōŋnéde moosyāál, ábel bon Dyōb áson alongé á moosyāál.

11

1 Né-óó, nyéhíde' mímem mbeltéd ngáne me-ε ríhídeé mbeltéd míme Krístəə.

Paale ahóbé tŋŋene akuten dé nló á mwembé-te

2 Bəəb-pəó, nkene nyé áyāle nyékamtan me pónde ésyāál, nyéhíde-ε elem éche mén'yāgēdté nyé.

3 Bon ndəó meé nyésōŋten nén bán Krístəə mó adé nló ámín e baachóm bésyāál, mwēnchóm-me abé nló ámín e mwaád. Dyōb dō-áá adé nló ámín e Krístəə.

4 Mwenchóm ké ahéé awě akáñne' ké'ε ahóbe mekan á ðĩn á Dyõb boŋ akútēn nló, awógte Krístæ awě adé nló ámĩn echē e'són.

5 Mmwaád-te awě akáñne' ké'ε ahóbe mekan á ðĩn á Dyõb boŋ eekútēne nló, awógte nchóm awě adé nló ámĩn echē e'són. Nhəŋlén ké nhóg méesaá áfĩntē ene ndĩn e mmwaád ne mmwaád awě akəŋné nló.

6 Mmwaád awě eekútán nló, émbē mboŋ né ankəŋ mó ngen póg. Ngáne édíí-aá dyam dé akwágké mmwaád ákəən nló ké'ε áseŋen nyoŋ, bebaád békútan nĩmab nló.

7 Mwenchóm eetəŋgenéé nló akútēn ngáne édíí bán ahəg áde Dyõb áhágé mó á nwágén nĩme álũmte éche edúbé. Boŋ ahágé mmwaád álũmed edúbé é mwenchóm.

8 Dyõb dénkənhəgənné mwenchóm mmwaád, boŋ anhəgén mmwaád mwenchóm.

9 Saá-kaá mmwaád ankəŋ boŋ Dyõb áhágé mwenchóm boŋ mwenchóm mó ankəŋ boŋ Dyõb áhágé mmwaád.

10 Ayāl e enén nzəm mmwaád átəŋgénéé néε áwóó e'chem á nló ábel boŋ áŋgel ényĩn.

11 Kénē-'ε, ngáne dédíí nhóg ne Sáŋgwéé, mmwaád éehēlēē-se abé ésebán mwenchóm, mwenchóm-me éehēlēē-se abé ésebán mmwaád.

12 Edé nē áyāle Dyõb dēnhəgén mmwaád mwenchóm, nē ðó-'aá mmwaád-te áchyáá'ε mwenchóm. Boŋ bwēm é'syāāl é'húú ne Dyõb.

13 Nyébēn nyénən áte, mmwaád átəŋgénéé akáne á elad é bad bé Dyõb áde éekútēnéé nló-ye?

14 Nyaa eche Dyõb áhágé bad chēn eelũmtéé nēn bán edé akwágké mwenchóm áte de esid ékwog mó á nló bwāmbwam-ε?

15 Boŋ nzé esid échábé mmwaád ébele áboŋ. Dyõb ábágé mó esid néε ekútēn é nló.

16 Nzé mod ahede ádén dyam apentēn, chóm ésyāāl éche níwóó ahób édíí nēn méé, syánē ne mwembé ní Dyõb nĩsyāāl, deewóó'ε nyaa empée eche débeleé nĩmén mekan, mwembé ní Dyõb-pe méewóó'ε.

Ndyééd e Sáŋgú

(Mat 26.26-29; Mak 14.22-25; Luk 22.14-20)

17 Boŋ təŋgene nĩmén mekan nĩme nílanğéé nyé bəob, méehēlēē-se níkeneé nyé áyāle nzé nyēbomé ábele Dyõb, mekan mé mbé b móó nyébeleéé saké mé bwām.

18 Dyam dé'só, nwógé bán nzé nyēbomé néε mwembé, nkabén nĩbelé nĩbé áfĩntē echēn, ndúbpe-'ε nēn méé kapóg nē adé mbále.

19 Nkabén nítanğénéé abé áfĩntē echēn pēn, ábel boŋ bad ábe békoo Dyõb ahíd bényĩnned.

20 Né-óó nzé nyēbomé nēnğáne elad é bad bé Dyõb, saké Ndyééd e Sáŋgú nyédyágké.

21 Ayāle nzé nyēbomé ádyé Ndyééd e Sáŋgú, mod téé adyág eche ndyééd ésebán asine waáb, nē ábele baahóg bébág nzaa, ábíní-'ε mĩm mékób bó.

22 Nédé edé nēn bán nyéewóó'ε nĩmen mendáb nĩme nyétəŋgénéé medyé adyé nyémwāg-ke mĩm áte-ye? Ké'ε nyēnyĩne' bán mwembé ní Dyõb méesaá dyaamdya, nyékwāgtē-'ε bad ábe béewóó chóm éche bédyágké? Cheé nyéhedeé bán nílaa nyé təŋgene ádén akan? Nyéhede bán níkeneé nyé-ye? Méehēlēē-se nĩbel nē.

23 Nhóbe nēn áyāle chóm éche Sáŋgwéé án'yəgədtē me chíó me-'ε nílanğéé nyé nēn, nĩmē nkuu ðēn áde békíí Sáŋgú Yesue ntúré, antéd ewele,

²⁴ aságnén Dyōb, ákáb ch́ó áte, áhōbē aá, “Echem yāl nén, ebágnédé áyāl echēn. Nyébele nén ákamten me.”

²⁵ Ade bémáá ndyééd adyé ambēl melemlem ne mbwendé ní mím. Anhób aá, “Mmén mbwendé ní mím ndii melé mékōsōlē mé Dyōb níme nímmén mekií mésógténé. Nyébele nén pónédé téé ákamten me.”

²⁶ Nén álumte nén bán pónédé téé echē nyédýákgē échén ewele nyémwāg-ke nímmén mím, nyékale kwééd eche Sánjwéé kóōn ne á pónédé eche ápéé.

²⁷ Né-ōó, kénzéé awē adyág échén ewele, ámwāg-ke nímmén mím nyaa eche éēbāgē Sánjwéé edúbé né abelé mbéb tñgene yāl ne mekií níme Sánjwéé.

²⁸ Né-ōó, mod téé ásébe ásimen yāl bonj adyē ewele, ámwē-ε nímm níme Sánjwéé.

²⁹ Nyébel nē áyāle kénzéé awē adyág échē ewele ámwāg-ke nímmé mím, bonj eékoo ahé á nlém-tē aá yāl eche Sánjwéé ch́ó edé, ákudtéd yāl nkógsen adyé áde adyákgē échē ewele, ámwāg-ke nímmé mím.

³⁰ Nē dōó akáás bonj nyé bad híin nyéchiitéd, nyékonlé-ε, donje-ε béwédé.

³¹ Bonj nzé syánē desēbpé yāl akáad, né Dyōb déekógsénné syánē.

³² Bonj Sánjwéé akáadte, akógsan-ne syánē áyāle mewusé níme débélé ábel bonj eebáá syánē áyāl áde akáadtē nkōjsé.

³³ Né-ōó, a-baányan, nzé nyēlādné ádyé ndyééd e Sánjú, désinē nhóg ne aníníí.

³⁴ Nyé ké ahéé awē nzaa ékóbé, adyé ndyééd á ndáb, ábel bonj nzé nyēlādné weébélē akan áde débēl bonj Dyōb akáád we. Tñgene mekan mémpēe, nzé mpédé, dōó mélaā'ε nyé ngáne nyétñgné abel.

12

Nde eche éhúú ne Edáádñj éche Esáá

¹ Bōōb-pōó a-baányan, ndáó meé nyébii mbále tñgene nde eche Edáádñj éche Esáá ébageé.

² Nyébii nén bán áde nyenkembíí'ε Dyōb, béntéd nyé nlém á ábum, bepānéd nyé nzii ábele nyōb níme mééhōbē akan.

³ Né-ōó, ndáó meé nyébii nén bán modmod awē Edáádñj é Dyōb élyágtéé, éēhēlē-se ahób aá, “Ebómán ne Yesue.” Nē dō-áá modmod éēhēlē-se ahób aá, “Yesue adíí Sánjwéé,” étōmēé nē Edáádñj éche Esáá élyágté mó.

⁴ Nde edé nyaa ne nyaa, bonj melemlem mé Edáádñj móó mébage échē nde.

⁵ Nyaa eche déhele débēl nsón ní Dyōb edé nyaa ne nyaa, bonj melemlem mé Dyōb móó bébenléé.

⁶ Ngude eche débēnléé nsón edé nyaa ne nyaa, bonj melemlem mé Dyōb móó débēnladté áde debyéé ábel nsón.

⁷ Mod-téé akudé chōm éche Edáádñj élyágtéé mó abel, nē áde-ε á mbonj ní moosyáál.

⁸ Edáádñj élyágté mod nhóg áhób dyam ne debyéé, melemlem mé Edáádñj mélyágté aníníí mod áyáged bad ne debyéé.

⁹ Melemlem mé Edáádñj níme mébele bonj mod nhóg awōñ adúbe aá Dyōb débēl dyam áde áhóbé aá ábel bōōb ábel-ε dō, nímmé melemlem mé Edáádñj móó mébage aníníí mod ngine áhood bad.

¹⁰ Echē Edáádñj ébage mod nhóg ngine ábel mekan mé menyáké, ábel-le aníníí álāngē bad mekan á dñn á Dyōb. Ch́ó ébágé-ε bad bēmpēe debyéé ásdñten ké chōm éche mod áhóbéé ké-ε ábeléé éhúú ne Edáádñj é Dyōb ké-ε éehúú'ε. Melemlem mé Edáádñj mébage mod nhóg debyéé áhób mehób mémpēe, ábē-ε aníníí debyéé átóge mehōb níme ábē bad béhóbéé.

11 Melemlem mé Edáádəŋ mɔ́ɔ mébele nímén mekan mésyā́ál, abage mod téé eché nde ngáne ádáá.

*Elad é bad bé Dyöb édti nêe
yál póg eche ewóó pág hiin*

12 Yál edii póg boŋ ewóó pág hiin. Kénéé edíí-’áá bán yál edé pág ne pág, edii yál póg. Melemlem nê dóó edii ne Krístəə.

13 Melemlem nê dóó syānē moosyā́ál, bad bé Israel ne bad ábe béesé bad bé Israel, betāŋ ne kunze, Edáádəŋ ehóg ébéle dekudé edusen boŋ debé pág éche ébéle ene yál póg. Dyöb áhédé-’e syānē melemlem mé Edáádəŋ á nlem-té.

14 Saké pág póg chó ebelé yál e moonyon, boŋ pág hiin.

15 Nzé ekuu éhele-se éhób áá, “Ayāle nén meesaá ekáá, meesaá á yál e moonyon,” nén déélúmteé bán éesaá á yál e moonyon.

16 Nzé etúu-’e éhele-se éhób áá “Ayāle meesaá díđ, meesaá á yál e moonyon,” nén déehelée-se álúméd bán éesaá áyāl e ene yál.

17 Nzé yál esyā́ál embé díđ dēmpen, né chán ámwagké dyaŋ awóg? Nzé yál esyā́ál embé etúu chēmpen, né chán ámwagké chōm elod awóg?

18 Boŋ edé nén bán Dyöb ábánné pág téé á yál e moonyon ngáne ádáá.

19 Nzé pág póg chó yál e moonyon émbēē, ne béechagké chó bán yál.

20 Edé nén bán pág edé hiin boŋ yál póg chóó ewóó chó.

21 Né-óó, díđ déehelée-se áláá ekáá áá, “Meetógneé wē.” Nló-’e méehelée-se níláá mekuu áá, “Meetógneé wē.”

22 Etímé anyínned pen nén bán pág é yál éche dényínéé bán éesaá dyaŋdyaŋ chóó étómténé etógnén abé.

23 Pág é yál-le éche dényínéé bán éewóó’é edúbé chóó débageé edúbé bwámbwam. Eche dényínéé-’e bán éeboó’é álúmten, chóó dékoo’é anən.

24 Pág éché ébóó álúmten chó-’e étógnenéé échén pág. Dyöb ábéle yál e moonyon nyaa eché pág éche ényínnad byánán éesaá etógnén, chóó débageé edúbé bwámbwam.

25 Abelé nê ábel boŋ nkabén méēbāg á yál e moonyon, boŋ pen pág téé éwōŋgan waáb.

26 Nzé pág e yál póg etage, échíníí ésyā́ál chómpē ébéle étage’. Nzé pág póg ekudé mekenag, échíníí ámpē ébéle éwógén mó menyinje.

27 Né-óó, nyé moosyā́ál nyédíí yál eché Krístəə, nyé mod téé-’e nyédíí pág eché ene yál.

28 Dyöb ábágé bad nsón á mwembé-te nyaa ne nyaa. Asébpé abelé baahóg bembapēé bé nlomag, ámbíd enē, ápwēdé bekal bé’dáádəŋ boŋ ápwēde-’e bemeléede. Ampwēd-te bad ábe ámbēé ngine ábel menyáké, ápwēd bad ábe ábágé ngine áhood bad, ápwēd bad ábe bēwōŋgan bad, ápwēd bad ábe ábágé debyéé ályáged bad, ápwēd-te bad ábe ábágé debyéé áhób mehób mé bad bēmpēe.

29 Saké bad bésyā́ál bédé bembapēé bé nlomag, saké bad bésyā́ál bédé bekal bé’dáádəŋ, saké bad bésyā́ál bédé bemeléede, saké bad bésyā́ál bédé bebel bé menyáké.

30 Saké bad bésyā́ál Dyöb ábágé ngine áhood bad, saké bad bésyā́ál Dyöb ábágé debyéé áhób mehób mémpēe. Saké bad bésyā́ál Dyöb ábágé debyéé átagé mehób mémpēe.

31 Nyébane nlem áyāl e nde éche étómténé etógnén abé.

Kénē-’e meédíí nlúméd nyé nzii empée eché étómténé aboŋ tómaa échíníí.

13

Edé etógnén ádəŋ bad

1 Nzé nhóbe mehób mé baányon ne mé ángel bon meédəə baányon, ehób échēm édii néε nkāj níme mbéle ntəgag ké'ε ngāj eché békuméé.

2 Nzé mbyéé' nkalaj ní Dyöb akal, nzé nsōntan mekan mé e'konéd mésyāāl, nwóó debyéé ásyāāl, nwóó-ε adúbe áde níhele-se nhób méε mbəəd éhəjlen e'dii, bon meédəə bad, né meesaá dyamdyam.

3 Nzé mbage bad chōm ésyāāl éche níwóó, nkwěnténé'-ε ábe echem yāl méε béhyád, áde meédəə'ε baányon, bwám é'héé nē ábélé mε?

4 Mod awé adəə bad, abelé áwesán, álúmté'-ε e'bon bé nlém. Eesífidéé bad, eesaá kúmbe.

5 Mod awé adəə bad, eebágké ewange, eéhēdtēē eche yāl chēmpen bwám, eewámsánné alin, eékonǵéé'-ε mekan mé mbéb á nlém-té.

6 Mod awé adəə bad, eewógnéé mekan mé mbéb menyinǵe, mekan níme métəǵnéé mó awógnéé menyinǵe.

7 Mod awé adəə bad, akobe mekan mésyāāl, adúbpe mekan mésyāāl, awóó' e'lyág bé nlém pónde ésyāāl, ákaá'-ε nlém pónde ésyāāl.

8 Edəǵe éewóó'ε asóg. Ahób dé mehób á dīn á Dyöb dépē á asóg, ahób dé mehób mémpēe, ámaa, debyéé'-ε áde mod awóó'ε, ápē á asóg.

9 E'bíi bé akan ábesyáné béélónéé mbon, akal áde sékaléé nkalaj ní Dyöb, séelónéé mbon.

10 Bon áde mekan níme mélóné mbon mépéé, mekan níme méelone mbon mépē á asóg.

11 Ade níbéde mwéndem nhóbé'áá néε mwéndem, nímmē mewémten mémbēē mewémten mé mwéndem, ndolé'-ε akan áte néε mwéndem. Bon bəəb áde nídíi mod ambáá, ntēdté abé á mwéndem.

12 Denyíne chōm bəəb nēǵáne á ebudbud-té á dyené-te. Bon ámbíd e pónde, syáné déēnyín Dyöb, syáné ne mó dénné'-ε e'só ne e'só. Meébudéé Dyöb asōnten bəəb bwám, bon pónde eche ehúe' mēsōntēn mó melemlen ngáne mómpē asōntēnnē mε bwám.

13 Né-ə, metəte méláán médé; áwónj adúbe, áwónj e'lyág bé nlém ne áwónj edəǵe. Bon atəte áde átómténé etógnén abé áttinté e nímmēn méláán, ádíi áwónj edəǵe.

14

Nde émpēe éche éhúú ne Edəədəǵ

1 Nyéwan áte ádəǵ bad, nyéwōǵ'-ε nlém áte ákud mende níme Edəədəǵ ébageé nyé, bwámbwam áláa bad mekan á dīn á Dyöb.

2 Mod awé ahóbe mehób mémpēe eehábéé wée bad bon wée Dyöb dáo áhóbeé. A mbále, modmod eesōntánné dyam áde áhóbeé. Kénéε ngíne e Edəədəǵ élyáǵtéé mó áhób mekan, bad ábe álanǵéé nímmē mekan, ne bó, nímmē mekan médíi mekan níme mod éesōntánné.

3 Mod awé ahóbe mekan á dīn á Dyöb, ahóbe mó áwónǵen bad áwúu áte, áwéd bad nlém á abum ne áhóded bad nlém á abum.

4 Bad ábe behóbe mehób mémpēe béwōǵan échab yāl bon bad ábe behóbe mekan á dīn á Dyöb behóbe mó áwónǵen mwembé rísyāāl.

5 Ndəə méé nyé moosyāāl nyéhóbe mehób mémpēe, bon métómtēn adəǵ méé nyéhóbe mekan á dīn á Dyöb. Mod awé ahóbe mekan á dīn á Dyöb, atómé mod awé ahóbe mehób mémpēe, éetóméé né atóǵke' chōm éche áhóbeé ábel bon áwónǵen mwembé.

6 Né-ə, a-baányan, nzé mpedé áwēn bon nhóbe mehób mémpēe, né chán méwōǵēnnē nyé? Meéhēlē-se nwōǵén nyé ké mwátííd, nzé meépēene

dyam áde Dyöb álúmté me, ké'ε dyam áde mbíí, ké'ε áhób mekan á dñn á Dyöb, ké'ε dyam áde méyāgēdtē nyé.

⁷ Dētēd elonj ne ndinjé, bwēm ábe béesē á alongé ábe bébenladté ákum mesíke. Chán mod ahele se abíí nkánjé níme békónēé nzé béekumé mós bwám.

⁸ Nzé mod ahele elonj atónj éche élad bad áke á bel, bonj eetóo chós bwám, né chán áhele ábel bonj bébōnsēn aké á bel?

⁹ Né dós édíí ne nyé ámpē. Nzé nyéhede mehób mémpēe ahób bonj nyéhóbe mekan níme méēwōo nsōntēn, nzé mod eebíí dyam áde nyéhóbeé, né nyéhóbe nēngáne epub éche étóme'.

¹⁰ Mehób médé á nkōñsé-te nyaa ne nyaa, ké ehóg-ke éesaá éche éewóo nsōntēn.

¹¹ Bonj nzé meebíí ehób éche mod áhóbeé, mod awē ahóbe chós ábē nken áwēm, me-ε mbé nken áwē.

¹² Ngáne nyéhedeé bán nyébele mekan níme Edáádānj é Dyöb élyágtēé nyé abel, nyéwane áte nyébele' níme mébele bonj mwembé nkwojé bwám.

¹³ Né-ós, mod awē ahóbe mehób mémpēe atánjéne akáne ábel bonj Dyöb ábel mós átóge chóm éche áhóbeé.

¹⁴ Ayāle nzé nkānne' ne ehób émpēe, échēm edáádānj chós ékānne, bonj mmēn meebyéé' é chóm éche ríhóbeé.

¹⁵ Cheé-ō nítánjéne abel? Ntánjéne akáne ne échēm edáádānj, nkáne-ε ne nímēm nlém. Mēkōnē nkōnjé ne échēm edáádānj, nkōnē-ε ne nímēm nlém.

¹⁶ Nzé ebenlad échōnj edáádānj ábe Dyöb mekenag, chán mod a ngēn awē adé ásē, áhōbpē aá, "ébé nē" áde éēsōntēnéé dyam áde éhóbeé.

¹⁷ Ehele-se ékené Dyöb bwám bonj dyam áde éhóbeé déēwōngān mod awē alýgé ásē ne awōngēn dēn.

¹⁸ Nságnan Dyöb nēn mēé nhóbe mehób mémpēe tómaa nyé bad bésyāāl,

¹⁹ bonj kēnē, nzé dedé á mwembé-te, mēdānj mēé ríhób metote métāan níme mēwōnj nsōntēn, ábel bonj bad béyáge, tómaa áhób metote ekólé dyóm níme méēwōo nsōntēn.

²⁰ A-baányānj, nyéewós' mewēmten mé bēndem. Nyébē pen néé bēndem ábe béebíí chóm éche mbéb rídíí. Bonj á mewēmten nyébē néé bad ábe békwojé.

²¹ Eténlédé á kálag e Dyöb nēn bán me Sāngwéé nhóbe nēn mēé,

"Mēbelén bad ábe béhóbe mehób mémpēe ahób wēé ábēm bad.

Mēbelén e'béb é' beken bé bad, bonj ké ábēm bad béewógénné me."

²² Né-ós, ahób dé mehób mémpēe adíí e'chemléd ne bad ábe béedúbpe, saké ne bad ábe bédúbpe. Ahób-pe mekan á dñn á Dyöb adíí e'chemléd ne bad ábe bédúbpe, saké ne bad ábe béedúbpe.

²³ Nzé bad bésyāāl béhóbe mehób mémpēe áde bédíí á mwembé-te, bonj donje á bad ábe béesōntēne mekan mé Dyöb ké'ε bad ábe béedúbpe Krístāá bésólé, béehóbpé bán nyépag mñ-ε?

²⁴ Bonj nzé bad bésyāāl béhóbe mekan á dñn á Dyöb, bonj donje á bad ábe béesōntēne chóm éche béhóbeé ké'ε bad ábe béedúbpe Krístāá bésólé, awóg áde béwōgkē nkalanj rí Dyöb, débél bebíí bán bébele mbéb, békwdé nkáá á'sós é Dyöb.

²⁵ Mmē nkalanj méhūd bós mekan níme bēnkoo'é á nlém-té. Békwē-ε ásē, bébagé Dyöb edúbé béhóbe nēn bán, "Ne mbále, Dyöb adé áfínté echēn."

Paale ad mpuutéđ mébag á mwembé-te

²⁶ A-baányānj, chóm éche nkoo'é ahób édíí nēn, nzé nyéládné á mwembé-te, mod nhóg abelé awónj nkánjé, ampēe-ε awónj chóm éche áyágtēé, ampēe awónj dyam áde Dyöb álúmté mós, ampēe awónj dyam áde áhōbpē á ahób

émpēe, ampēe-’ε abé awē atógke mehób mémpēe. Nyébele nímén mésyāāl áwōnggen mwembé.

²⁷ Nzé bad béhóbe mehób mémpēe, bad bééhóbe tómaa beláán, bó mod téé áhóbe ámbíd eche waáb amáá ahób. Mod-te atáňgéné abé awē atógke chóm eche béhóbe.

²⁸ Bon nzé mod eése awē atógke’, mod awē ahóbe mehób mémpēe, atáňgéné nēε ádíbe nsəl, áhóbe áwe nlém-té ne wée Dyób.

²⁹ Ade bad bébe ké’ε beláán beláňgēé bad mekan á đın á Dyób, ábíní bad betáňgéné béwōglán ábíi ké chóm eche béhóbeé étáňgéné.

³⁰ Bon nzé mod adé á mwembé-te awē akudé nkalan níme Dyób álúmté mó, mod awē ahóbe akan ásóg ahób.

³¹ Nyé moosyáál nyélanđe bad mekan á đın á Dyób nhógē-nhógē ábel bon mod téé áyágke, nē áwéde-’ε mod téé nlém á abum.

³² Nde eché Edáádəň ébageé bad áláa bad mekan á đın á Dyób, edii nde eche mod awē ahóbe nímé mekan áhelese ákamlən.

³³ Dyób déesaá Dyób áde ápeene mpuutéđ, nsanj móo ápeeneé.

A mwembé ní bad bé Dyób rísyāāl,

³⁴ bebaád bédib nsəl nzé bédé á mwembé-te, betáňgéné abé ásε e baachóm ngáne mbéndé e Mose éhóbeé.

³⁵ Nzé dyam áde áde bédás abii, bésēđđ abab bechóm á ndáb. Ayāle édé akwágké mmwaád áhób dyam á mwembé-te.

³⁶ Nyé bad bé Kōrinto, awēn dáo eyale é Dyób émbídtē-ye? Awēn dėmpen-εé eyale é Dyób émpε-ye?

³⁷ Nzé mod anyíne yāl aá módē mod awē alánđe bad mekan á đın á Dyób, ké’ε aá mówōđ nde eché ehúú ne Edáádəň, atáňgéné abii aá dyam áde rítenléé nyé ádíi dyam áde Sánđwéé áhóbe aá nyébel.

³⁸ Bon nzé ahóbe aá móohídté nímén mekan nyéhúd mó míd áyāl.

³⁹ Né-óó, a-baányan, nyébane nlém áláa bad mekan á đın á Dyób, bon nyéekás bad áhób mehób mémpēe.

⁴⁰ Nyébele mekan mésyāāl bwám, nyébele-’ε mó nyaa eché etáňgéné.

15

Mpuu níme Yesu Krístə

¹ Bəob-póó, a-baányan, nkamtan nyé nkalan ní bwám níme mēnkaleé nyé. Nyēnkob mó, mbéle-’ε nyésūmnédé áyāl e adúbe áde nyéwóó.

² Nzé nyédii nyéchəňnéde áyāl e nímé nkalan níme edii bán móo nipeene e’soóson, né nyéekúd e’soóson, éetóméé né adúbe áde nyédúbpé Krístə, dō-ε áde ngēn.

³ Menkalé nyé nkalan níme mēnkudté, mó-’aá rítómténé etógnén abé. Mmē nkalan, rídé nēn bán Krístə anwé á nló mímēđ ngáne éténléde á kálag e Dyób.

⁴ Eténléde nēn bán bēnlímē mó, ápū ámbíd e e’pun é’láán.

⁵ Anlúmed Petro yāl, bon ámbíd e pónđe anlúmed-te ábíní bembapee yāl.

⁶ Ámbíd ené, tómaa mbwókel é bad étáan ábe béhídé’áá mó anlúmed bó yāl álúmed ahóg. Abé bad híin bédii bédé á alonđe chii, donđe-’ε bémáá awé.

⁷ Ámbíd e pónđe anlúmed Jemse yāl, bon álúmed-te ábíní bembapee bé nlomag bésyāāl yāl.

⁸ Kásəne á asóg anlúmed mémpē yāl, kénéε edii bán ndii mod awē bēnchyāá’ε á pónđe eché bad bēnkémbíí’ε bán béchyáa.

⁹ Nǎsbe nén áyǎle átínté e bembapεε bé nlomag bésyāāl, mée ndé mbapεε awé éesé etógnén. Meékwognedεé áchagned ké née mbapεε a nlomag áyǎle mwenhé bad bé mwembé ní Dyǒb á meséb.

¹⁰ Boη nsimé ní Dyǒb mbélé ndé chǒm éche rídí. Mmē nsimé níme Dyǒb ábagé-ε me, méesaá ngén. Boη pen mbelé nsón tómaa ábíní bembapεε bé nlomag, kénéε édíí bán saké mmēn mbelé'áá nímé nsón, nsimé ní Dyǒb mó mbédé ne me.

¹¹ Né-óó, ké émbē bán mée nkanlé nyé nímén nkalaj, ké'ε bembapεε bé nlomag ábíní bóó békálé mó, chǒm ehóg chǒó syáábóó moosyāāl sékalée, mó'áá nyédúbpé.

*Paale áá ngáne Dyǒb dēmpuúdté Krístaa,
bad bé Krísto bǒmpē bēpuu*

¹² Bóób áde sékale-áa nén bán Krístaa apuúdé, chán-nǒ nyé donge á bad nyéhele nyéhǒbē bán bad ábe béwédé béepuú'é?

¹³ Nzé ahób áde nyéhǒbεé nén bán mpuu méesaá ámbíd e kwééd áde mbále, né élúmte bán Krístaa enkēmpuu'é.

¹⁴ Nzé Krístaa enkēmpuu'-ε, né nkalaj níme sékanléé nyé méesaá dyamdyam, né áden adúbe ámpé déesaá dyamdyam.

¹⁵ Né nē álúmte nén bán sékale Dyǒb metóm áyāl ahób áde séhǒbεé bán apuúdté Krístaa. Boη nzé édé mbále nén bán bad béepuudéé nzé béwédé, né Dyǒb dēnkēmpuúdté Krístaa.

¹⁶ Nzé bad ábe béwédé béepuudé, né kǒáηne Krístaa eépuudéé.

¹⁷ Nzé Dyǒb dēnkēmpuúdté Krístaa, né adúbe áden déesaá dyamdyam, né nyédíí nyédé-ε á mbéb te.

¹⁸ Né élúméd-te bán bad ábe bédúbpé Krístaa ábe béwédé, bēbóó-ε.

¹⁹ Nzé e'lyág bé nlém ábe séwóó áyāl wée Krístaa é'sógé áyāl e ádén alongé dēmpen, né bad bétáηgéné se ngól atómten dé awóg tómaa nyaa eché béhele bēwóg bad bēmpēe.

²⁰ Boη édé mbále nén bán Dyǒb ápuúdté Krístaa. Mó abédé mod a'só ápuu átínté e bad ábe béwédé.

²¹ Dyam áde mod nhóg ábélé dǒó ákás boη bad bēwāg. Melemlem nē dǒó dyam áde mod nhóg ábélé ákás boη bad bépuudé'.

²² Bad bésyāāl bēwē abé áde bédíí mod nhóg ne Adame, melemlem nē dǒó Dyǒb débenlé bad bésyāāl bēpuu abé áde bédíí mod nhóg ne Krístaa.

²³ Mod téé ápuú eche pǒndé eché átáηgéné apuu. Krístaa, mó awé adé mod a'só ápuu, áde ápεé ámpē, bad ábe bédé ábe Krísto bǒmpē bēpuu.

²⁴ Ámbíd ené, asóg dépé. Ene pǒndé e'dǎsdáη ábe é'kamlan, benkamlene ne ngíne é nkǒηsé, Krístaa ámad echab ngíne. Dǒ'-áá ábεé nkamlen wée Dyǒb Títé.

²⁵ Krístaa ábē á nkamlen kǒáη Dyǒb ábēl atóm ábē bad bé ekǒyí áte, ábānē-ε bó ásē eché.

²⁶ Mod a ekǒyí awé ádimténné atóm áte adíí kwééd.

²⁷ Édé nēngáne éténlédé á kálag e Dyǒb nén bán, "Dyǒb ábánné mekan mésyāāl ásē eché." Elúmte bwám pen nén bán mekan mésyāāl níme Dyǒb áhóbé áá móbánné ásē e Krístaa, Dyǒb dēn déesaá áwēd-te.

²⁸ Ade bwēm ésyāāl bémadté abé ásē e nkamlen níme Krístaa, mwēn-ne Mwán a Dyǒb, ábē ásē e Dyǒb. Dyǒb dǒ'-áá ábánné bwēm é'syāāl ásē eché, ábel boη mwēn Dyǒb-pe ákamlan bwēm é'syāāl ngen póg ne ngen ésyāāl.

²⁹ Bóób-pǒó, chán-nǒ déhǒbpé áyāl e bad ábe békúdé edusen a nló mí bad ábe bémáá awé? Nzé bad ábe béwédé béetágné apuu, cheé ékás boη bédusan bad á nló mí bad ábe bémáá awé?

30 Cheé-ᵛ ékásá bonj sébāg á nsəl rí kwééd pónde téé?

31 A-baányan, mbág á nsəl rí kwééd epun téé. Kúmbe eche mbééné nyé abé áde dédíí mod nhóg ne Yesu Krístəə, Sānjgwéé awêd, ch́ó ekásá bonj ríhábē nén.

32 Nzé nnané ch́ó á nyaa e moonyon, nsyáŋ ké nhóg méesaá né nzum éche syáabe e'loo nyam séwánaá á Efesus. Bonj nzé édé nén bán bad ábe b́éwédé béepuú'é, né dééhōb bán, "Dédyág, démwág-ke, áyāle ch́an mod áwē."

33 Nyéédōgnād, "E'choŋ bé mbéb é'bébte abé á bwám."

34 Nyéewóó mewēmtən ampē néé e'yókél é' bad, nyésóg-ke mbéb abel. Nyé donge á bad nyéebii'é Dyōb. Ngáne ríhóbeé nén, nén átāŋgené nyé akwágke akóbed.

Ngáne bad ábe b́éwédé bépuú'é

35 Bonj mod ásedéd aaken, "Ch́an Dyōb áhele ápuūd bad ábe b́emáá awé? Yál éhéé béwōngē?"

36 Eyókél é ch́óm, nzé ewené mbál-e-bū éebēlē-se ewé bonj ekág-ε?

37 Ch́óm éche behágke á ndoob édii mbál ngên, saké alín á bwel ásyāāl áde ákwoge' b́éwéneé, bonj mbum, kapóg mbum e ngun ké'ε mbum empée.

38 Dyōb dēn d́ó abele' ngáne ádásá bonj mbál téé ŕwōŋ yál eche ŕwóó. Abage mbál téé yál eche etāŋgené.

39 Yál é bwēm é'syāāl ábe é'dé á alongé éesaá nyaa póg. Baányonj b́ewóó echab ndín e yál, nyam éwóó echáb, menən méwóó echáb, sūu-ε éwóó echáb.

40 Bwēm é'dé ábe é'dé á nkoŋ nímín, é'bé-ε ábe é'dé á nkoŋ ŕsé. Bwēm bé nkoŋ mí mín é'wóó ábāb e'bonj ábe bwēm bé nkoŋ ŕsé béewóó'é. Bwēm bé nkoŋ nsé-ε é'wóó ábāb e'bonj ábe bwēm bé nkoŋ mí mín béewóó'é.

41 Etondεε awóó ábē e'bonj, ngən ewóó ábē, betintine-ε b́ewóó echáb nyaa e e'bonj. Kásŋne átínté e betintine, e'bonj ábe b́ewóó é'dé nyaa ne nyaa.

42 Nén d́ó ébēē ne bad ábe bépuú. Yál eché bélímmeé edii yál eche ebébe', eché Dyōb ápuudté edii yál eché eebébé' ampē.

43 Yál eche bélímmeé eebágke elóon, eewúē-áá áte. Nzé Dyōb ápuúdté ch́ó eboó' elóon bwámbwam, ewúe-ε áte.

44 Ade bélímmeé ch́ó ebágke yál e ekob, bonj nzé Dyōb ápuúdté ch́ó ebágke yál e edaádəŋ. Yál e ekob edé, yál e edaádəŋ-ε ampē edé.

45 Eténlédé á kálag e Dyōb nén bán "Mod a e'só, Adame, Dyōb dēnhəg ḿó abé nhəgtéd níme ŕwóó alongé." Bonj Adame a ndimtən adii Edaádəŋ éche ébage alongé.

46 Saké mod a edaádəŋ ḿó asébpé abé. Mod a ekob ḿó asébpé abé bonj mod a edaádəŋ ḿó-ε ábág.

47 Mod a'só ambíd á nkōŋsé, b́ēnhəgén ḿó ndoob. Awe ḿó-ε ampē ampē, ádyōb d́ó ábidé.

48 Bad ábe b́édé á nkōŋsé te, b́édé nēngáne Adame awē b́ēnhəgēnné ndoob. Abe b́ó-ε b́édé bé dyōb, b́édé nēngáne ane awē ábidé ádyōb.

49 Ngáne déwágné mod awē behágné ndoob, melemlen nē d́ó déwāgēnné ane awē ábidé ádyōb.

50 A-baányan, ch́óm éche ríhóbeé édii nén, ch́óm éche édé á nhəgtéd ŕí yál e ekob ne mekií éehelée-se ékūd bwēm bé nkamlən ŕí Dyōb. Eche ch́ó-ε éebé abé ne abé éehelée-se ékūd bwēm ábe b́ébé abé ne abé.

51 Nyélám metúu nyéwōg dyam áde ŕlāŋgeé nyé áde bad béebii'é. Syánē bad b́esyāāl déewaá', bonj pən Dyōb déhəŋlən syánē baasyāāl

52 Á esōŋ é pónde. Mmē nhəŋlén mébé á mehélé-te, nēngáne mod áhelese ápēbéd díd. Nén débenléd áde b́étōŋgē elon é asóg. Ade b́étōŋgē elon, bad ábe b́éwédé bépuú, béewaá ampē, Dyōb déhəŋlən-ne syánē baasyāāl.

⁵³ Ene yál eche ebɔɔde' ɛ̄tīm yál eche ɛ́ebɔ́ ɔ́mpɛ́, yál eche chɔ́-'ɛ́ ewág ɛ̄tīm yál eche eewág ɔ́mpɛ́.

⁵⁴ Póndé eche yál echɛ́ ebɔɔde' ɛ́tímmé yál echɛ́ ɛ́ebɔ́dɛ́', ne áde yál eche ewág ɛ́tímmé yál echɛ́ eewág, ɛ́lɔ́n ngáne ɛ́ténlédé á kálag e Dyɔ́b nɛ́n bán, "Kwééd ɛ́esáá ɔ́mpɛ́ ne abé dɛ́n, Dyɔ́b átomé chɔ́ áte."

⁵⁵ "A-kwééd, héé echon ngíne átom mod áte ɛ́díí? A-kwééd, héé echon ngíne áwóged mod e'wɛ́ ɛ́díí?"

⁵⁶ Mbé́b mɔ́ɔ́ ríkás bon kwééd ewón ngíne áwóged mod e'wɛ́, ngíne e mbé́b-pe ehúú ne mbéndé.

⁵⁷ Bon séságnan Dyɔ́b, mɔ́ abelé bon sétóm mbé́b áte mbwiined ne echɛ́d Sán, Yesu Krístə́.

⁵⁸ Né-ɔ́, a-baányan bé edənge, nyésuɔ́mɛ́n bwám, dyaɔ́mɔ́m dééhɔ́btɛ́ nyé mekuu ásé. Nyé́bɛ́ nyé́kɛ́ɛ́ne nsón níme nyé́benléé Sánḡwéé á'sɔ́. Nyé́bíí nɛ́n bán nsón níme nyé́benléé Sánḡwéé ké nhóg méesaá ngɛ́n.

16

Bésánḡé mɔ́né áwónḡen bad

¹ Bɔ́ɔb-ɔ́ɔ́, ríláa nyé tənḡene mɔ́né níme nyénladtɛ́ áwónḡen bad bé Dyɔ́b. Ngáne ménlā́'ɛ́ mwembé níme rídé á Galesia mɛ́é bébel, melemlem né dɔ́o nyémpɛ́ nyétənḡéné abel.

² Sɔ́ndé téé nyé mod téé áhúɔ́ mwá mɔ́né ákoo. Nén ábɛ́ nchoo ne mod téé níme nkudág. Nzé nyébelé nɛ́n, né dɛ́bɛ́l nzé mpedé, nyéetə́ḡénné mɔ́né asaa ɔ́mpɛ́.

³ Nzé mpedé, bad ábe nyépwédé, mɛ́lɔ́mɛ́n bó kálag ákɛ́ɛ́n nímmé mɔ́né níme nyéládé á Jerusalem.

⁴ Nzé ɛ́bɔ́ɔ́ bán mémpɛ́ ríke, né béwoón mɛ́.

Ntíi níme Paalɛ́ ɔ́bélé

⁵ Mɛ́pɛ́ áwɛ́n nzé mmaa átom á mbwóg e Masɛ́donia, áyāle nwoó mewɛ́mten átom á mbwóg e Masɛ́donia.

⁶ Kapóg mɛ́dyéé ne nyé, nhele mbé-'ɛ́ ne nyé póndé esyáál echɛ́ ahé́b ábáḡké ngíne, ábel bon nyéwónḡen mɛ́ ákɛ́ɛ́n ɛ́chɛ́m eke á'sɔ́ hóm ké áhéé áde ríkagké.

⁷ Meédə́'ɛ́ mɛ́é dényínɛ́n ámín-ámín. Nwoó mewɛ́mten ábɛ́ ne nyé mwá etún ɛ́ póndé nzé Sánḡwéé akwɛ́nténé.

⁸ Mɛ́dyéé á Efesus hén kááḡ ne á póndé e ngande e Pentekɔ́s.

⁹ Nzii ɛ́nɛ́ndéde mɛ́ hén ábel kase e nsón, kénéé ɛ́díí bán bad híin bédé ábe betənḡan mɛ́.

¹⁰ Nzé Timotíe apedé áwɛ́n, nyényín bán nyé́kobé mɔ́ nken áyāle melemlem mé nsón níme Sánḡwéé níme ábeleé, mɔ́ mémpɛ́ níbeleé.

¹¹ Modmod eenyíne mɔ́ nkónḡtéd. Nyéwónḡen mɔ́ ákɛ́ɛ́n ɛ́chɛ́ eke á'sɔ́ ne nsan ábel bon bóɔ́be bad bé Krísto bémpɛ́e ábe rínineé, betán mɛ́ hén.

¹² Bɔ́ɔb-ɔ́ɔ́, tənḡene awesyánɛ́ mwányan Apolose, menwéd mɔ́ nlém á abum bwám bwám áhye dé anon nyé nchoo ne bad bé Krísto bémpɛ́e, bon pen eewó'ɛ́ nlém ápe bɔ́ɔ́b. Nzé etál ɛ́báḡnéde mɔ́, ápɛ́.

Melɛ́nten mé asóg

¹³ Nyétéd póndé, nyésuɔ́mɛ́n á adúbe-tɛ́. Nyéwúu nlém á abum, nyéwúu áte.

¹⁴ Kéchéé ɛ́che nyébeleé, nyélúmed bán nyé́dɔ́ɔ́ nhóg ne aníníí.

¹⁵ Bɔ́ɔb-ɔ́ɔ́ a-baányan, nyé́bíí nɛ́n bán abum á ndáb áde Stefanuse dɔ́o ábédé dé'sɔ́ á mbwóg e Akaya ádúbe Krístə́, bébáḡé-'ɛ́ echab yál ábele bad bé Dyɔ́b. Ncháa nyé nɛ́n mɛ́é,

¹⁶ nyébê ásē e ndín é bad née échén, ne ásē e mod ké ahéé ampée awě abele nsón née nímén.

¹⁷ Ndé menyinje ne epe éche Stefanase, Fōtunatusē ne Akaikusē. Bépédé áyāle bébélé nsón níme nyéntāngēnnē abel.

¹⁸ Bévédé me nlém á abum ngáne bēnwēdtē nyémpē nlém á abum. Kéchéé éche échén ndín é bad éhóbēé, nyētāngéné bó edúbé abe.

¹⁹ Mwembé níme rídé á mbwóg e Esia rílómmé nyé melentēn. Akwilaa bó Prisilia ne mwembé níme níbome áwab ndáb, bélómme nyé melentēn ne nlém nhóg á dín áde Sāngwéé.

²⁰ Abed baányan bé Křisto ábe bédé hén bélómmé nyé melentēn.

Nyéhê nhóg ne aníní tál.

²¹ Me Paale, mbenlad échém ekáá átele nyé nímén melentēn.

²² Kénzée awě eédəə Sāngwéé ebómán ne mó. A-Sāngú awéd, hyăg!

²³ Nsimé níme Sāngú Yesuē nábē ne nyé.

²⁴ Ndəə nyé bad bésyāəl á dín áde Yesu Křistəə.

Kálag eché elónténé ébε eché Paalε áténlé

Baá Kōrinto

Ndibned ní kálag

Enén kálag chó edé kálag eché elónténé ébε, eché Paalε áténlé bad bé dyad á Kōrinto áde ábédé á Masēdonia. Paalε antél chó á pónde eché mam méekage'áá bóobe mwembé míme níbéde á Kōrinto. Bad behóg átínté e nímbé mwembé bēnhōb Paalε mekan mé mbéb á yāl, bon kéné Paalε anwón nlem bwāmbwam áá bóobōo bétim ásē. Ade bēntimmé-'ε ásē, Paalε anwóg menyinje bwāmbwam. A kálag-té wén, Paalε ahóbé ngáne bóobe bad bé mwembé bé Kōrinto bémbēē. Awēd-te ahóbé nzom eché ekáá bon átélé' enén kálag ne e'yale ábe é'wúú áte tñgene nzyón éche ákúde ne atyéemen áde baahóg átínté e mwembé bétyéémánáá mó. Alúmté-'ε nímbé menyinje ngáne nyaa eché átélé enén kálag, ébélé bad bétédte abel dé mbéb bon bóobōo bétim-mε ásē. Acháa-'ε mwembé áá bésaa mōné ne nlem nhóg áwónge betóótókē bé bad bé Krísto ábe bēbéde á mbwóg e Judeya. A kálag-té wē ámpē, Paalε ahóbé mekan álúmed áá móbēde mbapε a nlómag a mbále awé Yesu Krístaa. Ambel nén áyale nguse é bad ébéde á Kōrinto éché énhæg yāl bán bembapεε bé nlómag bé mbále ábe Krístaa, bán Paalε-'ε adé mbapεε a nlómag a metóm.

Nkabted ní kálag

Ndibned ní kálag 1.1-11

Paalε ne mwembé ní dyad á Kōrinto 1.12-7.16

Asarjed bad bé Krísto á mbwóg e Judeya mōné 8.1-9.15

Paalε mbapεε a nlómag a mbále awé Krístaa 10.1-13.10

Melenten mé asóg 13.11-13

¹ Mε Paalε, mbapεε a nlómag awé Yesu Krístaa ngáne Dyōb átíde, mε-εé ntelé enén kálag. Mε ne awēd mwānyan Krísto, Timotiε, sélómme' nyé elad e bad bé Dyōb ábe bēde á dyad á Kōrinto ne bad bé Dyōb bésyāal ábe bēde á mbwóg e Akaya, melenten.

² Nsimé ne nsan ní Dyōb Titée awēd ne Sāngú Yesu Krístaa, nímbé ne nyé.

Dyōb áwéde' moosyāal nlem á abum

³ Syāné déken Dyōb, Sáá awé awēd Sāngwéé, Yesu Krístaa. Mó adé Titée awé awóge moosyāal ngol, abé-'ε Dyōb áde áwéde' moosyāal nlem á abum.

⁴ Awéde' syāné nlem á abum áyale ndutul ésyāal eche dékudεé, ábel bon syāné ámpē déhel bad nlem awéd á abum ábe bōmpē békude nyaa e ndutul ké ehé. Déwéd bó nlem á abum melemlen ngáne Dyōb áwédeé syāné nlem á abum.

⁵ Ngáne Krístaa ákúde'áá metake, née syāné ámpē dékudεé metake áyāl eché. Né-óó, abé áde dedíi ne Yesu Krístaa, Dyōb déwéd syāné ámpē nlem á abum bwāmbwam.

⁶ Nzé sékude metake édii áwéd nyé nlem á abum ne áwónge nyé ákud e'sooson. Nzé sékudé e'wéd bé nlem á abum né nyémpē nyékūd e'wéd bé nlem á abum, nyékūd-te ngine áwεsen melemlen mé metake ne e'kan bé nlem ngáne sémpē séwéséné.

⁷ Sésumé nlem áwēn bwāmbwam. Sēbíi nén bán nzé nyékudé' metake melemlen ngáne sémpē sékudεé, Dyōb déwéd nyé nlem á abum melemlen ngáne áwéde-'ε sé.

⁸ A-baányan, sēdāó bān nyēsōntēn nyaa e metake echē sékúdē á mbwóg e Asia. Metake nīme sēnkudtē mēndenléd sé nyaa echē sēnwēmtennē bān séebāá á alongē.

⁹ Sēnwēmten nēn bān bēbīdtē mbakú bān bēwúu sé. Boŋ sékudē'áá nīmēn metake ábel séésūmē' nlem áwēd yál, boŋ pen sésum wēē Dyōb, mó awē apuudte bad.

¹⁰ Kēnēē édíi bān sēmbe á nsal ní kwééd, ansōŋ sé. Nzé sēdē á ndutul-tē, Dyōb débē áson sé. Sēsūmē'-ē nlem nēn bān ábē áson sé pōndé téē eche sēbēē á ndutul ámpē.

¹¹ Áson sé akānned áde nyékānnadtē sé. Bad hiin bēlad mekáá akānned sé, Dyōb-pe dénaméd sé. Nēn débēl bad hiin bēsāgnēn Dyōb áson áde ásóó sé.

Paale ahúde eke áse

¹² Dyam ádē áde ábélé sēdē kúmbe. Nlem níkēnlé sé á abum nēn bān, abē áde séwóó á nkōŋsē-te wēn, tanje nyaa eche sédíi ne nyé, ne nlem nīme nísáá ne nlem nhóg, ádíi nyaa eche Dyōb ábélé áá ébē. Adēn abē dénkēmbáá ne debyéé á moonoyŋ boŋ démbē ne nsimé ní Dyōb.

¹³ Chōm éche sétenléé nyé édíi éche nyēhenlé aláŋ, nyēsōntēn-ne. Nsumé nlem meé nyēsōntēn nīmēn mekan pōndé ésyāál.

¹⁴ Ngāne nyémáá donje á mekan t̄ŋgene sé asōntēn, ndúbpe nēn meé nyēēkon sé asōntēn bwām. Nēn débēl á pōndé eche Sāŋgú Yesue ápéé, nyēēhel áhób bān nyédé kúmbe ne sé melelem ngāne sémpē sēhenlé áhób bān sēdē kúmbe ne nyé.

¹⁵ Adúbe áde méndübēē meé nēn adé mbále mentii meé mēsēbē ape áwēn ábel boŋ nyétombwēn ngen éche élóntēnē ébe.

¹⁶ Mentii meé m̄hyē áwēn nzé nkag á mbwóg e Masedonia, mentii'-ē ámpē meé á ehúu métyēm áwēn ábel boŋ nyéwōŋgen me áke á mbwóg e Judeya.

¹⁷ Ade mēmbenlé nīmēn ntii, énkēmbáá éche níheláá-se níhēlén nlem á abum. Meébēlēē nīmēm ntii á nyaa e moonoyŋ. Meésáá néē mod awē akwentan áá, “Ee, m̄bēl.” Boŋ ámbid e pōndé átim áhób áá, “Ááy, meebenlé.”

¹⁸ Á'só é' Dyōb áde ábele ngāne áhóbé áá móóbēl, nzé sēlāngé nyé bān sēēbēl dyam, sēbélé sēbēl-le dó.

¹⁹ Nzom echē ekáó boŋ nēn ábe edii áyāle nkalan ní bwām t̄ŋgene Mwān a Dyōb, Yesu Krīstāá, nīme me, Sailase ne Timotie sékánlé'áá nyé. Yesue eehóbéé áá móóbēl dyam boŋ eétimé dó ábel. Yesu Krīstāá ábele dyam áde áhóbé áá móóbēl.

²⁰ Chōm ésyāál éche Dyōb áhóbé áá móóbēl, ábelé mébenlad ábel áde ábélé boŋ debé ne Krīstāá. Nēn dóó ákásá boŋ áyāle mekan nīme Yesue ábeléé syāné déhōbē bān, “Ebē nē” ábel boŋ Dyōb ákud edubē.

²¹ Dyōb dóó ábélé boŋ syāné debé dédúbpe Krīstāá. Dyōb dēn dóó áwógté syāné ábe ne Krīstāá.

²² Ahédé'-ē syāné ábē e'chem ábe é'lúmte bān syāné dedé ábē bad, ahé'-ē syāné éche Edāádəŋ éche Esáá á nlem-tē álúmed nēn bān deékūd bwēm é'syāál ábe áhóbé áá móóbē syāné.

²³ Dyōb ádē me mbōŋ nēn áá chōm éche níhóbéé édé mbále. Nzom echē enkāŋ boŋ menkētīm ámbid á dyad á Kōrinto, edii áyāle meéhedé'áá meé níwóged nyé ndutul.

²⁴ Séēhēdēē bān ébē byánán sēnyágté nyé ádúbe kéchéé. Boŋ pen sēbele nsón ne nyé, ábel boŋ nyébē menyīŋge áyāle nyēsūmné á adúbe-tē.

2

¹ Né-óó, memmāá á nlem-tē nēn meé méehyaá nyé anyín ámpē. Nzé mempē níwógté'áá nyé ndutul.

² Nzé nwógté nyé ndutul, mod éebáá awè áwōgēd mē menyinge, áyāle nwógté bad ndutul ábe bémbē bēwógte' mē menyinge.

³ Nén dōo dēnkān boŋ rítelē nyé enén ndín e kálag. Meéhede'áa mēé nzé mpedé áwēn, nyé bad ábe nyéwógte' mē menyinge, nyéwóged mē ndutul. Ndúbpé nén mēé nzé ndé menyinge, né nyé moosyāál nyéēbē menyinge.

⁴ Ntēnlé nyé enén kálag nyaa eche rítelē áyāle membé ndutul, metake mébé mē á nlém-tē, rítelē-é chō ne mēsod. Menkēntelēé nyé chō ábel boŋ nyéwóg ndutul, boŋ mentelé nyé chō ábel nyébii ngáne rídáá nyé bwāmbwam.

*Paale aá bad bé Kōrinto
bélagsen mod awè abelé mbéb*

⁵ Nzé mod abelé dyam áde áwógté bad ndutul, saké áwēm dēmpen dōo ábélé dō, né abelé dō wéé nyé moosyāál ámpē. Boŋ adén dyam adíí dyam áde mééhōbēē bwāmbwam.

⁶ Nkōgsen míme bad híin áfinté echēn bēbágé ene ndín e mod, ríkwógnédé mō.

⁷ Boŋ nyétāngéné nēé nyélagéséné mō nyéwéd-te mō nlém á abum, ábel ndutul eche ákúde eetómtán mō adenled.

⁸ Né-ōó, ncháa nyé mēé nyélúmed mō bán nyédíi nyédáá mō.

⁹ Nzom echē enkān boŋ rítelē nyé enén kálag edíi ábii nzé nyéēbēl mam mēsyāál míme ríhóbé mēé nyébēl.

¹⁰ Kénzēé awè nyélagéséné, mémpē nlágséné mō. Dyam áde rílagéséné, nzé édé bán nlágséné dō, né nlagšan dō áyāl echēn. Krístāā abelé abíi-é aá nlágséné dō.

¹¹ Debele nê ábel boŋ Satanē eetómé' syánē áte, éesaá bán syánē deebíi'ē mwane míme Satanē.

Békale nkalanj tǎngene melē mékōōlē

¹² Ade rípedé á dyad á Troas, ákal nkalanj mí bwām míme Krístāā, Dyōb dénnednéd mē nzii ábel míme nsón.

¹³ Boŋ nlem ménkēmbáá mē bwām á abum áyāle menkēntánné Titusē, mwānned a Krístāā awè sūmō sēbele nsón. Né-ōó, menlyágtén bó, ríkág-ke mē á mbwóg e Masēdonia.

¹⁴ Nságnan Dyōb áyāle ayōgké abel syāá dehēle' míme nkalanj akal. Abé áde dédíi ne Krístāā ábélé dedé nēngáne bad ábe Dyōb ákóbé boŋ ályāgtē áke dé akal nkalanj mí bwām mebwóg mēsyāāl. Dyōb ábélé bad bébyēé Yesu Krístāā áyāle míme nkalanj míme syāá dékalēé. Mmē nkalanj ríkag áfinté e bad ngáne elod é bwām.

¹⁵ Elod é bwām, elod é Krísto, chōó dédíí á'sō é' Dyōb. Nzé dekale nkalanj tǎngene Krístāā, bad bēsyāāl ábe bédúbpé míme nkalanj míme dékálé, Dyōb ásoo' ádáb alongé. Boŋ bad bēsyāāl ábe bédúbpē míme nkalanj, Dyōb déesoó' é ádáb alongé.

¹⁶ Ne bad ábe bédé á nzii echē epágnédé Dyōb á yāl, nkalanj mí bwām míme syāá dékanléé bó rídé áwāb nēngáne ebébtéd é elod éche éwúé' bó. Abíníi-é ábe bédé á nzii áke wéé Dyōb nkalanj mí bwām míme syāá dékanléé bó, rídíi nēngáne elod é bwām áyāle syāá delánge bó bán bēbé á alongé ne Dyōb á ngíndé ne á ngíndé. Nzé-ōó adé awè ahēlese ábel enén nyaa e nsón?

¹⁷ Séesaá ngáne bad abíníi híin ábe békale eyale é Dyōb ábel boŋ békud nsyān. Ne sé séēbēlēē nē, áyāle Dyōb álóme sé ákal nkalanj mí bwām, míme nkalanj sékale' mō ne nlem nhóg abé áde sédíí mod nhóg ne Krístāā, debíi-é nén bán Dyōb dōo álóme syánē ábel míme nsón.

3

Bekal bé nkalanj mé melë mékɔ̄ɔ̄lë

¹ Nyéwémténé bán sêhóbe' mekan mé bwâm tângene échêd yál ámpē-ye? Nyéwémténé bán sêɛbe nyé kálag ké'ɛ sêhêd kálag áwēn, álúmed nén bán sêkwognédé ábel nsón átínté echēn, ngáne bad bémpeê bébélé-ye? Séebenlé nê.

² Nyédii sé á nlém-té nēngáne kálag echê bétélé boŋ bad bésyāal belāā abii chōm éche édé áwēd-te.

³ Nyélúmte' bán nyédii kálag echê Krístāā átélé boŋ alómén sé. Enén kálag eésāá kálag echê béténlé ínke boŋ edii echê Edāádāŋ é Dyōb áde ábage alongé étélé. Bénkēntenlé enén kálag á melāā mīn, nīme métánlé, boŋ bēntel chō á nlém ní baányoj.

⁴ Sêhóbe nén áyāle sésúme nlém ne Dyōb abé áde sédíí ne Krístāā.

⁵ Sé bēn sêhēlē-ɛ se sêhób bán sêhēle-ɛ sêbēl nīmén nsón. Sé bēn sêhēlē-ɛ se sêbēl mō. Dyōb dāō ábélé boŋ sêhēl mō abel.

⁶ Abelé sêkwognédé ákal nīmē nkalanj mé melë mékɔ̄ɔ̄lë. Méesaá nkalanj áhíd mbéndé é melë mé nchun. Bad ábe bēhíde ene mbéndé bēwāg, bēébāg-kaā ne Dyōb. Nkalanj áhíd melë mékɔ̄ɔ̄lë nīme séyāgtéé, rídé nén bán Dyōb ábage bad Edāádāŋ éche Esáá, ébele-ɛ bēbē ne mō á ngíndé ne á ngíndé.

⁷ Bāob-pōó, Mosee an'yágéd bad áhíd mbéndé é Dyōb é melë mé nchun. Dyōb dēntél échēn mbéndé ámīn e melāá nīme métánlé boŋ ábe Mosee aá áyāgte bad. Ade Dyōb dēmbéé Mosee échē mbéndé, ambēl e'só é'pēné' Mosee féréd, álúmed bán échē mbéndé edii échē. E'só é'pēné'áá Mosee nyaa échē bad bé Israēl bēehelé'áá mō anōn á'sō. Boŋ kénéé é'pēné'áá bwāmbwam, nīmē mwayé mēmbōoté asud mwāmpīn mpīn. Bad ábe bēnhíd melë mé nchun bēnwē, bēnkēmbāā-áa ne Dyōb.

⁸ Né-óó, nzé séyāgte bad nkalanj tângene Edāádāŋ é Dyōb, Dyōb délūmēd bad nén aá nīmē nkalanj rítómténé etógnén abé á alongé á bad.

⁹ Dyōb dénlūmēd aá módé ngum áde ámbéé Mosee mbéndé. Echē mbéndé émbēl bad bēhíí bán ákāgsēn bō áyāle mbéb nīme bēbélé. Boŋ anabpé echē ngum alúmed abel áde ábélé boŋ sékalé' nīmē nkalanj nīme rílúmte ngáne bad bēkobnadté áwe e'só.

¹⁰ Mbéndé éche Mosee áyāgté'áá bad bōóó áhíd mbéndé é Dyōb émbē etógnén. Áyāged áde séyāgtéé bad bāob bán Dyōb délāgsēn bō mbéb, bēbélé-ɛ ngáne áhēdē, dāō átómténé etógnén abé.

¹¹ Kénéé edii bán Dyōb dénlūmēd ngáne ádíí etógnén áde ábélé melë mé nchun, melë nīme mēmbē á esón é pōndé, alúmté aá mōtómtēnē etógnén abé abel áde ábélé melë mékɔ̄ɔ̄lë. Mmēn melë méékɔ̄ɔ̄lë mōó mēhāŋléné alongé á bad, mébē-ɛ abé ne abé.

¹² Né-óó ngáne sésúme nlém bán nkalanj nīme sékaleé rídé etógnén bwāmbwam, sékale mō ésebán sébāā'.

¹³ Séesaá nēngáne Mosee. Mosee ankúdtén e'só ábel boŋ bad bé Israel bēényíné ngáne e'só ábe é'pēné'áá mō é'díméé.

¹⁴ Boŋ bēnkēnsōŋténé. A mbále, bootyaa ene pōndé ápe chii, bēehelé asōŋtén nén bán apen áde e'só é'pēné'áá Mosee, nīmē mpentéd rísúdé. Pōndé ké ehéé nzé bad bēwógé mod aláá kálag e melë mé nchun, bēesōŋtānnē chōm éche bēwógé. Edé nēngáne abad ákúténé bō mewēmtēn. Nzé mod adé ne Krístāā dēmpēn dāō asōŋtānné.

¹⁵ A mbále, bootyaa ene pōndé ápe chii, pōndé ké ehéé echē belāá mbéndé é Mosee, ébélé ébē byánán abad ákúténé bō nsōŋtēn nyaa eche bēeheléé chōm éche belāá' é abii.

16 Boŋ nzé bó ké ahéé adúbpé Sánjú Yesue, chõm éche ébâg nânġáne abad éche ékutan bó nsõŋten ébelé éhíde.

17 Bɔɔb-pɔɔ, Sánġwéé adii Edáɔɔɔŋ. Kéhéé áde Edáɔɔɔŋ éche Sánġwéé édii, bad béebâgké á mehan-tê.

18 Syánē ábe Dyõb áhúdé abad áde dénġūtēn syánē e'só, abé ádēd ábele' bad bébii ngáne ehúmé éche Sánġwéé épédé abé. Bényine' bán abelé syánē ngáne bad ábe bébele ngáne Dyõb áhédéé. Edáɔɔɔŋ éche Esáá éhənġlan syánē ahənġlen ne ahənġlen ábē ngáne Yesue ábel bad bényin ngáne ápédé ngine abé. Sánġwéé, mó awé adé Edáɔɔɔŋ, mó abele nímén mekan.

4

Yesue alúmté syánē ngáne Dyõb ápédé abé

1 Ngol eché Dyõb adii chõ ekáɔ boŋ sékalé' nímén nkalan. Né-ɔɔ, séedonlé mekuu ámbid ákal mó.

2 Séebenlé mekan mé e'sõn níme bad bébeleé á mesɔɔm-tê. Séédõgnēē nyé ehõb é nsál, séehənġlan-naa eyale é Dyõb ádog nyé. Boŋ pen, séyágte' bad eyale é Dyõb nyaa eché bad bésõŋtenné chõ. Ngáne séyágteé eyale é Dyõb ne nlém nhõg, modmod eéhēē-se ahõb á nlém-tê aá sédoge mó. Sébii bán Dyõb ábii kéchéé éche sébeléé.

3 Nzé donge á bad béhele nkalan ní bwám níme séyágteé asõŋten, né édii wéé ábē bad béedúbpéé mó. Ngáne béedúbpēē Dyõb béebáá ne mó.

4 Satane, nkamlene á nkõŋsé, akamlan mewēmtēn níme bad ábe béedúbpé Krístæ. Béehelēé-se bésõŋtēn bán nkalan ní bwám níúmte ngáne Krístæ ápédé etõgnén abé. Krístæ adii nēē Dyõb dēn.

5 Nē dõɔ ákás boŋ séékálē tãŋgene échēd yál. Boŋ sékanle nyé bán Yesue mó adé Sánġwéé. Sédii bembælede ábēn áyāl e Yesue.

6 Dyõb áde dénhõb aá, "E'nyinen bé ekide é'bê wēē ehintén énsēbēē abé," mó abelé nímē nkalan tãŋgene Yesue ábē nânġáne e'nyinen bé ekide ábe é'pene' syánē á nlém-tê. Syánē baásyā́l ábe dedúbpé Yesue bõs Dyõb ábénlé nē. Dyõb ábélé nē ábel boŋ bad bébii nēn bán módé etõgnén ábii áde bad bébii' é bán Yesu Krístæ adii nēē mó.

7 Boŋ nkalan níme Dyõb ábágé sé ákal, nídii chõm éche étõmténé etõgnén abé. Sédii nânġáne mbeé e mɔg eché chõm édii áte. Nēn ábénléde ábel boŋ bad bébii nēn bán ngine eché echabé ámín ehúú ne Dyõb saké ne sé.

8 Sēkude nyaa é ndutul híin boŋ séélyāgēē áwēd-te. Donge á pónde séebyéé' é dyam áde sébeléé, boŋ séehõbēé nēn bán Dyõb déelúmédte se chõm éche sétãŋgné abel.

9 Bad bétagte se pónde té boŋ Dyõb déetēdté sé. Bélõgne sé, boŋ Dyõb déekwēntánne aá bēwúu sé.

10 Kéhéé áde sékagké ákal nkalan ní bwám sēhédé á nlém-tê nēn bán bad béhede' sé awúu ngáne bēnwū-'é Yesue, boŋ bad bébii bán Yesue adé á alongé, mó-'aá ahág sé ngine áte abé áde sédii á alongé.

11 Sébii nēn bán kénēē sédii á alongé bɔɔb, séde benben ne kwééd pónde té áyāle sébenle Yesue. Nēn áde ábel boŋ bébii bán Yesue adé á alongé, mó-'aá ahág sé ngine áte abé áde sédii á alongé.

12 Né-ɔɔ, sékwēnténé kwééd ábel boŋ nyékud alongé áde déemaá'.

13 Sédii melemlem ngáne mod awé ahõbē ngáne éténléde á kálag e Dyõb nēn bán "Ndúbpé wē, né-ɔɔ, nkale' tãŋgene wē." Melemlem ngáne ane mod ándúbēē Dyõb, sémpé sédúbpé Dyõb, sémpé sédii sēkale-'é tãŋgene mó.

14 Sébii bán Dyõb áde ápuúdté Sánjú Yesue dépuúdtē sémpē ábē á alongé ámpē ne Yesue. Dyõb dépēēn-ne sé ne nyé wēē adii.

¹⁵ Metake mēsýāāl nīme sékudéé médii áwōngēn nyé, ábel boŋ nzé bad hiin béwógé eyale é Dyōb, nsimé ní Dyōb mébēl békūd alagsēn dé mbéb, bēbūd-te mó aságnēn. Nēn débēl bad hiin békēné' Dyōb.

¹⁶ Né-óó, séedonlé mekuu ámbid ákal nkalan ní bwām, kénéé édíí bán ngīne esude' sé á yāl, kéné Dyōb áwede' sé nlém á abum, áhāg-ke sé ngīne áte mbwe té.

¹⁷ Baá metake ábe sékudéé bōob béesaá ábe sétagteé nlém á abum. Sékude metake bōob boŋ ehúmé éche ébē ne sé échāb ámīn nyaa eché séekamténné metake nīme sékudé á nkōŋsé wēn, ébē-'e ne sé á ngīndé ne á ngīndé.

¹⁸ Nē dóó ákās boŋ séenyíné' metake nīme sékudéé bōob néé dyam. Boŋ sébānné nlém áyāl é bwēm ábe Dyōb ákōŋnédé sé, kénéé édíí bán séenyínéé bō. Bwēm ábe sényínéé bōob é'dé dās áyāl e esōŋ é pōndé, boŋ bwēm ábe séehéléé-se sēnnyīn bōob, bēbē á ngīndé ne á ngīndé.

5

Déékūd yāl ékōōlē ádyōb

¹ Sébíí nēn bán éched yāl éche sébééné á nkōŋsé edii néé e'bem ábe sédyéé' áte. Nzé bépáá ábē e'bem, sébíí nēn bán séwóó ndáb ádyōb eché moonyon éelóó' é. Dyōb dóó álóo' chō, ébē-'e á ngīndé ne á ngīndé.

² Sékōōmad áte bōob á ebēm-té wēn, séwane áte bán ene ndáb eché ebíde' ádyōb ékúten sé ngāne mbóté ékútanné mod.

³ Nzé sédé ene ndáb áte, séebaá nēngāne mod awé adé nsōb.

⁴ Abēen áde sébééné enēn yāl á nkōŋsé te wēn, sékōōmad áte adenled áde nēn adénlédé sé. Eesaá nēn bán séhede enēn yāl e nkōŋsé ahúd, boŋ séhede yāl ékōōlē eche edé ádyōb, ábel enēn yāl e nkōŋsé eché ewág émaa, étim yāl eché ébē á alongé.

⁵ Dyōb dóó ábōŋséné syāné ákud nīmēn nhāŋlén alómmé-'e syāné éché Edāádəŋ éche Esáá álúmed nēn áá adén akan débenléd.

⁶ Né-óó, pōndé téé desume' nlém nēn bán abé áde dédíí ne échén yāl á nkōŋsé, déesaá hōm ahóg ne Sāŋgwéé.

⁷ Sédé á alongé á nkōŋsé ne échén yāl, áyāle sédúbpé mó saké ngāne sényínéé mó.

⁸ Sésumé nlém nēn bán ábe syāné yāl ékōōlē, séhede-'e éched yāl é nkōŋsé atede áke débé ne Sāŋgú Yesue.

⁹ Né-óó, nīmed nlém nīsyāal nītāŋgéné abé áwóged Yesue menyīnge áyāl e kéchéé éche débéléé, ké ébē bán sédé ne éched yāl á nkōŋsé, ké'e séésaá ne chō.

¹⁰ Syāné mod téé átyēēm á nkáásé á'sō ábe Yesu Krīstəə epun éche ákáádté moosyāal, tāŋgene mekan nīme ábélé á pōndé eché ábédé á nkōŋsé. Mod té ákūd nsábe tāŋgene mekan mé bwām ké'e mé mbéb nīme ábélé.

Abé á nchemten ne Dyōb

¹¹ Ngāne sébíí bán Sāŋgwéé ákáād bad, sébagé-'e mó edúbé, séwane' áte nēn bán bad bésōŋten nēn bán nkalan nīme sékaleé níde mbále. Dyōb ábíí nyaa é bad éche sédíí, mbíí-'e méé nyémpē nyébíí nyaa é bad éche sédíí, ndúbépé-'e méé nyébíí-'e bán sékale mbále.

¹² Séehóbéé mekan mé bwām tāŋgene éched yāl ámpē. Boŋ pen séhede bán nyéwōŋ nzam ábēen sé kúmbe, ábel boŋ nyéwōŋ dyam áláa bad ábe bédé kúmbe áyāl e mekan nīme bēbéléé nīme bad bényínéé, saké áyāl e mekan nīme médé bó á nlém-té.

13 Donje á bad béhóbe bán sêhóbe mekan néε bad ábe nló méésáá' é áte. Nzé nê adé mbáale, né Dyóβ dóo sébageé edúbé. Nzé sêhóbe mekan néε bad ábe nló nsáá áte, né áwóngeη nýé dóo sêhóβεé.

14 Edəŋge éche Krístəə chóo étédé sé nlem á abum ábel mekan míme sébeleé, áyale sémadé á nlem-té nén bán Krístəə awédé á nló mí moosyáál. Né-óó, édé nēŋgáne moosyáál áwédé.

15 Anwé á nló mí moosyáál ábel boŋ bad ábe bédé á alongé, alongé ádāb déélumtē bán bédé á alongé áyāl echáb dēmpen. Boŋ pen bédé á alongé áyāl e Krístəə, mó awē anwé, boŋ Dyóβ ápūūd-te mó á nló nímāb.

16 Né-óó, bootya bəob, déēnōnē mod nyaa eche moononyoŋ ánonéé. Kénée édíí bán sēnōné'áá Krístəə á nyaa e moononyoŋ, séēnōnēē mó nē ámpē.

17 Né-óó, kénzée awē adé mod nhóg ne Krístəə, adíí nhəgtéd mékōōlē. Mmē mbeltéd mé nchun nýsyāál nímáá atóm awóó-ε mbeltéd mékōōlē nýsyāál bəob.

18 Mmēn mbeltéd mékōōlē níhúú ne Dyóβ. Abelé syánē detimé ásē ne Krístəə, abagé-ε syánē nsón ákale bad nén bán béhele bēbē nsan ne Dyóβ.

19 Chóm éche níhóβεé édíí áyāl e kwééd echē Krístəə áwédé á awóg. Dyóβ ábélé bad bépédé á nchemten ne mó. Dyóβ déétóo'áa mbéb míme bad bēbélé, abagé-ε syánē nsón ákale bad nén bán béhele bēbē nsan ne Dyóβ.

20 Aláa áde Dyóβ álāŋgeé sé mekan aláa bad sēdíí bad ábe béhóβpe Krístəə. Sésime nýé etúu áte á díŋ á Krístəə nén nyépe á nchemten ne Dyóβ.

21 Dyóβ dēmpwēd Yesue átag áyāl e mbéb nýsyāál míme syánē débélé. Yesue enkēmbenlé mbéb ké nhóg, boŋ kénē ankwentén atag áwəd nló. Dyóβ álágséné syánē mbéb ahóbe-ε áá déébēlēē mbéb ámpē melemlen ngáne mómpē éebéléé mbéb.

6

1 Né-óó, sé ábe sébele' nsón ní Dyóβ ne Dyóβ, sēcháa nýé nén bán nsimé ní Dyóβ míme nyékudéé méébāg ngén.

2 Dyóβ ahóbe ngáne éténlédé nén áá,

“Ade pónde épédé echē etāŋgéné, menwóg chóm éche nyéhóbe.

Ade epun é e'soóson-ε épédé, menwóngeη nýé.”

Nyénoné' pónde nén bəob echē etāŋgéné, eche nyétāŋgéné nsimé ní Dyóβ akud. Nyénoné', epun épédé éche nyéhele nyékud e'soóson.

3 Séekáá' modmod nzii, ábel boŋ awusé déēnyínnād áyāl e nsón míme sébeleé.

4 Boŋ pen, nēŋgáne bembəlede bé Dyóβ, sélumtē' yāl nyaa ésyāál ábé bad ábe bébele' mekan míme métāŋgéné. Sēwánlé e'kan bé nlem é' ngíne tāŋgene metake míme sékudéé, tāŋgene alongé áde álēnlad sé áte, ne ndutul éche étáne sé.

5 Sékude mbéte, béhāg sé á mbwóg, ndun e mod empēēn epuutéd béchodé sé yāl áte, sébele ntú ní ngíne, sēnangé' e'pin, sédyé-ε nzaa.

6 Sélumtē' ámpē bán sēdíí bembəlede bé Dyóβ ábel áde sébeleé mekan mé bwām ne e'sán bé nlem, abe áde Dyóβ ábágé sé nsōŋten ábíí alongé áde sétāŋgéné awón, awesen áde séwesanné, ne awóon áde séwónné bad bēmpēe nlem mí bwām. Edáádəŋ éche Esáá chóo élyágte sé, sēdáo-ε moosyáál ne nlem nhóg.

7 Nkalan míme sékaléé rídíí nkalan mí mbáale, ngíne e Dyóβ chó-áá sébenladtē ákal mó. Abel áde sébeleé mekan míme métāŋgéné ábélé bad béewóó'ε dyam dé mbéb ké ahóg ábán sé á yāl.

⁸ Séeḅē sébēnlé Dyōb ké békēn sé, ké'ē béekēne' sé. Ké bad béhōbē sé mekan mé mbēb áyāl ké'ē mekan mé bwám. Bad béhōbe bán sélúmte bán sédé ndín é bad éche séesaá, boḅ sēdii bad ábe séhōbé bán sédé.

⁹ Bad bébii sé bwám boḅ bémpē bényine' sé bán sēdii bad ábe béesē dyam dé abēlen. Bad béwēmtan bán séebáá á alongé boḅ kénê sēdii sédé á alongé. Sékude metake á mekáá mé bad boḅ kénê, béewúú' sé.

¹⁰ Sédé á ndutul tē, boḅ kénê, séwóge menyinge pónde ésyāāl. Kénē édii bán séebudé chōm awōḅ, boḅ kénê nsōn míme sébēléé mibélé bad hiin bédúbpe Dyōb. Né-óó nē ábélé bébúdé bwēm awōḅ bōob. Kénē séewó' é chōmchōm, nhōn ní Dyōb nídii mímēd.

¹¹ A-bad bé dyad á Korinto, sētēnlé nyé chōm ésyāāl ésebán sēkoḅnad nyé dyamdyam. Sélúmte-'ē ngáne nlém nídii sé áte áyāl echēn.

¹² Sédáá nyé, séebáá-'áá alúmed bán sēdáá nyé. Nyé pēn nyélúmte sé nēn nyéédáá' é sé.

¹³ Nhóbe áwēn bōob néē ábēm bán. Nyémpē nyédəḅ sé ngáne sémpē sēdáá nyé.

Nyéebēlé' mekan míme bad ábe bēdúbpe Krístāá bēbēléé

¹⁴ Nyéebág nlatén ne bad ábe bēdúbpe Krístāá. Nhóbe nēn áyāle bad ábe bétəḅgéné á sō é' Dyōb, béewó' é dyam abēlen mekan míme e'bébtéd é' bad bēbēléé. E'nyinēn bé e'kide béewó' é dyam abēlen ehintén.

¹⁵ Krístāá eewó' é dyam abēl ne Satane. Mod awē adúbpe Krístāá eewó' é dyam dé abēlen mod awē eedúbpe.

¹⁶ Ndáb-e-Dyōb eewó' é dyam dé abēlen ndáb eché bad bēbēnléé myōb mémpē. Nhóbe nēn áyāle dedii ndáb e Dyōb, Dyōb áde áde á alongé. Edé nēn ngáne étēnlédé bán Dyōb áhóbé áá,

“Mébē ne ábēm bad, ndyēē-'ē áwāb.

Bēbēléé mē nēngáne ádab Dyōb, mē-'ē métēd bó nēngáne ábēm bad.”

¹⁷ Səḅgwéé aláḅge ábē bad áá,

“Né-óó, nyéteḅe, nyéebág-ke ne bad ábe bēdúbpe mē.

Nyéewó' é dyam abēl ne e'bébtéd é mekan míme bēbēléé.

Mékōb-pe nyé néē ábēm bán.

¹⁸ Mébē nyé sáá,

nyé-'ē nyéebē ábēm bán.

Mē Dyōb á Ngum mē-éé nhóbe'.”

7

¹ A-baányəḅ bé edəḅge, ngáne Dyōb áhóbé áá módii awesyānē Sáá, syānē-'ē debé ábe bán, déteḅe mekan míme méwóḅte syānē mbinde á ekob é yāl ne á edááḅəḅ. Syānē débē Dyōb edúbé, déwōḅ-'ē alongé áde ásáá, nē débēl débəḅé Dyōb edúbé ngáne éhēdnadté.

Paale adé menyinge

² Nhēde mēé nyédəḅ sé ne nlém nísyāāl. Sépānnēē modmod, séēbēltēē modmod mbéḅ, séédōḅgēē-'ē modmod.

³ Meehóbéé nēn áhób nyé. Mésébé nyé atele nēn mēé, sēdāá nyé bwāmbwam, ké á kwééd ké'ē á alongé, dēbē debé mod nhóg.

⁴ Nkumne nyé ekáá á tál. Mbééné nyé kúmbe. Nyéwédé mē nlém á abum bwāmbwam nyaa eché rítómténé menyinge abé kénēé sékudéé metake bwāmbwam.

⁵ Ade sépédé á mbwóg e Masεdonia, sēnkēnkóméé áte. Sēkudé'áá metake nyaa ne nyaa. Bad bēpentánnáá ne sé mbwóg-ke níbé sé áte áyāle sékám tánnáá nyé.

⁶ Boŋ Dyōb áde áwéde bad ábe béēwóo e'lyág bé nlém, nlém á abum, dénwēd syáné nlém á abum alóm áde ánlóm mē Tituse áwesyáné.

⁷ Saá-kaá échē eπε chēmpen ēmbel sēwóg menyinge, boŋ awéd áde nyénwēdtē mó nlém á abum dénwōgēd sé menyinge. Anláá sé ngáne nyédáá me anyín bwāmbwam, aláá-ε sé ngáne nyénwōgkē pél áyāle ndutul eche ebédé nyé á nlém-tē ngáne nyēnkēnwōgéd-tē me menyinge. Anláá-ε me ngáne nyéwóo nlém áte ábē me ámbíd. Ade Tituse álángé sé nímén mekan, membé menyinge bwāmbwam.

⁸ Kénéé edíi bán ene kálag echē mēntelēé nyé enwōgéd nyé ndutul, meésáá ngól nén me nténlé nyé chó. Kénéé edíi nén bán membé ngól atel áde mēntenlé chó, nnyíné nén mēé echem kálag echē ríténlé nyé ewiídé nyé nē á esón ē pónde.

⁹ Boŋ boob ndé menyinge, saké áyāle ménwōgēdtē nyé ndutul, boŋ áyāle ndutul eche nyénwōgkē ebelé nyéhāŋléné áden abé dé mbéb nyébele' ngáne Dyōb áhedeé. Nyénwóg ndutul ngáne Dyōb áhédé'áá aá nyéwóg. Né-óó, ndutul ké ehéé echē sēmbenlé boŋ nyéwóg, enkēmbébénné nyé.

¹⁰ Nzé ndutul edé mod á nlém-tē ngáne Dyōb áhedeé, ane mod abelé ahāŋlén áde abé dé mbéb ábelé' ngáne Dyōb áhedeé. Nén ábele' ane mod ákúd e'soosón, nē déewiídéé modmod ámpē. Boŋ bad ábe bédúbpē Dyōb, ndutul eché edé bó á nlém-tē áyāle bédíi baányonj ebele' bēwág á edáádāŋ.

¹¹ Boŋ ndutul embé nyé á nlém-tē ngáne Dyōb áhedeé aá ebē. Né-óó, nyénāne' chōm eche nē ápiínédé nyé. Nyéhedeé'áá bán níbií nén mēé nyéwane áte álúmed bad nén bán nyéēbēlēé awusé ké ahóg boob. Melingá mémbē nyé áte nén bán ábē bad bēbélé awusé á etūn é pónde nyédé ahób bán nyélānge bó bán bésóg mbéb abel. Nyénwóg mbwóg nén bán Dyōb dékōgsēn nyé nzé nyédé nyébele échén ndín é mekan. Nyēndāŋ me anyín bwāmbwam, nyénwónj nlém ábē me ámbíd, nyékōgsān-ne bad ábe bēbele mbéb. Abel áde nyébéle nímén mésyāál, álúmté sé nén bán nyéēbēlēé mekan mé mbéb.

¹² Né-óó, kénéé rítélé ene kálag, menkēntenlé chó áyāle mod awē abelé epandé ké'ε mod awē bépánné boŋ ntelé chó ábel boŋ nyébií á'sō é' Dyōb nén bán nyékoó sé adāŋ.

¹³ Né dāó ákásá boŋ nyéwēdē sé nlém á abum.

Saá-kaá e'wéd bé nlém á abum bēnpēn, boŋ sēmbé menyinge bwāmbwam anyín áde sēnnyínné Tituse adé menyinge áde ápédé. Anláá sé ngáne nyébéle boŋ asóg atag áte.

¹⁴ Membé kúmbe áláá Tituse ngáne nyédíi bad bé bwām, nyēnkēnwōgéd-tá me e'són áyāle nyénlúmed nén bán mekan níme ménláá'é mó médé mbále, ngáne mekan mésyāál níme sēnlāá'é nyé médíi mbále.

¹⁵ Nē ábélé níme nlém nítime' áwēn tómaa ké ngen e'só, akamtēn áde ákamtanné ngáne nyé moosyāál nyénwōngē nlém ábel mekan níme ánlāá'é nyé aá nyébel. Nlém nítime mó áwēn ámpē nzé akámténé ngáne nyēnkōbpē mó ne edúbé, nyéwōngén-ne mó ne nlém nhóg.

¹⁶ Ndé menyinge áyāle nsumé nlém rísyāál áwēn.

8

*Bad bé Krísto bétōŋgéné
bad ábe bétōgéné awōŋgen*

¹ Bɔɔb-pɔɔ a-baányan, sêhede bán nyébíi nén bán Dyɔb ábágé nímē nsimé wée bad bé Dyɔb ábe bédé á mwembé níme rídé á mbwóg e Masēdonia ábel bon bésále ekáá áte.

² Békúde metake mé ngíne níme mékage bó áte bwámbwam. Kénée edíí bán bédé atóg bwámbwam, bésánlé ekáá áte bwámbwam, bédé-’ε menyinje.

³ Ndé mbón nén meé, bēmbě chōm éche bēnwōngē, bēntōmtēn-ne abe tómaa chōm éche bēmbēē bebage’. Bébágé’áá-’ε ngáne nlém nímāb ménlāā’ε bō.

⁴ Bēnchān syānē bwámbwam ábē menyinje áwōngēn bad bé Dyɔb bé Jerusalem ngáne bōmpē bēbelé.

⁵ Bēmbēl tómaa ngáne sēnwēmtēnnē. Bēnsēbē ádāb alonjé abe á mekáá níme Sāngwée. Ambid enē bēmbě ádāb alonjé áwēd mekáá ngáne Dyɔb áhedeé áá bēbel.

⁶ Né-ɔɔ, sēcháa’ Tituse awē ambootéd nímén nsón ne nyé nén bán ádíi áwōngan nyé, nímén nsón níme nyésánlé ekáá áte, nyébāgē-’ε bad kéchéé éche bétógnéné ne nlém nhóg, nyépid mó á asóg.

⁷ Bɔɔb-pɔɔ, nyébele bwām á menzii mésyāāl. Adúbe áwúú nyé áte. Nyékale’ nkalaní mī bwām, nyébíí mekan mé Dyɔb, nyéwóó nlém áwōngēn bad nyédā-’ε sé bwámbwam. Né-ɔɔ, sêhede bán nyébele bwām, kásñne ásále ekáá áte, nyébage-’ε bad kéchéé éche bétógnéné.

⁸ Meékamlánné nyé ábel nén. Bon ngáne nínýiné bad ábe bédúbpé bēwōngan bad bēmpēe, nhede meé nyémpé nyélúmed ngáne nyédáá bad bēmpēe.

⁹ Nyébíí ngáne echēd Sān, Yesu Krístā áwōnganné nyé ásále ekáá áte. Kéchéé éche Dyɔb áwóó mó awóó. Bon kénē á etutú échēn antedé nímē nhōn rísyāāl ádyōb ápē á nkōñsē abé nēe ntógétōke nyé mod nnam. Ambēl nē ábel bon nyékud nnam níme Dyɔb ábágé bad.

¹⁰ Mbage nyé elébé nén meé, mwě níme rítómé nyémbé bad bé e’só áwōn nlém áwōngēn bad, nyémbé-’ε bad bé e’só ábooted bad awōngēn.

¹¹ Bɔɔb-pɔɔ, nyétāngéné nsón níme nyébóótédé amad. Nē débēl bad bēbíi nén bán nyédé mbonñsēn ábe ngáne nyéwóó ápid-te nē á asóg melemlem ngáne nyémbonñsēnné ábooted nē.

¹² Nzé ewóó nímé nlém ábe mod chōm ngáne éwóó chō, ébelé ekobnéd ne Dyɔb. Dyɔb déhedéé áá mod ábe tómaa chōm éche áwóó.

¹³ Meehóbéé meé nwōngēn níme nyébageé bad ríwōngēn bó bon nyé bēn nyébē á metake-tē, bon nhede meé nyé moosyāāl melemlem, nyéwōñ chōm éche ékwógnédé nyé mod-téé.

¹⁴ Bɔɔb-pɔɔ abud áde nyébúdé bwēm awōñ, nyéwōngan bad ábe bédíi bēhede’, ábel bon á pónde éche nyémpé nyétōgnēnnē bōmpē bēwōngēn nyé. Nē débēl mod téé áwōñ.

¹⁵ Eténlédé á kálag e Dyɔb nén bán, “Mod awē ambud awōñ, enkēnwōngé tómaa ngáne ántōgnēnnē, awe mó-’ε enkēmbud awōñ, andíi anwōñ ngáne ántōgnēnnē.”

Bélómé Tituse bó á Kōrinto

¹⁶ Nságnan Dyɔb abe áde ábágé Tituse ámpē nlém áwōngēn nyé melemlem ngáne ábágé me.

¹⁷ Tituse eépāgkē áwēn áyāle sélāngē mó bán ape, bon apag kásñ ne áyāle awóó nímé nlém ápē, apag áyāle mwēn adāá ape.

¹⁸ Sélómne mó mwānned a Krísto ampée. Anén mwānned a Krísto, abyééné ántínté e mwembé rísyāāl akal áde ákaléé nkalaní mī bwām.

¹⁹ Saké alóm áde sélóméé mó dēmpen, mwembé mēmpwēd mó áhoon sé ngáne sébéléé nsón áwōngēn bad ábel bonj edúbé éche Sánjgwéé ényínned ne álúmed nēn bán séwóó nímé nlém áwōngēn bó.

²⁰ Séēhēdēē bán modmod áhōb dyam dé mbéb tāngene nímén nsón mé asále dé ekáá áte nímé sébéléé.

²¹ Séwóó nlém ábel dyam áde átāngéné saké á'sō ábe Sánjgwéé dēmpen bonj kááhne á'sō é' baányonj.

²² Sélómé' mwānned a Krísto áwēn nchoo ne Tituse bó. Alúmté sé á menzii híin aá mówóó nlém áte áwōngēn nyé. Bōōb-pe áde ályágé nlém áwēn, anábpé nlém awōñ áwōngēn nyé.

²³ Tituse mó ne mó ayōgké me ahoon ábel nsón áwōngēn nyé. Abíní bānned bé Krísto ábe békag ne Tituse bédii bad ábe mwembé melómé á dīn ádāb, kéhéé-'e wéé békíí mam nímé sébéléé mépiinad Krístəə edúbé.

²⁴ Né-ōó, nyélúmed ábēn bad nēn bán nyēdāó bó. Ábel áde nyébenlé nē, mwembé nímé nílómé bó mēsōhtēn nēn bán nēn dōó ákás bonj sékumné nyé ekáá á tál.

9

Békag bad bé Krísto bé Jerusalem mōné asāñned

¹ Bōōb-pōó, éesaa etógnén me átele nyé tāngene nsón nímé séwōñganné bad bé Dyōb.

² Mbíí nlém nímé nyéwóó áte áwōngēn bó, mbééné-'e nyé kúmbe awōñ áde nyéwóó nlém áwōngēn bad ábe bédé á mbwóg e Masedonia. Menláá bó nēn mēé, “Nyé ábe nyéde á mbwóg e Akaya, nyémbé mbonjén se mpú-mwē ábe bó mōné.” Nlém nímé nyéwóó áwōngēn bad nítédé bó bad híin nlém á abum ábel melemlem.

³ Bōōb-pōó, nlóme' ábēn bānned bé Krísto áwēn, ábel bonj ahób áde séhóbéé bán sékumne nyé ekáá á tál déēbāg bán sékale metóm. Bonj ébē bán ngáne nílāngé bó mēé nyéēbē mbonjén ábe bó mōné, nyéēbē-'e nē dēn.

⁴ Né-ōó, nzé mpedé áde bad bé Masedonia bépédé ne me bonj ntáné nyé áde nyéēbonjēné, séēkwāg bwāmbwam, nyé-'e ámpē nyékwāg.

⁵ Né-ōó, nē dōó ákás bonj nídōl áte nēn mēé édé etógnén álóm ábed bānned bé Krísto á'sō, ábel nyémad nwōngēn nímé níchábé ámín nímé nyéhóbé bán nyéēbe bó, abonjēn. Nzé nyébelé nē, né nwōngēn nísyāāl mébē mbonjén nzé mpedé. Nēn délúmed nēn bán nyébage ne nlém nhóg saké áyāle sényágté nyé.

⁶ Nyébíi nēn bán mod awē éebude awén, éebudé ahúd, awe mó-'e abudé awén ábūd-te ahúd.

⁷ Nyé mod té ábe mōné ngáne nímé nlém nílāngé mó. Mod éēbāgē sé nlém nīkōglád mó á abum ké'e ébē byánán bényágté mod. Dyōb ádāó mod awē abage ne e'sán bé nlém.

⁸ Dyōb débe nyé kéchéé éche nyétógnéné ábel bonj nyéwōñ chōm ésyāāl éche ékwógnédé nyé ásále ekáá áte ábe bad bēmpēe. Nēn débēl nyéēbude' bad mekan mé bwām abele.

⁹ Eténlédé á kálag e Dyōb nēn bán, “Asánlé ekáá áte ábe betóótōkē bé bad nwōngēn, bad bēchaténné ábē e'bonj bé nlém.”

¹⁰ Dyōb dōó ábage bad bwēm ábe bēwēnéé, ábagé-'e bad chōm éche bédyākē. Ábe nyé bwēm ésyāāl ábe nyétógnéné áwēn, ábēl é'kwōg é'chyáá mbote eche ebuú áte bwāmbwam. Ábel nēn áyāle e e'bonj bé nlém ábe nyéwóó.

¹¹ Dyōb débēl nyēbē nhon āyāl e chōm esyāāl, ābel bon nyésāle ekāá áte. Nén débēl bad hīn bésāgnēn Dyōb āyāle nwōngēn nīme nyēbagēé bō nīme rīhūú ne sé.

¹² Abel áde nyēbeleé nēn, déesaá āwōngēn bad bé Dyōb dēmpēn, bon áde káōngēn ālūmed bán bad hīn bésāgnan Dyōb bwāmbwam.

¹³ Mekan nīme nīmēn nsōn nīme nyēbeleé nēn mēbīdēdtē áwed, mēbēl bad hīn bēbagé Dyōb edúbé āyāle nyēbele ngāne nkalaní mī bwām nīme Krīstāā rīhōbēé, nyélūmtē-ē ābēn e'bon bé nlēm wēé bad bé Dyōb ābe bédé á Jerusalem, nyélūmtē-ē wēé bad bé Dyōb bēmpēe.

¹⁴ Bēwōó nlēm ānyīn nyé, békānnād-te nyé āyāle nsimé rí Dyōb rídé ne nyé. Mmē nsimé rīchábé āmīn bwāmbwam.

¹⁵ Nsāgnēn nībē ne Dyōb āyāle abagé syānē nsimé nīme rīlélé ahāgēn.

10

Paale alángé bad bé Kōrinto ad nīme nsōn rītāngēnē

¹ Mē Paale, mē awē mpwiitédé nsudte-ē yāl nēngāne Krīstāā, ncháa nyé. Baahóg bēhōbe' nēn bán nzé ndé ne nyé mbelé rīwógé mbwóg. Bán bon nzé meésē ne nyé, mbelé rītenlé nyé kálag éche éwūú áte.

² Ncháa nyé nēn mēé nyēēbēlē' ngāne ābē bad bēbeleé ābel bon nzé mpedé āwēn, rīhōbēn nyé ésebán mbáa' dyamdyam. Bad ābe mēhōbēnnē bédīi bad ābe bēhōbe bán sēbele nsōn ngāne bad bé nkōjsé bēbeleé.

³ Kénēé edīi bán sēdé á nkōjsé-te, sééwānēē nzum ngāne bad bé nkōjsé bēwanēé.

⁴ Bwēm ābe séwannēé nzum bēesaá melemlēm ngāne ābe bad bé nkōjsé bēwanēé. Bon bwēm é' nzum é' ngīne é' Dyōb bōó sēbenladtē ābēbed mbewóg mé ngīne nīme ābēd bad bé ekōyī. Abēn bwēm é' nzum bōó sēbenladtē āsuded mpentēn ké rīhéé nīme bad bēpēēnēé nīme meésē mbāle.

⁵ Sēbenlad bō āmpē āmad mehōb mé kúmbe nīme bēhōbēé nīme mēbele' bon bad bēēbyē' Dyōb. Sēbele' bad bēhānglan nīmab mewēmten ābel nīmab mewēmten mēsýāāl mēbē nyaa éche Krīstāā āhēdēé aá mēbē.

⁶ A pōndé eché nyēbenlé ngāne Krīstāā āhēdēé ne nlēm rīsyāāl, dōó sēbonjsēnnē ākōgsen kēnzēé awē alúmté aá móbēnlé ngāne Krīstāā āhēdēé.

⁷ Nyénōne' chōm éche édé nyé á'sō-te. Mod ké ahéé awē asumé nlēm ne Krīstāā ābīi aá ngāne módíi, nē dōó sémpē sēdíi ne Krīstāā.

⁸ Ké menkūm ké ekāá á tāl āyāle ngīne eche Sāngwéé ābágé mē tómaa ngāne rīkumēé bōob, méewógké e'sōn. Abagé mē ene ngīne āwéd nyé áte saké āsuded nyé adūbe.

⁹ Meéhēdēē mēé ényīned nēn bán kálag éche rītenléé nyé edīi āwóged nyé mbwóg.

¹⁰ Nhōbe nēn āyāle bad bēhōbe bán kálag éche rītenléé nyé éwūú áte, éwōó-ē, e'yale bé mbēb áte. Bēhōbe-ē āmpē bán bon nzé mmēn ndé, meewóó'ē ngīne, kéchéé éche rīhōbēé-ē éewóó'ē ngīne ké póg.

¹¹ Bad ābe bēhōbe nē bēbīi nēn bán kéchéé éche rītélé á kálag, nzé meésē ne nyé, mēbel chō nzé ndé ne nyé.

¹² Sééhēlēē-se sēhōb mbēd bán sēhāgtan yāl, ké'ē sé bán sēdé nyaa póg ne bad ābe bēhōbe' mekan mé bwām āyāl echáb. Bon ngāne bēn ne bēn bēhāgtannē yāl, bēhōbē-ē bán bēn ne bēn bētómnē, bédé eyókél.

¹³ Bon sé pēn séékūmēē ekāá á tāl tómaa ngāne sétāngēné akum. Hōm áde Dyōb ālómé sé aá sēbel nsōn dōó sēbēēnēé kúmbe. Nsōn nīme sēbeleé átīnté echēn mómpē rídé nsōn nīme sēbēēnēé kúmbe.

¹⁴ Séékūmēē ekáá á tâl ábel nsón hóm áde Dyöb dénkênlómme sé nsón ábel. Sé-'aá sêbédé bad bé'sō ábid nchabnede áhye dé akale nyé nkalanj ní bwám míme Krístā.

¹⁵ Séékūmēē ekáá á tâl tómaa ngáne sêtánjéné akum, nédé séékūmēē ekáá á tâl áyāl e nsón míme bad bémpee bébélé. Bonj pen sésomé nlém nén bán ngáne áden adúbe ákwogéé, nê dōo nsón míme sébéléé mékwogéé bwámbwam mebwóg míme sébéléé nsón.

¹⁶ Nén débēl séékág mebwóg mémpēe míme méchábnédé, sékale' Nkalanj ní bwám, ésebán sêkume' ekáá á tâl áyāle nsón míme bad bémpee bébélé mebwóg mémpēe.

¹⁷ Eténlédé á kálag e Dyöb nén bán, "Kénzéé awé akume' ekáá á tâl, atánjéné akum ekáá á tâl, áyāle chóm éche Sánjwéé ábénlé mós."

¹⁸ Saké ahób áde mod áhóbéé yāl mekan mé bwám á yāl dōo álúmtē' bán akōbnédé nēē mbapēe a nlómag, bonj mod á mbále awé Dyöb áhóbéé mekan mé bwám á yāl mós adé mod awé akōbnédé.

11

Paale ne bembapēe bé nlómag bé metóm

¹ Ncháa nyé nén mēé nyémwēe rílaa nyé mwá a akan ké nnyínnéd ké eyóké. Nyébán metúu.

² Nsiide' nyé nyaa echē Dyöb áhele ásíí nyé. Nyédíi nēngáne ngon e mmwaad echē eebíí mwenchóm. Ane mmwaad mós ríhóbé mēé mod nhóg áwōj, ane mod adii-'e Yesu Krístā.

³ Bonj ké nē, ndé mbwóg nén mēé ngáne Satane ámpoŋgé Ife nló áte ne míme mwane, melemlen nē dōo bépoŋgé nyémpēe nló áte nyaa echē nyéesummé mímen nlém rísyāal ámpē wēe Yesu Krístā nyébeléé-'e mós ne nlém rísyāal.

⁴ Nhóbe nén áyāle nzé mod apedé bonj akánlé nyé nkalanj míme méesē nkalanj míme Yesue míme sēnkaleé nyé, nyébelé nyésēbēn mós tâl. Ké'ε nzé akánlé nyé tǎngene edáádāŋ éche éesē edáádāŋ éche sēnkaleé nyé, nyébelé nyékob. Ké-'ε nzé mod akánlé nyé nkalanj ní bwám míme méesē nkalanj ní bwám míme sékánlé nyé, nyébelé nyékōbēn mós mekáá mébe.

⁵ Meedúbpēé mēé ábén bad ábe béchágé yāl bán bédé bembapēe bé nlómag bémbáá bétómé me áyāl e nsón míme bébéléé, nzé nhágténé syāábō.

⁶ Nhele se meebyéé' dyam ahób áftínté e bad ngáne béhóbéé, bonj nwóó nsōŋten tǎngene dyam áde ríhóbéé. Sékélūméd nyé nímén mekan áte híin míme sébéléé.

⁷ Ade ríkánlé'áá nyé nkalanj ní bwám míme ríhúú ne Dyöb, menkēnhóbpē mēé nyésábe me. Mensudéd echem yāl ábel bonj nyéwōŋ edúbé. Ade mémbenlé nén, dyam dé mbéb dōo mémbenlé-yē?

⁸ Mbēnlé'áá nyé, mwembé mémpēe mēsábpē me, né-ōó, ébédéé byánán ndoge' níme mwembé áwōŋgen nyé.

⁹ Ade mémbēē-'e ne nyé donge á pónde meewóo'áá chómchóm bonj meétagte'áá nyé, áyāle kéchéé éche méntōgnēnnē ábēm baányanj bé Krísto ábe bémbíd á Masdonia bébágé'áá me. Ngáne ménkēntagédte nyé ngen e'só, méetagéd-taá nyé pónde ké póg.

¹⁰ Ngáne ríkaleé mbále nēē mod á Krísto, modmod á mbwóg e Akaya eéhelēē-se ábel se nsóg ekáá akum á tâl akob áde méekobéé nsábe áwēn.

¹¹ Nyéwémténé bán ahób áde ríhóbé mēé méetagédte nyé ákob chóm áwēn ádii áyāle méedāé nyé-yē? Dyöb ábíí áá ndáó nyé.

¹² Adén akan áde mbelée bɔɔb, mēbē mbelē dɔ, ábel bonj méēbāgē bembapēe bé nlomag bé metóm etál áwón nẏm ákum ekáá á tâl áhób nén bán bébele nsón melemlem ngáne sémpē sébelée.

¹³ Echē ndin é bad éche ékume' ekáá á tâl, bédii bembapēe bé nlomag bé metóm. Bédoge bad áyál e nsón nime bébelée, alúmed áde bélúmtéé yál byánán bédii bembapēe bé nlomag ábe Krístəə.

¹⁴ Nén déékōmtēē me yál áte, áyāle nén ké Satane mómpe alúmté yál byánán adii ángel e Dyōb echē esáá.

¹⁵ Né-ɔɔ, éesaa me menyáké nzé bembalede ábe Satane bómpe bélúmté yál byánán bédii bembalede ábe béyágte' bad ábel mekan nime métāngéné ngáne Dyōb áhedeé. Káōñne á asóg, nkógsen nime békudté métāngēn nímāb mbeltéd.

*Metake nime Paale akúde
néē Mbapēe a nlomag*

¹⁶ Nhóbe ámpē nén meé, modmod eewémtán aá ndé eyóké. Bonj nzé nyéwémténé bán ndé eyóké, nyéwóg-kɔɔ chóm éche rilāngéé nyé ábel bonj mémpē nkum ekáá á tâl mwāmpín.

¹⁷ Kéchée éche rihóbe bɔɔb éesaa chóm éche Sāngwéé áhóbé aá rihób. Nzé nkume' ekáá á tâl áhób kéchéde bɔɔb, né nhóbe nēngáne eyóké é mod.

¹⁸ Ngáne edii bán bad hiin békume ekáá á tâl néē bad bé nkōñsé, mémpē mēbēl melemlem.

¹⁹ Nyébēn nyéhóbeé bán debyéé dēn-éé nyékúde, nē ábélé nyékobe ne menyinje kéchéé éche e'yóké é' bad éhóbeé.

²⁰ Ké mod átímté' nyé nēngáne ntān, ké ádyāg nyé bwēm áyál, ké' é ádogé nyé, ké' é áchāgtē yál ámín, ké' é ábóm nyé abén á'sō, nyékobe mós.

²¹ Akwágké ákóbe me nén, sēnkēnwóngé ene ndin e nlém ábel nyé échē ndin é mekan á yál.

Nhóbe bɔɔb nēngáne eyóké é mod. Mēbē kúmbe, nkumé-'e ekáá á tâl áyál e mekan nime mbelée melemlem nēngáne bembapēe bé nlomag bé metóm bébelée.

²² Belāngé nyé bán bédii bad bé Hibru bēn, mémpē ndii mod a Hibru. Béhóbé bán bédii bad bé Israēl, mod a Israēl mós mémpē ridii. Béhóbe bán bédii bad bé mbyaa nime Abrahamē, mod a mbyaa nime Abrahamē mós mémpē ridii.

²³ Béhóbé bán bédii bembalede ábe Yesu Krístəə, mémpē nlānge nyé meé mbelé nsón tómaa bó. Nhóbe' bɔɔb nēngáne mod awé nló méesaa' é áte. Mbelé ntú rí ngine tómaa bó, nkénké á mbwog ngen ne ngen tómaa bó, nkénkūd mbéte é ngine tómaa bó, nkēmbē-'e á nsāl rí sonj ngen ne ngen tómaa bó.

²⁴ Bad bé Israēl békébōm me e'tāngú móom meláan ne abog, ngen étáan.

²⁵ Bad bé Roma békébōmén me ntón ngen eláán. Ngen póg bad bēmpēe békébōmén me meláá káōñ bēpōn me awúu. Stíma ékékunnéd sé á edib é nkwe-te ngen eláán. Póndé póg nhóó'áá á edib é nkwe, nén dēmbenléd áyál e epun ehāg esyāāl, nkuu ne mūte. ²⁶ Nkénké meke bwāmbwam. A meke-té wē, e'dib é kēpōn me ahóod. Mponé alongé abód á mekáá mé bechib, á mekáá nime ábēm bad bé Israēl ne á mekáá nime bad ábe béesé bad bé Israēl. Mponé alongé abód á dyad á mbáá, nīpōn alongé abód á ehyanje, nīpōn alongé abód á edib é nkwe te, nīpōn-ne alongé abód á mekáá mé bad ábe béhóbe bán bédé bad bé Krísto áde béesaa.

²⁷ Mbelé ntú rí ngine, nnāngé epin ngen ne ngen. Donje á póndé meewóo'áá chóm éche ndiyákké ké' é ké chóm éche nīmwágkē, meeyógkē'áá-'e póndé awón ádyé ndyééd. Donje á póndé ahéb ábágáá me á yál bwāmbwam meewóo'áá-'e chóm éche rihágkē á yál.

²⁸ Amin e nímén mésyāāl, nwóó nímé nlém áte mbwε-té ânôn mwembé nisyāāl níme ndé áse echém bwám.

²⁹ Nzé mod eewúu áte áyāl e mekan mé Dyöb, mbélé nwóg yāl áte melemlem ngáne móm̄pé áwógεé. Nzé bébélte mod mbéb, mbélé nwóg ndutul bwámbwam.

³⁰ Nzé rítán̄géné ekáá akum á tâl, né chöm éche rítán̄géné ekáá akumén á tâl édií mekan níme mbéle' bonj bad bényín me n̄ngáne mod awé eewóo ngíne.

³¹ Dyöb, Sáá awé Sán̄gú Yesuε, abíí áá meékāl̄ε metóm. Mekenag mébê ne mós á ngíndé ne á ngíndé.

³² Ade mbédé á dyad á Damaskos, nkamlεne awé ambé áse e k̄n̄ Aretase ambané s̄anze ânôn nsal mé e'ké ní dyad nisyāāl ábel bonj békòb me.

³³ Bad bēnhē me á elón-tē, bébidéd me á wíndε eché ebédé á eséd éche enl̄n̄néd dyad, bésudéd me á ndoob, d̄oo rinyágté bonj r̄k̄ε'ε.

12

Dyöb álúmté Paale mekan á ndóg-te

¹ Mēbē níkumé ekáá á tâl. Kén̄ε édií bán nē déewōngān̄nē. Bonj mēkē á'só aláa nyé t̄n̄gεne ndóg éche rinyíné ne mekan níme Sán̄gwéé álúmté me.

² Mbíí dyam áde dēmbenléd ne mod awé adúbpé Kr̄st̄əə nhóg. Dyóm á mwé ne r̄niin áde átómé ámbíd, Dyöb d̄ensog mós ák̄ε̄n̄ mós ádyöb á ndágke eché etómténé achab amín. Meebíí'é ké ank̄é áwed á ekob é yāl ké'ε á edáád̄n̄, Dyöb d̄oo abíí.

³ Mbíí-'ε chöm éche ébénlédé ane mod áwed, kén̄ε méébíí'ε ké á ekob é yāl d̄oo ábédé ké'ε á edáád̄n̄, Dyöb d̄oo abíí.

⁴ Kr̄st̄əə ansog mós, ák̄ε̄n̄ mós á Paradis. Ahed Dyöb dénlāā mós mekan níme éemwagkē áá moonyon̄ a ekob é yāl áh̄b̄ wéε bad bémp̄e.

⁵ Ayāl é ene ndín e mod d̄oo mékummé ekáá á tâl saké áyāl echém ch̄n̄. Chöm éche mékumén̄né ekáá á tâl édií mekan níme mélúmté' bán nwóó yāl e moonyon̄.

⁶ Bonj ké mend̄n̄ ké ekáá akum á tâl, méenyínédte n̄ε eyókél é mod áyale mbále ch̄oo mékanlé. Méekumén̄né éché ndín é mekan ekáá á tâl ábel bonj nyéebágé me edubé áyale éché ndín é mekan. Bonj pen ndoob meé nyétéd me ngáne ndíí áyāl e mekan níme mbéleé ne níme r̄'yágtéé nyé.

⁷ Bonj ábel bonj meebág kúmbe áyāl e nímé mekan mé menyáké níme Dyöb álúmté me, bonj áb̄l-le nwóg, Dyöb dēmb̄l̄ áá r̄wón̄ nkole á yāl níme mbélé'áá me r̄wógé e'wε bwámbwam. Mm̄n̄ nkole mbéd̄ε n̄ε mes̄enze níme Satane álómé átaged me ábel bonj meebág kúmbe.

⁸ Nkán̄né wéε Sán̄gwéé ngen éláán, r̄cháā mós meé ákoben me nímén metake.

⁹ Bonj chöm éche ánlāā'ε me ébéd̄εé áá, "Nsimé níme mbágé wε níkwógé wε. Nwédé wε áte nyaa eché étóm̄εé metake mésyāāl áte níme éwóó. Áyāl é pónéd eché ngíne éébagkē mod áte d̄oo echem ngíne éwōngān̄é mós áwéd mós áte." B̄oob-p̄oó, méb̄e menyin̄ge akum ekáá á tâl áyāl e mekan níme mélúmté' bán ndíí moonyon̄ a ekob, ábel bonj bad bényín n̄n bán ngíne eché Kr̄st̄əə édé me áte, ch̄o'-áá ewéde me áte.

¹⁰ Né-óó, á yāl e Kr̄sto, mbélé mbé menyin̄ge ké áde méewúu'ε áte, ké áde bad bésyáá'ε me, ké áde mekan mél̄n̄lédé me áte, ké áde bad b̄etagt̄éé me ké'ε áde ndíí á ndutul tē. Nh̄be n̄n̄ áyale pónéd ké ehéé áde méewóo'ε ngíne, Kr̄st̄əə abelé áb̄ε me ngíne.

Paale atōhtan mwembé níme ndé á Kōrinto

¹¹ Nh̄be n̄ε eyókél é mod bonj nyéé nyék̄əə bonj r̄h̄b̄é n̄. Nyēmbé n̄ε nyéh̄b̄éé me mekan mé bwám áyāl. Ké émb̄ε bán meésáá dyam, bonj pen

bad ábe nyéchééé bán bembapεε bé nlómag bémbáá, béētōméé με άýāl e chōmchōm.

¹² Ade mbédé ne nyé, menwesén álúmed nyé e'chemléd ne ábel menyáké mé ngíne álúmed nén bán ndii mbapεε a nlómag awé Dyōb álómé.

¹³ Etōméé abele áde mbénlé nyé boη meékwentane meé nyésábe με, nyéláa με nyaa empée eché rítédé bad bé mwembé míminí μεé bédé με etógnén tómaa nyé. Nzé édé nén bán nē ádé awusé, nyélagšen με.

¹⁴ Bōob ndé mboηsén ápe áwēn ngen éche élónténé élaán boη pen méetagédte nyé. Méépagké ábel boη nyébage με bwēm boη nyébēn-εé nyékāá boη mpag. Nyétāngéné abii nén bán besáá ne benyaá bé bán bōo bétāngéné ábab bán atōgen saké bán bétāgné benyaá ne besáá.

¹⁵ Mēbē menyinge ábenled kéchéé éche níwóó káōηne ýāl echēm, áwōηgen nyé. Nzé ndāá nyé bwāmbwam, néde nyémpē nyéetāngeneé με adāη bwāmbwam-ε?

¹⁶ Nyébēn nyébii nén bán menkēntagédte nyé, boη mod ampée ahóbé áá membé akwáb, rídogné-ε nyé metóm.

¹⁷ Chán méndogké nyé? Bad ábe ménlōmmē áwēn menláá bō méε bédog nyé-ye?

¹⁸ Menchán Tituse μεé ápe áwēn, nlómén-ne mó anínii mwānned á Krísto. Néde nyéēhāb bán áde Tituse ápedé áwēn, andog nyé-ye? Eesaá mbále nén bán sé Titus séwóó mewēmten mehóg-ε?

¹⁹ Kapóg enén pónde esýāál nyéwēmtan bán sēhede éched ýāl nzom asuud ahób áde séhóbéé bán sékánlé nyé mbále. Eesaá nē, kéchéé éche sélāngéé nyé sélānge nyé chó néε bad ábe Krístāá ályágtéé, Dyōb-pe áwóge' chōm éche séhóbéé. A-baānyan bé edānge, kéchéé éche sébeleé, sébele chó áwéd nyé áte.

²⁰ Mbáa' nén meé áde mépéé áwēn métan néε nyébeleé mekan míme méedāá'ε, με-ε ámpē mēbel mekan míme nyéedāngé. Mbáa' nén μεé áde mépéé, métan ngáne nyébēn ne bēn nyésēnléé, nyésiideé nhóg ne anínii, nyéliηneé nhóg ne anínii, néε nyéedāá'ε bán mod ampée awōη edubé, néε nyésyāηneé, nyéhóbéé nhóg ne anínii ámbíd, néε nyédíi kúmbe, néε nyébeleé-ε mam mé epuuté.

²¹ Mbáa' nén μεé áde mépéé áwēn ámpē, Dyōb déwōgēd με e'són áwēn é'sō. Mēsudén-ne áýāle bad híin áfínté echēn bédíi bébele' mekan mé mbéb míme bébélé'áá bōób, ésebān béhāηlan ádab abé dé mbéb ábel ngáne Dyōb áhedéé. Bébele' mekan mé mbinde, békábe mesón, bébele-ε mekan míme mbinde míme méwógte bō e'són.

13

Paale abagé elébé é asóg

¹ Nén délōntēn ngen élaán áde mpagké áwēn. Eténlédé á kálag e Dyōb nén bán, "Nzé békáadte mod bétāngéné awóg wée mbōη ébe ké'ε élaán."

² Ade mémpéé áwēn ngen éche énlōntēn ébe, menláá nyé μεé mékōgsēn bad ábe bébele' mbéb áfínté echēn. Ndii nlānge-ε bō bōob, nlānge-ε bad bēmpēe ábe bōmpē bébele' mbéb, ké bōob áde méesaá ne nyé. Ade mépéé ámpē, méewógté modmod ngāl.

³ Ene pónde dāo nyébii'ε bán kéchéé éche níhóbéé éhúú ne Krístāá. Eesaá nén bán Krístāá eewúu'ε áte áýāl e chōm esýāāl eche ábeleé, boη álúmtē' eche ngíne áfínté echēn.

⁴ Édé mbále nén bán Krístāá nēηgáne moonyōη, enkēnwōngé ngíne áde bēmboméé mó á awōg. Boη kénē, adé á alongé bōob, áýāle Dyōb dēmbēnléd eche ngíne ábane mó á alongé ámpē. Abé áde sédíi mod nhóg ne Krístāá,

sémpē nēngāne baányon séewúú' é áte. Bon sémpē séēbē á alongé ne Krístəá á ngine e Dyōb, sébēle-'ε nyé chōm ésyāā́l éche sétāngéné nyé abele.

⁵ Nyé mod téé mwēn átōj yāl asimēn, ábii ké alongé ádēn ádé nēngāne alongé á bad ábe bédúbpé. Ndúbpé meé nyé mod téé abii nēn aá Yesu Krístəá adé mó áte. Nzé nyé mod téé asimné yāl né nyéēbī́i nēn bán á mbále nyédé ne Krístəá.

⁶ Ndúbpé meé nyéchemé nēn bán nsón míme sébēléé rílumte nēn bán sēdii bembapēé bé nlomag bé mbále.

⁷ Sékánne Dyōb nēn bán nyéēbḗlē' awusé ké ahóg. Séekánnéé nē abel bon bad bényín bán sēdii bembapēé bé nlomag ábe bébele míma nsón bwám. Bon pen, sékánne' nēn bán, nyébele mekan nyaa echē etāngéné kénéé édii bán donge á bad béhōb bán séelumtéé chōmchōm éche élumte' bán sēdii bembapēé bé nlomag ábe bébele nsón bwám.

⁸ Edé nēn áyāle séehḗlḗ-ε sébḗl dyamdyam áde átāngan nkalanj mí bwám ní mbále. Bon pen chōm éche sébēléé édii áwōngēn bad ábii ne ábel ngáne nkalanj ní bwám ríhóbéé.

⁹ Sébēlé sébé menyiŋge nzé sēnyiné nyébele mekan míme mélumte nēn bán adúbe áwúú nyé áte, ké sépen sēnyinnéd bán séewúú' é áte áyāle séenyinéé nzōm ké póg ákōgsēn nyé. Sékánne' nēn bán Dyōb áwōngēn nyé mímen mbeltéd mbé bwám ne abé dēn.

¹⁰ Nēn dōó ákós bon rítelé' mímén mekan, kénéé édii bán meésaá ne nyé. Ntenle nyé ábel bon nzé mpedé áwēn meébēnlād ngine eche Sāngwéé ábágé me ákáne nyé áte. Kunze eche Sāngwéé ábágé me edii ábel bon ríwōngēn nyé áwéd nyé áte saké ábel bon ríbenled chó ásudēd nyé.

Melēntēn mé asóg

¹¹ Asóged enén kálag, a-baányan, nyébē menyiŋge. Nlānge nyé meé nyéhəŋlən, ádēn abé ábē bwám ne abé dēn. Nhede meé nyéwōg échēm elébé. Nyéwōj mewēmtēn mehóg. Nyébē nsan ne nhóg ne aníníí. Nzé nyébēlé mímén mekan mésyāā́l, Dyōb áde ábēlé bon nyédəən, nyébē-'ε nsan ne nhóg ne aníníí, dénaméd nyé.

¹² Nyéhē nhóg ne aníníí tál á dīn á Yesu. Bad bé Dyōb bésyāā́l bəlómme nyé melēntēn.

¹³ Nkánne' nēn meé nsimé míme Sāngú Yesu Krístəá, edənge é Dyōb, ne nlatén míme Edəádəj éche Esáá épeeneé, bébē ne nyé.

Kálag echë Paalε áténlé Baá Galesia Ndibned ní kálag

Békálé'áá nkalaj ní bwám tãngene Yesue áfinté e bad ábe béese bad bé Israel, bad bènköb-pe mó. Atote démbid áyāl e mímén nkalaj áde áhóbe ké mod atãngéné mbéndé e Mosεε ahíd ábel boj ákonj mod a Krísto abé. Paale alúmté áte nén aá chöm éche ékää' boj mod ákud alongé áde Krístæ ábagéé édíi adúbe áde áwóó. Boj áfinté e mwembé níme mbédé a dyad á Galesia, dyad á mbwóg e Roma e Asia Mainæ, bad bébédé ábe bétãngánáá ayáge áde Paale, béhõbë nén bán mod atãngéné ahíd mbéndé e Mosεε ábel boj ákobned á'sõ é' Dyõb.

Kálag echë Paalε áténlé mwembé ní Galesia ebédé ábel boj bad ábe béhídé áá adúbe áde déetãngene bétim ámbid béhíde adúbe á mbále.

Paale aboótédé enén kálag álumed bad áte kunze echë áwóó ábë mbapεε a nlómag awë Yesu Krístæ. Alúmté áte nén aá abé áde módíi mbapεε a nlómag áhúu ne Dyõb saké ne moonyoj. Alúmté-ε áte nén aá níme nsõn menkoj abé ábel nsõn áfinté e bad bé Israel. Ahóbe-ε ámpé nén aá adúbe démpen dóó ákää' boj bad békobnéd á'sõ é' Dyõb. Asóged enén kálag, Paale alúmté áte nén aá abé á mod a Krísto ákag ne edãnge éche ehúu mó á nlem té, adúbe áde adúbpé Krístæ.

Nkabtéð ní kálag

Ndibned ní kálag 1.1-10

Kunze echë Paale áwóó ábë mbapεε a nlómag 1.11-2.21

Nkalaj ní bwám mé nsimé ní Dyõb 3.1-4.31

Kunze e mod a Krísto ne chöm éche atãngéné ábel 5.1-6.10

Nsõgten 6.11-18

Paale alómé melenten

¹ Me Paale, mbapεε a nlómag nhóg, me-εé ntelé enén kálag. Saké baányonj bépwédé me ábë mbapεε a nlómag. Meébenlád-taá kunze e moonyoj. Boj nímem mpwédédé níhúu ne Yesu Krístæ bó Dyõb Titée, awë apuúdté mó.

² Mmèn ne bad bé Krísto bésyāl ábe bédé ne me hén, sélómme' mwembé rýsýāl níme níde á Galesia melenten.

³ Nsimé ne nsanj ní Dyõb Titée awêð bó Sãngú Yesu Krístæ mbê ne nyé.

⁴ Nyébíi bán Yesu Krístæ abagé eche yál awé áyāl e nímed mbéb ábel boj áhúd syáné á mbeltéd mé mbéb níme níde á nkõjsé-te chii. Abelé nê áyāle nê dóó Dyõb Titée ántfi'é.

⁵ Mekenag mébê ne Dyõb á ngíndé ne á ngíndé. Ebê nê.

Nkalaj ní bwám mémpée méesað

⁶ Dyõb ápwédé nyé ábë ábë bad ámbid e nsimé níme Yesu Krístæ ábénlé nyé. Boj éde me e'kõmten é' yál-áte ányín nén bán nyéwámséné Dyõb atede, nyéhíde ayáge démpée áde nyéwémtené bán áde nkalaj ní bwám.

⁷ Nkalaj ní bwám mémpée méesaá. Baahóg bédé ábe bépuutad nyé. Béhede nkalaj ní bwám níme Yesu Krístæ ahãjlen.

⁸ Boj níláa nyé nén níme, nzé ké sé, ké'ε ángel ehúu ádyõb boj ekánlé nyé nkalaj ní bwám níme níde nhãjlen ne níme sênkaléé nyé, e'dim é'bê ne mó.

⁹ Sémnáð nyé aláa, nlãnge-ε nyémpé meé, kenzéé awë akánlé nyé nkalaj ní bwám níme níde nhãjlen ne níme sênkaléé nyé, boj nyékõb-pe, e'dim é'bê ne ane mod.

¹⁰ Ngáne ríhóbéé nén, nyéewémtán nén bán nhede' meé baányonj béchæge' me đin á bwám. Meéhedéé nê. Dyöb dáo ríhedeé meé áchæge' me đin á bwám. Nzé émbé nén bán ndii nhede meé baányonj béchæge' me đin á bwám, né meésaá mbáledé awé Krístæ.

Nkalañ níme Paale ríhúú ne Krístæ

¹¹ A-baányan, nhede' meé nyébbii nén bán nkalañ ní bwám níme ríkánlé nyé, meéhúú' é ne moonyonj.

¹² Moonyonj ké nhóg eelângeé me rímé nkalañ, modmod eeyágte' áa me. Bonj Yesu Krístæ mwên máo alúmté me rímé mekan áte.

¹³ Nyéwógé ngáne ádem alongé démbéé ngen e'só áde ríhídé' áa mbeltéd ní bad bé Israel. Nyéwógé nén bán ntagté' áa bad bé Krísto ne nhel rísyáál. Nhede' áa meé rímad bó moosyáál.

¹⁴ Nhídé' áa ayóge á bad bé Israel tómaa béd bésyáál ábe syáábōō sēbédé kōd. Menwōñ-é kán áte bwāmbwam áhid elem éche ábēd betaa.

¹⁵ Bonj kénéé ébédé nê, Dyöb démmād me apwēd né béēchyáá' é me. Anchélé me ne rímé nsimé, ábele mó.

¹⁶ Anlúmed me awe Mwān ábel bonj ríkanle bad ábe béesē bad bé Israel nkalañ ní bwám níme ane Mwān. Ade ábélé nê, menkēntánné modmod meé áyáged me dyam áde rítāngéné ábel.

¹⁷ Bonj ábwōg-ábwōg menkē á mbwōg e Arebia. Ambíd e pōndé, mentīm ámbíd á dyad á Damaskos. Menkēnkaá'-áa ké á Jerusalem áke dényín bad ábe bénsēbē bembapēé bé nlómag abé.

¹⁸ Ambíd e mwē rílaán dáo nkí á Jerusalem ányín Petro.* Membé ne mó áwed dyóm dé e'pun ne é'taan.

¹⁹ Menkēnyínné mbapēé a nlómag ampée ké nhóg ésebē Jemse, Sāngú Yesue mwānyan.

²⁰ Mam níme rítenléé nyé médé mbále. Dyöb ábíí áa saké metóm mó ríkaléé.

²¹ Ade ríhúú á Jerusalem, menkē á mbwōg e Siria ne á mbwōg e Silisia.

²² Ene pōndé né bad bé Krísto bé mwembé mé myad mé mbwōg e Judeya bébbí' é me.

²³ Béwógé' áa wógén bán, "mod awé ahágé' áa bad bé Krísto á meséb mwên atimé bōōb akanle bad áa bad bédúbe Yesu Krístæ, melemlen mé adúbe níme áhéde' áa abóded."

²⁴ Dyam áde Dyöb ábénlé me démbēl békéné' áa Dyöb.

2

Bembapēé bé nlómag ábinií béchéme nsón níme Paale

¹ Ambíd e dyóm á mwē ne ríniin, menkē á Jerusalem ámpē. Ene pōndé menkē áwed ne Banabase, menwálé-é Tituse áyál.

² Menkē áwed áyāle Dyöb dénhōb áa ríke. Ade ríbéde áwed, syáābe belyáged bé mwembé sēnkē kun. Mentánléd bó nkalañ ní bwám níme ménkaléé bad ábe béesē bad bé Israel. Membel nê ábán nén nsón níme ríbbélé, ne níme rídií mbele', méēbōō' ngén.

³ Bēnkōb dyam áde ménlāá' é bó. Ké Tituse awé ambé mod a alonj á Grikia awé abédé ne me, bēnkēnyágédté mó nén bán bétāngéné mó ayag.

⁴ Kénê, donje á bad bé metóm ábe bénsāl áfínté e bad bé Krísto byánán bómpē bédé bad bé Krísto béhéde' áa bán béyag mó. Abé bad bénsāl áfínté echéd á mesōom-té ábel bényín ngáne débēléé mekan ne kunze esyáál áyāle

* **1:18 Petro:** Kálag é'só éwóó *Sepace*. Adé đin ádii melemlen née Petro.

syánē dedé ne Yesue. Béhédé'áá bán débê betān, déhíde' mbéndé e bad bé Israel.

⁵Boñ sēnkēnháá bó etál ké mwāmpīn, áyāle sēhedé'áá nēn bán nyébē nyébbi ngāne mbāle e nkalanj mí bwām ékóó abé.

⁶Bad-te ámpē ábe bebédé áhed néε belyáged bé mwembé, bēnkēnwóngé dyamdyam ábád ámīn e mam nīme ní'yágté. Ké né-'ε, abé áde bēmbēε belyáged dénkēnwóngé dyamdyam abel ne me áyāle moosyáál adii nyaa póg á'só é' Dyöb.

⁷Boñ bēntim anyín nēn bán Dyöb ábágé me ekag ákale bad ábe béesē bad bé Israel nkalanj mí bwām.

⁸Edé nēn bán, Dyöb adé ápwédé Petro ábe mbapεε a nlomag wée bad bé Israel, dó-'áá ápwédé mémpē ábē mbapεε a nlomag wée bad ábe béesē bad bé Israel.

⁹Ade Jemse, Petro ne Jone ábe bad bēmbī'í néε mekon mé mwembé bēnyínē bán Dyöb ábágé me nīme nsimé ábē mbapεε a nlomag, bēnhē sé Banabase ekáá-áte, álúmed nēn bán békóbé sé néε bad ábe bóbōō bebele' nsōn nhóg. Syáábōō sēntīi nēn bán, sēbē sékanle bad ábe béesē bad bé Israel nkalanj mí bwām, bō-'ε bebē bēkanle bad bé Israel.

¹⁰Bēnlāá sé pēn bán, sééchatán betotókē bé bad awōngēn. Nē dó-'áá ábédé dyam áde mēndəj' é abel bwāmbwam.

Paale akánné Petro áte á dyad á Antyog

¹¹Ade Petro ápédé á Antyog, menkáné mó áte áfinté e bad áyāle abel'áá dyam áde déebo.

¹²Ade ápédé áwed pēn, ammentén ndyééd adyé ne bad bé Krīsto ábe béesē bad bé Israel. Boñ áde donge á bad bé Israel bebíde wée Jemse á Jerusalem boñ bēpe á Antyog, Petro ambootéd mekuu adol ámbíd. Eedyáge'áá ndyééd ámpē ne ábē bad ábe béesē bad bé Israel. Ambel nē áyāle abáá'áá epepé é bad ábe bēhóbé'áá bán betāngénē bad ábe béesē bad bé Israel ayag.

¹³Nē dēmbēl bad bé Israel ábe bēmbē bad bé Krīsto bōmpē bēmbootéd mekuu adol ámbíd. Kósōne Banabase mómpē anhíd bó ábel áde awusé.

¹⁴Ade nīnyínē nēn meε béebelēε mam ngāne nkalanj mí bwām rīhóbé áá bēbel, menlāá Petro á'sō wée bó moosyáál meε, "Kénēε édīi mod a Israel, etédte mbeltéd mí bad bé Israel, ebele mam bōob néε bad ábe béesē bad bé Israel. Chán-nō éhele ényágté' bad ábe béesē bad bé Israel áhíd mbeltéd mí bad bé Israel?"

¹⁵Sóo bēn awé dedé bán bé Israel se á nchyaátén, deesaá néε bad ábe béesē bad bé Israel ábe débīi nēn bán bebēbbī'í mbéndé é Dyöb.

¹⁶Boñ kēnē, debīi nēn bán Dyöb déekobéé mod néε mod awé asaá áyāle áhídeε mbéndé. Adúbe áde mod adúbpé Yesu Krīstəá dōō ábele' boñ Dyöb ákob mod. Né-ōó ké syánē ámpē dedúbpé Yesu Krīstəá ábel boñ Dyöb ákob syánē áyāle adúbe áde dedúbpé Yesue saké áyāle déhíde mbéndé. Dyöb déekobéé modmod áyāle áhídeε mbéndé.

¹⁷Áhed áde déhedéé bán désān á'só é' Dyöb áyāle adúbe áde dedúbpé Krīstəá, ábele donge á bad bé Israel bēnyínē' syánē néε bebel bé mbéb áyāle deehídeε mbéndé é bad bé Israel ámpē. Nédé élúmte' bán Krīstəá mó abelte' syánē mbéb-ε? Aáy, nē déehelēé-se ábē.

¹⁸Boñ nzé ntimé ámbíd ámpē boñ nhíde' mbéndé éche mēmmdaté atede, né nkwedé mbéndé.

¹⁹Nzé bēhíde mbéndé chó ne chó, né nwédé. Né mbéndé chēn-naá ewúú me. Boñ Yesu Krīstəá anhúd me á mbéndé-te, ábel rīhel Dyöb ábele.

²⁰Awé áde Yesue ánwēε á awōg áde nēn bán mémpē menwé. Meesaá á alongé ámpē. Krīstəá mó adé me áte. Né-ōó, kéchéé éche mbelēé á nkōjsé-te

wén bɔɔb, mbele' chɔ ne adúbe áde rídúbpé Mwän a Dyɔb awě adə́ me, boŋ awě-'e á nló nímēm.

²¹ Meesaá nhóg awě ahele ahób nén aá nsimé rí Dyɔb méesaá dyamdyam. Ayāle nén, nzé émbē nén bán Dyɔb áhelese ákɔb mod áyāle ahídé mbéndé, néde né Yesue awédé á awɔg ngên.

3

Mbéndé káa adúbe

¹ E'yókél é' bad bé Galesia. Nlem áhéé adyéde nyé nén? Nyéekamtánne ngáne ménlümédte nyé áte nén meé, Yesue awédé á awɔg á nló nime nyé moosyā́l-'e?

² Ndə́ meé n̄sɛded nyé dyam ahóg. Póndé eché nyékúde Edə́ɔdɔŋ éche Esáá, áyāle nyéhíde'áá mbéndé e bad bé Israel dɔɔ nyénkudte chɔ-'ye? Ngé áyāle nyéndúbēē nkaŋɔŋ ní bwám nime nyénwɔgkē?

³ Chán nyédíí eyókél nén? Néé nyémáá abooted dé abel ngáne Edə́ɔdɔŋ é Dyɔb éhedéé, mbeltéd nímēn ríhedé atim á asóg hén bɔɔb ngáne mewémten mé baányoŋ ríhedé-'ye?

⁴ Nyékúde metake áde nyédúbpé Krístə́ə. Néde nímē metake méde ngên-'e?

⁵ Dyɔb dēmbē nyé Edə́ɔdɔŋ éche Esáá, ábēl-'le menyáke átínté echēn. Ayāle nyéhíde'áá mbéndé dɔɔ dēnkɔŋ boŋ ábelé né-'ye? Aáy, saké nē dēnkɔŋ. Nkaŋɔŋ ní bwám nime nyéndúbēē mɔɔ mēnkɔŋ boŋ ábel nē.

⁶ Nyénəne mod néé Abrahamé. Eténléde nén bán, “Andúbé Dyɔb. Nē dēmbēl, Dyɔb dēnkob mɔ néé mod awě asáá.”

⁷ Nyésɔŋten-nɔɔ nén bán bad bésyā́l ábe bédúbpé Dyɔb ngáne Abrahamé ándúbēē bɔɔ békóó bán ábe Abrahamé abé.

⁸ Eyale é Dyɔb énhɔb á'sɔ e' póndé nén bán Dyɔb dékɔb bad ábe béesē bad bé Israel néé ábē bad áyāle bédúbpé mɔ. Nén dēmbyēēn bootya póndé eché Dyɔb dénláá-'é Abrahamé aá, “Méenaméd meloŋ mé nkɔŋsé mésyā́l ámbíd echɔŋ.”

⁹ Né-ɔɔ Dyɔb dénaméd moosyā́l awě adúbpé mɔ melemlem ngáne ánnamédte Abrahamé.

¹⁰ Nyébii-'e nén bán e'dim é'dé ne baásyā́l ábe bébánné nlem nén bán ahíd á mbéndé dɔɔ débēl boŋ Dyɔb ákɔb bɔ. Eténléde á kálag e Dyɔb nén bán, “E'dim ne kénzéé awě eehídé' mbéndé ésyā́l éche éténléde á kálag e Dyɔb.”

¹¹ Bɔɔb-pɔɔ élúmte nén bán modmod eekobnádte á'sɔ e' Dyɔb áyāle ahídeé chɔm-'e mbéndé éhedéé. Nhóbe nē áyāle éténléde nén bán, “Bad ábe békóbnéde á'sɔ e' Dyɔb áyāle bédúbpé, békúd alongé áde déemaá'.”

¹² Mbéndé eewóó' é dyamdyam ábel ne adúbe. Eténléde á kálag e Dyɔb nén bán, “Nzé mod ahíde' mbéndé ákud alongé, atángéné mbéndé ésyā́l ahíd.”

¹³ Boŋ Krístə́ə ahúde syā́nē á e'dim ábe dékúde á mbéndé-te. Eténléde á kálag e Dyɔb nén bán, “E'dim ne kénzéé awe bébómmé á awɔg.” Né-ɔɔ, áde bébómmé Krístə́ə á awɔg, ampém e'dim áyāle mbēh nímēd.

¹⁴ Yesu Krístə́ə ampém e'dim ábel nén, bad ábe béesē bad bé Israel békud nnam nime Dyɔb dénhɔbpé aá, Abrahamé ákúd. Nē ákás adúbe áde dédúbpé mɔ, ábélé syā́nē ámpé dékúde Edə́ɔdɔŋ éche ánhɔbpé aá mɔɔbē syā́nē.

Mbéndé ne dyam áde Dyɔb dénhɔbpé áá mɔɔbēl

¹⁵ A-baányoŋ, ndə́ meé rítéd nhə́gtén ne mekan nime mébenlad epun tée. Nzé bad bébe bétéde n̄səl, boŋ bétíde dyam, bépéde-'e á nchemten, modmod éhēlē-sɛ ahúd dɔ áse.

16 Dyöb dëmbë Abrahamε ne mwän akag. Kálag e Dyöb eehóβεέ nén aá, “bán” byánán bad bébúú áte. Ehóβε nén aá “mwän.” Krístæ mó-’aá adé ane Mwän.

17 Chöm éche níkoó’é ahób édíi nén Dyöb démwē melë ne Abrahamε Dyöb ahób-pe aá móšlōnēd áde akag. Mbwókēl é mwē éniin ne móom mé mwē meláán, ámbíd e nē, dóo Dyöb ábágé Mosεε mbéndé. Echē mbéndé éehelēé-se ébóó nímé melë, se éhúd dyam áde Dyöb ahóbé áse.

18 Nzé émbē nén bán, Dyöb ábage’ nyé kéchéé éche átāngéné ábē bán abe áyāle nyéhídeé mbéndé, né nímé nnam níme ábageé nyé méesaá ámpē áyāle dyam áde ánhōbpē aá móšbelé Abrahamε.

19 Cheé-ō émbē nzōm echē Dyöb ábágné mbéndé? Ambë chό álúmed bad chōm-ēē abel dé mbéb ákóó abē. Ene mbéndé entāngén-ne abē kóān ne pónde eche mwän a mbyaa níme Abrahamε awē Dyöb dëmbéénné akag ántāngēnē ape. Dyöb dëmbë mbéndé wēε ángel ábe Mosεε. Mosεε mó abédé mod-a-tíntē a baányon ne Dyöb.

20 Bōōb-pōō mod-a-tíntē ahednad nzé bad bédé mbíd ébe. Bōn Dyöb dëmbë Abrahamε akag ne mó mwēn, áde mod-a-tíntē éesaá.

Nsón níme mbéndé éwóó

21 Nédé nén álúmtē bán mbéndé epentan akag á Dyöb-ε? Aáy, éesaá nē mbéd. Nzé émbē nén bán mbéndé embé echē ebage alongé áde déemaá’, né desáá á’sō é’ Dyöb ahíd áde déhídeé chό.

22 Bōn kálag e Dyöb ehóβε nén aá, mbéb níháá nkōn sé nísyāāl. Né-ōō nde echē Dyöb dénhōbpē aá móšbē, ábágé chό wēε bad ábe bédúbpé Yesu Krístæ.

23 A pónde eche Krístæ éépēdēē, mbéndé enhan syānē, dembé-’ε áse e mbéndé kóān ne á pónde eche Dyöb dénlūmēdtē nén aá bad bésūm nlém wēε Krístæ.

24 Né-ōō mbéndé chό enōné’áá sé kóān ne pónde eche Krístæ ápédé ábel nén Dyöb ákob sé áyāle adúbe áde sédúbpé Krístæ.

25 Bōōb áde pónde épédé echē détāngéné nlém asum wēε Krístæ, chōm éetāngēneé abē éche énone’ sémpē.

26 Nyé moosyāāl nyédii bán bé Dyöb áyāle adúbe áde nyédúbpé Yesu Krístæ.

27 Nyékudé edusen, né-ōō, nyédé mod nhóg bōōb ne Krístæ, nyéwóó-’ε kunze bōōb nēε mó.

28 Né-ōō nhānlén méesaá ken mod adé mod a Israel, ken mod éesaá mod a Israel, ken mod adé ntān ké’ε kunze, ken mmwaád-ε ké’ε mwēnchóm. Nyé moosyāāl nyédii mod nhóg áyāle nyédúbpé Yesu Krístæ.

29 Ngáne nyédíi bad bé Krísto, nyédii bán ábe Abrahamε, nyéékūd-te nnam níme Dyöb dénhōbpē aá móšbē Abrahamε.

4

1 Chōm-ēε níhóβεé édé nén, mwän awē sáá átíídé aá móšdyé eche mbwóg, nze adii adé mwēndem, abelé abē nēε mbālede, kénεε édíi nén bán mó akóo ene mbwóg awōn.

2 Ene pónde, abelē awōn bad ábe belyágnédé mó ne ábe bēnonne’ mó ene mbwóg kóān né pónde eche sáá átíídé epedé.

3 Melemlem nē dóo syānē dëmbēē nēε bēndem áde Krístæ éépēdēē. Pónde echēd, ngíne é nkōn sé éntēd syānē ntān.

4 Bōn áde pónde eche Dyöb déntíí’ é épédé, Dyöb dénlōm awe Mwän á nkōn sé-te. Ane Mwän ambíd á abum dé mmwaád, ákwōg-ke áse e mbéndé.

5 Dyöb dénlōm mó ákōde syānē á mehan mé mbéndé, ábel bōn syānē détim bán bé Dyöb.

⁶ Abé áde nyédíí-'áá bǎn bé Dyöb, ábélé Dyöb álómé Edǎádǎŋ é Mwǎn áwesyǎnē nlém-tē. Echē Edǎádǎŋ ébélé bǎb, dēchǎge Dyöb bǎn, "A-Tē."

⁷ Né-ǎǎ nyéesaá betǎŋ ámpē. Nyédíi bǎn bé Dyöb. Abé áde nyédíí-'áá bǎn bé Dyöb, Dyöb dēbē nyé kéchéé éche átǎŋgéné ábe bǎn abe.

⁸ Ngen e'só, áde nyénkémbíí'ē Dyöb, nyébéde betǎŋ áse e myöb níme méese dyamdyam.

⁹ Boŋ bǎb áde nyébíi Dyöb, ké'ē ríhǎb meé bǎb áde Dyöb ábíi nyé, cheé ékǎǎ boŋ nyéhede mbíd atímen ábé betǎŋ ámpē áse e ngíne é nkǎŋsé?

¹⁰ Nyéhíde donge dé e'pun néē bíŋ é'mbáá, nyéhíde-'ē donge á ngǎn, donge á pǎndé áyǎle mwē, ne donge á mwē néē bíŋ é' mbáá byánán Dyöb dǎǎ nyé benlé.

¹¹ Nē ábele' ndé mbwǎg nén meé mbébté pǎndé áyǎle nsǎn rísyǎǎl níme níbéle áyǎle echēn.

¹² A-baányǎŋ, ncháá' nyé meé, nyébē néē me, áyǎle mémpē ndé bǎb néē nyé. Meesaá áse e mbéndé ámpē. Nyéébele-'ē me dyam dé mbéb ké ahǎg.

¹³ Nyébíi nén bǎn áde rísebpé nyé nkalan ní bwám akale, ndyééné-'áá nyé áyǎle menkéndyé'ē bwám.

¹⁴ Kénéē nímem nkole ríhélé'áá níbel nyébǎŋ me áyǎl, nyéekémbán'ē me áyǎl, nyéekénán-naá me. Nyénkǎb me byánán ángel e Dyöb chǎǎ rídíi, ké'ē byánán Yesu Krístǎ rídíi.

¹⁵ Ene pǎndé nyébé menyíŋge bwámbwam. Héé níme menyíŋge médíi bǎb? Mímē mbide nyé mbóŋ nén meé, á pǎndé eched, nyéndǎŋ me nyaa echē, nzé émbē nén bǎn mod ahelé'áá-se ahúd míd ábe waáb, áá ábenlad, né nyénhúd nímen míd nyébé me.

¹⁶ Nédē ntimé mod a ekǎyí awe nyé bǎb áyǎle ríkánlé nyé mbále tǎŋgene nkalan ní bwám-ē?

¹⁷ Abé bad ábe béyǎgte nyé ayáge démpē, béwóó nlém nén bǎn nyétímen bǎ, boŋ béewóŋnéé nyé nlém ní bwám. Béhede bǎn nyéebág ne me ábel boŋ nyéwóŋ nlém ábé ne bǎ.

¹⁸ Ebóó áwón nlém ábel dyam, nzése níme nlém rídé ábel dyam á bwám. Ebóó áwón nlém ábel dyam pǎndé ésyǎǎl, saké nzé nyéde ne me démpeŋ.

¹⁹ A-bǎn bé nlém ábēm, nwóge' e'we bǎb áyǎl echēn, melemem ngáne mmwaád áwógeé e'we bé achád. Mééwǎg-ke ábé e'we kǎŋ né abé á Krísto ásóle nyé áte bwám.

²⁰ Mendǎŋ meé mbé ne nyé bǎb ábel níbíi ngáne ríhǎbéé áwēn áyǎle nyéhóódté me yǎl áte.

Elǎŋsén éche Hagaa ne Seraa

²¹ Nyé ábe nyéhede abé áse e mbéndé, ndǎǎ nýé aseded meéken nyébíi chǎm-ē mbéndé ékoo'ē ahǎb-ē?

²² Eténléde á kǎlag e Dyöb nén bǎn Abrahame anchyáá bǎn bé baachóm bebé, nhǎg ne mmwaád a ntǎŋ, aníní-'ē ne mmwaád a kunze.

²³ Mwǎn awē mmwaád a ntǎŋ anchyáá'ē, anchyáá mó nyaa eche moonyǎŋ áchyáá'ē mwǎn. Boŋ akag áde Dyöb démbéé Abrahame dǎǎ dénkǎŋ boŋ mmwaád a kunze achyáá mwán.

²⁴ Abén bebaád bébe, dehele déhǎgtén bó ne melē mé Dyöb mébe. Hagaa adé nhǎgtén ne melē níme Dyöb démwēē ne bad bé Israel á mbǎd e Sinai á pǎndé eche ábágé Mosee mbéndé. Bad bésyǎǎl ábe bédé áse e níme melē bédíi betǎŋ.

²⁵ Hagaa adíi nēŋgáne melē níme Dyöb démwēē ne Mosee á mbǎd e Sinai, á alon á Arebia. Bad bé Jerusalem bǎmpē bédíi bǎb néē Hagaa áyǎle bó moosyǎǎl bédíi betǎŋ.

26 Bonj mmwaád a kunze, adé nhəgtén ne Jerusalem awè adé ámln. Ane mmwaád mós-’aá adé nyaá awesyánē.

27 Eténlédé á kálag e Dyöb nén bán, “A-ekəm é mmwaád, wε awè weechyáá’, hé esaád é menyinje. Wε awè weewōgε e’wε é’ mwán mbéd, wóg menyinje áyāle,

we awè awonj nchóm ántedéé, echyáá bán bəəb tómaa mmwaád awè nchóm ádíí á ndáb.”

28 Bəəb-pəə a-baányan, akag áde Dyöb dēmbεé Abrahamε ábélé bəəb nyéđii bán bé Dyöb melemem nēε Áisige.

29 Ene pónđé, ébédé nén bán, mwán awe bēnchyāá’ é nyaá eché moonyon áchyáá’ é, atágté’ áá mwán awè bēnchyāá á ngine e Edəəđəŋ é Dyöb. Melemem nē dəə éđlí káŋŋ ne chíi.

30 Bonj chán kálag e Dyöb éhóbé tŋŋgene nē? Kálag e Dyöb ehóbe’ nén áá, “Nán mmwaád a ntŋŋ bó mwán. Mwán awè mmwaád a ntŋŋ áchyáá eetŋŋgenéé mbwóg eche sáá adyé nchoo ne mwán awè mmwaád a kunze áchyáá.”

31 Né-əə a-baányan, deesaá bán bé mmwaád a ntŋŋ. Dedii bán bé mmwaád a kunze.

5

Séesad á mehan-té ámpε

1 A mehan-té dəə Krístəə áhúdé syánē ábel bonj syánē deebág nēε betŋŋ ámpε. Né-əə nyéwəd mekuu áse, nyéemwág-ke se modmod ahé nyé á mehan-té ámpε.

2 Nyéwóglen mε. Mε Paale, nlanje nyé nén mεé nzé nyéwémtné nén bán nzé béyágé nyé, né nē débēl Dyöb ákob nyé nēε bad ábe bésáá, né nsón níme Krístəə ábélé méeheléé-se nŋwŋŋén nyé mbéd.

3 Nsimé nyé etúu áte ámpε nén mεé, kénzée awè akwěnténé áá béyag mós ábel bonj Dyöb ákob mós, atŋŋgéné mbéndé ésyāal ahíd.

4 Nyé ké ahée awè awémténé áá mótŋŋgēnē mbéndé ahíd ábel bonj Dyöb ákob mós, asénlédé ne Yesue, ahúde-’ε yāl á nsimé ní Dyöb-te.

5 Sé ne sé, Edəəđəŋ é Dyöb ébélé sélyágé nlem nén bán Dyöb dékob sé nŋŋgáne bad ábe bésáá áyāle sédúbpé Krístəə.

6 Ken béyágé mod-ε, ken béeyagεé mod-ε, nē déewóó’ é dyamdyam ábel ne abé áde dedíí ne Yesu Krístəə. Chóm éche éde etógnén éđii, ádúbe Krístəə. Adé adúbe átŋŋgéné anyínned ne edŋŋge éche déwóŋnē nhóg ne anííí.

7 Ngen e’só, nyékeéné’ áá mekan bwám. Nzé-módé ahŋŋléné nyé nlem á abum áá nyéehíde’ mbále e nkalanj ní bwám ámpε?

8 Ahŋŋlən áde nyéhŋŋléné nlem á abum déeheléé-se áhúú ne Dyöb, áyāle Dyöb dēn dəə ápwéde nyé ábe ábe bán.

9 Mod nhóg awè adé mbéb ántíté echēn, mós abéhte’ baáb ábíníí bésyāal, nŋŋgáne mbumé ní ngun nsonléé nzé béhédé mwá esulten áwəd-te.

10 Bonj pen ndúbpé nén mεé, Dyöb débēl nyéehídté áyáge á bad bémpεe bonj nyéehíd ádém. Dyöb dékəgsēn mod ké ahée awè apuutad nyé, ábē kénzée.

11 A-baányan, nzé émbē nén bán ndíi nkale nén mεé bétŋŋgéné mod ayag bonj Dyöb dékob mós nēε mod awè asáá ngáne baá Israél bédúbpé, né chee ékás bonj béhé mε á mesé? Nzé nkalé’ áá nén mεé bétŋŋgéné bad ayag bonj meekale’ áá kwéed eche Krístəə áwédé á awəg, né nē déelínséé bad bé Israél.

12 Ndəə nén mεé ábē bad ábe bépuutad nyé nló áte, békag á’só, béke bésélen yāl e mwēnchóm esyāal.

13 A-baányan Dyöb dénchēlē nyé áhíde á mehan-tē. Boñ abé áde nyéesaá á mehan-tē ámpē déebageé nyé kunze ábel kéchéé éche échēn ekob é yäl éhédeé. Boñ pen, nyémōd-téé ábenle waáb á edəngə-tē.

14 Nyébele' nē áyāle nzé bēlādē mbéndé ésyāāl, chōm éche éhóbeé édíi nēn, "Edəñ mwānyon ngáne édás échon yäl."

15 Boñ nzé nyétimé nyékwaglan, nyéwanne-'e nhóg ne aníníi néē nyam é mehín, nyétéd pōndé. Nzé nyéetēde pōndé, ne nyéewūū nhóg ne aníníi ne awúu ásyāāl.

Edəádəñ é Dyöb ne ekob é yäl

16 Nē-óó, nlébe nyé nēn mēé nyémwē Edəádəñ é Dyöb élyágte nyé. Nē débēl nyéebeléé mekan mē mbéb níme ekob é yäl éhédeé.

17 Mam níme ekob é yäl édás, méekagké ne mam níme Edəádəñ édás. Mam mē níme Edəádəñ édás méekagké ne mam níme ekob é yäl édás. Echén ngíne ébe éwane'. Nē ábele' nyéehēlēē dyam abel áde nyédás abel.

18 Boñ pen nzé Edəádəñ é Dyöb élyágte nyé, né nyéesaá ásē e mbéndé ámpē.

19 Mbeltéd mé ekob é yäl mééyāgtādtéd. Ndíi mbeltéd néē akáb dé mesón, abel dé mekan mé mbinde, akáb dé akwaleē.

20 Abel é á myöb mémpēe, alem, ekəyí, nselag, kónjí, melingá, abun dé e'tál, ngabén, nkabén,

21 asíi á bad, sógkē e mím, epuutéd ne mbeltéd mé mbéb mémpēe néē nímén. Nsimé nyé etúu áte ngáne ménsím-maá bōód nēn mēé, bad ábe bébele' échē ndín é mekan béekudté nnam mé nkamlēn ní Dyöb.

22 Boñ nzé Edəádəñ éche Esáá édé mod áte, chōó ébele boñ ábelé mam ne edəngē, ne menyínge, ne nsañ, ne nwesen, ne e'boñ bé nlém, ne abé á bwám, abé-'e mod awē bad béhele bésun nlém áyāl.

23 Edəádəñ chō-'aá ébele' boñ mod ásudté yäl, acháá-'e yäl bwám. Mbéndé éewóó-'é dyam ábelēn nēn.

24 Bad ábe bédé ne Yesu Krístəə béesaá ásē e nkamlēn ní mam mé ekob é yäl ámpē. Ebelé ébe byánán bēbómme échab esíi é mam mé ekob é yäl á awōg, éwédé-'e áhed.

25 Ngáne Edəádəñ é Dyöb ébágé syánē alongé dékōōlē, démwē échē Edəádəñ chēn élyágte syánē áyāle chōm ké ehéé éche débēléé.

26 Deényenē yäl ámín, deélinjsé nhóg ne aníníi, deesíidé-'e nhóg ne aníníi.

6

Kéchéé éche mod áwéné chōó dhūdtē

1 A-baányan, nzé nyé mod nhóg nyéhúné á mbéb-te, nyé ábe nyédíi nyébele' mekan níme Edəádəñ é Dyöb éhédeé, nyétāngéné néē nyéwōngéné mó áhúd mó á mbéb-te. Nzé nyéwōngan mó, nyéchēdēn mó yäl. Boñ pen, nyétéd pōndé ábel nēn nyébēn ámpē nyéehúné' á mekəgsen-tē ábel nímé mbéb.

2 Nyéwōngan nhóg ne aníníi áhíde á ndutul-tē. Nzé nyébele nē, ne nyéhíde' ngáne mbéndé e Krístəə éhédeé.

3 Kénzēé awē awémténé áá mótōmtēnē abé, adoge yäl. Ene ndín e mod éesaá dyamdyam.

4 Mod téé átōñ yäl asimēn. Nzé mod abelé nsón ní bwám, né áwōgēn yäl menyínge. Né éehāgtán-áá yäl ne bad bēmpēe.

5 Nhóbe nē áyāle mbeltéd nímé mod téé nínōne' mēn.

6 Kénzēé awē bēyágte Eyale é Dyöb, atāngéné néē áhāgké mod awē ayágte' mó chōm é bwám ké ehéé éche áwóó, áwōngēn mó.

⁷ Mod eédōgē yāl. Mod eewém tán-ne aá mōhēle mōdog Dyōb. Kéchéé eche mod áwéné, chōó áhūdtē.

⁸ Kénzée áwē abele mam mé mbé b níme ekob é yāl éhedeé, ábíi aá nímé mam mēn mépiinéd mōkwééd. Bon kénzée áwē mō-’é abele’ mekan mé bwám ngáne Edáádān é Dyōb éhedeé, ábíi aá nímé mam mébēl mōókūd alongé áde déemaá’.

⁹ Deekómé bwám abel. Nzé deétēdnede ábel bwám, né deékūd nnam á pónde echē etāngéné.

¹⁰ Né-ōó pónde tēé eche etál ébágnédé syánē ábel bwám, débel bwám wée moosyáál, tanje wée bānned bé Krīsto.

Elébé ne melentēn mé asóg

¹¹ Nyébēn nyényín mbōn mé e’yale ábē mbēnlédé átele nyé enén kálag ne échēm ekáá.

¹² Bad ábe béhede nyé anyáged nēn bán bétāngéné nyé ayag, bébele nē álúmtēn yāl, ábel bon békud dīn á bwám á’sō é’ bad. Bébáa’ bán bad bééhāg bō á meséb nēn bán bétúme akal nēn bán, kwééd eche Yesue áwédé á awōg chēnpen chōó ekāā bon mod ákūd e’choóchon.

¹³ Ké bad ábe báyágé bēn bééhīdēē mbéndé, bon béhede bán báyag nyé ábel békume ekáá á tál nēn bán nyékwēténé nēn bán báyag nyé.

¹⁴ Dyam áde me pen mékuménne ekáá á tál ádíi kwééd echē awesyánē Sāngwéé, Yesu Krīstāā áwédé á awōg áwēd nló. Eche kwééd ebélé mam mé nkōnsé méesaá me dyamdyam á dīd-te, meewóo-’áa dyam ábelēn nkōnsé.

¹⁵ Ken báyágé mod, ken béeyagé mod-ē, nē déewóo’ē dyamdyam ábel. Dyam áde áde etógnén ádíi Dyōb átimed mod ekóólé.

¹⁶ Nsan ne ngāl e Dyōb ébē ne bad bésyāāl ábe béhīde ádén ayáge. Abē bad bōó bédé bad ábe Dyōb ápwédé.

¹⁷ Asóged enén kálag, nlānge nyé nēn meé, modmod eétagtán me nímén mekan áyāle mebanj médé me á yāl hén níme mélúmtē nēn bán mbēnle Yesue.

¹⁸ A-baányan, nsimé níme Sāngú Yesu Krīstāā nībē ne nyé moosyáál. Ebē nē.

Kálag echě Paale áténlé Baá Efesus Ndibned ní kálag

Kálag echě Paale áténlé bad bé Efesus ehóbe' tângene ntii ní Dyöb, ápeen nímě nhágtéd rísyāāl, nímě ndé á nkõñsé ne nímě ndé ámín hóm ahóg. Krístāá mǎ'áá adé nló ámín e nímě nhágtéd rísyāāl (1.10). Ehóbe-'e ámpě ngáne bad bé Dyöb bétáñgéné abé nêñgáne mod nhóg abé áde bédíí ne Yesu Krístāá.

A mbooted, enén kálag ehóbe' tângene abé áde bad bé Dyöb bétáñgéné abé nêñgáne mod nhóg. Ngáne Dyöb ápwéde ábē bad, álagsén bó, ahúd-te bó á mbéb-te, mbwiined ne awe Mwān Yesu Krístāá. Ehóbe-'e ámpě ngáne Edáádāñ éche Esáá éltúmteé áá dyam áde Dyöb áhóbe áá mǎōbēl, débēnléd. Asóged, Paale alébé bad bé Dyöb bé Efesus ngáne abé ádāb átáñgéné abé nêñgáne bad ábe bédé mod nhóg á ñin á Krísto. Paale abēnlédé ngan hiin álúmed ngáne bad bé Dyöb bétáñgéné abe abé áde bédíí mod nhóg ne Krístāá.

Nkabted ní kálag

Ndibned ní kálag 1.1-2

Krístāá ne mwembé ní bad bé Krísto 1.3-3.21

Aloñgé dékǎōlē ábē ne Krístāá 4.1-6.20

Nsógten 6.21-24

Paale alómme' bad melenten

¹ Me Paale, mbapere a nlomag awě Yesu Krístāá ngáne Dyöb áhédé'áá, me-éé ntenle nyé enén kálag. Ntenle nyé bad bé Dyöb ábe nyéde á dyad dé Efesus. Nyéde mod nhóg ne Yesu Krístāá nyéhíde-'e mó ne nlém nhóg.

² Nsimé ne nsañ ní Dyöb Titéé awéd ne nímě Sāñgú Yesu Krístāá mbē ne nyé.

Nnam nímě bad ábe bédé nhóg ne Krístāá békúde

³ Débe Dyöb mekenag. Mó adé Dyöb áde awed Sāñgwéé, Yesu Krístāá, abé-'e mó Sáá. Dyöb dǎo ánámte syāñē abe áde ábágé syāñē bwēm é'syāāl ábe é'bidé áwē nkamlēn ní mín. Abelé nēn abé áde dédíí mod nhóg ne Krístāá.

⁴ Byánán Dyöb déhǎg nkõñsé, ámpwéd syāñē ábē ábē bad, ábe áde ámbēnlé bon desāñ, deewóó-'e atón dé mbéb ké ahóg áwe e'só. Adāñ áde Dyöb ádáá syāñē,

⁵ dēmbēl antíí se' bǎod áá débē ábe bān mbwiined ne nsón nímě Yesu Krístāá ámbelélé syāñē. Dyöb dēmbel nēn áyāle nēn dǎo antíí' é áá mǎōbēl ngáne ébǎñnéde mó.

⁶ Abelé áá débē ábe bān ábel bon dékēne mó áyāle mekan mé bwām nímě ábélé. Abagé syāñē echě ndāle e nsimé ngēn. Dékúde nímě nsimé abé áde dédíí mod nhóg ne awe Mwān awě ádáá bwāmbwam.

⁷ Abé áde dédíí mod nhóg ne Krístāá ne asyóg áde ásyógé nímě mekií áwesyāñē nló, dǎo ákás bon ákōdē syāñē alagsen áde álagsēñē syāñē mbéb. Ábe áde Dyöb ábélé nēn álúmte syāñē bān nímě nsimé ndé kase e nsimé.

⁸ Abagé-'e syāñē mó nyaa echě elóné mbon, ábūd-te syāñē debyéé abe, ábēle desǎñtēn mekan mesyāāl.

⁹ Abelé mekan mesyāāl ngáne áhédé'áá áá móbel. Abelé syāñē debíí mekan nímě kǎñj ne bǎob modmod éesǎñtēñéé. Mmēn mekan médií mekan nímě ámbēnlé mbwiined ne Krístāá.

¹⁰ Dyöb áttíde aá mósb̄el n̄m̄én mekan mésyāal á pónde eché etāngéné. Ene pónde ālad bwēm é'syāal ábe é'dé á nkoŋ ní mín ne rísé, bēbē áse e Yesu Krístāa mó awē adé n̄n̄gāne nló.

¹¹ Dyöb ápwédé sé ábē ábē bad abel áde ábélé boŋ debé mod nhóg ne Krístāa. Ambel n̄n̄ áyāle ammad atii se' b̄oód. Abele mam mésyāal mébenlad ngāne áttíde.

¹² Ambel n̄n̄ ábel sé ábe sēbédé bad bé é'só ásum nlém w̄éé Yesu Krístāa séwāle abé áde dék̄ŋ boŋ bad bēmp̄ēe bēken mó áyāl e eché ngumē eché echabé ám̄in.

¹³ Nyēmp̄ē nyēnwóg nkalan ní mbále. Mm̄é nkalan ní mbále r̄idii nkalan ní bwām níme nípl̄ínédé nyé e'soos̄oŋ. Nyēndúbé Krístāa, nyēb̄é'-e mod nhóg ne mó. Nén dēmb̄ēl Dyöb dēmb̄ē nyé Edāádāŋ éche Esáá éche ánh̄ōp̄ē aá mósb̄ē ábē bad. Eché Edāádāŋ édii n̄n̄gāne e'chem ábe é'l̄umte bán nyēdii bad bé Dyöb.

¹⁴ Eché Edāádāŋ ch̄oó él̄umte syānē n̄n̄ bán deék̄ūd bwēm ábe Dyöb áh̄óbé aá mósb̄ē syānē. Deék̄ūd ábén bwēm á pónde eche Dyöb déh̄ūdte syānē ábe dedé ábe bad á mehaŋ-tē. Nén dēb̄ēl bad bēkené Dyöb áyāle eché ngumē echabé ám̄in.

Mekāne níme Paale

¹⁵ Nwógé bán nyēdúbpe Sāŋgú Yesue, nwógé'-e bán nyēdāó bad bé Dyöb bésyāal. Né-óó,

¹⁶ nságnan Dyöb pónde tēé áyāl echēn, nzé nkānnad nyé.

¹⁷ Nkānne'-e mēé, Dyöb áde echēd Sāŋ, Yesu Krístāa, Títēe a ehúmé ábe nyé Edāádāŋ é debyéé ne é nsōŋten mé mekan mé e'koŋnéd ábel boŋ nyébii mó bwām.

¹⁸ Nkānne'-e ámp̄ē n̄n̄ Dyöb ákéled nyé nlém á abum, ábel n̄n̄ nyébii bwēm é' bwām ábe nyésummé nlém áyāl, áyāle apwédé nyé. Nkānne'-e n̄n̄ mēé nyésōŋten ngāne n̄nam níme áh̄óbé aá mósb̄ē ábē bad nípédé achab ám̄in.

¹⁹ Nkānnad-te nyēmp̄ē n̄n̄ mēé nyébii eche ngīne. Ene ngīne etómé bwēm é'syāal, ch̄o'-aá ewōŋgan syānē ábe dedúbpe mó. Mm̄én melemlen mé ngīne eche echabé ám̄in,

²⁰ ch̄oó ámbenlédte áde ámpuúdté Yesue, ábel-le ádyēē mó á ekáá émbáá áwē nkamlen ní mín.

²¹ Ahed-taá Krístāa ákamlanne ngumē ne benkamlene bésyāal. Ade d̄in-ne áde ngīne tómaa m̄in mé benkamlene bésyāal, ábe bédé b̄oob ne ábe bēbē á pónde eché ehúe'.

²² Dyöb ábágé Krístāa nkamlen ám̄in é ch̄ōm ésyāal, abelé'-e mó awē akamlan ch̄ōm ésyāal, ábē nló, mé elad é bad ábe bédúbpe.

²³ Eché elad é bad ábe bédúbpe bédii néé yāl eché Krístāa. Eché elad é bad él̄ōgte Krístāa mbom, Krístāa mó'-aá alógte ch̄ōm ésyāal eche édé kēhéé mbom.

2

Dedé á alongé abé dde dédii mod nhóg ne Krístāa

¹ Ngen e e'só, nyēmbé n̄n̄gāne bad ábe bēwédé áyāle nyéēbele'-aá mekan níme Dyöb áh̄óbé'-aá aá nyébel, nyébeláá'-e mbéb.

² Ene pónde nyéhíde'-aá mbēltéd mé mbéb ní bad bé nkōŋsé. Nyēwógné'-aá nkamlene awē akamlan e'dāádāŋ bé mbéb ábe é'dé á pemē-tē. Kōŋne chii eché edāádāŋ édii élyágte' bad ábe bēbelé' ngāne Dyöb áh̄edēé.

³ Syānē moosyāal debédé néé b̄ó, dékōdtē esíí é mekan mé ekob é yāl. Debélé'-aá ngāne mekan mé mbéb mé ekob é yāl méhédé'-aá aá débēl, déhíde'-e mekan níme mewēmten melāŋgé'-aá syānē aá débēl. Mm̄én mbéb níme

débélé'áá mēmbēl Dyōb déntāngēn syānē āmpē akōgsen melemlēm ngāne āntāngēnnē moosyāal akōgsen.

⁴ Bon ngāne Dyōb átómténē ngəl abé ādān-^ε syānē bwāmbwam,

⁵ abelé syānē dedé á alonjé abé áde dēdíí ne Krīstāa, kénéē edíí bān dembé nēē bad ábe bēwédé áyāle deébele'áá mekan nīme Dyōb dénhōbpē áá débēl. Nsimé ní Dyōb móo níkáá bon nyékūd e'soósonj.

⁶ Abé áde dēdíí-'áá ne Krīstāa, Dyōb ápuúúdté syānē ne mó, adidé-^ε syānē hōm ahóg ne Krīstāa á nkoj nímín.

⁷ Ambel nēn álúmed syānē ábē e'bonj bé nlēm mbwiined ne Yesuē Krīstāa ábel bonj á pónké eché ehúē', bad bényín ngāne nīme nsimé nípedé nhōn abé nítom-me chōm ésyāal.

⁸ Nsimé ní Dyōb móo níkáá bon nyékūd e'soósonj. Adúbe áde nyédúbpē Krīstāa dōo ákáá bon nyékūd ábē e'soósonj. Saké mekan nīme nyébéle mékáá bon nyékūd e'soósonj. E'soósonj ábe nyékúde é'díí nde e Dyōb.

⁹ Saké mekan mé bwām nīme nyébéle mékáá bon nyékūd e'soósonj. Né-^{óó}, nzōm ké póg eesáá eche mod átāngēné ekáá akum átāl.

¹⁰ Syānē dedíí ekáá é nsōn é Dyōb. Abé áde dēdíí mod nhóg ne Yesu Krīstāa, ábágé syānē alonjé ábel bonj débēle mekan mé bwām. Nēn dōo Dyōb déntíí' é se' bōód áá déwōj ene nyaa e abé á alonjé.

Abé nhóg ne Krīstāa

¹¹ Nyé ábe nyéēsē bad bé Israel nyéēchatán ngāne nyémbēē bōód. Bad bé Israel ábe béchágé yāl bān, "bad ábe bēyágé," béchāge nyé bān, "bad ábe bēyagēē." Bon nímén meyagag mé ekob é yāl médíi chōm éche moonyonj ábenléé mekáá.

¹² Nyéēchatán bān ene pónké nyénkēmbíí' é Krīstāa. Nyénkēmbáá nlatén ne echoj é bad bé Israel, bad ábe Dyōb ápwédé. Nyénkēnwóngé dyam ábel ne melē nīme Dyōb démmwēē nīme nílúmté' chōm éche Dyōb dénhōbpē áá móšbēl. Abé áde nyémbēē á nkōjsé-te, nyénkēnwóngé e'lyág bé nlēm hōmhōm, nyénkēmbíí-'áá Dyōb.

¹³ Bōód nyēnchabnéd Dyōb á yāl. Bon bōób abé áde nyédíí nhóg ne Yesu Krīstāa, apēné nyé benben ne Dyōb asyōg áde ásyógé nímē mekií áwēn nló.

¹⁴ Krīstāa mwēn mó apiínédé syānē nsanj. Abelé bad bé Israel ne bad ábe béēsē bad bé Israel bédé mod nhóg. Kwééd eche áwédé ehúde ekoyí éche ébédé áfínté echéd. Eché ekoyí ébédéē nēē ekāñned éche énkab syānē áte.

¹⁵ Abelé mbéndé é bad bé Israel énkēnwóngé ngīne āmpē. Ambel nēn ábel bon álad bad bé Israel ne bad ábe béēsē bad bé Israel bēbē nēē mod ekóólé nhóg awē bōóbōo bēbē mod nhóg ne mó mwēn Krīstāa. Né-^{óó}, ábel áde ábélé nēn ápēné nsanj áfínté e bad bé Israel ne bad ábe béēsē bad bé Israel.

¹⁶ Awé áde áwédé á awōg, ábélé syānē dedé mod nhóg ne Dyōb, áfímté-^ε syānē ásē ne Dyōb. Né-^{óó}, amadé ekoyí éche ébédé áfínté e' syānē.

¹⁷ Krīstāa āmpē ákanlé nyé ábe nyéēsē bad bé Israel, nyé ábe nyēnchabnéd Dyōb á yāl nkalanj mé nsanj, ankalé-^ε bad bé Israel, bó ábe bēmbē Dyōb benben.

¹⁸ Mekan nīme Krīstāa ábélé, mébéle syānē moosyāal dekudé nzii āpe á'sō wēē Titée. Melemlēm mé Edáádānj ehóg chōó éwōngan syānē ábel nē.

¹⁹ Né-^{óó}, nyé bad ábe béēsē bad bé Israel nyéēsaá beken āmpē nyéēsaá-'áá bad ábe bēbíde etún. Bon pen nyáabe bad bé Dyōb nyédíí bad ábe bēbíde hōm ahóg. Nyé moosyāal nyédíí nēē bad ábe bédé á túmbé e Dyōb.

²⁰ Nyédíí nēē bwēm ábe bēlōñné ndáb. Bembapē mé nlómag ne bekal bé é'dáádānj bōo bédé nsáaned ní ndáb. Yesu Krīstāa mwēn-naa adé akon dé nchóméé.

21 Mós akáá boŋ ene ndáb etyéem, ékwogé', épē-'ε ndáb eche Esáá eche Sāngwéé.

22 Abé áde nyédíí mod nhóg ne Krístəə, aladé nyé ne bad bé Krísto bémpēe. Abé áde nyédíí-'aá bəəb nyédíí nées ndáb eché Dyób ádyεε'ε áte. Dyób áde áde nēŋgáne Edəádəŋ.

3

Paale akánlé bad ábe béesé bad bé Israel nkalaŋ ní bwám

1 Enén nzəm chós ekáá boŋ níkánád nyé. Abele áde níbenléé Yesu Krístəə ne akale áde níkanléé nyé dós akáá boŋ mbé mod a mbwəg.

2 Ndúbpe méé nyéwogé bán Dyób ápwédé me ákale nyé nkalaŋ ní bwám tēŋgene nímē nsimé.

3 Dyób ábágé me nsóŋten mé mekan mé e'koŋned níme níbéle mbíí mekan níme káŋŋne bəəb modmod éesóŋtenéé. Mmaá nyé nguse é e'yale atele tēŋgene nén.

4 Nzé nyéláá mam níme nítelé, nyéechém nímēm nsóŋten áyāl e mekan níme káŋŋne bəəb modmod éesóŋténéé tēŋgene Krístəə.

5 Bəəd, Dyób dénkənlúmédte baányoŋ nímén mekan níme káŋŋne bəəb modmod éesóŋténéé. Boŋ bəəb abénléde échē Edəádəŋ álúmed bekal bé dəádəŋ ne bembapeε bé nlomag ábe bédé ábele Dyób, nímən mekan.

6 Mmén mekan níme moonyoŋ enkəmbíí'ε médíí nén: Bad ábe béesé bad bé Israel, bómpē békúde nnam níme Dyób áhóbé aá móəbē melemlen nēŋgáne bad bé Israel békúde. Bad bé Israel ne bad ábe béesé bad bé Israel bédé mod nhóg. Dyam-me áde Dyób áhóbé aá móəbelé bad bé Israel, bad ábe béesé bad bé Israel bómpē bétombwén dý áyale bédé mod nhóg ne Yesu Krístəə. Nkalaŋ ní bwám móə níkáá boŋ nímén mekan mésyāāl mébenléde.

7 Mmén nkalaŋ ní bwám móə níkaléé. Dyób abénléde nímē nsimé, abagé me nímén nsón. Mbele mó á nwōŋgen mé eche ngíne.

8 Kénéε méetəgnéé etógnén abé áfinté e bad bé Dyób, Dyób dēmbē me nímén nsimé, ákale bad ábe béesé bad bé Israel tēŋgene nnam níme Krístəə ábagéé. Moonyoŋ eéhēlē-se abíí ngáne nímén nnam nídí.

9 Dyób dēmbēl mentánléde bad bésyāāl nyaa eché ápíde níme ntíí mé mekan á asóg níme káŋŋne bəəb modmod éesóŋténéé. Dyób áde áhágé chóm ésyāāl, dénkənlúmédte modmod nímén ntíí bəəd.

10 Dyób dēmbēl nē, ábel nén benkamlene ne ngume eché éde á nkoŋ nímín, bényín ngáne ápedé debyéé awóg áyāl e chóm ésyāāl eche ábeleé bəəb, mbwiined ne elad é bad bé Dyób.

11 Se' bəəd, byánán Dyób déhəg nkóŋsé, ammad atíí aá nímén mekan móə móbenlé. Bəəb-pe, abelé nímén mekan mébenléde mbwiined ne mam níme Yesu Krístəə, eched Sāŋ ábéle.

12 Adúbe áde dédúbpe Krístəə debé-'ε mod nhóg ne mó, dós ádíbnéde syánē nzíí ápe benben ne Dyób ne e'sum bé nlém é'syāāl ésebán debáa' dyamdyam.

13 Né-ə, ncháa' nyé nén méé nyéētímmé mbíd áyale metake níme níkudéé áyāl echén, médíí níme nípiinad nyé bwám.

Paale akánnéde bad bé Efesus

14 Enén nzəm chós ekáá boŋ níbwəgē' mebóbóŋ á'sō wée Titéε ákánned nyé.

15 Mós adé Titéε a metúmbé mésyāāl, áwé dós mín mé metúmbé mé nkoŋ níse ne mé nkoŋ ní mín mébíde.

16 Ngáne nímē nhən níme ákóŋnéde nyé níchábe ámín, nkánne nén meé eché Edəádəŋ ébe nyé ngíne ábel boŋ nlém níwúu nyé á abum.

¹⁷ Nkánne-’ε ámpē ábel nén adúbe áde nyédúbpé Krístəə ábel ásumen nyé á nlém-tê. Nkánne-’ε mée nyédəŋ Dyöb, nyédəŋ-’ε nhóg ne aníní. Nzé nyébele nê, né nyéəbê nēŋgáne alín á bwel áde míme nkaŋ nkíí ásē bwám, nyébé-’ε nées ndáb éche esúmnédé ásē bwám.

¹⁸ Nkánne’ nén mée nyé ne bad bé Dyöb bésyāäl nyébíí bán Krístəə adəə syānē bwāmbwam, éché edəŋge éewóo-’áá asóg.

¹⁹ Nkánne’ ámpē nén mée kénée édíí bán modmod eéhēēē-se ákoŋ abíí ngáne Krístəə ápedé nyé adəŋ, Dyöb ábel nyésōŋten. Nkánne’ nê ábel boŋ abé ádēn ábē nēé áde Dyöb.

²⁰ Dyöb áwóó ngíne ábel mekan míme méchábé ámín bwāmbwam tómaa mekan míme déhédné mó. Abele mekan tómaa ké ngáne déhele dewémtén bán ábēl. Eche ngíne eche edé-’ε syānē áte chóo ábenladté ábel nímén mekan.

²¹ Mekenag mébê ne mó áyāle ndale é mekan éche ábélé, éche ényínnédé áfínté e elad é bad bé Dyöb, ényínnéd-te áyāl e mekan míme Krístəə ábélé. Mekenag mébê ne mó pónidé ésyāäl, á ngíndé ne á ngíndé. Ebê nê.

4

Bad ábe bédúbpé Krístəə bédé mod nhóg ne mó

¹ Né-óó, me nēŋgáne mod a mbwəg áyāle nsón míme níbenléé Sánŋwéé, ncháa’ nén mée, abé ádēn ábē abé á bwám ngáne Dyöb áhedeé, apwəd áde ápwédé nyé.

² Kéchée éche nyébeleé nyésuded yāl, nyébê bad ábe bépwiídtédé, nyéwesən-ne nhóg ne aníní. Nyélúmed edəŋge awesən áde nyéwesanné nhóg ne aníní.

³ Edəəđəŋ éche Esáá ébélé nyédé mod nhóg. Né-óó, nyéwan áte ábē nsəŋ ne nhóg ne aníní, ábel nén nyédíí nyébê mod nhóg.

⁴ Syānē baásyāäl dedíí yāl póg, melemlém mé Edəəđəŋ ehóg chóo syānē dékúde. E’lyəg bé nlém e’hóg bō-’áá déwóó áyāl e melemlém mé nnam míme Dyöb dénhōbpē áá mósəbe syānē áde ámpwədté syānē.

⁵ Sánŋwéé nhóg mó syānē baásyāäl déwóó’. Adúbe ahóg dóo syāā baásyāäl déwóó dékúde-te melemlém mé edusen.

⁶ Dyöb ahóg dóo syānē baásyāäl débēnléé, mō-’áá adé Titée awe syānē moosyāäl. Mó akamlan syānē baásyāäl. Abele’ syānē moosyāäl debele kéchéé éche áhedeé áá débēl, adé-’ε syānē moosyāäl áte ne éché Edəəđəŋ.

⁷ Syānē mod té dekulé nsimé á nhəgtéd míme Krístəə ábágé. Boŋ nímé nsimé méesaá nyaa póg.

⁸ Nê dóo ákás boŋ étenléd á kálag e Dyöb nén bán, “Ankē á hōm áde áchábé ámín.

Ade ákagké, ankeén ábē bad bé ekoyí ábe ántōmmē áte, ábē-’ε ábē bad échē nde.”

⁹ Ngáne étenlédé nén bán, “Ankē á hōm áde áchábé ámín.” Chán nê ádíí? Nê alúmté nén bán ansébé ape a hōm áde áde se ásē, nédē á nkōŋsé wén.

¹⁰ Mó awē ampē a nkōŋsé mó adé melemlém me mod awē ankē á hōm áde áchábé ámín tómaa mebwóg mésyāäl. Ankē ámín ábel chóm ésyāäl elón mbom.

¹¹ Mó mwēn mó abagé bad nde. Abelé donŋe á bad ábē bembapēé bé nlomag, donŋe ábē bekal bé’dəəđəŋ, ábēl donŋe ákal nkaŋaŋ ní bwám, ábēl donŋe ábē belyáged bé bad ábe bédúbpé, ábēl-le donŋe ábē bemeléede áyáged bad ábe bédúbpé.

¹² Ambē ábē bad échén nde áboŋsən bad bé Dyöb ábele mó. Ambel nê ábel boŋ bad ábe bédúbpé bō ábe bédé nēŋgáne yāl eche Krístəə béwúu áte.

13 Nén débē kááñne á pónde eche syánē débēē mod nhóg, adúbe áde dédūbēē Mwän a Dyöb, debíí-ε mó. Nzé dedé nê, nê débēl deélōn mbon, debē nēngáne Krístā awē alóné mbon.

14 Né déebáá nēngáne bēndem ámpē. Nén débēl bad bé akwáb ábe béyágte' ayáge dé metóm, béehēnlé syánē adog, béehēl-laá abel se dedúbé mekan míme méetāngene. Déebáá nēngáne bōle ábe epub é ngine éhueneé pēd e mendib póg étimné' eníní.

15 Déebáá nê, bon pēn dékale mbále délūmte-ε edānge ne nhóg ne aníní. Débēle nê ábel bon dékwog á menzii mésyāāl débē nēngáne Yesu Krístā awē adé nló.

16 Krístā aladé ábē bad hōm ahóg, ngáne mebōñ mé yāl méladéé yāl e moonyon. Nzé pēd e yāl téé ebele míme nsōn ngáne étāngéné abel, ne yāl esyāāl ékwogé', ewúú-ε áte. Nê dōo édíí kááñne á elad é bad bé Dyöb, nzé mod-té adá mwānyan.

Alongé dékōlē á mod a Krísto

17 Né-ōó, nkoo' nyé aláa á ñin á Sāngú nēn meé abé áðēn déēbāg nēngáne abé áde bad ábe béebii Dyöb. Mekan míme békamtanné médii mekan míme méesē dyam dé abelen, méehelée-ε se méwōngén bō.

18 Ayāle nímab mewēmtēn méde mewēmtēn mé mbéb, béhídēē nyaa e Dyöb. Béwōó-é alongé áde Dyöb ábageé ayāle béwúú nló áte béebii-'áa nyaa e Dyöb.

19 Nzé bébéle dyam dé mbéb, akwágké déekóbéé bō. Bébagé yāl ábel mekan míme échāb ekob é yāl éhedeé. Béwōo nlém áte pónde ésyāāl ábel mekan mé mbinde.

20 Bon nyé, áde bēn'yāgēdtē nyé tāngene Krístā, saké ene ndín e abé bēnlāā-'ε nyé bán nyétāngéné awōñ.

21 Ndúbpé nēn meé nyēnwóg mam mé mbále tāngene Yesue. Abé áde nyēmbēē-'ε mod nhóg ne mó bēnlāā nyé mam ayāl eché.

22 Bēn'yāgēd nyé bán nyéte de abé dé nchun áde nyēnsēbēē awōñ. Ene pónde áðēn alongé démbēb ayāle nyēnwōñ nlém dāsō ábel mekan mé mbéb. Mmē nlém míme nyéwóó'áá-ε ábel mekan mé mbéb nípánté'áá nyé nzii.

23 Bēn'yāgēd nyé nēn bán nyēmwe Dyöb áhāññen nyé nlém á abum ábel bon nyéwōñ mewēmtēn mékōlē.

24 Dyöb ábageé nyé abé dékōlē áde áde nēngáne áde abé. Né-ōó, abé áðēn ábē nēngáne áde abé dékōlē. Adén abé dékōlē ádíí abé dékōlē á mbále ngáne Dyöb áhedeé ásanj-ε.

25 Né-ōó, modmod eékālē metóm ámpē. Syánē mod-té ákanle mwānyan mbále, ayāle syánē moosyāāl dedii nēe bad ábe bēlādne bon bébēl yāl póg.

26 Nzé nyélíí, nyéēmwāg-se melingá mébēlēd nyé mbéb. Nyéēmwāg-se mīmē melingá métom epub é bīn.

27 Nyéebāgē Satane yāl ádog nyé.

28 Bad ábe béchibe' bésóg achíb. Bon pēn bébenlad nímab mekáá ábel nsōn ne nlém nhóg ábel bon békud chōm, béwōngēn-ne betóótōké bé bad.

29 Eyale é ebébtéd ké ehóg éebídé modmod á nsāl. Bon pēn nyébenlad e'yale e' bwám ábe béwōngēn bad áwúu áte á adúbe té. Nyébenlad e'yale á pónde eche ehēdnad, ábel é'wōngēn bad ábe béwōnglan nyé.

30 Nyéebēlē mam míme méwōgēd Edāsdan eche Esáá ndutul. Edāsdan eche Esáá chōo éde nēngáne e'chem ábe Dyöb áhédé nyé ásin pónde eche ákodéé nyé ne akode ásyāāl.

³¹ Nyéhúd mewémten mé mbéb mésyāā́l á nlém-tê, nyéchene-’ε ekan η ngine ne melingá. Nyéesenlé’, nyéesyáá-’ε bad ahób adé nyéhóbεέ bó mekan á yál. Nyéelúmté’ e’béb bé nlém wée modmod.

³² Nyélúmed e’boη bé nlém wée nhóg ne aníní, nyéwōη-ge nlém rí ngol. Nyélagсан nhóg ne aníní melemlen ngáne Dyōb álágséné nyé áyāle Krístā.

5

Abé áde bad bé Krísto bétāngéné awōη

¹ Nyéwāle abé áde adé nēngáne abé á Dyōb, áyāle nyédii ábe bān ábe ádáá bwāmbwam.

² Nyédāη bad bémpēe, melemlen ngáne Krístā ádáá nyé boη awé-’ε á nló míme syānē. Ambě yál wée Dyōb nēε mende ne ndε echě enwógéd Dyōb menyīηge bwāmbwam.

³ Ngáne édii bān nyédii bad bé Dyōb, éeboo’ε bān nyékábe’ mesón, ké’ε nyébele mekan mé mbinde ké’ε nyébē ngoód. Echén ndín é mekan éeboo’ε ké awógned áfinté echēn.

⁴ Eeboo’ε bān nyéhóbe’ mbinde ne e’nyōgléd bé mehób, ké’ε nyébele’ e’kúkú bé ngwēl. Boη pēn nyésāngnan Dyōb.

⁵ Nyébii nēn bān kēnzéé awé akábe mesón ké’ε awé abele mbinde é mekan ké’ε awé adé ngoód, éesónlé á nkamlēn míme Krístā ne míme Dyōb, éekud-tāá bwēm é’ bwām ábe Dyōb áhóbé áá mósōbē. Mod awé adé ngoód adii nēε mod awé abenle’ myōb mémpeē.

⁶ Nyéemwāg-se mod ádōgēn nyé e’yókél é’ mehób. Dyōb dékōgsēn bad ábe bébele’ ngáne áhedéé boη bébele’ échén ndín é e’bébtéd é’ mekan.

⁷ Né-óó, nyéelatán ne bad ábe bébele’ échén ndín é e’bébtéd é’ mekan.

⁸ Ngen e’só nyémbé á ehintēn-tē, boη bōob abé áde nyédii ne Sāngwéé ábéle nyéde á e’nyīnen bé ekide tē. Né-óó, abé áden ábē ngáne abé á bad ábe bédé á e’nyīnen bé ekide.

⁹ Nhóbe nēn áyāle bad ábe bédé á e’nyīnen bé ekide tē bébele mekan mé bwām, bébele mekan míme métāngéné ne mekan míme médé mbāle.

¹⁰ Né-óó, nyéwanēn ábii mekan míme méwōgte Sāngwéé bwām.

¹¹ Nyéewóó dyam ábel ne mbéltéd míme méeboó míme bad ábe bédé á ehintēn tē bébeléé. Boη pēn nyélúmed bad nēn bān echē ndín é mbéltéd éeboo’ε.

¹² Edé e’sōn átúb échē ndín é mekan đīn éche bad bémpēe bébeleé á mesōm-tē.

¹³ Nzé mod abídté échē ndín é mekan áwed bad bényīn ngáne mēn mékóó abé.

¹⁴ E’nyīnen bé ekide bōó é’koo mekan mé mbéb abided áwed. Nē dōó ákáo boη éhōbnéd nēn bān,

“Wε awé ekúne’ kábnéd,

puú, weebág nēε mod awé awédé.

E’nyīnen bé ekide ábe Krístā-’ε é’pēn wε á yál.”

¹⁵ Né-óó, nyétéd pōndé ne nyaa e abé echě nyéwoo’ε. Adēn abé déēbāg nēngáne abé áde e’yókél é’ bad boη ábē nēngáne abé áde bad ábe béwóó debyéé.

¹⁶ Pōndé ké ehéé eche etál ébāgnédé nyé ábel bwām, nyébel. Ayāle mbéb rítomé áte enén pōndé.

¹⁷ Né-óó, nyéebág nēngáne bad ábe bédé eyókél. Boη pēn nyésōηten chōm éche Sāngwéé áhedéé áá nyébel, nyébel-le chó.

18 Nyéemwág mĩm se mékõbē nyé áyāle nén nê áwógte mod e'sôn. Boŋ pen Edæádəŋ éche Èsáá cháchá ébē nyé áte.

19 Nyékõnne' nhóg ne aniníi ngase é Dyõb áwéd nhóg ne aniníi nlém á abum. Nyékõne' ngase éche ébidé á kálag e Dyõb, nyékõne' ngase éche ékene Dyõb ne Krístæ, nyékõne'-e nkəŋgé ké ríhée míme ríhúú ne Edæádəŋ Eche Èsáá, áken Dyõb.

20 Nyéságnan Dyõb, Titée awéd pónde ésyāā́ áyāl e kéchéé éche ébenlad. Nyéságnan mó á đĩn áde echen Səŋ Yesu Krístæ.

Paale alébe' baachóm ne abāb bebaád

21 Mod téé abele ngáne waáb áhedeé áyāle edúbé éche nyébageé Krístæ.

22 Mmwaád-téé áwógne nchóm melemlen ngáne áwógneé Səŋgwéé.

23 Mwəenchóm té awóó nkamlən ámĩn e mmwaád, melemlen ngáne Krístæ awóó nkamlən ámĩn e elad é bad bé Dyõb. Chó'-aá édé nēŋgáne eche yāl mó-'aá abage chó e'soosŋ.

24 Né-óó, mmwaád-téé atəŋgéné áwōgnē nchóm áyāl e mam mésyāā́, melemlen ngáne elad é bad bé Dyõb éwōgnéé Krístæ.

25 Nyé baachóm ábe bəwóó bebaád, mod téé ádəŋ mwaád, melemlen ngáne Krístæ ádás elad é bad bé Dyõb boŋ ábē'-e áde alonjé áwé áwab nló.

26 Anwé á nló nímāb ábel boŋ bésāŋ. Ambənléd mendīb ne éché eyale ásaád bó.

27 Ambəl nén ábel boŋ elad é bad éboŋ áwe e'só. Ahede'áá aá mōpeen éché elad é bad áwé, ésebān atón á mbinde ké ehóg, ké'-e aban, ké'-e dyam dé mbéb ábág bó áyāl. Boŋ pen bésāŋ, béewōó'-e dyam dé mbéb ké ahóg áde mod ahele ahób bó áyāl.

28 Melemlen nê dōo baachóm bétəŋgéné ábab bebaád adəŋ ngáne bédás échab yāl. Mwəenchóm kéhéé awé adəó mwaád, adəó eche yāl.

29 Modmod eékkṓ' é yāl, boŋ abelé atəgné chó ánəné'-e chó bwām. Melemlen nê dōo Krístæ ábeléé elad é bad bé Dyõb.

30 Syānē dedé bad ábe bēbélé eche yāl.

31 Etənlédé á kálag e Dyõb nén bān, “Enén nzom chó ekəó boŋ mwəenchóm áte dé sáá ne nyan, abé ne mwaád, boŋ búmō bad bébe bétĩm mod nhóg.”

32 Adén dyam áđii ndale e dyam eche modmod éhēlēē-se asōŋten. Boŋ ndúbpe mēe nímén mekan méhóbe təŋge ne Krístæ ne elad é bad bé Dyõb.

33 Né-óó, mwəenchóm téé awé awóó mmwaád, adəŋ mwaád ngáne ádás eche yāl. Mmwaád a nchóm téé'-e atəŋgéné nchóm edúbé abe.

6

Paale alébe' bānbān ne abāb besáá ne benyaá

1 Nyé bānbān, nyéwógne' áben besáá ne benyaá ngáne bad ábe bédé ne Səŋgwéé bétəŋgéné abel.

2 Etənlédé á kálag e Dyõb nén bān, “Nyéwógne' áben besáá ne benyaá.” Atĩnté e mbéndé éche Dyõb ábágé, enén mbéndé chó ebédé mbéndé e'só eche Dyõb dénhōbēnne dyam.

3 Dyam áde ánhóbpé áđii nén bān, “Nzé nyéwógne' áben besáá ne benyaá, né mekan mébēen nyé bwām, né alonjé áđēn-ne déchāb áte.”

4 Besáá bé bān-ne, nyéeliŋsé áben bān. Boŋ pen nyənəne bó, nyélébe bó, nyéyágte'-e bó nyaa eche Səŋgwéé áhedeé.

Paale alébe betəŋ ne bewōŋ bé betəŋ

⁵ Nyé betān nyéwógne' áben bewón. Nyébage bó edúbé nyéwógne-'ε bó ne nlém nhóg, melemlem ngáne nyéwógneé Krístaa.

⁶ Nyéebenlé bó dásó á pónde eché bényíneé nyé ábel békémed nyé. Bon nyé, nēngáne betān ábe Krístaa, ábele áde nyébenléé Dyöb ábid nyé á nlém-té.

⁷ Nsón ké ríhéé míme nyébeléé, nyébel mó ne kán esyā́l. Nyébele mó byánán Dyöb dósó nyébenléé saké baányon.

⁸ Nyébii nén bán mod téé ákud nsábe áyāle nsón mí bwām ké ríhéé míme ábéle. Ábē ké ntān ké'ε kunze.

⁹ Nyé bad-te ábe nyéwóó betān ásē echēn, nyécháá áben betān bwām. Nyéékímmé bó bán bétāg. Nyébii nén bán nyāābō moosyā́l nyédé ásē e Sāngwéé, nhóg awé adé ámin, eékwōgnād-taá modmod.

Ngáne bad ábe bédúbpé bétāngéné Satane atāngen

¹⁰ Asóged, nlnānge nyé nén meé; Nyébē nyébē ne Sāngwéé ábel bon eche ngíne eche ewúú áte éwéd nyé nlém á abum.

¹¹ Nyétéd bwēm é' nzum é'syā́l ábe Dyöb ábágé nyé ábel bon nyéhel akwáb áde Satane atóm áte.

¹² Nzum eché déwaneé eésaá nzum eche déwaneé ne baányon. Bon ngume, ngíne, ábāb benkamlené ábe békamlan nkōnsé mé ehintén ne ngíne é ebébtéd éche edé ámin, bóó déwanneé nzum.

¹³ Né-óó, nyétéd bwēm é' nzum é'syā́l ábe Dyöb ábágé nyé ábel bon nzé pónde e ebébtéd epedé, nyéhel bó atyéemen. Nyéēwān nzum nyépid á asóg nyélyāg nyésūmēn ngáne nyémbēē.

¹⁴ Né-óó, nyébonjen nyékale mbále pónde esyā́l. Nzé nyébelé nē, ébē nēngáne mod awé awáá ngóó á nkg awé abōnséne ábel dyam. Nyébele mam míme métāngéné, áyāle ábel mekan míme métāngéné ádíí nēngáne mod awé ahédé mbóté eche bébénlé e'kii ákúten yā́l á pónde e nzum.

¹⁵ Nyébē nyékale' nkalan mí bwām. Mósó nípeene' nsan. Nzé nyébelé nē, né ébē byánán nyéhédé metāmbé á mekuu, mébēl nyésūmēn bwām.

¹⁶ Ámin e mímmé mesyā́l, nyébē nyédúbpé Yesu Krístaa. Adúbe ádēn débē nēngáne ekāngé éche ékóó nyé ábel bon mekon mé muú míme Satane álómméé nyé méebelé nyé dyamdyam.

¹⁷ Nzé nyékag awan nyébii nén bán nyékudé e'sooson á mekáá mé Dyöb, modmod éehēl-laá nyé dyamdyam ábel. Nyéēbē nēngáne nwan-é nzum awé ahédé ekóté eche bébénlé ekii. Nzé nyékag-ke nyétāngéné nēe nyéwānlé nkwtáe míme Edāádan éche Esáá ébágé nyé. Mmē nkwtáe ndé nēngáne eyale é Dyöb. ¹⁸ Nyékānne' pónde esyā́l ngáne Edāádan éche Esáá élyāgtéé nyé. Nyéláa Dyöb bán áwōngan nyé áyā́l é kéchéé éche nyébeléé. Nyétéd pónde, nyékānne' pónde esyā́l ésebán nyékóme'. Nyékānnad-te bad bé Dyöb bésyā́l.

¹⁹ Nyékānnad mémpē, nén bán pónde kéhéé nzé nhóbe meé nhóbe dyam, Dyöb débē me e'yale ábe é'tāngéné. Nén débēl méhēl bad nkalan mí bwām míme bad bēnkēnsōntēnné aláa, ésebán mbáa' dyamdyam.

²⁰ Yesu Krístaa apwedé me ábē míme mésénze, ákal mímmēn nkalan mí bwām, ene nzom chō'-aá ekóó bon mbé bōob nēe mod a mbwōg. Né-óó nyékānnad me nén bán Dyöb áwéd me nlém á abum níkal mímmēn nkalan mí bwām ésebán mbáa dyamdyam.

Paale ad Dyöb ánamed bad ábe bédúbpé

²¹ Tikikuse, awesyā́nē mwānyan a Krísto awé dédóó, ábenle Sāngwéé ne nlém nhóg. Mósó áláá nyé mekan tāngene me. Nén débēl nyébii ngáne nídíí ne chōm éche mbéleé.

²² Nlóme mós áwēn ábel bonj áláa nyé mam míme mébenlad ne sé, áwēd-te nyé nlém á abum.

²³ Nsaj míme Dyõb Titée awêd, ne eched Sáj Yesu Krístaa, mbê ne nyé, bad ábe bédúbpé. Bébel nyébê nyédəj nhóg ne aníníí, nyébê nyédúbe-'e Krístaa.

²⁴ Dyõb álúmed míme nsimé ne moosyál awě adə́ adə́ Sájú Yesu Krístaa, edəjge éche ébē abé ne abé.

Kálag eché Paalε áténlé Baá Filipi Ndibned ní kálag

Paalε mó áténlé mwembé níme rídé á Filipi enén kálag áde ábédé á mbwəg. Ábédé ndutul ne ayáge áde déetāngene áde bad bəmpəe bəyágté'áá. Kénεε nímén mekan mébénládtáá, Paalε ambé menyinge, ásūm-mε nlém áyāl e adúbe áde ádúbpé Yesu Krístəə.

Nzəm eche ekáə bon Paalε átél enén kálag edii áságnen bad bé Krísto bé Filipi áyāle nwōngen níme bəmbéé mó á pónde eche ántōgnēnnē nwōngen. Awédé bó nlém á abum, aláá-'ε bó áá bəbē bésūm mekuu. Acháa bó áá bəwōn asuded á yāl áde Yesuε, ésebán bəmwag bán mekan mé esii mé ekob é yāl mékamlan bó. Akamtan bó áá abé áde bédii mod nhóg ne Krístəə ádii nsimé ní Dyōb, áá Dyōb débəl-ε bəbē menyinge bəbē-'ε nsaŋ ábe áde bédii mod nhóg ne Krístəə.

Nkabted ní kálag

Paalε alénté, aságnéné, akánnéd-tε mwembé ní Filipi 1.1-11

Paalε áá ábé á nkōŋsé ádii ábele Krístəə, áwé-'ε débōŋndé mó 1.12-30

Paalε áá abé á bad bé Krísto ábē ngáne áde Krístəə 2.1-11

Paalε áá bad bé Krísto bəbē á nkōŋsé néε tintine 2.12-18

Paalε akené Timotiε bó Epafroditus 2.19-30

Paalε áá mod awé adúbpé Krístəə ákobnéd á'sō é' Dyōb 3.1-11

Paalε áá mod tée áwan áte ápid mam á asóg bwām 3.12-21

Paalε alébe bad bé Krísto 4.1-9

Paalε aságnan mwembé ní Filipi 4.10-20

Melenten mé asóg 4.21-23

Paalε alómmé bad melenten

¹ Mε Paalε, nchoo ne Timotiε, mε-εé ntenle nyé enén kálag. Sédii bembəlede ábe Yesu Krístəə. Ntenle bad bé Dyōb, bad ábe bédé mod nhóg ne Yesu Krístəə ábe bédé á Filipi, nchoo ne belyáged ne bad ábe bəwōngan ákεεn nsón ní Dyōb á'sō.

² Nsimé ne nsaŋ níme ríhúú ne Dyōb awéd Titée, ne Sáŋgú Yesu Krístəə níbē ne nyé.

Meságnen ne mekáne níme Paalε

³ Nságnan Dyōb áde níbenléε, pónde tée nzé nkámténé nyé.

⁴ Mbélé mbé menyinge pónde tée nzé nkánnad nyé moosyáál.

⁵ Mbélé mbé nságnen áyāle nwōngen níme nyékébeé mε ákal nkalan ní bwām, bootya á pónde eché nyéwógé mó, bon nyédúbe-'ε, ápe bəəb.

⁶ Ndúbpé mεé Dyōb áde ábóótédé nímén nsón ní bwām áfínté echén, dékεén mó á'sō káəŋ ápēēn mó á asóg á Epun éche Yesu Krístəə ápéé.

⁷ Ntāŋgéné enén ndín e mewēmten awōŋ áyāl e nyé baasyáál áyāle nyédé mε á nlém-té. Ké áde rídii á mbwəg, ne áde ríhóbeé mam tāngene nkalan ní bwām, nhóbe mεé nímén nkalan méesaá metóm, rídé mbále. Dyōb álúmté syánē moosyáál nímé nsimé ngáne débēnléé mó.

⁸ Dyōb áde mε mbōŋ nén áá nlém níme ríwōŋné nyé áte, rídé melemlen ne nlém níme Yesu Krístəə áwōŋné nyé.

9 Nkánne-'ε nén meé, edənge éche nyéwónné Dyöb ne éche nyéwóó ne nhós ne anínií ébê ékag á'só. Nkánne-'ε meé nyébii mekan mé Dyöb, nyésòñten-ne nharlén átinté e mekan mé bwám ne mekan níme méesé mekan mé bwám.

10 Nén débèl nyéèhèl mekan níme métómténé abon abii. Nén débèl nyéèsāñ-'ε á'só é' Dyöb, béekóbén-naa nyé awusé ké ahóg á Epun éche Krístā āpéé āmpē.

11 Nén débèl abé á bwám ádēn áde áhúú ne Yesu Krístā dényinnēd áyāl e mekan mé bwám mésyāāl níme nyébeleé, ábel bon Dyöb ákud ehúmé ne mekenag.

Paale ad abé á nkòñsé adii abele Krístā, áwē-'ε déboñéd mó

12 A-baányan, ndáó meé nyébii nén bán mekan níme mébénlédé ne me hén, níkó awóngeñ ábel bon nkalan ní bwám nikanlad níkag á'só.

13 Nén ábélé sánze ésyāāl éche éñone eyáde éche mod ambáá ne bad bémpēe bésyāāl hén, bébii nén bán ndé á mbwog áyāle nídií mbaledé awē Krístā.

14 Abé adé nídií-'ε á mbwog, áwédé ekud é bad ábe bédúbpé nlém á abum, bēnábpe nlém awón ákal eyale é Dyöb éseban bébáá' dyamdyam.

15 Edé mbále nén bán bó baahóg béwónné me kónji, béhede-'ε alúmed bán bédé etógnén tómaa me. Bon pen, bó baahóg-ke békale níme nkalan ne mewēmtēn mé bwám.

16 Bad ábe békale mó ne mewēmtēn mé bwám, békale mó áyāle bédáá me, bébii-'ε nén bán Dyöb ákwénténé áá mbê á mbwog hén ábel bon níhòb meé nkalan ní bwám méesaá metóm, níde mbále.

17 Abé ábe béwónné me kónji béekaléé nkalan ní bwám ne mewēmtēn mé bwám, békale mó áhede échab yāl chēn bwēm. Bébele nē, ne mewēmtēn nén bán níwóg ndutul abé áde nídií á mbwog.

18 Bon nén déewóó'ε dyam dé abel. Ayāl e níme menzii mésyāāl, nkalan níme Krístā mó békaleé, ké bébenlād mewēmtēn mé bwám, ké'ε mewēmtēn mé mbéb, ákal mó. Né-óó, áyāle nē, mēbē menyinge.

19 Mēbē mbé menyinge áyāle mbíí nén meé mekáne níme nyékánnadté me ne nwóngeñ níme Edáádāñ éche Yesu Krístā ébagéé me, bébèl níkúd e'sóoson.

20 Nwóó nlém áte ne menyinge mésyāāl, nlyágé-'ε nlém meé méewógké e'són, bon méwōñ e'wéd bé nlém á abum pónde ésyāāl, tanje bōb, ábel bon kéchéé éche níbeleé ébel ehúmé éche Krístā ényinned, ké ndé á alongé ké'ε nwédé.

21 Ne me, abé áde nídií á alongé adii ábele Krístā, nzé nwédé-'ε éboñéd me.

22 Nzé édé bán ndé á alongé mēbē níbeleé nsón níme ndé etógnén. Bōb-póó, meebíí'ε ped eche nítāngéné atéd.

23 Mmēn mekan mébe métyéémé me á'só-te, étómé me áte éche nítāngéné apwed. Ndáó meé nítede hén mbê ne Krístā, áyāle nén ábóó tómaa ábé á nkòñsé wén.

24 Bon áyāl echēn, édé etógnén bán nídií mbê á alongé.

25 Ndúbpé nén, mbíí-'ε meé mēbē mbé á alongé, mēbē mbé-'ε ne nyé moosyāāl ábel bon adúbe áde nyédúbpé Krístā ákwoge, nyébé-'ε menyinge áyāle nyédúbpé mó.

26 Nén débèl abé adé mébē ne nyé āmpē, nyéēnabé nzom awón ábe Krístā mekenag áyāl echēm.

27 Bōb-póó, abé ádēn átāngéné ábé ngáne Krístā áhóbeé áwē nkalan ní bwám. Nén débèl ké mpedé ányín nyé ké'ε meépede, mēbíí nén meé nyésumé

mekuu nêṅgáne mod nhóg, nyêwóó-'ε mewêmtεn mehóg áwan áte ákəə chòm éche nyédúbpé.

²⁸ Nyéebáá' bad ábe bétâṅgan nyé. Nlém níwúu nyé á abum pónédé ésyāāl. Nén délúméd nén bán béekudté e'sooson boṅ nyéékúd. Dyòb dś-'áá átíide nímén mésyāāl.

²⁹ Dyòb ábénlédé ábē e'boṅ bé nlém áwēn, saké ádúbe Krístəə dēmpen, boṅ kááṅ ne ákud metake áyāl e Krístəə.

³⁰ Syánē dewane nzum á yāl e nkaləṅ ní bwám bəəb. Melemlem mé nzum míme nyénnyínnē nwane' móə nídíi nwanéé bəəb.

2

Paale aá abé adēd abē nêṅgáne áde Krístəə

¹ Abé áde nyédíi nhóg ne Krístəə áwédé nyé nlém á abum, éché edəṅge-'ε épwiitad nyé nlém á abum. Nyédé nlatén ne Edəədəṅ éche Esáá. Nyélúmté' e'boṅ bé nlém, nyêwóó-'ε nlém ní ngəl ne nhóg ne aníníi.

² Mmém menyiṅge mēlōn mbon nzé nyêwóó mewêmtεn mehóg, nyélúmté melemlem mé edəṅge ne nhóg ne aníníi, nyêwóó nlém nhóg, nyédé-'ε nêṅgáne mod nhóg áyāl e kéchéé éche nyébeleé.

³ Nyéebēlē mekan míme mēlúmté bán échen yāl chēn chəə nyéhədtéé bwám. Nyéebēlē mekan míme mēlúmté nén bán nyédé kúmbé. Boṅ ne asuded á yāl, nyényín bad bēmpēe etógnén tómaa échen yāl.

⁴ Nyéebēlē mekan míme mēpiinad nyé bēn pən nsyāṅ, boṅ pən nyébele kááṅne mekan míme mēwōṅgan kááṅne bad bēmpēe.

⁵ Mewêmtεn mímēn mébē nêṅgáne míme Yesu Krístəə mémbēē.

⁶ Abédé nyaa eche Dyòb ádíi, boṅ kénē, enkénwōṅgé mewêmtεn nén aá móchəṅned nén móə bó Dyòb bétáá.

⁷ Enkəntédté yāl etógnén, boṅ ambēl eche yāl nêṅgáne mbəledε, bénchyāā-'ε mó nēε moonyon.

⁸ Áde abédé nēε moonyon, ansudéd eche yāl, ákwəntén-ne awé. Ankwəntén áwé kááṅ ne kwééd e awəg.

⁹ Né-əó, Dyòb dēmbē mó étál éche étómténé achab ámín, ábē-'ε mó díi áde átómé mín mésyāāl.

¹⁰ Dyòb dēmbēl nén ábel boṅ á díi áde Yesuε, nhəgtéd nísyāāl níbwōg mebóbōṅ, ké nhəgtéd míme rídé á nkoṅ nímín, á nkōṅ níse, ké'ε á mbwōg e baásē.

¹¹ Moosyāál áhōb aá Yesu Krístəə mó adé Səṅgwéé, ábel Dyòb Titéε ákud edúbé.

Nyébē átínté e bad ṅgáne tintine

¹² A-baányan bé edəṅge, ṅáne nyéyóṅké'áá mekan ábel míme Dyòb áhóbé aá nyébel áde níbéde ne nyé, édé etógnén bwámbwam bán nyébel mekan míme áhóbé aá nyébel, bəəb áde méesaá ne nyé. Nyéwōṅ mbwōg ní Dyòb áte nyésuded-tε yāl á'só é' Dyòb. Nyéwan áte bwámbwam ábel mekan míme Dyòb áhédéé, ábel boṅ e'sooson ábe nyékúde, é'lōn mbon.

¹³ Nyébel nē áyale Dyòb áde ne nyé pónédé ésyāāl, ábel nyéwōṅ nlém ábel mekan mé bwám míme áhédéé aá nyébel, nyébenle-'ε mó.

¹⁴ Nyébele' chōm ésyāāl ésebán nyényonṅe áte, nyépəntan-ne.

¹⁵ Nyébele nén ábel boṅ modmod eehóbé' aá nyêwóó atón dé mbéb ké á hóg á yāl, nyésāṅ-'ε. Nén débēl nyéēbē bán bé Dyòb ábe béewóó atón dé mbéb ké

á hóg á yäl, ábe bédé átínté e bad bé mbéb ábe bébele mbéb pónde ésyääl. Nyédé átínté echáb á nkõnsé-te nëngáne betintine ábe bépene'.

¹⁶ Nyébele nén akal áde nyékaleé nkalanj nímé n̄pene' alonjé áde déemaá'. Nzé nyébele nén mēbē kúmbe ne nyé á epun éche Krístæá ápéé áyāle nén déluméd bán awan áde n̄wáne'áá áte ne ntù nime mbéle, béebóó'é.

¹⁷ Mēbē nëngáne nzom e m̄in echē bésyógé ám̄in e nsón nime nyébeleé, nëngáne mende, áyāle adúbe áde nyédúbpé. Nhele-se ríkūd metake, nwé-'é áyāle nkale' nkalanj ní bwām melelem ngáne nyémpē áyāle nyédúbpé nímé nkalanj ní bwām. Bonj kénē ndé menyiñge mēwōgēn-ne nyé moosyāäl menyiñge.

¹⁸ Melelem nē dōo nyémpē nyétāngéné menyiñge awóg, nyéwógēn-ne mémpē menyiñge.

Paale atelé t̄āngene Timotiē b̄s Epafroditus

¹⁹ Nzé édé á ntii nime Sāngú Yesue, nwóo nlém álóm Timotiē áwēn mwāmp̄in ní pónde, ábel bonj p̄ole éche méwōgkē áyāl echēn, éwéd me nlém á abum.

²⁰ Meewóó'é modmod ampée née mó awé akoó nímé nlém awónj ádāñ dé ábii ngáne nyédíí.

²¹ Nhóbe nén áyāle bad ábe belyágé ásē échab yäl chōo bétōñtanné, béebeléé ngáne Yesu Krístæá áheḏéé áá bébel.

²² Nyé bēn nyébíí ngáne Timotiē álúmté áá móbele nsón bwām. Ábelé nsón ne me ákal nkalanj ní bwām ngáne mwān ábeleé nsón ne sáá.

²³ Né-óó, nlyágé nlém meé mēlóm mó áwēn áde ményínné ngáne mekan mēbēēnné me.

²⁴ Ndúbpé-'é nén meé Sāngwéé ábel mwāmp̄in ní pónde mmēn ámpē mēpē áwēn.

²⁵ Nnyiné nén meé édé etógnén me álóm awed mwānyāñ Epafroditus áwēn. Abele nsón nime Krístæá ne me, awōngan-ne átāngēn bad ábe bétāngan nkalanj ní bwām, mó-'áá abédé nëngáne mēsēnzē nime nyélómé áwōngēn me.

²⁶ Awóo nlém áte bwāmbwam ányin nyé moosyāäl, anwóg-ke ndutul áde áwógé bán nyéwógé bán mōnkolé.

²⁷ Edé mbále bán ankolé, ápōn-ne kóāñ ne awé. Bonj Dyōb dénwōg mó ngól, saá-kaá mwēmpēn, Dyōb dénwōg mémpē ngól. Enkēnkwētēnné áá áwé ábel bonj meenabpé abé á ndutul-té.

²⁸ Né-óó, nwóo nlém áte bwāmbwam álóm mó áwēn ábel bonj nyéwōg menyiñge ányin mó ámpē, me-'é ámpē meébūdē atag áte áyāl echēn.

²⁹ Né-óó, nyéhē menyiñge ákob mó nken áyāle adúbpé Sāngwéé ngáne nyémpē nyédúbpé, nyébage-'é bad nëngáne mó edúbé.

³⁰ Nyébage mó edúbé áyāle ampon awé, abé-'é á nsal ní sonj abele áde ábenléé Krístæá. Ámbel nén ábel bonj áwōngēn me ábel nsón nime nyébēn nyéehēle'áá-se nyébel.

3

Bad ábe bédúbpé Yesue b̄óó békobnad á'só é' Dyōb

¹ Asóged a-baányāñ, nyébē menyiñge abé áde nyédíí mod nhóg ne Sāngwéé. Eetagtéé me átele nyé mekan nime mēnsēbēē nyé atele. Nén ádíí ákæá nyé.

² Nyétéd pónde ne ábē e'bébtéd é' bad. Echē mbwé, bad ábe béhóbe bán bétāngéné mod ayag.

³ Syánē-ée béyágé nyaa eché etàngéné. Edǎǎdǎn éwōngan syánē ábe Dyǒb edúbé ngáne débēnléé mó. Syánē dedé menyinge ngáne dedíí ne Yesu Krístǎa. Debíí bán baányonj béehelée-se béwōngēn syánē.

⁴ Kénē mmēn nwóó nzom ályág nlem á yǎl e mekan mé moonyonj. Kénzée átínté echēn awé awémtnéé aá mówóó nzom ásum nlem á yǎl e mekan mé moonyonj né nwóó nzom tómaa nē.

⁵ Ade béchyáá me bēn'yág me ámbíd e epun saámbé. Ndií mod a Israel awé abídé á túmbé e Benjamin. Echem sánj ne nyanj bēbédée bad bé Hibru. Mbédée mod a Farisia, níhídē mbéndé ngáne éhóbée.

⁶ Menwónj kán áte bwámbwam nyaa eché nē dēmbēnlé nítagté elad é bad bé Krístǎo. Modmod eéhele'áa-se ahób aá nwóó atón dé mbéb ké ahóg áyāl, áyále níhídé'áa mbéndé é bad bé Israel ésyǎal.

⁷ Bonj ábē bwēm é'syǎal ábe nínyíné'áa nēe nsyǎn béesaá dyam dé abelen bǎǎb, áyále chǒm éche Krístǎa ábēnlé me.

⁸ Saké nē dēmpen, nnyíne chǒm ésyǎal meé éesaá dyamdyam nze nhǎgténé chǒ ne ndǎle e dyam eché edé ábii Yesu Krístǎa, awem Sǎngwéeé. Áyāl éché chǒm esyǎal éesaá dyam dé abelen, nnyíne-'e chǒ nēngáne mbinde ábel bonj níbii Krístǎa,

⁹ níbē-'e mod nhóg ne mó. Saké ahíd á mbéndé dǎǎ akás bonj níkobnéd á'sǒ é' Dyǒb. Bonj nkǒbnédé á'sǒ é' Dyǒb áyale ndúbpé Krístǎa. Dyǒb-paá ábélé bonj níkobnéd áwe e'sǒ áyale ndúbpé Krístǎa.

¹⁰ Ndǎǎ meé níbii Krístǎa níwónj-'e ngíne eché ánwōngē áde ámpuú'ée. Ndǎǎ meé níbē níkude metake melemlem ngáne ánkudté. Ndǎǎ-'e meé níkud metake ngáne ánkudté kǎǎn béwúu me ngáne bēnwúú'ée mó.

¹¹ Nlyágé nlem nēn meé nímén mésyǎal mébēnléd ábel bonj Dyǒb ápuud me ámbíd e kwééd echēm.

Paale ad mówane áte ápid mam á asóg bwám

¹² Meehóbéeé nēn meé nmaa nímén mekan amad ké'e meé nmaa atyéem á menzii mésyǎal. Bonj ndii nwane áte ábē nyaa e mod eché Yesu Krístǎa áhédé'áa aá níbē áde ápwédé me.

¹³ A-baányan, meehóbéeé nēn meé mmadé chǒm ésyǎal. Bonj dyam ahóg áde níbēléé ádíí, áchaten mekan níme métómé ámbíd ne áwan áte áhíd mekan níme méhúé' á'sǒ.

¹⁴ Ndií nwane áte áke á'sǒ kǎǎn nípe wée nítàngéné asóg ábel bonj níkud nsábe níme Dyǒb ábánnédé me ádyǒb. Achēnle me aá níke ádyǒb mbwiined ne Yesu Krístǎa.

¹⁵ Syánē moosyǎal awé demaá akwǎg á adúbe té déwále nímén melemlem mé mewēmten tǎngene nímén mekan. Bonj nze édé bán nyéwóó mewēmten mémpēe tǎngene nímén mekan, né Dyǒb déwōngēn nyé ásǒnten mó bwám.

¹⁶ Kénē-'e detàngéné déhídé mekan níme syánē demáá abii.

¹⁷ A-baányan, nyéladten nyébé nyéhíde nímmem mekuu, nyénǎne-'e bad ábe bébele ngáne nyényínné ngáne sébéláá.

¹⁸ Nkǎnlé'áa nyé ngen ne ngen, bǎǎb-pe ámpē nlǎnge nyé ne mēsǎd tǎngene bad híin ábe nímbāb mbéltéd nílúmtéé nēn bán bédé bad bé ekǎyí tǎngene nkalan níme níhóbe kwééd eche Krístǎa áwédé á awǎg.

¹⁹ Echén ndín é bad ádab asóg ádíí dú á muú. Chǒm éche ékamlan bǒ édíí mekan mé esíí mé ekob é yǎl. Bédás ábel mekan níme bétàngéné békwaagne. Mekan mé nkǒnsé mémpen-naá békamtanné.

²⁰ Bonj syánē pen dedii bad ábe echab mbwǎg édíí ádyǒb. Desine-'e awesyáné Nsoode, Sǎngú Yesu Krístǎa bán ábíd ádyǒb átim ámbíd á nkǒnsé.

²¹ Abenléd eche ngine eche abenladté ákamlen chöm ésyāāl, áhəŋɛn echesyānē yāl é nkòŋsé, yāl éche éewóo ngine, ábel bon dékud ndəle é yāl ngáne ánkudté áde Dyób dɛmpuúdté mó.

4

Paale abagé elébe

¹ A-baányan, ndəó nyé anyín ámpē áyāle ndəó nyé bwámbwam. Nyébelé ndé menyinje nyéde-’ε nēŋgáne nsábe nímmém áyāl e nsón míme mbéle. Né-óó, a-baányan bé edəŋge, nyébé nyésum mekuu tənŋene adúbe áde nyédúbpé Səŋgwéé.

² Ncháa nén meé Yudia bó Sintike bébé á nchemten áyāle bó bad bébe bédii baányan bé Krísto.

³ Nlənŋe wémpē, awem nsón a nsón awé níyágé nlém áyāl, nhede meé éwōŋŋen ábén bebaád ábe nsan. Abén bebaád bébe, Klemene ne bad bé nsón bémpēe bébedé me benben. Syáábəó sɛbéle ntū ábel bon níhel nkaləŋ mí bwám akal. Mmab mīn mésyāāl méde á kálag e alongé.

⁴ Nyébé menyinje pónde ésyāāl áyāle nyédii bad ábe Səŋgwéé. Nhóbe ámpē, nyébé menyinje.

⁵ Abé adén áluméd á’só é’ bad bésyāāl nén bán nyéchedne bad yāl. Səŋgwéé akwogé apɛ.

⁶ Nyéetāgē áte áyāl e dyamdyam. Bon pɛn áyāl e kéchéé éche étané nyé nyékāne Dyób nén bán ábe nyé chóm éche nyétógnéné. Nzé nyékāne-’ε nyésāgnān mó.

⁷ Nzé nyébelé-’ε nē, Dyób dɛbɛl nyébé nsan, nsan míme níchábé ámīn tómaa ngáne baányan béhele bésōŋten. Mmēn nsan mēwōŋŋen nyé ábel bon nyéetāgē áte abé áde nyédii bad ábe Yesu Krístəə.

⁸ Asóged a-baányan, nyékamtan ábén bwēm pónde ésyāāl. Nyékamtan kéchéé éche éde mbále, kéchéé éche ékwógnédé chöm éche ebóó, kéchéé éche étāŋgéné, kéchéé éche éewóo atón dɛ mbéb áyāl, kéchéé éche bad bétāŋgéné adəŋ ne kéchéé éche nyényíné bán ébōŋnédé nyé. Nyékamtan mekan míme mébóó bwámbwam ne míme bad béhóbéé bán mébóó. Echén ndín é mam chəó nyétāŋgéné ahé á mewēmten-tɛ pónde ésyāāl.

⁹ Kéchéé éche ní’yágté nyé bon nyékōb-pe ne kéchéé éche nyéwógé awēm ne éche nyényíné néε mbéle, nyébele chó. Nzé nyébele nén, Dyób, mó awé abage nsan, ábɛ ne nyé.

Paale aságnéné nwōŋŋen míme akúde

¹⁰ Abé áde nídí mod awe Səŋgwéé, ábéle ndé menyinje bwámbwam, áyāle káŋne á asóg nyélúmté bán nyébōŋge me. Mbíi nén meé nyéwóó mewēmten ábóo me pónde ésyāāl, bon etál éebagnedéé nyé ábel áned.

¹¹ Meehóbéé nén áyāle ntóge’ chöm. N’yágkə ákob kéchéé éche étané me á alongé.

¹² Mbíi ngáne mod ábáŋkə ésebán awóó chöm éche átógnéné, mbíi-’ε ngáne ébáŋkə mod ábud dɛ awōŋ chöm éche átógnéné. Mmēnténé ákob kéchéé éche étané me. Mmēnténé abé áde níbudé chöm éche níyáŋkə awōŋ, nímmētén-ne ádyɛɛ nzaa. Mmēnténé ábe áde níwóó tómaa ngáne nítoŋnéné, nímmētén-ne abé áde méewóó’ é chöm éche nítoŋnéné.

¹³ Kéchéé éche étané me, ngine eche Krístəə abagéé me ébɛl métōm chó áte.

¹⁴ Nyébelé bwám áwōŋŋen me áyāl e nímmém metake.

¹⁵ Nyé bad bé Filipi nyébíí bwâm nén bán áde mbóótédé nkalaní m'í bwâm akal áde mbídé á Macedonia, nyé bēnpēn-εέ nyébédé mwembé míme ménwōngēn mε.

¹⁶ Ké áde mémβēē á dyad á Tesalonika, nyénlómé mε nwōngēn ngen ne ngen.

¹⁷ Meehóbéé nén áyāle nhede mεé nyélómme mε ndε. Bon nhede mεé rinyine' ngáne Dyób ánamtéé nyé anamed ne anamed.

¹⁸ Nkudé chóm ésyāal éche nyékélómēē mε, nkūd-τε ké tómaa nê. Epafrodituse ampiiné mε bwēm ábe nyénlómēē mε. Edii byánán nyébagé Dyób ndε eche ewóó elod é bwâm. Dyób ákóbé nímē mende, mébóηnédē-ε mó.

¹⁹ Adém Dyób débē-ε nyé kéchéé éche nyétógnéné áfinté e nímē nkúú mé nhān, mbwiined ne Yesu Krístā.

²⁰ Ehúmé ébê ne ádεδ Dyób, awêd Titée á ngíndé ne á ngíndé. Ebê nê.

Melenten mé asóg

²¹ Nyéleled bad bé Dyób básyāal ábe bédúbpé Yesu Krístā. Abesyánē baányan ábe bédé ne mε bélómmé nyé melenten.

²² Bad bé Krísto básyāal bélómmé nyé melenten, bwāmbwam abum á ndáb áde Kaisεε.

²³ Nsimé míme Sánjú Yesu Krístā míbê ne nyé moosyāól.

Kálag echê Paalε áténlé Baá Kolose Ndibned ní kálag

Paale, mbapεε a nlomag nhóg awe Yesu Krístæ mós antél enén kálag áde ádíí á mbwóg á dyad á Roma. Antelé bad bé dyad á Kolose. Saké Paale andibé mwembé míme mbédé á Kolose. Epafrase mós andibé mwembé míme mbédé áwed. Epafrase ambé á dyad á Efesus. Anwóg eyale é Dyòb áwed, adúbe-ε Yesu Krístæ. Anhidnéd échê eyale, áke ákal chó á Kolose, ádíbe-ε mwembé áwed. Ambíd e pónde, Paale anwóg nén bán bemeléede bé metóm bépééné ayáge áde déeboó á mwembé-te wê. Abé bemeléede béyágté'áá nén bán, kénzée awé ahede' Dyòb abii, awé ahede-ε e'sooson akud, atánjéné néε ábageé ngíne ne benkamlene bé nkòjsé edúbé. Bán mod atánjéné-ε néε áhídeé mbéndé néε áyag mod ne áhíd mbéndé émpée tánjéne ndyééd échê mod éétánjéneé adyé, ne ekud é mam émpée. Mmén mekan mészāāl-ló mós ménkñ bon Paale áténlé bad bé mwembé mé Kolose enén kálag, áleb bó ábel bébii mbále tánjéne Yesu Krístæ ákamlen bad bészāāl ne ákamlen ngíne é nkòj rísé ne nímín. Mwênpen-naá ahele ahúd syáné á mbéb-te.

Nkabtéd ní kálag

Ndibned ní kálag 1.1-8

Nsón míme Krístæ 1.9-2.19

Alonjé dékōālē ábe ne Krístæ 2.20-4.6

Nsógten 4.7-18

Paale alómmé bad melenten

¹ Mε Paale, mbapεε a nlomag nhóg awé Yesu Krístæ, ngáne Dyòb átíídé mε-éé ntenlé nyé enén kálag. Se Timoti, awesyáné mwányan a Krísto, sélómme nyé melenten.

² Ntenle nyé bad bé Dyòb ábe nyédé á dyad á Kolose. Nyédé ne Krístæ, nyéhíde-ε mós ne nlém nhóg. Nsimé ne nsan ní Dyòb Titée awéd mbé ne nyé.

Paale aságnéné Dyòb á mekáne-té

³ Pónde téé sékannad nyé, séságnán Dyòb, Sáá awé áwed Sánjwée, Yesu Krístæ.

⁴ Séságnan Dyòb áyāle séwógé bán nyédúbpé Yesu Krístæ, nyédáá-ε bad bé Dyòb bészāāl.

⁵ Sébíí nén bán nyébele' né áyāle nyésumé nlém nén bán nyéékúd nnam míme Dyòb ákónnéde nyé ámín. Nyémmád mam awóg tánjéne nímé nnam áde bésébpé nyé nkalan ní bwám ní mbále akale.

⁶ Mmén nkalan ní bwám mé nsimé ní Dyòb ríkanlad mebwóg ne mebwóg ríak á'só. Epun e é'só éche nyéwógé nyénsòntén bán Dyòb ákónté nlém ní bwám awón ne bad bé mbéb.

⁷ Epafrase, mbáledé awe Yesu Krístæ mós ankalé nyé nímé nkalan. Adíí mod awé syāābō sébele' nsón, sédāá-ε mós bwāmbwam. Abenle' Yesu Krístæ ne nlém nhóg. Abé áde ádíí-ε ne nyé, nsón míme séntánjénné ábel mós ábeléé.

⁸ Mós alánjé-ε sé áá Edáádān é Dyòb ébélé nyédáá bad bé Dyòb.

⁹ Né-óó, bootya pónde echê séwógé nímén mam, sékannad nyé pónde téé. Sékánne nén bán Dyòb ábel nyékonj chóm éche áhídeé áá nyébel asòntén. Sékánne nén bán Dyòb ábe nyé debyée ne nsòntén ábel nyésòntén mam mé Edáádān bwám.

10 Nê débêl áden alongé débē ngáne alongé áde bad bé Dyöb átáŋgéné abé. Nyéēbele' mam nímé méwógte mós menyíŋge. Mekan mé bwám mós ne mós-éé nyébeléé. Nyaa echē nyésōŋtēn-naá Dyöb, échāgkē acháge ne acháge.

11 Sêkânne-'é ámpē nēn bán, Dyöb ábē áwēd nyé áte ne echē ngum echē echabé ámín, ábel nēn nyéhēl awēsēn, nyékan nlem, nyébé-'é menyíŋge áyāl e mam mésyāal.

12 Nyéēsāgnēn Titée áyāle chōm ésyāal. Mós-'aá abelé boŋ nyékwognéd ábē bad ábe békobe akab á bwēm ábe ákōŋnédē ábē bad hōm áde e'nyínen bé ekíde é'díi.

13 Ahúdé syānē ásē e ngíne e nkamlēne a ehíntén, apēséné syānē ásē e nkamlēn nímē awe Mwán a nlem.

14 Dyöb álágséné syānē nímēd mbéb akode áde ákódté syānē ne mekií nímē awe Mwán ásyógé á awōg.

15 Modmod eenyínnéé Dyöb díd. Boŋ bad bénsōŋtēn ngáne Dyöb ádíi áde bényíné Krístā áyāle adíi nwágén ní Dyöb.

16 Edé nē áyāle, mbwiined ne Krístā dōo Dyöb áhágé bwēm é'syāal á nkoŋ ní mín ne rísé. Ahágé bwēm ábē bényínnéé díd ne ábē béenyínnéé díd. Mós ahágé benkamlēne, ne ngíne ésyāal. Dyöb áhágé bwēm é'syāal mbwiined ne mós, mós-'aá Dyöb áhágkē ábē bwēm é'syāal.

17 Bédēhōb bán béhage' kéchéé á nkōŋsé-te né Krístā adé alongé. Mós-'aá akáso boŋ bwēm é'syāal ébē á e'díi.

18 Mós adé nló nímē bad ábe bédúbpé mós, bós-'aá bédé nēngáne eche yāl. Mós abage ábē bad alongé áyāle mós adé mod a'só awē Dyöb ápúúdté awē ábē-'é abé ne abé. Nēn dēmbēnléd ábēl nēn ábē nkamlēne ámín mekan mésyāal.

19 Mmēn mekan médé nē áyāle nēn Dyöb dēn-éé ádē.

20 Dyöb dēmbēl nēn áá chōm ésyāal étim ásē ne mós Dyöb mbwiined ne Krístā. Abén bwēm é'bédé bwēm bé nkoŋ rísé ne bwēm bé nkoŋ ní mín áyāle ásyógé ádē awe Mwán ásyógé mekií á awōg. Bōob-pōo, chōm ésyāal éhele ébē nsaj ne Dyöb.

21 Nyé ne nyé nyēmbé nchabned ne Dyöb, nyáābe Dyöb nyéebédéé áyāle mewēmten mé mbéb nímē nyénwōŋ' é ne mbéltéd mé mbéb nímē nyébéléé áá.

22 Boŋ bōob, Dyöb ábélé nyétimé ásē ne mós, awé áde awe Mwán Krístā awé abédé moonyoŋ áwédé á awōg. Dyöb dēmbēl nē ábēl nēn nyébé wéé módíi, nyébé bad ábe bésáá, nyéewóo atón dé mbéb ké ahóg á yāl, béékōbnē-'é nyé awusé ké ahóg.

23 Ebē nēn bán áden adúbe adíi awúú áte nyéehúdē-'é mekuu ásē ne asum áde nyésómé nlem áyāl e nkalan ní bwám nímē nyéwógé. Mmē nkalan ní bwám nímē nyémáá awóg, rídíi nkalan nímē níkánlédé nkōŋsé áte nisyāal mós-'aá me Paale, nítimé mbāledé a Dyöb ákal.

Nsōn nímē Paale

24 Ndé menyíŋge bōob ne metake nímē níkudéé áyāl echēn. Ngáne níkudéé nímēn metake, mmāde metake nímē Yesue nímé nítáŋgéné abé, áyāl eche yāl, nédē bad ábe bédúbpé mós.

25 Dyöb ábélé me mbāledé ábele bad ábe bédúbpé Krístā. Alómé me áá níkoŋ nyé échē eyale akale bwám.

26 Bōód, éché eyale émbē dyam ádē bad bēnkēnsōŋtēnné. Boŋ bōob ábele ábē bad bēbíi chō.

27 Dyöb áhede' nēn áá ábē bad bēbíi nēn bán nhōn ne ehúmé éche Krístā édé kōŋne ne bad ábe béésē bad bé Israel. Kun eché edé áwēd-te edíi nēn bán, nyésómé nlem nēn bán nyéékūd ehúmé éche Dyöb áhóbé áá mósóbē ábē bad.

²⁸ Né-'áá ákás bonj sélāngē bad t̄n̄gene Kr̄istāa kéhéé wéé sékagkē. Sélébe', séyāgtē-'ε bó ne debyéé ásyāāl áde Dyōb ábágé sé. Sēbele nē áyāle sēhede nēn bán békobned á'sō é' Dyōb nēngáne bad ábe mekuu mémáá awédned ásé á adúbe-tē.

²⁹ Bonj nwane áte bwámbwam. Ngum echē Kr̄istāa eche edé me áte, chó-'ε ebage me ngíne áwan áte.

2

¹ Ndáó mēé nyébii ngáne níkémpéé awan áte áyāl echēn, ne áyāl e bad bé dyad á Laudesia, nyébii-'ε ngáne níkémpéé awan áte áyāl e bad bēmpēe ábe béenyinnē me díd.

² Mbale nē áwéd bó nlém á abum ábel bonj edānge eche edé áfintē echēn ébel nyébē mod nhóg. Nhede me nyāábō nyésum nlém ne asum ásyāāl nēé bad ábe bésónténé dyam á Dyōb áde bad bēnkénsónténé. Adē dyam-me ádii Kr̄istāa mwēn.

³ Kr̄istāa móō ahele ábel bonj nyēwōn debyéé ásoñten mekan mé Dyōb. Mmē mekan méde etógnén bwámbwam.

⁴ Nlānge nyé nēn ábel bonj mod eédogné nyé e'nyin bé nsal áte se nyēwémten nēn bán dyam áde álāngeé nyé átāngéné.

⁵ Ndáó mēé nyébii nēn bán kénéé mmēn méesaá ne nyé, ndé ne nyé é edáádān. Kénéé méesaá-'áá ne nyé, ndé menyinge nēn adúbe áde nyédúbpé Kr̄istāa ályágé adé ngíne.

Bad bé Kr̄isto béesaá ase e mbéndé é nkōñsé ámpē

⁶ Né-óó, ngáne nyékóbé Kr̄istāa nēé Sāngwéé awēn, nyébē nyébele' ngáne áhedeé.

⁷ Adúbe áde nyédúbpé chōm-éé ábēn bemeléede béyāgté nyé edé mbále. Nyéságnan-ne Dyōb pónde tē áyāle chōm ésyāāl.

⁸ Nyēmwāg-se mod atéd nyé ntān áhíd e'hóhó bé áyāge dé metóm áde béyāgté. Áyāge adē béyāgtéé nyé ádii áyāge adē békóbé wéé ábāb betaa ne áde áhíde mbéndé é mekan mé nkōñsé. Adē áyāge ádii áyāge adē áhúú ne baányon ngēn déehúú'ε ne Kr̄istāa.

⁹ Nyēmwāg-se ábē bemeléede bé metóm bédog nyé áyāle nēn ngíne ne abé á Dyōb adé yāl e moonyon echē Kr̄istāa áte.

¹⁰ Né-óó, nyelóné mbon áyāle nēn nyédé ne Kr̄istāa, Mó-'áá akamlan ngíne ne benkamlené bésyāāl.

¹¹ Abé áde nyédii ne Kr̄istāa, Kr̄istāa ayagé nyé. Eesaá nēngáne moonyon áyāgeé mod. Kr̄istāa mó ayagé nyé é edáádān-tē. Ahúde áden abé dé mbéb.

¹² Ade bēndusénné nyé, edé nēé nyēnwé, béliímé nyé, Dyōb ápuūd-te nyé ne Kr̄istāa. Nēn dēmbenléd ne nyé áyāle nyēndúbé nēn bán ngíne e Dyōb echē epuúdté Kr̄istāa épúúdté nyēmpē.

¹³ Ngen e'só nyēmbé byánan nyēwéde áyāle nyébóó'áá mbéndé é Dyōb. Ene pónde-'ε ne Kr̄istāa éehúdeé nyé abé dé mbéb áyāl. Bonj bōob, Dyōb ábágé nyé alonjé dékōlē apuud áde ápuúdté syáné ne Kr̄istāa. Alāgséné syáné níméd mbéb n̄syāāl.

¹⁴ Edé nēngáne apinné mbéb nímé syáné wéé ántenlé mó. Nédé nímé mbéb méesaá ámpē. Dyōb ábómmé nímé mbéb á awōg abome áde bēbómmé Kr̄istāa á awōg bonj awé-'ε.

¹⁵ Dyōb déntóm ngíne ne benkamlené bé nkōñsé áte. Atóm áde ántōmmé bó, dényinnéd ne moosyāāl ne awé áde Kr̄istāa ánwēé á awōg.

16 Né-ɔɔ, nyéēmhwāg-se bad bēlāngē nyé bán nyébelé awusé áyāle nyédyákgē donje dé medyé, ké'ε áyāle nyémwāgkē donje dé mmítéd, ké'ε áyāle nyéebāgkē donje á ngande áse, ké'ε ngande eché ebāg nzé ngon étúbé túbén, ké'ε ngande e Epun é Nkóme áte.

17 Eché mbéndé ésyā́l ébédé-'ε néε e'diidinge ábē é'lúmté'áá mam mé bwám níme Dyób déntāngēnnē alóm. Krístā́ mós-'aá alónté nímē mam mésyā́l.

18 Nyéēmhwāg-se mod anyágéd nyé aá nyétāngéné yāl asuded. Nyéēmhwāg-ke se mod anyágéd nyé nén aá nyétāngéné ángel edúbé abe ngáne ábageé. Nzé nyébelé nē né nyéēbōd nde eché Dyób áhōbē aá mōsbē nyé. Kénzēé awé ayágte' nē, áhōbē' aá mōnyīnē á ndóg-te. Ene ndín e mod edé kúmbe ngén ne mekan mé mbéb níme mbíde' mós á nlém-té, bon eewóó'ε nzom ké póg ábē.

19 Ene ndín e mod esógé Krístā́ awé adé nló mí bad ábe bédúbpé adúbe. Ngáne nló níkamlané yāl esyā́l, melelem nē dōo Krístā́ ákamlané bad ábe bédúbpé mós bésyā́l ábel bēbē mod nhóg. Ngáne nsid níladéé mebon mé yāl mé mod bon abé mod nhóg, nē dōo Krístā́ áladéé bad ábe bédúbpé mós ábē mod nhóg áse eché. Mmē nlatén níkwoge-'ε ngáne Dyób átífidé.

Awé ne abé á alongé ne Krístā́

20 Edé bōob byánán awé áde Krístā́ áwédé, nyéwédé ne mós. Né-ɔɔ nyéēsaá áse e mbéndé é nkōjsé ámpē. Cheé-ɔ́ ékáá bon nyēbē nyéhídé' éché mbéndé byánán nkōjsé ndíi níkamlané nyé?

21 Abé bemeléede bé metóm bēlāngē nyé nén bán, “Nyéechāngé échén, nyéewóglán échíníí á nsəl, nyéēsítan éché.”

22 Eché mbéndé ésyā́l énonē' bwēm ábē bēebāg dyamdyam ámpē nzé mod amaa bós abenled. Eché mbéndé édíi mbéndé ne ayáge áde bad bēn bēhāgné nló.

23 Eché mbéndé ébelé ényinnāad byánán edé debyéé áte bwāmbwam áyāle nén, éyágte bad nén bán bēn bētāngéné néε bēwóó nlem ábel mekan mé mékámé ábel, álúmed nén bán békoo Dyób ahíd. Eyágte bad bán bésúded yāl, bēbane-'ε yāl á metake-té bwāmbwam. Bon ké bad bēnhūū éché mbéndé ahíd, éeheléé bós awōngēn ásoḡ mewēmten mé mbéb awōj.

3

1 Edé bōob byánán apuud áde Dyób ápuúdté Krístā́, nyémpē nyépuúde ne mós. Né-ɔɔ, nyébē nyóngé áyāl e mam mé mīn, wéε Krístā́ ádíí á nkamlen á ekáá émbáá é Dyób.

2 Nyébē nyésūm nlem áyāl e mam mé mīn, nyéēsūmē nlem áyāl e mam mé nkōjsé.

3 Nyébíi nén bán, awé áde Krístā́ áwédé, edé nēngáne nyémpē nyéwédé.

4 Krístā́ mós áde alongé ádēd, áde ápéé-'ε á nkōjsé-te wén nyémpē nyéēbē ne mós ne ehúmé ésyā́l.

Alongé dé nchun ne alongé dékōsē

5 Né-ɔɔ, nyéhúd mekan mé ekob é yāl nlem ne ahúd ásyā́l. Nyéhúd nlem áyāl e mam nēngáne, akáb dé mesón, mbinde é mekan, esíí é mam mé ekob é yāl, áwōj mewēmten mé mbéb ne ngoód. Nzé nyédé ngoód né edé nēngáne nyébage Dyób dēmpēe edúbé.

6 Dyób dékōsgēn bad bésyā́l ábē bēbele' échén ndín e mekan. Echén ndín é mekan élijsé' Dyób, né-ɔɔ, ákōsgēn bad ábe bēbele chós hēén.

7 Echén ndín é mekan chós nyébeláá ngen e e'só, áde esíí é mekan mé nkōjsé ékámlánáá nyé.

⁸ Bon bɔɔb mekan nêngáne meliŋgá, pél, ekoyí, ábèbed mod òn, ne ábèb nsal áte, nyètánǵéné mós asóg dé ábel.

⁹ Nyéekanlé' nhóg ne aníníí metóm. Nyéebèlè' nímén mekan ngáne édíí bán nyémaa áden abé dé mbeltéd mé mbéb atede.

¹⁰ Bɔɔb-pɔɔ nyémaa nkoɔb mékɔɔlè ahé. Dyòb áhédé nyé ádén alongé dékɔɔlè áte, akwoɔte-é dós ábel nyébè nêé mós, nyékoŋ-é mós awè ahegé nyé abíí bwám. Awón áde nyéwóó ádén alongé dékɔɔlè ábélè

¹¹ nhəŋlén méesaá áfinté e mod awè adé mod a Israel ne awè eesé, ké' e mod awè béyagé ne awè béeyagé. Ken mod adé mod a nken-ε, ken mod e ahin-té-ye, ken ntán-ε, ken kunze-ye. Krístə mós adé dyam ásyəəl adé-ε bó mod asyəəl áte.

¹² Né-ɔɔ, nyètánǵéné nlém rí ngol awón, nyètánǵéné nlém abon, nyètánǵéné-ε yál asuded. Nyètánǵéné apwiited, nyètánǵéné-ε awesen.

¹³ Nyètánǵéné nhóg ne aníníí awesen. Nzé mod bó waab békuú waab alágsén mós. Ngáne Sánǵwéé alágséné nyé, nyémpè nyètánǵéné nyélagсэн nhóg ne aníníí.

¹⁴ Ámin e nímén mésyəəl, nyédəŋ nhóg ne aníníí. Edəŋge chɔɔ élade' chòm ésyəəl.

¹⁵ Krístə abelé nyédé nsan ne nhóg ne aníníí. Né-ɔɔ nímé nsan rítánǵéné chòm ésyəəl éché nyébeleé alyáged. Nyètánǵéné nyésagnən-ne Dyòb pónde ésyəəl.

¹⁶ Eyale éche Krístə ébè nyé á nlém-tè bwám abé ne abé. Nyébenlad éché eyale ne debyéé ásyəəl áyáged ne áléb nhóg ne aníníí. Nyékónne' Dyòb ngase éche édé á kalag e Dyòb. Nyékónne' Dyòb ngase éche ékémte' Dyòb ne Krístə, ne nkánǵé ké nhéé nímé mípíde nyé ákémed Dyòb. Nyékónne' mós ásánne mós ne nlém rísyəəl.

¹⁷ Kéchéé éché nyéhóbeé, ké' e éché nyébeleé, nyébele chós á òn áde Sánǵú Yesu. Nyésagnan Dyòb Titée á òn á Yesu.

Alongé dékɔɔlè áde nyètánǵéné awón

¹⁸ Nyé bebaád bé bechóm, nyéwógne áben bechóm. Nê dós bad abé bédúbpé Sánǵwéé bétánǵéné ábel.

¹⁹ Nyé baachóm ábe nyéwóó bebaád, nyédəŋ áben bebaád, nyéetagté-ε bó ngén.

²⁰ Nyé bənbən, nyéwógne áben bésáá ne benyaá áyál e kéchéé éché nyébeleé. Nê dós Sánǵwéé ádós aá nyébe.

²¹ Nyé bésáá bé bán, nyéekanté áben bán. Nzé nyékante' bó, né nyésunte bó yál áte.

²² Nyé betən, nyéwógne áben bewón pónde ésyəəl. Nyéebenlé bó nsón dásɔ pónde éché bényínéé nyé ábel békémed nyé. Bon nyébenle bó ne nlém nhóg áyale nən Sánǵwéé mós nyébagéé edúbé.

²³ Nsón ké nhéé nímé nyébeleé, nyébele' mós ne nlém rísyəəl. Nyébele mós, nyébíí-ε nən bán Dyòb dós nyébenléé saké baanyon.

²⁴ Nyébíí nən bán nyéekūd nsábe nímé Sánǵwéé ákónnéde abé bad. Krístə mós adé mod awè nyékoo' é ábele.

²⁵ Dyòb dékəgsən kénzéé awé abelé mbéb áyál e mbéb nímé ábélè. Dyòb déekwognádté modmod.

4

¹ Nyé bad ábe nyéwóó betən ásé ehən nyéwále áben betən nyaa éché Dyòb áhedéé, nyécháə-ε bó bwám. Nyébíí nən bán nyémpè nyéwóó mod ámin awé nyédíí ásé éché.

Paale awéde' bad nlém á abum

² Nyébé nyéwéd yál áte á mekáne-tê. Nzé nyékánné-'é nyébanē nlém ne kéchéé éche nyélanḡéé Dyōb, nyésāgnēn-ne mó.

³ Nyékánned-te sémpē ábel nēn Dyōb ánedned sé nzii ákal nkalan tḡngene Krístā nīme bad békēnsōḡtēnnē bōōd. Mmē nkalan nīme níkaléé mōs níkáá boḡ mbé á mbwōḡ.

⁴ Nyékánné' nēn bán níkalé mó bwám nyaa echē rítḡngéné abel.

⁵ Nyébií ngáne nyébeleé mekan nzé nyédé ne bad ábe béédúbpe Krístā. Póndé téé eche etál ébāgné ne nyé, nyébenle' bō mekan me bwám.

⁶ Nzé nyáábōō nyékale', nyéched ehób á nsal, nyékale póle éche ébonḡte bad nlém á abum. Nzé nyébele' nē, né nyéēbií ngáne nyékwentanné kénzēé awé asédte nyé dyaḡ.

Melēntēn mé asōḡ

⁷ Tikikuse, mwānned a nlém a Krísto áláā nyé mam nīme mébenlad ne me hén. Mōmpē adii mbālede awé abenle Sāḡgwéé ne nlém nhōḡ nchoo ne me.

⁸ Nlōme' mō áwēn ábel boḡ áláā nyé ngáne sédií, áwéd-te nyé nlém á abum.

⁹ Nlōme' bō Onesimus. Onesimuse mōmpē adii mwānned a Krísto awesyānē awé dédáá. Mōmpē abenle Krístā ne nlém nhōḡ. Adii mod awé abidé áwēn dyad. Bō Tikikuse bēláā nyé mam nīme mébenlad hén.

¹⁰ Aristakuse awé sūmō bedé á mbwōḡ hén alēnté nyé. Banabase mwānyāḡ mōmpē alēnté nyé. Memād nyé aláā tḡngene Makose. Nzé apedé, nyékob mó nken.

¹¹ Yesue awé béchāḡéé bán Justuse, mōmpē alente' nyé. Abén bad bēláán bēnpen bōō bédé bad bé Israel ábe bédúbpe Krístā, ábe syáábōō debēle' nsón ákal nkalan tḡngene nkamlēn rí Dyōb. Békéwéd me nlém abum bwāmbwam.

¹² Epafrase mōmpē alēnté nyé. Mōmpē adii mod awé abidé áwēn dyad, abé-'é mbālede awe Yesu Krístā. Akánnad nyé póndé téé. Aá Dyōb dēn ábel nyékoḡ chōm éche áhēdeé aá nyébel abii, nyébel-le chō.

¹³ Mmēn mbíde' mó mbōḡ nēn meé abelē nsón bwāmbwam áyāle echēn ne áyāle e bad bé Krísto ábe bédé á Laudesia ne á Hirapōlis.

¹⁴ Lukase, dōḡte awé dédáá bō Demase, bōmpē bēlōmmé nyé melēntēn.

¹⁵ Nyélentēn me bānned bé Krísto ábe bédé á Laudesia. Nyélentēd-te me Nimfaa, ne bad ábe bédúbpe bésyāāle ábe bēbome' áwe ndáb.

¹⁶ Nzé nyémaá enén kálag aláḡ, nyélómm chō á Laudesia ábel bōmpē belāḡ chō. Nyémpē nyényín nēn bán nyéláá kálag echē nílómmé bad bé Laudesia.

¹⁷ Nyéláá Achipuse bán ányín nēn aá mōmadé nsón nīme Sāḡgwéé ábāḡé mó aá ábel.

¹⁸ Me Paale mmēn-éé mbēnlédé échēm ekáá átele nyé nīmēn melēntēn. Nyééchatán nēn bán ndé á mbwōḡ. Nsimé rí Dyōb níbé ne nyé.

Kálag e'só echê Paalε áténlé Baá Tesalonika Ndibned n kálag

Dyad á Tesalonika dóo ábédé nló mé alonj á mbwóg e Masedonia. Ade Paale ábídé á dyad á Filipi, ankê á Tesalonika ádíbē mwembé áwed. Ámbíd e póndé, Paale anhidé á Tesalonika áke á dyad á Beria. Anhidé áwed ámpē ákē á dyad á Kōrinto, áwed-taá ákúdé kálag echê mod awē búmō bébele nsón, Timotiε, álómmé mó, áláa mó tǎngene mekan míme mébenlad á mwembé míme rídé á Tesalonika.

Paale antelé mwembé míme ndé á Tesalonika, enén kálag e'só áwéd bó nlém á abum tǎngene adúbe áde bédúbpé Sǎngwéé bédǎŋ'-ε mó. Áwéd-te, ankamtén bó nyaa e alongé echê ánwōŋgē áde ábédé ne bó, ákōŋ'-ε bó mekan alúmed áte tǎngene epe éche Krístaa ápeé ámpē, éche émpεén mpuutéđ átínté e mwembé míme ndé á Tesalonika. Anlúméd bó áte ngáne áwóó nlém áte átim ámbíd áwáb ábel bonj áwéd bó nlém á abum tǎngene mam mémpēe míme ménōne' ádab adúbe. Anláa bó mekan míme bétǎngéné ábel áwóged Dyōb menyinje ne ngáne alongé ádáb átǎngéné abé asin áde bésinεé epe éche Sǎngwéé.

Nkabtéđ n kálag

Ndibned n kálag 1.1

Meságnen ne mekenag 1.2-3.13

Elébé tǎngene abé á bad bé Krísto 4.1-12

Elébé tǎngene epe éche Krístaa 4.13-5.11

Elébé é asóg 5.12-22

Nsógten n kálag 5.23-28

¹ Me Paale, nchoo ne Sailase bó Timotiε, me-εé ntenle' nyé enén kálag. Ntenle nyé bad ábe bédé á mwembé míme rídé á dyad á Tesalonika, nyé ábe nyéde bad ábe Dyōb Titée, nyébé'-ε bad ábe Sǎngú Yesu Krístaa.

Nsimé ne nsanj míme Dyōb nǐbē ne nyé.

Paale aságnan áyǎle adúbe

áde bad bé Tesalonika béwóó

² Séságnan Dyōb áyāl e nyé moosyáál póndé té, séhǎg nyé á mekáne póndé-té nzé sékǎnne'.

³ Nzé sékǎnne' ádeđ Dyōb eched Sǎnj, sébelé sékamtán nsón míme nyébeléé áyǎle adúbe áde nyéduǐpé. Sékamtan ngáne edǎnge éche nyéwōŋné bad bémpēe ébelé nyébele ntú áwōŋgen bó, nēngáne alyóg áde nyélyágé nlém áyāl e epe éche awesyánē Sǎngwéé, Yesu Krístaa, ábelé mekuu méwúú nyé asé.

⁴ A-baányan, sébíí nén bán Dyōb ádáó nyé apwedé'-ε nyé ábē ábē bad.

⁵ Sébíí nén áyǎle áde sémpεé áwēn bonj sékanlé nyé nkalanj nǐ bwām, sake e'yale bēnpen bóó sémpεénné. Bonj ngine e Edáádǎŋ éche Esáá chó embēl bonj sékalé nkalanj ne ngine, sēnkōŋ'-ε adúbe nén bán kéchéé éche séhóbéé éde mbále. Nyébíí ngáne abé ádeđ démbēē áde sémbēē ne nyé. Chōm éche énkǎŋ bonj ábē nē édíí áwōŋgen nyé.

⁶ Ne nyé, nyéhídé'áá nyaa e abé echê sénwōŋgē, nyéhídē'-ε abé áde Sǎngwéé. Edáádǎŋ éche Esáá émbēl nyéwóg menyinje akob áde nyénkobpé nkalanj míme sémpεénné áwēn.

⁷ Né-óó, abé ádeđ démbē nēngáne elǎŋsén átínté e bad ábe bédúbpé, ábe bédé á mbwóg é Masedonia ne Akaya.

⁸ Nyɛɛ nyɛkɔ́aɔ boŋ nkalaŋ nɛme Saŋgwɛ́e nɔ́wɔ́gnéd mebwɔ́g mémpɛe. Saké á mbwɔ́g é Masedonia ne á Akaya dɛmpɛn-ɛɛ nɔ́wɔ́gnédé. Boŋ adúbe áde nyédúbpé Dyɔ́b dɔ́mpɛ áwɔ́gnédé hóm ásyáál. Né-ɔ́ɔ, nzɔm ké pɔ́g eésaa eché sehóbeɛ áden akan ámpɛ tɔ́ŋgene nyé.

⁹ Abé bad bɛn bóo bétíme ahób ngáne nyɛnkobpé sé nken áde sépédé áwɛn. Béhóbe-’ɛ ngáne nyétímné Dyɔ́b, nyétáde-’ɛ abele á myɔ́b mé metóm boŋ nyébenlé Dyɔ́b dɛn áde áde á alonjé.

¹⁰ Béhóbe-’ɛ ngáne nyésineɛ epe éche Mwán a Dyɔ́b awé abide ádyɔ́b. Ane Mwán a Dyɔ́b, Yesue, awé asoo’ syáne áse e nkógsɛn ní Dyɔ́b nɛme níhúe’, móɔ Dyɔ́b dɛmpuúdté.

2

Paale abelé nsón á Tesalonika

¹ A-baányan, nyé bɛn nyébíí bán epe éche sɛmpɛé áwɛn, énkɛmbáá ngɛn.

² Nyé bɛn nyébíí ngáne sɛnkudté metake bɛwógéd-te sé e’són á dyad á Filipi. Boŋ ádesyáne Dyɔ́b dɛnwɛd sé nlém á abum, ákale nyé nɛmɛ Nkalaŋ ní bwám. Sékale’áá mó kénɛɛ édíí bán bad híin bétyéémánáá sé bwámbwam áyále béehede’áá bán sékale mó.

³ Chóm éche séláŋg’áá nyé bán nyébel, énkɛmbáá nɛn bán sɛnwón mewɛmɛn mé mbéb, káa bán ébédé chóm éche sɛnkéntáŋgɛnné abel ké-’ɛ ádog nyé.

⁴ Boŋ pɛn séláŋg’áá nyé mó, néɛ bad ábe Dyɔ́b ápwédé ákwogned dé akal nɛmɛ nkalaŋ. Né-ɔ́ɔ, sékale nɛmɛ nkalaŋ ní bwám saké áwóged moonoyon menyinje boŋ áwóged Dyɔ́b áde ábíí sé nlém áte menyinje.

⁵ Nyébíí bán áde sɛmbɛɛ ne nyé sɛebonje’áá nsál áte, ngoód-te eebédé sé áte. Dyɔ́b áde sé mbón áyál e nɛ.

⁶ Séehede’áá nɛn bán nyé ké’ɛ bad bɛmpɛe békɛne’ sé.

⁷ Kénɛɛ édíí bán sé nɛngáne bembapɛɛ bé nlómag ábe Krístaa, sɛnwón kunze ápɛmed nyé nted, sɛnkémpɛmtédte nyé, boŋ pɛn sɛmpwiitéd áfínté echɛn ngáne nyéɛ-mwán átágnɛɛ ábe bán.

⁸ Sédáa nyé bwámbwam, saké ákale nyé nkalaŋ ní bwám ní Dyɔ́b mɛmpɛn, boŋ kááŋne ábel nyaa eché séhele sɛwónjɛn nyé, áyále sédáa nyé bwámbwam.

⁹ A-baányan bé Krísto, ndúbpé mɛé nyékamtan nsón ne ntú ní ngíne nɛme sébélé. Áde sékánlé’áá nyé Nkalaŋ ní bwám ní Dyɔ́b, sébelé’áá nsón nkuu ne múte ábel boŋ séétagté nyé modmod.

¹⁰ Nyédé sé mbón, Dyɔ́b-pe ámpɛ áde sé mbón nɛn, áde sébéde áfínté echɛn, nyé ábe nyédúbpé, abé dénsán sé, sébelé’áá mekan nɛme métáŋgɛné, sɛnkénwón-’áá awusé ké ahóg á yál.

¹¹ Nyébíí nɛn bán sɛncháa nyé mod tée ngáne sáa-a-mwán áchɛŋgɛɛ ábe bán.

¹² Sɛwédé’áá nyé nlém á abum, sésímɛ-’ɛ nyé etúu áte áwón abé áde áwógte Dyɔ́b menyinje. Dyɔ́b dɔ́o áchɛnlé nyé ábe áfínté e ábe bad ábe ákamlanné ne ábe áse e éche ehúme.

¹³ Nzɔm empée edé eché ekáa boŋ sɛbagé Dyɔ́b meságnɛn pónde ésyáál. Ade sɛmpɛɛnné eyale é Dyɔ́b áwɛn, nyɛnwóg chɔ́, nyékɔ́b-pe chɔ́. Nyɛnkɛnkobpé chɔ́ nɛngáne eyale éche éhúu ne moonoyon boŋ nyɛnkob chɔ́ nɛngáne eyale éche éhúu ne Dyɔ́b, ngáne chɛn-ne ékónté abé. Eché eyale chɔ́-’áá Dyɔ́b ábenladté áfínté echɛn, nyé ábe nyédúbpé, áwónjɛn nyé.

¹⁴ A-baányan, melelem mé mam nɛme mɛmbɛnléd ne mwembé ní bad bé Dyɔ́b ábe bédúbpé Yesu Krístaa ábe bédé á Judeya, móɔ mɛbɛnlédé ne

nyémpē. Nyékudé metake á mekáá níme ábēn bad melemlen ngáne bómpē bēnkudté metake á mekáá mé bad bé Israel.

¹⁵ Abé bad bé Israel bó donje bēnwū Sánjú Yesue, bémpē-ε béwúú bekal bé'dáádāη. Abé bad bé Israel-ε bó donje-'aa bēnnān sé áwāb dyad-tē. Bēwógtéé Dyōb menyinje, bētyéeman-ne moosyāāl.

¹⁶ Bēbele nē ábel boη séekanlé bad ábe béesē bad bé Israel eyale é Dyōb, ábel boη béekudé e'soosōη. Bébáde mbéb ámīn e mbéb pōndé ésyāāl, káāηne á asóg-ke, Dyōb átāηgéné bó akógsēn.

*Paale awóó nlém áte ányin
bad bé Dyōb bé Tesalonika*

¹⁷ A-baányan, sēhšbe nēn bán sēpágnédé nyé á yāl á esōη é pōndé. Kénéε séesaá hōm ahóg ne nyé, sédíi sékamtan nyé. Ngáne sénwōηgē mewēmten bwāmbwam ányin nyé, sénwān áte bwāmbwam ányin nyé ámpē.

¹⁸ Nēn ábédé áyāle séhēdé'áá ape áwēn. Mmēn Paale, nwané áte ngen ne ngen ápe boη Satane enkēnháá sé etól.

¹⁹ Nyéε nyékáó boη séwōη e'lyág bé nlém, nyéε nyékáó boη sēbé menyinje, nyéε nyékáó-ε boη sékumé ekáá á tâl, áyāle nsábe níme sénōneé á'sō ákud á pōndé echē Sánjú Yesue ápēé. Nyébēn-εε nyékáó.

²⁰ Ne mbále, nyéε nyékáó boη sékumé' ekáá á tâl, boη sēbé-ε menyinje.

3

¹ Né-óó, áde sēnkēnhēnlé adyεε ésebán sēdé ne nyé, séntíi nēn bán séēdyéé ne sé bēn á dyad á Athens.

² Sēnlóm Timotiε, awesyānē mwānyan áwēn. Syāābōó sēbele nsón ní Dyōb ákal nkalanj ní bwām tāηgene Krístā. Sēnlóm mó áwēn áwōηgen nyé áwéd nyé áte á adúbe-tē ne áwéd nyé nlém á abum.

³ Sēhede bán áwéd nyé nlém á abum ábel boη nímēn metake méebelé'-se nyétimēn mbíd. Nyébēn nyébíi bwām nēn bán Dyōb áamá átíi nēn áa syāá baasyāāl deékúd nímēn metake níme nyékudéé.

⁴ Nyébíi nēn bán áde sēbédé ne nyé, sēnláá nyé á'sō é' pōndé nēn bán séékúd metake. Nyé bēn nyébíi-ε bán nēn dēn-εé ébēnlédé.

⁵ Nēn dōó dēnkāη boη nlóm Timotiε. Menkēnhēnlé nlém akanj ámpē, né-óó, menlóm mó áhye dé ahēd áte ngáne adúbe ádíi nyé. Membel nē áyāle mbáá'áá meé ane awē abele' boη bad béhún á mekágsēn-tē, ahēle ahúnéd nyé á mekágsēn-tē. Nēn délūmēd bán sēbelé nsón ngēn.

⁶ Bōób-pōó, Timotiε abidé áwēn apedé ámbíd áwēd, alāηgē-ε sé kase e nkalanj, áá nyédíi nyédúbpé, nyédíi nyédáó-ε nhóg ne aníníi. Alāηgē-ε sé áá nyédíi nyékamtan sé ne nlém ní bwām, áá nyédíi nyédáó sé anyin ngáne sémpē sédáó nyé anyin.

⁷ Né-óó, a-baányan, áttíntē e échēd ndutul ne metake mésyāāl, nlém níwúú sé á abum áyāl echēn. Adēn adúbe dōó áwédé sé nlém á abum.

⁸ Bōób-pōó, séēbē menyinje abé áde sédíi ámīn, ngáne mekuu méwúú nyé áse áyāle adúbe áde nyédúbpé Sāηgwéé.

⁹ Bōób sēhele sēságnēn Dyōb áyāl echēn. Sēságnan mó áyāle menyinje níme sédíi áyāl echēn áwe e'só.

¹⁰ Sékánne' nkuu ne mūte, bwāmbwam nēn bán séhēl ape áwēn ámpē, ábel boη dényīnen, séwōηgen-ne nyé ábel adúbe áwúú nyé áte.

¹¹ Nhēde meé ádesyānē Dyōb, Titéε ne awesyānē Sánjú Yesue bēlūmēd syānē nzii séhēl ape áwēn ámpē.

¹² Nhədé meé Sǎngwéé ábel edǎnge éche nyéwónǎné nhóg ne aníní ne bad bémpéé ékwog akwog ne akwog melemlem ngáne edǎnge éche séwónǎné nyé ékwogéé akwog ne akwog.

¹³ Sékǎnne' nén ábel boŋ Sǎngwéé áwəd nyé nlém á abum ábel nén nyéewóó' atǎn dé mbéb ké ahóg á yǎl, nyésǎŋ'-e á'só ábe ádesyǎné Dyöb Titée, áde awesyǎné Sǎngú Yesue ápéé ne ábê bad.

4

Nyéwónǎ abé áde áwógte Dyöb menyinǎge

¹ A-baányan séhóbe ámpé nén bán, nyén'yágé áwəd nyaa e abé eché nyétǎngéné awón, ábel boŋ nyéwóged Dyöb menyinǎge. Enén ndín e abé chó-'aá nyéwóó. Божь-рѳо, sécháa', sélǎnge-'e nyé á dín á Sǎngú Yesu nén bán, nyébê nyékeene' enén ndín e abé á'só.

² Nyébén nyébíi mam míme sén'yǎgédte nyé, sé nēngáne bad ábe Sǎngú Yesue ábágé kunze.

³ Dyöb áhede aá nyébê nēngáne bad ábe bésáá. Nyéekábé mesón.

⁴ Nyé mod-té ábii ngáne akóbeé eche yǎl.* Nyébele nê nyaa eché etǎngéné, ne nyaa eché nê débeé nyé edúbe áftinté e bad.

⁵ Yǎl échén éébǎg yǎl éche éwóó' esíi bwámbwam áyál e mekan mé ekob é yǎl ngáne bad ábe béebíi Dyöb béwóó'é.

⁶ Ayále ádén dyam, modmod eébēnlé mwányan epandé atéd-te chóm éche édé eché. Sēnláá nyé nímén mekan ngen e'só sésim-me nyé etúu áte nén bán Dyöb dékōgsēn bad ábe bébele nē.

⁷ Dyöb dénkēmpwēdté syánē áwónǎ abé á mbinde, boŋ ampwēd syánē áwónǎ abé áde ásáá.

⁸ Kénzée awé eekobe ayáge áde séyágté mó, saké moonyonǎ móo ábáá á yǎl, boŋ Dyöb dǎo ábáá á yǎl. Dyöb dǎo-'e ábage' nyé échē Edǎǎdǎŋ éche Esáá.

⁹ Nzom ké póg éesaá eché íntenlé nyé ngáne nyé mod téé átǎngéné mwányan adǎŋ, áyále Dyöb dēn ámáá nyé ayáged ngáne nyé mod téé átǎngéné mwányan adǎŋ.

¹⁰ A mbále nē dēn-naa nyédáá áben baányan bé Krísto bésyǎl ábe bédé á mbwóg e Masēdonia esyǎál. Kénē, a-baányan, sécháa nyé nén bán nyédǎŋ bó tómaa nē pónde ésyǎál.

¹¹ Sécháa nyé ámpé nén bán mod téé áwónǎ alongé áde ápwítédé, modmod eénōnē chóm éche waáb ábeleé, mod téé ábele-'e míme nsón. Nén dǎo sēnláá'é nyé bán nyébele'.

¹² Ábel áde nyébenlé nén, bad ábe béedúbpe, bébeé nyé edúbé, nyé mod téé ábōngē-'e eche yǎl.

Sǎngwéé ápē tǎléd

¹³ A-baányan, séhede bán nyébíi mbále tǎngene bad ábe béwédé, ábel boŋ nyéelēbē nēngáne bad ábe béewóó e'lyág bé nlém.

¹⁴ Ngáne sédúbpe nén bán Yesue anwé, ápūū-'e, sébíi nén bán áde Yesue ápéé, Dyöb débēl bad ábe bédúbpe ábe béwédé, hépuú, bébé ne Yesue.

¹⁵ Ayáge áde séyágtéé nyé boob ádii ayáge áde Sǎngwéé. Adé ayáge ádii nén bán, syánē ábe déēbē á alongé epun éche Sǎngwéé ápéé, déebáá á'só se bad ábe béwédé bébé ámbíd.

* **4:4** Nyé mod-té ábii ngáne akóbeé eche yǎl; Donge á kǎlag áwóó Nyé mod té ábii ngáne áchǎngéé mwadd.

¹⁶ Sǎngwéé mwën äbïd ámin, esaád é ngíne éwōgnēd, ehób éche ángel embáá éwōgnēd, esaád é elon é Dyōb-pe éwōgnēd. Ene pōndé dyam dé'só, bad ábe bēndübē Krístaa, bēpuú.

¹⁷ Ambïd enē syāá ábe dedé á alongé ábe dedé á nkōñsé, deélatēn ne bó, déké ámin á mbag-tē átán Sǎngwéé á peme-tē. Né-'aa débēē ne Sǎngwéé á ngíndé ne á ngíndé.

¹⁸ Né-óó, nyébenled ádēn ayáge áwéd nhóg ne aníníí nlém á abum.

5

Nyèbē mboñsén áyāl e epē éche Sǎngwéé

¹ Bóob-póó a-baányan bé Krísto, nzom ké póg eésaa átele nyé áláa nyé pōndé ne epun echē nímēn mekan mēbenlédté.

² Áyāle nyé bēn nyébíí bwām nēn bán epun éche Sǎngwéé ápagké, ápē taléd, melemlem nēngáne nchíb ápagké nkuu áde mod éesinēé mó.

³ Ade bad béhóbēé nēn bán, "Nsan rídé, dyamdyam déesaa áde sébáa'é," dso ebébtéd epíí' é bó taléd. Ebē melemlem ngáne e'wē bé achád é'piidēé mmwaád awé adé nkog. Modmod éebíd-taá échén ebébtéd áte.

⁴ Boñ a-baányan, nyé pēn nyéesaa bad bé mbéb ngáne bad ábe bédé á ehíntēn-tē. Né-óó, epun éche Sǎngwéé ápagké éētānē nyé taléd melemlem ngáne nchíb ápagké taléd.

⁵ Nyé baásyāāl nyédíí bad bé e'nyínen bé ekide, nyébē bad bé bīn ábe é'kénlé. Syānē déesaa bad bé nkuu ké'ε bad bé ehíntēn.

⁶ Né-óó, deebág néε bad ábe bédé nēngáne békúne'. Boñ syānē déttéd pōndé décháa-ε éche syānē yāl.

⁷ Nkuu dso bad békunεé, bad ábe mīm mó-ε mékóbεé, nkuu dso bémwákē mīm boñ mékóbē bó.

⁸ Boñ ngáne syānē dédtíí bad bé bīn ábe é'kénlé, syānē décháa éched yāl. Adúbe ne edaŋge éche édé syānē áte bēbē nēngáne mod ahédé mbóté echē bēbénlé e'kii ákútēn tāl á pōndé e nzum. E'lyág bé nlém-ε ábe nyéwóó áyāl e e'soosoj ábe nyékudté é'bē nēngáne mod awé ahédé ekóté éche bēbénlé e'kii.

⁹ Dyōb déntíí aa móssōñ syānē mbwiined ne awesyānē Sǎngwéé, Yesu Krístaa. Enkēntíí' é aa nímē meliñgá mépii syānē.

¹⁰ Yesue anwé á nló nímēd ábel boñ ké nzé édé bán syānē dedé á alongé, ké'ε dewédé, débē ne mó.

¹¹ Né-óó, nyéwéd nhóg ne aníníí nlém á abum, nyéwéd-te nhóg ne aníníí áte ngáne nyébélé'áa bóód.

Elébé ne melentēn mé asóg

¹² A-baányan, sécháa nyé ábe edúbé bwāmbwam wéε bad ábe bēwōŋgan nyé. Bso belyágte nyé, býāgtē-ε nyé ngáne alongé ádēn átāngéné abé nēngáne bad bé Krísto.

¹³ Nyécháa bó ne edúbé éche échábé ámin, nyédāñ-ε bó áyāle nsón míme bēbēlé. Nyébē nsan ne nhóg ne aníníí.

¹⁴ A-baányan, sēlānge nyé nēn bán, nyéléb bad ábe bēbēlé chōmchōm. Nyéwéd bad ábe bēwóó mbwóg áte, nlém á abum. Nyéwōŋgen bad ábe bēwúu áte, nyéwεsen-ne nhóg ne aníníí.

¹⁵ Nyényín nēn bán modmod ééftimtē mbéb áyāl e mbéb. Boñ pēn nyéwane áte pōndé ésyāāl áwōñ nlém nībwām wéε nhóg ne aníníí ne wéε bad bésyāāl.

¹⁶ Nyébág meniñge pōndé ésyāāl.

¹⁷ Nyékāne' pōndé ésyāāl.

¹⁸ Kéchéé éche ébénlédé ne nyé, nyéságnan Dyöb. Mmén mekan móo Dyöb áhédéé aá nyébele' abé áde nyédíí mod nhóg ne Yesu Krístəə.

¹⁹ Nyéētímté Edəádəŋ éche Esáá áte áyāle nsón níme ébeleé.

²⁰ Nyéebáá' nkaləŋ á yāl níme Dyöb áhóbé aá nyékal.

²¹ Boŋ pɛn nyékəg mam mésyāā́l níme béhóbéé. Nyéchəŋned mam níme béhóbéé níme métəŋgéné.

²² Nyéewóó' dyaŋ ábel ne mam níme béhóbéé níme méetəŋgene.

²³ Dyöb dən, mó awé abage syánē nsəŋ ábel nyésəŋ áyāl e mam mésyāā́l. Nyébane edəádəŋ ne yāl échēn ésyāā́l bwām, éewóó' atón dé mbéb ké ahóg á yāl káəŋne á pónde échē awesyánē Səŋgú Yesu Krístəə ápéé.

²⁴ Dyöb áde áchénlé nyé ábele' ngáne áhóbé, ábəl-le áned.

²⁵ A-baányəŋ, nyékānnad sé.

²⁶ Nyéləntad sé ábesyánē baányəŋ bésyāā́l, nyéhê bó təl.

²⁷ Nlāŋge nyé á đín áde Səŋgwéé nén məé nyélāŋ enén kálag wéé ábesyánē baányəŋ bésyāā́l.

²⁸ Nsimé níme awesyánē Səŋgwéé, Yesu Krístəə núbê ne nyé.

Kálag eché elónténé ébε eché Paale áténlé

Baá Tesalonika

Ndibned ní kálag

Kálag eché elónténé ébε eché Paale ántelée bad bé mwembé níme rídé á Tesalonika, ehébe tǎngene adúbe áde bad b́enwǒngé ńen b́an epe éche Krístaa ápeé ámpé, émaá ape áte. Paale antelé bad bé Krísto enén kálag átií b́o nsóŋten níme b́enwǒngé tǎngene nímén mekan. Mḿen mewémten níme baahóg á mwembé-te b́enwǒngé, ḿembél b́o donje á bad b́enkwan mekaa áte, b́enkéntéd-taa e'boŋ bé nlém ábe donje á bad bé Krísto b́elúmté'áá néε dyam. Paale anlúmed b́o áte ńen aá, Krístaa adéhób aá mópag ámpé, ebébtéd ne mod-e-ebébtéd b́ó b́ésébé ape. Ane mod e ebébtéd mó átǎngén Krístaa, alúmed-te káŋne lúmtén aá mó mwén-εé móde Dyób. Paale ansím b́o etúu áte aá b́edii b́ewéd adab adúbe áte kénεε b́ekudé ndutul ne metake. Ansímε b́o etúu áte ámpé aá b́éekwané mekaa áte boŋ b́o mod tée ábele nsón ábel boŋ áhél eche yál atǎgen, melemem ngáne mó Paale ne bad ábe b́óbbó bébele nsón.

Nkabtéd ní kálag

Ndibned ní kálag 1.1-2

Mekenag ne e'wéd bé nlém á abum 1.3-12

Elébé tǎngene epe éche Krístaa 2.1-17

Elébé tǎngene abé á bad bé Krísto 3.1-15

Nsóŋten ní kálag 3.16-18

¹ Me Paale, nchoo ne Sailase b́o Timotiε, me-εé ntenle' nyé enén kálag. Ntenle nyé bad ábe b́edé á mwembé níme rídé á dyad á Tesalonika, nyé ábe nyédé bad ábe Dyób Titée awéd, nyébé-'ε bad ábe Sǎngú Yesu Krístaa.

² Nsimé ne nsan níme Dyób Titée ne níme Sǎngú Yesu Krístaa níbε ne nyé.

Dyób dékaád bad nyaa eché etǎngéné

³ A-baányan sétǎngéné néε séságnanné Dyób áyál echén pónde tée. Etǎngéné b́an sébel nê áyale adúbe adén akwǒge, akwǒg ne akwǒg, edǎnge-ε éche nyéwóŋné nhóg ne anínii chó-'ε ékwǒge'.

⁴ Né-óó, átúnté e mwembé ní Dyób, sébén sékumne nyé ekáá á tál tǎngene awesen áde nyéwéséné ne adúbe áde nyéwóó, ataged áde b́etagtéé nyé ne metake mésyáál níme nyékudéε.

⁵ Mḿen mekan mésyáál melúmté' ńen b́an nyaa eche Dyób akáadtéε etǎngéné. Mḿen mésyáál mó-'aá mékǎŋ boŋ Dyób átéd nyé néε bad ábe b́ekwǒgnédé ábé áwé nkamlen. Mḿé nkamlen móó ríkás boŋ nyékudé metake.

⁶ Dyób ábele mekan nyaa eché etǎngéné. Bad ábe bébele' boŋ nyékudé' metake, Dyób dépiiné b́o metake.

⁷ Dyób débél nyéekudté metake ámpé, ábél-le sé-'ε ámpé séekudté. Nén débénléd áde Sǎngú Yesuε ábídte ádyób ne éche ángel é ngine, muú níme ríchodne-'ε mélǎnnéd b́o.

⁸ Akǎsǎn bad ábe b́ebáá Dyób á yál b́ebán-'ε áhíd nkalan ní bwám níme ríhóbe tǎngene awesyáné Sǎngú Yesuε.

⁹ Akǎsǎn b́o ne metake níme mébε á ngíndé ne á ngíndé. Béebáá wée Sǎngwée ádí, béenyín-naá ngáne éche ehúmé epédé achab ámín.

¹⁰ Ade áπεέ échē epun, bad bé Dyōb béβε mó mekenag, bad ábe béédúbpe bésyāal-le, bényāg bwāmbwam. Nyémpē nyéēbē áfintē e ábén bad áyāle nyéndúbē nkalanj níme sénlāá'ē nyé.

¹¹ Abé áde nímén mekan mésyāal médifí sé á nlém-tē dōó ákásá bonj sékännād nyé. Sékánne bán áded Dyōb ábel nyékwoḡned ákud bwēm é' bwām ábē áhēdeé nyé abele apwēd áde ápwēdé nyé ábē ábē bad. Sékánne-'ē bán ábenled eche ngíne ábel bonj mekan mé bwām mésyāal níme nyéhēdeé, adúbe áde nyédúbpe Krístāa nyékud mó.

¹² Sékánne nén ábel bonj đin áde awesyánē Sāngú Yesu Krístāa áwōḡn edúbē áfintē echēn, nyé-'ē ámpē nyéēkūd edúbē áyāl echē. Nsimé níme áded Dyōb ne níme Sāngú Yesu Krístāa, móó mébēl bonj nén ábenled.

2

Mod-e-ebébtéd āpě

¹ Βοῶb-ρῶó a-baányan, sētenle nyé tāḡḡene epe éche awesyánē Sāḡgwéé, Yesu Krístāa áπεέ ámpē ne aladen áde déladnēé ábē ne mó. Ncháa nyé nén mēé,

² nyéewámsán apuudted á mewēmten, ké'ē nyéetédnád áte ahób áde bad béhōbēé bán Epun éche Sāḡgwéé émáá ape. Kapōg bad béwēmthan bán sénhōb ádén akan áde séhōbē'áá mam níme Edāádāḡ élyáḡté'áá sé áá séhōb, ké'ē áde sékánlē'áá nyé nkalanj ní bwām ké'ē bán sēntelé nyé mó á kálag-tē. Bonj sénkēmbeñlé nē.

³ Nyéēmwāg-se mod ábenléd nzii ké pōg ádog nyé. Ayāle Epun éche Sāḡgwéé áπεέ éepaa kóāḡne á pōndé echē mpuuted ní ngíne mēpēé á nkōḡsé, mod awē mó-'ē adé ebébtéd anyínned. Dyōb ámáá atíí áá ane mod ákē á ehyāḡ é muú.

⁴ Atyēēmēn kéchéé éche bad béchāḡēé bán dyōb ké'ē kéchéé éche bad bébagēé edúbē, ábánē-'ē eche yāl ámín echáb. Asōl, ádyēē-'ē ásé kóāḡne á ndáb e Dyōb, áchāḡē-'ē yāl áá móó móde Dyōb.

⁵ Nyéechatān nén bán áde mbédé ne nyé menláá nyé nímén mekan.

⁶ Nyébíí dyam áde áchāḡgé ane mod bonj eépédé βοῶb. Adē dyam áchāḡgé mó ábel ápe á pōndé echē etāḡḡéné.

⁷ Mekan mé' ekoḡnéd mé ebébtéd mémáá abooted dé abenled. Ane awē áchāḡgé nímén mekan ábel bonj méebenlād βοῶb, mó ábē achásá mó kóāḡne á pōndé echē Dyōb débēñle bonj áhíde.

⁸ Ene pōndé-'áá mod a ebébtéd anyínnēdtē. Adii mod awē Sāngú Yesue áwūū'ē ne echē pemē e nsāl, abébed-te mó apen áde yāl épenne mó áde áπεé.

⁹ Mod-e-ebébtéd āpě ne ngíne eche Satanē. Abelé nsón mé edogké álúmed eche ngíne, ábelé' e'chemléd ne menyáké nyaa ne nyaa.

¹⁰ Ábenléd-te medogké mé ebébtéd nyaa ne nyaa wéē bad ábe ádāb alongé débōō'ē. Adāb alongé débōō áyāle bémbāḡ mbále akob, ábel bonj békud e'soosōḡ.

¹¹ Né-ῶó, Dyōb dēmbēl béwōḡ mewēmten mé mewusé mé ngíne ábel bonj bédúbe metóm.

¹² Nén débēl bad ábe béedúbpe mbále bonj bétimé' béwōḡgé menyīḡḡe ábel mbéb, békūd nkōḡsen.

Dyōb ápwēdé nyé ákud e'soosōḡ

¹³ A-baányan, nyé ábe Sāngú Yesue ádásá, sētāḡḡéné sēsāḡnān Dyōb pōndé téé áyāl echēn. Sēsāḡnan mó áyāle apwēdé nyé bad bé Tesalonika ábē bad bé'só ákud e'soosōḡ á ngíne e Edāádāḡ éche Esáá ábel bonj nyébē ábē bad ábe básáá. Ambēl-le nyékūd e'soosōḡ adúbe áde nyédúbpe mbále.

14 Apwede nyé ákud e'sooson mbwiined ne nkalan mí bwám míme sékánlé nyé. Ábelé nén ábel bon nyempé nyébê ásé e ehúmé éche awesyánē Sǎngú Yesu Krístəə.

15 Né-ɔ́, a-baányan, mekuu méwúu nyé ásé nyéhíde-'e ayáge áde sékúidé, bon sémpé séyáged nyé. Séyágté'áá nyé akale áde sékánlé'áá nyé ne atele áde séténlé'áá nyé kálag.

16 Awesyánē Sǎngwéé, Yesu Krístəə mwèn ne Dyöb Titée awéd, mó awé adáá syáné abènléde míme nsimé ábe syáné e'wéd bé nlém á abum ábe béemaá', ábē-'e syáné e'lyág bé nlém ályág nlém áyál e mam mé bwám.

17 Awéd nyé nlém á abum awéd-te nyé áte pónde ésyāā́l ábel ne áhób mekan mé bwám.

3

Paale ad bad bé Kristo békannad b́

1 A-baányan, tǎngene mekan mémpée, nhóbe nén meé nyébê nyékannad sé nén bán nkalanj mí bwám míme Sǎngwéé mbê níkanlad áfinté e bad bémpée níkag á'sō, bad békob-pe mó ne edúbé melelem ngáne émbēē ne nyé.

2 Nyékánne-'e ámpē nén bán Dyöb áson sé á mekáá mé bad ábe bébébé nlém ne á mekáá mé e'ebétd é' bad, áyāle saké bad bésyāā́l ábe béwóge nkalanj mí bwám bédúbbe mó.

3 Bon Sǎngwéé ábele' ngáne áhóbé áá móōbēl, áwéd nyé áte ákōā́-'e nyé ábel bon Satanē éēbēlē nyé ebébtéd.

4 Sésimé nlém nén bán Sǎngwéé ábēl nyébēl kéchéé éche sélángé nyé bán nyébēl, nyéēbē nyébēlé-'e ch́.

5 Sǎngú Yesu Krístəə mwèn ábel nyésōnten ngáne Dyöb ápedé nyé adəj, nyéwēsēn-ne melelem ngáne ánwēsénné.

Paale ad mod atǎngéné nsón abel

6 A-baányan, sésime nyé etúu áte á dín áde Sǎngú Yesu Krístəə, nén bán nyéēdōlē bad bé Kristo á yāl ábe békwané mekáá áte béēhídē-'e ayáge áde séyágté nyé.

7 Nyé bēn nyébíí bán séē nyétǎngéné ahānten. Sēnkēnkwané mekáá áte áde sébédé ne nyé.

8 Sēnkēndyáá ch́m é mod éche séēsábpēé, bon pen sébēlé'áá nsón ne ntú ní ngine, nkuu ne müte ábel bon séetágtē nyé modmod.

9 Sébēlé'áá nén saké nén bán sēnkēnwóngé kunze álaa nyé nén bán nyéwōngēn sé. Bon sébēlé'áá ábel bon kéchéé éche sébēléé ébē nēngáne elánsēn éche nyempé nyétǎngéné ahíd.

10 Ade sébédé ne nyé, séyággé'áá nyé etúu asím áte nén bán, “Mod awé abáá nsón abel, béebagé mó ch́m éche ádyēē.”

11 Séhóbe nén áyāle séwóge nén bán donge á bad bédé áfinté echēn ábe békwané mekáá áte, béebēléé ch́mch́m, bēhāg-ke nsal áyál e mekan mé bad.

12 Echén ndín é bad sésime bó etúu áte, sélángē-'e bó á dín áde Sǎngú Yesu Krístəə nén bán bébwāg yāl, bébele nímbab nsón ákud ndyééd e epun é b́n.

13 A-baányan, nyéekómé' ábel mbonj.

14 Nzé mod abáá ch́m éche sétélé á kálag-té wén ahíd, nyébane mó míd á yāl. Nyéewóó' dyam ábel ne mó ábel bon ákwág.

15 Kénē, nyéetédé mó néē mod á ekoyí. Bon pen nēngáne awen mwányan á Kristo, nyéláa mó bán átéd pónde.

Melenten mé asóg

¹⁶ Sǎngú Yesuε mwën, mós awě abage syánē nsan, áβε nyé nsan pón dé ésyāál ne á menzii mésyāál. Sékǎnne-'ε bán mwën ábê ne nyé moosyāál.

¹⁷ Me Paalε, mmën-εé ntelé rímén melentεn ne échém ekáá. Nén dósó á dé nêngáne e'chem áyāl e échém kálag ésyāál. Nê dósó ríteleé kálag.

¹⁸ Nsimé ríme awesyánē Sǎngwéé, Yesu Krístəə, núbê ne nyé moosyāál.

Kálag e'só echë Paalε áténlé Timotiε Ndibned ní kálag

Timotiε abédé kódemod echë endúbé Krístæ. Ambíd á Esia Maino. Nyaá abédεε mmwaád a Israel, sáá-'ε mod a Griikia. Ahõñné'áá Paale ábelé-'ε nsõñ ní Dyõb ne mó. Kálag e'só echë Paale áténlé Timotiε ekoo' metõñ meláán ahõb.

Dyam dé'só, ene kálag esime bad etúu áte átéd póndé ne ayáge dé metõñ áde abédé á mwembé-te. Adén ayáge dénladtén mekan míme bad bé Israel behídé'áá ne míme bad ábe béesë bad bé Israel behídé'áá. Adé ayáge abédé nén bán nkõñsé míme bad bédíí áte rídé ebébtéd, bán nzé mod ákud-te e'soosõñ atánǵéné abíí mekan mé e'koñnéð ábelé-'ε mekan nēñgáne ákii donǵe á ndyééd ne ádyεε ésebán mod awóó' mmwaád ké'ε mmwaád awóó' nchóm. Enén kálag ehõbe ámpē ngáne bad bétánǵéné mwembé alyáged, ngáne bétánǵéné Dyõb edúbé abε, ne nyaá e abé echë bad ábe bélyágte mwembé ne ábe béwõñgan á mwembé-te bétánǵéné awõñ. Asóged, Paale alébe Timotiε ngáne átánǵéné mbæledε awe Yesu Krístæ a bwám abé ne nsõñ míme átánǵéné abel áfinté e bad ábe bédúbpé Krístæ.

Nkabtéd ní kálag

Ndibned ní kálag 1.1-2

Elébé tǵngene mwembé ne bad ábe bélyágte mó 1.3-3.16

Timotiε akudé elébé tǵngene míme nsõñ 4.1-6.21

Paale alómmé Timotiε melentēn

¹ Mε Paalε, mε-εé ntelé enén kálag. Ndií mbapεε a nlómag awé Yesu Krístæ. Ndake echë ríkudé ábel nímé nsõñ ehúú ne Dyõb, mó awé asoo syánē áyāl e mbéb, ehúú-'ε ne Yesu Krístæ, mó awé adé syánē e'lyáǵ bé nlém.

² A-Timoti, wε-εé nitenlé enén kálag. Edíí nēñgáne awem mwán mwēn, adúbe áde edúbpé Krístæ. Nsimé, ngõl ne nsarj míme ríhúú ne Dyõb Titéε awéd ne Yesu Krístæ, Sǵngwéé awéd mbê ne wε.

Paale alébe Timotiε tǵngene bemeléede bé metóm

³ Ade ríkágé'áá á mbwóg e Masedonia menláá wε meé élyáǵ hē á dyad dé Efesus ábel bon weémwāg wεé donǵe á bad bélyágte' ayáge áde déetǵngene.

⁴ Weémwāg-ke-se áhê bad bébebté póndé ákal póle éche éesë mbále ne póle éche ehõbe tǵngene ábáb betaa ábe mod éeheléé-se atón. Nzé bélyágte éché ndín é póle épεene mpentēn, éewõñgännē bad áwõñ alongé áde álúmte bán bédúbpé Dyõb.

⁵ Nzõm echë enkǵñ bon nláá wε meé éyágte bad ayáge áde átánǵéné edíí ábel bon bad bédǵñ nhóg ne aníníí. Etánǵéné edǵnge awõñ éche ébide' á nlém míme rísáá, nlém míme mbíí dyam áde átánǵéné ne áde déetǵngene, mbíí-'ε adúbe áde áde mbále.

⁶ Donǵe á bad béehídεε nímén mekan, nē ábelé bepáné nzii ahõb áde behõbéé e'kúkú é' mekan.

⁷ Abé bad béwóó nlém áte ábe bemeléede ábe bélyágte mbéndé é Dyõb bon béesõñtenéé mekan míme belǵngéé bad, béesõñtenéé-'ε mekan míme behõbéé bán békóó abíí.

⁸ Debíí nén bán mbéndé eboó nzé bad bébenlad chõ ngáne éhednad-té.

⁹ Debí'ε nén bán Dyöb déebeléé mbéndé áyāle bad ábe bébele' ngáne áhedéé. Bonj Dyöb ábelé mbéndé áyāle bad ábe béehidē mbéndé ne bad ábe béebelé' ngáne áhedéé. Abelé mbéndé áyāle bad ábe béewóo Edáádan é Dyöb áte, ne bad ábe bébele mbéb. Bébélé mbéndé áyāle bad ábe béewóo mbwóg ní Dyöb áte, ne ábe béhóbe Dyöb mekan mé mbéb áyāl. Dyöb ábelé mbéndé áyāle bad ábe béwúe' ábab besáá ne benyaá, ne bad ábe béwúe' bad bémpēe.

¹⁰ Bébélé mbéndé áyāle bad ábe békábe mesón, baachóm ábe benañnad baachóm bémpēe, bad ábe békóbe bad bonj bésóm bó néε betān, bad ábe békale metóm, bad ábe bémwág melē mé metóm á pónde e nkáásé ne bad ábe bébele' kéchéé éche éesē nchoo ne ngáne ayáge á bwām áhóbéé.

¹¹ Adē ayáge adé nchoo ne nkalanj ní bwām níme Dyöb ábágé me ákale bad. Mmē nkalanj ní bwām níhúú ne Dyöb dé ehúmé áde bad békεεé.

Nságnen áyāle ngól e Dyöb

¹² Nságnan Yesu Krístaa, Sángwéé awêd, mó abage me ngíne ábel nímm nsón. Nságnan mó áyāle anyín áde anyíné aá mēbēl mó nyaa eche etāngéné, ápwēd-ε me ábele mó.

¹³ Ambel nē, kénéé edíi bán ngen e'só nhóbé'áá mó mam mé mbéb áyāl, nítagtē bad ábe bédúbpé mó, níbenlād-ε e'yale bé mbéb áyāl eché. Bonj Yesu Krístaa anwóg me ngól áyāle menkēmpaá adúbe awónj, menkēmbíi'-aá chóm éche mbéleé.

¹⁴ Sángwéé ambē me nímm nsímé níme méesē ahagtēn, ábēl ndúbé Krístaa, ábēl'-ε aá nílúmed bad bémpēe edange áyāle dedé nhóg ne Yesu Krístaa.

¹⁵ Yesu Krístaa ampē a nkójsé ásonj bebel bé mbéb. Mmēn-ne mbédé mod awē atómtánnáá mbéb ábel tómaa moosyáál. Enén póle edé mbále detāngéné'-ε chó akonj dé adúbe.

¹⁶ Bonj Dyöb dénwóg me ngól áyāle áhedé'áá aá Yesu Krístaa álúmed aá nímm nwesen méewóo'ε asóg áyāl e me awē ntómtánnáá mbéb ábel tómaa moosyáál. Nén dēmbenléd nēngáne elānsēn wée bad ábe bédúbē, békūd-ε alongé áde déemaá'.

¹⁷ Ehúmé ne edúbé bébē ne Dyöb á ngíndé ne á ngíndé. Mó adé kān eché edé á ngíndé ne á ngíndé. Mó'-aá adé ane awē bad béenyínnēé díd awē eewág-ke. Mwēmpēn-εé áde Dyöb. Ebē nē.

¹⁸ A awem mwān Timoti, mekan níme nílangéé wε meé ébel, médií mekan níme Dyöb dénlāá'ε bad aá béhōb bán mébenléd áyāl echōn. Abē e'yale é'wēd wε áte. Abenled áde ébenladte ayáge á mbále é'bel wε ébē nēngáne mod awē awane nzum bwām.

¹⁹ Enyín-ne nén wée móchāñnēde ne adúbe adé édúbpé Krístaa, ébele'-ε mekan bwām ngáne nlém nílangé wε. Donje á bad béebeléé ngáne nímmab nlém nílangé bó. Nén ákás béchénné ádab adúbe béebíi'ε wée békagké.

²⁰ Atínté e bad ábe níhóbéé nē, nhóg adé bán Himenose, aníní'-ε bán Alesandaa. Abén bad ntédte bó á mekáá níme Satane ábel bonj bébii nén bán éeboó'ε áhób Dyöb mekan mé mbéb á yāl.

2

Elébé tāngene ábe Dyöb edúbé

¹ Dyam dé'só, nwéde wε aláa nén meé nyékánnad moosyáál. Nyékánnad bad bémpēe. Nyékánnē nén bán Dyöb álóme nyé bwēm ábe nyétógnéné, nyeságnan-ne mó áyāle mbonj níme ábenléé nyé ne bad bésyáál.

² Nyékánnad kān é bad ne bad bésyáál ábe bédé á nkamlen. Nén débēl alongé áde syánē débē nsanj ésebán mehób médé, débéléé ngáne Dyöb áhedéé, débágé'-ε mó edúbé á menzii mésyáál.

³ Akanned bad ábóó. Nén áwógte Dyöb adé ásóó syānē menyĩnge.

⁴ Dyöb áhede aá moosyáál ákud e'soósonj bésõn̄ten-ne mbále echē Eyale é Dyöb ékaléé.

⁵ Ebyéénē nén bán Dyöb ahóg dēmpen d́óó adé. Mod nhóg mwēmpen-naá adé awé apēene Dyöb ne baányonj á nchemten. Ane mod adii Yesu Krístaa.

⁶ Ambē adé alonggé áwé á nló ní moosyáál. Ene kwééd echē awédé á nló ní moosyáál enlúmed á pónidé echē etāngéné nén bán Dyöb áhede aá moosyáál ákud e'soósonj.

⁷ Ayāle nén d́óó akáá bonj Krístaa álómē me nēe mbapēe a nlómag áke dé akal nímē nkalanj tāngene adúbe á Krísto ne mbále, wēe bad ábe béesē bad bé Israel. Dyam áde nhóbeé adé mbále. Meékālē metóm.

⁸ Né-óó hóm ké ahéé adé bad bé Krísto béladnēé, nhede nén meé baachóm ábe bébágé échab yāl ábele Dyöb bényene mekáá ámín bébage mekáne. Abé bad béētāngeneé melingá ahé á nlém káa béētāngeneé bad abé ábe bésenle'.

⁹ Nhede-é ámpē nén meé bebaád béhāg mesanj nímé bad bényinnē nén bán métāngéné. Mmāb mesanj métāngéné b́ó yāl akúten bwām ésebān métēde baachóm nlém á abum. Béenappé esid é nló nyaa echē etómé áte, bééhāg bwēm é' gól, béewāā' nsāj nímme bébénlé bán bé meláá mé etógnén, bééhāg-ke mbóté éche étómténé nkun abé.

¹⁰ Bonj pen nímāb mbeltéd ní bwām rílúmed nén bán bédii bebaád ábe bébenle Dyöb.

¹¹ Mmwaád atāngéné ádyēē piib, ásūdéd yāl bonj áwōglān ngāne baachóm béyāgtēé.

¹² Meehóbēé nén meé mmwaád awóó kunze áyāged káa ákamlēn baachóm. Mmwaád atāngéné ádyēē piib.

¹³ Nhóbe nén áyāle Dyöb dēnsēbē Adame ahag bonj áhagé' Ife.

¹⁴ Ebyéénē-é nén bán mmwaád mó Satanē ándogké bonj abóó mbéndé, saké Adame. Né-óó mmwaád mó ambóó mbéndé.

¹⁵ Bonj Dyöb désõn alonggé dé mmwaád á pónidé e achád nzé adii asumé nlém wēe Krístaa alúmté-é edānge ne bad bēmpēe, eewóo-é atón dé mbéb ké ahóg ayāl.

3

Paale atēnlé Timotiē tāngene belyāged bé mwembé

¹ Nzé mod ahede aá móbē nlyāged a mwembé, né apwēdé kase e nsón. Enén pōle edé mbále.

² Bóob-póó, mod awe alyāgte mwembé, atāngéné abé mod awē bad béēhōbēē mekan mé mbéb á yāl, atāngéné-é dásō mmwaád nhóg awonj.* Abé mod awē akóbe yāl, abé mod awē adole dyam áte bwām, abé mod awē adélté yāl áte, abé mod awē akobe beken, abé-é mod awē abé bad ayāged.

³ Eebág mod awē abagé yāl á amwé á mīm, káa mod awē apēene epuutéd. Bonj ábē mod awē apwiitédé, ábē-é mod awē eēsēnlé'. Eebág mod awē atómténé mōné adān.

⁴ Atāngéné abé mod awē achāngé eche ndáb bwām, ábōngē-é ábe bán nyaa echē béwógnéé mó bébágé-é mó edúbé á menzii mésyāál.

⁵ Nhóbe nē áyāle nzé mod eéhele eche ndáb akamlēn, chán-nō áhenlé mwembé ní Dyöb akamlēn?

* **3:2** Atāngéné-é dásō mmwaád nhóg awónj káa atāngéné dásō mwáád awonj ngen póg ne ngen ésyāál káa mod atāngéné dásō mwáád mwēmpen anān̄ned.

⁶ Eetāngeneé se abé mod awě adúbpé Krístæ ekóólé ekóólé. Esehé nê, né abē kúmbe, ch́ óbēl ákwε, ákūd-te nkógsen melemlem ngáne Satanε ánkweé bon ákūd-te nkógsen.

⁷ Abád ámpē, ane mod atāngéné abé mod awě kááŋne bad ábe béesē á mwembé bébagéé edúbé. Nén débēl éekudté akwágkε éehūn-naá melám míme Satanε áhíinédé mó.

⁸ Bad ábe béwōŋgan ábel nsón á mwembé, ébē melemlem née bó. Bétāngéné abé á bwám awōŋ, bébé-'ε bad ábe béhóbe dyam ne nlém nhóg. Béetāngeneé bad ábe ábē bébágé yál á ámwé á mím, káa bad ábe bédé metog áyāle mōné.

⁹ Bétāngéné béhíd mbále echē Dyōb ábeleé bon bad bébíí tāngene mewēmten míme áhedeé áá béwōŋ ne abé áde áhedeé áá béwōŋ. Bétāngéné bébel nê ne nlém míme míbíí chōm éche étāngéné.

¹⁰ Belyáged bédēhób bán bēpwede bad ábe béwōŋgan á mwembé-te, bétāngéné bad ábe béhedeé apwed asebe dé asimēn. Nzé bényíné nén bán mod awě bésímné eewóó'ε awusé ké ahóg á yál nê ane mod akwōgnédé ábel mímé nsón.

¹¹ Kááŋne ábāb bebaád bétāngéné abé á bwám awōŋ. Béebāg bebaád ábe béhóbe bad ámbíd, bébē bebaád ábe békóbe yál, bébé-'ε bebaád ábe bad béhele-se bésūm nlém á yál ne kéchéé éche bébeleé.

¹² Mod awě awōŋgan ábel nsón á mwembé atāngéné dásō mmwaád nhóg awōŋ. Atāngéné abé mod awě abōŋge ábe bán ne bad bēmpēe ábe bédé áwe ndáb bwám.

¹³ Nhóbe nê áyāle nzé bad ábe béwōŋgan ábel nsón á mwembé bébele nsón bwám, bad bébe bó edúbé. Nén débēl béwōŋ nlém áhób tāngene adúbe áde béwóó ne Yesu Krístæ.

Dyam dé e'koŋnéd áde dēntīm abyēn

¹⁴ Á Timoti, kénéé edíí bán nwóó nlém ápe áwōŋ mwāmpín pōndé, ndii ntenle wε enén kálag.

¹⁵ Ntenle wε mímén mekan míme étāngéné ábel ábel nén ké meelyoge ape, ehele ebíí nyaa e abé echē bad bé Dyōb bétāngéné awáale. Bad bé Dyōb b́ó bédé mwembé ní Dyōb, Dyōb áde-'ε á alongé. Mímé mwembé móó rídé nēŋgáne akon ne nsáaned míme ríchāngé mbále Eyale é Dyōb bwám. Ahed d́ó-'áá ene mbále ébwōgnédé. ¹⁶ Dyōb ábélé syáá debíí nén bán mímé nkalan ndé etógnén bwāmbwam. Ndé nén bán:

Krístæ ampē, abē-'ε moonyon, Edáádāŋ éche Esáá énlūméd sé nén bán adii Mwān a Dyōb, ángel-le ényín mó.

Bēnkale bad bé nkōŋsé bésyāāl, bēndübē-'ε mó. Dyōb démpuúd mó ákē-'ε ádyōb ne ehúmé ésyāāl.

4

Paale alébé Timotie tāngene bemeléde bé metóm

¹ Edáádāŋ éche Esáá énhōb bwám nén áá, mímén mesú donge á bad bétedé adúbe á mbále ádāb, bédübpē bad ábe b́yágte ayáge dé metóm. Adén ayáge d́ó e'dáádāŋ bé mbéb é'hedeé áá bédúbe.

² Abén bad bébele' byánán békale mbále bon metóm móó békaleé. Nzé b́yágte chōm éche étāngene bélümte nén bán béebíí'ε nhāŋlén áfnté chōm éche étāngéné ne éche étāngene.

³ Abén bemeléde bé metóm, b́yágte bad bán béewōŋné, bán bad béedyāg-ke donge dé medyé. Dyōb dénhāg mímé medyé ábel nén bad bédyāg

mó. Bad ábe bébíi nkalaj mí bwám, bédúbpé mó, béságnanne Dyöb áyále nímé medyé.

⁴ Abê bemeléede béētāngēnē, áyále kéchéé éche Dyöb áhágé ébóó. Nzom ké póg eésaa ábán donge dé medyé. Né-óó, déságnen Dyöb akud áde dékudéé ábēn bwēm.

⁵ Mod eékīē ndyééd, áyále Eyale é Dyöb ne mekáne bébele chó ébonj adyé.

*Paale alángé Timotie
ngáne átāngéné mbáledé
a bwám awe Krístāā abé*

⁶ Nzé eyágte bad ábe bédúbpé Yesue nímén mekan né wēbē mbáledé a bwám awe Yesu Krístāā. Wēwēdnēd-te áte á edāādan-tē áyāl e nkalaj nímé édúbpé ne áyále ayáge dé eyale é Dyöb áde éhídeé ámbíd.

⁷ Weewóó dyam dé abelen ne póle éche élúmte bán bad béédúbpéé Dyöb, ne e'yákél é' póle. Bonj pen éyágte' pónde té ábel ngáne Dyöb áhedéé aá ébel.

⁸ Edé etógnēn mod áyáged yāl e nkōñsé, áwéd chó áte. Bonj étómténé etógnēn abé nzé mod awédé yāl áte ábel ngáne Dyöb áhedéé áyāl e chōm ésyāāl. Débel ngáne Dyöb áhedéé áyále, Dyöb áhóbé aá mósōbē syānē alongé áde déemaá', bōb ne á pónde eché ehúé'.

⁹ Adén dyam áde nhóbé nēn áde mbále. Nyētāngéné dó adúbe.

¹⁰ Né-óó, nēn dōó ákás bonj dényōdé, déwantē-é yāl áte áyále delyáge nlem ne Dyöb áde áde á alongé. Mó abage baásyāāl e'soosōn, bwámbwam bad ábe bédúbpé mó.

¹¹ Nyín nēn wēé mólāngē bad ábe bédúbpé nímén mekan, wēé móyāgte-é bó mó.

¹² Weémwāg-se modmod anyín we nkōntéd áyále édíí kódemod. Bonj pen lúmed bad ábe bédúbpé abé a bwám ábel bonj bōmpé bébel melemlem. Nyaa eché éhóbéé dyam, abé áde éwóó, nyaa eché édás bad, nyaa éche édúbpé Dyöb ne ábel áde wébeléé mekan mé mbinde ábē néé elānsēn wēé bad ábe bédúbpé.

¹³ Enyín nēn wēé mólāā' Eyale é Dyöb nzé bad beládné á mwembé-te. Elāngē bó chōm éche échē Eyale é Dyöb éhóbéé, éyágte-é bó kōāñ né mpedé.

¹⁴ Weétedté nsōn nímé Dyöb ábágé we néé nde, álāā bad mekan nímé Dyöb dénhōbpē aá élāā bó á pónde éche belyáged bé mwembé bémānnē we mekáā á nló.

¹⁵ Belé nímén mekan ne nlém nhóg ábel bonj baásyāāl bényín nēn bán ebele mó bwám, ekeene-é mó á'sō.

¹⁶ Etōñ yāl achāā bwám ne kéchéé éche éyágteé bad. Keēné' nē á'sō, ábel bonj Dyöb ásonj we alongé, ásonj-é alongé á bad ábe éyágteé.

5

*Paale alángé Timotie ngáne átāngéné
donge á bad achāā á mwembé-te*

¹ Weekánné mod a mbáā áte. Chás mó melemlem ngáne ehēle-se echás sóó mwēm. Chás bad ábe béepede we kōd néé baányonj bé baachóm.

² Chás bebaád bémháā nēngáne ehēléé-se echás nyoó mwēm. Echāā-é ngōndére néé baányonj bé bebaád. Weewōñné bó mekan mé mesón á mewēmtēn.

³ Bekúd ábe béewóó bad ábe bēnōne bó éwōñgan bó.

⁴ Bonj nzé nkúd achyáā bán káā bán ábe ábē bán, bētāngéné mó atōgen. Nēn áde dyam dé'só áde bad ábe bébele ngáne Dyöb áhedéé bētāngéné ábel. Abāb

benyaa ne besaa bëntogén bó, bómpë bétàngéné bó atogén. Nén áwógte Dyób menyinge.

⁵ Nkúd awë adé mwëmpen bon eewóo mod awë awòngan mó, wée Dyób dëmpen dso ályógéé nlém. Ábë ákánne', áhédne-'e mó nwòngén nkuu ne müte.

⁶ Bon nkúd awë asólté yál á mekan mé nkònsé, awédé á eedáðen, kénéé adíí á alongé.

⁷ Láá bad bé mwembé nímén mekan ábel bon mod eehóbé bó mekan mé mbéb á yál.

⁸ Nzé mod a Krísto eétógné bad bé túmbé ábë, bwámbwam áde abum a ndáb, né alúmte nén aá móódúbpéé Krístaa. Ene ndín e mod níme mbeltéd níúmte nén bán adíí mod awë abelé mbéb tómaa mod awë eedúbpé Krístaa.

⁹ Nkúd awë éhele-se etón wée atàngéné nwòngén akud, adíí nkúd awë atómé móom mé mwé ntóób. Atàngéné abé-'e nkúd awë a nwón nchóm nhóg mwëmpen.

¹⁰ Ane nkúd atàngéné abé mmwaád awë bad bényíne bán níme mbeltéd níbóó. Atàngéné abé mmwaád awë apééné bán amín bwám, abé mmwaád awë akobe beken awe ndáb bwám, abé mmwaád awë asudte yál, ábenlé bad bé Dyób nyaa eché áwóbpé'áá bó mekuu. Atàngéné mmwaád abé awë awóngéné bad ábe bémbë á ndutul-té, ábë-'e eche yál ábel mekan mé bwám.

¹¹ Bon weetóó bekúd ábe bédé etum nêngáne bekúd ábe békud nwòngén. Weetóó bó áyále nzé béwóó esíí áwón bechóm ámpë béebeléé Krístaa ngáne éhédnadté.

¹² Nzé béwóó-'e bechóm bémpëe né békwoónédé ákud nkógsen, áyále béelóntéé akag áde bénhëé nén bán bébelé Krístaa.

¹³ Saá-kaá nê dëmpen, béwóó abé áde béebeléé chóm, béhyóme ndáb ne ndáb. Amín ené béhóbe bad ámbíd, béhāg nsal áyál e mekan mé bad, béhóbe-'e mekan níme békéntàngénné ahób.

¹⁴ Né-óó, ndáó méé e'tum bé bekúd béwón bechóm, béchyáa bán, bébònge-'e échāb ndáb. Nén débël béebeléé mekan níme bad ábe békóó syáné béhōbëé syáné mekan mé mbéb á yál.

¹⁵ Nhóbe nén áyále ábén bekúd donje bébóótédé mekan abel níme Satane áhédéé aá bébel.

¹⁶ Mmwaád ké ahée awë adúbpé Krístaa awë awóó bekúd awë abum á ndáb, atàngéné bó atogén, saké nén bán ápëmted mwembé níme nted. Nén débë mwembé etál ábóo bekúd ábe béewóo bad ábe bébònge bó.

¹⁷ Mwembé níbe bad bémbáá ábe bélyógte bó bwám edúbé ne nsábe, bwámbwam ábë belyóged ábe bébele nsóm né akal ne áyáged Eyale é Dyób.

¹⁸ Edé né áyále éténlédé á kálag e Dyób nén bán, "Weetádé nyag nsal eche esálte ngun." Eténlédé ámpë nén bán, "Bebel bé nsón bétàngéné nímaab nsábe akúd."

¹⁹ Weedúbpé mekan níme bad béhóbéé belyóged bé mwembé áyál, éetómeé né mbón ébe káa élaán étýéémé nén bán nê adé mbále.

²⁰ Nzé mod ámbáá a mwembé abelé mbéb, káné mó áte á'só é' mwembé ábel bon bad bémbáá bémpëe bébān mbéb abel.

²¹ Nlānge we á'só é Dyób ne Yesu Krístaa ne á'só é ángel éche épwédnéde méé ébel chóm eche étàngéné abel, ésebán ekwognad modmod. Weéftimë-'e modmod ámbíd.

²² Weewámsán mod mekáá abán á yál áwóged mó mod a mbáá a mwembé. Nzé ebelé nê bon ane mod atímé mbéb abel, ne wëmpë ebelé mbéb. Mmōn weébëlé mekan mé mbinde.

²³ Weemwág mendib mwëmpen ámpë. Mwág mwá mím ábel nén abum áde ákwaglan we áte pónké ésyāā́ ámaa.

²⁴ Donje á bad bébele mbéb á nhéné níme moosyā́ál ábíí, békāād-te bó. Abíníí'-é bébele mbéb á mesōom-té níme bad béébií'-é káōñ né béhéde áte.

²⁵ Melemlem nē dōo donje á bad bébeleé mboñ níme níbyééné ne moosyā́ál. Bémpee'-é bébele mboñ a mesōom-té níme bad béébií'-é káōñ né béhéde áte.

6

¹ Bad ábe bédé betāñ bésyā́āl betāngéné bébage bad ábe bédíí áse echáb edúbé ábel boñ modmod eehóbé Dyōb mekan mé mbéb áyāl, eehóbé'-é ayáge ádēd mam mé mbéb áyāl.

² Betāñ ábe bédé áse e bad ábe bédúbpé Krístā́a béewēmṭān bán ngáne ábab besáá bédíí bad ábe bédúbpé, béetāngeneé bó edúbé abe. Bétāngéné bó abele tómaa ngáne béhéle'áá-se bébēle bad ábe béedúbpé Krístā́a. Bétāngéné abel nē áyāle ábab besáá ábe bébenléé bédíí bad ábe bédúbpé Krístā́a bébé'-é bad ábe ábāb bembālede bédáá'-é.

Paale ahóbe tāngene ayáge dé metóm ne nhān níme rītāngéné

Eyágte bad nímén mekan éwēd-te bó nlém á abum áhíd mós.

³ Donje á bad bédé ábe báyágte' ayáge áde déetāngene. Adab ayáge déesaá melemlem ne ayáge áde awēd Sāngú Yesu Krístā́a áde ayágte bad ábel ngáne Dyōb áhēdeé.

⁴ Abé bad belóné ne kúmbe, béébií'-aá dyaṃdyam. Nyaa eché ábē bad bédáá ṃpenten mé e'yale ne nselag edíí bó néé nkole. Nén ápene kōñjí áñinté echáb, ápeneé mehóḃ áñinté echáb, bad béhōbē'-é baáb mehóḃ mé mbéb áyāl, béwōñnē nhōg ne aníníí mewēmṭen mé mbéb.

⁵ Nén ábele'-é bēpentan pónké té nyaa eché béeheléé-se bēbíí chōm éche étāngéné. Béeheléé-se bēsōñtén chōm éche édé mbále ne éche éesé mbále. Béwēmṭan bán nze bébenle Dyōb, né bébé nhān.

⁶ Boñ mod ábē menyinge bwāmbwam nze ábele' ngáne Dyōb áhēdeé nze atēde'-é aá kéchéé éche mōwóó ékwógnédé mós.

⁷ Depedé á nkōñsé, deépeneé chōmchōm, nze dewédé'-é, déeswéenné chōmchōm.

⁸ Né-ōó, nze dewóó ndyééd eche dédyāgkē ne chōm éche déhāgkē á yāl, né nē ákwógnédé syāné.

⁹ Boñ bad ábe béhēde nhān asud, bébelé béhún á mekágsen-té, bébé ngáne bad ábe bēkwédé melám. Bébelé béhéde mekan ábel híin níme mééboo ne mekan híin níme mééboñne bó. Nén ábele bétage bwāmbwam.

¹⁰ Mod ké ahéé awé awóó nlém áte bwāmbwam ábud ṃnē awōñ, ábelé ábelé' e'bébtéd é' mekan ákud nímé ṃnē. Nē ábélé donje á bad bétédte ádúbe Krístā́a, békúde'-é ndutul híin á nlém té.

Paale abagé Timotié elébé

¹¹ Boñ we, á-Timoti, mod a Dyōb, bán ábē e'bébtéd é' mekan. Nané mekan ámbíd níme métāngéné á'sō é' Dyōb, édañ bad, éwesān pónké ésyā́āl, épwíit-te.

¹² Wéd yāl áte ébē ésum nlém wéé Dyōb ébenle'-é mós. Alonje áde déemaá' áde Dyōb ábágé we, wéd dō achāñned. Dyōb dēmbē we ádē alonje áde wénhābpé á'sō é' bad híin wéé módubpé Krístā́a.

¹³ Á'sō é' Dyōb, mós awé abage bwēm ésyā́āl alonje, ne á'sō ábe Yesu Krístā́a, mós awé ankal mbále á'sō wéé Pontus Paylede, nlāñge we nén meé,

14 ébele chõm ésyāāl ngáne Dyõb áhóbé aá ébel, kóõne pónde eche awed Sāngwéé, Yesu Krístā ápéé.

15 Apé á epun éche Dyõb Titéé átífidé aá ápe, Dyõb ane awé ábē bad bébagéé mekenag. Mwēmpen-naá adé Nkamlēne a mbáá a nkõnsé ísyāāl. Mó adé Kān e kān ésyāāl abé-'e Sāngwéé a besāngwéé bésyāāl.

16 Mwēmpen-éé awóó ngíne ábē á alongé á ngíndé ne á ngíndé, adé-'e á e'nyínen bé ekíde ábe é'pene bwāmbwam nyaa eché modmod éeheléé-se ápē benben. Mó adé ane awé modmod éenyínēē mbéd, modmod ééhēléé-'e-se anyín mó. Edúbé ébē ne mó, ábē-'e á nkamlēn á ngíndé ne á ngíndé. Ebē nē.

17 Símb bad ábe bédé nhon etúu áte nén wéé béekumé ekáá á tál, béesumé-'e nlém áyāl e nímāb nhon, bwēm ábe é'maa', bonj bésúm nímāb nlém wéé Dyõb. Mó adé ane awé abage syánē chõm é'syāāl éche détógnéné ábel bonj débē menyinge.

18 Láá bó wéé bébele mbonj áwõngen bad, ngáne bad ábe bébúdé mone awõnj bébágkē nhon, mekan mé bwām níme bébeleé núbē nímāb nhon, béwõn-'e nlém áwõngen bad ne kéchéé éche Dyõb ábágé bó.

19 Nzé bad bébele nén ébē nēngáne békongé nímāb nhon ádyõb. Nén débē nēngáne nsāaned níme ísúmnédé bwām ábel bonj ísõgtēn mekan níme méhúé' á'sõ ábel békud alongé dēn áde ákõnté alongé abé.

20 A-Timoti, nsón níme Dyõb ábagé we tónj mó acháá. Weewóó pónde ne mehób níme bad béhóbéé níme méewõngān ábe Dyõb edúbé, ne mehób níme donje á bad béhóbéé bán chõm ehõg édé mbále, bad bēmpēe-'e béhóbē bán chõm émpēe chõó édé mbále. Bonj bó moosyāāl bébele awusé nzé béhóbē bán, "Mē-éé ndé mod awe abíí."

21 Donje á bad ábe béwēmtan bán bébíí mam níme médé, bonj bēn béekoó'é adube áde Dyõb á mbále ahíd.

Nsimé ní Dyõb núbē ne nyé moosyāāl.

Kálag eche elónténé ébε echê Paalε áténlé Timotiε Ndibned ní kálag

Kálag eche Paalε áténlé Timotiε eche elónténé ébε éhábε bwámbwam tângene elébé éche ábagéé Timotiε néε mod awé búmō bébele nsón ní Dyōb ne awé awōngan mó. Dyam áde Paalε ákóó ahób awéd-te ádíi nwεsen. Alébe Timotiε awéde-ε mó nlém á abum aá ábê ábenle' Yesu Krístæ ne nlém nhóg. Paalε akoo Timotiε etúu asím áte aá átéd pón dé ne mpenten mé eyókél míme mééwōngān bad bon ntimé nípuutád bad. Amín e nímén mésyāal Paalε akamtan Timotiε áyāl e áde alongé, mó Paalε nyaa eche adúbpé Krístæ, awesen áde áwesanné, edaŋge éche álúmté wéε bad ne metake míme ákudéé akal áde ákaleé Eyale é Dyōb.

Nkabtéd ní kálag

Ndibned ní kálag 1.1-2

Mekenag ne elébé 1.3-2.13

Elébé ne asím dé etúu áte 2.14-4.5

Paalε ahóbé tângene eche nyaa 4.6-18

Nsógten 4.19-22

Paalε alómmé Timotiε melenten

¹ Mε Paalε, mbapεε a nlomag awé Yesu Krístæ me-εé ntelé enén kálag. Dyōb áhede aá níkal nkalan tângene alongé áde ahóbé aá dekadé abé áde dédíi nhóg ne Yesu Krístæ.

² A-Timoti, wε-εé ntenléé enén kálag. Edii awem mwān a nlém. Nsimé, e'bon bé nlém ne nsaŋ míme níhúú ne Dyōb Titée ne Yesu Krístæ awesyáné Sán gwéé, mbê ne nyé.

Paalε aságnéné Dyōb, awéde-ε Timotiε nlém á abum

³ Nságnan Dyōb áde míbenléé ne nlém nhóg melemlen ngáne ábêm betaa bébénlé áá mó. Nságnan mó pón dé té áyāl echōŋ nzé nkánne', nkuu ne mūte.

⁴ Nzé nkámténé ngáne wénsudénné bon échii, mbelé nídāŋ wε anyín bwámbwam, ábel bon nílon ne menyīŋge.

⁵ Nkamtan nén meé ekoó Yesu Krístæ adúbe, nímê melemlen mé adúbe móo nyoo ambáá, Loise, ne nyoo, Yunise, bómpé bēnwōŋgē. Bōob-pōó, mbíí meé áde adúbe dōo wémpé éwóó.

⁶ Enén nzom chó ekáó bon níkamtán wε nén meé nde eché Dyōb dēmbéé wε áde mémbānnē wε mekáá á nló, ébê ébenlad chó.

⁷ Dyōb déébeeléé aá syánē déwōŋ mbwóg áte ábele mó. Bon pen éché Edáádāŋ ébage syánē ngíne ábele mó, ébele delúmtē bad edaŋge, ébele-ε dechāŋge échesyánē yāl.

⁸ Né-ōó, weewógé e'són aláa bad tângene awesyánē Sán gwéé, Yesu Krístæ. Weewógé-ε e'són áyāl echēm kénée nídíi mod a mbwóg áyāl eché Krístæ. Bon pen ne ngíne eché Dyōb ábágé wε, kwentén ákud metake ne me akal áde dékaleé nkalan ní bwám.

⁹ Dyōb dōo ásóó syánē, achélé-ε syánē ábē ábē bad. Abelé nén saké áyāle dyaŋ áde débélé bon áyāle míme ntii mén míme ámbenlé nkōŋsé nídehób bán níbootad. Abage syánē míme nsimé alóm áde alómé Yesu Krístæ á nkōŋsé áyāl e syánē.

¹⁰ Βῶοβ-πε, Dyöb álúmté syánē nsimé aπε adé Yesu Krístəə, Nsoode awêd ápédé. Abódté ngine e kwééd, abēnlédé-ε nkalaj ní bwám álúmed syánē alonjé áde déemaá’.

¹¹ Dyöb ápwédé με nηngáne mbaπεε a nlomag ne meléede ákal nímé nkalaj ní bwám.

¹² Enén nζom chó-’aa ekáə boη níkudé nímén metake. Boη meewógéé akwágké ké ahóγ áyale mbíí ane awē nísúmé nlém áyāl. Mbíí-ε nén μεε ákəə chóm éche ábágé áwēm mekáá káəηne á epun é nkáásé.

¹³ Ayáge áde átəngéné áde ní’yágté we, ékoη dó acháə. Abē nηngáne elənsén éche étəngéné ahíd. Edúbe Yesu Krístəə, édəη-ε bad bémpēe abé áde édíí mod nhóg ne Yesu Krístəə.

¹⁴ Edəádəη éche Esáá édé syánē áte, chóo éwōηgan we ábel boη nkalaj ní bwám nímé Dyöb ábágé áwōη mekáá échəə mó bwám.

¹⁵ Ebíí weé bad bé Krísto bésyáal bémbarη με á yál áde núbédé á mbwóg e Esia. Faygeduse bó Hemogenes bómpē bémbe átínté e bad ábe bémbarη με á yál.

¹⁶ Nkánne’ nén μεé Dyöb álúmed ndáb eché Onesiforuse ábē e’boη bé nlém áyale awédé-’aa με nlém á abum póndé té. Enkēnkwágénné με áá ndé á mbwóg.

¹⁷ Ade ápédé á Roma πεέν, ambootéd με ahead káəη anyín-ne με.

¹⁸ Nkánne μεé Dyöb álúmed mó ábē e’boη bé nlém á Epun é nkáásé. Mmōη ebíí-ε bwám nwōηgen nímé ábágé-’aa με á dyad dé Efesus.

2

Paale ad Timotic atəngéné

abé sánze e bwám eche Yesu Krístəə

¹ Βῶοβ-πόο á awem mwān Timoti, nsimé nímé Yesu Krístəə ábágé we, núbé níwede we áte.

² Mekan nímé wénwōgkē néε ní’yágtéé ekud é bad təngene Krístəə, wémpē yágéd bad mó ábe bédé bad ábe bómpē béhəle béyágéd bad bémpēe. Bébē bad ábe béyágéd-te bó.

³ Wémpē ékwentən ákud metake, ébē ngáne sánze eche Yesu Krístəə.

⁴ Sánze eché edé á nsón, ebélé éhədé áá mówóged awē mod ambáá menyíηge, né-óo eesóléé mekan áte nímé bad ábe béesé sánze bébéléé.

⁵ Nyaa empéé eche éhəle ébélē Krístəə edé nηngáne mod awē anyəgte mehélé ne bad bémpēe. Eēhēlē-se ákud nsábe étóméé né ahídé mbéndé éche bétíídé ányəged mehélé.

⁶ Mbelé-nzag awē ábelé ntú móo atəngéné mod a e’só abé ákud mbote.

⁷ Döl mekan áte nímé níhóbé áyale Sáηgwéé ábēl esōηtén mó mésyáal.

⁸ Kamtén nén weé Yesu Krístəə ambíd á mbyaa nímé Dabide, Dyöb dēmpuúd-te mó áde awédé. Mmén nkalaj ní bwám móo níkanléé bad.

⁹ Akal áde níkaléé nímén nkalaj ní bwám dóo ákəə boη níkudé metake káəη béhəg-ke με á mehaη nηngáne mod awe abóo mbéndé. Boη modmod éēhēlē-se ahé Eyale é Dyöb bengbēngōbē.

¹⁰ Né-óo, nwēséné metake nímé níkúde ábel bad ábe Dyöb ápwédé, bómpē békud e’sóosōη ábe Yesu Krístəə ábēé bó, bébē-ε ásē e ehúmé éche ébē á ngíndé ne á ngíndé.

¹¹ Enén póle edé mbále, edé nén bán, “Nzé syánē dewédé ne Krístəə, né syánē déébē-ε á alonjé, ne mó.

¹² Nzé dedé dewesan mekan ne mó,

deékamlén ne mó,
nzé debáá mó á yál
né mó-'ε ábān syānē áyāl.

13 Nzé déebēl' ngáne Krístəə áhēdēé aá débél,
mópen ábē ábel chōm ésyāāl eche áhóbé aá móšbēl,
áyāle eéhēlē-ε abān eche yāl á yāl."

Paale aá Timotiē ábē mbélé-nsón a bwám

14 Ebē ébele bad ábe bédúbpé békamtan nímén mekan. Esím bó etúu áte á'só é' Dyōb wεé béepentán nhóg ne aníníi tǎngene e'yale. Ene ndín e ntántén eewōngánne bon pen ebéhte adúbe áde bad ábe bēwóglan.

15 Wéd yál áte ábel Dyōb ányín nén aá edé mod a nsón awé eékwágé ábel nsón míme ábeléé, ébē-'ε mod awé ayágte nkalan nǐ mbále nyaa echē etǎngéné.

16 Weewóó dyam ábel ne e'kúkú é' mehób, ne mehób míme méesē etógnén áyāle nzé bad bēhóbe échē ndín é mehób, né débēl bēnabpé mekan ábel míme Dyōb déehēdēé aá bēbel.

17 Donje á bad ábe bēhóbe échén ndín é mehób bédii Himenose bó Filetus. Mmab mehób médii nēngáne sii eche edyág mod áte ésebán emaa'.

18 Bétédte adúbe áde átǎngéné, bétímé bēyágte bán syānē ábe dedúbpé, Dyōb ámáá syānē apuud. Enén ndín e ayáge ebéhte donje á bad adúbe.

19 Bon kénē, mekan míme Dyōb ámáá anabe, méehǎnlánne. Awedé mínnaá e'yale éténlédé nén bán, "Sǎngwéé abíi bad ábe bédé ábē bad," éténlédé-'ε nén bán, "Bad bésyāāl ábe bēhóbe bán bédé ne Sǎngwéé, bétǎngéné bésóg mbéb ábel."

20 A ndáb e mod ambáá, donje á míse ádé áde bēbénlé gól, donje sílva, donje-'ε ádé áde bépódé ne áde bēbénlé hyæg. Bēbenlad donje nzé dyam dé edúbé ádé, donje-'ε bēbenlad pónké kéhéé.

21 Nzé mod ké ahéé asógé mekan mé mbinde ábel, ábē nēngáne míse míme bēbenladte nzé dyam dé edúbé ádé. Ane mod ábelé asán, eche Sǎn-'ε abenlad mó. Ane mod abág mbojsén ábel dyam á bwám ké ahéé.

22 A-Timoti, weébēl mekan mé mbéb míme kódebad ébeleé. Bon pen éwane áte ébele mekan míme métǎngéné, ébē edúbe Krístəə, édǎn bad bēmpēe, ébē-'ε nšan ne bad. Ehíde nímén mekan nchoo ne bad bēmpēe ábe békánne Dyōb ne nlem nhóg.

23 Weewóó dyam ábel ne e'yókél bé mpenten mmé méewóó-'ε nwōngen ké nhóg áyāl e mod. Ebíi wεé mpenten nǐcene nselag.

24 Syānē ábe dedé-'ε bembáledε bé Dyōb deésenlé. Bon pen, detǎngéné débōn nlem ne mod ké ahéé, detǎngéné déyágte bad bwám déwesán-ne bad.

25 Déyágte bad ábe bétyéeman syānē ábel bon bēbii bán mam míme bēhóbéé syānē á yál méesaá mbále. Décheden bó yál nzé debele nē. Délyág nlem nén bán Dyōb débēl bēchēm ádáb awusé bēhǎnlén, bésōntén-ne mbále eche eyale é Dyōb ékaléé.

26 Nén débēl debyéé dépē bó á nló-te, bēbíd-te Devəle á melám tē. Devəle ammad bó akób ádogé-'ε bó ábel mekan míme áhédé'áá aá bēbel.

3

*Paale ahóbé tǎngene ebébtéd
eche ébē á e'pun bé asóg*

1 A-Timoti, nhede méé ebíi nén wεé á e'pun bé asóg, mekan mébē ebébtéd.

² Ene pónde bad bébē ábe bédás chōm, ábe bédás mōné, ábe bédé kúmbe, ábe bédé epame, ábe bébébé nsal áte, ábe béewógné ábab besáá ne benyaá, ábe béebagé meságnen áyāl e chōmchōm, ábe béebelé ngáne Dyōb áhedeé.

³ Bad bébē-ε ábe béelūmtē bad bémpee edange, ábe béewóo nlém ní ngol, ábe békale bad metóm áyāl, ábe béehelé yāl akób, ábe bédé ekan, ábe béedəə bwám.

⁴ Bébé ábe békag bad ntúrē, ábe béwóo ehóhó é abé, ábe béwēmtan bán bétómténé abé, bébē ábe bédás menyinge mé nkōnsé, béedəə' Dyōb.

⁵ Bad bébé ábe bélūmte byánán bébele ngáne Dyōb áhedeé bonj béemwaa bán ngine e Dyōb éhəŋlən ádáb alongé. Weékag échén ndín é bad benben.

⁶ Abén bad donje adé áde adoge bad, bésól áwab mendáb bédoge bebaád ábe béewóo debyéé ábe bédyee áwəd-te. Abé bebaád bébéle mbéb bwám bwam nyaa eche nímé mbéb rídénlédé bó née nted. Mewēmtən mé mbéb mó ne mōó níkamlan bó.

⁷ Béwóglan meyáge nyaa ne nyaa bonj béeheléé ayáge á Dyōb á mbále abii.

⁸ Ngáne Janese bó Jambres béntəŋgənnē Mosee bōód, melemlen nē dōó abé bemelēede bé metóm bétəŋganné ayáge á mbále. Mewēmtən mé mbéb móó béwóo. Dyōb ábáá bó á yāl áyale béetəgnéé adúbe awonj.

⁹ Bonj bédōg bad dās á esón é pónde áyale bad bəchēm échab edimdim, melemlen ngáne émbenlédte ne Janese bó Jambres.

Paale adii alébe' Timotié

¹⁰ Bonj we a-Timoti, ehidé ayáge áde ní'yágté bad bwám, ehidé abé áde níwóo, ehidé-ε chōm éche ríhedeé abel áwēm alongé. Ebíi wéé ndúbpé Dyōb, ebíi awesen áde níwesanné, edange éche nílūmtéé bad. Ebíi ngáne níkáá nlém áyāl e nsón níme mbéleé.

¹¹ Ebíi ngáne bad bétagteé me, ebíi-ε metake níme níkudeé áyāl enē. Ebíi ndín é mekan éche ebénlédé me á myad mé Antəg, Ekōniom ne á Listra. Ebíi ngáne mēnkanjé nlém áyāl e metake níme mēnkudté áwed. Bonj Səngú Yesue ansōŋ ádēm alongé ásē e níme metake mésyāāl.

¹² Ne mbále mod ké ahéé awé abele mekan ngáne Dyōb áhedeé abé áde adíi ne Yesu Krístəə, atəŋgéné ákud metake á mekáá mé bad.

¹³ Bonj e'bébtéd é' bad ne bad ábe bédoge' échab yāl, bənabpé mekan abel níme métómténé ebébtéd abé, bédogé bad, bad bémpee-ε bédogé bó.

¹⁴ We pen a-Timoti, ébē ébele mekan níme éyággké níme ebíi-ε nēn wéé méde mbále, áyale ebíi bad ábe báyágté we mó.

¹⁵ Ebíi-ε wéé se ánwēndemé móbfi chōm éche eyale é Dyōb édíi. Echén eyale é Dyōb chōó ebágé we debyéé ásonŋten nēn wéé Dyōb ásoó we áyale édúbpé Yesu Krístəə.

¹⁶ Chōm ésyāāl éche bétélé á kálag e Dyōb ehúú ne Dyōb. Ewōŋgan áyáged bad, éwōŋgān áláa bad nímbab mewusé, éwōŋgān bad átii mewusé níme bébéle, éləŋgē-ε bad ábel mekan níme métəŋgéné.

¹⁷ Eyale é Dyōb éwōŋgan ábel bonj mod awé abenle Dyōb abé mbonjén ákwōgned-te ábel nsón ní bwám nísyāāl.

4

¹ A-Timoti, á'sō é' Dyōb ne Yesu Krístəə, mó awé ákáad bad ábe béwédé ne ábe bédé á alongé, á dfin áde mó awé ápē ámbíd abé-ε nkamlene a moosyāál, nkoo we nímén mekan aláa méé:

² Ekale' nkalan ní bwám ké áde bad bédás mó awóg ké'ε áde béedəə'é. Ebel bébii bán chōm éche éhóbéé édé mbále, ébel bésóg mewusé abel, éwéde-ε bó nlém á abum, éyágte-ε bad nímén mekan ne nwesen nísyāāl.

³ Póndé ɛpɛ echê bad béehɛdté bán béwóg ayáge áde átánǵéné, bonj pen bébelé' mekan níme nímad ním nílánǵé bó aá bébel. Bemeléede-'e ábe bédáá bán belánǵe bó mekan níme bédáá awóǵlen bèn ne bèn-naá béwóǵlannê.

⁴ Bad bébān mbále e Dyób awóǵlen, bébāg metúu áwóg póle é metóm.

⁵ Bonj we a-Timoti, écháa ehoŋ yál bwám póndé ésyāā. Ewesen metake, ébele nsón ní mod awé akanle bad eyale é Dyób ébele-'e nsón nísyāā níme Dyób ábáge we aá ébel.

⁶ Me pen, póndé emaa me ape echê bébéé me ngáne nde, póndé emaa me abé benben áte de ádén alonǵé.

⁷ Née mod a nsón awé Křístaa, nwané nzum e bwám, mmadá nsón níme Křístaa ámbéé me aá níbele mó. Nhídé-'e adúbe nyaa echê etánǵéné.

⁸ Bóob-pe, nsábe nisine me, níme nílúmte nén bán mbele nsón níme nítánǵéné ngáne Dyób áhedeé. Mmê nsábe mó Sánǵwéé, mó awé akáadte bad nyaa echê etánǵéné ábéé me á epun é nkáásé. Saá-kaá mměmpen ábéé mó bonj ábê kááŋne bad bésyāā ábe bésine' échê epe.

Paale alébe Timoti

⁹ A-Timoti, éwan áte éwámsen ape áwěm.

¹⁰ Nhóbe nén áyāle Demase abáá me áyāl akíí á dyad á Tesalonika áyāle adáá mekan mé nkóŋsé. Křesense akíí á mbwóg e Galesia, Tituse mó-'e ákē á dyad á Dalmatia.

¹¹ Lukase mwěmpen mó adé ne me. Nzé epag, épēēn Makóse áyāle áwōŋǵēn me áyāl e nsón níme níwóó.

¹² Nlómé Tikikuse á Efesus.

¹³ Nzé epag, épiinéd me echem kóte. Mentédé chó á dyad a Troas á ndáb wéé Kaapuse. Epiinéd-te me nhíbe ní kálag, bwámbwam ní ngob é nyam.

¹⁴ Alésandaa awe alúe e'kii abelé me ebébtéd bwámbwam. Sánǵú Yesue ákǵsēn mó áyāle mbéb níme ábélé.

¹⁵ Wěmpē étédēn mó póndé áyāle antyéémēn sé bwámbwam áyāle nkalan níme sékaléé.

¹⁶ Ngen e'só eche nítyéémé a nkáásé modmod enkěnkwognédté me. Moosyāā ambān me á yāl. Nkánne nén meé Dyób álagšen bó.

¹⁷ Kénê Sánǵwéé ambé ne me, ábē-'e me ngíne. Nén dēmbēl menhēl nkalan ní bwám akal nyaa echê bad ábe béesē bad bé Israel bēnwóǵkē mó. Sánǵwéé anhúd-te me á nsāl ní ngii.

¹⁸ Sánǵwéé ásoŋ me alonǵé áyāl e ebébtéd ké éhéé eche étán me ákēēn-ne me áwé nkamlēn ní mín ne nsāŋ. Edúbé ébē ne mó á ngíndé ne á ngíndé.

Melenten mé asóǵ

¹⁹ Lēntéd me Priskaa bó Akwilaa, élentēd-te me abum á ndáb áde Onesiforuse.

²⁰ Erastuse anlyǵg á dyad á Kōrinto, nítēdē-'e Trofimuse á dyad á Miletus, áyāle akónlē'áá.

²¹ Ewan áte ényín nén wéé mópedé áwěm, ahéb á ngíne ádēhób bán ápag. Yubuluse, Pudense, Laynuse, Klodia ne bānned bé Křisto ábiní bésyāā bélénté we.

²² Sánǵwéé ábē ne we. Nsimé ní Dyób níbē ne we.

Kálag eche Paale áténlé Tituse Ndíbned n kálag

Tituse eebédeé mod a Israel boŋ antim mod a Krísto, áwōngān Paale, búmā bébelé nsón ní Dyōb. Paale antelé Tituse enén kálag alyág áde ányāgkē mós á mbwóg é Krēt ānon nsón ní mwembé. Enén kálag ekoo' metote mélaán anōn á díd.

Dyam dé'só, Paale akamtan Tituse nyaa e abé eché belyáged bé mwembé bétāngéné awōŋ, tanje ngáne bad bé Krēt bēnwōngē abe dé mbéb. Paale alébe-ε Tituse ngáne átāngéné bad nyaa ne nyaa aléb á mwembé-te. Abén bad bédii bechun bé bad, kódebad ne ngōndéré, ne betāŋ. Asóged, Paale alébe Tituse ngáne abé á mod a Krísto átāngéné abé bwāmbwam ábē nsan ne nhóg ne aníní, ábel ekōyí éēbāg, mpentēn méēbāg, nkabén-ne méēbāg á mwembé-te.

Nkabtéd n kálag

Ndíbned n kálag 1.1-4

Belyáged bé mwembé 1.5-16

Nsón níme bad téé bétāngéné abel á mwembé te 2.1-15

Elébe ne asím dé etúu áte 3.1-11

Nsógten 3.12-15

Paale alómmé Tituse melēten

¹ Mē Paale, mbālede a Dyōb ne mbapēe a nlomag awē Yesu Krístā, mē-éé ntelé enén kálag.

Yesue ampwēd mē, alóm-mē mē ábel boŋ adúbe áde bad ábe Dyōb ápwédé ákag á'sō ne ábel boŋ bēbii mbále tāngene Yesue, bébele' ngáne Dyōb áhédeé.

² Nén ábele bad bé Krísto bēwōŋ e'lyág bé nlém ákud alonjé áde déemaá', dōo Dyōb, mós awē eekālē metóm ánhōbpē aá mósōbē, nkōjsé nídehób bán níbootad.

³ A pónde eche etāngéné-ε Dyōb dēmbel aá bad bēbii níme nkalanj. Dyōb dēmbē níme nkalanj áwēm mekáá, mē-ε níkal mós ne kunze eche mós Dyōb, awesyánē Nsoode ámbéé mē.

⁴ Ntenle wē, Tituse, awem mwān a mbále á adúbe áde syánē moosyáál déwóó. Nsimé ne nsanj níme níhuú ne Dyōb Titée ne Yesu Krístā awēd Nsoode, níbe ne wē.

Paale ahóbé tāngene nsón níme Tituse ábenlé á mbwóg e Krēt

⁵ Mentéde wē á Krēt, mbwóg eche mendíb mélāŋnéde ábel boŋ étii mekan níme méhednad abel, épwed belyáged bé mwembé dyad té. Ekamtēn ngáne ménlāá' é wē mēé ébel.

⁶ Nlyáged atāngéné abé mod awē béehelée sé békóbén awusé. Atāngéné awōŋ dāsō mmwaád nhóg, ábe bán-ne bétāngéné bédúbé Yesue. Bétāngéné abé awōŋ áde modmod ééhēlē-se ahób aá bēwúu nló áte ké'ε aá bédé epuutéd.

⁷ Nlyáged a mwembé nēngáne mod awē ahíde nsón ní Dyōb ámbíd, eetāngénéé nēe áwóó awusé á yál. Eetāngénéé epame abé, ké'ε abé mod awē awámsan alinj. Eetāngénéé-se abé mod awē abagé yál á amwé á mím káa mod awē apēene epuutéd. Eetāngéné-ε se abé metōg.

8 Boŋ pen atánǵéné abé mod awě akobe beken abé-'e mod awě adəə akan á bwâm. Atánǵéné abé mod awě abíe' dyam abel, abé mod awě abele mekan míme métánǵéné, abé mod awě asáá, abé-'e mod awě akóbe eche yál.

9 Atánǵéné abé mod awě akoó nkalaj ní bwâm, nkalaj míme bad bétánǵéné nlém asum áyāl adúbe ngáne báyáǵte mó mó. Nén débēl áhēl bad bémpeə ahébe áhíd nkalaj ní bwâm nyaa eche etánǵéné áhēl-le mewusé míme bad ábe bétánǵan nímé nkalaj abided áwed.

10 Nhóbe nén áyāle bad híin béekwenteené áhíd nkamlen míme belyáǵed bé mwembé. Bédii bad ábe béhóbe e'yale ábe béewóo nsónŋen bédoge-'e bad. Bad híin ábe báyáǵte enén ndín e ayáǵe bédii bad ábe bédé á epepé éche éhóbe nén bán bétánǵéné bad ayag.

11 Weémwāg se ábē bad báyáǵte áyāle bēbēbte bad bé Krísto híin ndáb áte ayáǵed áde báyáǵteé mekan míme béewóo'ē kunze áyáǵed. Báyáǵte' échē ndín e mekan ábel békud mənē.

12 Mod nhóg awě ambíd á Kret se' bəód awě abédé mod a debyéé, anhób aá, "Bad hé Kret békale metóm pónde ésyāal. Bēbēbé nlém á abum, bédii bad ábe béehēle nsón, bédyāg-ke ndyééd bwāmbwam."

13 Abé e'yale ábe ane mod ánhōbpē áyāl e ábē bad é'dé mbále. Né-ōó, bad ábe bédúbpē Yesue boŋ bēhíde áde ayáǵe dé metóm, ékoŋ bó nímāb mewusé aláa ábel bédúbe ayáǵe áde atánǵéné.

14 Nén débēl bēdúbéé pōle é metóm éche bad bé Israel, bēehíd-taá mekan míme bad ábe bēbáá ayáǵe á mbále áyāl bēhóbeé.

15 Ne mod awě asáá, chōm ésyāal ésaá boŋ ne mod awě eekēnle áte ne awě eedúbpe, chōmchōm áyāle nímāb mewēmtēn ne nlém méekēnleé áte.

16 Bad ábe báyáǵte áde ayáǵe dé metóm bēhóbe nén bán bēbíi Dyōb, boŋ nímāb mbeltéd nílūmte nén bán bēbíi'ē mó. Bébele mam míme bad békós, bēebeléé-'e ngáne Dyōb áhēdeé, bēheléé dyam á bwām ké ahóg abel.

2

Paale aá Titus: áyáǵte ayáǵe áde atánǵéné

1 A-Titus, éyáǵte bad ayáǵe áde atánǵéné.

2 Eyáǵed baachóm bēmbáá wēé bēchyāə échab yāl bwâm, bēbele mam nyaa échē bad bēbagéé bó edúbé bēbē-'e bad ábe bēbyéé' mam abel. Békag á'sō bédúbpē Krístəə, békag á'sō bēdəə bad bémpeə, békag-ke á'sō bēwesən metake míme békudéé áyāl e adúbe áde bédúbpē.

3 Eyáǵed-te bebaád bēmbáá wēé nímāb mbeltéd nílūmed nén bán bēbage Dyōb edúbé. Eláa bó wēé bēehōbē nhóg ne anínii mam áyāl ábēbed bó dín, bēebagé-'e échab yāl á amwé á mím. Boŋ éláa bó wēé báyáǵte bad mam míme métánǵéné.

4 Bēbele nímén mekan ábel boŋ bēhel e'tum é' bebaád ayáǵed ngáne bétánǵéné ábab bechóm ne ábab bán adəŋ.

5 Báyáǵed bó bán bēbē bebaád bé e'wónǵé bé bwâm. Bésun nlém wēé ábab bechóm bēnpēn, báyáǵed-te bó nyaa eche bétánǵéné nímāb mendáb abóo bwâm, nyaa eche bēbē bebaád ábe bésúdté yāl áse e ábab bechóm. Nzé bebaád bēbele nímén mekan mésyāal, bad bēehōbpē nkalaj míme Dyōb ábáǵe bad dyam dé mbéb áyāl.

6 Melemlēn ébel kódebad échəə yāl.

7 A mbeltéd nímōŋ-'e nísyāal, ébele mekan mé bwâm nyaa eche bad bēhíde nímōŋ mekuu. Nzé eyáǵte, chōm éche éyáǵteé étánǵéné ébē mbále, ébē-'e mod awě ahíde mekan ámbíd bwām.

⁸ Enyín nén wéé ayáge áđōñ átāngéné ngáne bad béekudté etál áhób we mam mé mbéb áyāl. Nén débēl bad ábe betāngan we békwağ ayāle nén béekudté nzii áhób syānē dyaṁ dé mbéb á yāl.

⁹ Eyáged betāñ nén wéé béwógne ábab besáá á menzii mésyāal, bébele-’e mam nime méwōgtē bó menyinje. Béetāngeneé nēe bēpentanné bó.

¹⁰ Béechībñē-’e bó. Boñ pen betāngéné alúmed bán ábab besáá béhele bésūm bó nlém áyāl. Nén débēl bad béwōñ mewēmten mé bwām tāngene nkalan nime Dyōb, awesyānē Nsoode, nime déyágtēé.

¹¹ Dyōb álómé nímē nsimé átíntē e syānē ábel áde ábélé nzii eche moosyāal áhele ákūd e’soosōñ.

¹² Abé e’boñ bé nlém é’ Dyōb é’yágte syānē áchene mekan nime Dyōb déhedéé aá débēl ne ásóg esíí awōñ ábel mekan nime bad bé nkōñsé ábe béebii Dyōb bébeleé. Eyágte syānē ábel mekan nēngáne bad ábe bébyéé’ mam ábel, ábel mekan nime métāngéné ne ábel mekan nime Dyōb áhedéé á nkōñsé wén.

¹³ Debele nén ngáne désineé ne e’lyág bé nlém mam nime mépē éché epun áde ádeđ Dyōb, mō awē adé Ngum ne awēđ Nsoode, Yesu Krístāá ápéé ne éché ehúmé.

¹⁴ Yesuε ambē eche yāl ákōde syānē ásē e mbéb nisyāal ábel-le syānē debé bad ábe besáá, debé-’ε ábē bad bēnpen, ábe béwóó nlém áte ábel mekan mé bwām.

¹⁵ Eyágte bad nímén mekan. Ebenlad kunze eche Dyōb ábágé we, áwéd bad nlém á abum ne áláa bad nímāb mewusé ábel béhāñlen. Weémwāg-se modmod anyín we nkōñtéđ.

3

Paale ahóbé ngáne

abé á bad bé Krístō átāngéné abé

¹ Nlāñge we méé ékamten bad ábe éyágtēé wéé bésuded yāl ásē e benkamlene ne ásē e bad bémháá. Wéé béwógne bó bébé-’ε mboñsén ábel dyaṁ a bwām ké áhéé.

² Eláa bó wéé bééhōbē modmod dyaṁ dé mbéb á yāl, bēháa’ mpenten, bēpwiited, bécheden-ne moosyāal yāl.

³ Ngen e’só syānē bēn ámpē debédé eyókél, deewógne’aá Dyōb, dempāñ nzii, debédéé nēe betāñ awōñ áde déwóó’aá esíí ayāl e mekan mé nkōñsé, déhedé-’ε menyinje mé nkōñsé. Dekónáá bad, désíide-’ε bad alonje ádeđ ásyāal. Bad bēnkóó syānē, syānē bēn-ne dékōó nhóg ne aniníí.

⁴ Boñ Dyōb, awēđ Nsoode, anlóméd syānē ábē e’boñ bé nlém ne éché eđāñge.

⁵ Ansōñ ádesyānē alonje. Saké nsón ní bwām nime syānē dēmbēnlé mēmbēl boñ ábēl nē, boñ ámbēl nē áyāle nime nlém ní ngəl. Anlóm Edáəđāñ éche Esáá áwobe syānē mbéb ábel nén déchyáad ekóólé.

⁶ Dyōb ábúde syānē Edáəđāñ éche Esáá ábe mbwiined ne Yesu Krístāá, awesyānē Nsoode.

⁷ Dyōb ábélé nē, ábel boñ nímē nsimé mbēl dékobned áwe e’só boñ syānē ámpē déwōñ e’lyág bé nlém nén bán deékūd alonje áde déemaá’.

⁸ Enén póle échē nhóbéé edé mbále.

Nhedé méé níkoñ nyé nímén mekan aláa ábel boñ bad ábe bédúbpé Dyōb bébii ngáne bébeleé mekan mé bwām. Nén dōó ébóó bán débēle’, nē dō-’aá dépiined moosyāal nsyāñ.

⁹ Boŋ nyéte de e'kúkú bé mpentén, akal á póle tângene ngáne mbyaa mêmbootédte. Nyéte de-'e ngabén ne ntântén tângene mbéndé é bad bé Israel. Abén bwem béepe enéé nsyáŋ, béesaá-'aá dyam dé abelen.

¹⁰ Mod té awé apene ngabén áfinté e bad bé Krísto, nzé ebagé mó elébé ngen póg ne ngen ébe boŋ eewóge we, weewóó dyam ábel ne mó.

¹¹ Ebíi nén wéé ene ndín e mod abébé abele-'e mbéb. Mbéb níme ábéle nílúmte bán akwíde eche yál nkáásé.

Elébé ne melnten mé asóg

¹² Nzé nlómé Atemase ké'e Tikikuse bó mod nhóg áwón, éwān áte áhye dényín me á dyad á Nikopolis áyāle áwed dōó nífidé méé mēbē á pónde e ahéb á ngine.

¹³ Ewan áte ábel boŋ Zenase, mod a mbéndé bó Apolos béhide áke eke éche béhedeé áke. Nyín nén wéé mōwōngēnē bó nyaa eche béetógké chōmchōm éche bébenlédté áke.

¹⁴ Ebel-le ábesóo bad béyáge ábel mekan mé bwám. Bēwōngēn ábel mekan níme méhedne bán mod ábel. Béebelé mekan níme méesē dyam dé abelen.

¹⁵ Bad ábe bédé ne me bésyāāl bélénté we. Lentéd me ábesyānē baanyan bé Krísto bésyāāl ábe bédáó sé.

Nsimé ní Dyōb níbē ne nyé moosyāál.

Kálag echě Paale áténlé Filemɔne Ndibned ní kálag

Filemɔne abédé mod awě andúbé Krístə abé-’ε mod awě awóó edúbé bwámbwam á mwembé-te. Kapóg abédé á mwembé níme rídé á Kolose. Anwón ntán awě béchágé’áá bán Onesimuse. Ane ntán ansób wée Filemɔne dɔ-’aa ámbíd e pónde ábómne Paale. Paale abédé á mbwəg ene pónde. Paale mó ankəŋ boŋ Onesimuse abé mod a Krísto. Kálag echě Paale áténlé Filemɔne, antel chó aa Filemɔne bó awe ntán bétim áse, aa mó Paale mólóme’ awe ntán ámbíd, nén Filemɔne akob mó ámbíd saké áyāle ádíí awe ntán dēmpen boŋ ákob mó nēŋgāne mwānyan á Krísto.

Nkabtéd ní kálag

Ndibned ní kálag 1-3

Paale akené Filemɔne 4-7

Paale acháá’ Filemɔne átéd Onesimuse ámbíd 8-22

Nsógten 23-25

Paale alómmé bad melɛnten

¹ Mε Paale, awě adé á mbwəg á dín á Yesu Krístə, mε-εé ntelé enén kálag. Sé Timoti, mwānyan a Krísto awēd, sélómme nyé melɛnten. Sélente’ we Filemɔne, nsón e echon awēd awě mómpə abele’ nsón níme sébeleé.

² Sélente’ kóŋne Afia, awēd mwānyan a mmwaád a Krísto. Sélente’ Achipuse awě mómpə akale’ nkaləŋ ní bwām ne nŋine esyāál nŋane sémpé sékaleé. Sélente-’ε bánned bé mwembé ábe bébome’ áwoŋ ndáb.

³ Nsimé ne nsan ní Dyób Titée awēd ne Sánŋú Yesu Krístə, mbê ne nyé.

Edəŋge ne adube áde Filemɔne

⁴ A-Filemɔn pónde tée nzé nkānne’, mbelé n̄sagnān Dyób áyāl echon.

⁵ Nságnan Dyób áyāle nwógé nén bán edəá bad bé Dyób bésyāál, esumé-’ε nlém wée Sánŋú Yesu Krístə.

⁶ Nkānne’ nén mεé, nlatén níme syānē déwóó nēŋgāne bad ábe bédúbpé Krístə, mbél nyékon mekan mé bwām mésyāál níme Dyób ábágé syānē ason̄ten. Nén débēl ehúmé éche Krístə ényínned.

⁷ A-mwānyan, edəŋge éche éwónné bad ábe bédúbpé Krístə, éwógté me menyĩŋge bwámbwam éwéde-’ε mε nlém á abum. Éwógté bad bé Dyób menyĩŋge.

Paale ad Filemɔne akob Onesimuse

⁸ Né-óó, kénéε edíí bán nwóó kunze ákamlen we á dín á Krísto ábel dyam áde étəŋéné abel,

⁹ edəŋge éche níwánléne wε ébéle ncháa’ wε cháán. Mε Paale, nhóbe nén nēŋgāne nchun ní mod níme rídé-’ε á mbwəg bəəb á dín á Krísto.

¹⁰ Ncháa wε á nló níme Onesimuse. Adíí bəəb nēŋgāne awem mwān. Mε-εé nkəə boŋ adubé Krístə áde abédé á mbwəg hén ne me.

¹¹ Ngen e’só, enkēmbáá we etógnén. Boŋ bəəb adé sóo etógnén.

¹² Nlómé’ mó ámbíd áwón bəəb, adíí mod awě rídóó bwámbwam.

¹³ Mendəŋ mεé ábê ábê ne mε ábel boŋ áwónŋen mε á etál échon bəəb áde nídíí á mbwəg hén á dín dé nkaləŋ ní bwām.

¹⁴ Kénê, meédəə' é meé rínyaged wε áwógen me. Boη pen mēďǎη meé éwōηgen me áyǎle mmōn edəə me awōηgen. Né-ɔ́, meéhēlē-se nǐbēl dyamdyam ésebán mmōn ekwēténé.

¹⁵ Kapóg Dyōb dǎo dēmbēl aá Onesimuse ápágned wε á yǎl é esóη é pónde, ábel boη nzé atimé ámbíd áwōη ábē ne wε ne abé ásyāál.

¹⁶ Bootya bɔɔb, saké ntán ngēn adii. Adii awed mwánned a Krísto. Ndəə mó bwámwam, wε-'ε ámpē etáηgéné mó adəη ké tómaa ngáne nǐdǎó mó. Etáηgéné mó adəη ngáne ntán awōη, édāη-'ε mó nēe awoη mwányan a Krísto.

¹⁷ Né-ɔ́, nzé etédé me nēηgáne mod awē nyúmō nyébele nsón, etáηgéné mó akob melemlem nēηgáne wékobpé me.

¹⁸ Nzé édé nén bán abēnlé wε epande, ké'ε awánlé wε alúm, né mēsábē wε.

¹⁹ Mε Paale, mmēn-εé ntelé nén ne échēm ekáá. Mēsábē wε. Boη pen, weéchatán nén wεé abel áde nǐbélé boη ékud alongé dékǎlē, édé nēηgáne wēmpē ewanlé me alúm.

²⁰ Né-ɔ́, a-mwányan, ncháa' nén meé éwōηgen me á dǐn á Sánjú. Wógéd me menyinge á dǐn á Krísto.

²¹ Atel áde nǐtélé enén kálag ábélé nsumé nlém nén meé, wēbelé me kéchéé éche nǐlángé wε meé ébele me. Mbíí meé wēbēl-le ké tómaa ngáne nǐhóbé meé ébel.

²² Dyam démpēe áde nǐhóbé meé nǐlāa wε ádii nén meé, é nabned me toη áwōη ndáb áyǎle ndúbpé nén meé Dyōb déwōg nyé mekáne, abídéd me á mbwōg, ntán nyé ámpē.

²³ Epafrase, awē súmō sédé á mbwōg á dǐn á Yesu Krísto, mómpē alómme nyé melenten.

²⁴ Kǎóηne Makose, Aristakuse, Demase, ne Lukase ábe syáábō sébele nsón bǎmpē bélénté nyé.

²⁵ Nsimé nime Yesu Krístə nǐbē ne nyé moosyáál.

Kálag e Hibru Ndbined n kálag

Mod awé atelé enén kálag antel chó áwéd bad bé Krísto nlém a abum áyāl e metake níme bó donje á bad békúdé'áá adúbe áde béndübēē Yesue. Alúmté áte nén aá melē níme Yesue ápééné métómé melē níme ménsēbē abé. Alúmté-é áte ámpē nén aá bééhüntē nlem nén bán Dyöb déelónédte akag áde ábágé. A melē mé'sō níme Dyöb démwēē ne ábē bad mbwiined ne Mosēē, beprise bōō bēbágé'áá Dyöb mendē á nló ní bad. Boñ bōōb, Yesue mó adé mod a títé a bad ne Dyöb abé-'é prise ambáábáa awe atómé bekal bé'dáádəñ bé' bōōd, atóm ángel, atóm-me káəñne Mosēē, áyale eche yāl chēn chōō ámbēē nēē mendē, ngen póg ne ngen ésyāāl. Hōm áde ádíí Atómténé Asán tómaa hōm áde beprise bé' bōōd bēbágé'áá mendē á nló ní bad, mendē níme ábágé-'e mékwógnédé.

Nkabted n kálag

Krístəə mó alúmté bad ngáne Dyöb ákóó abé 1.1-3

Krístəə atómé ángel 1.4-2.18

Krístəə atómé Mosēē bó Josua 3.1-4.13

Krístəə adé prise awé atómé beprise ésyāāl á mbyaa níme Levi 4.14-7.28

Melē níme Krístəə rítómé melē mé'sō 8.1-9.28

Mendē níme Krístəə ábágé rítómé mendē níme beprise bēbágé'áá bōōd 10.1-39

Adúbe atómé chōm ésyāāl 11.1-12.29

Abé áde áwógte Dyöb menyinje 13.1-19

Mekáne mé asóg 13.20-21

Meləntən mé asóg 13.22-25

Dyöb áhóbe wéē bad mbwiined ne Mwän

¹ Se' bōōd, Dyöb dénhōb wéē ábēd betaa, anláá bekal bé'dáádəñ mam áláa bó. Anhōb áwāb ngen ne ngen, ábenléd-te menzii híin áhōb áwāb.

² Boñ á e'pun bé asóg hén, áhóbe wéē syánē, álangē awe Mwän mam áláa syánē. Wéē ane Mwän dōō Dyöb ápóó boñ áhəg' nkoñ ní mín ne ní sé. Mó-'aá Dyöb áttídé aá mó awóó nhəgtéd n̄syāāl.

³ Ane mwän móó adé e'kin-áte bé ehúmé é Dyöb, mó-'aá alúmté syánē ngáne Dyöb ákóó abé. Adíí melemlem nēē Dyöb-pe ádíí. Ngíne e eyale é nsəl éché ane Mwän ebélé mekan mésyāāl mékag á'sō ngáne métəngéné abé. Ahúd áde áhúdé syánē á mbéb-te, abélé syánē moosyāāl desáá. Ambíd e nē, andyēé Dyöb á Ngum é ekáá é mbáá ádyöb.

Mwän a Dyöb atómé ángel

⁴ Né-ōō, Mwän a Dyöb atómé ángel. Melemlem nē dōō d̄in áde Dyöb áchágé mó aá, "Mwän" atómé d̄in ádáb á "ángel."

⁵ Dyöb dééhōbēē wéē ángel ké póg mbéd aá,

"Edíí awem Mwän,

chii, ndíí sóó."

Dyöb dééhōbē'áá wéē ángel ké póg aá,

"Mēbē Sáá,

mó-'e abé awem Mwän."

⁶ Boñ Dyöb ádēhōb aá mólóme' awe Mwän a'só á nkōñsē-te, anhōb ámpē aá, "Ángel éché m̄ ésyāāl étəngéné mó edúbé abe."

7 Anhób tâḡene ángel pen aá,
 “Abelé éche ángel édé née epub.
 Eché Ángel éche édé ábē bembālede,
 abelé édii née muú nīme rīchodne’.”

8 Bon Dyób dénhōb tâḡene Mwān aá,
 “A-Dyób,
 weékamlén á ngíndé ne á ngíndé.
 Weékamlén ábōḡ bad nyaa echē etāḡéné.

9 Edáá mam nīme métāḡéné, ékōō-’ε mam nīme méeboo.
 Né-’aá ákásá bon Dyób, ádon Dyób,
 ápwēd we ábē etógnén tómaa baásyāal ábe nyāābōō nyédé,
 ápwēd-te we ábē menyīḡe tómaa baásyāal ábe nyāābōō nyédé.”

10 Dyób áhóbé ámpē aá,
 “A-Sán we-εé ehāḡé nkōḡsé se á mbooted,
 nkonj mí mín-ne ndii abwóg áde eháḡné échon ekáá.
 11 Abé bwēm é’syāal bépē á asóg, bon we pen weébē abé ne abé.
 Abé bwēm é’syāal bémaa áse née mbóté.
 12 Weényag bó áte ngáne bényagēé mbóté,
 weéhāḡlén-ne bó áte ngáne béhāḡlanné mbóté.
 Bon we pen weébē ehé melelem, ádōḡ alongé-’ε déewóngé asóg.”

13 Dyób déélāḡēé ángel ké póg mbéd aá,
 “Dyēé me é ekáá émbáá hén
 káāḡ ne á pónde eche mébenlé
 bon ékōḡtéd ábōḡ bad bé ekoyí ámín ne mekuu.”
 14 Cheé-ō ángel édii? Edii e’daádāḡ abé é’benle Dyób. Dyób álóme-’ε bó
 áwōḡḡen bad ábe békūd e’soóson.

2

1 Né-ōó ngáne débii nīmén mekan, detāḡéné kéchéé éche déwógé nlém
 asum áyāl ábel bon deépānē’ nzii.

2 Mekan nīme Dyób dénlāā-’é ángel aá éláa ábēd betaa ménwōḡ ngíne. Bad
 bésyāal ábe bēnkēnhíd nīmē mekan, ábe bēnkēmbēl-le ngáne nīmē mekan
 méhóbé-’aá, bēnkūd nkōḡsen nīme bēntāḡēnné akud.

3 Chán-nō nyéwémténé bán dehele debíd nīmén nkōḡsen áte nzé deewōḡne
 nkalāḡ ní bwām pónde? Mmē nkalāḡ mō-’aá nīpēene’ enén ndín e e’soóson.
 Sāḡú Yesue mwēm mō asébpē bad akale tâḡene áben e’soóson. Bad ábe
 bēnwōḡ-ke mam nīmē ánhōbpē, bēmbēl syāné denyín nēn bán médé mbále.

4 Dyób dōmpē dénlúmed syāné áte nén aá nīmē nkalāḡ nídé mbále. Ambel
 nē alúmed áde alúmté e’chemléd, mekan mé menyáké ne menyáké hiín.
 Anlúmed nē ámpē ne mekan nīmē bad bébélé-’aá á ngíne e Edáádāḡ éche Esáá
 éche Dyób démbēé bó. Dyób démbē bad Edáádāḡ éche Esáá ngáne ébonnéde
 mō.

Ane awē alyḡte syāné akud e’soóson

5 Saké ángel chōō Dyób ábānné aá ékamlén nkōḡsé mékōālē nīmē séhóbēé
 bán mēpē.

6 Bon éténlédé hōm ahóg á kálag e Dyób pen nén bán,
 “A-Dyób, cheé moonyon ádíí awē éwōḡné pónde?
 Cheé mwān a moonyon ádíí éche ekásá bon énoné mō?

7 Ayāl e esón é pónde, wembēl enkēmpaá ángel. Wembané mō á atii dé ehúme
 ne edúbé.

8 Wembē mō ngíne ákamlen chōm ésyāal.”

Abε adε ébágé mó ngine ákamlεn chǒm ésyāāl, álumte' bán chǒmchǒm éesaá éche éesε áše e nkamlεn nímε. Kénεε édífí-'aá nê, deenyínεé bǒb nén bán chǒm ésyāāl édε áše échε.

⁹ Bon denyíne' ngáne Yesuε adífí. Ayāle esónj é pǒndé Dyǒb dεmbǐl enkεmpaa ángel. Bǒb, Dyǒb ábágé mó ehúmé ne edúbε néε kǎn áyāle metake níme ákúdε ne kwééd eche áwédé. Dyǒb álúmté syánε nímε nsímé awé áde Yesuε áwédé á nló ní bad bésyāāl.

¹⁰ Bwēm é'syāāl é'díi é' Dyǒb, mó-'aá anǒne' bǒ. Ngáne édífí nén bán Dyǒb áhede' aá bad híin békud etál ábε ábe bán, békud-tε ehúmé, émbε mbonj nén bán ábel mod awé ásalé bǒ nzii ákud metake. Nê débǐl ákwognéd ábε mod awé ábǐl bonj bad békud e'soosoj.

¹¹ Yesuε awé ábele' bonj bad bésán, ne bad ábe bésáá, bǒ moosyaál bédii bán bé Sáá nhóg. Né-'aá ákós bonj Yesuε eekwágé' áchǎg bǒ aá baányan.

¹² Eténlédé nén bán anláá Dyǒb aá,
 "Mεélaá ábēm baányan ngáne ádonj dín ápédé abé.
 Mǐkǐn wε nzé syáábǒ séládné hǒm ahóg."

¹³ Anhób ámpε aá,
 "Mεésúm nímēm nlém ne Dyǒb."
 Anhób-pε ámpε aá,
 "Mε nén, syáábe bán ábe Dyǒb ábágé mε."

¹⁴ Ngáne édífí nén bán ábε bán bé Dyǒb bédii baányonj ábe bεwóó ekob é yǎl ne mekií, Yesuε ámpε antéd yǎl e moonyonj néε bǒ. Ámbel nê ábel bonj kwééd eche ánwεé ébǒded ngine eche Satanε awé ábele' bonj bad bεwág.

¹⁵ Awé áde ánwεé áhúdé bad á mehanj ábe bémbε betǎn á alongé ádáb ásyāāl áyāle mbwóg ní kwééd.

¹⁶ Enyínnédé bwám nén bán saké ángel ánhycé awǒngεn. Bonj ampé áwǒngεn bad bé mbyaa níme Abrahame.

¹⁷ Né-ǒó éhédnǎdtáá nén bán Yesuε ábε melemlem néε baányonj á menzii mésyāāl ábel bonj ábε prisε ambáámbáa awé awóó nlém ní ngǒl, abé-'ε mod awé béhεle bésúm nlém áyāl. Ábele áde ábεnléε Dyǒb, ábélé Dyǒb álagsan bad mbéb.

¹⁸ Ngáne édífí-'aá bán mwēn antǎg, ákūd-tε mekǎgsεn, awǒngan bad nzé bédé á mekǎgsεn-té.

3

Yesuε atómé Mosεε

¹ Né-ǒó a-baányan, nyé ábe Dyǒb áchénlé ábε ábε bad, nyénǒne' Yesuε. Mó adε mbapεε awé Dyǒb álómé, abé-'ε Prisε ambáámbáa á mekan níme séhǒbε bán sédúbpé.

² Dyǒb dεmpwεd mó, ábεnlé-'ε Dyǒb ne nlém nhóg melemlem ngáne Mosεε ábεnlé-'aá Dyǒb ne nlém nhóg á abum á ndáb á Dyǒb.

³ Mod awé alóó ndáb, bébélé bébε mó edúbé tǒmaa ndáb eche alóó. Melemlem nê dǒó Yesuε ákwǒgnédé ákud edúbé éche étómé edúbé éche Mosεε.

⁴ Ndáb téé ewóó mod awé alóó chǒ. Bonj Dyǒb dǒó alóó chǒm ésyāāl.

⁵ Mosεε abédé mbaledε á abum á ndáb á Dyǒb, awé ábεnlé-'aá Dyǒb ne nlém nhóg, álumte' bad mam á'sǒ é' pǒndé níme Dyǒb débεnlé.

⁶ Yesu Křístǎ pεn abédεε Mwán á Dyǒb, ákamlán-ne abum á ndáb á Dyǒb ne nlém nhóg. Syánε ámpε dedii bad bé abum á ndáb á Dyǒb nzé édε nén bán dedé déchǎgnédé, desumé-'ε nlém ne chǒm éche débééné kúmbe, éche désúmé-'ε nlém áyāl.

Elébé ne bad ábe béedúbpe

- ⁷ Né-ṣṣ, nyéwóg chōm-εε Edṓáδaη éche Esáá éhóbé. Ehóbé aá,
 “Chii nén nzé nyéwógé ehób é Dyöb,
⁸ nyéewúéné’ Dyöb nló áte ngáne ábēn betaa bēnwūēnnē Dyöb nló áte á
 póndé eché bēnkunnénnē Dyöb yǎl.
 Bēnkunnén mó yǎl
 á póndé eche békágé mó é ehyáŋge.
⁹ A ehyáŋge wē, bēnkǎg me,
 bényín-ne mam nīme mbéle é etún é móom mé mwē méniin.
¹⁰ Nē dṓṓ dēnkāη boη nīlīn ene nyonŋel e bad boη nhób mēé,
 ‘Awab nlém-tē, bétamnad,
 bééhīdē-’aá nzii echēm.’
¹¹ Né-ṣṣ, menlīη, mmwē-’ε melē mēé
 ‘Béesónlé áwēm abwóg dé nkóme-áte mbéd.’ ”
¹² A-baányan nyétéd póndé ábel nyé modmod nyéewóó nlém mé mbéb
 nīme méédúbpe’ Dyöb, ábel boη nyéētēdté Dyöb áde ád é alonŋé.
¹³ Boη pēn nyéwéde’ nhóg ne aníní nlém á abum epun tēé, ngáne échē epun
 échágnédé bán “Chii”, ábel boη mbéb méedogé nyé modmod áwūēn Dyöb
 nló-áte.
¹⁴ Syánē dedii mod nhóg ne Yesu Křīstṓ, nzése delyáŋgé dechāŋnéde káāη ne
 á asóg ne mekan nīme désébpé adúbe tāŋgene Dyöb.
¹⁵ Demaá anyín nén bán éténlédé á kálag e Dyöb nén bán,
 “Nzé nyéwógé ehób é Dyöb,
 nyéewúéné’ Dyöb nló áte
 ngáne ábēn betaa bēnwūēnnē Dyöb nló áte á póndé eche bēnkunnénnē
 Dyöb yǎl.”
¹⁶ Benzébádé bēnwóg ehób é Dyöb boη bēkunnén Dyöb yǎl? Abé bad
 bésyāāl, saá bad ábe Mosεε ámbīdēnnē á Egipto bebédé-ye?
¹⁷ Benzébádé Dyöb dēnliín-naá é etún e móom mé mwē méniin? Saá bad
 ábe bēmbel mbéb bóṓ bēnnaá ndim é ehyáŋge-ye?
¹⁸ Benzébádé Dyöb dēmwwē melē aá béesónlé áwe abwóg dé nkóme-áte
 mbéd? Saá bad ábe békēmbēl ngáne áhédé-’aá-ye?
¹⁹ Né-ṣṣ, denyīne’ nén bán, bēnkēnhēnlé asól áyāle bēnkēndúbéé Dyöb.

4*Nkóme áte nīme bad bé Dyöb békudté*

- ¹ Ahób áde Dyöb dénhōbpē aá syánē dēsōl áwe abwóg dé nkóme-áte ádíi
 étyéémé. Né-ṣṣ déttéd póndé ábel boη nyé modmod eebṓṓ’ asól áhed.
² Syánē ámpē dewógé nkalan nī bwām melemem ngáne bómpē
 bēnwōgkē. Bēnwóg nīmé nkalan nī bwām boη ménkēnwōŋgēnnē bó ne
 awōŋgen dēn áyāle nén, bēnkēndúbéé mó.
³ Bṓṓb-pṓṓ, syánē ábe dedúbpe nīmé nkalan, desóle’ áde abwóg dé nkóme-
 áte. Boη ne bad ábe béedúbpe pēn, Dyöb dénhōb aá,
 “Menlīη, mmwē-’ε melē nén mēé,
 ‘Béesónlé áwēm abwóg dé nkóme áte mbéd.’ ”
 Anhōb nē, kēnéε édíí bán ammad nīme nsōn amad se áde áhágé nkōŋsē,
 abwóg dé nkóme áte dēmmād-tε abé.
⁴ Eténlédé á kálag e Dyöb tāŋgene epun éche élónténé epun saámbé nén
 bán, “Dyöb dēmmād nīme nsōn. Né-ṣṣ ankómé áte epun éche élónténé epun
 saámbé.”
⁵ Eténlédé á kálag-tē wē ámpē bán Dyöb áhóbé aá,
 “Béesónlé áwēm abwóg dé nkóme-áte mbéd.”

⁶ Né-ɔɔ, etál edii ébágnédé donje á bad ásól á hóm dé nkóme-áte. Boŋ bad ábe bénwōg nkalaj ní bwám se' bɔɔd, békênhenlé asól, áyāle nén békémbenlé mekan níme Dyōb dénlāá' é bó aá bébel.

⁷ Nê démbél, Dyōb dèmpwéd epun émpēe, áchāg-ke chós aá “Chii.” Anhób nê etún é pónké ámbid eché ábéd betaa békémbenlé ngáne ánhōbpē aá bébel. Anhób nê mbwiined ne e'yale ábe Dabidē ábe nímáá nyé atele nén meé, “Chii nzé nyéwógé ehób é Dyōb, nyéewúiné' Dyōb nló-áte.”

⁸ Nzé émbē nén bán hóm áde Josua ánkéénné bad dɔɔ dènkōŋ hóm dé nkóme-áte abé, né ámbid e pónké Dyōb dénkênhōbpē tñŋene epun émpēe.

⁹ Né-ɔɔ hóm dé nkóme-áte áde ádé nēŋgáne nkóme-áte níme Dyōb dénkōmēē áte áde ámáá nkōŋsé ahāg ályágé ásine ábē bad.

¹⁰ Kénzée awé asólé á abwóg dé nkóme-áte á Dyōb, akómme áte áyāle amadé níme nsón, melemlem ngáne Dyōb dénkōmēē áte áde ámáá nkōŋsé ahāg.

¹¹ Né-ɔɔ syánē déwan áte désól ádé abwóg dé nkóme-áte, ábel boŋ syánē modmod deebóó asól áhed. Deehidé' mekuu níme bad ábe békémbeél ngáne Dyōb dénhōbpē.

¹² Debíí nén bán Eyale éche éhúú ne Dyōb, édé alongé, édé-'e ngine. Ekóbpē' tómaa páá e nsal níbe. Esóle' mod áte káŋŋ se á mbom ní ngob e yāl ne edáádāŋ. Esóle-'e mod káŋŋ se á meboŋ mé yāl ne á e'hid-té. Eché eyale écheme' mewēmten mé mod ne kéchéé éche mod áhedéé ábel.

¹³ A e'só é' Dyōb, chómchóm éesaa á e'koŋnéd. Chóm ésyāal édé á tâl e ékwéé. Dyōb dɔɔ-'aá détāŋgéné mekan mésyāal nímé débeleé aláa.

Yesue adii ndale e prise ambaámháa

¹⁴ Né-ɔɔ, ngáne déwóó Prise Ambaámháa, Yesue Mwán a Dyōb, awé akií amín á'só é' Dyōb, déchāŋned adúbe áde désúmé nlém áyāl.

¹⁵ Awesyánē Prise Ambaámháa asōŋténé mechínzé nímēd, áyāle nén mómpē ankúd melemlem mé mekāŋsen níme dékudéé á menzii mésyāal, boŋ kéné, enkénbenlé mbéb.

¹⁶ Né-ɔɔ ne e'sum bé nlém désíde benben ne atii dé nkamlen á Dyōb áde ábage nsimé. Deewógé mbwóg ké nhóg. Débel nē ábel boŋ Dyōb áwóg syánē ngól, ábāg-ke syánē nsimé nímé méwōŋgān syánē pónké téé eche détógnéné nwōŋgen.

5

¹ Prise ambaámháa téé awé Dyōb ápwédé átínté e bad, ápwede mó ábele mó á dín áde ábē bad. Ane prise móɔ akobe' mende wée bad boŋ ábagé mó wée Dyōb nēe nde ne mende ábel boŋ Dyōb álāgen bad mbéb.

² Ahele bad yāl acheden ábe bépane' nzii áyāle béebíí' é chóm éche bébeleé áyāle nén mwén ámpē adii moonyon awé awóó mechínzé mé ngob e yāl.

³ Nē ábélé atāŋgéné nēe ábageé mende káŋŋne áyāl e níme mbéb mēn, ábagé-'e áyāle mbéb ní bad.

⁴ Modmod mwén eéhēlēē-se ábe yāl edúbé é prise ambaámháa. Dyōb dɔɔ ápwede' mod ábē prise, melemlem ngáne ámpwedté Arone.

⁵ Melemlem nē dɔɔ-'aá Křístā mwén enkénchógédte yāl ábē prise ambaámháa. Dyōb dɔɔ dèmpwed mó. Dyōb dénlāá mó aá, “Edii awem Mwán. Chii ndíí Sóó.”

⁶ Nē ádé á kálāg e Dyōb hóm dèmpēe bán Dyōb dénlāá mó aá “Wéébé prise abe ne abé, nēe Melkizedeŋe.”

⁷ Ade Yesue ábédé á nkõñsé, akánné'áá, áchāā Dyõb, áchyeé' awé á ngine, mésod mébidé' mó á mîd. Akánné'áá wée mod awé ahele ásõñ alongé adé. Dyõb dénwõg mó mekáne áyāle anwõñ mbwõg ní Dyõb áte.

⁸ Kénée ábédé Mwān a Dyõb, an'yágé áwõgen Dyõb mbwiined ne metake míme ánkudté.

⁹ Dyõb dēmbēl ankwognéd abé-'ε prise ambáámbáa awé akwõgnédé, ábel bad ábe bēwõgne mó békud e'soõson ábe é'dé á ngindé ne á ngindé.

¹⁰ Dyõb dēmbané mó á atii aá mó adé prise ambáámbáa née Melkizedeg.

Elébé ábel mod eétdé adúbe

¹¹ Nwóó mam híin áhób tângene adén atón. Elénlé me áte ngáne mébenlé bon nyēsõñtén mó, áyāle nén nyéewámsánné dyam asõñten.

¹² Nhóbe nén áyāle nén nyētāngén bad abé bõõb ábe bēyāgte' bad bēmpēe. Bon nyēdii nyēhednad ámpē bán mod áyāged nyé mam míme nyēmmadté abii tângene nkalaj ní Dyõb. Nyēdii nyédé née bán bé nkáál ábe bēhednad abii saké ndyééd.

¹³ Kénzée awé adii amwáa' abii, adii née nkáál. Eébfí' é mbon ne mbéb.

¹⁴ Ndyééd pen edii áyāle bad ábe bémáá akwog. Mod ambáá adii mod awé ayággké, awé amēnténé-'ε mbon ne mbéb abii.

6

¹ Né-óó dékéene adúbe á'sõ nēngáne bad ábe bémáá dyam abii. Deetāngeneé née détédeé pónde ámpē áyāge mam míme bēn'yāgēdté syāñē tângene Křistāe se á mbooted. Demmād ayāge, debii-'ε nén bán bad bētāngéné békúné mbid, bētēdē ábel dé mekan mé mbéb míme mépene' kwééd. Demmād-te abii nén bán bētāngéné Dyõb adúbe,

² bēyāgte bad tângene edusen* ne tângene abán á bad mekáá á nló. Debii-'ε nén bán bētāngéné bad ayāged tângene mpuu ne tângene mbakú e nkáásé eché ébē abé ne abé.

³ Deétdé nímén mekan. Dékag á'sõ nzé Dyõb ábágé etál.

⁴ Nhóbe nén áyāle nzé bad bētēdté ádab adúbe, mod eēhēlē-se ápēñ bó ámbid ámpē, bētēdē nímab mbéb bétimen Dyõb. Nhóbe bad ábe bēnkūd e'nyínen bé ekide, bēwõglén nnam ní Dyõb, békūd-te Edáádaj éche Esáá née bad bēmpēe.

⁵ Bēwõgléné e'bon bé eyale é Dyõb, bēnyín-ne ngine eché ébē á pónde eche Dyõb dékamlénné.

⁶ Nzé ábē bad bémáá-'ε mímé mekan anyín bon bétime bētēdté ádab adúbe, mod eēhēlē-se ápēñ bó ámbid ámpē áte de mbéb áhíd Dyõb. Abán áde bēbáá'é Mwān a Dyõb áyāl, ébelé ébē byánán bēbomme' mó á awõg ámpē, bēkwāgté-'ε mó á'sõ é' bad bēmpēe.

⁷ Ndõõb eche mbúú éyággké achóoted bon mendib mésól ásē, ebele bwēm é'kwog bwám. Abé bwēm é'belé é'wõngān bad ábe bēwéné bó. Né álumte bán Dyõb ánamte' ene ndõõb.

⁸ Bon nzé ene ndõõb ekwogte' mekáad ne e'sum bé mbéb bēmpēe, né eesáa dyam de abelen. Né kóáñ ne á asóg bēhyāād-te chó.

⁹ A-baányaj, kénée rílanjéé nyé nén, ndúbpé nén meé nyēbele' mekan nyaa eche nyékudté mekan mé bwám mé e'soõson.

* **6:2 Edusen:** eché edusen énkémbáá edusen eché bédúsánnáá bad ábe bédúbpé Křistāe bēnpen. Bad bé Israel bõmpē bēnwõñ elem éche bédúsánnáá bad, bédúsán-ne bwēm bēmpēe.

¹⁰ Dyōb ábele' nímē mekan nyaa echē etāngénē. Ééchatánnē nsón ké nhóg nímē mod ábélé, ééchatán-naá edange éche mod álúmté mó ngáne nyédii nyébenléé bad bé Dyōb hémpēe.

¹¹ Mmēd nlém rídii nén bán nyé mod téé nyébē nyéwōn ene kán káōn ne á asóg ábel bonj nyékude' chōm ésyāā́l éche nyésúmē nlém áyāl bán Dyōb débe nyé.

¹² Séēhēdēē bán nyébē bad ábe béehedé chōmchōm ábel. Bonj séhede' bán nyébē bad ábe béhíde' mekuu nímē bad ábe béwesān áyāle bédúbpē Dyōb. Echē ndín é bad ékūd chōm ésyāā́l éche Dyōb áhóbé áá mósōbē bō.

Dyam áde Dyōb áhóbé déehidtéé áse

¹³ Se' bōód áde Dyōb dénhōbpē áá mósōbelé Abrahamē dyam, ammwé melé áá mótāngēnē áde akag alóned. Ade dīn dēn dōó ámmwēēnnē melé áyāle nén modmod eebédēé awē atómé mó awē áhélé'áá-se amwé melé áwe dīn.

¹⁴ Anhób áá,

“Nhóbé nén mēé, ntāngénē we anamed,
mēbēl-le nímōn mbyaa nībūū áte bwāmbwam.”

¹⁵ Abrahamē anwesén ásum-me nlém, né-óó ankūd chōm éche Dyōb démbēénnē mó akag.

¹⁶ Nzé mod amwág melé abenlad dīn áde mod awē atómé mó. Mpentēn ké ríhē-é nímē bad béwóó'é, melé móó méyānle'.

¹⁷ Dyōb áhédé'áá ábē bad ábe ámbēé akag alúmed áte nén áá, móóhúdté dyam áde móhóbé áse. Né-óó amwé melé ásoḡtēn akag áde ábágé.

¹⁸ Né-óó Dyōb ábágé syānē mekan mébe nímē méehānlán áyāle Dyōb déeheléé-se ákal metóm. Abagé syānē akag, amwé-'é melé. Abelē nē ábel syānē awē dekií áwē ábel ákəə syānē, déwōn e'wéd bé nlém, désūm-me nlém ne mekan nímē áhóbé áá mósōbē syānē.

¹⁹ Abē e'lyág bé nlém é'dii néé chōm éche ébélé alongé ádēd ásumnédé, ákoḡnéd-te. Ebē e'lyág bé nlém bōó békān bonj detóm abad dé mmwe ámín, dépe á abwóg á hōm áde ásaá wēe Dyōb ádíí.

²⁰ Yesue mó asébpé asól áhed á nló nímē syānē ábonḡsen syānē e'dii. Bōob átimé prise ámbáámbáa awēd awē adé á ngíndé melemlēm néé Melkizēdege.

7

Melkizēdege abédé Prise

¹ Melkizēdege abédé kān e dyad á Salēm, abé-'e prise a Dyōb á Ngum. Ámbomén Abrahamē áde Abrahamē áhúé'é á bel ábe ánwūū'é kān é bad, ánāmēd-te Abrahamē.

² Abrahamē-'e ábe mó akab á bwēm ahóg áfínté mekab mé bwēm dyōm nímē ánhūēnnē á bel. Dyam dé'sō, dīn á Melkizēdege á ehōb é Hibru ádíí bán, “Kān éche ebele mam nímē rítāngénē.” Atón áde álónténē mébe ádíí bán “Kān e Salēm,” awē adé “Kān e nsān.”

³ Eetenledéé hōmhōm nén bán Melkizēdege anwōn sáá, ké'ε mbyaa. Béetele-'áa ngáne béchyáá mó, ké'ε ngáne áwédé. Ádíí prise á ngíndé ne á ngíndé melemlēm néé Mwān á Moonyon ádíí Prise á ngíndé ne á ngíndé.

⁴ Nyénōne-óó nyaa e ndāle e mod echē Melkizēdege ábédé. Abrahamē, sáá ámbáá awēd, ámbé mó akab ahóg áfínté e mekab mé bwēm dyōm nímē ánhūēnnē á bel.

⁵ Mbéndé e Mosēe ebagé kunze nén bán bad bé mbyaa nímē Levi ábe bédé beprise békobe' akab á bwēm ahóg áfínté e mekab dyōm téé, wēe ábāb bad bé Israel, kénéé émbēē bán bōmpē bebédéé mbyaa nímē Abrahamē.

⁶ Melkizedege enkembídté á mbyaa níme Levi, bon kéné ankób akab á bwēm ahóg áfínté e mekab dyóm wée Abrahamε. Annaméd-te Abrahamε, Abrahamε awé Dyób dēmmadté akag abε.

⁷ Ebyééné nén bán mod awé anamte' mod atómé mod awé ánámte.

⁸ Bəob-pə, prise éche ébídé á mbyaa níme Levi ábe békobe' akab ahóg áfínté e mekab mé bwēm dyóm, bésyāal bédii baányon ábe bėwāg. Bon Melkizedege awé ankób akab ahóg áfínté e mekab dyóm, adii mod awé eewéde, ngáne kálag e Dyób éltúmtéε.

⁹ Dehele dehób bán Levi awé akobé'áá mekab wée bad mwēn ámpε abagε akab wée Melkizedege mbwiined ne sáá ambáá Abrahamε.

¹⁰ Dehele dehób né áyāle nén, áde Melkizedege ákíí Abrahamε abomen, né bēechyāā'ε Levi.

¹¹ Dyób dēmbě bad bé Israel éche mbéndé á pónde echě bad bé túmbé e Levi bėbédé beprise á alon á Israel. Nzé nsón níme ábε beprise bėbélé'áá ménkwognéd ábel bad bėkobned á'só é' Dyób, né nzom enkėmbáá echě prise ampée ábídéé néε Melkizedege awé eebide á mbyaa níme Arone.*
¹² Nzé mpwēdtéd mé beprise níhānléné túmbé, né mbéndé chópmpε etāngéné ahānlen.

¹³ Mod awé níhóbéé nímén mekan áyāl, ambíd á túmbé empée. Modmod eébidē-'áá awe túmbé mbéd awé abelé nsón níme prise.

¹⁴ Ebyééné bwām nén bán Sāngwée awéd ambíd á túmbé e Juda. Mosε enkētúbpé đín nén áá beprise bėbíd á túmbé e Juda.

Yesue adii néε Melkizedege

¹⁵ Dyam ádě déhóbé tāngene ahānlen á mbéndé ábúdé anyínned ne abíd áde prise ampée ábídé néε Melkizedege.

¹⁶ Saké mbéndé é baányon chōz embēl bon abé prise. Bon áde prise áyāle awóó ngine ábε á alonjé abé ne abé.

¹⁷ Eténlédé á kálag e Dyób nén bán,
"Edii prise á ngíndé ne á ngíndé,
melemlem néε Melkizedege."

¹⁸ Nzé denoné ped póg, Dyób ásídté mbéndé é' bōód á nkəg, áyāle enkēnwúú'ε áte, enkēnkwoǵnéd-taá.

¹⁹ Debíí nén bán mbéndé eébélē-se chōmchōm ébé ngáne étāngéné abé. Nzé denoné-'ε ped enííí, chōm é bwām épédé echě ékás bon dewon e'lyág bé nlém. Chó-'áá épεene syánē benben ne Dyób.

²⁰ Dyam démpēe áde débíí adii nén, Dyób démwē melě áá Krístā ābē prise abé ne abé. Bon áde bēmpwēdté beprise bēmpēe, Dyób dénkėmmwáá melě ké nhóg.

²¹ Bon áde Dyób ápwédé Yesue prise, anhób áá,
"Sāngwée amwédé melě,
éehúd-taá nímé melě ásē,

áá,
'Edii prise á ngíndé ne á ngíndé.' "

²² Mmé melě melúmte nén bán Yesue mó adé e'chemléd ábε é'lúmte syánē nén bán melě níme Dyób ámwédé méehídtéé ásē.

²³ Beprise bé' bōód bėmbuú áte áyāle nén kwééd ebélé'áá bēhele'áá nsón akεen á'sō.

²⁴ Bon ngáne Yesue adíí á alonjé abé ne abé, ābē prise á ngíndé ne á ngíndé.

* **7:11 Arone:** Arone ambíd á túmbé e Levi. Mó abédé prise ambáambáa e'só e bad bé Israel.

²⁵ Né-ṣṣ, Yesue akwōgnédé áson alongé á bad ábe bépag wée Dyōb áwe mbíd. Akwōgnédé áson bó ne ason ásyāāl áyāle nén, adé á alongé pónde ésyāāl ákanned bó.

²⁶ Ehédnadtáá nén bán déwōn ene ndin e prise ambáámbáa awé asáá, mod eéhēē se ahób mó awusé ké hōg áyāl, eewóó' é atón á mbinde ké hōg á yāl, awé apágnédé bad bé mbéb áyāl, bébānē-' é mó ámin e atii dé nkamlēn ámbáá.

²⁷ Eesaá née beprise abínii ábe bétāngéné bébage mende epun-té. Abé beprise bésébpē mende abe áyāle nímab mbéb, bon bébagé mende áyāle mbéb ní bad bēmpēe. Bon Yesue ambe yāl née mende áyāle mbéb ní bad. Ambēl-le nē ngen pōg ne ngen ésyāāl.

²⁸ Mbéndé epwede baányon ábē beprise bēmbáámbáa. Baányon bébele' mewusé. Bon Dyōb dēmpwēd awe Mwān ne melē áde amáá mbéndé abe. Abelé-' é ane Mwān akōbnédé á ngindé ne á ngindé.

8

Yesue mó adé sydnē prise ambáámbáa a melē mékālē

¹ Atón áde sékoo' é ahób ádii nén; dewóó ene ndin e prise ambáámbáa awé adyē é ekáá émbáá é atii dé nkamlēn á Dyōb á Ngum ámin.

² Abenle' Dyōb wée bwēm ábē é'sáá é'díí á hōm áde akóó ebem é Dyōb abé. Sān Dyōbe mwēm mó alóó éché ebem, saké baányon.

³ Bépwede prise ambáámbáa tée ábe Dyōb nde ne mende mé élém. Né-ṣṣ, anén prise ambáámbáa mōmpē atāngéné chōm awōn éche ábeé Dyōb.

⁴ Bōōb-pōō, nzé émbē nén bán ambé á nkōnsé, né éebáá prise ne abé dēn, áyāle nén beprise bédé ábe bébage Dyōb mende ngāne mbéndé éhédeé.

⁵ Nsón nime ábē beprise bébeleé rídii née e'chemléd ne ediidinge é' mekan nime medé ádyōb. Debii nē áyāle nén, áde Mosee áhóbé aá mōlō' ebem é Dyōb, Dyōb dénsim mó etúu áte aá, "Nyín nén wée mōlōō chōm ésyāāl á yāl é éché ebem nyaa e nlōntéd eche nílumté wē á mbōōd mīn." ⁶ Bon bōōb, nsón nime prise nime bébagé Yesue rítómé nsón nime ábē beprise bé' bōōd. Melemlem nē dōō nchemtēn nime Yesue ápééné áfinté é Dyōb ne ábē bad, rítómé nchemtēn mé'sō nime bēmpéénné, áyāle nén, Dyōb ábagé bad akag aá móōbē bó bwēm é' bwām.

⁷ Nzé émbē nén bán melē mé'sō ménkwognéd ábel bad békobned á'sō é' Dyōb, melē mémpēe méhednad-taá.

⁸ Bon Dyōb dénnýn awusé ne ábē bad, anhób-pe aá, "Me Sāngwée nhóbe' nén meé e'pun é' bín é'húe áde mémwēē melē mékālē ne bad bé Israel

ne bad bé Juda.

⁹ Mmē melē méebáá née melē nime mémwēē

ne ábāb betaa

áde ríchāngé bó á ekáá

bon mbídén bó á alon á Egipto.

Bénkēnhídté nímé melē.

Né-ṣṣ, menhúd bó díd áyāl.

¹⁰ Dyōb áhóbé ámpē aá, Me Sāngwée me-éé nhóbe'.

Bōōb-pōō melē nime mémwēē ne bad bé Israel

á pónde échē ehúe' á'sō médii nén:

Mābēl bébii échémbéndé,

béwōn-’ε nlém áhíd chós.

Měbē ádab Dyōb,

bós-ε bébē ábém bad.

¹¹ Bós modmod éeyágédte waáb,
modmod éeláá-’aá mwānyan nén aá ábíi Dyōb,
áyale bós moosyáál bébīi me,
bootya bésad, kááη ne bémháá.

¹² Mεélagсэн nímab mbéb,
méekamtén-naá nímāb mewusé.”

¹³ Ahós áde Dyōb áhóbεé tēηgene melē mékōālē, álúmtē’ nén bán abelé melē
mé nchun nítómé póndé. Chōm kéhéé éche étómé póndé, éche échune-’ε,
mwāmpin mī póndé éebáá ámpé ne abé dēn.

9

Abēle á Dyōb dé ekob é yāl ne abēle á Dyōb dé Edáádāη

¹ Bōob-ρός, kááη ne melē mé’sō ménwōη mbéndé éche béhídé’áá ábēle
Dyōb, bénwōη-γε abwós á hōm á nkōηsé wéε bébēnlé’áá Dyōb.

² Bénlōη ebem éche énwōη toη ébε. Toη echē embé á’sō béchágé’áá chós
bán Hōm áde Asáá. Atii dé etrukāη ábédé áwēd-te, tébele abé, ne ewele éche
bébágé Dyōb mende.

³ Abad démbē áde ákábé toη e’só ne toη embíd áte. Ene toη eche ebédé
ámbíd e abad béchágé’áá chós bán Hōm áde Atómténé Asāη.

⁴ A toη-tē wē, menyán níme bébēnlé gól níme béhyánté’áá e’twé ámīn ábe
Dyōb edúbé mébédé áhed. Ntyág níme béchágé’áá bán ntyág mé melē mómpé
nibédé áhed. Mmē ntyág bēnkūtēn mós pēd ésyāāl ne gól. Á ntyág-te wē, apom
á gól áde ábédé mána áte abédé áwēd-te. Ntōη níme Arōne níme ménkāg
byaa, nibédé áwēd-te. E’pēd é’ meláá é’be ábe bēntenlé mbéndé áyāl bōmpé
é’bédé áwēd-te.

⁵ A ntyág mīn wē, bwēm é’bédé é’be, ábe bébélé á nwágén ní ángel, ábe
é’lúmté’áá ehómé é Dyōb. Mepab níme ábē bwēm ménkūtēn ebéd é ntyág
wéε ábédé hōm dé alagsen dé mbéb. Bōη ábē bwēm é’syāāl deéhēlē-se dékoη
bós ahós bōob.

⁶ Bémáá’áá chōm ésyāāl anabe bōη, beprise bésóle á toη é’sō epun-té bébélé’
nīmab nsón.

⁷ Bōη prise Ambáámbáa mwēmpēn mós asóle á toη echē edé áte. Asóle
áhed mwē-té ngen pág. Eesóléé mbēd áde éewanléé mekii mé nyam ábe Dyōb
mende áyāl e mbéb nímē ne mī bad bēmpēe, níme bébélé ésebán bébīi bán
bébélé mbéb.

⁸ Edáádāη éche Esáá ébele nímén mam álúmed syánē áte nén aá, abēnled
áde dédíi débēnladté ebem é nkōηsé, ábélé nzii eesaá syánē ápe á Ebem éche
Esáá wéε Dyōb ádíi.

⁹ Echē ebem élúmtē mekan níme mébēnlad chii. Elúmtē syánē nén bán nde
ne mende mé nyam níme bad bébágé’áá Dyōb, méehéléé-se mébel nlém níme
mod awé abage mende se níkéle á abum.

¹⁰ Mmēn mbeltéd nisyāāl nīnōne’ dásō adyé á ndyééd, amwé á mīm ne nyaa é
mekan émpēe hiin échē bad bébélé’áá ásaad yāl. Mmē mbeltéd nídíi mbéndé
e ekob é yāl ngēn, éche émaá á póndé eche Dyōb dé nabéé mam mésyāāl.

Mekii níme Yesue mós médé nde echē esáá

¹¹ Krīstəə amaá ape. Mós adé Prise Ambáámbáa a mekan mé bwām níme
mémáá ape. Abēle níme nsón á ebem éche étómé ebem é nkōηsé, élón-ne

mbom tómaa ebem é nkõñsé. Saké baányonj béléó échê ebem. Eesaá ebem éche édé á nkõñsé.

12 Ade Yesue áásólé á ebem-tê wê, ansól adê Hõm áde Atómténé Asán ngen póg ne ngen ésyāāl. Saké mekií mé mbód ne mé nyag ánkεεnné áwēd-te áβε mende. Boñ nímê mekií mēn mōó ántédte. Ambenléd mó ákade syāné á mbéb-te ábel débê á alongé á ngíndé ne á ngíndé.

13 Ngen e'só, bétédé'áá mekií mé mbód ne mé nyag, bétéd-te mbúmbú é etum é nyag éche béhyánté, bémwagtaáá bad á yāl ábe béesáá á'só é' Dyõb, ábel bésánj.

14 Nzé édé nén bán mekií mé nyam méhele méwõñ ngine ábel bad bésánj, né élúmte nén bán mekií níme Krístæ méwóó ngine bwámbwam, eche ehéle esáád bad. Abagé eche yāl eche eewóó mbéb ké nhóg néε mende, ákade syāné moosyāāl. Ambel nén á ngine e Edáádəñ éche Esáá éche édé á ngíndé ne á ngíndé. Mímê mekií mōó mēsāñte syāné nlem á abum ábel nén deébēlē mekan mé mbéb níme mépiinéd syāné kwééd. Boñ pen detəñgéné Dyõb dé alongé abele.

15 Né-'aá ákás boñ Krístæ abé mod atínté a melé mékōōlē ábel nén bad ábe Dyõb ápwédé békud nnam níme mébē abé ne abé. Mímê nnam mōó Dyõb áhóbé áá mōōbē ábe bad. Kwééd eché Krístæ áwédé chō ekāá boñ nén ábenlad. Eche kwééd ekōdté bad áse e mbéb níme bēmbenlé áde melé mé nchun médii mékámlánnáá bō.

16 Bōōb-pōó, melé médii néε nlyáge. Póndé ké ehéé áde mod alyáγκεé, étəñgéné alúmed nén bán mod awé abele nímê nlyáge amaá awé boñ behíde chõm éche ályáγκé.

17 Nén adé áyāle nén, á póndé eché mod áwédé dōó níme nlyáge mibáγκé ngine. Mēébáγκé ngine á póndé eche mod awe abelé nímê nlyáge ádíí adé á alongé.

18 Nê dōó ákás boñ ké melé mé'só níme Dyõb démmwēε ne baányonj ménkēnwõñ ngine ésebán mekií mésyóγκe.

19 Se' bōód, Moseε anláá bad mbéndé ésyāāl éche Dyõb dénhābpē áá bad behíd. Ade ámáá bō aláá, antéd mekií mé nyag ne mé mbód, ákumtén ne mendíb. Ambenléd ngen e bwel é' hīsōb ne nyonj é mbód éche éyáge', ámwagtéd nímê mekií á kálag eche mbéndé ébédé áte, ámwagtéd-te bad á yāl.

20 Ade ámáá nímê mekií amwagted, anhób áá, "Mmén mekií mōó mélúmte' nén bán melé mé Dyõb méehəñlānné."

21 Melemlem nê dōó Moseε ámwagtedté nímê mekií ámín e ebem é mende, ne ámín e bwēm é'syāāl ábe bébenlādtáá ábe mende.

22 Á mbále, émbē nén bán á mbéndé, chõm ké ehéé éche bémwágtédé mekií áyāl chōó bad bétédé'áá bán esáá. Mbéb-pe méewóó'ε alagsen ésebán mekií mésyóγκé.

Krístæ eche yāl eché abagé néε ndε chōó ehúdé mbéb

23 Né-óó, nén dōó dénkəñ boñ ebem é nkõñsé né bwēm é'syāāl ábe é'dé áwēd-te bésāñtē bō ne mekií mé e'lém. Abé bwēm é'syāāl é'bédéε nwágēn mé mekan níme médé ámín níme mékõñté abé. Boñ ábē bwēm ábe é'dé ámín, bēntəñgēn néε bésāñtēé bō ne mekií níme métómé mekií mé e'lém.

24 Krístæ enkēnsónlé Hõm áde Asáá áde baányonj bóbó bébélé, áde áde á nwágén á hõm áde ákõñté abé. Adyõb den dōó ánkεé asól. Ankē-'ε áwēd nēñgáne mod awé ahōbpe' syāné wēε Dyõb.

25 Enkēnkaá-'aá áwēd ábe yāl néε mende ngen ne ngen. Enkēnkáa nēñgáne prise ambaámbáa ákagké mwē téé á Hõm áde Atómténé Asán ábe mende mé

mekii mé elém. ²⁶ Nzé née émbēē, né Krístə antəngén née átageé ngen ne ngen taase nkònsé níbootad. Bonj chó-’ε énkəmbáá nē. Krístə ampē ngen póg ne ngen ésyāāl bəəb áde nkònsé ríkagké ape á asóg. Ambē eche yāl nēngáne mendē áhúd mbéb mí baásyāāl.

²⁷ Nē dáo moonyonj asyāāl átəngéné awé ngen póg, bonj ámbíd e póndé ákud nkáásé ní Dyób.

²⁸ Melemlem nē dáo Krístə ábágé eche yāl ngen póg ne ngen ésyāāl áhúd mbéb mí bad híin. Apē-’ε ngen éche élónténé ébe, saké áhúd mbéb mí bad, bonj apē ásonj alongé á bad ábe básine mó.

10

Krístə abágé eche yāl ngen póg ne ngen ésyāāl

¹ Mbéndé éche Dyób dēmbéé bad bé Israel ébédéé ngēn nēngáne nwágén mé mekan mé bwám míme méhúe’ á’sō. Echē mbéndé éehelée-se ékonj syáné alúmed ngáne míme mekan mébēē. Beprise bəbage’ Dyób mendē abe ne abe, mwē ne mwē-té. Chán-nō échē ndín é mbéndé éche bəbageé échē ndín e mendē éhele ébəl bad ábe bédé bənben ne Dyób básán? Eehelée.

² Nzé émbē nēn bán bēhélé’áá, né bénkənsógké Dyób mendē abe-ye? Né bənsóg áyāle nēn né bad ábe bəbage Dyób mendē básáá’áá ngen póg ne ngen ésyāāl, né bēetage’áá-’ε áte bán bēbélé mbéb.

³ Bonj míme mendē mēn-εé métímé mékamtan bad mwē ne mwē téé nēn bán bēbélé mbéb,

⁴ áyāle nēn mekii mé nyag ne mé mbód méehelée sé méhúd mbéb mí bad mbéd.

⁵ Nēn dó-’áá dēnkənj bonj áde Krístə ápédé á nkònsé-te aláá Dyób áá, “Saké mendē ne nde éhedéé.

Ebònséné me yāl e moonyonj echē mébēé wε née mendē.

⁶ E’lém ábe béhyánté á menyán, mendē-’ε ampē míme bad bəbageé wε áhúd mbéb mí bad, bēewógtēē wε menyinje.

⁷ Dó-’áá ríhóbé méé,

‘Me nēn A-Sánj,

mbònséné ábel ngáne éhedéé

melemlem ngáne éténléde áyāl echēm á kálag echònj.’”

⁸ Ansébé ahób áá, “Saké mendē ne nde éhedéé saá-kaá e’lém ábe béhyánté á menyán áhúd mbéb mí bad é’wógte wε menyinje.” kénéé édíf nēn bán bad bēbélé’áá mímén mekan ngáne mbéndé e Mosεé éhedéé.

⁹ Ambé ambád áá, “Me nēn A-Sánj, mbònséné ábel ngáne éhedéé.” Né-óó, Dyób ásídté mendē mé’ bəód á nkəg ábel bonj átimed mendē míme Krístə.

¹⁰ Akwəntən áde Yesu Krístə ákwənténé ábel ngáne Dyób áhedéé bonj ábe eche yāl nēngáne mendē, ábélé syáné desáá á’sō é’ Dyób ngen póg ne ngen ésyāāl.

¹¹ Nsón míme beprise bé Israel rídii átyém ábe Dyób mendē mehóg ne mehóg epun téé. Mímén mendē mó-’ε méehelée sé méhúd mbéb mí bad mbéd.

¹² Bonj Krístə pən abagé mendē mehóg míme méwóó ngíne áhúd mbéb mí bad ngen póg ne ngen ésyāāl. Ámbíd enē, andyéé Dyób á ekáá émbáá.

¹³ Ahed-taá ádyéé ásin póndé echē Dyób débenlé bonj ákəgtéd ábe bad bé ekəyí ámin ne mekuu.

¹⁴ Áyāle mendē mehóg mwəmpən míme ábágé, ábélé bad ábe áhúdé mímab mbéb básáá nyaa eche elóné mbon.

15 Edəádəŋ eche Esáá chǒmpē élúmté syánē áte nén bán nê adé mbále. Enhǒb aá,

16 “Sáŋgwéé ahóbé aá
 ‘Mmén melē móo syáábō sémwēē
 á pǒndé echē ehúé’ á’sō.
 Mēbēl bēbíí échēm mbéndé,
 nǐbel-le ngáne bēechatēnné chǒ mbéd.’ ”

17 Anhǒb ámpē aá,
 “Méekamtén-naá mbéb
 ne mewusé nímāb ámpē.”

18 Dyǒb áamáá bad mbéb alagsen. Mendε ké mehóg méesaá ámpē níme bad bétāŋgéné abε ákud alagsen dé mbéb.

Syánē dépe benben ne Dyǒb

19 Né-ó, a-baányan dewóó kunze ásól adé abwóg á Hǒm áde Atómténé Asán.

20 Yesue adǐbnédé syánē nzii e ekóólé echē epeene’ alongé abε áde ábágé eche yál. Eche yál edé nēŋgáne abad áde dénkāŋ syánē ápe wéε Dyǒb adíí.

21 Syánē dewóó ndale e prise awé anǒne’ bad bé Ndáb e Dyǒb.

22 Né-ó, syánē désíde benben ne Dyǒb ne nlém nhóg, désum-me nlém nisyāal áwē. Nén adé áyāle mekií níme Yesue ásyógé á awǒg, mébélé nlém nkénlén syánē á abum, awǒbpé-ε syánē ne mendín níme mésáá áte.

23 Déwéd adúbe áde dédúbpé achāŋned, désum-me nlém áhed, áyāle dedúbpé nén bán Dyǒb áde ábele dyam áde áhóbé aá móóbēl, eche ehǒb ééhūnēé á ndǒb.

24 Dénǒn ngáne déhele dewéd nhóg ne aníníí nlém á abum, ábel dédǎn débele-ε mekan mé bwām.

25 Deebág bán deébōmēē pǒndé ésyāal ngáne donje á bad bēbeleé. Bon pen débē déwéde’ nhóg ne aníníí nlém á abum, tanje bǒb áde nyényíneé bán Epun eche Sáŋgwéé ápeé édé benben.

26 Nzé dedii deko’ mekan mé mbéb ábel áde démáá mbále abii, né mende ké mehóg méesaá ámpē níme méhūd nímé mbéb.

27 Bon nzé mod adii akoo’ mbéb ábel, né mbwóg móo mébē mó áte nén aá Dyǒb dékwid mó nkáá é Epun é Nkáásé. Béhyāad mó á ebonde é muú é ngíne echē éhyaad bad ábe bétāŋgan Dyǒb.

28 Kénzéé awé eehídé’ mbéndé eche Moseε, bon bad bēbe ké’ε beláán bēbíid mbǒn nén bán eehídé mbéndé, bēbelé béwúú mó, béewǒgēε-ε mó ngal.

29 Nzé mod-te eetéde Mwān a Dyǒb néε dyam, eetéde mekií mé melē mé Dyǒb níme mébélé bon asán néε dyam, ásyāā-ε kǒŋne Edəádəŋ eche epeene nsimé, né chán nkǒgsen níme ene ndín e mod ríhele nǐbé’

30 Debíí mod awé anhǒb aá, “Mékǒgsen bad. Mētímtén bó áyāle mbéb níme bēbélé.” Anhǒb-pe ámpē aá, “Sáŋgwéé ákáad ábe bad.”

31 Edé ebébtéd ne kénzéé awé ahúné á mekáá mé Dyǒb dé alongé ákud nkǒgsen.

32 Bon nyéechatán ngáne nyémbēε-se á mbooted áde nyékúdé e’nyínen bé ekíde. Ene pǒndé, kénεε nyénkudté metake mé ngíne, nyénkanj nlém.

33 Pǒndé ebédé echē bad béwǒgté’áá nyé e’sǒn á’só é’ bad, bétagté-ε nyé. Donje á pǒndé ámpē nyébágé’áá ne bad ábe békúdé échē ndín é metake.

34 Nyéwēnnádtáá bad ábe bémbe á mbwǒg. Ké áde béndumme nyé bwēm, nyémbé nyébé menyíŋge, áyāle nyémbíí nén bán nyéwóó bwēm ábe é’tómé nê ábe bēbe abé ne abé.

³⁵ Né-ṣṣ, nyébê nyéwêd nlém á abum, áyāle nén Dyöb ábage nyé nsábe míme ríchábé ámín.

³⁶ Nyétánjéné awesen ábel nén nyébel ngáne Dyöb áhedeé, nyékud-te chöm éche Dyöb áhóbé aá mósóbé nyé.

³⁷ Eténlédé á kálag e Dyöb nén bán,
 “Mwämpín mí pónidé,
 mod awé atánjéné ape, ápč,
 éebébed-taá pónidé.

³⁸ Abêm bad ábe bébele mekan míme métánjéné
 bēbē á alonjé áyāle bédúbpé ábêm e'yale.

Boj pen kénzée awé atímné mbíd,
 méewógénné mó menyinge.”

³⁹ Syáné pen deesaa nyaa é bad éche étimén mbíd ébós-’e. Dedii bad ábe bédúbpé Dyöb, békúdé-’e e’soosoj.

11

Adúbe

¹ Adúbe ádii áwōj nlém wée mósókúd chöm éche mósúmé nlém áyāl. Amad nén wée chöm éche mósnyínnē did ékóó abé.

² Adúbe áde bad bé’ bósd béndúbēē Dyöb dōo dēnkāj boj Dyöb ábéén bó menyinge.

³ Adúbe dōo ákás boj desójtén nén bán eyale é nsal chōo Dyöb áhagné nkōjsé. Né-ṣṣ, bwēm ábe dényínnē did é’huú ne chöm éche déenyínnē did.

⁴ Adúbe dōo dēnkāj boj Abele ábe Dyöb mende mé bwām míme méntōm míme Keene ámbéé Dyöb. Adé adúbe dōo dēmbēl boj Dyöb ábéén mó menyinge née mod awé abele mekan míme métánjéné. Nén dényínnēd ne akob áde Dyöb dēnkobpé mende míme Abele. Adúbe dō-’aá ákás boj, kénée ámáá awé, abé álānjē bad mam.

⁵ Adúbe áde Enoge dōo dēnkāj boj eenyínne’ kwééd did. Boj pen Dyöb dēnkéén mó ámín, bēnkēnyín-naa mó ámpē. Eténlédé nén bán, byánán Dyöb dékéén mó ámín, abel’áá mekan míme méwógt’áá Dyöb menyinge.

⁶ Modmod eéhēlē-se awógéd Dyöb menyinge áde eedúbpeé Dyöb. Nén adé áyāle kénzée awé ahede ape benben ne Dyöb, atánjéné adúbe nén aá Dyöb adé, adúbe-’e aá Dyöb désábē bad ábe béhede mó abii.

⁷ Adúbe dōo dēnkāj boj Noa awógén Dyöb áde Dyöb dénlāā’é mó mam míme mébenléd á’sō é’ pónidé. Kénée édíi bán pónidé eched enkēnyínénné míme mekan did, ambēl ngáne Dyöb dénlāā’é mó. Anlónj bōle é’mbáámbáa. Awēd-te dōo bóobe adé abum á ndáb bēnsānlé békúd-te e’soosoj áde mendíb ménlōnnē nkōjsé áte rísyāal boj chöm ésyāal éhó. Abel áde Noa ámbenlé nē, dénlūmēd bán mbeltéd mí bad bé nkōjsé ídē mbéb. Adúbe pen áde Noa ánwōnjē dēmbēl Dyöb déntēd mó née mod awé abele mekan míme métánjéné.

⁸ Adúbe dōo dēnkāj boj Abrahame awógén Dyöb áde Dyöb dénlāā’é mó aá áhíde á dyad wée abédé, áke hōm démpēe á mbwóg eche Dyöb dēmbonjsénné mó abe. Anwógén Dyöb ákē-’e, kénée énkēmbíí’é wée ákagké.

⁹ Adúbe dōo dēnkāj boj áke ádyēē á mbwóg eché Dyöb dénlāā’é mó aá móhābē mós móobe mó. Ambé áwed née nken. Aisige bó Jakob bómpē bédyéé’áá á e’bem-té. Dyöb dénlāā bómpē melemlen ngáne ánlāā’é Abrahame.

¹⁰ Abrahame adyéé’áá á e’bem-té wē ásine’ pónidé eche ádyēé’é á dyad ámbáá áde ásumnéde, áde Dyöb dēn átíídē boj alónj-’e.

11 Adúbe dǎo dǎnkǎḡ boḡ Seraa abé nkoḡ kénée ámmadté kǎd e achád atóm. Andúbe nē áyále andúbe aá, nzé Dyób áhóbé aá mǎsbēl dyam, abelé alóned dǎ.

12 Né-ǎǎ, kénée Abrahamé ámmadté achun bwámbwam nyaa eché éehelē'aá-se achyáá mwán, nchyaátén rísyāāl ménhūū ne mǎ. Mmē nchyaátén mēmbuú áte nēḡgáne betintine ábe bédé ámín, mībūū-'e áte nēḡgáne nsíi níme rídé á nkǎḡ mé edíb é nkwě, níme béehelēé-se bétōḡ.

13 Abé bad bé' bǎǎd, bēnwōḡ adúbe kǎḡḡne á kwééd. Kénée bēn bēnkēnkudté chǎm éche Dyób dénlāā' é bǎ aá mǎhǎbē mǎo mǎḡḡe bǎ, boḡ bēnnýín ábē bwēm nchabnede bēwǎḡén-ne bǎ menyīḡḡe. Bēnkēmbán-gaá ahób bán bédii beken ábe bēewóo hǎm áde bédyē'e á nkǎḡsé-te.

14 Bad ábe bēhóbé éché ndín é mekan bēlǎmte nēn bán bēhede hǎm áde bēchǎḡké ádāb.

15 Nzé bédii bēkámánnáá wēe bēmbǎdtē, né bēnhéd nzii átim ámbǎd.

16 Boḡ bēntīm bēhede dǎsǎ mbwǎḡ éche eboó, nédē mbwǎḡ e ekombe é mǎn. Né-ǎǎ, Dyób déekwǎḡnē bǎ nzé bēchǎḡé mǎ bán ádāb Dyób, áyále amaa bǎ echab mbwǎḡ aboḡsen.

17 Kénée edíi nēn bán Abrahamé mǎo Dyób dénlāā' é aá bán bēbuú mǎ áte, adúbe dǎo dǎnkǎḡ boḡ abé mboḡsén ábe Aisigé awé abédé mímē mpǎm ní mwán nēe mende áde Dyób ákǎḡé mǎ.

18 Aisigé mǎo Dyób dénlāā' é Abrahamé aá, "Mbwēen ne Aisigé dǎo nchyaátén míme nǎḡḡé wē mēé wēkǎd mébǎdtē."

19 Abrahamé andúbe aá Dyób áwóo ḡnīne ápuud ké mod awé amaa awé. Né-ǎǎ, dehele dehób bán Abrahamé ankúđ Aisigé ámbǎd áde ápúúde.

20 Adúbe dǎo dǎnkǎḡ boḡ Aisigé ahób aá Jakǎbe bǎ Esao bēkǎd nnam pǎndé éche ehúe' á'sǎ.

21 Ade Jakǎbe ádíi bēnben ne kwééd adúbe dǎo dǎnkǎḡ boḡ ánámēd mwǎntéé awé Josebe. Anwúlén á ntǎḡ níme átǎmneé, ábe Dyób edubé.

22 Ade Josebe ádíi bēnben ne kwééd, adúbe dǎo dǎnkǎḡ boḡ ahób á'sǎ' é pǎndé aá bad bé Israel bēbǎd á Egipto. Dǎ-'aá dǎnkǎḡ boḡ alǎḡtén ḡnáne bétǎḡḡéné nímē ndim abel.

23 Adúbe dǎo dǎnkǎḡ boḡ Mosēe sáa bǎ nyan bēkǎǎ mǎ á etún é ḡḡon éláán áde bémáa mǎ achyáa. Bēnnýín nēn bán Mosēe aboo elóon bwámbwam, bēnkēmbán-gaá ábǎo mbéndé éche kǎḡ éntǎmēdtē.*

24 Adúbe dǎo dǎnkǎḡ boḡ áde Mosēe amaa akwǎḡ, enkēnkwentén aá bēchǎḡe mǎ bán mwán awé mwán a mmwaađ awe kǎḡ e Egipto.

25 Ankwentén ákud metake ne bad bé Israel tǎmaa áwǎḡ bwám á mbeltéd mé mbéb-te á esǎḡ é pǎndé.

26 Ne mǎ, annyín nēn áá ákud akwǎḡké á nló níme Ane-awē-Bésineé, áde nsábe níme rítómé nhǎn ní Egipto rísyāāl. Ambel nē áyále asiné'áa nsábe níme Dyób débēé mǎ á pǎndé eché ehúe'.

27 Adúbe dǎo dǎnkǎḡ boḡ Mosēe áhǎdē á Egipto ésebán abaa' meliḡá míme kǎḡ e Egipto. Ankan nǎm abé áke nēḡgáne mod awé anyíne Dyób áde mod éenyínnēé díđ.

28 Adúbe dǎo dǎnkǎḡ boḡ atíi ḡande e Nnyíme-ámín. Anláa bad aá bémwagted mekií á mmwē mé e'kob ábel boḡ nzé áḡel e Dyób epedé áwúu bán bē'sǎ, eewúē' bán bē'sǎ bē bad bé Israel.

29 Adúbe dǎo dǎnkǎḡ boḡ bad bé Israel bēchǎbē edíb é nkwe éche bēchǎḡéé bán Edíb é nkwe éche Eyāḡe'. Bēnchabé chǎ byánán bēkag á ndǎǎb mǎn. Boḡ áde bad bé Egipto bēhóbé bán bǎmpē bēchabe, bēnhǎ.

* 11:23 Kǎḡ e Egipto éntǎméd mbéndé aá bēwúu bán bē baachóm bésyāāl ábe bēchyáa ekǎsélé ábe bédé mwē nibe átimé áse.

³⁰ Adúbe á bad bé Israel dǎo dēnkāḡ boḡ e'ké ábe bēnləḡnéd dyad á Jeriko é'kwē áde bad bé Israel béhyǎmnédé bó epun saámbe.

³¹ Adúbe dǎo dēnkāḡ boḡ akwale awé béchǎgé'áá bán Rahabe enkēnwé áde bad ábe bēnwūēn Dyǎb nló áte bēnwēē. Nēn dēmbenléd áyale ankǎb bad bé Israel nken áwe ndáb, áde bēlómé bó áhye dé anǎn dyad áte á mesǎm-té.

³² Mbê níkag á'sǎ-yé? Póndé eesaa echē níhele nláá nyé mam áyale bad nēḡgáne Gidione, Barage, Saamsine, Jeftaa, Dabide, Samwele ne bekal bé edáadəḡ bésyāal?

³³ Adúbe áde ábê bad dǎo dēnkāḡ boḡ bétóm meloḡ áte níme bósbǎo bēnwān bel. Bélyágté'áá bad ábe bēbédé áse echáḡ nyaa echē etǎḡné. Bēnkǎd-te bwēm ábe Dyǎb dénhǎbpē aá mǎsbē bó. Bēnkāḡ nsəl ní ngii.

³⁴ Béndimēd e'bonde é' muú. Bémǎd á mekáá mé bad ábe bēhéde'áá bó páá awúen. Kénéé á mbooted bēnkēnwǎḡgé ngine boḡ Dyǎb dēmbē bó ngine, bēhédeé sánze é ngine bēwanne' sánze é meloḡ mémpēe, éche sánze étómé' mehlé.

³⁵ Adúbe dǎo dēnkāḡ boḡ donḡe dé bebaád ányín néé ábāb bad ábe bēmmād awé bétímé ámbíd á alongé.

Donḡe á bad pen bēnkǎd mbéte kǎḡḡ béwé. Bēnkēnkwenténne Dyǎb abǎḡ á yǎl ábel bétede bó. Bēmbel nē áyale bémǎl bán bēpuú békud alongé áde adé bwām tómaa dé nkǎḡsé.

³⁶ Donḡe démpēe dēnkǎd metake, awel áde bad bēwéláá bó, bēbǎmé-'e bó. Bēnhāḡ donḡe bēhé-'e bó á mbwǎḡ.

³⁷ Donḡe ábédé áde bēnwūēnnē meláá, bēmpēe-'e bésél bó áte e'sǎḡ é'be. Bēnwūēn bēmpēe páá. Ábē bad bēwáá'áá e'kob é'mbód béhyǎmne'. Bēbédéé betǎótǎkē bé bad, békudé' metake, békudé-'e ndutul á mekáá mé bad bé ekǎyí.

³⁸ Ehednád-taá bán bad bé bwām néé bó bēbē á nkǎḡsé mé mbéb wén. Bétámnádtáá á ehýḡḡe ne á mbǎod mǎn, bédyéé' á e'láá-té ne á e'lóm-té.

³⁹ Adúbe áde ábē bad bésyāal dēnkāḡ Dyǎb ábēén bó menyinḡe. Boḡ ké nē, bēnkēnkudté chǎm eche Dyǎb dénhǎbpē aá mǎsbē ábē bad.

⁴⁰ Nēn dēmbē áyale Dyǎb dēmmad atii aá mǎsbē syānē chǎm echē étómé chǎm éche ánhǎbpē aá mǎsbē bó. Antii nēn aá, nchoo ne syānē dǎo ábē bad békwoḡnédté áwe e'sǎ.

12

Dyǎb dǎo adé syānē Sád

¹ Ngáne edíí-'aá bán enén ndun e mod elǎḡnéde syānē edé-'e mbǎḡ, tǎḡḡene adúbe áde déwóó, detǎḡnéne desidéd kéchéé éche ékáá syānē nzii á nkǎḡ, détedē-'e mbéb níme níháá syānē. Detǎḡnéne néé dékáá nlem ányǎged mehlé níme Dyǎb áhǎbē aá dényaged.

² Detǎḡnéne néé désúme mǎd wēe Yesue mwēn, áyale mó alyáḡte syānē áwǎḡ adúbe. Mwēn-naa áwǎḡḡēn syānē kǎḡḡ dépid-te dǎo á asǎḡ. Ankwentén áwé kwéed e'sǎn á awǎḡ, enkéntéd-taá áde akwǎḡké néé dyam ábel nēn ákud menyinḡe níme Dyǎb ákǎḡnéde mó. Nē ábélé-'e bǎob, adyéé á ekáá é mbáá á atii dé nkamlen á Dyǎb.

³ Nyékamten ngáne Yesue ánkwenténne metake akud á mekáá mé bad bé mbéb ábe bēnkǎs mó. Nyékamten níme metake ábel boḡ nyéekǎmé', nyéédulé-'e mekuu ámbíd.

⁴ Nzum eche nyéwanéé ábǎded mbéb, eépédéé ndǎḡke eche nló nímmēn níhele rítóm.

⁵ Nyéechatán e'yale ábe Dyöb dëmbenlédte áwéd nyé nlém á abum, achäg áde ánychákgé nyé aá ábe bán. Anhób aá, "A-mwän, nzé Dyöb ákänné wε áte áyāle mbéb míme ébélé, etéd míme nkáne áte néε dyam dën.

Nzé Dyöb ákógséné wε, yāl eehó' wε áte.

⁶ Bíf nén wεé mod awé Dyöb ádáá, móó ákännéé áte.

Mod awé átédé néε awe mwän, móó ákógsanné."

⁷ Né-óó nyéwεsen míme nkógsen áyāle nén, nílümte nén bán Dyöb átédé nyé néε ábe bán. Mwän ahéé adé awé sáá éékógsanné áyāle awusé áde ábélé?

⁸ Nzé nyéékúdē nkógsen áyāle mbéb míme nyébélé ngáne bán bé Dyöb bésyāal békudéé, né nē álümte' nén bán nyéekoo' é bán bé Dyöb abé. Né nyédii bán ábe béchyáá á asón.

⁹ Nzé ábēd besáá bé nkójsé béhēle békógsēn syánē áyāle mbéb míme débélé, débágé'-ε bó edúbé, né detāngénē Sáá awēd awé adé ámīn edúbé abε tómaa nē, ábel débē á alongé.

¹⁰ A esón é pónde dōó ábēd besáá bé nkójsé békógsanné syánē, kéchán áde ébónnéde'-ε bó dōó bébeleé. Dyöb pen ákógsan syánē áwónge syánē ábel nén débē bad ábe bésáá ngáne mwēn ámpē ásáá.

¹¹ A pónde eche dékudé nkógsen, dewóge mbéb áte, deewógéé bwám. Bon ámbid e pónde, kénzéé awé míme nkógsen ní'yágté debyéé, ábelé abé nšan, ábelé'-ε mekan míme métāngéné.

¹² Né-óó, mekáá míme mémmad nyé achii áte, nyéwéd mó áte. Nyéēmwāg-ke se mekuu mésāgē nyé ásē.

¹³ Nyébē nyéhídé' nzii eché etyéémé ábel nén bad ábe bésyāgte', béenabpé eped atim, bon bédyεε bwám.

Elébé áwógen Dyöb

¹⁴ Nyéwan áte ábe nšan ne moosyāal. Nyéwan-ne áte ámpē áwón abé áde ásáá, áyāle ésebán mod asáá, eéhēlē-se anyīn Sāngwéé.

¹⁵ Nyényīn nén bán nyé modmod nyéebó' é nsimé ní Dyöb akud. Nyényīn-ne nén bán nyé modmod nyéesaá nēngáne mbál mé mbéb míme nzé níkwógé mbéle mpēēn ndutul, mbébéde-te mbál mémpēe.

¹⁶ Nyényīn-ne nén bán nyéekábéé mesón, nyéébéle'-ε mam néε bad ábe bééwónne Dyöb pónde ngáne Esao ámbenlé. Esao ansóm kunze eché ánwōngē néε mwän a'só á etútú é ebwōg é ndyééd ehóg.

¹⁷ Nyébíf nén bán, ámbid e nē, Esao ahédé'áá aá sáá ánamed mó, bon sáá ámbán mó ánamed. Kénéé ánchii' é bwámbwam, nzii enkēnbáá áhānlen dyam áde dëmbenléd.

¹⁸ Nyékamten nén bán hōm áde nyétyéémé bōob ádii á'só é' Dyöb. Nyétyééméé nēngáne bad bé Israel béntyéēmmé benben ne mbōod e Sinai e nkójsé eché muú ní ngíne mbíde'áá ámīn. Adé béntyéēmmé áhed, ngānlen e ehíntén embé áhed, bīn é'sūdēn áte, ekukud é ngíne'-ε étōme'.

¹⁹ Bénwōg esaád é elon, bēwōg-ke ehób. Mbwōg ní ngíne ménkōb bó. Bēnchān Dyöb nén bán eehóbé' ámpē.

²⁰ Bēnchān Dyöb nē, áyāle dyam áde ánlāá' é bó aá bébel dēnwōgēd bó mbwōg bwámbwam. Anhób aá, "Chómchóm éekidtan enén mbōod. Nzé ké nyam ekidténe chó, bēlüm chó meláá káān ewé."

²¹ Mekan míme bēnnyīnné ménkōbēd bó mbwōg bwámbwam. Mbwōg ménkōb káānne Mosεε. Anhób aá, "Mbwōg rīnānne mε."

²² Bon nyépen, nyépedé benben ne mbōod e Zayon. Nyépedé bōob á dyad áde Dyöb dé alongé. Adé dyad ádii Jerusalem awé adé ámīn. Awēd-te, ángel bíib, éladné áte ne menyīnge.

²³ Nyèmpē nyèpedé á nlatén ní bǎn bé'só bé Dyöb ábe Dyöb átélé mǎn ádyöb. Nyèpedé wéε Dyöb áde ákáadte' moosyáál. Nyèpedé átínté e e'dáádǎn ábe bad bé bwám ábe Dyöb ábélé békwoǵnéde.

²⁴ Nyèpedé wéε Yesue awé adé mod átínté á bad ne Dyöb á melé mékǎálé. Nyèpedé ʘʘʘ wéε Yesue ámwáǵtéde nyé níme mekií. Mmé mekií mébáǵé syáné nsimé tómaa mekií níme Abele. *

²⁵ Nyényín nén bǎn nyéékǎnléε Dyöb metúu tǎǵgene dyaam áde álǎǵǵé nyé. Bad ábe békénwóǵén mod awé Dyöb dǎmbanéé á nkǎǵs-ε te áléb bad, békúǵ nkǎǵsεn. Ngáne békúǵté nkǎǵsεn, syáne ámpé detǎǵǵéné nkǎǵsεn akud nze deewóǵe elébé éche ébidé ádyöb.

²⁶ Bǎǵd áde ánhǎbpé akan, nkǎǵsé ménsǎǵnéǵ ásé. ʘʘʘ-ε ahóbé nén áá, "Mǎbél nkǎǵsé nǎsǎǵnéǵ ámpé. Saa-kaa nkǎǵsé mǎwǎmpεn ménsǎǵnéǵ, mébél kǎǵǵne ekombe é mǎn chǎmpé éǎsǎǵnéǵ."

²⁷ Ahób áde áhóbé áá, "Ámpé" álúǵmte' syáné nén bǎn Dyöb déhúǵ bwém ésyáál ábe bésǎǵnéǵ ásé. Abé bwém é'dúú bwém ábe áhǎǵé. Abél nê ábel ʘʘʘ bwém ábe bésǎǵnéǵ é'lyǎǵ.

²⁸ Né-ǎǎ, déǎǵnεn Dyöb áyále nén abagé syáné mbwǎǵ eché mod éehelé-ε éǎsǎǵnéǵ ásé. Déǎǵnεn Dyöb, débáǵe-ε mó edúbé nyaa eché éwǎǵéǵ mó menyínǵe. Débele-ε nê ne mbwǎǵ ne edúbé ésyáál.

²⁹ Ne mbále, Dyöb áǵéǵ ádíí néε muú níme níhǎǵte chǎm ésyáál.

13

Abé áde áwóǵte Dyöb menyínǵe

¹ Edǎǵe é Bad bé Krístó ébé éǵag á'sǎ átínté echén.

² Nyéebǎǵ bǎn nyéékobéé bad beken pǎndé ésyáál. Dǎǵe á bad békékǎǵb áǵǵel nken, áde béébií' é bǎn áǵǵel chǎǎ éde.

³ Nyékamtén bad ábe bédé á mbwǎǵ. Ebé byánán nyáábʘʘ nyéde áwed. Nyékamtán-ne bad ábe békude metake ásé e bad bémpéε. Ébé byánán nyémpé nyékude' níme metake.

⁴ Mod-téé awé adé á ndáb e'wǎǵǵé ábáǵe e'wǎǵǵé edúbé. Mod eekábé mesón á ebwǎǵ. Nyééchatán nén bǎn Dyöb dékáǎǵ bad ábe bébéle' e'tǎǵǵé é' mekan ne ábe békábe mesón.

⁵ Nyéésúǵé nléǵm áyále edǎǵe é mǎné, nyébé-ε menyínǵe ne kéchéé éche nyéwóó áyále nén Dyöb áhóbé áá, "Mééchenéé nyé mbéd, méébǎǵ-'áá nyé áyáǎ."

⁶ Né-ǎǎ, dehele dehób ne nléǵm nǎsyáál nén bǎn,

"Dyöb dǎǎ áde nǎwǎǵnεnε awém,

méébǎǵǵé dyaamdyaam,

chéé moonyǎǵ áhele ábél mε?"

⁷ Nyékamtén bad ábe bélyǎǵte' áá nyé ʘʘʘd, ábe békálé nyé eyale é Dyöb. Nyényín nsón níme abé áǵáb ábélé. Nyéhíd níǵmáb mekuu, nyédúbe ngáne ʘʘmpé béndúbéε.

⁸ Yesu Krístáǎ adé meleǵmlem pǎndé ésyáál. Ngáne ámbéε chǎn, nê dǎǎ ádíí chíí, nê dǎ-'áá ábéε abé ne abé.

⁹ Nyéémwǎǵ-ε éǎǵǵe ké áhéé áde áde nǎǵǵlén áhǎǵlén nyé nléǵm á abum. Ebóó nén bǎn nsimé ní Dyöb múǵó níwéde nyé áte saké mbéndé tǎǵǵene ádyé dé medyé. Eché mbéndé ééwǎǵǵǎnné bad ábe béhíde chǎ.

¹⁰ Dewóó menyán mé mende níme bepríε ábe bébáǵe mende á ebem é Dyöb bééwóó' é kunze ádyé chǎm áhed.

* 12:24 Mekíí níme Abele méhede' metuuten, ʘʘǵ mekií níme Yesue mépεεne dáǎǵ alǵsεn.

11 Prisε ambáámbáa, abage Dyöb mendε áyāle mbéb mí bad. Abelé atéd mekií mé nyam é mendε asólén mó á Höm áde Atómténé Asánj. Bébélé bétéd ndim ní nyam pen, bébidén ámbíd e eyáde béhyáád mó.

12 Nê dso dénkanj bon Yesue ámpē átag, awé ámbíd e e'ké é' dyad ábel bon míme mekií mébel bad básánj.

13 Né-óó syánē ámpē déke détán mó ámbíd e eyáde ábel bon syánē ámpē dékud e'són ábe ánkudté.

14 Déke détán mó áhed áyāle nén deewóó'é dyad áde ásúmnédé á nkōjsé-te wén. Bon desumé nlém ábē á dyad áde áhúé' á'sō.

15 Né-óó, débē dékene Dyöb mbwiined ne Yesue. Mmēd mekenag mébē nēngáne mendε míme débageé Dyöb. Dékag dékale' nén bán móó adé Sāngwéé.

16 Nyéechatán nén bán, nyétāngéné bwām ábel wéε bad bémpēe. Kéchéé éche mod áwóó-'aa, áwōngan nhōg ne aníní. Echē ndín é mendε chíó éwōgte Dyöb menyinge.

17 Nyéwōgne bad ábe belyágte nyé, nyésuded-te yāl asē e nkamlen mímb áyāle bóo bēone nyé. Bétyēm-me á'sō é' Dyöb álaa mó ngáne bēnóné'áá nyé. Nyéwōgne bó ábel bon bébē menyinge ánon nyé. Esebé nē, né bēwōg ndutul ánon nyé. Né nē déewōngén-naa nyé.

18 Nyékānnad sé. Sébíí nén bán nlém níkénlé sé á abum áyāle chōm ésyāāl éche sébélé. Séhedé'áá bán sébel chōm ésyāāl nyaa echē etāngéné.

19 Mbáde nyé achánj nén meé nyékānnad sé ábel nén Dyöb ábel níwāmsen atim ámbíd ábē ne nyé ámpē.

Mekáne mé asóg

20 Dyöb dso ábage' bad nšan, dó-'aa ápuúúdté Yesue, Sāngwéé awéd. Bōob-pōó, Yesue adii néε ndāle a Nnōn-a-mbód awé bébénlédé míme mekií ábel nchemten míbē á ngíndé ne á ngíndé, áfínté e Dyöb, ne éche mbód.

21 Nkánne nén meé, Dyöb ábel nyébē mbonšén ábel chōm-té éche áhedéé áá nyébel, nyébé-'ε nyōngé ábel mam míme métāngéné. Yesue áwōngan nyé ábel mam míme méwōgte Dyöb menyinge. Ehúme ébē ne Yesu Křístāā abé ne abé. Ebē nē.

E'yale bé asóg

22 A-bānned, ncháa nyé meé, nyékonj échén elébé awōg. Enén kálag echē nítnlé nyé échabéé áte.

23 Ndāó meé nyébíí nén bán bébidté mwānyanj awéd, Timotie, á mbwōg. Nzé awāmséné me atán, né sūmō séēpē áwēn.

24 Nyélenté me bad ábe belyágte nyé bésyāāl, nyéleled-te bad bé Dyöb bésyāāl. Bad bé Dyöb bémpēe ábe bébidé á Italia, bómpē bélómmé nyé melentēn.

25 Nsimé ní Dyöb míbē ne nyé moosyāál. Ebē nē.

Kálag eche Jemse Ndibned n kálag

Kálag eche Jemse átélé ehóbe tãngene mekan nime bad bé Krísto bétãngéné abel pónde ésyãal á alongé adãb. Bad bé Dyöb ábe bepãntédé áte nkõñsé áte rísyãal bõo Jemse ántelée chõ. Abẽnlédé ngan hiin áléb bad bé Krísto tãngene metõn hiin. Mmê metõn médii, ábé nhõn ne ábé atóg, mekágsen, abé á bwãm, ãnõn bad nkõñtéd, adúbe ne mbeltéd, ngáne bad bé Krísto bétãngéné echem abenled, áwõñ debyéé, nselag, kúmbe ne asuded á yãl, ábided mbakú á yãl e bad, ákum ekáá á tãl, áwesen, ne ákáne.

Jemse awédé áte á kálag tẽ wẽ nẽn aá mbeltéd nkag ekuu ehóg ne adúbe.

Nkabtéd n kálag

Ndibned n kálag 1.1

Adúbe ne áwõñ debyéé 1.2-8

Abé atóg ne ábé nhõn 1.9-11

Ákag ne ákud mekágsen 1.12-18

Áwóg ne ábel 1.19-27

Ngabén eéhednãdté 2.1-13

Adúbe ne mbeltéd 2.14-26

Ngáne mod a Krísto ábenladté echém 3.1-18

Mod a Krísto ne mekan mé nkõñsé 4.1-5.6

Elébé émpẽe 5.7-20

¹ Mẽ Jemse, mbãledẽ a Dyöb ne awẽ Sãngú Yesu Krístã, mẽ-éé ntenle nyé enén kálag. Nlente nyé metúmbé dyõm ne mébẽ mé bad bé Israel nime mepãntédé áte nkõñsé áte rísyãal.

*Jemse aá bad bédúbe Krístã
béwõñ-ẽ debyéé*

² A-baányã, pónde ké ehéé eche nyaa e mekágsen ké ehéé étáné nyé, nyétéd nẽ e'boñ é yãl áte.

³ Nyébii nẽn bán nímẽn mekágsen nime nyékudé áyãl e adúbe áde nyéwóó, méwede nyé nlém á abum.

⁴ Nlém níwúu nyé á abum káãñ á asóg ábel boñ mbeltéd nímẽn rityéem bwãm rílõn-ne mbon, ábel boñ nyéewóó' abé dé mbéb ké ahóg á alongé adẽn.

⁵ Nyé ké ahéé awé atóge' debyéé, áchãñ Dyöb aá ábe mó. Dyöb dõo ábage moosyãal debyéé ne nlém nhóg, ésebãn akwognãd modmod, ábe-ẽ mó.

⁶ Boñ pen nzé nyéhãã Dyöb nyédúbé bán ábe nyé chõm éche nyésédté mó ésebãn nlém nkããdte nyé á abum. Mod awé nlém nkããdte á abum ádii nẽe edib é nkwe éche éhode', epub éhúene' mendib ped enén étimne eninii.

⁷ Ene ndin e mod eewémntãn aá mõskũd chõm wẽe Sãngwéé.

⁸ Adii mod awé awóó nlém níbe, eechãñnãd-taá hõm ahóg áyãl e kéchéé éche ábeléé.

Betóótøkẽ bé bad ne behõn bé bad

⁹ Mod a Krísto awé eesẽ etógnén á'sõ é' bad bẽmpẽe atãngéné abé kúmbe nzé Dyöb áchãgté mó ámĩn.

¹⁰ Mod a Krísto awé adé etógnén á'sõ é' bad bẽmpẽe atãngéné abé kúmbe nzé Dyöb ásúdté mó. Nhóbe nẽn áyãle ámaá melemlen ngáne ébéenẽe mbonja e nkããkã awé adé á ahin-tẽ.

11 Nzé enyɛn épene ne ngíne ábe e'hyé bé ekíde é'belé é'hyáád ane nkəákəə, éche mbonja-'é ébelé ésoo, e'boŋ é'bāb-pe é'belé é'maa. Melemlem nê dɔ́o behon bé bad bémaá' é anan áde bənanéé nímāb nhon ámbld.

Jemse aá mekəgsen méəhūú' é wéé Dyöb

12 Nnam ne kénzée awə awəséné mekəgsen, áyāle nzé atómé nímé mekəgsen áte, Dyöb débé mó nsábe níme nídé alongé áde áhóbé aá móᄁbē bad ábe bédás mó.

13 Nzé mod akudé mekəgsen eetəŋgenéé ahób aá, "Mmén mekəgsen méhúú wéé Dyöb." Mod eéhəlɛɛ-se ákəg Dyöb ne ebébtéd, melemlem ngáne Dyöb-pe déekəgée mod ábel mbéb.

14 Mewəmtən mé mbéb mé mod mwən móᄁ mekəə boŋ ahún á mekəgsen-té, ene pónde-'aá nímé mekəgsen métédéé mó nlém á abum boŋ mehaŋ mó.

15 Mmé mewəmtən níme mébāg mod áte mó-'aá mépene mbéb, nzé nímé mbéb-pe níkwógé mod áte, npiinad mó kwééd.

16 A-baányan bé edəŋge nyéədognād.

17 Ndé e bwām ké ehéé ne kéchéé éche éloné mbon éhúú ne Titée awə adé ámín. Titée mó ahəgé bwəm é'syā́l ábe é'pene ámín. Abén bwəm é'pene-'e nhəŋlən ne nhəŋlén, boŋ Dyöb pən déehəŋlānné.

18 Dyöb débél ntii ábe syā́nē alongé dékᄁlē abe áde ámbéé syā́nē échē eyale é mbále. Ambél nê ábel boŋ áfinté e nímé nhəgtéd nisyā́l, syā́nē débē ngáne mbote e'só echē bébageé mó nēe mendé.

Jemse aá bad bé Dyöb bébele ngáne eyale é Dyöb éhóbéé

19 A-baányan bé edəŋge, nyébii nímén mekan. Mod téé ábē mehél áwóg dyam áde mod ampée áhóbéé, mod eewámsán dyam ahób pən, mod eewámsán-ne alij.

20 Melingá mé mod méemwagké-se ábel mekan níme Dyöb áhedéé aá ábel.

21 Né-ᄁó nyétede mekan mé mbinde ne mekan mé ebébtéd mésyā́l níme nyébeleé. Ne asudé á yāl ásyā́l, nyékob eyale éche Dyöb áwéné nyé á nlém-té. Echē eyale chᄁo Dyöb ábenladté áson ádén alongé.

22 Nyébele ngáne eyale éhóbéé. Nyéədōgē yāl se nyéwōgē chᄁo wógn.

23 Kénzée awə awóge' eyale é Dyöb, ésebán abele' ngáne éhóbéé, adii nēe mod awə anone' ábe e'só á dyené.

24 Amaa eche yāl anyín, boŋ aké áde ákagké, abelé áchatén ngáne e'só é'dí mó.

25 Boŋ bad ábe békoo' mbéndé echē etəŋgéné anon áte, mbéndé eche ehúde' bad á mehaŋ, nzé béhíde chᄁo ngáne éhednadté saké bán béléaa' chᄁo boŋ béchatén-ne, boŋ pən, béhíde chᄁm éche éhóbéé, Dyöb dénaméd bᄁo áyāl e kéchéé éche bébeléé.

26 Mod ké ahéé awə awémténé aá móbele' ngáne Dyöb áhedéé boŋ eekóbe éche echém, ene ndin e mod adoge eche yāl, áde abele á Dyöb-pe, áde ngén.

27 Abele Dyöb nyaa eche esáá ne eche etəŋgéné á'sᄁo é' Dyöb Titée, adii anon menyuu ne bekúd ábe bétage', ne áchᄁo yāl bwām ésebán mekan mé mbinde mé nkᄁsē méwōge mod áyāl.

2

1 A-baányan, nyé nāngáne bad ábe bédúbpé eched Sān, Yesu Krístəə, Sāngwéé awé échē edúbé échábé amīn, nyéetāngeneé nēe nyényíné mod á did-te se nyétéd mó etógnén ké-ε nkóntéd.

2 Détéd bán mod asólé wéε nyeládné, ahédé nzéd é gól, ahédé-ε kəse é mbóté, ntógetóke ní mod mómpé rísólé, ahédé mbóté é mbinde.

3 Nzé nyébagé mod awé ahédé kəse é mbóté edúbé boŋ nyélangé mó bán, “Hyé édyεε enén kəse e e'dii,” boŋ nyélangé-ε ntógetóke ní mod bán, “Tyéém hē,” ké-ε bán, “Dyεé á ndəob tē hē,”

4 né nyélúmté bán baahóg bétómé abíníí, né nyékáadte-ε bad ne mewémten mé mbéb.

5 A-baányan bé edənge, nyéwóglan. Eesaá mbále nén bán Dyöb ápwéde betóótókē bé bad á nkónsé te aá bédúbe Krístəə-ye? Adé adúbe dó-áá adé nímāb nhən, apwéde-ε bó ábé bad ábe ébéé awé nkamlən. Mmé nkamlən móó áhóbé aá móšbē bad ábe bédáá mó.

6 Boŋ nyéetédeé betóótókē bé bad nēε dyam. Saá behən bé bad bóó bétagte nyé-ye? Eesaá mbále bán bóó békene nyé á kóte-ye?

7 Eesaá mbále bán bóó béhóbe dīn dé edúbé áde ane awé akamlan nyé mekan mé mbéb áyāl-ε?

8 Nyéēbēl dyam áde átāngéné nzé nyékoo' mbéndé e nkamlən eche Krístəə ahíd eche éténlédé nén bán, “Edəŋ mwānyon ngáne édáá echoŋ yāl.”

9 Boŋ nzé nyétede baahóg etógnén abíníí-ε nkóntéd, né nyébele mbéb, né mbéndé e Dyöb-pe ekóbé nyé nēε bad ábe bébóó mbéndé.

10 Kénzēé awé ahíde mbéndé boŋ abóó mbéndé póg, né abóó mbéndé ésyāāl.

11 Mod awé ahóbé aá, “Nyéekábé mesón á ndáb e e'wóngé,” mó ahóbé ámpé aá, “Nyéewúé' bad.” Né-óó, nzé mod eekábé mesón boŋ awúé' bad, né abóó mbéndé.

12 Nyéhóbe dyam, nyébele-ε mekan nēε bad ábe bébíí bán Dyöb dékāād bó, nchoo ne eche mbéndé éche éhúde bad á mehaŋ-tē.

13 Mod awé eewóge mod ampée ngəl, Dyöb-pe déewógké mó ngəl nzé akáadte bad. Boŋ mod awé awóge bad bémpee ngəl, éewógké mbwóg mbwe níme Dyöb ákáadteé bad.

Jemse ad nzé adúbe déekii ne mbéltéd né áwédé

14 A-baányan, nzé mod ahóbé aá módubpé Krístəə boŋ eébéle mekan níme mélúmté bán awóó adúbe, bwām é'héé é'dé áhed? Adé adúbe áhele ásoŋ áde alongé-ye?

15 Détéd nén bán mwānyon a Krísto nhóg eewóó' é chóm éche áhāgkē á yāl, eewóó-áa ndyééd e epun é bīn.

16 Boŋ nyé mod nhóg alāngé mó aá, “Ekag bwām, ékud chóm éche éhāgkē, ékud-te ndyééd éche édyāgkē.” Nzé nyélangé mó nē ésebán nyébage mó chóm éche átógnéné, né bwām é'héé nyébéle mó?

17 Melemlem nē dóó édíí ne adúbe. Nzé mod awóó adúbe áde éebeléé ngáne áde adúbe áhóbeé, né áde adúbe áwédé.

18 Mod nhóg állā me aá, “Mod nhóg awóó adúbe, aníníí-ε abele mekan mé bwām,” me-ε mētímtén mó meé, “Lúmed me ngáne mod áhele awóŋ adúbe ésebán abele mekan mé bwām, mélúméd we ádēm adúbe áyāl e mekan mé bwām níme níbeleé.”

19 Edúbpé nén wéε Dyöb ádíí ahóg. Nē áde bwām. Káŋne e'e'dáədəŋ bé mbéb bómpé é'dúbpé nē, é'nəə-ε ne mbwóg.

20 A-eyókéł é mod, ehede wéε bélúmed we nén bán nzé mod awóó adúbe boŋ eébéle ngáne áde adúbe áhóbeé, né áde adúbe déesaá dyamdyam-ε?

²¹ Cheé ênkāñ boñ Abrahamε, awesyánē saá ambáá, ákobnéd á'sō é' Dyōb néε mod awē abele' mam nīme Dyōb áhóbé? Saá akwenten áde ânkwenténné ábe awe mwān Aisige néε mendε-yε?

²² Nyényiné nén bán adúbe áde Abrahamε ne nīmē mbeltéd békágé'áá ekuu ehóg, nīmē mbeltéd-te mēnkāñ áde adúbe álón mbon.

²³ Nén dēmbēl eyale é Dyōb énnýínnéd mbále ngáne éténlédé nén bán, "Abrahamε andúbé Dyōb. Nén dēmbēl Dyōb dēnkob mó nēngáne mod awē abele mekan nīme métāngéné." Né-óó, bad bēnchāg Abrahamε bán nsón a Dyōb.

²⁴ Nyényiné nén bán mbeltéd ní mod níbele boñ mod ákobnéd á'sō é' Dyōb néε mod awē abele' mekan nīme métāngéné, saké adúbe dēmpen.

²⁵ Melemlem nē dōó émbēē ne akwalεε awē béchágé'áá bán Rahabe. Ankobnéd á'sō é' Dyōb áyāle bad bé Israel ábe bēnlōmmē bán béhyε bēnon dyad áte á mesōom-tē. Ankōb bó nken, abidéd-te bó á dyad-tē, nzii empée á mesōom-tē.

²⁶ Ngáne yāl e moonyoñ echē eewóo edāádāñ éwédé, melemlem nē dōó adúbe áde déékāg ne mbeltéd áwédé.

3

Jemse áá mod-té ákamlan échē echém

¹ A-baányañ, nyé bad híin nyéebág bemeléede bé eyale é Dyōb. Nyébii bán Dyōb dékáād se bemeléede tómaa ngáne ákáádté ábíníí bad.

² Syánē baásyāāl debéle mewusé á ríhóbtéd. Kénzée awē éebēle awusé á ríhóbtéd adii mod awē ádē abé átyéémé, ahele-'ε eche yāl akób ábel boñ eebēle awusé.

³ Détéd elānsén ne hóse. Nzé mod ahede áá hóse ébel ngáne áhedéé, abelé ahé chō chōm á nsal-tē. Echē chōm chō-'áá ábenladté ályáged ene hóse kéhéé wēé áhedéé áá éke.

⁴ Ké'ε déted elānsén ámpē ne bōle é'mbáá ábe é'dé á edib é nkwē-te. Kénée edíí bán é'kálé bwāmbwam, epub é ngíne chō-'áá ékeene bó, mod awē adole' ábē bōle mwā abámbé móó ábenladté ákeεn bó kéhéé áde ádóó.

⁵ Melemlem nē dōó edíí ne echém. Kénée edíí bán edé mwāmpin á yāl e moonyoñ, edé kúmbe bwāmbwam áyāl e nīmē mbeltéd.

Nyényín ngáne mwā muú ahele se ahyáád ahín ámbáá.

⁶ Echém ámpē edii nēngáne muú. Edii ped e yāl e moonyoñ póg, ébele' mbéb ní kamlan yāl e moonyoñ esyāál. Ebele' alongé á moonyoñ ásyāāl abé nēngáne ákobné muú, muú nīme níbidé á dū-á-muú, nīme méédímē'.

⁷ Moonyoñ akamlan nyaa é nyam ésyāāl. Akamlan nyam é mehín, ákamlan menon, ákamlan nyam éche édole abum áse, ákamlán-ne nyam ésyāāl éche edé á edib é nkwē-te, ambootéd-te chō akamlan se á mbooted.

⁸ Boñ modmod éehēlēε-se ákamlén echém. Echém edíí chōm é mbéb éche modmod éeheléeε-se ákamlén, éloné-'ε ne e'wε bé mbéb ábe é'pεene' kwééd.

⁹ Chōó débēnladté áken Sāngú Dyōbe, awēd Titée, chō-'áá débēnladté ábe moonyoñ ebómán. Moonyoñ mó-'áá Dyōb áhágé áwágen mó.

¹⁰ Á melemlem mé nsal dōó e'yale bé mekenag ne ebómán bēbídéé. A-baányañ, éetāngénéé abé nē.

¹¹ N'yélé mé edib nhóg méeheléeε-se mébidte mendíb nīme mésáá ne mé mbinde abided ahóg.

¹² A-baányañ, alín dé asáá déeheléeε-se áchyáá e'pum é píε. Ké'ε alín á sabé déeheléeε-se áchyáá e'pum é' mesáá. Edib-pe éche ébidte mendíb mé nkwē, éeheléeε-se ébidéd mendíb nīme mésáá.

Debyéé áde áhúú ne Dyöb

13 Mod adé áfínté echên awë awóó debyéé awón-’ε nsòñten-ε? Alúmed nê ne alongé á bwám áde áwóó, áyāl e kéchéé éche ábeléé. Abel nê ne asuded á yāl áde debyéé áde áwóó ábélé bon awón.

14 Bon nzé nyéwóó kán áte eche edé mbéb, nyëtòñtan-ne dásō échen yāl, nyéebnlád debyéé áde nyéwóó ábel mbéb tângene ayáge á mbále, akum áde nyékumε ekáá á tál,

15 ene ndín e debyéé eehúé-’ε ne Dyöb. Edii debyéé áde áhúú ne bad bé nkòñsé. Adii debyéé áde áhúú ne bad ábe béewóó Edáádaj é Dyöb, debyéé dé edáádaj é mbéb.

16 Kéchéé wéε bad béwóó kán áte eché edé mbéb, bétòñtan-ne dásō échab yāl, mpuutéd mbéle mbé, nyaa e ebébtéd ké ehéé-’ε ebág áhed.

17 Bon debyéé áde áhúú ne Dyöb adé nhəñlén. Kénzée awë awóó adé debyéé eewóó-’ε atón dé mbéb ké ahóg áyāl. Ene ndín e mod adəə nsəñ, apwiitad, achede yāl áwóglen bad bémpée, awóó ngəl bwámbwam. Abenle bad mekan mé bwám ésebán akwəgnad modmod, abele-’ε nê ne nlém nhóg.

18 Nzé bekóm bé nsəñ bébele nsón níme nípεene’ nsəñ áfínté e bad, nê débəl bad bébelé mekan níme Dyöb áhedéé.

4

Jemse ad bad bésuded yāl, Dyöb akamlen bō

1 Cheé épεene nzum ne nselag áfínté echên? Eesaá mbále bán esí é awón á bwém éche éwane nyé nzum áte, chósó ékəə’ bon nyébelé nén-ε?

2 Ehede chöm bon weékudéé chós, nê ábélé ewúú mod. Ewóó esí áte bwámbwam ákud chöm bon weéhéleé chós akud. Nê ábélé nyésenle, nyéwanne-’ε nhóg ne aníní nzum. Nyéekūdεε chöm éche nyéhedeé áyāle nyéēsədtεε Dyöb chós.

3 Nzé nyéhedne Dyöb chöm, nyéekūdεε chós áyāle nyéhedne chós mewémten mé mbéb. Nyéhede bwém dásō áwóged échen yāl menyinge.

4 Nyéde nēngáne bad ábe bédé á ndáb é mewóngé, bon bébé békábé mesón. Nyéebíi’ é bán ábane nlém ne mekan mé nkòñsé ábele nyé bad bé ekoyí bé Dyöb-ε? Né-ósó kénzée awë adəə nlém abane ne mekan mé nkòñsé, ábelé eche yāl mod-a-ekoyí a Dyöb.

5 Nyéwémtné bán ngēn-εé éténlédé á kálag e Dyöb nén bán, “Dyöb ábanné nlém ad edáádaj éche mǎhédé syáné áte, ébē éché, adé-’ε kónjí ne chós-ye?”

6 Bon Dyöb ábage syáné nsimé abε ne abε. Nê dós-’aá akásá bon étenléd á kálag e Dyöb nén bán, “Bad ábe bédé kúmbe, Dyöb ákunnad bós yāl, bon ne bad ábe bésúdté yāl, Dyöb ábage bós nsimé.”

7 Né-ósó, nyésuded yāl á’só é’ Dyöb. Nyéwúen Satane nló áte. Nzé nyébelé nê, mós-’ε átóm mehélé.

8 Nyépe Dyöb benben, mómpē əpē nyé benben. Nyé bad bé mbéb, nyésóg mbéb ábel. Bad-te ábe béwóó nlém núbε, nyébane nimen nlém ábel mekan níme mésáá.

9 Nyésuden áyāl e nimen mbéb. Nyélebe’, nyéchyε-’ε. Nyésóg awósó, nyélebe’ lebén, nyésóg menyinge awóg, nyésuden sudnén.

10 Nyésuded yāl á’só ábe Səngwéé. Nzé nyébelé nê, áchəgəd nyé.

Jemse ad mod eekáadté mwányan

11 A-baányan, nyéehóbé nhóg ne aníní mam mé mbéb á yāl. Kénzée awë ahóbe mwányan mam mé mbéb á yāl, ké-’ε akáadte mós, né ahóbe mbéndé e Dyöb mam mé mbéb áyāl, né ahóbe-’ε aá ene mbéndé eéboó-’ε. Nzé ehóbé wéé

mbéndé e Dyöb eéboo' é né weébēlēē chōm éche mbéndé éhóbé aá bébel. Boŋ né etédé etál éché éesē échōŋ ábē mod awé akáadte.

¹² Mod nhóg mwēmpēn-εé adé awé abage' mbéndé, mwēmpēn-naá akáadte bad. Mwēmpēn-εé ahele ásoŋ alongé á bad, mwēmpēn-naá ahele abébéd dó. Boŋ wε, nzé-módé édii ákáad mwányonŋ?

Jemse ad mod eebág kúmbe

¹³ Βααβ-ρῶδ, nyéwóglan, nyé bad ábe nyéhóbe bán, “chii ké'ε chān, séēkē dyad dekalengōme, séēdyεé áwed mwé nhóg, sékábē nyongé, sékudé-'ε nsyāŋ.”

¹⁴ Nyébii dyam áde débēnléd chān-ε? Chān nyébii bán alongé ádēn ádé? Alongé ádēn ádii nēŋgāne mbag. Ebág á esōŋ é pónké, ámbid enē, weenyinéé chó ámpē.

¹⁵ Chōm éche nyétāŋgéné ahób édii nēn, “Nzé Dyöb ákwénténé, né séēbē á alongé, sébēl-le ádēn dyam ké'ε ádiní.”

¹⁶ Boŋ βααβ, nyētimé nyékume ekáá á tál ne kúmbe esyāál. Enēn ndin e akum dé ekáá á tál eetāŋgēnεé.

¹⁷ Né-δó, kénzεé awé abii dyam á bwām áde átāŋgéné abel, boŋ eébele dó, abelé mbéb á'sō é' Dyöb.

5

Jemse ad behon bé bad bétéd pónké

¹ Nyé behon bé bad, nyéwóglan me! Nyéchyε', nyéhágke e'saád áyāl e metake míme mépií nyé.

² Mmēn nhon míme nyékúme ní máá abo, sii-'ε émáá nyé asan adyé.

³ Echēn gōl ne silva éche nyélimmé áse, émáá ngag akób. Ene ngag eche ekóbé ábē bwēm, chōó ēbēl boŋ Dyöb ákógsén nyé, émád-te nyé áse nēε muú. Nyékúme yāl nhon enēn pónké eché edé bēnben ne e'pun bé asóg.

⁴ Nōné', weesábpεé bad ábe bébēnlé wε nsón á nzag-té. Etimé edogé bó dogēn. Nēn ábélé ábē bad ábe wéesábpεé ádab awé áwógnad á'sō wée Titéε, Dyöb á Ngum.

⁵ Abé áde nyédii á nkōŋsé hēn ádii áchog alongé, nyébele-'ε kéchéé éche nyédáá. Nyékódte mímen mewēmtēn, kénεε nyébii bán epun éche Dyöb dékōgsēnnē ábē bad bé ekoyí ékwógé ape.

⁶ Nyéhóbé bán bad ábe bébele mekan míme métāŋgéné á'sō é' Dyöb bédé bad bé mbéb, nyéwúú-'ε bó. Béeheléé nyé atyémen.

Jemse ad bad béwesēn metake

⁷ Né-δó a-baányan, nyéwesēn káōŋ Sāŋgwéé ápe. Nyétéd elāŋsēn ne mod awé abele nzag. Abelé ásin káōŋ ne pónké eché ápādtē mbote é bwām. Awesan káōŋ ne á pónké eche mbúú e'sō ébootadté achó, ne áde édimtanné achó.

⁸ Nyémpē nyéwesēn, nyéwéd-te nlém á abum, nyésine' epe éche Sāŋgwéé, édé bēnben.

⁹ A-baányan, nyéenyongé áte tāŋgene nhóg ne aniní ábel boŋ Dyöb dééhōbe aá nyédé bad bé mbéb. Nyébii nēn bán mod awé akáadte' adé nyé bēnben.

¹⁰ A-baányan, nyétéde e'chemléd ne bekal bé'dáōdāŋ. Békálé'áá nkalāŋ á dīn áde Sāŋgwéé, békudé metake, béwesán-ne ní mé metake.

¹¹ Ne mbále, syáá dechage bad ábe béwéséné bán bad ábe békúde nnam. Nyéwógé ngāne Jobε ánwesēnné áde ákúde metake, nyényin-ne ngāne Dyöb débēnlé mó bwām á asóg. Sāŋgwéé aboó nlém bwāmbwam awóó-'ε nlém ní ngol.

¹² Amln e nímén mésyāā, a-baányan, nyēbenlād dīn dé nkon nímín, ké'ε dé nkōn rísé, ké'ε chōm émpēe āmwé melé. Boŋ pen, nzé ehóbé“Éε” abé εε, nzé ehóbé-ε “Aáy” abé aáy. Nzé nyēbelé nén, né Dyōb déékógsénné nyé.

¹³ Kénzée awé adé á metake tē, ákánne. Kénzée awé awóge menyinge, ákóne ákené-ε Dyōb.

¹⁴ Kénzée awé eedyεε bwām, áchag belyáged bé mwembé, békánned mó. Nzé békánnad mó béwōgtē mó dyōg á dīn áde Sāngwéeé.

¹⁵ Nzé édé bán békánnédé mó ne nlém nhóg, né Dyōb déwōg bó mekáne, né débēl-le mod a nkole ádyēε bwām. Sāngwéeé ábēl áhídé á anon dé nkole, ádyēε bwām, ké mbéb-pe mó āmbenlé Dyōb délāgsén mó.

¹⁶ Né-ōó, nyépale mbéb áte wéε nhóg ne aníní, mod tée ákánned-te mwānyan, ábel boŋ nyédyεε bwām. Mekáne níme mod awé abele mam níme métāngéné á'só e' Dyōb, méde ngine bwāmbwam, mébele-ε nsón.

¹⁷ Elaijaa abédéε moonyon melelem ngáne syānē. Póndé póg ankáne bwāmbwam aá mbúú echóg, mbúú enkēnchó-aá á etún é mwē rílāán ne eped.

¹⁸ Ambíd enē ankáne ámpē, Dyōb ábēl mbúú echó, bwēm é'bootéd-te akwog.

¹⁹ A-baányan, nzé nyé ké ahéé atēdté áhíd nzii e mbále e Dyōb, boŋ mod ampée abelé atīmné mbíd,

²⁰ ábíi nén aá, kénzée awé abelé boŋ mod awé abelé mbéb asóg mbéb abel, né asoó alongé áde mod awé abelé mbéb. Nén débēl-le mbéb hīn níme ane mod ákébenlé, Dyōb déenonné mó á dīd.

Kálag e'só eche Petro Ndibned n kálag

Kálag e'só eche Petro antenlé, bad bé Krísto b̄w̄ō anteléé ch̄o. A kálag-tê wê achagé b̄o aá, “Bad ábe Dyöb ápwédé.” Abén bad bém̄p̄ant̄ed áte á ped e akuu á mbw̄og e ech̄é béchágé'áá bán Esia Maino. Nzom ech̄é enk̄aj bon̄ átel enén kálag, ebédéé áwéd bad bé Dyöb nlém á abum áȳale metake n̄me békúdé'áá ne adúbe áde bénw̄ongē. Awéd-te, abage b̄o e'lyág bé nlém ábe nkalaj n̄ bwám n̄me Yesu Kríst̄aá mbagéé b̄o. Mm̄e nkalaj n̄ bwám n̄h̄obe t̄angene, kwééd, mpuu ne epe eche Yesue áp̄eé ámp̄e. Alüm̄ed-te b̄o áte aá békwenten metake ne e'lyág bé nlém. Anlüm̄ed b̄o áte aá beb̄ii n̄n bán n̄m̄e metake médii mekágsen ányin n̄zé adúbe áde b̄ewánlé áde adúbe á mbále. Bébi-'e n̄n bán béküd nsábe á “Epun eche Yesue Kríst̄aá áp̄eé.” Anlüm̄ed-te b̄o áte ámp̄e aá alongé ádáb át̄anḡen̄e ab̄é ngáne alongé á bad ábe béh̄ide Kríst̄aá.

Nkabted n kálag

Ndibned n kálag 1.1-2

Dyöb d̄ōo abage e'soos̄on̄ 1.3-12

Elébé ábel mekan n̄me m̄esáá 1.13-2.10

Mekan n̄me bad bé Krísto b̄et̄anḡené abel á p̄ondé e metake 2.11-4.19

Asuded á ȳäl ne ábele Dyöb n̄éé mod a Krísto 5.1-11

Nsoḡten 5.12-14

¹ M̄e Petro, mbap̄ee a nlómag aw̄é Yesu Kríst̄aá, ntenle nyé bad ábe Dyöb ápwédé, ábe b̄ep̄ant̄édé áte bon̄ beb̄é beken á mbw̄og é Pontus, Galesia, Kapadosia, Esia ne Bitinia.

² A ntii n̄m̄e Dyöb Titée, ammad nyé apw̄ed. Ech̄é Ed̄aád̄an̄-'e eb̄el̄é nyédé bad ábe b̄esáá. Abelé n̄e ábel nyébele mekan n̄me Yesu Kríst̄aá álángé nyé aá nyébel. Abelé n̄e, ábel n̄m̄e meki n̄me m̄esyógk̄é á aw̄og mb̄el nyékud alagsen d̄ mb̄éb. Nsim̄e ne n̄san̄ n̄ Dyöb mb̄e ne nyé ab̄é ne ab̄é.

Dewoó e'lyág bé nlém

³ Mekenag mb̄e ne Dyöb áde áde Sáá aw̄é aw̄ed S̄angw̄éé, Yesu Kríst̄aá. Apuúdté Yesu Kríst̄aá. Né-ó̄o dekué alongé dék̄ōl̄e. Abel áde áb̄el̄é n̄e, ábágé syán̄e e'lyág bé nlém bé alongé áde déemaá'.

⁴ Desine' k̄á̄j̄ne n̄han n̄me Dyöb ák̄ōjn̄édé ab̄e bad. Ak̄ōjn̄édé nyé mó ádyöb. Ahed-te m̄eéb̄ō'é, m̄eéb̄éb̄-paá.

⁵ Dyöb ábenlad ech̄é ngum ák̄aá nyé adúbe áde nyédúbp̄é mó, k̄á̄j̄ né nyékudé e'soos̄on̄. Ab̄é e'soos̄on̄ b̄enyin̄n̄éd á epun é asóg.

⁶ Nyédii nyéb̄e menyin̄ge ne n̄e, k̄én̄éé édíi n̄n bán nyééküd metake nyaa ne nyaa é esón̄j é p̄ondé.

⁷ Mm̄e metake m̄áp̄é ák̄ag nyé adúbe, álümed n̄n bán adúbe áwúú nyé áte ne mbále. Gól eh̄ele eb̄éb, bon̄ ké n̄e, bébelé béhé ch̄o á dü ásaad ch̄o. N̄zé béhele bébel n̄e ne gól, né b̄et̄anḡené áden adúbe d̄omp̄e ak̄ag ábel n̄n áwúú áte áȳale áden adúbe átómé gól. N̄zé áden adúbe átómé mekágsen áte, né Dyöb d̄éken nyé, ábe nyé eh̄um̄é ne edubé áde Yesue álüm̄ed̄te bad bé nk̄ōj̄s̄e b̄esȳäl ȳäl.

⁸ Nyédáá mó k̄én̄éé nyéenyin̄ēē mó. Nyédúbp̄e-'e mó k̄én̄éé nyéenyin̄ēē mó b̄ōob. Ké b̄ōob-pe nyetómt̄én̄é menyin̄ge ab̄é nyaa ech̄é mod éeh̄el̄é-se ah̄ób.

⁹ Ch̄om̄ ech̄é nyékud̄te áȳale adúbe áde nyédúbp̄é mó édíi e'soos̄on̄ ábe áb̄en e'daád̄an̄j b̄ékud̄te.

10 Bekal bé'daádəŋ bənhōb mam á'sō é' pónde t̄ŋgene ábē e'soosəŋ ábē Dyōb dēbēé nyé nēe nsimé. Béntōŋ ábē e'soosəŋ ahəd áte ábel bésōŋtən bó.

11 Edaádəŋ éche Kr̄stəá embē bó áte áláa bó á e'sō é' pónde ngáne Kr̄stəá átagké ne ehúmé échē ákudté ámbid e pónde, boŋ bēmbē béhedé áte. Béhéde'áá áte ábiu pónde échē nímé mam mébenlédté ne wée mod awē mébenlédté.

12 Dyōb dénlüméd ábē bekal bé'daádəŋ áte aá nsón nímé bébēléé méesaá nsón nímé bēn békudté nsyāŋ áhed, boŋ r̄dii nsón mímenyé. Dyōb dénlómē bad Edaádəŋ éche Esáá échē ébidé ádyōb. Echē Edaádəŋ chōó embēl boŋ baahóg bēkalé Nkalan̄ ní Bwám nímé nyéwógéé bōob. Mmén mam mōó bekal bé'daádəŋ bēhōb'áá. Kóŋŋe ángel édáá nímén mekan asōŋtən.

Mbēltéd nímēn r̄sāŋ

13 Né-óó, nyépūd abad, nyébē mbonsén ábel nsón nímé Dyōb áhedeé. Nyétéd pónde nyésūm-me nlem r̄syāāl áyāl e nsimé nímé Dyōb dēbēé nyé á pónde échē Yesuē ápēé ámpē alúmed-te nyé yāl.

14 Ngáne édii bán nyédii bad ábe bébēle mekan nímé Dyōb áhedeé, nyéemwāg-se mam mé mbéb nímé nyébélé'áá bōod mébé mékamlán ádēn alonjé.

15 Dyōb áde apwēde nyé asáá. Né-óó nyémpē nyétāŋgéné asāŋ á mbēltéd nímēn r̄syāāl.

16 Eténléde á kálag e Dyōb nēn bán, "Mbēltéd nímēn r̄sāŋ áyāle mbēltéd nímēm r̄sáá."

17 Dyōb akáadte' moosyāal nyaa póg. Eékwognáadté modmod. Nzé nyékáne-'e áwē, nyéchage mó bán Titēe. Né-óó, nyéwōŋ mbwóg ní Dyōb áte á alonjé ádēn ásyāāl á nkōŋsé-te wēn wée nyédii beken.

18 Nyēbíí nēn bán Dyōb ákódté nyé á ekúkú é abé-te. Ekúkú é abé échē ábēn betaa bēnlyāgnēdté nyé saké chōm nēe gól ké'e silva échē ébébe' chōó ánkōdnédté nyé.

19 Ndāle e mekií échē Yesu Kr̄stəá chōó ánkōdnédté nyé. Kr̄stəá awē adé nēe r̄dyōŋ ní mbód nímé méewōo awusé ké ahóg á yāl.

20 Nkōŋsé r̄dēhōb bán níbootad, Dyōb dēmmád mó apwēd. Boŋ bōob á asóg hén alúmté yāl wée bad bé nkōŋsé. Abelé nē áyāle nyé.

21 Kr̄stəá akəá nyédúbpé Dyōb. Nyéhele-se nyédúbé Dyōb nyésūm-me nlem r̄syāāl áwē, áyāle apuúdté Kr̄stəá abídté-'e échē ehúmé áwēd.

22 Abel áde nyébēléé mekan mé mbále ábélé nyésáá. Nē ábélé-'e nyáábe bad bēmpēe ábe bédúbpé Yesuē nyédāŋné. Né-óó nyédəŋ nhóg ne anínií ne nlem r̄syāāl.

23 Nyēbíí nēn bán Dyōb ábágé nyé alonjé dékōlē mbwiined ne échē eyale. Echē eyale épééné alonjé éesaá-'áá chōm éche ébébe'. Ebē abé ne abé. Dyōb áde áde á ngindé ne á ngindé dōó ábágé nyé áde alonjé saké moonyoŋ.

24 Eténléde á kálag e Dyōb nēn bán,
 "Moonyoŋ adii nēe nkəákəá,
 ábē e'boŋ-'e é'dé nēŋgáne mbonja échē ékwoge á ahín-tē.
 Nkəákəá ayēnle', mbonja-'e ésoode.

25 Boŋ eyale é Dyōb ébé abé ne abé."
 Echē eyale édii nkalan̄ ní bwám nímé békánlé nyé.

2

¹ Né-ɔɔ, nyéteɗe mímēn mbeltéd mé mbéb rísyāɔl. Nyéekālē metóm, nyéelúmté' á díɗ-te ngēn nēn bán nyébele bwām áde nyéebeléé, mod eesííde waáb, e'yale bé mbéb béebíɗe-'e nyé á nsəl.

² Nyétánǵéné awan áte ákud ndyééd e edáádǵe echē esáá, melemlen ngáne bán bé nkáál béchyee' é abii, ábel nēn nzé nyédyédé ene ndyééd, nyékwog ákud e'soósonǵ.

³ Nyéwóǵléné ene ndyééd, nyébíi-'e bɔɔb ngáne Sǵngwéé ábeleé mekan mé bwām.

⁴ Nyéhyag wée Sǵngwéé, mɔ adé nēe aláá dé alongé áde belónǵ bé ndáb bēnchenéé, bonǵ Dyób ányín dɔ á akwóǵnéde, ápwēɗ, ákōɔ-'e dɔ.

⁵ Nyéhyag-kɔɔ nyébê nēe meláá mé alongé míme Dyób ábenladté álónǵ eche ndáb e edáádǵe. Awēɗ-te-'aá nyébenléé mɔ. Nyéēbē beprisē ábe bésáá, nyébagé mɔ mende mé edáádǵe míme mékóbnédé áwe e'so mbwiined ne Yesu Krístá.

⁶ Eténlédé á kálag e Dyób nēn bán,

“Ntédé aláá dé etóǵnēn

nsumé á Zayɔn.

Kénzée awē adúbpe mɔ éekwáǵké.”

⁷ Adén aláá-ɔɔ adé etóǵnēn ne nyé awē nyédúbpé mɔ bonǵ ne bad ábe béédúbpé mɔ ádii nēngáne

“Aláá áde belónǵ bé ndáb bēmbāǵgē abenled,

dɔɔ átímé aláá dé etóǵnēn abé.”

⁸ Eténlédé ámpē nēn bán,

“Mɔ adé aláá áde bad bélúméé ámín

abé-'e ndim e aláá echē ebele bad békweg.

Bad békweg áyāle béewóǵnēē Dyób. Nē dɔɔ Dyób átííde aá ébenled ne bó.”

⁹ Bonǵ nyé, nyéesaá nē. Nyédíi bad ábe Dyób ápwédé, beprisē bé Dyób áde áde kǵn. Nyédíi alonǵ áde ásáá, Dyób dēn-naá áwóó nyé ábel nēn nyélúmed bad bēmpēe ngáne ápédé bwām abé. Dyób áhúdé nyé á ehintēn-tē, apēené nyé á e'nyínen bé ekíde.

¹⁰ Ngen e'so nyénkēmbáá bad bonǵ bɔɔb nyéēnyédé bad bé Dyób. Ngen e'so ngol e Dyób enkémpáá áwēn bonǵ bɔɔb Dyób áwóǵé nyé ngol.

Nyébé betǵnǵ bé Dyób

¹¹ A-bánned nheɗe mee nyésǵntēn nēn bán nyédíi beken, nyétome-'e á nkǵnsé wēn tómmēn. Né-ɔɔ nyéebánné nlem ne mekan mé ekob é yǵl áyāle nēn nē áwanne ábēn e'dáádǵe bēn nzum.

¹² Nyéwále alongé á bwām áfinté e bad ábe béédúbpé Dyób, ábel bonǵ ké bēnhɔb bán nyédíi bad bé mbéb, bényín mímēn mbeltéd mí bwām. Nē dékǵn bébe Dyób edúbe mbwe míme Dyób dépéé á epun é asóǵ.

¹³ A dīn á Sǵngú, nyéwóǵne bad bé nkǵnsé ábe bédé á nkamlēn, ken nkamlēne ambáámbáa,

¹⁴ ké-'e kǵn echē éde áse e nkamlēne ambáámbáa, echē álómé ákǵgsen bebel bé mbéb ne ákémed bad ábe bébele' bwām.

¹⁵ Dyób áhede nēn aá mekan mé bwām míme nyébeleé mékúɗtēn mehɔb míme ábe e'yókél é' bad bēhóbeé nyé áyāl, míme béebíi' é.

¹⁶ Nyéesaá betǵnǵ, nyédíi kunze. Bonǵ pēn nē déebagéé nyé nzom ábel mbéb. Nyébé nēe bembaleɗe bé Dyób.

¹⁷ Nyébage moosyáál edúbe. Nyédǵe-'e bad bēmpēe ábe bómpē bédúbpé Krístá. Nyébáa Dyób. Nyébage kǵn Embáámbáa edúbe.

Metake míme Krístá mébē syānē e'chemléd

18 Nyé bad ábe nyédé bembæde, nyésuded yál ásē e bad ábe nyēbenléé ne edúbé ésyāāl. Nē déebāg ne ábe bébóó nlém bēnpen, boŋ nē ábē ne káŋne ábe bebébé nlém.

19 Dyōb débē menyinge ne nyé nzé nyēweséné e'we é' metake níme nyénkēmbáá nyékude áyāl echē.

20 Nzé ebelé mbéb, boŋ ewēséné mbéte áyāle nímé mbéb, ne nsyāŋ ríhée wékudté? Boŋ nzé ewēséné metake ké áyāle dyam á bwām áde ébélé, né Dyōb débē menyinge ne we.

21 Mmēn metake mébōŋnéde nyé awē Dyōb ápwédé, áyāle nēn Křstæ mwēn antāg á nló nímēn. Anlyágé-ε nyé elansén ábel nyéhíd nímé mekuu.

22 Enkēmbenlé mbéb ké nhóg, modmod enkēnwóg-kaá mós eyale é mbéb á nsal.

23 Ade bad bésyáá mós, enkēntimténné bós. Ade betágté'áá mós, enkēnsidté bós. Boŋ ambē mésyāāl á mekáá mé Dyōb áde ákáadte bad bésyāāl nyaa póg.

24 Křstæ mwēn ampém nímēd mbéb áwe yál á awog ábel nēn deewóó dyamdyam ábel ne mbéb, débēle-ε mekan níme Dyōb áhedéé, á alongé ádēd. Echē sii ébélé nyékudé e'chochoŋ.

25 Nyēmbé nēe rídyoŋ ní mbód níme mbós boŋ bōob Dyōb ápééné nyé ámbíd áhíd mod awē anōne nyé ngáne nnōn-a-mbód anōneé éche mbód.

3

Bebaád ne ábab bechóm

1 Nyé bebaád bé bechóm-me nyéwógne áben bechóm ábel boŋ ké émbē nēn bán bééhídē eyale é Dyōb, nímēn mbéltéd ní bwām mbel bōmpē bétimned Dyōb, bédúbé-ε mós. Ké nyéētōgne bós dyamdyam aláa,

2 bényín áden abé á bwām áde ásáá.

3 Nyéēsümē nlém nēn bán ábēn e'boŋ é'bide dásō áyāle ekāŋ é mbíd ebwóg nēe anabe dé esid, ahé á bwēm nēngáne e'bōŋ, nsāŋ, ne e'bése kéε kase é mbóté.

4 Boŋ bebíi nyé dásō ne e'boŋ ábe é'bide nyé áte. Abé e'boŋ béehāŋlānné áyāle é'bide ne edāādāŋ echē épwítédé échē éetagtán-ne. Abé e'boŋ bōó Dyōb ányínéé áá é'dé etógnēn.

5 Nē dós bebaád ábe bésáá bé' bōód ábe bēnsüm nlém ne Dyōb bebélé'áá boŋ é'bāb e'boŋ é'bíd áwed. Bēwógné'áá ábab bechóm.

6 Seraa mwēn ambé nē. Awógné'áá Abrahame áchágé-ε mós áá asāŋ. Nzé nyēbele' mam mé bwām ésebān nyébāa dyamdyam, né nyédíi Seraa ábe bán.

7 Nyé baachóm-me ábe nyéwóó bebaád, nyétāŋgéné áben bebaád edúbé abe. Mod téé ábē ne awē mwaád, anōne mós bwām. Bépedeé nyé e'wúu áte, boŋ nyáábōó nyéékūd alongé nyaa póg. Adé alongé ádíi nsimé níme Dyōb ábageé. Nzé nyéewānle bós ngáne éhednéé, né Dyōb déewógké nyé mekáne.

Nyēbele bwām ké nyékudé metake

8 Asóged, nyé moosyāāl nyébē mod nhóg, nyéwōŋ nlém níme nípwiítédé, nyésudēd-te yāl.

9 Nyéētímté mbéb áyāle mbéb. Nzé mod ahóbé nyé dyam dé mbéb áyāl, nyémpē nyéehóbé mós dyam dé mbéb á yāl, nyékáné kánnēn bán Dyōb ánamed mós, áyāle nnam mós Dyōb dénhōbpē áá mósōbē nyé áde ámpwēdté nyé.

10 Eténlédé nēn bán,

“Kéznééé awe ahede alongé dé menyinge,
áhédé-ε áá mónyín e'pun é' bín é' bwām,

eehóbé' mekan mé mbéb,
eékālē-'ε metóm.

11 Asóg mbéb abel, ábele mekan mé bwám.
Awanen ábē nsaŋ ne moosyáál.

12 Ayále Dyób anóné bad ábe bébele mekan mé bwám
awoge-'ε bó mekáne.
Boŋ akunnan bad yál ábē bébele mbéb."

13 Nzéé-ᵛ ahele ádāŋ nyé mbéb abel nzé nyéwóó nlém áte ábel mekan mé
bwám?

14 Boŋ ké nyéntāg-ke ké tagén ábel mekan níme Dyób áhedéé, né Dyób dé
naméd nyé. Nyéewógé mbwóg, nyéētāgē-'ε áte.

15 Boŋ pen nyébe Krístā edúbé, nén móódé Sāŋgwéé á alongé áđen. Nyébé
mboŋsén pónde ésyāál átímtēn kénzée awé asédté nyé dyaŋ tāŋgene nlém
níme nyésūmē wée Krístā.

16 Nyékéled nlém á abum. Nzé nyébele nē, nyésūdēd yál ne edúbé ésyāál,
nyékéled-tē nlém á abum wée bad ábe béhóbe nyé mekan me mbéb áyāl, áyāle
nyéhídeé Krístā. Békwaŋ nzé bényíné áđen abē á bwám.

17 Nyébii nén bán edé bwám mod ákud metake áyāle dyaŋ á bwám áde
ábelé, nzé nē áde á ntii ní Dyób, tómaa ákud metake áyāle dyaŋ dé mbéb.

18 Krístā mómpē ankūd metake awé-'ε áyāle nímēd mbéb ngen póg ne ngen
ésyāál. Abédéé mod awé abele mekan níme Dyób áhedéé, boŋ anwé á nló níme
bebelé mbéb. Ambel nē, ábel dépe wée Dyób. Bad bēnwū mós boŋ échē ekob
é yál chóó énwē. Dyób dēmbēl échē edáádāŋ émbē ébē á alongé.

19 Echē edáádāŋ chó-'áá ánkéénné á mbwóg áke dé akale e'dáádāŋ eyale é
Dyób.

20 Abén e'dáádāŋ é'bédéé e'dáádāŋ ábe bēnkēnwógēn Dyób se' bōód áde Dyób
dēnchabtédte bó e'kād áte ábel bétēde nímab mbéb á pónde échē Noa álóó'áá
bōle émbáá. Bad waam bēnpēn bōó bēmbē á bōle-tē. Bēnkūd e'soóson áyāle
mendíb.

21 Nén áde melemlem nēŋgāne edusen. Echē edusen chóó ébele bōob boŋ
bad békūd e'soóson á ngīne e mpuu níme Yesu Krístā. Edusen éesaá awobe
á yál áhūd mbinde boŋ édii ákwentēn dé abele Dyób ne nlém níme nísáá.

22 Krístā akii ádyób, áwed-tāá ádyéé Dyób á ekáá é mbáá boŋ ákamláán
áŋgel ésyāál, benkamlenē ne ngīne échē édé ámín.

4

Alongé á bad ábe bédúbpē ábē ngāne Dyób áhedéé

1 Né-ᵛ ngāne édii bán Krístā ankūd metake é ekob é yál, nyémpē
nyētāŋgénē nyébé mboŋsén áwōŋ melemlem mé mewēmtēn nēŋgāne
ánwōŋgē. Ayāle, kénzée awé atagé é ekob é yál, asógé mbéb abel.

2 Ngāne édii-'áá nē, alongé áđen á nkōŋsé wēn ábē ngāne Dyób áhedéé saké
bán mpúlé mé nkōŋsé múmó níkamlan nyé.

3 Mekan nímé bad ábe bébii Dyób bédā'ε abel móo nyémpē nyébélé'áá.
Ene pónde emaa átóm, ekwógnédé-'ε. Nyékábé'áá mesón, nyéwōŋ nlém áte
ábel mam mé mbéb, nyémwágé'áá mīm mékōbē nyé, nyéchagé'áá ngande
échē bad bēmwágé'áá mīm mékōbē bó, bébelé-'ε e'tongé é' mekan, nyé bēnlé-
'ε myób mémpēe, dyaŋ áde déeboo.

4 Bēn ábe nyáábōo nyébeláá nímén mbeltéd mé mbéb bōód, bédé menyáké
bōob ányín nyéesaá ne bó ámpē ábel epuutéd ne e'kúkú é' mekan. Né-'áá ákós
boŋ bésyāá nyé.

⁵ Bon bétýēem á nkáá á'sō é' Dyōb áde ábónséné ákáad moosýāál. Akāād ábe bédé álongé ne ábe bówédé.

⁶ Nén dōo dékāñ bon nkalañ mí bwām ríkanléd kóññ ne wéε bad ábe bówédé, ábel bon kénεε bénkāadtē bó áde bédíí á nkōñsé-te, bówé-'ε ngáne moosýāál áwágkē, bēhēle-se bēbé á alongé ngáne Dyōb ádíí.

Nyébēnlad nde éche Dyōb ábágé nyé bwām

⁷ Asóg dé mekan mésyāál ádé benben. Né-óó nyébwōg yāl nyétéd-te póndé ábel nén nyéhēl akáne.

⁸ Amín e nímén mésyāál, nyédəñ nhóg ne aníníí ne nlém rísyāál. Nyédəñ nhóg ne aníníí, áyāle edəñge ékúdtan mbéb híin.

⁹ Nyékob nhóg ne aníníí nken ésebán nyényonje áte.

¹⁰ Dyōb áwóó nde híin, abagé-'ε mod tée echē nde. Nyébē bambəledε bé bwām nyébēnlad-te échēn nde áwóngeñ nhóg ne aníníí.

¹¹ Ane awé abíε' dýam ahób, ahóbé dó néε nhóg awé akale' e'yale ábē é'bidé wéε Dyōb dēn. Ké nzéε-'ε awé awóngeñ baáb, ábele' nē ne ngine esýāál echē Dyōb ábágé mó. Nē débídéd ehúmé é Dyōb áwed á yāl e mekan mésyāál mbwiined ne Yesu Krístə. Ehúmé ne ngine esýāál bébágnédé mó á ngíndé ne á ngíndé. Ebē nē.

Metake nímē bad bé Krísto békudéε

¹² A-baányañ, nyéebág menyáké ne mekəgsen mé ngine níme mépiide nyé bəəb. Nén déebág nyé nken.

¹³ Nyébē menyínje pen nén, nyékude' metake melemlen ngáne Krístə ákudé'áá, ábel nén nyélōn ne menyínje á póndé echē Dyōb délūmédtē ehúmé éche Krístə.

¹⁴ Nzé bad bésýāá nyé áyāle nyédíí bad ábe bēhíde Krístə, né yāl eboó nyé áte, áyāle ehúmé é Edəádəñ é Dyōb édé ne nyé.

¹⁵ Bon pen nzé nyékude metake éebág nén bán nyékude nímē metake áyāle nyéwúú bad, kéε áyāle nyéchíbé, kéε áyāle nyédíí bad bé ebébtéd, kéε áyāle nyésóléε mam mé bad áte níme méenənē nyé.

¹⁶ Ké né-'ε, nzé nyékudé metake áyāle nyédíí bad ábe bēhíde Krístə, nē déekwəgtē nyé. Nyéságnen Dyōb ságnén nén bán bēchágé nyé bán bad bé Krísto.

¹⁷ Ayāle póndé edé echē Dyōb débootédte bad akáad, ábootéd-te ne ábē bad. Nzé Dyōb áhēle ábootéd-te ne syáné awé dedé bad bé Krísto, chán-nō ébēñnē bad ábe bēebelé' mam ngáne nkalañ mí bwām rí Dyōb ríhēdēε.

¹⁸ Eténlédé-'ε á kálag e Dyōb nén bán,

“Nzé éhēle élenléd kóññne mod awé ábele ngáne Dyōb áhēdēε áte ákud e'soósəñ,
né chán-nō ébēñnē bebel bé mbéb ne bad ábe bēedúbpe Dyōb?”

¹⁹ Né-óó, bad ábe bétage' ngáne Dyōb átíídé, bēbē bébele mekan mé bwām, bēbē-'ε yāl á mekáá mé Dyōb áde áhágé bó, mó awé ábele kéchéé echē áhóbé.

5

Petro alébe bad ábe bélyágte mwembé

¹ Me néε nhóg awé alyágte', ndəá meé mbe bad ábe bélyágte' áfíntē echēn elébé. Ndé nhóg awé ambé metake níme Yesu: ásé. Ehúmé echē Dyōb débēε Krístə épē awēm ámpē. Nlébe' nyé nén meé,

² nyénəne bad ábe Dyōb ábánné ásé echēn melemlen nēñgáne nnən-a-mbód ánənéé éche mbód. Nyénəne bó áyāle nyédáá bó anən. Nyéēnənē bó byánán bényágtē nyé anən bó. Nyébele' nímé nsón saké é etútú é nsýáññ,

boŋ ébê bán nyéwóó nlém ábɛl mós. ³ Nyéékamlán bad ábe bédé ásɛ echên ne ngine. Nyébê bad ábe béhídtɛ mekuu nímáb.

⁴ Ade kân e benân-bé-mbód épɛɛ, ábɛ nyé nsábe níme ríchábé ámín. Mmɛ nsábe mébɛ á ngíndé ne á ngíndé.

⁵ Nyémpɛ ábe nyédé ásɛ e bad ábe bélyágte', nyésuded yál, nyésuded-tɛ yál nzé nyéwôŋgan nhóg ne aníníí. Ayále éténlédé á kálag e Dyób nɛn bán Dyób ákunnan bad ábe bédé kúmbe yál, boŋ abage bad ábe bésúdtɛ yál nsimé.

⁶ Né-óó nyésudɛd yál ásɛ e ngine e Dyób ábɛl boŋ mwɛn ácháged nyé á pónde échɛ ebôŋnéde mós.

⁷ Nyéchene mekan mésyáál níme métagte nyé áwe mekáá, áyále atédé mam níme métagte' nyé nɛɛ níme.

⁸ Nyékób yál, nyétéd-tɛ pónde. Mod a ekoyí awɛn, Satane, ahôŋge néɛ ngii échɛ edume áte, ahɛde mod awɛ ányabɛɛ áte. ⁹ Nyéémwāg-se atóm nyé áte. Adɛn adúbe déesudé'. Nyébíí nɛn bán bad bémpe ábe bédúbpɛ néɛ nyé nkôŋsɛ áte nísyáál bômpɛ békude metake níme nyémpɛ nyékudɛɛ.

¹⁰ Nyékude' metake boŋ níme metake méechabpɛ áte. Ambíd e nɛ, Dyób áde ábage' nsimé nísyáál dɛn débɛ nyé kéchéé éche nyébódé. Abɛl nyésúmɛn, awéd-tɛ nyé áte. Adii Dyób áde nsimé níme níkwógnédé moosyáál, níbɛ-tɛ pónde ésyáál. Mós apwédé nyé ákud éche ehúme échɛ ébɛ á ngíndé ne á ngíndé. Nyéékúd-tɛ chó áyále nyédé ne Krístáa.

¹¹ Ngine esyáál edii échɛ á ngíndé ne á ngíndé. Ebɛ nɛ.

Melɛntɛn mé asóg

¹² Sailase mós awóŋgɛné mɛ átel anɛn mwá kálag. Adii mɛ néɛ mwánned mbánné-tɛ mós nlém á yál. Ntenle nyé enɛn kálag áwéd nyé nlém á abum, áláa-tɛ nyé nɛn méɛ nímén mam níme nítnlé nyé médii nsimé ní Dyób ní mbále. Nyéehúde mekuu áhed.

¹³ Baányon bé mwembé ní Babilon ábe Dyób ápwédé néɛ nyé, bélómmé nyé melɛntɛn. Awem mwán awɛ níkwógtɛ á adúbe-tɛ, Makɔse mómpɛ alómmé nyé melɛntɛn.

¹⁴ Nyéhɛ nhóg ne aníníí tál álúmed edəŋge. Nsaŋ níbɛ ne nyé bad bé Krísto bésyáál.

Kálag eche elónténé ébε eche Petro Ndibned ní kálag

Kálag eche elónténé ébε eche Petro ántenlé, bad bé Krísto bé'só bésyāal bóo ánteléé ch́. Ene pónde bad bébedé ábe béyágté'áá bad ayáged dé metóm. Adé ayáged dé metóm ábélé'áá bad bébelé e'tóngé é' mekan. Né-óó, Petro antél ene kálag álúmed áá míme mekan mééboo'ε. Anlúméd bó áte nén áá béétāngeneé éché ndín é mekan ahíd. Áá dyam áde bétāngéné ábel ádíi, ábíi mbále tāngene mam mé Dyōb ne Sāngú Yesu Krístā ne ádúbe bó ne nlém nhóg. Bad ábe bényinné Yesuε béwóg-ke mekan míme áyágté'áá, bóo bébelé boŋ ábén bad bébíi míme mekan. Atón ahóg áde Petro ánkongé anón áte ábédé tāngene bad behóg ábe bélúmté'áá bán Yesu Krístā éepaá ámpε. Anlúméd bó áte nén áá atoo áde Krístā átongeé ápe, ádíi áyāle Dyōb déehedéé áá modmod ábód alongé, boŋ áhede' áá bad bésyāal bétede ábel dé mbéb, béhíde Krístā.

Nkabted ní kálag

Ndibned ní kálag 1.1-2

Mpwédédé ní mod a Krísto 1.3-21

Bemeléede bé metóm 2.1-22

Epe e asóg eche Krístā 3.1-18

¹ Mε, Simōn Petro, mbāledε ne mbapεε a nlomag awε Yesu Krístā, ntenle nyé bad ábe nyédúbpé Yesu Krístā melemlem ngáne sémpε sédúbpé mó. Yesu Krístā ádíi syāné Dyōb abε-'ε Nsoode. Abelé' mekan míme métāngéné. Mwēn-naá akáá boŋ syāné moosyāal dedúbé mó.

² Nsimé ne nsanŋ ní Dyōb mbád mbé ne nyé abíi áde nyébíi Dyōb, nyébíi-'ε Yesuε, awesyāné Sāngwéé.

*Nyébele' mekan míme mélúmté'
nén bán Dyōb d́o apwédé nyé*

³ Ngíne e Dyōb ebagé syāné mam mésyāal míme déhedéé á alongé, ebélé-'ε syāné debele' ngáne Dyōb áhedéé. Nén ábénlédé áyāle debíi mó. Abénlédé eché ngum ne ábε e'boŋ bé nlém ápwed syāné ábε ábε bad.

⁴ Eche ehúme ne ábε e'boŋ bé nlém é'belé ahóbé áá móóbelé syāné ndāle é mekan é bwám. Abelé mímén mésyāal ábel boŋ nyéesólé' mbéltéd mé mbéb mé nkōŋsé áte. Esíí é mekan mé ekob é yāl ch́oó ébelte' bad éché ndín é mekan. Nzé nē ábénlédé né abé ádēn désāŋ néε abé á Dyōb.

⁵ Né-óó, h́oob áde ádíi nē, nyéwan áte ábel mekan mé bwám. Saá-kaá nē dēmpen. Nyétāngéné awan áte ámpε ábε bad ábe bébenlad debyéé ábel mekan.

⁶ Abád ámín e debyéé, nyébíi ngáne nyékóbeé échen yāl. Saá-kaá akób á yāl dēmpen. Nyébε bad ábe békaa' nlém. Ámín e e'kanŋ bé nlém, abé ádēn átāngéné ábε ngáne abé á bad bé Dyōb átāngéné ábε.

⁷ Saá-kaá ábel mam míme Dyōb áhedéé dēmpen. Edāŋge ébε áftínté echēn nyé Bad bé Krísto. Saá-kaá edāŋge áftínté e nyé Bad bé Krísto bēnpen, boŋ nyédāŋ moosyāal.

⁸ Nzé ádε abé ákwoge-'ε nyé áte, né debyéé áde nyéwóo tāngene Sáá awêd, Yesu Krístā, déebáá ngēn, boŋ débēl nyéchyáá' e'pum.

⁹ Boŋ kénzéé awé ádε abé déesaá áte, adé nēngáne mod awé eéchébε' anyínen, ké'ε awé akwedé ndím. Acháténé-'ε áá Dyōb áwóbpé mó, álagsén-ne mó mbéb.

¹⁰ Né-ɔ́, a-baányan nyénabe awan áte álúmed nén bán Dyöb dɔ́o áchénlé nyé, ápwéd-te nyé ábè ábè bad. Nhóbe nén áyále nzé nyébelé nê, né nyéhúnné á mbéb-te mbéd.

¹¹ Nén débèl-le Dyöb débè nyé kunze esyáál ásól ne ábè á nkamlen nímín wée Sáa ne Nsoode awéd, Yesu Krístə́ ákamlané nées kàñ á ngíndé ne á ngíndé.

¹² Né-ɔ́, ké nées nyémáá nímén mekan mésyáál abíi bon nyédúbé-'e mbále eché edé awéd-te, mǎbè níkamtén nyé mó.

¹³ Nnyiné-'e nén mée, bɔɔb áde rídii ndé á alongé, éhɛdnad nén bán níkamtan nyé nímén mekan pónde téé ábel bon nyékwandé.

¹⁴ Mbíi mée nkwogé nímén nkòñsə́ atede. Sǎngwée awéd, Yesu Krístə́ abelé mbíi nê.

¹⁵ Nwane-'e áte áláa nyé nímé mekan ábel bon ké nwé ké wéén, nyéhel mó akamten pónde téé.

Mbónj edé éche ényínné ehúmé éche Yesu díd

¹⁶ Saké póle éche bad bèn bənábpé sékánlé'áá nyé áde sénhɔ́bpé bán Yesu Krístə́ ápè ámpè ne ngum. Sébèn sényínné éche ehúmé díd.

¹⁷ Sébédé áhed áde Dyöb Títée ábáge mó edúbé ne ehúmé. Ehób émbid ámín éche Dyöb á Ngum álǎngéé mó áá, "Awem mwǎn a nlém mó nén, mó awógte' me menyinge."

¹⁸ Sébèn sénwóg éché ehób áde syáábɔ́o débédé á mbɔɔd eché esáá.

¹⁹ Né-ɔ́ syánè dekoó adúbe nén bán e'yale ábè bekal-bé-e'də́ádəñ bə́nhɔ́bpé é'dé mbále. Ebon nén bán nyétón bó awóglen. E'dii nées etrukánj éche échodne' á ehínten-té kááj né Epun épédé éché bín bésáá' é bon Krístə́, tintine a mbwə́mbwə́, ápen nyé á nlém-té.

²⁰ Amín e nímén mésyáál, nyétǎngéné asón̄ten nén bán modmod eéheléé-sé ábenléd áde debyéé átóge mekan níme bekal-bé-e'də́ádəñ bə́nhɔ́bpé ngáne éténlédé á kálag e Dyöb.

²¹ E'yale ábe bekal-bé-e'də́ádəñ bə́nhɔ́bpé bə́nkə́mbáá á ntii ní moonyon, bon Edə́ádəñ éche Esáá chíó élyágté'áá bad ábe bə́nhɔ́b ábè e'yale. Ábè e'yale bə́nhúu ne Dyöb.

2

Bemeléede bé metóm ne ebébtéd éche békudté

¹ Se' bɔ́od bekal-bé-e'də́ádəñ bé metóm bə́mbid átínté e bad. Melemlem nê dɔ́o bemeléede bé metóm bə́bidtə́ átínté echén. Bə́benléd mwane ápen ayáge dé metóm. Adé ayáge débèbéd bad ábe bédúbé dɔ́. Ábè bemeléede bé metóm bə́bǎñ Sǎngwée awé ahúdé bó á mbéb-te á yál. Nén dékǎñ bèn bə́wǎmsən yál ebébtéd akude.

² Bad híin bə́híd écháb mbinde é mekan. Mbéltéd níme ábè bad mébèl bad bə́mpée bə́hɔ́bə́' mam mé mbéñ tǎngene Nzii e mbále.

³ Adəñ á chíom áde ábè bemeléede bé metóm débèl bə́kanlé nyé póle éche bèn bənábpé ábel bə́kobən nyé bwəm. Dyöb də́mmád mbakú abided se' bɔ́od áá mɔ́kɔ́gsən bó. Mmè nkógsen nisine-'e bó. Eché ebébtéd éde-'e bó á nzii.

⁴ Dyöb dénkénchenéé ángel éche émbèl mbéb, bon ambwém bó á ehýanj é muú, áhed-taá bédíi á mehanj é ehínten-té, bésine' Epun é nkáásé.

⁵ Dyöb dénkénlǎgsən-naa bad bé' bɔ́od. Ambèl mbúú enchó kááj mendíb ménlone, méhóod bad bésyáál ábe bə́nkénwónj abé á bad bé Dyöb. Noa awé álǎngé'áá bad áá bə́bele' mekan níme mé-tǎngéné mwə́mpən-éé Dyöb dənsongé alongé, nchoo ne bad saámbé bə́mpée.

6 Ambíd e nê, Dyöb dénkögsën myad mé Sodom ne Gomora. Anhyáád mó métim mbúmbú, álúmed chöm éche ébenléd ne bad ábe béewóo abé á bad bé Dyöb.

7 Dyöb dénkögsën nímé myad boŋ ansöŋ alongé áde Lote, áyāle Lote abédée mod a bwām awē enkëndāŋ mbinde é mbeltéd éche abé bad bé mbéb bébélé'áá.

8 Ane mod a bwām adyē'áá hōm ahóg ne abê bad bé mbéb. Epun ne epun téé anyíné'áá, áwōgē-ε e' bēbtéd é' mekan ábe abé bad bébélé'áá ne ábe béhóbé'áá. Mmē mekan mébēbté'áá mó nlém á abum áyāle abédée mod a bwām.

9 Né-óó, Sāngwée ábíí ngáne áhúdeé bad ábe béwóo abé á bad bé Dyöb á mekōgsen-tē. Boŋ ábē akōgsén bad bé mbéb kóāŋ ne é Epun éche ákáādtē bad bésyāāl.

10 Abē akōgsén bad, tanŋe bad ábe békódtē esíí é mekan mé ekob é yāl, ábe béekobé'-ε nkamlēn.

Abé bemeléede bé metóm bédé kúmbe, bēbē'-ε epame. Béebagé-'áá ngume éche édé ámín edúbé ké ehóg. Bésyāá' éché ngume kóāŋne syāān ésebán béwōge' mbwóg ké nhóg.

11 Ké ángel éche éwóo ngine ébē'-ε ngum tómaa abê bemeléede bé metóm, éehābēé éché ngume éche édé ámín mekan mé mbéb áyāl á'sō wēε Sāngwēé mbéd.

12 Boŋ abé bemeléede bé metóm bēbele' mekan néε nyam é mehín. Echyáádtē-ε ábel békób chō béwúu. Bēbele' kéchéé éche epíídé bō á nlém-tē. Abé bemeléede bé metóm béhóbe' dyaŋ téé áde béesōŋtēné mam mé mbéb á yāl. Né-óó, Dyöb débōdēd bō melemlēn nēŋgáne bad béwúé' é éché nyam.

13 Dyöb débēl bétag bwāmbwam áyāle bétágté bad bēmpēe. Bédāá' échāb esíí é ekob é yāl akóded. Béekwágé-'áá ábel nē ké mūte. Béwōge' bwām ábel éché ndín é mekan áde bēdyákgē ndyēéd hōm ahóg ne nyé. Né-óó, bēbēbte nyé dīn, bēpiinaád-te nyé akwákgē.

14 Nsón nímāb nīsyāāl nídii ákáb mesón ne kēnzéé awē bēnyíné. Echab esíí ábel mbéb éemaá' é mbéd. Bédoge' bad ábe adúbe déewúu' é áte, bēhūnte' bō á mbéb-te. Ngoód edé bō á mekiŋ-te bwāmbwam. Bédii bad ábe Dyöb ábágé ebómán.

15 Bétédte nzii échē etāŋgéné, bēhídē' nzii empée. Bēhíde' mbeltéd nīme Balame, * mwān awē Beo. Balame andāŋ mōné nīme bēsābēé mó ábel mbéb.

16 Boŋ Dyöb dēmbēl esel éche Balame énhōb wēε Balame. Esel, nyam échē eehóbé' akan, énhōb wēε Balame ne ehōb é moonyōŋ, ékáné mó áte. Nēn dēmbēl nímé mbeltéd mé mpēmíne nīme ane nkal é' dāōdāŋ Balame ménsōg.

17 Abén bad bēdii néε n'yélé nímé nīléné. Bēdii néε mbembag éche epub ékeeneé. Ndib e ehíntén échē Dyöb ábánnédé bō esine bō.

18 Bébóó' nsāl áte ngēn. Bēbenlad esíí é ekob é yāl átéd bad nlém á abum. Bad ábe bétédéé nlém á abum bēdii bad ábe bēbóótédé mekuu ahúd á echoŋ é bad bé mbéb.

19 Bēlāŋge' bad bán nzé bēhídé ádab ayáge né bēebáá á mehaŋ-tē, né bēhele' bēbel kéchéé éche bédás, áde édíí nēn bán mbéb ríháá bēn. Mbéb ríháá bēn áyāle nēn dyaŋ ké áhéé áde ákamlan mod, ane mod ábelé abé ntāŋ ášē e ádé dyaŋ.

20 Nzé mod adúbpé Sāngú Yesu Krīstāá, Nsoode, né amaá alongé dé mbéb dé nkōŋsé ahíde áte. Nzé amaá-ε dō ahíde áte boŋ átímé ámbíd áwēd-te ámpē,

* **2:15 Balame:** Balame ambé nyōŋgé bwāmbwam ákud nsábe nīme kāŋ Balage ášābēé mó nyaa échē ambēé mboŋsén ké ábel bad bé Israel mbéb. Nēn ádé á kálag e (Nōm 22.4-35).

ádé alongé átédé-'ε mós ntān, né nyaa eché ádíí bōob edé mbéb tómaa ngáne ansēbēē abé.

²¹ Né émbē mboŋ nzé bēnkētogén nzii e mbále abii tómaa ámad chó abii boŋ bétimé' bebāā' mbéndé é Dyōb éche esáá á yāl. Alyágned dōo bēnyágnēdtē bō éché mbéndé.

²² Nén ábele' ngan eche békálé nén bán, "Mbówé edyág ábē e'chó," ne eche békálé nén bán, "Ké chán bēnwōgēdtē nguu mendíb eéchatánné elōob," édé mbále.

3

Epun échē Sāŋgwéé ápéé ámpē

¹ A-baányan, enén kálag chó elónténé kálag ébe eche rítenléé nyé. Átínté échē kálag, nkámtné nyé mam níme nyémáá abii ábel boŋ nzé nyéwēmténé mekan níme rítélé, méwōŋgan nyé áwōŋ mewēmtēn níme métāŋgéné.

² Nhede méé nyékamten mekan níme bekal bé' dāóđəŋ bé Dyōb bēnhōbpē se' bōód bán mébenléd. Nyékamten-ne chōm-éé Sāŋgwéé, Nsoode awēd ánlāā' é bembapēé bé nlómag aá béléa nyé.

³ Dyam dé'só, nyétāŋgéné asōŋten nén bán á e'pun bé asóg, donge á bad débid ábe esíí é mekan mé ekob é yāl ékamlanne áđáb alongé. Bēwélé nyé,

⁴ bēhōbē bánken, "Anhób aá mōópē ámpē, hēé-ō ádíí bōob? Abēd besáá bēwéde bōob échábé áte, boŋ káāŋne' bōob mam médíi méde melemlem ngáne mémbeē se á mbooted mé nkōŋsé."

⁵ Bēn békoo' ahúd á mewēmtēn nén bán Dyōb dēmbenléd échē eyale é nsāl áhag nkoŋ ní mīn ne rí sé. Ambēl nkōŋsé níbid á mendíb-te, ambenléd-te mendíb áde áhágé nkōŋsé.

⁶ Mendíb mwēn-naá ámbenlédte ábébed nkōŋsé mé' bōód. Anlóm mbúú. Ene mbúú enchó káāŋ mendíb melóné nkōŋsé áte nisyāāl, chōm ésyāāl éhó.

⁷ Melemlem mé eyale níme Dyōb dēmbenlédte áhag nkoŋ ní mīn ne rí sé, mōó ábénlédé ákəə mós ábel boŋ ábébed mós ne muú. Asinne' nkoŋ ní mīn ne rí sé mé' chii epun é nkáásé. Echē epun dōo ábōđēdtē bad ábe bēéwōo abé á bad bé Dyōb.

⁸ Boŋ a-baányan, nyééchatán dyam ahóg. Nyééchatán nén bán ne Sāŋgwéé, nhəŋlén méesaá átínté e epun ehóg ne ekálé é mwě.

⁹ Sāŋgwéé eétoŋgéé álóned áde akag. Donge á bad bēwēmtan pen bán atonge'. Boŋ awēséné nyé áyale eéhēdēē aá modmod ábōd alongé. Ahede' aá bad bésyāāl békuned mbíd bētede abel dé mbéb.

¹⁰ Boŋ epun éche Sāŋgwéé ápéé, ápē taléd, melemlem nēŋgáne nchíb ápagké. Echē epun, abobe dényōŋ ne esaád é ngíne, chōm ésyāāl éche édé ádyōb éhyāŋ, ényōŋ-'ε. Nkōŋsé ne chōm ésyāāl éche édé áwēd-te éhyāŋ, ényōŋ-'ε.

¹¹ Ngáne édíí bán chōm ésyāāl étāŋgéné anyōŋ, nyaa é bad éhēé-ō nyétāŋgéné abé? Abé áđēn átāŋgéné asāŋ, nyéwōŋ-'ε abé á bad bé Dyōb.

¹² Nyéwále áđēn abé ngáne nyésinéé epun éche Dyōb átíidé aá Krístəə ápē. Nyéwan-ne áte ábel éwāmsen ape. Echē epun muú méhyāād abobe ámīn, muú ményāmēd chōm ésyāāl-le éche édé áwedé-mīn.

¹³ Boŋ desiné' akag áde Dyōb ábágé syáné aá mōóđēl abobe dékōōlē ne nkōŋsé mé ékōōlē. Bad bésyāāl ábe bēbē á nkōŋsé mékōōlē bēbēlé' mekan níme rítāŋgéné.

¹⁴ Né-ōó, a-baányan bōob áde nyésinéé échē Epun, nyébel ngáne Dyōb dényōŋné nyé néé bad ábe bésáá, nyébel-le ngáne ééhōbpē aá nyébele mekan mé mbéb. Nyébé-'ε nsāŋ ne mós.

¹⁵ Nyébii nén bán atoo áde Sǎngwéé awêd átonǵéé ápe, ádíi ábel boŋ ábe bad pónde ákud e'soóson. Nén dǎo Paale ámpé ámbenlédté debyéé áde Dyǒb ábágé mǎ, átele nyé kálag.

¹⁶ Atelé ádén atón á kálag échē ésyāāl. Donǵe a mekan áde áwe kálag-tē áde álélé asǒŋten. Echē ndín é mekan chǎo bad ábe béewóo nsǒŋten, ábe adúbe-ε déetyéeméé béhǎŋlanné nsǒŋten míme rídé áwêd-te nyaa echē eetǎŋene. Melemlem nê dǎo béhǎŋlanné e'ped bémpēe á kálag e Dyǒb-te. Abel áde bébele'-áa nê dékǎŋ bébód ádāb alongé.

¹⁷ Boŋ a-baányan, nyé pen nyémaá mímén mekan abii. Né-ǎǎ, nyétéd pónde ábel boŋ bad ábe béehíde' mbéndé é Dyǒb, béehüntē nyé ne mewusé míme býyǎgtéé nyé. Nzé nyéhíde mímāb mewusé, né adúbe ádén déetyéémmé.

¹⁸ Boŋ pen nyébê nyéwǒŋ abé áde Sǎngwéé, Nsoode awêd, Yesue Krístā, ábadē nyé mímē nsimé abe. Edúbé ébê ne mó bootya bǎǎb ne á ngíndé. Ebê nê.

Kálag e'só eche Jone Ndibned n kálag

Metote méde mébe nime mékáá bon Jone átēl kálag e e'só. Atote dé e'só ádíi áwéd bad ábe átēnlé chó nlém á abum ábel bebē mod nhóg ne Dyōb ne awe Mwān, Yesu Krístā.

Metote nime mélonténé mébe médii, Jone alánge bad ábe átēnlé chó áá betéd pónde ne ayáge dé metóm ayāle débēbēd abé áde bédíi mod nhóg ne Dyōb ne Yesu Krístā. Adé ayáge dé metóm áhóbe nén bán ebébtéd épag ne abé áde moonyon ábágkē á nkōnsé tē, bán né-ṣó, Yesue, Mwān a Dyōb eéhele'áa-se ákōn moonyon abé. Abé bemeléede bé metóm béhóbe nén bán nzé mod ákūd e'sóson, atāngéné nēe ábáá mekan mé nkōnsé á yāl. Bényágte ámpē nén bán e'sóson béewóó'ē dyamdyam ábel ne abé á bwám ne áwón edānge ne nhóg ne aníníi.

Alúmed áá áde ayáge déetāngeneé Jone alúmté á kálag tē wén áá Yesue ankōn moonyon abé akoó'-ē alúmed áte nén áá bad ábe bédúbpé Yesue bon bédān'-ē Dyōb betāngéné nēe bédáá nhóg ne aníníi.

Nkabtéd n kálag

Ndibned 1.1-4

E'nyinen bé ekide ne ehintén 1.5-2.29

Bán bé Dyōb ne bán bé Satane 3.1-24

Mbáale ne awusé 4.1-6

Chóm éche edānge édíi 4.7-21

Adúbe áde átómé mekan mésyāal áte 5.1-21

Eyale é alongé

¹ Ntenle' nyé tāngene ane awē adé Eyale é Dyōb éche épeene' alongé. Abédé se á mbooted, sēnwóg mam tāngene mó, sēnnyínén mó mīd, sēmbán mó díd ayāl, sēmbán-ne mó ekáá á yāl.

² Mó awē apēene' alongé antīm moonyon awē bényinneé díd, dennyin-ne mó. Sēbide' mó mbón, sēlāngē'-ē nyé mam tāngene mó awē abage' alongé áde déemaá', mó awē ambé ne Titēe, bon átlm abyéén ántinté echéd.

³ Chóm éche sényiné, éche séwógé'-ē, chóo sēlāngéé nyé, ábel bon nyébē nlatén ne sé. Mmēd nlatén-ne rídii nlatén nime déwóó ne Titēe ne awe Mwān Yesu Krístā.

⁴ Sételé enén kálag, ábel bon nīmēd menyiinge mélōn mbon.

Alongé á bad ábe bédé á e'nyinen bé ekide

⁵ Bōob-ṣó, póle eché séwógé á nsāl wēe Yesu Krístā bon sēlāngē'-ē nyé edii nén, Dyōb ádíi e'nyinen bé ekide. Atón dé mbéb ké ahóg déesaá mó á yāl.

⁶ Nzé dehóbé bán dedé nlatén ne mó áde alongé ádēd ádíi ádíi alongé dé ehintén, né dekae metóm né nime syānē mbeltéd-te méēhidēē mbáale.

⁷ Bon nzé dewóó alongé dé e'nyinen bé ekide ngáne Mwēn-ne ámpē áwóó, né syānē déēbē nlatén ne nhóg ne aníníi, mekií nime Yesue awe Mwān, mó'-ē méwobé nimesyānē mbéb nsyāal.

⁸ Nzé dehóbé bán deewóó'ē atón dé mbéb ké ahóg á yāl, né dedoge' échēd yāl, né mbáale'-ē eesaá syānē áte.

⁹ Nzé depanle' nimesyānē mbéb áte, né ábēl ngáne áhóbé, ábēl-le chó nyaa eché etāngéné. Alagsén syānē mbéb, áwōbē'-ē nimesyānē mbéb nsyāal.

¹⁰ Nzé dehóbbé bán deébeléé mbéb, né dehóbbé bán Dyöb ádíi nkal a metóm, né eyale é Dyöb éesaá-'áa syánē áte.

2

Jone ad Krístaa mó adé awesyánē Nwōngene

¹ Nyé ábe nyédé nēngáne ábēm bán, ntenle nyé enén kálag, ábel bon nyéebēlé mbéb. Bon nzé mod abelé mbéb, syánē dewóó mod awé abele' mekan níme métāngēné, Yesu Krístaa. Mó achāngē' syánē Titée.

² Krístaa mwēn-éé ambé nēngáne nde echē Dyöb dēmbenlédte ákode syánē áyāl e mbéb níme dēmbenlé. Ambel nē ábel dékud alagsen. Saá-kaá mbéb nimesyánē mēmpen, bon mbéb níme bad bé nkōjsé bésyāāl.

³ Nzé dehíde' mbéndé é Dyöb né édé mbáale bán debíí mó.

⁴ Kénzée awé ahóbbé áa móbbí mó, bon eehídé' éche mbéndé, né ene ndín e mod adíi nkal a metóm, né mbáale ké póg éesaá-'áa mó áte.

⁵ Bon kénzée awé abele' ngáne eyale é Dyöb éhóbbéé, edāngē éche ene ndín e mod ádáá Dyöb élónē' mbon. Nēn dōó abele' bon debíí ne mbáale bán dedé ne Dyöb.

⁶ Kénzée awé ahóbbé áa módē ne Dyöb, áde alongé átāngēné abé nēngáne alongé áde Yesu Krístaa.

Mbéndé e ekóólé

⁷ A-baányan bé edāngē, enén mbéndé echē rítenléé nyé éesaá mbéndé e ekóólé, edíi mbéndé e nchun echē nyénwōngē se á mbooted. Enén mbéndé e nchun edíi nkalan ní bwām níme nyémáá awóg.

⁸ Bon kénē, mbéndé e ekóólé chōó rítenléé nyé bōob, mbáale echē edé-'e á mbéndé-te wē, enyínnédé á alongé áde Krístaa, enyínnéd-te á alongé ádēn, áyāle nēn ehíntēn ébóótédé amaa, e'nyínen bé ekíde é' mbáale é'máá abooted dé apen.

⁹ Kénzée awé ahóbbé áa módē á e'nyínen bé ekíde bon ákōō mwānyan, ene ndín e mod adíi adé á ehíntēn-tē.

¹⁰ Kénzée awé adáá mwānyan adé á e'nyínen bé ekíde-tē. Né-ōó, ene ndín e mod éebēléé dyamdyam áde ábelte' bad bēmpēe mbéb.

¹¹ Bon kénzée awé akōó mwānyan, awóó alongé dé ehíntēn. Ene ndín e mod akag á ehíntēn-tē eebýéé-'áa wēe ákagké áyāle ehíntēn ébélé adé néē mod awé akwedé ndím.

¹² Nyé ábe nyédé nēngáne ábēm bán, ntenle nyé áyāle Dyöb álāgséné nyé mbéb á díi áde Yesu Krístaa.

¹³ A-besán, ntenle nyé áyāle nyébíí ane awé adé se á mbooted. A-kódebad, ntenle nyé, áyāle nyétómé ane awé adé ebébtéd áte.

¹⁴ A-bānbān, ntenle' nyé áyāle nyébíí Titée. A-besán, ntenle nyé, áyāle nyébíí ane awé adé se á mbooted. A-kódebad ntenle nyé, áyāle nyéwúú áte, eyale é Dyöb édé nyé áte nyétómé-'e ane awe adé ebébtéd áte.

¹⁵ Nyéédāā' nkōjsé ké'ε bwēm ábe é'dé áwēd-te. Nzé mod adáá nkōjsé, né eédāā' é Titée.

¹⁶ Bwēm é'syāāl ábe é'dé á nkōjsé te, nédē bwēm ábe moonyon a ekob áwóó'ε esíí áte, bwēm ábe mīd mēdāā' é anyín ne bwēm ábe bad békumneé ekáá á tāl, béehúu'ε ne Titée, é díi bwēm bé nkōjsé.

¹⁷ Nkōjsé ne ábe bwēm é'syāāl ábe baānyon bēwóó'ε esíí áte áyāl echáb, rítome tómén, bon mod awé abele' ngáne Dyöb áhēdeé, abāg ne Dyöb á ngíndé ne á ngíndé.

*Jone aá nyétèd pónde
ne bad ábe bétəŋgan Krístə*

18 A-bānbān, asóg ákwógé ape. Bénlāā nyé bán Mod a Ekoyí awě Krístəə ápě, bəəb-pe bad bé ekoyí hiin ábe Krístəə bəməáá ape. Né-óó, debíi bán asóg ákwógé ape.

19 Abé bad bėnkėnkongé bad abé ábe bédé nimesyānē nlatén, né-'aá dėnkəŋ boŋ bétədē syānē. Nzé bėmbē bad ábe bédé áwesyānē nlatén, né bėmbē bėbē ne syānē, boŋ bėnchené syānē ábel boŋ ényínned ne mbále nēn bán bėnkėnkongé abé ne syānē.

20 Boŋ ne nyé, Ane-awě-Béwógté abagé nyé Edəádəŋ éche Esáá. Né-óó, nyé moosyəəl nyébíi mbále.

21 Meətėnlē nyé enén kálag áyāle nyéebíi' é mbále, boŋ ntenle' nyé chó áyāle nyébíi mbále, nyébíi-' é nēn bán metóm ké mehóg méebídēē á mbále-té.

22 Nzéé-' 5 adé nkal a metóm? Nkal a metóm adii kėnzéé awě ahóbé aá, Yesue eesáá Ane awě Dyöb Awógté. Ene ndin e mod chó edé Mod a Ekoyí awe Krístəə, abáa' Titée á yəl, ábāā-' é Mwān.

23 Mod éehēlē-se abāŋ Mwān a Dyöb á yəl se abé ne Titée. Kėnzéé awe akobé Mwān a Dyöb, akobé káəŋne Titée.

24 Nyényin nēn bán nkalaŋ nime nyéwógé se á mbooted rídé nyé áte. Nzé nkalaŋ nime nyéwógé, rídii rídé nyé áte, né nyémpē nyéēbē ne Mwān a Dyöb nyébē-' é ne Titée.

25 Chöm éche Krístəə ahóbé aá móəbē syānē édii alongé áde déemaá'.

26 Ntenle nyé nímén mam áyāle bad bédé ábe bēhede nyé adog.

27 Boŋ ne nyé, Krístəə abagé nyé Edəádəŋ éche Esáá. Abé áde échē Edəádəŋ édii nyé áte, nyéetógnēné modmod áyáged nyé. Echē edəádəŋ éyágte nyé mam mésyəəl, mam nime éyágte-' áa nyé médé mbále, méesaá metóm. Né-óó, nyébē nyébē ne Krístəə ngáne Edəádəŋ éche Esáá éyágte nyé.

28 Bəəb-óó, a-bānbān, nyébē mod nhóg ne mó, ábel boŋ epun éche ápéé, nlém níwúu syānē á abum, deewógé-' é e'son átyéem mó á'só.

29 Nyébíi bán Krístəə abele mekan nime métəŋgéné á'só é' Dyöb, né-óó, nyébíi bán kėnzéé awě abele' mekan nime métəŋgéné, adii mwān a Dyöb.

3

*Jone ahóbé ngáne alongé
áde bán bé Dyöb átəŋgéné abé*

1 Nyényin ndin e edəŋge echē Titée ádáá syānē. Echē edəŋge échábé ámin káəŋ bēchəge syānē bán bán bé Dyöb, bēn-naá dėkóó abé. Nzəm echē ekəá boŋ bad bé nkóŋsē bēebii syānē edii áyāle bēesebpeé Titée abii.

2 A-baányan bé edəŋge, syānē dedii bán bé Dyöb bəəb. Eēbyēēnēē bwām pēn chöm-éé syānē dēbēē. Boŋ debíi bán pónde echē Krístəə ápéé, syānē dēēbē nēŋgáne mó, áyāle nēn dēenyin mó ngáne ádii.

3 Kėnzéé awě asumé nlém wée Krístəə átəŋgéné nēe asəŋtē eche yəl ngáne Krístəə mwēn ámpē ásáá.

4 Kėnzéé awě abelé mbéb, akwedé nkáá áyāle abóó mbéndé e Dyöb. Mbéb rídii abóó á mbéndé e Dyöb.

5 Nyébíi bán epe éche Krístəə ámpéé á nkóŋsē ébédéé ámad mbéb. Krístəə mwēn-ne eewóó' é mbéb ké nhóg á yəl.

6 Kėnzéé awě adé ne Krístəə éēbēlēē mbéb. Kėnzéé awě abele mbéb, eenyinēé Krístəə eebii-' áa mó.

7 A-bānbān, nyéemwāg se mod ádog nyé. Kénzéé awě abele mekan níme métāngéné adii mod awě abele mekan níme métāngéné á'sō é' Dyōb, ngáne Krīstā abelēé mekan níme métāngéné.

8 Kénzéé awě abele mbéb, adii mwān awě Devəle áyāle Devəle ambootéd mbéb abel sé á mbooted. Nzom echē enkāḡ boḡ Mwān a Dyōb āpē á nkōḡsé, ebédēē ābēbed nsón níme Devəle ābélé.

9 Kénzéé awě adé mwān a Dyōb, éebēlēē mbéb, áyāle abé á Dyōb adé mós áte, éehēlēē-ε-se ābélé mbéb áyāle Dyōb dōo adé mós Sāá.

10 Chōm éche ékoo' syānē alúmed bad ābe bédé bān bé Dyōb ne ābe bédé bān bé Satan édii nēn bān, bad ābe bēebēlé' mam níme métāngéné ne bad ābe bēedəə baányan bé Krīsto, béesaá bān bé Dyōb.

Jone ad bad bédəḡ nhóg ne anínii

11 Nkalaḡ nī bwām níme nyénwōgkē se á mbooted nībédēē nēn bān, dédəḡ nhóg ne anínii.

12 Deebāg nēē Keene. Keene abédēē mod awě Satane, anwúú-ε mwānyan. Cheé ēnkāḡ boḡ Keene awúú mwānyan? Anwúú mós áyāle mekan níme mwān ābélé'áá mébédé mam mé mbéb boḡ níme mwānyan méntāngēn á'sō é' Dyōb.

13 Né-óó, a-baányan, nyéebāg menyáké ngáne bad bé nkōḡsé békóó nyé.

14 Dedəə bānned bé Krīsto bémpēē, nē dōo ābélé boḡ debíi bān dehídté ásé e ngíne e kwééd dekudé alongé áde déemaá'. Kénzéé awě eédəə bānned bé Krīsto bémpēē, alyāgé adé ásé e ngíne e kwééd.

15 Kénzéé awě akóó mwānyan a Krīsto, adii mod a ewúen, nyēbíi-ε nēn bān alongé áde déemaá' déesaá mod a ewúen ké nhóg áte.

16 Krīstā ambē áde alongé á nló nímēd. Nēn dōo ābélé boḡ debíi chōm éche edəḡge édii. Né-óó, syānē āmpē detāngéné nēē débāgé ádēd alongé á nló níme bānned bé Krīsto bémpēē.

17 Nzé mod adé awě adé nhon, boḡ anyíné mwānyan awě atóge' boḡ eewóo nlém nī bwām áwōḡgen mós, chán áhēlese ahób áá módəə Dyōb?

18 A-bānbān, edəḡge éche déwānléné nhóg ne anínii, éetāngēné abé dāsō á nsəl-tē ne á póle boḡ étāngéné abé á mbeltéd ne á mbále-tē.

Jone dhóbé chōm éche ébele' boḡ deewógé mbwóg á'sō é' Dyōb

19 Nzé delúmté nhóg ne anínii edəḡge, né debíi bān dedé bad bé mbále ne debíi-ε bān nlém méwūú syānē á abum á'sō e' Dyōb.

20 Pōndé ké ehéé echē mímēd mewēmtēn mélāngé syānē bān debélé mbéb, debíi bān Dyōb ābíi mam mésyāal tómaa ngáne syānē débii.

21 A-baányan bé edəḡge, nzé nimesyānē mewēmtēn méēlāngē syānē bān dedii bebel bé mbéb, deewógéé mbwóg ké nhóg nzé dekanne' á'sō é' Dyōb.

22 Dekude kéchéé éche désédté mós áyāle dehíde' éche mbéndé débélé-ε mam níme méwógte mós menyīnge.

23 Mbéndé echē ābāgé, edii nēn, dédúbe á dīn áde awe Mwān Yesu Krīstā, dédəḡ-ε nhóg ne anínii. Melemlēm mé mbéndé mōo Krīstā mómpē āmbēé syānē.

24 Kénzéé-ε awě ahíde' mbéndé é Dyōb, abāg mod nhóg ne Dyōb, Dyōb-pe ābē mod nhóg ne mós. Nēn dō-áá débéléé boḡ debíi bān Dyōb adé ne syānē. Debíi āned áyāle Edəədəḡ éche ābāgé syānē.

4

*Jone ahóbe aá bad bétéd
póndé ne e' daádəŋ bé metóm*

¹ A-baányan bé eɗəŋge, nyéedúbpé bad bésyāāl ábe béhóbe' bán bəwóó Edəádəŋ é Dyób. Boŋ peŋ, nyékəg bós ábii nzé edəádəŋ éche édé bós áte éhúú ne Dyób. Nyékəg bós áyāle ekud é bekal bé'daádəŋ bé metóm bépédé á nkòŋsé-te.

² Chòm éche wébēnlé boŋ ebii mod awé Edəádəŋ é Dyób édíí áte édíí; kénzée awé ahóbe aá Yesu Krístəə apedé á nkòŋsé néé moonyon, né ane mod awóó Edəádəŋ é Dyób.

³ Boŋ kénzée awé ahóbe aá Yesu e eépedeé á nkòŋsé néé moonyon, eewóó' é Edəádəŋ é Dyób áte. Edəádəŋ éche ene ndin e mod áwóó áte édíí edəádəŋ éche éhúú ne Mod a Ebébtéd. Nyēnwóg bán échén edəádəŋ épé, bəəb-pe émaá ape á nkòŋsé-te.

⁴ A-bānbān nyédii bad bé Dyób, nyétómé-'é abé bekal bé'daádəŋ bé metóm áte, áyāle Edəádəŋ éche édé nyé áte édé ngine tómaa Satan e awé akamlan bad bé nkòŋsé.

⁵ Abé bekal bé'daádəŋ bé metóm bédii bad bé nkòŋsé, né-óó, mekan nime béhóbeé médii mekan mé nkòŋsé, bad bé nkòŋsé-'é bəwóglan bós.

⁶ Syānē dedii bad bé Dyób. Kénzée awé abii Dyób awóglan syānē, kénzée-'é awé eése mod a Dyób, eewóglanné syānē. Né-óó, nēn dós mod áhele abii nhəŋlən áfinté e Edəádəŋ é mbále ne edəádəŋ é metóm.

Jone aá Dyób ádás syānē

⁷ A-baányan bé eɗəŋge, dédəŋ nhóg ne aníní áyāle nēn eɗəŋge éhúú ne Dyób. Kénzée-'é awé adəə mwānyan a Krísto adíí mwān a Dyób, abii-'é Dyób.

⁸ Kénzée awé eédəə baányan bé Krísto, eebii' é Dyób, áyāle kéchéé éche Dyób ábeleé éluimte' eɗəŋge éche áwóŋné bad.

⁹ Dyób áluimte syānē eɗəŋge ne nēn, alómé nímé mpom mí Mwān á nkòŋsé-te ábel boŋ dékud alongé áde déemaá' mbwiined ne mós.

¹⁰ Chòm éche édé eɗəŋge édíí nēn, saké bán syānē dedəə Dyób, boŋ nēn Dyób ádás syānē, anlóm-me awe Mwān ákəde syānē áyāl e mbéb nime débélé.

¹¹ A-baányan bé eɗəŋge, ngáne édíí bán Dyób átómténé syānē adəŋ, syānē ámpē detəŋgéné dédəŋ nhóg ne aníní.

¹² Mod eényinēē Dyób mbéd. Nzé dedəə nhóg ne aníní, né Dyób débē ne syānē, éché eɗəŋge-'é éche ádás syānē élon mbon.

¹³ Nēn dós-'aá débēl boŋ debii bán syānē dedé ne Dyób, Dyób-pe áde ne syānē, áyāle abage syānē éché Edəádəŋ.

¹⁴ Syānē denyiné, deləŋge-'é bad bəmpēe nēn bán Titée alómé awe Mwān ábe Nsoode a nkòŋsé.

¹⁵ Bad ábe béhóbe' bán Yesu e adíí Mwān a Dyób, Dyób áde ne bós, bós-'é bédé ne Dyób.

¹⁶ Né-óó, syānē debii, dedúbpé-'é eɗəŋge éche Dyób ádás syānē.

Kéchéé éche Dyób ábeleé éluimte eɗəŋge éche áwóŋné bad, bad-te ábe eɗəŋge édíí áte, bédé ne Dyób. Dyób-pe áde ne bós.

¹⁷ Eɗəŋge éche édé syānē áte, éloné mbon ne nēn, nlém mēwūū syānē áte á mbwe mé nkáásé, áyāle nēn dedé mod nhóg ne Dyób á nkòŋsé-te hēn melemlem ngáne Krístəə ámbēē ne mós.

¹⁸ Mod awé Dyób ádás eewógéé mbwóg. Eɗəŋge éche éloné mbon énane mbwóg nisyāāl. Abāŋ dé nkòŋsēn dós ápeene mbwóg. Né-óó, kénzée awé mbwóg nídíí áte, eɗəŋge eéloné mós mbon áte.

¹⁹ Delúimte' eɗəŋge áyāle Dyób ásébpé syānē eɗəŋge alúmed.

²⁰ Nze mod ahóbé aá módáá Dyòb boŋ akóó mwányan a Krīsto, ane mod akale metóm, áyāle mod awē eedāa mwányan awē ányīnēé, éehēlēē-se ádāŋ Dyòb áde éēnyīnēē.

²¹ Né-óó, enén mbéndé chóó bebágé syánē; kénzēé awē adāa Dyòb ádāŋ kááŋne mwányan.

5

Jone aá bad ábe bedúbpé

Krīstāa bétómé nkòŋsé áte

¹ Kénzēé awē adúbpé aá Yesue mó adé Ane awē Dyòb Awógté, adii mwān a Dyòb. Kénzēé-’e awē adāa sáa-a-mwān adāa’ kááŋne mwān.

² Nyaa echē débíí-’é bán dedāa bán bé Dyòb edii nēn bán syánē dedāa Dyòb, dekoŋge-’e échē mbéndé.

³ Adāŋ Dyòb adii áhíd éche mbéndé, éche mbéndé-’e éetómteneé awúu áte syánē áhíd chó.

⁴ Kénzēé awē adé mwān a Dyòb atómé nkòŋsé áte. Nzəm echē atómé nkòŋsé áte, edii nēn, dedúbpé bán Yesue mó adé Ane awē Dyòb Awógté.

⁵ Modmod ampée eesāa awē atóme nkòŋsé áte éetóméé mod awē adúbpé aá Yesue adii Mwān a Dyòb.

Jone ahóbé bwēm é’lāán ábe é’bide Yesue mbóŋ

⁶ Yesu Krīstāa ampé á nkòŋsé. Bēndusén mó ne mendib boŋ ámbíd e pónéd echē áwédé á awóg nímé mekií mēnsyógé. Saké edusen é mendib chēmpen émbenléd ne mó, boŋ áde áwédé nímé mekií mēnsyógé. Edāádāŋ éche Esāa chōó élúmtē syánē aá nēn adé mbále, áyāle Edāádāŋ éche Esāa éekaléé metóm.

⁷ Nyaa édé éláán ábii mbále tāŋgene Yesue.

⁸ Debíí mbále tāŋgene Yesue áyāle Edāádāŋ éláŋgé syánē, bēndusén mó ne mendib, ansyóg-ke nímé mekií áde áwédé. Echén nyaa éláán ésyāal élúmtē syánē bán Yesue adii Mwān a Dyòb.

⁹ Ngáne dedúbpé mekan níme bad béhóbéé, kéchéé éche Dyòb álāŋgéé syánē étómténé étógnén abé tómaa mekan níme bad belāŋgéé syánē. Nēn áde áyāle Dyòb dēn dōó álāŋgéé syánē, tāŋgene awe Mwān.

¹⁰ Kénzēé awē adúbpé Mwān a Dyòb, abíí nēn aá nímén mekan mésyāal méde mbále. Boŋ kénzēé awē eedúbpé Dyòb, édii nēngáne ahóbe’ aá Dyòb adii nkal a metóm, áyāle eedúbpéé mekan níme Dyòb ahóbé tāŋgene awe Mwān.

¹¹ Chóm éche Dyòb álāŋgéé syánē édii nēn; abelé syánē dekuδέ alongé áde déemaá’. Adén alongé ádii alongé áde awe Mwān ábageé.

¹² Kénzēé awē adé nhóg ne Mwān a Dyòb akudé áde alongé, kénzēé-’e awē eesé nhóg ne Mwān a Dyòb, eekudéé áde alongé.

Déwōŋgen nhóg ne aniníí

ákud alongé áde déemaá’

¹³ Ntenle’ nyé ábe nyédúbpé á dīn á Mwān a Dyòb, ábel boŋ nyébii bán nyékudé alongé áde déemaá’.

¹⁴ Desumé nlém nēn bán, kéchéé éche déhédné Dyòb ngáne ébóŋnédeé mó, abelé awóg syánē mekáne.

¹⁵ Ngáne débíí-’e bán awóge’ syánē áyāle e kéchéé éche déhédné mó, detāŋgéné abii bán abage syánē kéchéé éche déhédné mó.

¹⁶ Nze mod anyíné mwányan abele mbéb níme méepiinéd mó kwééd, atāŋgéné akánnéd mó. Dyòb débē ane mod alongé. Bad ábe ríhóbéé meé nyékánnéd bédii bad ábe mbéb nímāb méebeléé boŋ échāb edāádāŋ éwé.

Mbéb rídé níme mbéle bon edáádəŋ éwé. Nzé mod abelé ene ndín e mbéb meehóbéé méé nyékánned ane mod.

¹⁷ Mewusé mésyā́l médii mbéb, bon donge dé mbéb ádé áde déebelé bon edáádəŋ éwé.

¹⁸ Debíí nén bán kénzée awé áde mwán a Dyöb eébéłéé mbéb, áyāle Mwán a Dyöb akəŋge mós, Ane awé áde Ebébtéd eéhēłēē-’ε-se ábel mós mbéb.

¹⁹ Debíí bán dedii bán bé Dyöb debíí-’ε nén bán Ane awé áde Ebébtéd akamlan bad bésyā́l ábe béebíí Dyöb.

²⁰ Debíí nén bán Mwán a Dyöb apedé á nköŋsé-te abagé-’ε syānē nsöŋten ábii Dyöb á mbále. Dedé-’ε mod nhóg ne mós áyāle dedé mod nhóg ne awe Mwán, Yesu Krístəə. Mwənpen-naá áde Dyöb, mwən-naá abage bad alongé áde déemaá’.

²¹ A-bānbān, nyéewóó’ dyamdyam ábel ne myöb mé metóm.

Kálag echë elónténé ébε eche Jone Ndibned n kálag

Kálag echë Jone echë elónténé ébε elúmte bán, “Nlyáged a mwembé” mós aténlé “Mmwaád nhóg ne ábe bán.” Ane nlyáged a mwembé awë atelé enén kálag adii Jone, mmwaád awë áténlé chós ne ábe bán bédii bad ábe bédé á mwembé-te. Chóm éche Jone átélé á kálag-té wén édé nén bán bad bédəj nhóg ne aníníí, bétéd-te pónde ne bemeléede bé metóm, ne ádab ayáge.

Nkabtéd n kálag

Ndibned 1-3

Edənge étomé chóm ésyāā 4-6

Elébé tənģene ayáge dé metóm 7-11

Nsógten 12-13

Melenten

¹ Me, nēngáne nlyáged a mwembé, mε-éé ntelé enén kálag. Ntenle, wε mmwaád awë Dyōb ápwédé, ne ábōj bán. Ndəó wε ne mbále, saá-kaa mmēmpen ndəó nyé, bōj káōj ne bad ábe bēbii mbále bédəó nyé.

² Ndəó nyé áyāle mbále echë syánē débii, débii-ε chós á ngindé ne á ngindé.

³ Dyōb Titée ne Yesu Krístə, Mwān awë Titée bēbē syánē nsimé, bélúmed syánē ngəl, bēbē-ε syánē nsanj. Abén bwēm é’syāā bēbē ábε syánē ngáne débéléé mekan mé mbále adəj áde dédəó nhóg ne aníníí.

Jone aá dédəj nhóg ne aníníí dédəj-ε mbále

⁴ Mbédé menyinge bwāmbwam áwóg bán donģe á bán ábōj behide’ mbále melemlen ngáne Titée ahóbé aá syánē déhíd.

⁵ Né-óó, a mwān a mmwaád, ncháa wε nén mεé dédəj nhóg ne aníníí. Enén mbéndé echë rítenlé wε, eésaá mbéndé e ekóólé. Edii mbéndé eche ebédé ne syáné se á mbooted.

⁶ Echén edənge éche ríhóbéé edii nén bán syánē detəngéné dehíd mbéndé e Dyōb. Ene mbéndé ngáne nyémoosyāā nyéwógé se á mbooted, edii nén, nyétəngéné nyédəj nhóg ne aníníí.

⁷ Bad bé medogké hiin bédé á nkōjsé-te chii. Bédii bad ábe béekwεntene nén bán Yesu Krístə achyáádté á nkōjsé née moonyonj. Abē bad bédii bad bé medogké ne bad ábe bétəngan Krístə.

⁸ Nyétéd pónde ábel bōj ntū nímēn méébōō’ ngēn, bōj pēn, nyékud nsábe ríme ríloné mbon.

⁹ Kénzéé awë atédte áhíd ayáge áde Krístə bōj atimé ahíde’ ayáge démpēe, eésaá ne Dyōb. Bōj kénzéé awë ahíde’ ayáge áde Krístə, adé ne Titée adé-ε ne Mwān.

¹⁰ Né-óó, kénzéé awë apedé áwān bōj ápēēn ayáge áde déehúu ne Krístə, nyéékōbē mós áwēn mendáb, nyéélenté-ε mós ké lentén née mod a Krísto.

¹¹ Nhóbe nén áyāle kénzéé awë alénté mós, aládténé mós ábel e’bértéd é’ mekan ábe ábeléé.

Jone ahóbé e’yale bé asóg

¹² Nwóó mam hiin álaa wε bōj meéhēdēē wε mós atele á kálag-té. Bōj pēn nwóó nlém áte ápe wē ábel bōj dényínen e’só ne e’só, ábel mmesyáné menyinge mélōn mbon.

¹³ Bãn ábe mwãnyonj a mmwaád awě Dyõb ápwédé, bélómme nyé melentɛn.

Kálag echë elónténé éláán echë

Jone

Ndibned ní kálag

Kálag echë Jone echë elónténé éláán elúmtë bán Jone, “Nlyáged a mwembé” mós áfelé chós. Gayose nlyáged a mwembé ampée mós áténlé chós. Awēd-te Jone akene’ Gayose áyāle nwōngēn níme ábagéé bad bé Krísto bémpēe, alānge-’e mwembé aá bétéd pónde ne mod awē béchāgēé bán Diotrefese. Jone akené-’e Demetruse áyāle nsón ní bwām níme ábélé.

Nkabtéd ní kálag

Ndibned 1-4

Békéné Gayose 5-8

Béchágé Diotrefese dīn dé mbéb 9-10

Béchágé Demetruse dīn á bwām 11-12

Nsógten 13-15

Jone alente Gayose

¹ Mē nēngāne nlyáged a mwembé, mē-éé ntenle’ wē Gayose, enén kálag. Ndáó wē ne mbále.

² A-mwānyān a edānge, nkānne’ nēn mēé mam mésyāāl níme ébeleé mékēen wē bwām, mmōn-’e ámpē édyēe bwām, melelem ngāne edāádān échōn ámpē édyēē bwām.

³ Menwóg menyīnge bwāmbwām áde donge ábesyānē baányān bé Krísto bēpédé hén bon bēhāb ngāne ne mbále ébeleé mekan níme Dyōb álúmté syānē aá débele’, mbíí-’e nēn mēé elyāgé ebele’ nímē mekan.

⁴ Chōmchōm éewōgtēē mē menyīnge tōmaa áwóg bán bad ábe bédé ngāne ábēm bán bébele ngāne Dyōb áhēdéé.

Jone aá bad béwōngan bad bé

Krísto ábe bébele nsón ní Dyōb

⁵ A-mwānyān a edānge, ébele mekan ne nlém nhóg áwōngēn ábesyānē baányān bé Krísto, kénéē wēnkēmbíí’ é bós donge á bad.

⁶ Bélāngé mwembé níme ndé hén edānge éche élúmté bós. Nhēde mēé éwōngēn ábén bad nzé bétédté nyé áke hōm démpēe. Ebel áned áyāle nē dós Dyōb áhēdéé.

⁷ Abén bad békágé’áá mebwóg ne mebwóg ábele Yesu Krístā, bēnkēnkwentēn-naá ákob nwōngēn ké nhóg níme mbídé wēe bad ábe bēédúbpe Krístā.

⁸ Né-ós, syānē ábe dedúbpe Krístā detāngéné dewōngén ábē bad ábel bon syāā ne bós débele nsón aláa bad nkalan ní mbále.

Jone achágé Diotrefese dīn dé

mbéb akēn-nē Demetruse

⁹ Mentelé mwembé níme níde áwōn dyad kálag, bon Diotrefese eékwentēnē ábel chōm éche rítélé áyāle ahēde’ aá mósé nlyáged a mwembé.

¹⁰ Né-ós, áde mēpēé mēlāā bad bé mwembé bésyāāl mam níme Diotrefese ábéléé. Akaltá sé metóm áyāl. Byánán nē déekwōgnedéé, abāa’ bānned bé Krísto nken akob, ákāā-’e bad bémpēe ákob bós nken, ánané-’e bós á mwembé-te.

¹¹ A-mwānyan a edaŋge, weehāntan abé á bad ábe bébele mbeltéd mé mbéb, boŋ éhāntan abé á bad ábe bébele' mbeltéd ní bwám. Kéznéé awě abele mbeltéd ní bwám adii mwān a Dyób. Kéznéé-ε awě abele mbeltéd mé mbéb, eebii'é Dyób.

¹² Baásyāāl béhóbe Demetruse mam mé bwám á yāl. Abele mekan mé bwám níme mélúmte' bán adii mod a bwám. Me-'ε ámpē nhóbe' mós mekan mé bwám á yāl, nyébii-'ε nēn bán kéchéé éche nhóbe' édé mbále.

Jone ahóbe e'yale bé asóg

¹³ Nwóó mam híin aláa wε, boŋ méēhēdēē mεé ítel mós ásē.

¹⁴ Nwóó nlém áte ányín wε mwāmpīn ní pónké, ene pónké-'aá dényīnēnnē e'só ne e'só, boŋ dékal.

¹⁵ Nsan níbē ne wε. Bēn bésyāāl bélómmé wε melentēn. Lentéd me bēd bésyāāl, nhóg ne nhóg tēé.

Kálag eche Judε Ndibned ní kálag

Kálag eche Judε ántenlé, antel chó átāngen bemeléede bé metóm ábe belúmté'áá bán bédé bad ábe bédúbpé Krístā. Enén kálag eéchabéé áte. Chómpē ewágné kálag eché elónténé ébε eché Petro átélé (2 Petro). Judε awéde' Bad bé Krísto nlem, áá bésun mekuu ámbíd e mbále e nkalanj ní bwám. Áá nímé nkalanj ní bwám méehānlánné. Áá Dyób dēmbē mós wéε ábe bad ngen póg ne ngen ésyāāl.

Nkabté d ní kálag

Ndibned ní kálag 1-2

Abé ne ayáged dé bemeléede bé metóm ne ebómán éche békudté 3-16

Bélébe bad áwúu áte á adúbe tē 17-23

Nnamed mé asóg 24-25

Judε alómé melēten

¹ Mε Judε, ndii mbáede awe Yesu Krístā, mbé'-ε Jemse mwānyaj. Mε-εé ntenle' nyé bad ábe Dyób ápwédé enén kálag. Nyébii nén bán Dyób Títéε adá nyé, Yesu Krístā-ε anone' nyé.

² Ngol e Dyób, nsañ ní Dyób ne edānge é Dyób ébád abé ne nyé.

Bad bé metóm

³ A-baānyaj, nkénwanén nyé atele bwámbwam tāngene e'soóson ábe Dyób ábágé syánē mbwiined ne Yesu Krístā. Bonj bōob nnyiné méé ébóó bán nítele nyé tāngene mekan mémpēe. Nwéde nyé nlem á abum nén méé, nyésun mekuu ámbíd e mbále e nkalanj ní bwám. Mmén nkalanj ní bwám méehānlánné. Dyób dēmbē mós wéε ábē bad ngen póg ne ngen ésyāāl.

⁴ Nhóbe' nén áyāle bad ábe béewóo abé á bad bé Dyób bésólé áfinté echēn á mesōom-tē. Abé bad bēhóbe' nén bán nsimé míme Dyób ábágé syánē ne alagsen áde álagsanné syánē mbéb, ábágé syánē kunze ábel mbinde é mekan. Dyób dēmmād nkógsen míme ábē bad békúdé atii se' bōód. Abé bad bēekobéé Yesu Krístā áde édíí-'áá bán Yesuε mwēmpen mós adé syánē Sáá abé'-ε Nkamlēε.

⁵ Kénéε nyébii nímén mekan mésyāāl, ndáá méé níkamten nyé ngáne Sāngwéé ánhúdté bad bé Israél á mekáá mé bad bé Egipto bonj ámbíd e pōndé abóádé alonjé á bad ábe bēnkēsum nlem áwe.

⁶ Nyékamten-ne ángel ámpē eché énkēndyéé hóm áde Dyób dēnnabnédté bō, bonj bēnhidé ádé abwóg á hóm wéε bēntāngēnné abé. Dyób ábánné bō á mehanj á mbwōg mé ehintén wéε bēbēε abé ne abé ké ámbíd e Epun émbáá é nkáásé.

⁷ Ndáá méé nyékamten kááñne myad mé Sodom ne Gomora ne myad míme mébédé bō benben. Bad ábe bēbédé nímé myad, békábé'áá mesón, bēhídē'-ε mekan mé esii mé ekob é yál míme moonyonj éetāngēnéé Abel. Békúdé nkógsen ní muu míme mééđímé'. Mmén nkógsen níde álúmed bad bēmpēe bán nén áheleε ábenléd ne bō.

⁸ Bonj kéné, ábē bad ábe bésólé áfinté echēn bōmpē bédii bēnange nló bán nkamlēn níde áwāb mekáá. Mmé nló níbele' bēbele' mbinde é mekan, bēenyínēε nkamlēn ní Dyób néε dyam, bésyāā'-ε ngume éche éde ámín.

9 Boŋ ké Maikεle, ángel embáá enkéntédté ne mó mwën ásyáŋ Satane áde búmā bépéntánáá t̄ŋgene mod awe átéd ndim níme Moseε. Anláá mó dásō aá, “Sáŋgwéé akógsen wε.”

10 Boŋ ábē bad ábe bésólé átínté echēn pen, kéchéé éche béesōŋtεnεé béhóbe chō mam mé mbéb áyāl. Kéchéé éche épédé bó á mewēmten chōo bébeleé. Bébeleé néε nyam é mehín. Mmē mekan mēn móo mépiinad bó kwééd.

11 Medim ne bó. Bómpē bébele’ ngáne Keenε awē anwúú mwānyan ámbenlé. A etútú é mōné, béhele bébēl kéchéé, ngáne Balame. E’wúú bé nló-áte ábāb bébēl bómpē béwē melelem nēŋgáne Kōraa ánwēé áyāle anwúén Dyōb nló áte.

12 Abé bad béekwāgεε, né-óó nzé nyáábōo nyéládné ádyé ndyééd álúmed edaŋge éche Sáŋgwéé, bébelé bébé nēŋgáne mbinde átínté echēn. Echab yāl chēn chōo bétōŋtanné. Bédii néε mbag échē epub ékεenεé échē élúmtε’ bán mbúú échō, áde échó’é. Bédii nēŋgáne mel níme méechyāá’ e’pum ké á póndé échē mel méchyāá’é. Bénáppé awé nēŋgáne bwel ábe béwúbne nkan áse.

13 Bédii nēŋgáne edib é nkwé éche éhode’ ne ngine. Ahod áde éhodeé ébídte’ mbinde á nkin. Nē dōo ádāb abé dé mbéb ábídεé áwed. Bédii néε betintine ábe bétamnad. Ndib e ehíntén échē Dyōb akóŋnédé bó esine bó, ébē-’ε abé ne abé.

14 Enoge awé anlóntén nyonŋel saámbé á mbyaa níme Adame, anhób se’ bōsd á’sō é’ póndé t̄ŋgene ábén bad. Anhób aá, “Nyénone’, Sáŋgwéé ápéén e’kálé ne e’kálé é’ ángel éche ésaá.

15 Akāad bad bé nkōŋsé bésyāāl. Akwíd bad bésyāāl ábe ádab abé déesaá néε abé á bad bé Dyōb nkáá, akógsén-ne bad bé mbéb ábe béewóo mbwóg ní Dyōb. Akógsēn bó áyāle mam mé mbéb níme béhóbeé t̄ŋgene mó.”

16 Abén bad béyogke’ anyoo áte béyogké-’ε bad ahób ngén. Bébele’ dyam dé mbéb ké áhéé áde bédás ábel. Békume ekáá á t̄l, bényinte-’ε nsāl áte ábel békud bwám.

Nyébē nyékεene’ adúbe á mbále á’sō

17 Boŋ a-baányan, nyé pen nyékamten mam níme bembapεε bé nlomag ábe Sáá awéd, Yesu Krístāá bēnlāá’ é nyé.

18 Bēnlāá nyé bán “Ade e’pun bé asóg bépéé, bad bépē, béwelé nyé, béhídε’ échab esíí é mekan mé ekob é yāl.”

19 Echēn ndín é bad chōo épεene’ nkabén átínté e bad bé Dyōb. Esíí é mekan mé mbéb mé nkōŋsé ékamlan bó, béewóo-’áa Edāsdāŋ é Dyōb áte.

20 Boŋ a-baányan, adúbe áde asáá áde nyéwóo ábē ákwoge’ ákag á’sō. Nyékānne’, ngine e Edāsdāŋ éche Esáá élyágtε’ nyé.

21 Nyékεene’ alongé ádēn á’sō nyaa eche nyéchemlédté nēn bán Dyōb ádás nyé. Nyésine’, nyélyôg nlém nēn bán Sáá awéd Yesu Krístāá ápē, ábenléd níme nlém ní ngól, nyékud alongé áde déemaá’. Ábel nēn áyāle adás nyé.

22 Nyéwōŋ nlém ní ngól wéε bad ábe béédúbpe ne nlém nhóg.

23 Nyéson alongé a bad bēmpēe. Nyéhūd bó á dū á muú mehélé. Bēmpēe bédé ábe nyétāŋgéné nlém ní ngól awānlen, boŋ pen nyétédēn bó póndé. Nyétāŋgéné káōŋne échab mbóté akōo byánán esíí é mekan mé mbéb mé ekob é yāl ékóbté chō mbinde.

Mekáne mé mekenag

24 Ehúmé ébē ne Dyōb áde ábele’ boŋ nyéehúné á mbéb-te. Mwën-aá apεene’ nyé abwóg á hóm wéε mwën ádíí ne ehúmé. Ápéén nyé áhed ésebán átōn dé mbéb ké ahóg áde nyé á yāl, nyéebē-’ε menyinŋe.

²⁵ Edúbé ésyāā́l ébê ne mós. Mwěmpen mós adé Dyōb áde ásóó alongé ádēd mbwiined ne chōm-éε Yesu Krīstāā́ Sāngwéé awêd ábélé. Ehúmé, edúbé, ngum, ne nkamlen rīsyāā́l rīdīi rīmē, se á mbooted, bōōb, ne á ngíndé. Ebê nê.

Kálag e Mam nime mébenléd Ndibned ní kálag

Ndibned ní kálag e mam nime mébenléd nime Dyöb álúmté Jone. Jone mó atelé chó á pónde eche bad ábe béndübe Krístæá békúdé'áá metake áyale adübe áde béndübé nén bán Yesu Krístæá adii Sáŋgwéé. Atote áde Jone ákóó ahób á kálag té wén adii ábe bad ábe áténlé chó e'lyág bé nlém ne áwéd bó nlém á abum. Mekan nime Jone ábúdé atel á kálag té wén médii mekan nime Dyöb dénlümédte mó á ndög-te aá mébenléd.

Kénéé edii bán mewemten mébuú áte tãŋgene nsõŋten nime ridé á kálag té wén, atón áde den ákóó abé áwéd-te adii nén; kóón ne á asóg, Dyöb détom ábe bad bé ekoyí ne Satané áte. Dyöb débéł nén mbwiined ne Sáŋgwéé, Yesu Krístæá. Dyöb désábé ábe bad ábe bédübpé mó ne nlém nhóg, anamed áde ánamédte bó ábe á nkoŋ ní mín mékõlè ne nkoŋ ní sé mé ekõlè.

Nkabtéd ní kálag

Ndibned 1.1-8

Ndóg e'só ne kálag eche béténlé mwembé saámbé 1.9-3.22

Nhíbe ní kálag nime níwóó e'diben saámbé 4.1-8.1

E'loŋ saámbé 8.2-11.19

Dragõne ne nyam ébe 12.1-13.18

Ndóg híin 14.1-15.8

E'bwóg bé melingá mé Dyöb saámbé 16.1-21

Dyöb ábébté Dyad á Babilon, nyam ekwedé nzum, nkal e'dæádãŋ a metóm, ne Devæle 17.1-20.10

Mbakú e asóg 20.11-15

Nkoŋ ní mín mékõlè, nkoŋ ní sé mékõlè, Jerusalem a ekõlè 21.1-22.5

Nsõŋten 22.6-21

¹ Enén kálag ehóbe mekan nime mébenléd nime Yesue Krístæá ábélé boŋ mébyéen. Dyöb démbé mó nímén mekan aá mébyéen ábel boŋ álúmed ábe bembæledé mam nime mékwógé abenled. Krístæá ambél awé mbæledé, Jone abii nímén mekan alóm áde ánlómmé ángel áwé.

² Jone mó-'e anhób mam mésyãl ngáne ányínné. Mmén mam mós ánhõbpé tãŋgene nkalan nime níhúú ne Dyöb, ne mbõŋ eché ámbidte Yesu Krístæá.

³ Nnam níbè ne kénzée awé aláa' enén kálag ábel boŋ bad bémpée béwóg nímen nkalan tãŋgene mekan nime mébenléd. Nnam níbè-'e ne kénzée awé awógé nímé nkalan boŋ ahíd-te mam nime meténlédé á kálag-té wén. Pónde emaa ábe benben eché nímén mekan mésyãl mébenlédte.

Jone alómmé mwembé saámbé melenten

⁴ Me Jone, ntenle mwembé saámbé nime ridé á mbwóg e Esia. Nsimé ne nsaj ní Dyöb níbè ne nyé. Dyöb áde ádé, áde démbé, ne áde débé, ne e'dæádãŋ saámbé bélómmé nyé nsimé ne nsaj. Abé e'dæádãŋ é'dé á'sõ bé atii dé nkamlen ádyöb.

⁵ Yesu Krístæá mómpé alómmé nyé nsimé ne nsaj. Mó adé ane awé ahóbe mbále tãŋgene Dyöb nyaa eché débii bán edé mbále. Mó abédé mod á'só awé ansébé apuu, abé-'e nkamlene a kãŋ é nkõŋsé.

Adáó syáné, abelé-'e mbéb méekamlánné syáné ámpé, asyóg áde ásyógé nímé mekií a nló nímé.

⁶ Abelé syānē n̄ē beprise ábe bébenle Dyōb eche Sāṅ awē akamlan b́. Eche ehúmē ne nĩmē nkamlen nĩbē abē ne abē. Ebē nē.

⁷ Nyénōne', āhūē' ne mbag, mod-tē-'ē ānyin ḿ, ḱáṅne bad ábe bēmbēl bon awē, abome áde bēmbomēé ḿ á awōg. Metúmbé mé nkōṅsé mēsýāā-lē mēlēb ḿ. Nē dēn d́ō ēbēē, ēbē nē.

⁸ Sāṅ Dyōb á Ngume ahóbē aá, "Mē-éé ndé Alfaa mbé-'ē Omégaa." Ḿ adé Dyōb áde ádé, áde dēmbē ne áde dēbē.

Jōne anyiné Krístā á ndóg-te

⁹ Ndii Jōne, awen mwānyan. Ndé nhóg awē ḿmpē adé melemlen ngáne nyé akāṅ nlēm āwesēn metake nĩme mēpiide bad ábe bédé á nkamlen nĩme Yesu Krístā. Bēmbanē mē á mbwóg echē mendib mēlōṅnédé eche béchagēé bán Patmōs áyāle menkāl Eyale é Dyōb níláá-'ē bad mekan nĩme rínyinē t̄ṅgene Yesu.

¹⁰ Edāsdāṅ eche Esáá ēmpii mē á Epun é Sāṅgú.* Menwóg ehób é ngine ébidé mē ámbid, émbē nēē esaád é elon.

¹¹ Enhōb aá "Mam nĩmē ényiné, tel ḿ á kálag-tē, élóme nĩmén mwembé saámbé nĩme nídé á Efesus, á Semaina, á Pegamum, á Tiatira, á Sadis, á Filadēlfia ne á Laudesia."

¹² D́ō ríkunné ānyin ehób eche éhóbé'áá áwēm, bon rínyinē metii nĩme bébánné etrukāṅ ámīn saámbé mé gól.

¹³ Afinté e nĩmē metii saámbé d́ō rínyiné mod awē awágné moonyon. Anhé mengombe nĩme méchábé ḱáṅ mēpē ḿ á mekuu-sé, awáá-'ē etúd é gól á t̄l.

¹⁴ Esid é nló épúbé'áá ḿ féréd nēē mbóm, m̄id méchodné ḿ áte nēē muí.

¹⁵ Mekuu mémbe ḿ nēē ekii eche béchagēé bán br̄ōns eche béhédé á dū bon ébē byánān épene' áte, ehób-pe éđumé ḿ áte nēē mendib nĩme mēsoppe'.

¹⁶ Betintine saámbé bēmbē ḿ á ekáá émbáá, páá e nsal nĩbe echē ekóbpe bwámbwam ebíd ḿ á nsal-tē, e'só-'ē é'pene ḿ nēē enyen eche étóm̄tan apēn.

¹⁷ Ade rínyiné ḿ, menkwē ḿ á mekuu, mbé nēē mod awē awédé. D́ō ábáné mē eche ekáá émbáá á yāḷ bon áhōbē aá "Weebáá', mē-éé ndé Mod á Mbooted mbé-'ē Mod á Asóg.

¹⁸ Mē-éé ndé ane awē adé alonégé. Menwé bon b́ōb ndé á alonégé abē ne abē. Nwóó nkamlen ámīn e kwééd nwóṅ-ge ámīn e mbwóg e kwééd.

¹⁹ B́ōb-ṕō t̄l mekan ásē nĩme ényinéé, nĩme mb̄enlad b́ōb ne nĩme mb̄enléd.

²⁰ Kun e e'koṅnéd echē edé t̄ṅgene betintine saámbé ábe bédé mē á ekáá émbáá ne metii mé etrukāṅ saámbé mē gól edii n̄n: Betintine saámbé bédii ángel é mwembé saámbé, metii mé etrukāṅ saámbé-'ē mēdii nĩmē mwembé saámbé."

2

Jōne alómmé mwembé mé Efesus póle

¹ Ane awē anwágēn moonyon anláá mē n̄n aá "Telé ángel echē edé á mwembé nĩme nídé á Efesus n̄n wēé, Mod awē awánlé betintine saámbé áwe ekáá émbáá awē akag áfinté e metii mé etrukāṅ saámbé mé gól ḿ alómé enén póle.

² Mbíi mekan nĩme nyébélé. Mbíi mēé nyétédé ntū bwámbwam, mbíi-'ē mēé nyékaá nlēm āwesēn. Mbíi ngáne nyéehelēé e'bébtéd é' bad akob, mbíi-'ē ngáne nyébélé bon nyéchēm bad ábe béchágé yāḷ bán bédé bembapēé bé nlómag áde béesaá, bon nyédībēd-te bán bédii bekal bé' d́āsdāṅ bé metóm.

* 1:10 Epun é Sāṅgú ébédéé melemlen n̄ṅngáne mbwe rí S̄ōndé.

³ Mbíı meé nyēwesan ne e'kan bé nlém, nyékude-'e metake á dın ádēm, bon kénē nlém nılyágé nıwúú nyé ábum ngáne nyéhídéé me.

⁴ Bon nhóbe áyāl echēn nēn meé, nyéédəə' é me boob ngáne nyénsēbēē me adəŋ.

⁵ Boob-pəó, nyébēn nyékon anyın nyaa echē nyépédé akwē. Nyétede áden abé dé mbēb nyébele mekan nıme nyébélé'áá áde nyébóótédé Yesue ahíd. Nzé nyéētēdte áden abé dé mbéb, né mēpē áwēn nhúd áden atii dé etrukán á e'dii.

⁶ Bon dyam á bwám áde nyébeleé ádíı, nyéētımteé mıd áyāl wēe mam nıme bad bé epepé ábe Nikolausē ábe mēmpē méetımteé mıd áyāl.

⁷ Kénzée awé awóó metúu, áwóge chōm éche Edəəđəŋ élanğéé mwembé. Kénzée awé atómé mekan mé ebébtéd áte, mēbe mó kunze ádyé epum é bwel éche ébele bad bébé á alongé á ngındé, éche é'kwoge á Paradıs."

Jone alómmé mwembé nıme rıde á Semaina póle

⁸ Anláá-'e me ámpē aá, "Telé-'e ángel echē edé á mwembé nıme rıde á Semaina nēn wēe,

"Mod awé adé mod a'só abé-'e mod awé adé mod a ndımten, awé anwé bon abé á alongé ámpē, mó alómé enén póle.

⁹ Mbíı mımēn metake mbíı-'e meé nyédıı betóótókē bé bad, bon kénē nyédıı behon bé bad. Mbíı e'bébtéd é' mam ábe bad ábe behóbe bán bédé bad bé Israel kénēe béesaá, behóbeé nyé áyāl. Bédıı bad ábe bédé bad ábe Satane ké'e bad ábe bédé áwē echon.

¹⁰ Nyéebáá' metake nıme méhúe' nyé á'só. Nlanğe nyé meé, Satane ábēl béhē nyé donge á bad á mbwəg, wēe nyékudté metuné áyāl e epun dyóm. Abel nē ákəg áden adúbe. Ké nyéwāg ké wúēn, nyébē nyédúbe me. Nzé nyébelé nē, né me-'e mēbe nyé alongé áde déemaá' nēngáne nsábe ní mod awé atómbwéné.

¹¹ Kénzée awé awóó metúu áwóge' chōm éche Edəəđəŋ élanğéé mwembé. Bad ábe bétómé mbéb áte béewáá kwéed e edəəđəŋ."

Jone alómmé mwembé nıme rıde á Pəgamum póle

¹² Anláá-'e me ámpē aá "Telé ángel echē edé á mwembé nıme rıde á Pəgamum.

"Ané awé awánlé páá e nsał nıbe echē ekóbpē', mó alómmé nyé enén póle.

¹³ Mbíı wēe nyédye'é, wēe Satane nıme nkamlēn rıdíı. Nyébē nyésum nlém áwēm. Nyēmbé nyédúbé me ne nlém nhóg ké á pónde echē Antipase. Antipase ambıd me mbón e mbále, bēnwúú' é mó átınté echēn wēe Satane ádye'é.

¹⁴ Bon nwóó nguse e mam áhób nyé áyāl. Baahóg bédé átınté echēn ábe behıde ayáge áde Balame. Balame mó anlúméd Balage ngáne ásōlédte bad bé Israel á mbēb-te adyé áde bédyágé'áá medyé nıme bebágé'áá myōb mēmpēe nēe mende, ambēl-le békābē meson.

¹⁵ Chōm émpēe éche nıwónné nyé édíı nēn bán, baahóg bédé átınté echēn ábe behıde adúbe áde Nikolausē áyágteé.

¹⁶ Né-əó, nyétede áden abé dé mbéb. Nzé nyéētēdte, né mēwāmsēn ape áwanen abé bad, mbenléd páá echē ebıde me á nsał áwanen abé bad.

¹⁷ Kénzée awé awóó metúu áwóge' chōm éche Edəəđəŋ élanğéé mwembé. Bad ábe bétómé mbéb áte, mēbe bó mána nıme nıkónnéde bó, mēbē-'e bó aláá áde ápúbe'. Amin e áde aláá, bétélé dın dékōléd áde modmod éebıı' é étóméé mod awé bébéé áde aláá."

*Jɔŋe alómmé mwembé
nĩme nĩde á Tiatira pólé*

18 Anláá me ámpē aá, “Telé ángel echē edé á mwembé nĩme nĩde á Tiatira nén wēé,

“Me Mwān a Dyōb awē mĩd méchodneé áte nēe muú, mekuu-’e mébé mó nēe ekii éche béchagēé bán brōns boŋ ébé byánán echodne’.

19 Mbíi nsón nĩme nyébeléé. Mbíi edaŋge éche nyéwánłné me, mbíi-’e adúbe áde nyédúbpē me. Mbíi abele áde nyébenłéé me, ne nłém nĩme nyékáá awēsēn áde nyéwēséné. Mbíi-’e nén meé, nsón nĩme nyébeléé bōob, nĩtómé nĩme nyēsēbēē abel.

20 Boŋ chōm éche rĩhóbeé nyé áyāl éđii nén meé, nyéwēsēn mmwaađ awē béchagēé bán Jesēbele. Achāge yāl aá móđii nkal é’ dāóđaŋ a Dyōb. Ayágte’, ádogne ábēm bembālede áde adúbe ákáb mesón ne ádyé medyé nĩme bébāgé myōb mémpēe nēe mēde.

21 Mbagé mó pōndé meé átede nĩmē mbeltéd mé mbéb boŋ eéhēđēē akáb dé mesón atēde.

22 Nyénōne’, mébwēm mó ne bad ábe ákábneé mesón á anōŋ dé nkole, békũd-te metuné mé ngĩne. Mēbel nén nzé béēsóge nĩmē mekan mé mbéb abel ne ane mmwaađ.

23 Mēwū bad ábe behíde chōm éche ayágteé, mwembé rĩsyāł-le mébĩi nén bán me-’é ndé ane awē abíi mewēmten ne nłém nĩ moosyāł áte. Mod ké ahéé awē abelé mbéb né-’aá mékōgsēnnē mó.

24 “Boŋ nłānge nyé bad ábe nyélyāgé áse á Tiatira, ábe nyéehídé áden ayāge, nyé ábe nyéeyāgkē mekan nĩme béchagēé mekan mé kun mé Satan, meéhēđēē meé nĩtagēd nyé ámpē.

25 Boŋ pen, nyébé nyésum nłém áwēm káōŋne áde mépēé.

26 Bad ábe bétómé mekan mé mbéb áte boŋ bébelé-’e mam nĩme rĩlāŋgé bō meé bébel, káōŋ ne á asóg dé ádāb alōŋgé á nkōŋse te wēn, mēbe bō kunze ákamlēn meloŋ mésyāł.

27 Békamlén bad bé nĩmē meloŋ ne ekaá éche éhyédé, békōgtéd-te bō áte ngāne mod ákōtatdē mbeé é mōg áte.

28 Melemlem ngāne echem Sāŋ ábāgé me ngĩne, nēe mémpē mébeé ngĩne wēe bad ábe bétómé mekan mé mbéb áte. Né-’ó, áyāle bétómé mekan mé mbéb áte, mēbē bō tintine a mbwembwe.

29 Kénzēé awē awóó metúu, áwōge’ chōm éche Edāóđaŋ éłāŋgeé mwembé.”

3

*Jɔŋe alómmé mwembé
nĩme nĩde á Sadis pólé*

1 Ane mod awē anwāgēn moonyoŋ anláá me ámpē aá, “Telé ángel eche edé á mwembé nĩme nĩde á Sadis nén wēé,

“Me awē nwánłé e’ dāóđaŋ é’ Dyōb saámbé, nwalé-’e betintine saámbé, me-’é nłómmé nyé enén pólé. Mbíi nsón nĩme nyébeléé. Bad behóbe nén bán nyédé á alōŋgé, boŋ nyéesaá á alōŋgé.

2 Nyékábneđ. Nyéhēde nĩmēm nsón asóg dé abel, boŋ bōob nyéwēđ yāl áte nyébel mó bwām, áyāle nnyiné nén meé nĩmen nsón méekwōgnedeé á’ sō ábe áđēm Dyōb.

3 Né-’ó, nyékamten chōm éche nyén’yāgēē ne eche nyénwōgkē, nyékoo chó, nyétede-’e áden abé dé mbéb. Boŋ nzé nyéekábneđe, né mēpē nēŋgāne nchīb, nyéebíi-’é pōndé echē mépēé.

4 Nyēwóó nguse é bad á dyad á Sadis ábe béēwógté échab mbóté mbinde. Béhé ne me, béhé mbóté éche épúbe' áyāle békwoǵnéde.

5 Né-óó, kénzéé awé atómé mekan mé mbéb áte, mómpē áwāā mbóté échē épúbe, melemlem ngáne bó, méehúd-taá mó dīn á kálag e alonǵé. Mēhāb á'só ábe echem Sāj ne á'só ábe éche ángel nēn meé bédii ábēm.

6 Kénzéé awé awóó metúu áwóge chōm éche Edāóđāj élanǵéé mwembé."

Jōne alómmé mwembé ríme rídé á Filadelfia póle

7 Anláá me ámpē aá, "Telé ángel e mwembé ríme rídé á Filadelfia nēn wēé, "Mod awé asáá abé-'e mod á mbále, mó alómé enén póle. Awóó ngíne ákamlen nēngáne Dabidē ákamlánáá. Nzé adībpē modmod ééhēlēē adib, nzé adibé-'e modmod ééhēlēē adibe.

8 Mbíi nsón ríme nyébeleé. Nōné', ndībnédé wē ekob éche édé wē á'sō-te, modmod eéhēlēē-'e chō adib. Mbíi meé ngíne echē nyéwóó edé mwāmpīn boj kéné nyéhíde échēm eyale, nyééhóéé bán nyéebíi é me.

9 Nyénōne', bad ábe bédé echon éche Satane, ábe béhóbe bán bédé bad bé Israel kénéé béesaá, bédii bad ábe békale metóm. Mēbēl bēpē áwōj, békwē wē á mekuu. Mēbēl-le bó moosyāāl bēbii bán ndāó wē.

10 Ngáne edíi bán nyéhíde échēm eyale éche nlanǵé nyé meé nyékan nlem áwēsen metake, mémpē meékāó nyé á pónde e metake ríme mépē á nkōjsé, ákag bad bésyāāl ábe bédé á nkōjsé-te.

11 Nkwogé ape, nyédii nyésun nlem áwēm ábel boj modmod eékobné nyé rímen nsábe.

12 Bad ábe bétómé mekan mé mbéb áte, mēbel bó akon á ndáb echē ádēm Dyōb, béebíd-taá áwēd-te ámpē mbéd. Mētel bó dīn áde ádēm Dyōb áyāl, mētel dīn á dyad áde ádēm Dyōb, Jerusalem á ekósólé awé ahúú ne ádēm Dyōb, ámīn. Mētel-le bó ádēm dīn dékōsólé á yāl.

13 Kénzéé awé awóó metúu áwóge' chōm éche Edāóđāj élanǵéé mwembé."

Jōne alómmé mwembé ríme rídé a Laudesia póle

14 Anláá-'e me ámpē aá, "Telé ángel echē edé á mwembé ríme rídé á Laudesia, nēn wēé,

"Ane awé adé Ebē nē, awé abele ngáne Dyōb áhédeé, abé mbón e mbále, mbiined ne mó-'aá se á mbooted Dyōb dénhāgké chōm ésyāāl, mó alómé enén póle.

15 Mbíi nsón ríme nyébeleé. Mbíi meé nyééhóó'é nyééchodté-'aá, nyémbé nyéhóó' ké'e nyéhunne'.

16 Né-óó, ngáne nyédii etōné, nyééhóó'é nyééchodté-'aá, mébidēd nyé áwēm nsal té.

17 Nyéhóbe nēn bán nyédé nhōn, nyéwóó bwēm é'syāāl, nyé bán nyéetóǵéé-'e chōmchōm. Boj nyéebíi'é bán nyédii bad ábe bétómtan atag ábe békóbténé etyag, ábe bédé atóg, ábe békwédé ndím, bēbé-'e nsób.

18 Né-óó, nlébe nyé nēn meé nyéchan gól áwēm echē bétómté á muu-te, ábel nēn nyébé nhōn. Nyéchan-ne mbóté áwem éche épúbe nyéwāá chō, ábel boj e'són ábe rímen nsób nípenéé, béenyínnād. Nyéchan-ne dyōg áwēm áde nyéwōǵédté á mīd ábel boj nyényínné'.

19 Bad ábe rídás nkánne bó áte ríkōgsān-ne bó. Né-óó, nyéwōj kán nyéede-'e áden abé dé mbéb.

20 Nyénōne', ntyéémé á ekob nkume-'e chō. Kénzéé awé awóge me ehób boj adībē ekob, mēššl, ndyé ndyééd ne mó, mó-'e adyé ndyééd ne me.

21 Bad ábe bétómé mekan mé mbéḅ áte, mḅbe bó kunze ádyεε ne me á atii dé nkamlen, melemlem ngáne mmèn ámpē méntómmē bad bé ekoyí áte boj rídyεε ne echem Sáj áwē atii dé nkamlen.

22 Kénzée awē awóó metúu áwóge' chóm éche Edáádəŋ élanḡεé mwembé."

4

Jone anyiné atii dé nkamlen áde áde ámín

1 Ámbid enén dóó rínyiné ndóg empée. Mennyín ekob ádyōḅ éche édíbnédé. Dóó ríwóge ehóḅ éche éseḅpē ahóḅ áwēm, ébéde née elonḡ, élanḡεé me nén áá, "Hyāḡ ámín hén, mēlūmēd we mekan nĩme métəŋḡéné abenled ámbid e enén pónde."

2 Abwōḡ-ábwōḡ dóó Edáádəŋ é Dyōḅ épíídé me. Hē dó-'áá rínyiné atii dé nkamlen, rínyínē-'ε ngáne mod ádíídé dó.

3 Ane mod awē andíí ádē atii dé nkamlen, yāl epené'áá mó áte née meláá nĩme béchəḡεé bán jáspa ne kanélian. Ngubélen-ne ámpē enlənḡéné atii dé nkamlen. Ene ngubélen epené'áá áte née aláá áde béchəḡεé bán emeran.

4 Metii mé nkamlen mémpēe móom mébe ne méniin mēnləŋnéd ádē atii dé nkamlen, bad bémháá-'ε móom mébe ne bēniin bēndíí nímē metii mé nkamlen. Bēnwāá mbóté éche épúbe béhé-'ε e'kóté bé nkamlen é' gól á nló.

5 A atii dé nkamlen hē, emwedmwəd ébíde'áá, e'saád ébíde', dyōḅ-pe ákumé áte. E'kag saámbé ábe é'chodne' é'béde á'sō ábe ádē atii dé nkamlen. Abé e'kag saámbé é'díí e'dáádəŋ é' Dyōḅ saámbé.

6 Chóm empēe ébéde á'sō ábe ádē atii dé nkamlen éche émbē née edíḅ é nkwē éche ewáḡne dyené boj ényínne'áá áte.

Nyam éniin énləŋnéd ádē atii dé nkamlen ped ésyāḗl éniin. Míd mébéde bó yāl esyāḗl, á'sō ne ámbid.

7 Nyam e'sō ebédée née ngii, nyam eché elónténé ébe ebédé née nyag, eché elónténé éláán enwōŋ e'sō é' moonyonḡ, eché chó-'ε elónténé éniin embé née mbye awē apumme'.

8 Eché nyam éniin téé, enwōŋ mepab ntóób, míd-te ménlōn bó yāl esyāḗl, káŋne á mepab-té. Békóné'áá bwēm nkuu ne mūte ésebán békómme áte. Békóné'áá bán,

"Sáj Dyōḅ á Ngume, asáá, asáá, asáá.

Mó ambé, mó adé, mó-'áá ápě."

9 Eché nyam éniin ékōnne ane awē adíídé atii dé nkamlen mó awē adé á alongé abé ne abé. Békōnnē mó nkəŋgé nĩme níbage mó ehúmé, edúbé ne mesáḡnen.

10 Pónde eché békónéé nē, ábē bad bémháá móom mébe ne bēniin bēnkwxé áse á'sō wée ane awē adíídé atii dé nkamlen, awē adé á alongé abé ne abé, bébage mó edúbé, bébwēm ábab e'kóté bé nkamlen á'sō ábe ádē atii dé nkamlen békōnē bán,

11 "Awəd Sájḡwée ne ádeḅ Dyōḅ, ekwōḡnéde

ákuḅ ehúmé, edúbé ne ngíne,

áyāle nén we-εé ehəḡé bwēm é'syāḗl,

mmōŋ-εé etíídé áhəḡ bó ne ábel é'bē."

5

Mwān-a-Ndyəŋ ní mbód mó akwōḡnéde ádibe níbe ní kálag

1 Héε rínyiné níbe ní kálag á ekáá émbáá éche ane awē adíídé atii dé nkamlen. Mímé níbe ní kálag, bēntel mó bwēm áyāl ped ésyāḗl ébe, bényāḡ

bédıb-pe mós ne e'dıben saámbé.* ² Dós rınyıné ángel e ngıne ehóbe ne ehób éche échágké aá, “Nzé-móde akwógnéde ábóo e'dıben bon ádıbē-ε nhıbe ní kálag áte?”

³ Bon ké ádyób, ké á nkóńsé ké'ε á mbwóg e baásē, modmod eebédeé awé ahelé'áá nımé nhıbe ní kálag adıbe áte ké'ε ánon mós áte.

⁴ Menchıı bwámbwam áyále nén bénkényınné modmod awé akwógnéde ádıbe nımé nhıbe ní kálag áte ké'ε ánon mós áte.

⁵ Dós mod ambáá nhóg álângeé me aá, “Weechyēē'. Nóné', Ngii-e-nyame awé abıde á túmbé e Juda, á mbyaa nıme kâh Dabıde atómé nzum áte. Ahelē ahıd-te ábē e'dıben saámbé, ádıbē-ε nımé nhıbe ní kálag áte.”

⁶ Dós rınyıné Mwán-a-Ndyoń ní mbód atyéémé áfınté e atii dé nkamlēn ne éché nyam éniin, bad bémháá béláńnéde mós. Mmē rıdyoń ní mbód mémbe nēe nıme bėwıı. Mėnwōń meséb saámbé, ne mıd saámbé. Mmē mıd saámbé mós méde e'dáádāń é' Dyób saámbé ábe Dyób álómé nkóńsé áte rısyāā.

⁷ Ane Mwán-a-Ndyoń ní mbód ankē nhıbe ní kálag atéd á ekáá émbáá éche ane awé andıı atii dé nkamlēn.

⁸ Ade átédé nē éché nyam éniin ne ábē bad bémháá móom mēbe ne bėniin, bėnkwe áse a'só wēe ane Mwán-a-Ndyoń ní mbód. Abē bad bémháá bós mod té anwálé rılendē ne kımbe é gól, elón e'twé áte. Abē e'twé é'dıi mekáne mé bad bé Dyób.

⁹ Bėnkōń nkóńgé mekōālē nén bān,

“Ekwógnéde átéd nhıbe ní kálag,
ne ádıbe e'dıben ábe bėndıbpē.
Ekwógnéde áyále nén bėnwıı wε,
ékōdnéd-te bad bé Dyób nımōń mekıı.
Ebelé bėtımé bad bé Dyób.
Bėmbıd metúmbé ne metúmbé,
bėhóbé mehób nyaa ne nyaa,
bėbıd meloń ne meloń,
bėbē-ε ndın é bad ésyāā.

¹⁰ Abelé syánē beprıse ábe bėbenle áded Dyób,
bėkamlān-ne á nkóńsé.”

¹¹ Dós rınóné ámpē bon rıwógē ehób é' ángel bııb, élıńnéde áde abwóg dé atii dé nkamlēn wēe éché nyam ne bad bémháá bėbédé. Éché ángel ébédé e'kále ne e'kále, e'dun ne e'dun.

¹² Bėnkōń ne ehób éche échágké bān,
“Mwán-a-Ndyoń ní mbód nıme bėnwıı'ε
akwógnéde ákud ngıne, nhōn, debyéé, ngum,
edúbé, ehúmé ne mekenag.”

¹³ Dós-áá rıwógē nhagtéd rısyāā nıme rıde ádyób ne á nkóńsé, á mbwóg e baásē,
á edıb é nkwe-te, bwēm ésyāā ábe é'dé áwēd-te bėkōne bān,
“Mekēnag, edúbé, ehúmé ne ngum
bėbē ne ane awé adııde atii dé nkamlēn,
bėbē-ε ne Mwán-a-Ndyoń ní mbód, abé ne abé.”

¹⁴ Éché nyam éniin ehóbé'áá bān, “Ebē nē.” Bad bémháá-ε bėnkwe áse bėbagé-ε mós edúbé.

* 5:1 E'dıben saámbé é'bédé e'twé ábe bėpėnnáá nhıbe ní kálag, mod awé adıbpē'áá-ε bós abédé mod awe ene kunze émbagnédé.

6

J̄one anyin̄é Mwān-a-Ndyōj n̄i mbód adibp̄é e' diben ntóób

¹ D̄so n̄nyin̄é ane Mwān-a-Ndyōj n̄i mbód adibp̄é ediben ehóg át̄int̄é e e'diben saám̄bé. H̄éé n̄wógé nyam p̄óg át̄int̄é e éch̄é nyam éniin ehōb̄é aá “Hyág!” Ehōb ebédé ch̄ó n̄é dyōb ákume áte.

² H̄éé n̄nóné bon̄ n̄nyin̄é h̄óse ech̄é ép̄ube'. Mod aw̄é andīi ch̄ó anwálé ép̄wese beb̄é-'e m̄ó ekóté e nkaml̄en. Abédé mod aw̄é ayōgk̄é nzum atóm áte akaḡé'áá-'e áke d̄étóm nzum émp̄ee áte eche áwanné ne bad bé ekoyí.

³ D̄so n̄nyin̄é ane Mwān-a-Ndyōj n̄i mbód adibp̄é ediben eche élónt̄éné é'be. D̄so n̄wógé nyam ech̄é élónt̄éné ébe, át̄int̄é éch̄é nyam éniin ehōb̄é aá, “Hyág!”

⁴ H̄éé h̄óse emp̄ée, ech̄é eyage bwāmbwam, ébidé áwed. B̄emb̄é mod aw̄é andīi ch̄ó kunze bán áhūd nsaj̄ á nkōjs̄é-te ábel bon̄ baányon̄ béwūé' nhóg ne anin̄ií. B̄emb̄é-'e m̄ó s̄anj̄kalaa a nkwáté.

⁵ Ade n̄nyin̄é ane Mwān-a-Ndyōj n̄i mbód adibp̄é e'diben ábe é'lónt̄éné é'láan, d̄so n̄wógé nyam ech̄é élónt̄éné éláan, át̄int̄é e éch̄é nyam éniin ehōb̄é' aá, “Hyág!” H̄éé n̄nyin̄é h̄óse ech̄é eh̄ine'. Mod aw̄é andīi ch̄ó anwálé k̄ilo á ekáá.

⁶ D̄so n̄wógé ehōb̄ n̄n̄gane ehōb̄ eche ébidé át̄int̄é e éch̄é nyam éniin, ehōb̄e n̄n̄ aá, “Asii á ngun ahóg nḡen̄ áyāl e nsábe mé nsón mé epun é b̄in̄ ne mesii mé báli meláan n̄me méeelele nkun áyāl e nsábe mé epun é b̄in̄. Bon̄ pen mod eeb̄ébt̄é m̄ol ne m̄im̄.”

⁷ D̄so ane Mwān-a-Ndyōj n̄i mbód adibp̄é ediben eche élónt̄éné é'niin. H̄éé n̄wógé nyam ech̄é élónt̄éné éniin ehōb̄e' aá “Hyág!”

⁸ H̄éé n̄nyin̄é h̄óse ech̄é edé mbále. Mod aw̄é andīi ch̄ó béchágé'áá m̄ó bán Kwéed, Mb̄wóg e kwééde-'e áh̄id̄é m̄ó ámb̄id̄. B̄emb̄é b̄ó nḡine ákaml̄en eped é nkōjs̄é ehóg át̄int̄é e'ped éniin. B̄énhōb̄ bán ábenlad nkwáté, nzaa, nkole ne e'loo nyam áwūene bad, á nkōjs̄é te.

⁹ D̄so ane Mwān-a-Ndyōj n̄i mbód adibp̄é ediben eche élónt̄éné é'taan. H̄éé n̄nóné á menyán mé e'twé sé, bon̄ n̄nyin̄é' e'd̄aád̄an̄ áb̄e bad ábe b̄enwūú' é áyale békálé'áá eyale é Dyōb̄ béhōb̄é-'e mam mé mbále t̄nḡene Dyōb̄ nyaa eche séb̄ií bán mbále ch̄ó edé.

¹⁰ Ab̄é e'd̄aád̄an̄ é'h̄ób̄é'áá ne ehōb̄ eche éch̄gk̄é bán, “A-S̄anj̄ Dyōb̄ a Ngum, w̄e aw̄é esáá eb̄é-'e mbále, k̄áns̄e p̄ondé eh̄éé w̄ék̄aádt̄é bad bé nkōjs̄é bon̄ ékūn mekií n̄im̄ed n̄me b̄esyógé?”

¹¹ H̄éé beb̄ágé b̄ó mod t̄éé mengombe n̄me m̄ép̄ube', b̄eláá-'e b̄ó bán b̄ésine mwāmp̄in̄ n̄i p̄ondé, k̄áns̄e ne á p̄ondé eche mesonḡé mé baányan̄ bé bemb̄aled̄e ne baányan̄ bé Kr̄isto mel̄ōnn̄é, ábe b̄ewūú' é b̄omp̄é meleml̄em nḡane b̄enwūú' é b̄ó.

¹² D̄so ane Mwān-a-Ndyōj n̄i mbód adibp̄é ediben eche élónt̄éné ntóób. H̄éé n̄nyin̄é nḡane nd̄oob̄ énánn̄édé ne nḡine, enyen-ne énh̄in̄ bwāmbwam, nḡon̄ esyā́l-le eyage' n̄éé mekií.

¹³ Betint̄ine b̄énhūn̄ á nkōjs̄é nḡane e'pum é' mel é'sood̄é nch̄ole áde epub ésgát̄é alin̄ á bwel.

¹⁴ Abobe dénn̄yōj n̄n̄gane b̄éd̄ás̄ nh̄ibe n̄i k̄alaḡ áte n̄me b̄ennyi'í áte. Mb̄ood̄ esyā́l ne mb̄wóg esyā́l eche mendib̄ mel̄ánn̄édé b̄énhid̄é á e'dii.

¹⁵ H̄éé k̄an̄ é nkōjs̄é, nd̄ale é bad, bad b̄emb̄áá bé s̄anze, beh̄on̄ bé bad, nḡine é bad, bet̄an̄ ne kunze b̄ékōnḡé ȳál á pwóg é meláá t̄é ne á meláá n̄me m̄ebédé á mb̄ood̄ m̄in̄.

¹⁶ B̄échágé'áá mb̄ood̄ ne meláá b̄éhōb̄é bán “Nyéh̄unt̄ed̄ sé am̄in̄ nyék̄uten̄ sé ábel bon̄ ane aw̄é adé á atii dé nkaml̄en eenyin̄é sé, melinḡá mé Mwān-a-Ndyōj n̄i mbód-te méep̄iid̄ sé.

17 Epun é ebébtéd éche nımāb melıngá mēbıdeé áwed émáá ape, modmod éehenlé-’aá chó atāngen.”

7

Bembaledε bé Dyōb

békıdε e’chem a’só e’ mbom

1 Ade nē atómé, mennyın ángel éniın étyéémé á metōngé mé nkōıse ménıın. Echē ángel énkāı metōngé mé nkōıse ménıın nıme epub étóméé ábel boı epub étómé’ á nkōıse, ké’ε á edıb é nkwx ké’ε tāıngene bwel ké e’hóg.

2 Dóo rınyıné ángel empée ebıde á pæd echē enyen ébıdeé, awánlé e’chem é’ Dyōb dé alonjé. Héε ene ángel ne ehób éche échágké, échageé échınıı ángel éniın eche bébagé ngıne ábēbed nkōıse ne edıb é nkwx

3 boı álāıgē bó aá, “Nyéebébté nkōıse, ké’ε edıb é nkwx ké’ε mæl, káıııne á pōndé echē débādēε bembaledε bé Dyōb e’chem á mbom.”

4 Dóo rıwógé mesonjé mé bad nıme bébádté e’chem á mbom. Bébedé Mbwókel ekalé póg, móom mé e’kálé ménıın ne e’kálé é’niın. Mmē mesonjé mémıbd átınté e metúmbé mé alonı á Israel mésyāıl dyóm ne mébe.

5 Mesonjé mé bad nıme bémbādēε ábē e’chem á mbom á túmbé e Juda mébédé dyóm dé e’kálé ne é’be. Á túmbé e Ruben mébédé dyóm dé e’kálé ne é’be, á túmbé e Gad mébédé dyóm dé e’kálé ne é’be.

6 Á túmbé e Ashεε mesonjé mé bad mébédé dyóm dé e’kálé ne é’be, á túmbé e Naftali mébédé dyóm dé e’kálé ne é’be, á túmbé e Manase mébédé dyóm dé e’kálé ne é’be.

7 Á túmbé e Simıone mesonjé mé bad mébédé dyóm dé e’kálé ne é’be, á túmbé e Levi mébédé dyóm dé e’kálé ne é’be, á túmbé e Isaka mébédé dyóm dé e’kálé ne é’be.

8 Á túmbé e Zebulon mesonjé mé bad nıme bémbādēε e’chem á mbom mébédé dyóm dé e’kálé ne é’be, á túmbé e Joseb, mébédé dyóm dé e’kálé ne é’be, mébē-’ε á túmbé e Benjamin dyóm dé e’kálé ne é’be.

Nsabe nıme bad bé Dyōb békıdε

9 Ade nın atómé dóo rınyıné nkúı nı bad. Bēmbuú áte nyaa echē modmod éehelé-’aá bó atōı. Bémıbd melonı ne melonı, bémıbd metúmbé ne metúmbé, bēbé nyaa é bad ésyāıl béhōbe-’ε mehób nyaa ne nyaa. Bentyēem á’só bé atıı dé nkamlen ne é’ Mwān-a-Ndyōı nı mbód. Bénhε mengombe nıme mépúbe’ bēwálé-’ε e’kıkag é’ mıı á mekáá.

10 Béhóbé-’áá ne ehób éche échágké bán, “E’soosonı é’ baányonı é’húe ne ádeı Dyōb, Dyōb áde ádııde atıı dé nkamlen, é’húē-’ε ne awe Mwān-a-Ndyōı nı mbód.”

11 Bad ábe bēnlāınéı adé atıı dé nkamlen bébedéε ángel ésyāıl, bad bēmbáá, ne échē nyam éniın. Bēnkwx áse á’só bé atıı dé nkamlen bébagé-’ε Dyōb edúbé.

12 Béhóbé-’áá bán, “Ebē nē! Nnam, ehúme, debyéé, mesáıngen, edúbé, ngıne, ne ngum bēbē ne ádeı Dyōb abé ne abé! Ebē nē.”

13 Dóo mod ambáá nhóg ásedtēε me áá ken, “Benzéé bēn ábe bēwáá mengombe nıme mépúbe’? Héé bēbıde’?”

14 Mentımtén mó meé, “A-sán, wε-εé ebıı.” Dóo álāıgeé me áá, “Abēn bad bóo bétómé metake me ngıne áte; bēwóbpé nımāb mengombe ne mekıı mé Mwān-a-Ndyōı nı mbód, bepúbte mó.

15 Né-’aá ábélé boı bēbé á’só bé atıı dé nkamlen á Dyōb, bébagé-’ε Dyōb edúbé nkıu ne mıte áwe ndáb e mekáne. Ane awé adé á atıı dé nkamlen, adé áhed pōndé ésyāıl ānōn bó.

¹⁶ Nzaa éewaá bós ámpē mbéd, píd-te ámpē éekóbpē bós mbéd. Enyen éebábédte bós, béewóg-kaá e'chode bé ekíde é'ngine.

¹⁷ Ayále nén ane Mwän-a-Ndyon m mbód awě adé áfinté e atii dé nkamlen, mwēn ānōn bós. Alyāgēd-te bós wēē mendíb nıme mbídé á n'yéle nıme mbage' alongé médíí. Dyōb-pe ámpē dépīnē bós mēsod mēsýāäl á míđ.

8

Mwän-a-Ndyon m mbód adıbpé ediben eche elónténé saámbé

¹ Dóo ane Mwän-a-Ndyon m mbód adıbpé ediben eche elónténé saámbé. Ade adıbpé chós, ekíde énhōō áte ádyōb, dyam-ēē ade eped é háwa.

² Héē rınyıné ángel saámbé eche étyéémé á'sō e' Dyōb, bébágé bós e'lon saámbé.

³ Dóo rınyıné ángel empée epedé, etyéémé á'sō é' menyán mé e'twé, awánlé díse á gól áde béhyāntē e'twé áte. Bēmbud mós e'twé abē bán áladten mekan mé bad bé Dyōb bēsýāäl ábe mendē á menyán mé gól. Mmē menyán mēbédé á'sō bé atii dé nkamlen.

⁴ Mwēntud mbídé áá ayāl e e'twé ábe ángel énwālē, rıkág ámın ne mekáne nıme ene ángel ékánnádtáá bad bé Dyōb. Ene ángel entyéém á'sō é' Dyōb.

⁵ Héē ene ángel étédé kúmbe eche e'twé é'bédé áte, atéd muú nıme mēmbíd á menyán mé e'twé, alónéd áwēd-te, bon ásyōg á nkōņsé. Nén dēmbēl dyōb ákumé áte e'saád ébıde, emwēdmwēd étóme, ndōb-pe énāñnad.

Ángel etós e'lon bé'só é'niin

⁶ Dóo échē ángel saámbé eche énwālē e'lon saámbé ébōņséné átōñ abé e'lon.

⁷ Ángel e'só entōñ échē elon. Héē meláá mé mbuú ne muú nıme meládténé ne mekií bébóótédé asoo á nkōņsé. Eped ehóg áfinté e'ped bé nkōņsé é'láán émmad ahyāñ. Eped é ahın é mel ehóg áfinté e e'ped é'láán ne byaa é'sýāäl bēmmad ahyāñ.

⁸ Ángel eche elónténé ébe entōñ échē elon. Héē chōm eche éwágné néē sánkalaa á mbōod échē ehyáá' éhúné á edıb é nkwxē te.

⁹ Eped e edıb é nkwxē ehóg áfinté e'ped é'láán, éntım mekií. Donje ahóg-ke áfinté e monje meláán mé bwēm ábe é'dé á alongé bēnwē á edıb é nkwxē-te wē. Donje á stıma ahóg-ke áfinté monje meláán eche ébédé á edıb é nkwxē te wē chāmpē émmád abéb.

¹⁰ Ángel échē elónténé é'láán entōñ échē elon. Héē sánkalaa á tintıne awé achōdné áá néē ekag ábidé ádyōb, ahún ámın e eped ehóg áfinté e'ped bé e'dıb é'láán ne ámın e mendıb nıme mēbíde' á n'yéle.

¹¹ Dın áde ane tintıne ádíí "E'chāa." Eped é mendıb ehóg áfinté e e'ped é'láán, é'chós'áá. Bad híın ábe bēmmwē nıme mendıb bēnwē ayále nén méchós'áá.

¹² Ángel échē elónténé éniin entōñ échē elon. Dóo chōm ébómé eped é etondē ehóg áfinté e'ped é'láán, ébōm eped é ngon ehóg áfinté e'ped é'láán, ébōm eped é betintıne ehóg áfinté e e'ped é'láán. Né dēmbēl eped ehóg-téé áfinté e'ped é'láán ábe ábēn bwēm bēnkwxē ehıntén. E'nyınen bé ekıde bēnkēmbáá á e'ped é müte ehóg áfinté e'ped é'láán, bēnkēmbáá-aa á e'ped é nkku ehóg áfinté e'ped bé nkku é'láán.

¹³ Dóo nınóné bon rınyınē' mbye apumme se ádyōb te álēbpē-ē ne ehób eche échákgké áá, "Medım, medım, medım mēbē ne bad ábe bēdyēé' á nkōņsé á pōndé eche échınıí ángel é'láán étōñgē ábāb e'lon, ábe békwogé atōñ."

9

Eloj éche elónténé é'táan

¹ Angel echē elónténé étáan entónj échē eloj. Dóo rínyíné tintine abidé ádyōb ahún á nkōñsé. Bēmbē mós e'kii bé echóg échē éewóo asóg.

² Andibé nsal mé echóg échē éewóo asóg. Mwěntud mémbid áwēd-te nĩme rídé nēngāne mwěntud nĩme nĩbidé á muú rí ngine. Mmē mwěntud, mémběl enyen éche épéné'áá éehalé'aá ekide anyined.

³ Dóo bengóméé bébidé á mwěntud tē wē, bēsūd á nkōñsé. Bēmbē'-ē bós ngine nēngāne bengaabōbē bé mpwēn ábē bédé á nkōñsé.

⁴ Bénlāā ábē bengóméé bán béebelé nkə̀ə̀kə̀ə̀ ké'ē byaa ké'ē mel ebébtéd ké ehóg. Bōj bán bébel ebébtéd dāsō wēē bad ábē béewóo e'chem é' Dyōb á'sō é' mbām.

⁵ Békēmbaa ábē bengóméé kunze áwúu ábē bad. Bōj bēmbē bós kunze átaged bós á etún é ngon étáan dēmpen. Metake nĩme ábē bad béwōgkē nzé ábē bengóméé belédé bós, mébē nēē metake nĩme mod ákudéé nzé ngabōbē á mpwēn alédé mós.

⁶ A etún e échē ngon étáan, ábē bad bēhēd kwéed bōj béenyinné. Bédəj bán bēwē, bōj kwéed ēnyagéd, ebāj bós áyāl.

⁷ Abē bengóméé bēmbēē nēē hōse éche bēbōñséné ákēen á bel. Bwēm ábē é'bédé bós á nló é'bédé nēē e'kóté bé nkamlēn é' gól, e'só'-ē é'bē bós nēē e'só é' baányonj.

⁸ Nyonj ébédé bós nēē nyonj é bebaad, mesonj'-ē mébē bós nēē mesonj mé ngii.

⁹ E'kid é'bédé bós á tāl ábē é'bédé nēē e'kii ábē bad bēwáa'ē ákúdtēn tāl á pónde e bel. Ntəgag nĩme nĩmāb mepab mébélé'áá mbédé nēē ntəgag mé e'bambam ábē hōse híin édoléé ákē á bel.

¹⁰ Bénwōj nkon bēwōj'-ē nsyag nēē nkon rí ngabōbē á mpwēn. Mmē nkon mós-áá ríwóo ngine ábel baányonj ebébtéd á etún é ngon étáan. ¹¹ Bēwóo kəñ echē ekamlan bós. Ene kəñ edii ángel echē enəne' echóg échē éewóo asóg. Ade dīn ádii á ehób é Hibru bán Abadəne, ábē'-ē á ehób é Grikia bán Apolyəne (nē ádé nēn bán mod awē abébte).

¹² Nēē medim mé'sō métómé ámbid enén, medim mémpēe mébē médii méhúe'.

Angel etóó eloj éche elónténé ntóob

¹³ Angel echē elónténé ntóob entónj échē eloj. Dóo ríwógé nēē ehób ébidé á metónjé méniin mé menyán mé e'twé mé gól nĩme mébédé á'sō é' Dyōb.

¹⁴ Echē ehób élanjē ángel echē elónténé ntóob, echē ewánlé eloj nēn áá, "Huné ángel éniin éche Dyōb ábánné á mehanj á edib embáá é Yufretes."

¹⁵ Ene ángel enhuné échē ángel éniin. Bēmmād bós abonjēn áwúu donje ahóg áftinté e monje mé bad meláán ene pónde chēn, échē epun chēn, ene ngon chēn nĩmē mwē mēn.

¹⁶ Bénlāā mē mesonjé mé sánze éche édiídé hōse. Ebédé mbwókel é e'dun é'be.

¹⁷ Nēn dóo ményinné échē hōse ne bad ábē bédíidé chós á ndóg-te. Bad ábē bēndii chós bēnwáa e'kii ábē bēwáa'ē ákúdtēn tāl á pónde e bel. Abē e'kii é'yágé'áá nēē muú, é'bē'-ē ebəj nēē blúu, é'bē'-ē ebəj nēē nsulē. Nló nĩbédé échē hōse nēē nló rí ngii, muú, mwěntud ne muú nĩme rídé ebəj nēē nsulē bēbidē'-ē chós á nsəl.

¹⁸ Mmē medim meláán, nédē muú, mwěntud ne ebəj éche édé nēē nsulē, ábē é'bidé'áá échē hōse á nsəl bēnwū donje ahóg áftinté e monje mé baányonj mé meláán.

19 Ngine edé échē hósē dásō á nsəl ebé-'ε á nkon. Mmāb nkon rídé nēε nyā, ne nló áyāl, bēbenlad-te mó ābel bad ebébtéd.

20 Moonyon aníní asyāól awē alyagé asē awē nĩmē medim ménkēnwúú'ε bēnkētédéé abele á myōb nĩme bēn bēbélé. Bēnkēnsógké e'dāádəŋ bē mbéb abele, bēnkēnsóg-kaá myōb mémpēe abele, myōb nĩme bēbēnlé gól, sílva, brōns, ké meláá, ké'ε hyōn, myōb nĩme méenyĩnnē', méēwōgnē', méēhélé-'ε akε.

21 Béetēdte-'āa ādāb abel dé mbéb ātīmēn Dyōb. Béētēdteē awúu á bad, béētēdteē akum á nḡan, béētēdteē akáb dé mesón, béētēdte-'āa echīb.

10

Jōne anyine ángel echē ewānlé mwā nhibe rí kálag

1 Hē dōo rĩnyíné ángel e ngine empēe ebídé ádyōb, esude' asē, mbag élanḡnéd mó, ngubélen-ne ebé mó á nló. E'só bēmbē mó nēε enyēn, mekuu-'ε mébé mó nēε mekon mé muú.

2 Anwálé mwā nhibe rí kálag awē bédíbpé áte, ásūm ekuu é ekáá é mbáá á edíb é nkwē-te, ásūm-me ekuu é ekáá é emwəd á nkin.

3 Hēε áhóbé ne ehōb éche échággké éche éwágné ehōb é ngii echē edume áte. Ade álébpé esaád, nḡin saámbé ēnkweñtén ne ndumag.

4 Ade ékúmé áte kumén, nhedé'áá chōm éche bēhóbé abooted dé atel, boŋ ríwōgē nēε ehōb ebídé ádyōb nēn bán "Kóó mekan nĩme nḡin saámbé éhóbé, mébé kun, weētēlé' mó asē."

5 Dōo ángel echē ményĩnnē nēε ásúmé ekuu ehóg á edíb é nkwē-te boŋ ásūm-me échíníí á nkin átífidé ekáá é mbáá ámín

6 boŋ ánwāg melē á dīn á Dyōb áde ádé á alongé abé ne abé. Mó áhágé nkon rí mīn ne rísé ne edíb é nkwē ne bwēm é'syāól ábe é'dé áwəd-te. Ene ángel ehōb áá "Abébed á pónde ké ahóg déebáá ámpē.

7 Boŋ áde ángel echē elónténé saámbé étōŋgē échē elon, Dyōb dēbēl dyam áde ántíí' é áá mōsbēl áde ádé á e'konḡéd-te. Abēl ngáne ánlāā' é ábe bembədeε, bekal bē'dāádəŋ."

8 Hēε ehōb éche ménwōggké nēε ebídé ádyōb élanḡgēε me ámpē nēn áá, "Kág étéd nhibe rí kálag nĩme rídēbnédé áte nĩme rídé á ekáá é ángel echē etyéémé ne ekuu ehóg á edíb é nkwē échíníí-'ε ebé á nkin."

9 Dōo ríkíí wēε ene ángel boŋ rílanḡē mó meé ábe me ane mwā nhibe rí kálag. Dōo álanḡgēε me áá "Kōb nēn, édyē. Achāsd wε abum áte boŋ anyĩn wε á nsəl nēε e'chuu."

10 Dōo ríkóbé mwā nhibe rí kálag áwe ekáá, ndyé-'ε mó. Annyĩn me á nsəl nēε e'chuu. Boŋ áde nĩmáá mó amú, anchāsd me abum áte.

11 Dōo bēlanḡgēε me bán, "Etāŋgēné mekan ahób nĩme mēbenléd ne melon híin, bad nyaa ne nyaa, mehōb nyaa ne nyaa ne kāŋ é bad híin."

11

Jōne anyiné mbōŋ ébe

1 Dōo bēbágé me ntón nĩme rídé nēε chōm éche bēhāgnēε bwēm, boŋ bēlanḡē me bán, "Kág ehāg ndáb e Dyōb, ehāg-ke menyán mé e'twé, étōŋ-'ε bad ábe bēbāge Dyōb edúbe áhed.

2 Boŋ weéhāgē' eyáde pēn áyāle nēn bēbágé chō wēε bad ábe bēébíi Dyōb. Bēdyañtéd Dyad áde Asáá ámín á etūn é móom mé nḡon méniin ne ébe.

3 Měbě échēm mbóŋ ébe kunze áhób mekan níme mébenléd á pónđe echě ehúe' á etún é e'pun ekálé ehóg mbwókel ébe ne móom ntóób. Běwāā-'ε mbóté é melebe."

4 Echén mbóŋ ébe édií mēl mé menzab mébe ne metii mé etrukán mébe níme métyéémé á'sō ábe Sāŋgwéé awě akamlan nkōŋsé.

5 Nzé mod awémténé-'ε bó ebébtéd abel, muú nǐbíd bó á nsał níme nhyante ábāb bad bé ekoyí nímād-te bó áse. Nén dōo kénzée awě awémténé bó ebébtéd abel bēwūū'ε mō.

6 Abén bad bēwóo ngine ákāj abobe ámín ábel nén mbúú eechóg á pónđe echě bēlāŋgeé bad mam níme Dyōb áhóbé aá mébenléd. Bēwóo-'ε ngine ábel e'dib é'tim mekií, bēwōŋ-'ε ápeen medim á nkōŋsé pónđe ké ehéé echě bédáá.

7 Ade bēmad-taá mam ahób níme bēlómé bó ahób, ene nyam echě ebídé á echóg echě éewóo asóg étyēmēn bó nzum, etóm bó áte ewūū-'ε bó.

8 Mmāb ndim-me ménaá á nzii echě epoo' á dyad ámbáá tē wée bēmboméé awab Sāŋgwéé á awōg. Béchage adé dyad á ngan-tē bán Sodom káa Egipto.

9 A etún é e'pun é'láán ne eped, bad bēbíd meloŋ ne meloŋ, metúmbé ne metúmbé, mehōb nyaa ne nyaa, ne bad nyaa ne nyaa bēnōn nímāb ndim ésebān bēkwentan bán bēlíme mō.

10 Bad ábe bédé á nkōŋsé bēwōgēn abén bad bēbe echab kwééd menyinge. Béchāg ngande, bēbāg-ke nhóg ne aníníí nde álúmed menyinge. Bēbēl nē áyāle ábē bekal-bé-e'daádāŋ bēbe bēpínádtáá bó metake bwāmbwam áde bēbédé á nkōŋsé te.

11 Boŋ ámbíd e ábē e'pun é'láán ne eped, peme e alongé embíd wée Dyōb esól bó áte bēpuu bētyéem-me ámín. Mbwóg nǐ ngine ménkōb bad ábe bényín bó.

12 Dōo ábē bekal-bé-e'daádāŋ bēwógeé ehób echě échāgké ebídé ádyōb nēé élanŋgeé bó nēn aá, "Nyéhyag ámín hén." Dōo bésólé á mbag-té bēke-'ε ádyōb. Abāb bad bé ekoyí bényín nēé bēkagké.

13 Abwōg-ábwōg ndōob énaŋnéd ne ngine. Eped é dyad ehóg átínté e e'ped dyōm ábe adé dyad ámbáá émpāntēd áte. E'kálé e' bad saámbé bēnwē áde ndōob énaŋnéde nē. Mbwóg ménkōb bad ábe bēlyógé áse, bēbagé Dyōb á ngume, mō awě adé ámín, edúbé.

14 Medim níme mélónténé mébe méntōm. Boŋ nōnē! Medim níme mélónténé meláán mékwógé ape.

Angel etóo eloŋ echě élónténé saámbé

15 Angel echě élónténé saámbé entōŋ éché eloŋ. Dōo ehób éche échāgké ebídé ádyōb ehōbē nēn bán, "Nkamlēn mé nkōŋsé nítímē nkamlēn níme awed Sāŋgwéé, Dyōb ne awě Křistāe, ákamlēn-ne á ngindé ne á ngindé."

16 Hē dōo ábē bad bēmbáá móom mébe ne bēniin ábe bēdífidé metii mé nkamlēn á'sō é' Dyōb bēkwédé áse á'sō é' Dyōb bēbage mō edúbé.

17 Béhóbé nēn bán,
"Séságnéné wē a-Sāŋ Dyōb á Ngum, wē awě edé ane ne awě ambé. Séságnéné wē áyāle ebēnlédé echōŋ ngum eboótédé akamlēn.

18 Bad ábe bēebēnlé wē bēnlŋŋ áyāle melingá nímōŋ mé ngine mēmpě. Pónđe epedé echě bēkáadtēé bad ábē bēwédé.

Pónđe epedé echě ábōŋ bēmbāledē, bekal bē'daádāŋ, ne bad ábe bēbenle wē ábe bēbage wē edúbé, bad bēsýāāł, ken bad ábe bédé etógnén-'ε ké'ε ábe bēesé etógnén, wēsābēē bó. Ene pónđe dōo wēbēbēdtē bad ábe bēbēbte bad á nkōŋsé te!"

19 Hē dōo nnyíné ndáb e Dyōb echě edé ádyōb nēé édíbnédé. A ndáb-te wē-'ε, nnyín Ntyág mé Melē. Emwēdmwēd étómáá, e'saád é'bíde', ádyōb ákumé' áte, ndōob énaŋnád áse, meláá mé mbúú mé ngine-'ε méhúne.

12

Jɔne anyíné mmwaád ne dragɔne

¹ Hê dɔɔ e'chemléd é' ngine é'bidé ámín. Mmwaád ambé awě eche mbóté embēē enyeu, ngɔn chɔ-'e ebé mɔ á mekuu sé. Ekóté é nkamlen éche betintine dyóm ne bébe bédí áyál ebédé mɔ á nló.

² Ambé dyēm, ákwɔg-ke achyáa. E'wε ne metake mé achád nĩme áwógé'áá mēmbēl akánéd awé ámín.

³ E'chemléd bé menyáké bēmpēe bēmbíd ámín. Dɔɔ dragɔn ébidé táléd. Enkāl bwámbwam, éyágé-'ε. Enwɔŋ nló saámbe ne meséb dyóm. Nló tēé mēnwāá ekóté é nkamlen.

⁴ Andolén nĩmē nkon donje ahóg átínté e monje mé betintine méláán ábe bēbédé ádyɔb, abwém-me bɔ á nkɔŋsé-te. Ene dragɔn entyéém mmwaád awé ahedé'áá achyáa á'sɔ-te ábel nén nzé achyáa ádyē mɔ mwān.

⁵ Dɔɔ ane mmwaád áchyáa mwān a mwenchóm awé atáŋgéné melon mēsýāl akamlen ne ekáá éche éhyédé. Bon bēnsog mwān, békēēn mɔ wēε Dyɔb ádíí ne ádē atii dé nkamlen.

⁶ Ane mmwaád antóm mehlé á éhyáŋge wēε Dyɔb dēmbɔŋsénne áá bétɔgen mɔ á etún é e'pun ekálé ehóg mbwákel ébe ne móom ntóob.

⁷ Hê dɔɔ nzum ékúmmé ádyɔb. Maikelε bɔ éche ángel béntyēēmēn ene dragɔn nzum. Ene dragɔn chɔ-'ε ámpē ne éche ángel bétyéémén bɔ nzum.

⁸ Bon Maikelε ne éche ángel béntóm ene dragɔn ne éche ángel áte. Dragɔne ne éche ángel bēnkēnwɔŋgé etál ádyɔb ámpē.

⁹ Dɔɔ bēhúnté ene sánkalaa á dragɔn á nkɔŋsé-te. Ene dragɔn chɔ ebédé ene nyā e'boád eché béchagéé bán Devæle ne Satane, awé adoge' nkɔŋsé nĩsyāl. Bēmbwēm-me éche ángel ésyāāl ásē á nkɔŋsé nchoo ne mɔ.

¹⁰ Hê dɔɔ n̄wógé ehɔb éche echáŋké ébidé ádyɔb éhābē nén bán, "Bɔɔb-pɔɔ, e'sɔɔson é' Dyɔb é'pédé. Dyɔb álúmté eche ngine e nkamlen nēε kāŋ. Awé Krístæe álúmté eché ngine bɔɔb. Ayāle ane awé ahóbé'áá á'sɔ é' Dyɔb nkuu ne mĩte áá ábesyáné baányan bēbélé mbéb, bēhúnté mɔ á nkɔŋsé. Abánáá bɔ mam áyál á'sɔ é' Dyɔb nkuu ne mĩte.

¹¹ Mekíí mé Mwān-a-Ndyɔŋ ní mbód ne mbón e mbále eché bēbidé'áá bēmbēl bétóm Satane áte. Bēnkwentén ké kwééd ákal eyale é Dyɔb áyāle nkalan nĩme békálé'áá mībédé mbále.

¹² Né-ɔɔ, mĩne ne ábe bēsýāl ábe bédé áwed, bēnwɔg menyinje. Bon ndutul ébē ne bad ábe bédé á nkɔŋsé ne ábe bédé á edib é nkwe áyāle nén Devæle asudé ásē áwēn ne melinǵá mé ngine ngáne ábíí áá eche pónde edé esón."

¹³ Pónde eché ene dragɔn ényíné áá bēhúnté mɔ á nkɔŋsé, embootéd ane mmwaád awé anchyáa mwān a mwenchóm anan.

¹⁴ Bon bēmbē ane mmwaád mepab mēbē nĩme sánkalaa a mbyε, ábel nén ápume ápe hóm áde bēbɔŋséné mɔ á éhyáŋge, hóm áde ákudté ntɔgén á etún é mwē nílān né eped, wēε békáé'ε mɔ wēε ene nyā.

¹⁵ Dɔɔ ene nyā esádé ane mmwaád aléed á yál. Adé aléed dēnsyogé nēε edib émbáá, ábel nén éhóod ane mmwaád.

¹⁶ Bon ndɔɔb enwɔŋgén ane mmwaád émfi edib éche émbíd ene dragɔn á nsal.

¹⁷ Dɔɔ dragɔn éliné ane mmwaád, bon ákǵ ákumé' bel ne nchyáátén nĩme ane mmwaád nĩsyāl nĩme nĩyágé ásē, bad bēsýāl ábe bébele ngáne Dyɔb áhedéé bon bēbidé-'ε Yesue mbón.

¹⁸ Dɔɔ ene dragɔn étyéémé á nkin mé edib é nkwe.

13

Jone anyiné nyam ébe

¹ Hê dǎo rinyiné nyam ebíde' á edíb é nkwe'-te. Ene nyam enwón meséb dyóm ne nló saámbe, ewón-'é e'kóté bé nkamlen dyóm áwe meséb mǎn. Nló téé ménwón dǎn áde ásyáa' Dyób.

² Ene nyam eché ményinnē embé néé ebwé é ngǎ, mímē mekuu-'é mékál méhé-'é nyon áyāl néé mekuu mé nyam e ahín eché ekaa' ewón-'é nyán éche échábé eche béchagéé bán Bée. Mímē nsál mémbē néé nsál rí ngii. Drǎgǎne ambě ene nyam eche ngíne, ábe-'é chó áde atii dé nkamlen ne ngíne e nkamlen.

³ Ene nyam enwón nló nhóg nime mémbē byánán ríkúde sii eché empon chó awúu, bonj sii eched étim amaa. Yál enkóm bad bé nkǎnsé bésyāāl áte áyāle enén nyam, bébootéd-te chó ahíd.

⁴ Bad bébágé'áá dragǎne edúbé áyāle ambě ene nyam mímē nkamlen. Bébágé'áá ene nyam chǎmpē edúbé béhóbé nén bán, "Nzé-módé adé nēngáne enén nyam? Nzé-módé ahele atyéémén chó nzum?"

⁵ Běmbě ene nyam kunze áhób e'yale é' kúmbe ne e'yale ábe e'syáa' Dyób. Běmbǎg-ke chó kunze ábenled mímē nkamlen á etún é móom mé ngǎn eniin ne ébe.

⁶ Dǎo ene nyam enédte mímē nsál áte bonj ébootéd Dyób asyáŋ. Ansyáŋ dǎn á Dyób, asyáŋ abwóg á hǎm wée Dyób ádyee'é, asyéŋ-'é bad bésyāāl ábe bédé ádyób.

⁷ Dyób dēmbě-'é ene nyam kunze áwan nzum ne ábē bad, átóm-me bó áte. Ambě-'é mǎo kunze ákamlen metúmbé ne metúmbé, melonj ne melonj, mehób té ne bad nyaa ne nyaa.

⁸ Moosyáál awé adyee á nkǎnsé ábe chó edúbé. Bad ábe bébeé chó edúbé bédii bad ábe bételé dǎn á kálag e alongé e Mwǎn-a-Ndyonj ní mbód awé bėnwū'é. Bėntel bó mǎn se á pǎndé eché Dyób dēnhǎgké nkǎnsé. Moosyáál awé adyee' á nkǎnsé ábe chó edúbé. Moosyáál awé bėntelēé mǎo dǎn á kálag e alongé se á pǎndé eche Dyób dēnhǎgké nkǎnsé. Mwǎn-a-Ndyonj ní mbód awé bėnwū' é mǎo awóo enén kálag.

⁹ Kėnzéé awé awóo metúu áwóge'.

¹⁰ Kėnzéé awe édii nén bán atǎngéne áke á mbwǎg ákě á mbwǎg, kėnzéé-'é awé atǎngéne awé ne nkwaté, nkwaté-'áá bėwūennē mó. Nén áhednad bán bad bé Dyób bėwǎn e'kanj bé nlém, béchǎned-te ngíne-ngíne ne eyale á Dyób.

¹¹ Hê dǎo rinyiné nyam empée ebíde' á ndǎb-té, enwón meséb mébe nēngáne mwǎn-a-rídyonj ní mbód, éhǎbē-'é dyam néé dragǎne.

¹² Ebēnládtáá ngíne eché nyam e'só, ébelé-'é áned áwe e'só-te dēn. Ábelé-'é nkǎnsé ne bad ábe bédé áwēd-te aá bébage' ene nyam e'só edúbé. Ene nyam ebédé nyam eché enwónj sii eché empon chó awúu bonj ene sii émaa.

¹³ Ene nyam eché elónténe ébe embēl mekan mé menyáké mé ngíne. Embēl muu mǎbíd ádyób rǎhún á nkǎnsé bad bésyāāl bényín-ne.

¹⁴ Andǎg-ke bad ábe bédé á nkǎnsé bésyāāl ne mímē mekan mé menyáké nime ákúde kunze ábel. Ábelé'áá-'é nē á'só wée ene nyam eché enkūd sii bonj ene sii épon chó awúu. Anláá bad aá bēbel edídinge éche bébageé edúbé éche éwǎgné nyam eché enkūd sii e nkwaté bonj ebé ebé á alongé.

¹⁵ Běmbě nyam eché elónténe ébe kunze áhébe pemē e alongé á edídinge é nyam e'só ábel nén éché edídinge éhel dyam ahób éwúu-'é bad bésyāāl ábe bėekwentene mó edúbé ábe.

¹⁶ Ene nyam ennyágéd bad bésyāāl, ken bad ábe bédé etógnén ké'ábe béēsē etógnén, nhən ne ntógetóke, ntān ne kunze, aá béhē bó e'chem áwab ekáá émbáá ké'ε áwab e'só é' mbóm.

¹⁷ Modmod éhele'áa chómchóm achan ké'ε asóm ésebán awóó ábē e'chem. Abē e'chem é'bédēε dñn áde enén nyam ké'ε eche nómbe.

¹⁸ Nén áhedne debyéé. Mod ké ahéé awé awóó nsōñtən áhed áte chóm éche nómbe eché ene nyam édíí. Ene nómbe edíí nómbe e dñn á mod. Ane mod eche nómbe edíí mbwókel ntóób ne móom ntóób ne ntóób.

14

Jone anyiné Mwän-a-Ndyɔn ní mbód ne ábē bad

¹ Hē dōo rínóné bon rínyine' Mwän-a-Ndyɔn ní mbód atyéémé á mbóod eche béchagēé bān Zayon. Bad bēbédé ne mó mbwókel ekálé, móom mé e'kálé méniin ne é'niin ábe bēnwōñ áde dñn ne dñn áde Sáá áwab mesó mé mbóm.

² Ene pónde dōo ríwógé ehób ébidé ádyōb. Echē ehób ébédēε néε ntógag mé eláá éche ésobpe, ébé-ε néε ntógag rímé mbág nzé ngin etómé. Ehób éche ménwōgkē ébédēε nēñgáne ntógag ní bad ábe békume rílendε.

³ Abē bad mbwókel ekálé ne móom mé e'kálé é'niin ne é'niin bentyēem békōñé' nkāñgé mēkōšlē á'sō bé atii dé nkamlen ne á'sō é' nyam chē éniin éche édé á alonjé, ne á'sō é' bad bēmbáá. Modmod enkēnhenlé rímé nkāñgé ayáge nzése bó bad mbwókel ekálé móom mé e'kálé méniin ne é'niin ábe Dyōb ákódté á nkōñsε-te.

⁴ Abén bad bēbédēε bad ábe béewōgē mbinde e mmwaád áyāle nēn béébii' é nsób mé mmwaád. Abē bad bóó béhíde, Mwän-a-Ndyɔn ní mbód kéhéé wēε ákagké. Abēn bad bóó békódté áfinté e baányonj. Bó-'áá bédé néε e'pum bé'só ábe bēbágé Dyōb ne Mwän-a-Ndyɔn ní mbód néε mende.

⁵ Metóm ké mehóg méesaá bó á nsəl, béewóo-'áa awusé ké ahóg á yāl.

Angel eláán épééné nkalan ní mbáku e Dyōb

⁶ Hē dōo rínyiné ángel empée epumme' se ádyōb. Ene ángel empéén nkalan ní bwám ríme ndé abé ne abé. Mmē nkalanj mó-'áá álánjé'áá bad ábe bédé á nkōñsé, bad nyaa ne nyaa, metúmbé ne metúmbé, mehób nyaa ne nyaa, ne melonj ne melonj.

⁷ Ene ángel enhób ne ehób éche échágké aá, "Nyébage Dyōb edúbé, nyébage-ε mó mekenag áyāle nñn eche pónde e nkáásé emaa apc. Nyébage' edúbé ne ane awé ahágé ámñn ne ásē, edíb é nkwē ne n'yélé."

⁸ Angel empée eche elónténé ébe enhíd mó, éhōbē nēn aá, "Ndāle e Dyad, Babilōn amaa ne amaa ásyāāl! Ambēl bad bé melonj bésyāāl bēmūwē ríme mñm mé ngine. Mmē mñm mébédēε esíí é nkábtéd mé akwalεε."

⁹ Angel empée eche elónténé eláán enhíd bó, éhōbē ne ehób éche échágké aá, "Kénzēé awé abage' ene nyam eche ebídé á edíb é nkwē-te ne éche edíidinjε edúbé bonj ákūd-te abē e'chem áwe e'só é' mbóm ké'ε á ekáá,

¹⁰ mómpé ámwē mñm rímé rídé melingá mé Dyōb. Bésógé mó á kōb e melingá mé Dyōb ne ngine esyāál. Kénzēé awé abage ene nyam edúbé ane mod ákūd metuné mé muú ríme ríhunne' bwámbwam á'só é' ángel éche esáá ne Mwän-a-Ndyɔn ní mbód.

¹¹ Mwēntud ríme ríbide á muú ríme ríhyāñte' bó, ríchágke' ámñn á ngíndé ne á ngíndé. Nkuu ne müte, nkóme áte méesaá ne bad ábe bēbage ene nyam ne éché edíidinjε edúbé. Né-'áá edíí ne kénzēé awé awóó e'chem é' dñn ábe ene nyam."

12 Nén áhədnađ bān bad bé Dyōb bėkaŋ nłēm. Bad ábe bėbėle ngāne mbėndé é Dyōb éhədėé boŋ bėdúbe-’ε Yesue.

13 Dó-’aá nĩwógé nées ehōb ébídé ádyōb éhābē aá, “Tēl ásē nén wεé, bootya bōob, nnam ne bad ábe bėwédé, áyāle bėdúbpe Sāŋgwéé.” Edāádāŋ éhōbe nén aá “Eε, bėkūd nkōme áte áyāle nsōn nĩme bėbėlé, bėkūd nsábe áyāle nsōn nĩ bwām nĩme bėbėlé.”

Jōne anyiné bėpáde’ mbote á nkōŋsé

14 Dóo nĩnóné boŋ nĩnyínē mbag eche épúbe’. A mbag mĩn wē, mod andyεé awē awágné Mwān-a-Moonyon. Ekóté é nkamlēn é gól ébē mó á nłó, páá eché ekóbpe eche bėpádnεé bwēm nēŋgāne ngun, chō-’ε ebé mó ekáá.

15 Áŋgel empée embíd á ndáb e Dyōb-te élēbpē ane awē andyεé á mbag mĩn ne ehōb eche échágkė aá, “Benléd ehoŋ páá ápád mbote, áyāle pónđé epedé eché bėpádeé. Mbote é nkōŋsé émáá ayāg.”

16 Dóo ane awē adyεé á mbag mĩn átómteé páá á nkōŋsé, apád-te mbote é nkōŋsé ésyāā.

17 Dóo áŋgel empée eché chō-’ε ámpē enwálé páá eché bėpádnεé bwēm nēŋgāne ngun ebídé á ndáb e Dyōb eché edé ámĩn.

18 Áŋgel empée empē eché ewóo ngĩne ámĩn e muú, embíd á menyán mé e’twé boŋ álēbpē áŋgel eché ewánlė páá eché ekóbpe ne ehōb eché échágkė aá, “Benléd ehoŋ páá, éladēn mechāŋ mé e’pum é’ mel á nzag éche edé á nkōŋsé, áyāle e’pum é’yágé.”

19 Dóo ene áŋgel étómté eche páá á nkōŋsé boŋ áladé ábē bad ábwēmē bó wεé Dyōb álúmtéé nĩmē meliŋgá mé ngĩne, ngāne bėladεé e’pum é’ mel boŋ bėbwēm á bwāl bé e’pum é mel.

20 Bėndyāŋ ábē e’pum é’ mel á bwāl ábe bėesē á dyad tē. Mekiú mēmbūl, mēbé e’che ásē dyām méta mehōg ne eped, méchāb-pe áte dyām mbwókél é máyl ébe.

15

Jōne anyiné áŋgel saámbé ne medim saámbé

1 Hē dōo nĩnyíné e’chemléd bėmpēe ádyōb ábe bėmbē ngĩne, bėnkōmēd me yāl áte. Menyín áŋgel saámbé éche éwánlė medim saámbé. Mmē medim móo mēdé medim mé asóg áyāle móo Dyōb dēbenlédte álúmed nĩmē meliŋgá ámād-te áte.

2 Dóo nĩnyíné chōm nées edīb é nkwé eche edé nées dyané, éche bėkúmténé ne muú. Menyín-ne nées bad bėtyéémé á nkāg mé eché chōm éche ebédé nées edīb é nkwé, bėwálé nĩlende nĩ Dyōb. Abé bad bėbėđéé bad ábe bėntōm ene nyam áte, ne éché ediđiŋge ne nōmbe e đĩn áde ene nyam e’só.

3 Bėkóné’áá nkāŋgé nĩme mbālede a Dyōb, Moseε, ne nĩme Mwān-a-Ndyōŋ nĩ mbód, bān,

“A-Sāŋ Dyōb á Ngum,
nĩmōŋ mbēltéd nĩde ngĩne nĩkómté-’ε mod yāl áte.

A kāŋ e meloŋ, * echōŋ nyaa etāŋgéné, edé-’ε mbále.

4 A-Sāŋ, nzé-módé éebāŋ wε?

Nzé-módé eebāgē wε edúbé?

Mmōŋpen-naá esáá.

Bad bé meloŋ bėsyāāl bėhyč wε edúbé abε.

Mmōŋ mbēltéd nĩme nĩtāŋgéné nĩbíde áwed.”

* 15:3 Donje á kálag dé’só áwóo: kāŋ e meloŋ; donje-’ε áwóo: kāŋ e bad bé Dyōb.

⁵ Ade nén átómé dǎo rĩnyíné néε bédĩbpé ebem é Dyöb á ndáb e Dyöb.

⁶ Dǎo ángel chē saámbé éche énwālē medim saámbé ébidé á ndáb e Dyöb-te wē. Bénhē mbóté échē esáá éche ekine' áte, bēwáá-'ε bengáá bé gól á tál tē.

⁷ Dǎo nyam póg áftínté nyam éniin, ébágé échē ángel kúmbe é gól saámbé, échē elóné ne melingá mé ngine mé Dyöb, mó awé adé abé ne abé.

⁸ Dǎo mwěntud mé ehúmé é Dyöb ne ngine e Dyöb bélóné á ndáb é Dyöb-te. Modmod-te ekēnhenlé asól á ebem tē wē kááŋ né medim saámbé nĩme échē ángel saámbé mēpédé á asóg.

16

Kúmbe saámbé é melingá mé ngine mé Dyöb

¹ Dǎo rĩwógé néε ehób éche échágkē ébidé á ndáb e Dyöb te wē, élanjē échē ángel saámbé aá, “Nyékag, nyésyög melingá mé ngine mé Dyöb nĩme médé á kúmbe saámbé te á nkǎnsé te.”

² Hē dǎo ángel e'só ékíi ene kúmbe e melingá mé ngine mé Dyöb asyög á nkǎnsé-te. Melóg nĩme médé ebébtéd, nĩme méwag bwámbwam mémbíd bad á yál. Abē bad bēbédéε bad ábe bēnwōŋ e'chem ábe ene nyam bēbē-'ε bad ábe bēbágé'áá échē ediidingε edúbé.

³ Dǎo ángel echē elónténé ébe esyógé ene kúmbe e melingá mé ngine á edib é nkwē te. Mēntĩm nēŋgáne mekií mé ndim ní mod. Chǎm-té éche ébédé á alongé á edib é nkwē-te wē énwē.

⁴ Dǎo ángel echē elónténé élaán esyógé melingá mé ngine nĩme mébédé áwē kúmbe', á e'dib ne á n'yélé tē. Abē e'dib bēntĩm mekií.

⁵ Dǎo rĩwógé ángel echē ekamlan mendib ehóbe' aá, “Mbakú e nkáásé echōŋ etǎŋgéné. Wε awé edé, awé ambé-'ε. Wε awé Esáá.”

⁶ Mbakú echōŋ etǎŋgéné áyāle bēnsyög mekií nĩme ábōŋ bad ne ábōŋ bekal-bé-e'daádǎŋ, né-ǎ ebagé bó mekií ámwé. Mmē nkǎgsen mó-aá bētǎŋgéné akud.

⁷ Dǎo rĩwógé néε ehób ébidé á menyán mé e'twé éhóbē nén aá, “A-Sǎŋ Dyöb á Ngum, mbakú echōŋ etǎŋgéné edé-'ε mbále.”

⁸ Dǎo ángel echē elónténé éniin esyógé melingá mé ngine nĩme mébédé áwē kúmbe-té á etondεε. Dyöb dēmbē Etondeε ngine áhyáad bad néε muú.

⁹ Bad bēnhyāŋ ne e'chode bé ekíde é' ngine. Héε bésyáá dĩn á Dyöb mó awé ákamlan nĩmē medim. Bōŋ bēnkēnhǎŋlénne mbeltéd mé mbéb átimen Dyöb ábe mó ehúmé.

¹⁰ Dǎo ángel echē elónténé étáan esyógé melingá mé ngine nĩme mébédé áwē kúmbe á atii dé nkamlen áde ene nyam echē ébidé á edib é nkwē-te. Hē dǎo nkamlen nĩme ene nyam rĩkwédé ehintén áte. Bad ábe bēhídé'áá ene nyam bēláádé'áá ábab e'chem áyāle e'wε ábe bēwógéε.

¹¹ Bēnsyāŋ Dyöb ámĩn áyāle mewε mé melóg nĩme bēwógé'áá. Bōŋ bēnkéntedéε nĩmáb mbeltéd mé mbéb átimen Dyöb.

¹² Dǎo ángel echē elónténé ntóob esyógé melingá mé ngine nĩme mébédé áwē kúmbe-té á edib é mbáámbáa é Yufretεε. Echē edib énlēn, ábōŋsen nzii ábel bōŋ kǎŋ échē ébidé wéε etondεε ábidéε éhēl átóm.

¹³ Dǎo rĩnyíné néε e'daádǎŋ bé mbéb é'laán ábe é'dé néε e'būd é'bídéε. Abē e'daádǎŋ, ehóg émbíd á nsal nĩme dragone, ehóg ébid á nsal nĩme nyam echē émbíd á edib é nkwē-te, échíní-'ε ébid á nsal nĩme nkal e'daádǎŋ a metóm.

¹⁴ Abē e'daádǎŋ é'díi e'daádǎŋ bé mbéb ábe é'bele menyáké, é'hyóme' nkǎnsé áte rĩsyāal, bētānē kǎŋ é bad, bēladé bó áte, ábel bēbōŋsen nzum e epun éche Dyöb á Ngum ákáádté bad.

15 Yesue ahóbé aá, “Nyénóné, mēpě á epun éche modmod éebíí’é, ngáne nchíb ápagké. Nnam ne ane awé adyεé epin, awálé-’ε eche mbóté áyāl ábel bon eékág nsób bon awóg akwágké á’só é’ bad.”

16 Abé e’ dǎǎdǎj bēnlǎd éché kǎj áte á hǎm áde béchǎgεé á ehób é Hibru bán Amagdǎn.

17 Dóo ángel eché elónténé saámbé ch’-ε ésyógé melinjá me ngine nĩme mēbédé áwē kúmbe-té á pemε-té. Ehób éche échágké émbíd á atii dé nkamlǎn á ndáb é Dyób te, éhǎbē nén aá, “Ebénlédé.”

18 Emwεdmwεd étómé’áá, dyób ákumé’ áte, ngin-ne étómé’. Ndǎǎb ennaǎjnéd ne ngine nyaa eché éébénlédéé ámpē taa moonyon abág á nkǎjśé. Ndǎǎb ennaǎjnéd ne ngine nyaa eché ebédé ebébtéd.

19 Hē dóo dyad á ngine ámbáá ákábne áte monje meláán, myad mémábáá nĩme mēbédé á melonj mésyāāl mémpāā. Dyób dēnkamtén ngine-e-dyad, Babilǎnε, ábēl-le aá bad ábe bédé áde dyad békud nkǎgśen adéhób aá mǎbēl bémwε mĩm nĩme nĩmē melinjá mé ngine.

20 Dyad ké ahéé áde mendíb mēnlǎjnédté démbǎo, mbǎǎd ésyāāl-le ényónj.

21 Meláá mé mbúú nĩme méde e’ del dyam móom mé kilo méniiin ne étáan, mēbíde’ áá ámĩn méhüntǎd baányonj ámĩn. Abé bad bénsyǎj Dyób áyāle abé e’ dim é’ meláá-mé-mbúú bēntǎmtǎn ebébtéd abé.

17

Jǎne anyĩné mmwaád awé adíté nyam

1 Dóo ángel póg áfinté éché ángel saámbé éche énwālē kúmbe saámbé épédé bonj élǎnjē me aá, “Hyǎg, nĩke nĩlúmed wε nkǎgśen nĩme akwalεε ámbáámbáa ákudté. Ane akwalεε adyεε’ dyad ámbáá áde áde bēnbēn ne e’ dīb é’ mbáá hĩin.

2 Mmwaád awé kǎj é melonj mé nkǎjśé ésyāāl énáǎnáádtáá. Bad bé nkǎjśé bémwágé’ áá mĩm nĩme ane mmwaád mékǎbē bó békábē-’ε mesón ne mó.”

3 Dóo Edǎǎdǎj é Dyób épíidé me, bonj ángel ékéεné me á ehyǎnge. Ahed dó-’áá nĩnyíné mmwaád nhóg. Ane mmwaád andii nyam eché eyǎge. Ene nyam enwónj mĩn nĩme mésyāā Dyób yāl ésyāāl. Ene nyam enwónj nĩó saámbé ne meséb dyóm.

4 Ane mmwaád anwáá mbóté eché eyǎge’, ndin eche kǎj éhǎgkē ne eché etómtǎnnáá ayǎg. Ankútén yāl ésyāāl ne bwēm é’ gól ne bǎn bé meláá mé etógnén ábē bēpεε áte ne bwēm bé etógnén bēmpēe. Anwálé kǎb e gól á ekáá éche elóné ne mekan mé nkólonjǎo ne mekan mé mbinde mé akáb dé mesón.

5 Dín ábédé mó á’só é’ mbǎm néε kun e e’ kǎjnéd áde mod énkémbíí’é, ábédé bán, “Babilǎn, Dyad á ngine. Nyaá á bekwalεε ne mekan mé mbéb á nkǎjśé te.”

6 Dóo nĩnyíné ane mmwaád, mekií mé bad bé Dyób ne mekií nĩme bad ábe bébele’ ngáne Yesue áhεdεé, mékǎbē mó néε mĩm.

Ade nĩnyíné mó, menyáké mé ngine ménkǎb me.

7 Dóo ene Angel ésdteé me aáken, “Cheé ékǎá bonj menyáké mékǎbē wε? Mēlǎā wε kun e mmwaád ne e nyam eché ádíidé, eché ewóó nĩó saámbé ne meséb dyóm.

8 Ene nyam eché wényinnē, ekébé á alonjé bonj eésaá á alonjé bǎǎb. Embíd á echóg eché éewóó asóg, áke wéε bēwūū’ é ch’ó. Bad ábe bédé á nkǎjśé, ábe Dyób déetelεé nĩmǎb mĩn á kǎlag eche ewóó mĩn nĩmē bad ábe békúde alonjé áde déemaá’ byánán áhǎg nkǎjśé, menyáké mékǎb bó. Yāl ékǎm bó áte ányin nyam eché embé á alonjé bonj eéśé á alonjé bonj étim abé alonjé ámpē.

⁹ Né dǎo debyéé ne nsǒn̄ten béhēdnadté. Mmē nló saámbé nime ene nyam éwóó rǐdii e'kone saámbé ábe ane mmwaád ándii' é am̄n, nǐbé-'é kǎn saámbé.

¹⁰ Afinté échē kǎn saámbé, étaan émáá awé, pǒg edii edé á nkamlen, eníní pǒg-ke eépédéé á nkamlen. Bon áde épéé, édyéé á esón é pǒndé.

¹¹ Ene nyam eché embé bon eésē bǎǎb, chǒ olónténé kǎn waam. Echē kǎn saámbé chǒó éwóó chǒ, ekag-ke wéé éwēé.

¹² Meséb dyóm nime ene nyam médii kǎn dyóm échē éékūdē nkamlen. Bon békūd ngine ákamlen néé kǎn nchoo ne ene nyam áyale háwa pǒg.

¹³ Ntii nhǒg mó échē kǎn dyóm éwóó, bébage-'é ene nyam echab ngine ne mímāb nkamlen.

¹⁴ Bēwǎn nzum ne Mwǎn-a-Ndyǒn mǐ mbód. Mwǎn-a-Ndyǒn mǐ mbód átōm bǒ áte á nzum. Nén débenléd áyale mó adé Sǎngwéé a baásyāāl, abé-'é kǎn e kǎn ésyāāl. Adé ne bad ábe Dyǒb áchénlé bon ápwēd-te, ábe bébenle mó ne nlém nhǒg."

¹⁵ Dǎo ene ángel élanǵéé me áá, "E'dib ábe ényiné wéé ane mmwaád-akwaleé ádyēé, é'dii bad, amute, melon ne mehǒb.

¹⁶ Meséb dyóm nime ényiné bǒǒbe ene nyam békǒó ane akwaleé. Békóbén mó chǒm ésyāāl eché áwóó, bēbēl abé nsǒb. Bédyē mó nyam, béhyāād-te mó á muú.

¹⁷ Bēbēl nē áyale Dyǒb áhédé bǒ nímē ntií á nlém-té, nime áhédéé áá bēbēl. Dyǒb átíidé nén áá échē nyam éwón ntií nhǒg, ábele mó néé mod nhǒg. Bēbē ene nyam echab ngine e nkamlen kǎn ne pǒndé eché e'yale ábe Dyǒb áhóbé bēlǒnnē.

¹⁸ Mmwaád awé ényiné adii dyad ámbáá áde ákamlan kǎn é nkǒjsé."

18

Jone anyiné ngáne Dyǒb ákǒgséné Babilǒne

¹ Ade nímén mekan métomé dǎo nnyiné néé ángel empée ébidé am̄n, eché éwóó nkamlen nǐ ngine, échē ehúmé épené' nkǒjsé áte n̄syāāl.

² Dǎo ákáné áte ne ehǒb échē échǒgké áá, "Akwedé, Babilǒne, ndale e dyad akwedé! Atimé dyad dé e'dǎǎǎn bē mbéb, abón dé e'dǎǎǎn ábe béésáá e'syāāl, ne abón dé menǎn nime méésáá * ne nímé bad békǒó.

³ Áyale bad bé melon mé nkǒjsé bésyāāl bēnwǒn esíí ábel mekan mé mbéb nime ábeléé byánán abagé bǒ mím nime mékóbé bǒ. Kǎn é nkǒjsé ékábné mó asón. Esíí é ngine ábel mekan mé mbéb échē-'é, ébélé bekáb bényonǵé bé nkǒjsé bésúdé nhǎn."

⁴ Dǎo n̄wǒgé ehǒb empée ébidé am̄n nén bán, "Abém bad, nyébid áde dyad áte, ábel nén nyéelatán bǒ ábel mbéb bon nyéékūdē akab dé nkǒgsen nime békudté.

⁵ Mbéb nime nkúmné mó á yǎl rǐde e'che se ádyǒb, Dyǒb-pe ákámtené nímē mekan mé mbéb nime ábélé.

⁶ Bēl mó melelem mé dyam nime mǎ-'é ábélé wé. Sábé mó ngen ébe áyale mekan mé mbéb nime ábélé. Hǎgé mó mím ngen ébe á kǒb eché áhǒgké wé ébe mó.

⁷ Ewǒgēd mó ndutul ne metake nime médé ngen ébe ne nhǎgtéd mé ehúmé ne esíí é ngine ábel mekan mé mbéb échē ábágé yǎl.

Áhǒbe' áwe nlém-té áá,
'Ndyéé néé ndale e mmwaád, meésáá nkúd, méelēb-paá mbéd.'

* 18:2 Mbéndé é bad bé Israel elúmté'áá nén bán donǵe dé menǎn ne donǵe á nyam déésáá'é, né-ǎ bédyáge'áá ábén bwēm.

8 Né-óó, medim méšyāāl mépiū mós epun ehóg.

Mmé medim médii: Nkole, achii dé awé ne nzaa.

Béhyāād mós ne muú, áyāle Sānj Dyóbe, mós awé ákáād mós, awóó ngine.”

9 Kān é nkōšsé éche ékábnáá mós mesón, bélatán-ne mós ne esíí é ngine ábeł mekan mé mbēb, béchiū bélēb-pe pónde eché bényīnnē mwēntud nímbide’ áde áhyāá’é.

10 Bétyēem nchabnede áyāle béwóge mbwóg bán bōmpē békūd metake níme ákúde. Bébōnē bán, “Etyāg, etyāg ne ndāle e dyad, a ngine e dyad á Babilōn, á etūn é háwa póg ngēn dōó ékúde nkógsen nēn-ē?”

11 Bekáb bé nyongé bé nkōšsé-’é béchyéé’, bélebe-’é mós áyāle modmod éechanéé ábab bwēm ámpē.

12 Bwēm é’ nyongé bē é’bédeé bwēm é’ gól, sílva, bán bé meláá ábe békine áte ne bán bé meláá bé etógnén. Ábē bwēm é’béde káōne mebad níme melélé nkun, ahóg áde béchāgeé línēn, démpēe bán Sílíke, ne mémpēe níme méyāge’, ndín éche kān ehágke ne níme métómtan ayāg. Ábē bwēm é’béde mebábme níme mébidé áyāl e mel mé e’lod é’ bwām ne bwēm ábe bépóde ábe é’léle nkun bwāmbwam. Ábē bwēm é’béde káōne bwēm ábe bébēnlé meson mé nzyog ne e’kii, brōns ne meláá níme mékine áte níme béchāgeé mábel.

13 Bēnwōj káōne bwēm nēngāne sinamōn, bwēm bé elod é bwām, e’twé, mía, frankinsen, mīm, dyōg dé menzab, kase é mbumé ní ngun ne ngun éche béchāgeé bán wīt. Bésómé’áá káōne nyag ne mbód, hōse ne e’bambam, ne betān ne bad ábe békóbe.

14 Bekáb bé nyongé béhōbē’áá áwē nēn bán, “Bwēm é’ bwām é’syāāl ábe nyénwōngē esíí áyāl, béesaá ne nyé ámpē. Ebóó bwēm é’ bwām é’syāāl ne bwēm bé elōon, wéekūd-taá bó ámpē.”

15 Bekáb bé nyongé ábe béwóó ábēn bwēm bésúde nhōn ne ábe bwēm. Bétyēem nchabnede áyāle béwóge mbwóg bán bōmpē békūd metake níme ákúde, béchyéé’ bélebe-’é.

16 Bébōnē bán, “Etyāg, etyāg, á ndāle e dyad, wē awé ewáá’áá mbóté é bwām éche bébānnéde kase e abad eche béchāgeé bán línēn, éwāā-’é áde áyāge ne áde átómtan ayāg. We awé ehágáá bwēm é’ gól, ábe bébēnlé bán bé meláá mé etógnén ábe békine áte ne bán bé meláá bēmpēe ábe béléle nkun ábe béchāgeé bán pēel,

17 á etūn é háwa póg ngēn mīmē nhōn nísyāāl níbóó.”

Bad bēmbáá bé stíma ne bad ábe békag ne stíma, bad ábe bébele nsón á stíma té, bad ábe békábe nyongé á edib é nkwe té, béntyēem nchabnede,

18 anyín áde bényīnnē mwēntud níbide’ áde béhyāntēé mós. Bēnlēbē e’saād bán, “Ndāle e dyad ké póg eébédeé nēngāne enén!”

19 Dōó béšyōgeé e’bumbú áwab nló áyāle béchyéé’áá’, bélebe-’é, béhōbē bán, “Etyāg, etyāg, ne ndāle e dyad, eché bewōj bé stíma bésúde nhōn ne ábe bwēm. Á etūn é háwa póg ngēn abóde chōm ésyāāl.

20 “Bwēl-amīne asyāāl áwōg menyīnge áyāle nkógsen níme ane mmwāád ákúde. Á-bad bé Dyōb, bewapēe bé nlómag ne bekal-bé-e’daādān, nyéwōg menyīnge áyāle Dyōb ábíditéde nyé mbakú tājgene mó.”

21 Dōó ángel e ngine ényéné nyé ndim e aláá abwém-me dós á edib é nkwe té, áhōbē áá, “Nēn dōó bébwēmē ndāle e dyad embáá, Babilōne, ásē ne ewānge ésyāāl, bad béenyín-naá dós ámpē mbēb.

22 Ene pónde ntōgag níme bechōg bé nílende, ne bekón bé nkāngé, ntōgag níme betōn bé ngombé ne betōn bé e’lon méewógnédté áwōj dyad-tē ámpē. Bad bé nsón mé mekáá ábē béebáá ámpē, ntōgag ní mesín níme mékage’ bwēm méewógnédté ámpē.

²³ Awōn dyad tē, etrukān ēepennē ampē mbēd, ehōb é sōmbé bō nchóm ēewōgnédte ampē mbēd. Adē dyad bēbēbēd dō āyāle ābē bekāb bē nyongé bō bēbédé ndāle é bad á nkōnsé, bad bē melon mé nkōnsé mēsýāāl-ē bēndognéd āyāl ē echōn nḡan.”

²⁴ Dyōb akōgsné Babilōne āyāle bad bē Babilōn bēwúu bekal-bé-e'dāōdān, ne bad bēmpēe ābe bēwédé á nkōnsé.

19

¹ Ade ene Angel émáá nīmén mekan mēsýāāl ahōb, dōo ríwógé chōm nēḡgāne ehōb éche échāgkē é ndun e mod ébídé ámín, bēbōnē bán “Mekenag mébē ne Dyōb. E'soōson, ehúmē ne ḡnīne bēhúu ne ádeD Dyōb.

² Echē mbakú edé mbāle etāḡgné-’ē āyāle akāádté akwalēe ambáá awē abēlté bad bē nkōnsé bēsýāāl mbēb ne áde akāb dé mesón, akuné-’ē mekií nĩme ābē bembālede nĩme ane mmwāád ānsyōgkē.”

³ Dōo bēbóné ampē bán, “Mekenag mébē ne Dyōb. Mwēntud nĩme nĩbídé’ ḡgāne ene ndāle e dyad éhyāa’ é ríkag ámín á ḡngídé ne á ḡngídé.”

⁴ Abē bad bēmbáá móom mébē ne bēniin ne échē nyam éniin bēnkwē áse á’só é’ Dyōb bēbage-’ē mó edúbé, mó awē adiídé atii dé nkamlēn, bēhōbē nēn bán, “Ebē nē! Mekenag mébē ne Dyōb.”

Jōne anyiné ḡgānde e e’wōḡgé e Mwān-a-Ndyōn ní mbód

⁵ Dōo ríwógé ehōb ébídé á atii dé nkamlēn, ehōbē’ nēn aá, “Nyékene’ ádeD Dyōb. Nyé ābe nyédé ābē bembālede, nyé ābe nyēbage mó edúbé, ken bad ābe bédé etōḡgnēn-ē ké’ē ābe bēesē etōḡgnēn.”

⁶ Dōo ríwógé chōm nēḡgāne esaád é ḡnīne é ndun e mod, ébédé byánán mendīb nĩme mēsōbpe’, ébédé ampē nēē dyōb ákumé’ áte ne ḡnīne. Echē esaád ehōbē nēn, “Mekenag mébē ne Dyōb. Ayāle awēd Sāḡgwēé, Dyōb á Nḡum adé á nkamlēn.

⁷ Syánē déwōge’ menyinḡe bwāmbwam, déhōbe bán dedé menyinḡe dékené-’ē mó, āyāle pōndé e e’wōḡgé eche Mwān-a-Ndyōn ní mbód epedé, sōmbé-’ē emáá abōḡsen.

⁸ Ayāle akwōgnédé, Dyōb abágé mó kunze áhé mbóté eche bēbāḡnédé kase e abad áde bēchāgeé bán línēn. Apene’ áte ásáá-’ē.” Ene kase e mbóté édé nēḡgāne mekan nĩme bad bē Dyōb bēbeleé nĩme Dyōb áhedeé.

⁹ Dōo ene ángel élanḡgeé me aá, “Tēl nēn we, Nnam ne ābē ābe bélébpé á ḡgānde e e’wōḡgé eche Mwān-a-Ndyōn ní mbód.” Anhōb áwēm ampē aláá-’ē me ampē aá, “Abēn e’yale é’ mbāle é’húu ne Dyōb.”

¹⁰ Dōo ríkwedé áse áwe e’só ābe mó edúbé. Anláá me aá, “Weébēlē nē, mémpē ndii mbālede á Dyōb nēē we, mbē nēē bad bēmpēe ābe bēdúbpe Křistā, mbē-’ē nēē nhōḡ awē atyéémé āyāl e mbāle eche Yesue āyāgté. Dyōb dōo nyétāḡgné edúbé abe. Ene mbāle eche Yesue ábíté áwēd, chōo ebage bad ḡnīne ákal nkalan ní Dyōb.”

Mod awē adiídé hōse eche épube’ atómé nyam echē ebídé á edīb é nkwē-te áte á nzum

¹¹ Menyín meé ádyōb ánédnédé. Héē rínóné boḡ rínynīnē’ hōse echē épube’, mod awē mó-’ē andii chō bēchāgé’áá mó bán Ane Awē Adé mbāle ábēlé-’ē bad ábii mbāle tāḡḡene Dyōb. Akōgsan bad nyaa echē etāḡgné áwanné-’ē ābē bad bē ekoyí.

¹² Míd mēbedé mó áte néε muú nime ríchodne', anhé-'ε e'kóté bé nkamlen híin á nló. Anwón dīn á yāl áde modmod éebíi' é éetómεε mwēn.

¹³ Anwáá-'ε megombe nime béchubé á meki-te, dīn áde béchagεε-'ε mó ádíí Eyale é Dyōb.

¹⁴ Sánze éche edé ádyōb énhē kase é mbóté éche bébannéde abad áde béchagεε bán līnen, épūbe' ésan-'ε. Bēndii hōse éche épūbe' béhīde mó.

¹⁵ Páá echē ekóppe' bwāmbwam embíd mó á nsal-tē. Cháo ábenleε ákōgsen bad bé melon. Akamlén-ne bó ne ekáá éche éhyédé. Akogtéd bwāl bé e'pum áte ábel ámīn besabé ábe bébenleε mīm, álúmed nímē melingá mé ngīne mé ébēbtéd nime Dyōb á ngumε.

¹⁶ Dīn áde áwē mengombe ne áwē epān mīn nēn bán, "Kān e kān ésyāal ne Sāngwéε á besāngwéε bésyāal."

¹⁷ Dóo nīnyīné ángel etyéémé á enyen-tē bon ábōnnē menon nime mēpūmmé'áá ádyōb ne ehōb éche échágkε áá "Nyéhyag nyéladen áyāle sánkalaa á ngande echē Dyōb débonšénné.

¹⁸ Nyéhyag nyédyē nyam é kān, nyam é sánze émbáá, nyam é ndale é bad, nyam é hōse ne nyam é bad ábe bédíídé chó. Nyéhyag nyédyē nyam é baányonj bésyāal, é kunze ne é betān, bad ábe bédé etógnēn ké'ε ábe béesé etógnēn."

¹⁹ Dóo nīnyīné nyam ne kān é bad é nkōjsé ne échab sánze éladné áwan nzum ne ane awé ansébé ape ádíí hōse echē épūbe' ne éche sánze.

²⁰ Dóo békóbé ene nyam ne nkal é'daádān a metóm. Ane nkal é'daádān a metóm ambé chó á'sō-te, álūmtē e'chemléd ádog bad ábe békúdé e'chem ábe ene nyam, bébagé-'ε échē edíidīngε edúbé. Ade bédíí á alongé, bēmbwēm bó bad bébe á edib é nzab é muú, bēnhyān ne muú nime rīhunne' bwāmbwam.

²¹ Ane awé adíídé hōse ambēnléd páá e echē embíd mó á nsal tē awúú bad ábe bélyágé ásē, échē kān ne échab sánze. Menon mēsýāal ménkōd áde bédýédé échāb nyam.

20

Devāle ábē á mehanj á etūn é ekálé é mwē

¹ Ade ane mod átómé ábē bad bé ekoyí áte, dóo nīnyīné néε ángel ébídεé ádyōb ésudé ásē awalé e'kii bé echóg échē éewóo asóg, ewalé-'ε sánkalaa á ngóbēngōbē awē adelé.

² Dóo ákóbé dragone, ene nyō e'boōd echē edé Devāle, ebé-'ε Satane, áhanj mó á etūn é ekálé é mwē.

³ Ambwém mó á echóg échē éewóo asóg ádíb, ápēn-ne chó ábel bon eéhēlē bad bé nkōjsé adog ámpē káāne á pōndé echē ekálé é mwē émaá'ε áte. Ambíd enē bēnhúd mó á mehanj á esónj é pōndé.

⁴ Dóo nīnyīné metii mé nkamlen, bad ábe Dyōb dēmbεé kunze ákamlen, bóo bēndyεé áhed. Mennýin-ne e'daádān é' bad ábe bēnwē. Bēnwū bó áyāle mbōnj echē bēbídé'áá Yesue ne áyāle akal áde békálé'áá nkalanj nime rīhúú ne Dyōb. Bēnwū bó áyāle béebage-'aa ene nyam edúbé ké'ε échē edíidīngε ne áyāle akob áde bēnkēnkobpé e'chem á mbōm ké'ε á ekáá. Bēfīm ámbíd á alongé, bóobε Yesu Krístā bēbé á nkamlen á etūn é ekálé é mwē.

⁵ Nēn dóo débē mpuu mé e'só. Bad ábe bēnlyág ásē ábe bēnwē bēnkēntimmé ámbíd á alongé káāne ámbíd e ekálé é mwē.

⁶ Nnam mībē ne ábē ábe bēbé mpuu mé'só áte. Bédii bad ábe bésáá. Kwééd echē edé kwééd e edaádān éewōnjé ngīne ámīn e bad ábe bédé mpuu mé'só áte. Bonj bēbē prisε é Dyōb ne échē Krístā bēbé-'ε á nkamlen ne mó á etūn é ekálé é mwē.

Jone anyiné Satane akwedé nzum

⁷ Ade échê ekálé é mwě épeé á asóg, béhūd Satane á mbwog.

⁸ Abíd áde abídté á mbwog, áke metóngé mé nkòñsé méniin, ádög bad bé nkòñsé. Mmén metóngé mé nkòñsé médií Góg, ne Mágog. Satane álad bó áwan nzum, bébuú-é áte n'èngáne nsíí n'ime rídé á edib é nkwě.

⁹ Dóo békíí nkòñsé áte n'syāā, bélañéd abwóg á hóm áde Dyöb ádáá, wée ábē bad bédíí, bon muú mémbíđ ámín n'hyāāđ bó baasyāā bam.

¹⁰ Devāle awě andog bó, bémbwēm mós á edib é nzab é muú n'ime n'hunne' bwāmbwam, wée ene nyam ne nkal é'dāádāñ a metóm bédíí. Ahed dóo békudté metake mé ngíne nkuu ne m'ute á ngíndé ne á ngíndé.

Dyöb akáádté bad á asóg dé nkòñsé

¹¹ Dóo n'nyiné mod adíídé atii dé nkamlen ámbáá áde ápúbe'. Ahed-taá nkòñsé ne abobe ámín b'ennyōñ' é awe e'so-te béetime abé ámpē.

¹² Héé n'nyiné bad ábe bémáá awé, bad ábe bédé etógnén ne ábe béésē etógnén, b'etyéémé á'so bé áde atii dé nkamlen. Kálag éche Dyöb d'entenlé nímāb mbeltéd áte, b'endibé chó áte, b'endibé-'e empée áte. Ene chó enwōñ m'ín mé bad ábe b'ebē abé ne abé ne Dyöb. Dyöb d'ekāāđ bad ábe b'ewédé, nchoo ne mbeltéd nímāb ngáne éténlédé á kálag-té wē.

¹³ Bad ábe b'ewédé á edib é nkwě-te b'enkē wée Dyöb ábel b'ekāāđ bó. Abíníí bad-te ábe b'ewédé ábe b'edé á mbwog e kwééd, b'ómpē b'etyéém á'so é' Dyöb ábel b'ekāāđ bó nchoo ne nímāb mbeltéd.

¹⁴ B'embwēm Kwééd ne Mbwóg e kwééd á edib é nzab é muú. Enén kwééd e edib é nzab chó edé kwééd e edāādāñ.

¹⁵ Kénz'éé awě b'enk'entenlé d'ín á kálag e alongé, bémbwēm mós á edib é nzab é muú.

21*Jone anyiné nkòñsé ne nkoñ ní m'ín mé ekóólé*

¹ Ade nkáásé rítómé, dóo n'nyiné nkoñ ní m'ín mékōāāle ne nkòñsé mé ekóólé. Nkoñ ní m'ín ne n'sé mé'so b'ennyōñ, edib é nkwě-'e énk'embáá ámpē.

² Héé n'nyiné Dyad áde Asáá, Jerusalem e ekóólé, ahúé', ábidéé ámín wée Dyöb. Dyöb d'embon'sén mós ngáne bebaād b'ebon'sanné s'ombé eché ekag á e'wóngé.

³ Dóo n'wógé ehób éche échágkē ébidé á atii dé nkamlen éhōbē n'én áá, "Nyénōne', e d'ii é' Dyöb é'dé ne baányon bōob! Dyöb d'edyéé hóm ahóg ne bó, bō-'e b'ebé ábē bad. Dyöb d'edyéé hóm ahóg ne bó.

⁴ Apínē bó m'ésōđ m'esyāā á m'íd. Kwééd éebáá ámpē, bad b'eelebpé ámpē, b'echií-'áá ámpē, b'ewóg-kaá e'wē ámpē. Ebē n'én áyāle mam mé nchun m'etómé."

⁵ Dóo ane awě adíídé atii dé nkamlen áhōbēé áá, "Nyénōne', m'bele' bwēm é'syāā ekóólé!" Anhób ámpē aláá-'e me áá, "T'él n'én, áyāle e'yale ábe n'hōbēé é'dé mbále é'dé-'e ábe moosyāāl ádūbēē."

⁶ Anhób ámpē aláá-'e me áá, "Emáá. Me-éé ndé Alfaa mbé-'e Omégaa, me-éé ndé mbooted mbé-'e asóg. Kénz'éé awě p'íd ékóbé, m'ēbe mós mendib mé nhyélé n'ime mod ámwākē bon abé á alongé abé ne abé. M'ēbē-'e nyé mós ngēn.

⁷ Mod awě ätóm metake áte, adúbe áde ádūbpé me, m'ēbe mós ábén bwēm é'syāā. M'ēbē áde Dyöb mós-'e abé awem mwān.

⁸ Bon ne bad ábe b'ewós mbwóg áte, ábe b'ewóó adúbe, ábe b'ebēle' mbindé é mekan, bad bé ewūen, bekáb bé mesón, bekum bé ngan, bad ábe b'ebenle' myöb mé metóm ne bekal bé metóm b'esyāā, ádab abwóg á hóm ádii

edib é nzab é muú nímé níhunne' bwâmbwam. Enén kwééd chó edé kwééd e edaáðan."

Jone anyine Jerusalem a ekóólé

⁹ Dóo ángel póg átínté e ángel saámbé éche énwālē kúmbe saámbé éche éloné ne medim saámbé épédé boj élanḡē me aá, "Hyág, melúmēd we sómbé, mmwaád awē Mwān-a-Ndyon ní mbód."

¹⁰ Dóo Edaáðan éche Esáá epíídé me boj ene ángel ékēené me á mbóod mín echē echabé ámín bwâmbwam. Ambané me áwedé-mín alúméd me Jerusalem, dyad áde ásáá, ngáne ábídeé ámín wēe Dyóð,

¹¹ ápené-'é ne ehúmé é Dyóð. Adē dyad ákínáá áte née aláá dé etógnén áde álélé akud, ákíné áte née jáspa ánylínne-'é áte.

¹² Adé dyad dénwōn sánkalaa a e'ké ábe é'chábé ámín. Bénwōn nsəl mé e'ké dyóm ne mébe, ne ángel dyóm ne ébe éche éñone nímé nsəl mé e'ké nisyāā. Ayā e nímé nsəl mé e'ké, bēntēl mín mé metúmbé dyóm ne mébe mé bad bé Israel.

¹³ Abé e'ké bénwōn ped éniin. Ped e á akuu enwōn mmwe mé e'ké rílaán, á mekunekune mmwe nílaán, á mehúléhulé mmwe rílaán á ped e mbəñ rílaán.

¹⁴ E'ké ábe bēnləñnéd adē dyad bēnsuḡmín ámín e meláá dyóm ne mébe. Ámín e nímé meláá, bēntēl mín nime bembapēe bé nlomag dyóm ne bébe ábe Mwān-a-Ndyon ní mbód.

¹⁵ Ángel echē élanḡé'áá me nímén mekan, enwálé ntón í gól nime áhəgné'áá adē dyad, nímé nsəl mé e'ké ne ábē e'ké é' dyad.

¹⁶ Adé dyad dénwōn metóḡgé méniin, e'chab áte ne e'kal áte é'bédé nyaa póg. Ene ángel embēnléd nímé ntón áhəg adē dyad. Abédé ekálé é máyl ehóg ne mbwókel étáan. A e'chab áte, e'kal áte ne e'chab ámín bēbédéé nyaa póg.

¹⁷ Ene ángel anhəg káəñne e'che bé e'ké, é'bédé móom mé méta ntóob ne ntóob. Ambēnléd nhəgtéd nímé bad bésyāā bēbenladté.

¹⁸ Bēmbēnléd jáspa álón ábē e'ké. Bēmbēnléd gól echē eēsē mbinde áte, éche epene áte née dyené álón adē dyad.

¹⁹ Meláá nime bēnsuḡmēé ábē e'ké ámín, mébédé bán bé meláá ábe bélélé nkun nyaa ne nyaa. Aláá dé nsumé dé e'só, ábédéé jáspa, áde álónténé mébe, ábédéé safia, áde álónténé meláán áget, áde álónténé méniin émeral,

²⁰ áde álónténé métaán, ónis, áde álónténé ntóob kanélia, áde álónténé saámbé krisolit, áde álónténé waam béril, áde álónténé abog topas, áde álónténé dyóm kaladóni, áde álónténé dyóm ne ahóg hyasín, áde álónténé dyóm ne mébe amētís.

²¹ Mmén mmwe dyóm ne nibe níbédéé meláá mé etógnén, mmwe nhóg téé níbédéé aláá dé etógnén ahóg. Nzii eche empōñ á dyad tē ebédéé gól echē eēsē mbinde áte echē epene' áte.

²² A dyad-tē wē, menkēnyinné ndáb e Dyóð áyāle Sán Dyóð é Ngume ne Mwān-a-Ndyon ní mbód, bédii née ndáb e Dyóð.

²³ Adé dyad déehədnéé bán áwōñ enyēn ké'ē ngōn áwēd-te áyāle ehúmé é Dyóð édií ábe e'nyínēn bé ekíde, Mwān-a-Ndyon ní mbód-te ápenē' née éche etrukán.

²⁴ Bad bé nkōñsé bésyāā bēbenléd ábe e'nyínēn bé ekíde ábel nímab mam nime bétəñḡéné ábel epun ké éhéé. Kəñ é nkōñsé épeén nímab nhon á dyad-tē wē.

²⁵ Mmē mmwe mé e'ké dyóm ne nibe béepenné mó mbéd, áyāle nkuu méebáá áwēd-te mbéd.

²⁶ Bépēén bwēm é' bwām ne nhon ní bwēm é' bad bé nkōñsé áwēd-te.

²⁷ Dyam á mbinde ké ahóg, ké'ε mod awě abele' e'bébtéd é' mekan, ké'ε mod awě akale metóm ké nhóg éesónlé á dyad-tê wê. Bad ábe m'ın médíí á kálag e alongé eche Mwān-a-Ndyōŋ ní mbód bēnpēn bōo bēsōl áwēd-te.

22

*Jōne anyíné edib éche ébage
alongé á ngíndé ne á ngíndé*

¹ Dōo ene ángel élúmtéé me edib é mendíb nĩme mēbele boŋ mod abé á alongé á ngíndé ne á ngíndé, ényínnē áte nēŋgáne dyεné. Echē edib ébidé'áá á atii dé nkamlēn áde Dyōb ne Mwān-a-Ndyōŋ ní mbód,

² époó' áftínté e nzii á dyad-tê. A nkin mé échē edib, pēd ébe, nyaa e bwel póg eche echyáá' e'pum ábe é'bele boŋ mod abé á alongé abé ne abé ebédé áhed. Mmē mel méchyáá'áá e'pum nyaa dyōm ne ébe, méchyáá'áá ngōn té. Bad bé nkōŋsé bēbēnládtáá ábab byáá ákud e'choóchoŋ.

³ Chōmchōm éche Dyōb ábágé ebómán éebáá á dyad-tê wê. Atii dé nkamlēn áde Dyōb ne Mwān-a-Ndyōŋ ní mbód mēbédé áwēd-te, bembāledē bé Dyōb-pe bēbágé mó edúbé.

⁴ Bényín Dyōb e'só ne e'só, áde đín-ne démbē bós á mesó mé mbōm.

⁵ Nkuu méebáá ámpē, bēehđ-taá etrukán káa enyēn ányínēn ekíde áyāle Sāŋ Dyōbe ábē ábab e'nyínēn bé ekíde, bēbē-ε á nkamlēn á ngíndé né á ngíndé.

Jōne anyine epe éche Yesue

⁶ Dōo ene ángel élanğéé me áá, "Abén e'yale ábe n'langé nyé é'dé mbále, né-ó nyédúbe bós. Sāŋ Dyōbe awě abage bekal bé'dáóđāŋ échē edáóđāŋ ábel boŋ békale nĩmē nkalaŋ, álómé eche ángel álúmed ábē bembāledē mam nĩme mékwógé abenled."

⁷ Dōo Yesue áhóbēé áá, "Nyénōne', nkwógé ape. Nnam ne bad ábe bēhíde' mekan nĩme bétélé á kálag-tê wēn nĩme mēbenléd bōob ne á pónde échē ehúe' á'só."

⁸ Me, Jōne nwógé nnyín-ne nĩmēn mekan. Ade n'wógé nĩmēn mekan nnyín-ne mó, menkwē áse á'só é ángel echē enlúmed me nĩmēn mekan, ábe mó edúbé.

⁹ Boŋ anláá me áá, "Weébēlē nē! Mēmpē ndii mbāledē a Dyōb néε we, ne néε ábíníí baányōŋ bé Krísto ábe bédé bekal bé'dáóđāŋ ne bad ábe bēhíde' chōm éche éténlédé á kálag-tê wēn. Dyōb dōo nyétāŋğéné edúbé abe."

¹⁰ Dōo álāŋğéé me ámpē áá, "Nyéékōŋnād bad mekan nĩme mēbenléd nĩme méténlédé á kálag-tê wē áyāle mékwógé abenled.

¹¹ Bad ábe bēbele mbéb bēbē bēbele' mbéb. Abe bēbele mekan mé mbinde bēbē bēbele' mekan mé mbinde. Abe bēbele mekan nĩme métāŋğéné bēbē bēbele' mekan nĩme métāŋğéné, ábe bós-ε bēsáá bēbē bēsāŋ."

¹² Dōo Yesue áhóbēé áá, "Nyénōne', nkwógé ape, ásábe mod-té nchoo ne nsón nĩme ábélé.

¹³ Me-εé ndé Alfaa mbé-'ε Omégaa, awě Asébpé ne awě Adĩmténé, mbé-'ε Mbooted ne Asóg."

¹⁴ Nnam nĩbē ne ábē ábe bēwóbpé nĩmāb megombe, bēwōŋ kunze ápoŋ á mmwe mé e'ké ásol á dyad-tê ábel bēdyē e'pum é' bwel ábe é'bele mod abé á alongé abé ne abé.

¹⁵ Bad ábe bēsól á dyad-tê wē, bédíí bad ábe bēbélé mekan mé mbinde, bad ábe békume nğāŋ, bad ábe békábe' mesón, bad ábe bēwúe bad, bad ábe bēbenle myōb mé metóm ne bad ábe bédásó akal dé metóm ne ábe békale metóm.

¹⁶ Me Yesue, me-éé nlómé echem ángel áláa nyé ábe nyêdé á mwembé-te nímén mekan. Ndii ane awě abídé á mbyaa níme kâη Dabide, tintine a mbwεmbwε awě apene’.

¹⁷ Edăădăη é Dyôb ne Sômbé behôbe nén bán, “Hyăg.” Kénzée awě awógé nén, mômpe áhôb aá, “Hyăg.” Ane awě pid êkóbé áhyε ámwê mendib nímé mébele boη bad bébe á alongé á ngíndé ne á ngíndé. Mod ké ahée awě ahede’ nímén mendib âtêd mó ngen.

Jne ahôbé ehôb é asóg

¹⁸ Nsíme mod ké ahée etúu áte awě awógé e’yale ábe é’ténlédé á kálag tê wén tâηgene mekan níme mébenléd. Nzé mod abádé kéchéé á kálag tê wén, né Dyôb débādē mó medim níme bétélé á kálag tê wén.

¹⁹ Mod ké ahée-’ε awě áhūd ké eyale ámín e mekan níme méténlédé á kálag tê wén tâηgene mekan níme mébenléd, Dyôb déhūd áde asii dé e’pum é’ mēl é’ bwel ábe é’bele boη mod abé á alongé á ngíndé ne á ngíndé. Dyôb déhūd-te éche etál á Dyad áde Ásáá. Mmén mekan méténlédé á kálag tê wén.

²⁰ Ane awě abíde mbóη tâηgene nímén mekan mésyāēl ahôbe nén aá, “Ne mbále, nkwogé apε.” Ebê nê, hyăg a-Sâηgú Yesu.

²¹ Nsimé níme Sâηgú Yesue mbê ne bad bésyāēl.*

* **22:21** *Bad bésyāēl*; donje á kálag dé’só áwóó *Bad bé Dyôb* káa *Bad bé Dyôb bésyāēl*.